


Bëngbe Bëtsa
Cabëngaftaca
Entsoyebuambna



New Testament in Camsá

**Bëngbe Bëtsa Cabëngaftaca Entsoyebuambna
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files dated 29 Jan 2022
19104c0e-9046-5ff3-82fb-eb838c88dcf9

Contents

San Mateo	1
San Marcos	68
San Lucas	108
San Juan	176
Hechos	227
Romanos	290
1 Corintios	325
2 Corintios	358
Gálatas	380
Efesios	393
Filipenses	405
Colosenses	413
1 Tesalonicenses	421
2 Tesalonicenses	428
1 Timoteo	432
2 Timoteo	442
Tito	449
Filemón	453
Hebreos	455
Santiago	483
1 San Pedro	491
2 San Pedro	501
1 San Juan	507
2 San Juan	515
3 San Juan	516
San Judas	518
Apocalipsis	521

San Mateo

Jesusbe bēts taitanga

(Lc 3.23-38)

¹ Quemēnga imnamna Jesucristbe bēts taitanga: Jesucristna Rey David y Abrahám bentsana entsá inamna.

²⁻⁶ Abraham yojamna Isaacbe taitá;

Isaacna Jacobēbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitēnga tmojánishēche y choca imo-janētámena ora, Josías chë básenga yojánabamna.

¹²⁻¹⁶ Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadochbe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobēbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bēngbe Bētsabe Uámana Uabuayaná, chë Cristo ca uabainá.

17 Chcasna, Abrahámbentsana Davidbentscoñe bnétsana canta bēts pamíllanga imojéftsemna. Davídbentsana y chē israelitēnga Babilonioca imojanētamenēntscuana inye bnétsana canta bēts pamíllanga; y inye bnétsana canta bēts pamíllanga chē Israeloca entsanga imojanētamenentsana, chē Cristo tojanonýnántscóñe.

Jesucristo tojanonýná

(Lc 2.1-7)

18 Jesucristo jónýnanamna mēntśá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomamaná yojoquéda chē Uámana Espíritbe obenánaca.

19 José, Mariybe boyá, canye nyetsca soyēnguiñe tśabá jamama bośá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytēcana Mariybentsana jtsojuánañana. 20 Y chca yojtsejuabnantscuana, mo otjenayoquécá canye Bēngbe Bētsabe ángel tbojáninye y chana Josébioye tbojaniyana: “José, Davídbentsana entśá, ndoñe matenócochinýenana Mariáftaca jobouamayama, er chē bochántsebmna šešona chē Uámana Espíritbe obenánaca cha bochántsebmna. 21 María canye šešona bochántsebmna y cha Jesús ca cochjuabaye. Chca echantsabaina er cha chabe entsanga chēngbe bacna soyēnguentśana echanjátsebacaye ca” —chē ángel tbojaniyana.

22 Lempe chca tojanochñengo, cachcá chaotsemnama ntśamo Bēngbe Bētsá chabe juabna oyebuambnayēngbiajana tojanayancá. Chē oyebuambnayá mēntśá tojánayana:

23 Chē cabá boyabása nduabuatmá ngomamaná echanjoquéda y canye šešona boyabásetema bochántsebmna, y cha mochanjuabaye Emanuel ca.

(Emanuel endayana “Bēngbe Bētsá bēngaftaca ca”.)

24 José chē otjénayentsana tojanofšená ora, tojanma ntśamo chē Bēngbe Bētsabe ángel tbojanmandacá y Mariáftaca tojanobouamá. 25 Pero ndoñe cánýiñe ibontsaniyena, sinó nye chē šešonatema tojanonýná orscana. Chē šešonatema tojanonýná orna, José chábioye Jesús ca tbojanabaye.

2

Reyes Magos Jesúsbioye tmojána

1 Herodes judiēngbe rey yojamna ora, canye pueblo Judeoca, Belén ca uabáinentse Jesús tojanonýná. Chentśana, báseftanga, estrellēnga uatsjēndayēnga, magos ca uabáinēnga, canye bēts pueblōye Jerusalén ca uabáinoye tmojánashjajna. Chēnga tmojánabo shinýe bocanoye luarēngocana.

2 Jerusalenocna chēnga, Heródesbioye tmojána y tmojanēnoticiá: “¿Ndayentse yojtsemna chē judiēngbe rey jtsemnama tojonýná cha ca? Bēngbe luarēngoca shinýe bocanoye chabe onýnana estrella fsēnjinye y as muentse cha jaboadorama tifjabo ca.”

3 Rey Herodes chca tojanuena ora, corente yojtsenócochinýena, y nyetsca chē Jerusalenentse oyenēngnaca. 4 Chentśana chē rey tojánachembo nyetsca chē judiēngbe bachnangbe amēndayēnga y chē judiēngbe ley abuátambayēnga jenoyeunayēngama. Mēntśá tojanatjá: —¿Ndayentse chē Bēngbe Bētsabe Uámana Uabuayaná, chē Cristo ca uabainá, jónýnama ibomna ca?

5 Chēnga tmojanjuá: —Judeoca, Belén pueblentse ca. Bayté entsemna chē Bēngbe Bētsabe juabna oyebuambnayá Miqueas mēntśá tojanábema:

6 Y tśēngaftanga, Judeoca Belenentse oyenēnga, canye mandayá tśēngaftangbentsana echanjabo.

Cha n̄yetsca ch̄e Judeoca m̄andaȳngbiama más uamaná echántsemna, y at̄sbe ent̄sanga Israeloca echántsan̄yena.

Chíyeca t̄šēngaftangbe pueblo ndoñe n̄ye bat̄sá uamana pueblo quenát̄smēna ca.

⁷ Chora Herodes iyt̄ēcana ch̄e maguēnga tojánachembo y cuedádoca tojanat̄já ntseco ora ch̄e estrella tmojánin̄yama. ⁸ Herodes ch̄e soyēnga yojtsetat̄sēmbo ora, Belenoye ch̄e maguēnga tojanichamó, y mēnt̄sá tojanéyana: “Choye motsajna y t̄sabá ch̄e šešona šmochjánguango. Chašmojin̄yena ora, šmochjabēuenaye, as át̄snaca chayobená jama ch̄e šešona jadórana ca.”

⁹ Rey Herodes ch̄e soyēnga tojánēyanent̄sana, ch̄e maguēnga tmojtsatanoñe. Chora cachiñe tmojtandin̄ye ch̄e chēngbe luarēngoca tmojánin̄ye estrella y yojtsanebnatsana ch̄e šešona yojtsemnēnt̄scoñe. Chent̄sa juatsbuacá ch̄e estrella yojójayiye. ¹⁰ Ch̄e maguēnga ch̄e estrella tmojánin̄ye orna, corente oyejuayēnga imojtsemna. ¹¹ Ch̄e yebnoye tmojánamashjna ora, ch̄e šešona tmojánin̄ye chabe mamá Mariáftaca. Chorna, tmojanoshament̄sé y ch̄e šešonatema tmojanadorá. Chora chēngbe cajontēmēnga tmojanēt̄sēcaca y tmojanat̄stá castellano, incienso y can̄ye botamana uanguēt̄se soye, mirra ca uabáiniye. ¹² Chent̄sana, mo can̄ye otjenayoquēcá Bēngbe Bēt̄sá ch̄e maguēnga tojanabuayená rey Herodesbiajana ndoñe chamondesshēcuanama. As chēnga chent̄sana in̄ye benachējana cachēngbe luarēngoye tmojésanshēcuanama.

Egiptó luaroye tmojtsanachá

¹³ Ch̄e maguēnga tmojtsatanoñe ora, otjénayoca José can̄ye Bēngbe Bēt̄sabe ángelbioye tbojánin̄ye y cha mēnt̄sá tbojaniyana: “Motsbaná, ch̄e šešonatema y chabe mamá mesēbiat̄se y Egiptoye motsachá. Herodes ch̄e šešonatema bochanjánguango jtsóbama, chíyeca choca cochtsoquedañe at̄se chacbochjábuaenantscuana ca.”

¹⁴ As José tojantsbaná, ch̄e šešonatema y chabe mamá tojesanēbiat̄se y ibeta Egiptó benache tojēftsanbocna. ¹⁵ Y choca imojtsanomñe Herodes tojanóbanēnt̄scuana. Chca tojanopasá, cachcá chaotsemnama nt̄samo Bēngbe Bēt̄sá chabe juabna oyebuambnabayajana tojanayancá. Ch̄e oyebuambnaya mēnt̄sá tojánayana: “Egiptocana at̄sbe uaquiñá sēnjanchembo ca.”

Herodes tojanmandá basetēmēnga jtsēbáyama

¹⁶ Ch̄e maguēnga tmojtsaningñema Herodes tojántat̄sēmbona ora, puerte tbojánetna, y tojanmandá lempe jtsēbáyama base boyabásetēmēnga uta uata bomnēnga y cabá uta uata ndbomnēnga, Belén y ch̄e juachañe pueblēnguent̄sēnga. Uta uatama cha tojanjuabó, er uta uata yojtsemna ch̄e maguēnga ch̄e estrella tmojánin̄yama. ¹⁷ Nt̄samo ch̄e Bēngbe Bēt̄sabe juabna oyebuambnaya Jeremías tojanoyebuambacá, cachcá tojanochñēngo:

¹⁸ Ramá ca uabaina pueblent̄se can̄ye oyebuambnayana tmojanuena, ngmēnaca ošachiyana y becá tset̄sanánaca oyebuambnayana.

Raquel yojamna chabe básēngbiama ošachiyiñe, pero ndoñe yontseboše chamuatebiajuama, chabe básēnga ya obanēnga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chent̄sana, otjénayoca José can̄ye Bēngbe Bēt̄sabe ángelbioye tbojánin̄ye y cha mēnt̄sá tbojaniyana: ²⁰ “Motsbaná, ch̄e šešonatema y chabe mamá mesēbiat̄se y Israeloye cochtá. Ch̄e šešonatema jóbama bošēnga ya obanēnga montsemna ca.”

²¹ As José tojantsbaná y ch̄e šešonatema y chabe mamá Israel luaroye tojt̄sanēbiat̄se. ²² Arquelao Judeoca yojanmánda chabe taitá Heródesbe cuentiñe, y José chca tojántat̄sēmbona orna, yojtsauatja choye jama. Pero otjénayoca

Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. ²³ Choye tojánashjango ora, José tojána canye pueblo Nazaret ca uabáinoye chentše joyéanama. Chca tojanochnéngo cachcá chaotsemnana ntsamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

3

Juan chë Ubayaná entsanga yojanabuayiná (Mc 1.1-8; Lc 3.1-9, 15-17; Jn 1.19-28)

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mëntšá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canya ndabiama chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama, tšëngaftángnaca cachcá, Bëngbe Utabná jabama ainaniñe tšabe juabnéngaca šmochtseprontana ca” —cha tojánayana.

⁴ Juanbe entsáyá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye.

⁵ Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. ⁶ Bëngbe Bëtsábioye chëngbe bacna soyëngama jaimpáda chentsana, Juan chë Jordán béjayiñe chënga yojanëbáyana.

⁷ Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtsajbanama. ⁹ Y ndoñe šmattsejuabnaye cach tšëngaftangbiana jayanama: ‘Abrahábentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahábentšana entsanga nanjábiana. ¹⁰ Chë tatšniá ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tontseshajo, jtseshatëtšana y iñoje jtsatmetšana. Tšëngaftangftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše merecido taitsatobuajoñe ni mo chabe shecochëtjonëshe jtsámabanama. Chë chabe benache aiñe chamojtishachëngbiana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequécá.

¹² Canye entsá chabe mëtštá cucuatšniñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájuana, y chë ndoservena shácuanëngna iñoje

jtsatmetšana. Cachcá, chë atšbe ústonoye echanjabana, chë tšabe entšanga echanjúbuaja, y chë bacna entšangna canye íñeshiñe echantsacastígaye, y chë iñe ndocna te queochátsfsana ca” —cha tojanéyana.

Juan, Jesúsbiöye tbojanabaye
(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuábayama. ¹⁴ Pero Juan ndoñe yontseboše Jesús juabáyama, y mēntšá tbojaníyana: —Atše šontsemna aca chaščuabaye, y ¿más atše aca cbochjuabaye ca?

¹⁵ Chora Jesús tbojanjuá: —Morna chca chaotsemna. Entsemna lempe ntšamo Bēngbe Bētsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chë buyeshoicana tojtanshébēbocna. Chorna Jesús tsbanánoye yojontješiye y tojáninye chë celoca atēfñiñe y chë Uámana Espíritu mo canye palomatemcá chábioye yojtsastajuana. ¹⁷ Chora celocana Bēngbe Bētsá mēntšá tojánayana: “Mua atšbe bonshana uaquiñá endmēna. Chabíama corente sēntsoyejuá ca.”

4

Jesús tojanobená Satanás jayēnjanama
(Mc 1.12-13; Lc 4.1-13)

¹ Chentšana chë Uámana Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

² Chentše canta bnētsana te y canta bnētsana íbeta ntjascá tbojanjétana; chíyeca chora tbojaneshēntsena. ³ As Satanás tbojanobobconá y tbojaníyana: —Aca ndegombre Bēngbe Bētsabe Uaquiñá tcomñese, momandá quem ndētšbenga tandēse chaobíama ca.

⁴ Pero Jesús tbojanjuá: —Bēngbe Bētsabe uabemana palabrēnguiñe mēntšá endayana: “Entšá nye tandēseca ndoñe vida ntsebomnana, sinó entšá endobena jtsiyenana lempe ntšamo Bēngbe Bētsá tojayancá tbojtseyeunanese ca.”

⁵ Chentšana Satanás, Jerusalén, chë uámana bēts pueblo ca uabáinoye Jesús tbojanánatse, y chë Bēngbe Bētsabe bēts yebnentše chë más tsbanánoca tbojanatsá. ⁶ Chentše Satanás mēntšá tbojaníyana: —Aca ndegombre Bēngbe Bētsabe Uaquiñá tcomñese, muentšana fshantsoye montsēnja, er Bēngbe Bētsabe uabemana palabrēnguiñe endayana:

Bēngbe Bētsá chabe angelēnga echanjichamuá, chacmotsinýenama.

Chēnga buacuatšēngaca cmochanjishache, shecuatše ndētšbeñe ndocá chacondomama ca —cha tbojaníyana.

⁷ Chora Jesús tbojanjuá: —Cach Bēngbe Bētsabe uabemana palabrēnguiñe mēntšá endayana: “Ndoñe matsbošana acbe Bētsá chë Útabná bacna soyēngama jacochēnguama ca.”

⁸ Cabana, Satanás tbojanánatse canye bēts tjoye y betsko nyētsca quem luarentša amēndayēngbenache y chentša nyētsca uámana soyēnga Jesúsbiöye tbojaninýinýe. ⁹ As Satanás tbojaníyana: —Aca chacojoshēntsamentšé y chaščojadorase, lempe chë soyēnga cbochjatštaye ca.

¹⁰ Y Jesús tbojanjuá: —¡Satanás, átšbentšana mojuaná! Bēngbe Bētsabe uabemana palabrēnguiñe mēntšá endayana: “Bēngbe Bētsá cochtsadorana y nye cha cochtseservena ca.”

¹¹ As Satanás cachcá tbojanonýá. Cachora Bēngbe Bētsábiocana angelotémēnga tmojánabo Jesús jtseservénama.

Jesús tojanontsé Galileoca chabe trabajo jamana
(Mc 1.14-15; Lc 4.14-15)

¹² Juan chë Ubayaná cárceloye tmojanëtámíama Jesús tojanuena ora, Galilea luaroye cha tojtaná. ¹³ Pero ndoñe tonjanoquedá Nazaret pueblentse, sinó Capernaumoca, uafjónaye tsachañe; choye tojána joyénanama, chë uámana bëts taitata Zabulón y Neftalibe luariñe. ¹⁴ Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán béjaye chenguánoica, uafjónaye tsachañe;

Galilea luariñe, ndoñe judío entsanga oyenentse.

¹⁶ Chë mo ibetiñe cuaftsiyencá imojoyena entsanga, Bëngbe Bëtsabe soyënga nduabuatma causa, tmojinýe canýa entsangbe juabnënga binýnayá.

Chë chëngbe juabnënga binýnayá entsebuashinýinýana chë Bëngbe Bëtsábioye nduabuatmëngbiamá,

y chë causa chabíama imomna mo obanëngcá, ndoñe binýniñe jtsiyenëse ca —cha tojanábema.

¹⁷ Cach orscana Jesús tojanontsé entsanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuas-tama

(Mc 1.16-20; Lc 5.1-11)

¹⁸ Canýe te, Jesús chë Galilea uafjónaye tsachajana yojtsaye y ndeolpe uta boyabásata tojanýe: canýa yojamna Simón, chë Pedro cánaca uabainá, y chabe uabentsá Andrés. Chatna atarraiešhangá ibnetsashbuétsetšañe, er beonga ashebuánayata ibnamna. ¹⁹ Jesús tojanéyana: “Atšeftaca mabata; atše chochanjábiama Bëngbe Bëtsabiama entsanga anguayata, y morscana nýe beonga ashebuánayata ya ndoñe quešochátsmëna ca.” ²⁰ Cachora chatbe atarraiešhangá cachcá tbojésanaboshjuana y Jesús tmojanasto.

²¹ Y más chcoye, Jesús inýe uta catsátata tojánanye: Santiago y Juan, chë Zebedeobe uaquiñata. Chata ibojtsomñe canýe barquëshañe, chatbe taitáftaca, chëngbe atarraiešhangá atapórmayíne. Jesús tojánachembo, ²² y cachora chë barquësha tbojésanaboshjona, chë taitá cachentse imojéseboshjona y Jesús tmojanasto.

Jesús ba entsanga yojanabuatambá y yojánashnaye

(Lc 6.17-19)

²³ Jesús nýets Galilea luarëjana yojánana, chentse judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiyná y nýetsca šocanëngama y tsetšanëngama yojánashnaye. ²⁴ Nýets Siria luarëjana entsanga cha imojtsebáyana. As entsanga nýetsca šocana bomnënga Jesúsbiocyte imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nýetscanga yojánashnaye.

²⁵ Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanoicana Jesús imojústona.

5

Ndayá Jesús tjoca tojanabuatambá

1 Jesús chë mallajta entšanga tojánanÿe ora, batsjoye tojánantsjua y tojanótbema. Chabe ústonënga tmojanobobeconá y ² Jesús tojanontsé mëntsá jabuátambana:

*Ndëmuanyënga imomna chë ndegombre oyejuayana bomnënga
(Lc 6.20-23)*

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entšanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjójyëngacñe.

⁶ “Puerte oyejuayënga mochántsemna chë nÿetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nÿetsca soyënguiñe tšabá jamama bošënga mochanjobenaye jëftsinÿana lempe ntšamo tmojtsebošcá.

⁷ “Puerte oyejuayënga mochántsemna chë ínÿengbiamana ongmiayënga, er Bëngbe Bëtsá chëngbiamana bochanjóngmia.

⁸ “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

⁹ “Puerte oyejuayënga mochántsemna chë nÿetscanga natjëmbana chamot-siyenama amënga, er chënga Bëngbe Bëtsabe básenga ca mochantsabaina.

¹⁰ “Puerte oyejuayënga mochántsemna chë ínÿenga tmojama chamot-sesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

¹¹ “Puerte oyejuayënga tšëngaftanga šmochtsemna, entšanga chacmojoyánguango y chacmojtšécamena ora y nÿetscna soyëngaca chacmojtšëbuayatsenaye ora, atšbe ústonënga bétsemnama. ¹² Móyejuanga, puerte móyejuanga, tšëngaftanga celoca becá šmochanjójyëngacñe. Er ntšamo entšanga tšëngaftanga cmécamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjanienëngbioye entšanga monjanécamena ca” —Jesús tojánayana.

Ošbuáchiyënga jtsemnana mo tamocá y binÿnayënga quem luarentša entšangbiamana

(Mc 9.50; Lc 14.34-35)

¹³ “Tšëngaftanga, quem luarentša entšanga jtsëjabuáchanëse šmojtсийena, Bëngbe Bëtsabe soyënga chamotsetatšëmbuama, as chëngbiamana šmochántsemna mo chë mëntsëna ndoñe chaondónbëmama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntsoservénana; chíyeca chë tamó tsáshenoye jtsëtšënanana y entšanga jtsebotájayana.

¹⁴ “Tšëngaftanga, ntšamo tšabá yomncá šmojtсийenëse, as quem luarentša entšangbiamana šmochántsemna mo chë ibetiñe tojtsebínÿna soycá. Canÿe bëts pueblo batsjo juatsbuañe tomnëse, ndoñe ntsopodénana iytëmencá jtsemnama. ¹⁵ Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tsbanánoca juajájuama, chca, nÿetsca entšanga chë yebnentse tmojtsemnëngbiamana chaotsebínÿnama. ¹⁶ Cachcá tšëngaftanga, entšangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë

Taitá, Bëngbe Bëtsá celoca endmëná, corente uamaná y obená bétsemnama ca” —Jesús tojánayana.

Chë Moisesbe leyama Jesús tojanabuatambá

¹⁷ “Ndoñe šmattsejuabnaye, ntšamo Moisesbe leyiñe iuayancá y chë Bëngbe Bëtsabe juabna oyebuambnayënga tmojanayancá jabétsepochochocama atše tijabo ca. Atše ndoñe chiyátabo chë soyënga jabétsepochochocama, sinó jabábuayenama ndayá chë soyënga ndegombre bétsayanama. ¹⁸ Ndegombre šcuayana: Celoca y quem luare chaojëftsemnëntscuana, ndocná queochatobenaye ni canye punto, ni canye letra chë leyënguentshana jtsejuánana, lempe ntšamo jochnënguama yomncá chaojtsemnëntscuana. ¹⁹ Chíyeca, nda nye mo canye mando chë leyënguñe ndoñe tonjoyeuná cha, masque nye base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamot-samama tmojtsabuátambase, chënga Bëngbe Bëtsabe amëndayoca uámanënga mochántsemna. ²⁰ Chë soyëngamna mëntšá šcuayana: Tšëngaftanga chë ley abuatambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

²¹ “Tšëngaftanga šmojouena ntšamo Bëngbe Bëtsá tšëngaftangbe bëtš taitanga tojanamëndacá: ‘Ndoñe catjóba ca. Chca ochjajnyá bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’ ²² Pero atše šcuayana, nda cachabe catšátaftaca tbojetna, chánaca bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiana opjema ca tojayana, ntšamo cha bétsamama, cha bontsemna chë infiernoca íñeshoye jama.

²³ “Chíyeca, nderado ndayá Bëngbe Bëtsabe bëtš yebnoye tcojuamba Bëngbe Bëtsá jëtšchuayama y chora tcojenojuabó acbe catšata ácaftaca etonaná yojtsemna ca, ²⁴ as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtšchuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšinë cmochanjáboshjona y chënga cárceloye cmochanjutame. ²⁶ Ndegombre cbëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

Chë boyá o shémbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’ ²⁸ Pero atše cbëyana: Nderado canye boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë ínÿe shembásaftaca cachabe shémbioye tbojtseingñé.

²⁹ “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bomínÿe cochtsenobuchjatsëca y cochtsëtšena. Nÿets cuerpo jtsebomnana y lémpeca infiernoye

jama chacmotsétšenamna, acbiama más tšabá nántsemna n̄ye can̄ye soye acbe cuerpentšana chacoperdé. ³⁰ Nderado acbe catšbioica cucuátšeca bacna soye tcojamēse, más tšabá nántsemna chē cucuatše cochtsenástjango y cochtsétšena. N̄yets cuerpo jtsebomnana y lémpeca infernoye chacmotsétšenamna, acbiama más tšabá nántsemna n̄ye can̄ye soye acbe cuerpentšana chacoperdé ca” —Jesús tojánayana.

Chē bouamnata enētšanama Jesús tojanabuatambá
(Mt 19.9; Mc 10.11-12; Lc 16.18)

³¹ “Mēntšánaca leyiñe enduábemana: ‘Ndēmuan̄ye boyá chabe shémaftaca tbojtsenētšena, chē boyá bontsemna chabe shema can̄ye tsbuanácha juiiyana, ndayēchañe chaotsayana cha ya ndoñe chabe shema yontsemna ca.’ ³² Pero atše cbēyana: Nda chabe shémaftaca tbojtsenētšena y chca tojopasá ndoñe chē shema ín̄yáftaca tbontseingñé causa, as chē boyá jtsamana cha chabotseingñema, chē shema ín̄yáftaca tojtóbouamase. Y nda chē útsena shémaftaca tojtobouamá, chana can̄ye uabuatmá jtsebomnana, y chca, chē tsēm boyánaca can̄ye bacna soye jamana ca” —Jesús tojánayana.

Chē entsanga júrayama Jesús tojanabuatambá

³³ “Tšēngaftanga šmojouena ntšamo tšēngaftangbe bēts taitángbioye tmojanēyancá: ‘Nderado tcojayana: De Dios chē soye chanjama ca; ojal chē soye ndoñe catjama ca.’ ³⁴ Pero atše cbēyana: Tondayama šmattsejúraye; ni celocama, er choca Bēngbe Bētsabe tbemaniñe endmēna. ³⁵ Ni quem luarama, er Bēngbe Bētsabiama mo tšenētemcá endmēna, chiñe chabe shecutšēnga jacjayama; ni Jerusalenama, er chē pueblo endmēna Bēngbe Bētsá chē Bēts Reybe bēts pueblo. ³⁶ Ni tšēngaftangbe bestšašama cach ndoñe, er tšēngaftanga ndoñe quešmátobena ni mo can̄ye stjēnashe ftsenguēshe o fjantsēshe jabemana. ³⁷ Tšēngaftanga aíñe ca jayanama šmojtsebošēse, n̄ye aíñe ca šmochjayana, y ndoñe casna n̄ye ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

Chē entsanga mondbátenachnēnguama Jesús tojanabuatambá
(Lc 6.29-30)

³⁸ “Tšēngaftanga šmojouena ntšamo tšēngaftangbe bēts taitángbioye tmojanēyancá: ‘Nderado nda tcmojtsebuchjatsēca, ácnaca derecho contsebmna can̄yebé cha jētsbuchjatsēcama ca; y nderado nda can̄ye juatsaše tcmojtsásiye, ácnaca derecho contsebmna cán̄yēse cha jtašiyama ca.’ ³⁹ Pero atše cbēyana: Ndoñe matsbošana chē ndayánaca tcmojaborlábioye jtachnēnguama; chamna, ndánaca catšbioica tcmojajuebjantšetase, cochjomiye chē ín̄yoica cachcá chacmomama. ⁴⁰ Nderado nda tcmojademandá y tojtseboše acbe shabuanguanējua jtsabocñama, cha molesenciá acbe quēfsaíyanaca chauetsácñama. ⁴¹ Nderado nda tcmojuasmá y tcmojamandá bnētsana cuadroca juyambama, in̄ye bnētsana cuadro cochjuyamba. ⁴² Nda ndaye soye tcmojotjañēse, cochjatštaye; y nda ndaye soye tcmojúátjase, cha ndoñe stētšoye catjaquéda ca” —Jesús tojánayana.

Chē uayayēngbiama bonshánana jtsebomnana
(Lc 6.27-28, 32-36)

⁴³ “Tšēngaftanga šmojouena ntšamo tšēngaftangbe bēts taitángbioye tmojanēyancá: ‘Acbe amigo cochtsebobonshana y acbe uayayá cochtsaboyēnja ca.’ ⁴⁴ Pero atše cbēyana: Tšēngaftangbe uayayēnga šmochtsababuán̄yeshana, y chē cmécamenēngbiama Bēngbe Bētsá šmochtseimpadana. ⁴⁵ Chca tšēngaftanga, chē Taitá, Bēngbe Bētsá, chē celoca endmēnabe básenga šmochántsemna; Bēngbe Bētsá endbētsama tsabe

y bacna entsángbeñe chabe shinje chaotsebinynayama, y endbétsama chë nyetsca soyënguiñe tsabá jamama bošënga y ndoñe chca entsángbeñe chauaftema. ⁴⁶ Tsëngaftanga nye chë tsëngaftanga tcmojtsababuányeshanënga šmojtsababuányeshanëse, ¿Bëngbe Bëtsábiocana ndayá šmochjuacaná? Romocama crocénana entsángbioye atjanayégnaca chca monduamana. ⁴⁷ Y nye chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbétsama. ⁴⁸ Tsëngaftangbe Taitá, Bëngbe Bëtsá celoca endmëná, nyetsca tsabe soyënga bomná y amá endmëna. Tsëngaftángnaca cachcá šmochtsemna ca” —Jesús tojánayana.

6

Jesús tojanabuatambá ntšamo tsabe soyënga ínÿengbiamama jamana

¹ “Cuedado šmochtsebomna ndoñe ntsamama entsángbeñe tsëngaftangbe tsabe soyënga, nye chënga chca chamuinÿama. Chca šmojamëse, tsëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatšataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyetscanga chamotsetatšëmbuama, mo canÿe trompetëfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entsanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre chëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tsabá chëngbiamama tmojtsoyebuambná ora. ³ Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, ⁴ chca, acbe caridá iytëcana chaotsemnana. As, tsëngaftangbe Taitá, nda bominÿe endbëtsequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntšamo Bëngbe Bëtsáftaca jencuëntana (Lc 11.2-4)

⁵ “Bëngbe Bëtsáftaca šmojtsencuënta ora, ndoñe šmattsama chë bacna entsanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuëntayana, chca, nye entsanga chë soye chamuinÿama. Ndegombre šcuayana: chënga nye morscama ya montsábouacanana, chënga tsabá imojtsama ca entsanga tmojayana ora. ⁶ Pero aca Bëngbe Bëtsáftaca jencuëntama orna, acbe tsoye cochtamáshëngo, bësáša cochtatame y cháftaca cochjencuënta. Chánaca chë iytëmentšë ácaftaca echántsemna. Bëngbe Taitá lempe bominÿe endetsequëcná, masque cánÿenga šmojtsemna ora šmojtsama soyëgnaca. As Bëngbe Bëtsá, chca cháftaca chacojtsencuënta ora, cachá acbe uacanana soye cmochántatštaye.

⁷ “Bëngbe Bëtsáftaca šmojtsencuënta ora, ndoñe nye cachcá ndoservena palabrënga ba soye šmattsichamo. Chca mondbétsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. ⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tsëngaftanga cmojtsëjbotcá. ⁹ Chamna tsëngaftanga mëntsá cmontsëtocana Bëngbe Bëtsáftaca jencuëntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

¹⁰ Acbe amëndayana chaóshjango.
Celoca yojtsemna ntšamo icobošcá;
quem luariñnaca cachcá chaotsemna.

¹¹ Mënté šmiyatšatá cada te šnetsëjaboto tandëse.

¹² Bacna soyënga bënga fsënjama: šmotsaperdónaye;
cachcá ntšamo chë bëngbiama bacna soyënga amënga fsëndbetsaperdonaycá.

¹³ Bacna soyënga jamama šojocohëngo ora, šcochjubahuache chca nde-
nobiüyama.

Nyetsca bacna soyënguentšana šmatsebacaye.

¹⁴ “Chë tšëngaftangbiama bacna soyënga amënga šmojtšaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. ¹⁵ Pero chë tšëngaftangbiama bacna soyënga amënga ndoñe šmotsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inye ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entsanga chë ndegombre tmojuabnacá ndinýinýnayënga mondbet-
samcá, as chca, chënga imojtsayúnama entsanga chamuinýama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entsanga tšabá chëngbiama tmojtsoyebuambná ora. ¹⁷ Aca nderado tcojt-
sayúna ora, cochtsojuebjabebiyé y aceitíyeca botamana cochtenochquëca,
¹⁸ as chca, entsanga ndoñe chamondëtsetatšëmbo aca tondaye ntjascá co-
jtsemnana. Nye acbe Taitá, lempe chë mo iytëmencá yomna soyëngama
tatšëmbuá, chama echántsetatšëmbo. Y cha, chë iytëmencá tcojama soye
bominýe endbetsequëcjnyá, acbe uacanana soye cmochántatštaye ca” —
Jesús tojánayana.

Chë celoca bomnana (Lc 12.33-34)

¹⁹ “Bomnana quem luarentše ndoñe šmattsëjuabaye. Muentšna chë mejojón
y inye pochócaye soyënga lempe jtsendbiamana, chë atbëbanënga jtsamashj-
nana y chë juabana soyënga jesatbëbana. ²⁰ Más tšabá tšëngaftangbiama
entsemna, mora quem luarentše tšabe soyënga šmojtsamamna, uacanana
soyënga celoca chaotsójuabaye. Chentše ni chë mejojón, ni chë inye
pochócaye soyënga acbe soyënga quemochatspochóca, ni atbëbanënga que-
mochátamashjna jatbëbama. ²¹ Er chë ndayentše acbe bomnana tojtsemnentša
soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinýanëshá (Lc 11.34-36)

²²⁻²³ “Acbe bominýe tšabá totsomñëse, mo canýe uajuinýanëshacá acbe cuer-
pama jtsemnana, chíyeca aca jtsobenana ntšamo tcojtsamcá chë bomínýeca
jtsonýayana. Chë bominýe ndoñe tšabá tontsemnësna, chë bominýe tondaye
ntsobenana jamana, ntšamo tcojtsamcá chacobená jinýama. Cachcá, acbe
ainaniñe tšabe juabnënga tcojtsebomnëse, lempe ntšamo chacojtsamcá tšabá
echántsemna. Y acbe ainaniñe ndocna tšabe juabnënga tcontsebomnësna,
lempe ntšamo chacojtsamcá ndoñe tšabá queochátsmëna. Y chca, aca
cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiama bonshánana o chë nye quem luarentša soyënga jtse-
bošana
(Lc 16.13)*

24 “Ndocná ntsobenana uta mandayata jtsaservénana: cánÿabioye bochantśaboyënja y chë ínÿabioyna bochantśebobonshana, o cánÿabiamna tśabá echántsetrabajaye y chë ínÿabiamna ndoñe tśabá. Ndoñe quecátobena Bëngbe Bëtsá jtsebobonshánana, nÿe quem luarentśa soyënga jtsebonnama yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanÿenana
(Lc 12.22-31)*

25 “Chcasna atśe ōcuayana: Ndoñe ōmattśenócochinÿena ndayá ōmochjase o ōmochjofśiye vida jtsebonnama, ni ndaye entśayá ōmochjuíchëtjuama cach ndoñe. Ndegombre, vida chë sanama más enduámana y cuerpo chë entśayama más. 26 Smochjanÿe chë shloftśënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguine quemnatsquëcjná; pero Bëngbe Bëtsá, celoca endmëná, chënga saná jtsatśatnayana. ¡Y tśëngaftanga chë shloftśetëmëngbiama puerte más ōmonduámana! 27 Masque chca endmëna, canÿa masque tśa tojtśenócochinÿena, ¿ntśamo nanjobenaye jamana chë ntsachetśá vida yochtsebonnentsana, canÿe hora vida más jabotiyana?

28 “Y ndayá ōmochjuíchëtjuama, ¿ndáyeca ōmojtśenócochinÿena? Smochjinÿe chë jajañe lirio uantśefjushangá jtsajuajnana: ndoñe ntsetrabájayana, ni ntshabiamnayana. 29 Pero atśe cbëyana, ndegombre ni mo Rey Salomón nÿetsca chabe bomnánaca nÿetśá botamana mo chë lirio uantśefjushangacá quenjatspormana. 30 Bëngbe Bëtsá tśa botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tśëngaftangbiámna Bëngbe Bëtsá echanjama entśayá chaōmotsábomnama, jentśanga nÿe batśá Bëngbe Bëtsábeñe ošbuáchiyënga! 31 Ndoñe ōmattśenócochinÿena, mëntśá jtsichámëse: ‘¿Ndayá mochjase?’ o ‘¿Ndayá mochjofśiye?’ o ‘¿Ndayá mochtichëtjo ca?’ 32 Chë soyëngama, chë Bëngbe Bëtsábioye nduabuátmënga mondbëtsenocochinÿena, pero tśëngaftanga ndoñe. Tśëngaftangbe Taitá, Bëngbe Bëtsá, ndayá cmojtśëjabotama endëtatsëmbo. 33 Chíyeca, tśëngaftangna natsana ōmochjshëtseboše Bëngbe Bëtsá tśëngaftangbe ainaniñe chaotsemándama y lempe ntśamo cha tojamandacá ōmochtsama. Chca ōmojamëse, Bëngbe Bëtsá lempe ntśamo cmojtśëjabotcá cmochanjátśataye. 34 Ndoñe matenócochinÿenana ndayá yëfse yochjochnënguama. Yëfse luare cochántsebonna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

7

*Ndoñe ntsichámuana chë ínÿenga tśabá o ndoñe tśabá tmonjamama
(Lc 6.37-38, 41-42)*

1 “Ndocá ínÿengbiama ōmattśichamo chë ndoñe tśabá tmontśamama. Chca, Bëngbe Bëtsá ndoñe queochátichamo tśëngaftanga ndoñe tśabá ōmonjama ca. 2 Chë ntśamo tśëngaftanga ínÿengbiama ōmojtśichamcá tśabá o ndoñe tśabá tmontśamama, cachcá Bëngbe Bëtsá tśëngaftangbiama chë ntśamo ōmojamama echántśichamo. Y ntśamo ínÿengbioye chaōmojábiamna, uabouana o ndoñe jabuache soyënga, cachcá Bëngbe Bëtsá tśëngaftangbioye cmochanjábiamna.

3-5 “Nderado canÿa chabe bominÿiñe canÿe niñëfja tojtsebonnëse, cha ndoñe ntsobenana chabe catśata jauyanama: ‘Acbe bominÿentśana canÿe polvështema jtsebuchjátśecama ōmolesenciá ca’. Natsana cha bontsemna

cachabe bominyentsana chë niñëfja jtsenobuchjâtsëcana tšabá jinýama jobenayama, chabe catsatbe bominyentsá polvështema jtsebuchjâtsëcana. Cachá entsemna acbiama, jbacna entšá chë ntšamo ndegombre tcojuabnacá ndinýinýayá!, chë tša bacna soye cojtsama ca acbe catsata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canýe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catsata juajabuáchana ntšamo tšabá yomncá chaotsamama.

⁶ “Chë Bëngbe Bëtsabe soyëngama josértama ndéboše entsanga ndoñe šmattsabuayinyaye. Aíñese nántsemna mo chë Bëngbe Bëtsabe bëts yebnoca uátšëmbona mëntsena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtšancá, chënga nýe jtsebotájayana ca” —Jesús tojánayana.

Smochjotjañe, smochjáanguango y smochjachembo
(Lc 11.9-13; 6.31)

⁷ “Smochjotjañe y Bëngbe Bëtsá cmochanjátšataye; smochjáanguango y smochanjínýena; smochjachembo y bëšása cmochanjébëtafjo. ⁸ Er ndánaca tojtsotjanañá, jóyëngacñana; y nda tojtsenguá cha, jónýenana; y nda tojtsechembuanábioye jebiatëfjuana.

⁹ “¿Ndëmuanýe boyabása tšëngaftanguentšá, canýe tandëse chabe uaquiñá tbojtsotjanañe ora, canýe ndëtšbé chábioye buanjatštaye? ¹⁰ ¿O canýe mëtscuaye buanjatštaye, beona tbojtsotjanañe ora? ¹¹ Y chca, tšëngaftanga, bacna soye amënga, tšëngaftangbe basetémënga tšabe soyënga jatšatayama šmojtsamanëse, jmás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

¹² “Inýëngaftaca smochtsama ntšamo chë ínýënga tšëngaftangaftaca chamot-samama šmojtsebošcá. Chca endmëna ntšamo Moisesbe leyíne y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

Chë base utëntšá bëšása
(Lc 13.24)

¹³ “Chë base utëntšá bëšásajana smochjámashjna. Chë utëntšá bëšásajana y chë paselo jóyënama benache, infiernoye cmochanjuánatse y banga chëjana mondámashjuana. ¹⁴ Chë tšabe vida binýnoye jamna base utëntšá bëšásajana endmëna y ndoñe paselo jóyënama benache, y chiñe báseftanga mondbínýena.

Chë Bëngbe Bëtsabe ndoñe ndegombre juabna oyebuambnayënga
(Lc 6.43-44)

¹⁵ “Cuedado smochtsebomna chë Bëngbe Bëtsabe ndoñe ndegombre juabna oyebuambnayëngbiana. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. ¹⁶ Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga smochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátatabiana, ni higuëbé cardo betiyentsana. ¹⁷ Chca, nýetsca tšabe betiyiñe tšabe soye jashájonana; y chë ndoñe tšabeshiñna podësca soye. ¹⁸ Canýe tšabe betiyiñe quenátopodena podësca soyënga jashájonana, ni canýe ndoñe tšabe betiyiñe tšabe soyënga jashájonana. ¹⁹ Ndaye betiye podësca shajuanëshe jtseshatëtšana y iñoye jtsatmetšana. ²⁰ As chca tšëngaftanga chënga smochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nyetscanga jamashjnana
(Lc 13.25-27)

²¹ “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe. ²² Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbeñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsana fsëndëtábocana, y ácbeyeca bëts soyënga fsëndama ca.’ ²³ Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entšanga ca’ ” —Jesús tojánayana.

Chë uta ucuatjoniñe
(Mc 1.22; Lc 6.47-49)

²⁴ “Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo. ²⁵ Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. ²⁶ Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo. ²⁷ Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entšanga ojanánënga imojtsemna ntšamo cha tojánabuatambama. ²⁹ Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

8

Jesús, canya bacna nguayanánaca šocábioye tbojanshná
(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto. ² Chora canye boyabása bacna nguayanánaca šocá Jesúsbioye tojanobeconá, chabe delante yojoshamentsiye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe. ⁴ Jesús chë shnanábioye tbojaniyana: —Mouena, ndocnábeñe cattsecuëntaye; nye chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënema. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsëmbona mora aca ya ndoñe šocá contsemnama ca —Jesús tbojaniyana.

Jesús canye Romano soldadëngbe amëndayabe bochichnayábioye tbojanshná
(Lc 7.1-10)

⁵ Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama. ⁶ Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadëngbe amëndayá tbojaniyana: —Señor, atše merecido tait-satobuajoñe atšbe yebnentše chacuamashënguama; nÿe mayana y atšbe bochichnayá tšabá echántsatsmëna. ⁹ Atšbioye mándayënga atše sëndábamna y átšnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nÿets Israelentše ni canÿa quem boyabasacá Bëngbe Bëtsábeñe nÿetsá ošbuachiyá chiyátinÿena. ¹¹ Y šcuayana, shinÿe bocanoicana y shinÿe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëtš taitángaftaca mochanjotbiamá Bëngbe Bëtsabe amëndayoca, cánÿiñe juasama. ¹² Ba Israe-loca entšanga, chë ndëmuanÿengbiamá Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infier-noye. Chentše puerte mochanjenóbošachna y chë tsetšanama juatsašënga mochantšenoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojaniyana: —Acbe yeb-noye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojsatsmëna.

Jesús, Pédrëbe uambén mamábioye tbojanshná

(Mc 1.29-31; Lc 4.38-39)

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracá yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšë chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

¹⁶ Chë te jaibétatama ora, Jesús yojtsemnoye banga bacna bayëjëngbe juabna uambaye entšanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná. ¹⁷ Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

¹⁸ Jesús tojánanÿe mallajta entšanga chabe shëconana; as tojanmandá uafjajónaye chenguana jama. ¹⁹ Chorna, canÿe ley abuatambayá Jesúsbioye tbojanobobconá y tbojaniyana: —Buatëmbayá, atše sëntseboše aca juas-tama, ndëmoye chacojtsá choye ca.

²⁰ As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹ Chora inÿa, cach uatsjendayënguentšá, Jesúsbioye tbojaniyana: —Bëngbe Utabná, šmolesenciá atšbe taitá chjshesabotbontsañe ca.

²² Chora Jesús tbojanjuá: —Nÿe šmasto. Chë Bëngbe Bëtsabiamá mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

Jesús chë binýia y chë béjaye bonguana yojëtsbema
(Mc 4.35-41; Lc 8.22-25)

²³ Chentšana Jesús canýe barquëshoye tojánamashëngo y chabe uat-sjëndayënga imojtsetjëmbambnaye. ²⁴ Ndeolpe tša jabuache binýia chë uaf-jajónaye béjayiñe yojóshjango; nyëtsá jabuachana yojtsemna, chë olëshënga barquëshha imojtsëtsbotsana. Y Jesús chora inétsomañe. ²⁵ As chabe uat-sjëndayënga tmojána Jesús jetsefšenama y tmojanianyana: —¡Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binýia y chë búyeshe bonguana chaotsatsmënama, y lempe natjëmbana yojtsatsmëna. ²⁷ Chabe uatsjëndayënga ojnánänënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binýia y chë búyeshe tmonjoyeuná ca.”

Chë Gadara luaroca entšata, bacna bayëjbe juabna uambayata
(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canýe luare Gadara ca uabáinentše. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entšanga ndoñe ntsobenana chëjana jtsachnějuanana; ²⁹ y chora tbojanontsé chë bacna bayëjëngbeyeca mëntsá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrema, chama cabá ndoñe chë tempo yontsemna ora ca?

³⁰ Chentša béconana ba cotsënga imnajena y chënga imnétsosañe. ³¹ Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotsëngbeñe fchayamashjnama ca.

³² Y Jesús tojanëyana: —Motsajna ca.

Chora chë bayëjënga chë boyabásatbentšana tmojésanbocana y chë cotsëngbeñe tmojánamashjna; cachora chë cotsënga batsjocana penëšëjana uafjajónayoye imojtsoshbuetše y yojtsatajo.

³³ Chora chë cotsënga anýenënga tmojtsanacheta, y chë puebloye tmojánashjajna ora, tmojanontsé lempe ntšamo yojochněngcá jacuéntana y ntšamo chë bayëjbe juabna uambayátaftaca tojanopasámnaca. ³⁴ Chora nyëtsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninýe ora, tmojanimpadá chë luarentšana chaueseboचना.

9

Jesús, canýe jama ndobenábioye tbojanshná
(Mc 2.1-12; Lc 5.17-26)

¹ Chca tojanopasá chentšana, Jesús canýe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango. ² Chora, canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bétsobenama; as chë šocábioye tbojanianyana: “Sobreno, añemo matsca; acbe bacna soyënga tcbontsebooperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiama; mo chábioye cuafjoyenguangcá entsemna ca.” ⁴ Pero Jesús yojtsetátšëmbo ntšamo chënga imojtsejuabnacyá; chíyeca tojanëyana: “¿Ndáyeca nyëtsá

bacna juabnënga ainaniñe šmojtsebomna ca? ⁵ ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’? ⁶ Atše cbochanjínÿanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanëyana.

As chë jama ndobenábioye tbojanianyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe. ⁸ Chca tmojáninÿama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatsatama.

Jesús, Matéobioye tbojanchembo chabuastama
(Mc 2.13-17; Lc 5.27-32)

⁹ Jesús chentšana tojtsanoñe y canÿe entšábioye tbojáninÿe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojanianyana: “Smasto ca.” As Mateo chentšana tojëftsantsbaná y tbojanasto.

¹⁰ Jesús cach Mateobe yebnentše yojtsesaye ora, banga Romocama impuesto entšángbioye atjanayënga y ínÿenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiama. ¹¹ Chë fariseunga chca tmojáninÿe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga aíñe. ¹³ Smochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuéntama tondaye saytescama
(Mc 2.18-22; Lc 5.33-39)

¹⁴ Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacna.

¹⁶ “Ndocná canÿe uatanguá entšayá base tsëm entšëjuaca jtarmëndana. Er chë tsëm entšëjua jtsabéconana y chë uatanguá entšayá más jtsatanëcanana, y chca chë uátanëcniñe más bëtsiñe jtsabemana. ¹⁷ Y cach ndoñe chë tojtshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservënanana. Chíyeca comna, chë tojtseshayana

vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

Jesús canye shembásabioye tbojanshná y tojanma Jairëbe bembetema cháuatayenama

(Mc 5.21-43; Lc 8.40-56)

¹⁸ Jesús entsanga yojsëtsëtsnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojobamentsiye. Chë mandayá tbojanianana: “Atšbe bembe tontsóbona. Diosmanda atšbe yebnoye mabo; cochjabojajo y cha echántayena ca.”

¹⁹ Chentšana Jesús y chabe uatsjëndayënga chë mandayá tmojanasto. ²⁰⁻²¹ Imojtsaye ora, canye shembása stëtšoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nÿe mo chabe entsáyá sibiájua chaijuábojajo, salud chantinÿena ca.” Chentšana chë šocá Jesusbe entsáyá tojanábojajo.

²² Tojanábojajo ora, Jesús tojanobuértana, chë shembásabioye tbojáninÿe y tbojanianana: “Añemo matsca, shembása. Bëngbe Bëtsábeñe icošbuachéyeca, mora tšabá contsatšmëna ca.” Y cach orscana cha tšabá yojsatšmëna.

²³ Chënga tmojtëtanontšë ayana y chora chë mandayábioca chënga tmojánashjajna. Chentše Jesús tojánanÿe, ínÿengna chë veloriamá imojtsanflautaye y ínÿengna tša imojtsošachiye. ²⁴ Chora Jesús tojanëyana: “Muentšana mobocnënga. Chë shembásetema cabá ndoñe obaná quenátšmëna; nÿe endëtsomañe ca.”

Pero chë entsanga Jesúsbioye nÿe imojtsáfchaye. ²⁵ Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. ²⁶ Y nÿets chë luarëjana ndayá Jesús yojamama nÿetsca entsanga imojátatšëmbona.

Jesús uta jtanata tojanashná

²⁷ Jesús chentšana tojëftsanbocna ora, uta jtanata tbojanasto y mëntšá ibojtsaiuáye buache: —¡Davídbentšana Entšá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca? Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

³¹ Pero chata chentšana tojëftsanbocna y cachora tbojanontšë ndayá Jesús chátaftaca tojanmama nÿets chë luarëjana jacúntana.

Jesús, canye ndëbiábioye tbojanshná

³² Chë jtanata ibojtsebocanëntscuana, básefta entsanga canye ndëbiá, bacna bayëjbe juabna uambayá, Jesúsbioye tmojanamba. ³³ Jesús chë bacna bayëja chá bentšana tbojtanábocna y cachora chë ndëbiá tojtanontšë oyebuambnayanana. Entšanga ojnánänënga imojtsichamo: “¡Ndocna te Israelentše chca bëts soye chemuáisinÿe ca!”

³⁴ Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entsángbentšana jtëbuacanama ca.”

Jesús entsangbiama tbojanongmé

³⁵ Jesús nyetsca pueblenguējana y luarenguējana yojsachnējuana y chë judiëngbe enefjuana yebnënguenache entsanga yojsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nyetsca šocanëngama y tsetšanama yojánashnaye. ³⁶ Y chë entsanga tojánanyë ora, puerte tbojanongmé. Er chënga imojtsemna mo abujajënyë ndbomna oveshëngcá, puerte uamëntsnayënga ba soyëngama padecena causa, y chaujabuachama ndocná ntsebomncá. ³⁷ Chora chabe uatsjëndayënga tojanëyana: “Canýe bëts jajañe bëtscá játbanama entsemna, pero peonga nyë báseftanga. Cachcá quem luarentse, bëtscá entsanga Bëngbe Bëtsábioye nduabuátmënga montsemna, y chëngbioye chabiamá abuyiynayënga nyë báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuyiynayënga chauichamoma, quem entsanga chábioye chamúbuajama ca” —Jesús tojanëyana.

10

Jesús chë bnëtsana uta uatsjëndayënga tojanabacacá (Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entsángbentšana jtabocnama y nyetsca šocanëngama y tsetšanama jashnayama.

² Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaqiñata; ³ Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaqiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšinë Jesúsbioye boshjuaná.

Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama (Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶ Nyë Israeloca pueblëngoye šmochjá. Choca entsanga mo ótsena oveshëngcá montsemna, Bëngbe Bëtsábioye corente nduabu-atma causa. ⁷ Smochjá y entsanga šmochjábuayenaye Bëngbe Bëtsabe amëndayana echanjóshjanguama. ⁸ Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjengbe juabna entsángbentšana šmochtábocna. Chë obenana šmonjóyëngacñe tondaye ntjëtšajuacá; cachcá, chë soyënga šmojtsamama tondaye entsanga šmattsayëngacaye.

⁹ “Ndoñe šmattsambaye crocénana uasnanëchiñe. ¹⁰ Ni shecnaja sanaca benachiñama, ni inyë entsayá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

¹¹ “Nderado canýe bëts pueblentše o base pueblentše chašmojášhajna ora, šmochjáanguango canýe tšabe entsá, ínýëngbioye ndaingñayá, y chabe yebnentše šmochtsoquedañe, inyë puebloye játantscuana. ¹² Canýe yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

13 Chë yebnentša entsanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nÿe cach tšëngaftangftaca chaotsomñe. 14 Y nderado canÿe pueblentše o bëts pueblentše chë entsanga ndoñe tcmonejúbuaaja y ndoñe tcmonejóyaunase, chentsana šmochjësebocana y chë shecuatšentša polvëshe šmochjësenstoto. Chca, chë entsanga mochántsetatsšëmbo chënga tšëngaftangftaca ndoñe tšabá tmonjamama. 15 Ndegombre šcuayana, quem luare jopochócama te, chë ndoñe chacmonjúbuaaja y ndoñe chacmonjoyauná entsanga Bëngbe Bëtsá puerte jabuache echantsacastígaye, y chë bacna entsanga Sodoma y Gomorra luaroquëngna ndoñe nÿa nÿetsá jabuache queochatacastígaye ca” —Jesús tojánayana.

Ntšamo chë uatsjëndayënga mochjansúfria

16 “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. 17 Entšangbiamia cuedado šmochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. 18 Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamia šmotatšëmbcá jóyebuambayama. 19 Pero chë mandadëngbe cucuatšinë chacmojábashejuana ora, ntšamo o ndayá šmochjayanama ndoñe šmattsenócochinÿena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. 20 Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

21 “Y canÿe entsá cachabe catšátbioye uayayëngbe cucuatšinë bochanjáboshjona chamotsóbama; y canÿe taitá cachabe uaquiñábioynaca. Y chë básenga chëngbe bëtsëtsangbe contra mochántsemna y uayayëngbe cucuatšinë mochanjábashhejuana chamotsëbáyama. 22 Tšëngaftanga atšbe ústonënga bëtsemnama, nÿetsca entsanga cmochantsëbuayënja; pero nda nÿets tempo átšbeñe ošbuachiyá chaotsomñá, atsbocaná echántsemna. 23 Canÿe pueblentše chacmojtšécamena ora, inÿe puebloye šmochtsacheta. Ndegombre cbëyana, Israelentša nÿetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

24 “Ni canÿe uatsjëndayá chabe buatëmbayabiamia más uamaná ntsemnana, ni chë oservená chabe nduiñbiamia más uamaná. 25 Chë uatsjëndayá ya cachabe buatëmbayacá jtsemnana tojashjáchëse, ndayá más nanjatsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canÿe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanëyana.

Nda ndegombre cuantsebiauatja

(Lc 12.2-7)

26 “Chíyeca entsangbiamia ndoñe matauatjëngana. Chë yoiytëmena soyentšana tondaye ntjinÿcá queochaisoquéda, y chë ndótatsšëmbo soye, ntstotatsšëmbcá queochaisoquéda. 27 Chë mora cbontsëtsësná soyënga, chë entsangbiamia mo ibetiñe cuaftsemncá soyënga, tšëngaftanga šmochjama entsanga botamana chama chamotsetatsšëmbuama. Y chë iytëcana

cbontsëtsëtsná soyënga nyëtsca entsanga šmochtsabuayiynaye, mo nda canye yebnentša tsbanánocana noticiënga tojtsayebuachcá. ²⁸ Ndoñe matauatjëngana nye chë tsëngaftangbe cuerpo japochócama imobenëngbiana y ainana jtsepochócama ndoñe ntobenana. Más šmochtsebiauatja chë nda endobena tsëngaftangbe cuerpo y tsëngaftangbe ainana jtsepochócama, nyëtsca tescama infiernoca.

²⁹ “Uta jaja shloftšetémata nye canye denario crocenánama mondbétsena. Masque chca, ni cányetema obanatema fshantsoye jotsatšana, tsëngaftangbe Taitá, Bëngbe Bëtsá ndoñe tontsebošëse. ³⁰ Y tsëngaftangbiana, Bëngbe Bëtsá botamana jtsantješnana, y chca, cha lempe tsëngaftangbiana jtsetatšëmbuana, bueta stjënashënga tsëngaftangbe bestšašinë yomnámna. ³¹ Chiyeca ndoñe matauatjëngana, tsëngaftanga ba jaja shloftšetëmëngbiana corente más šmonduámana ca” —Jesús tojánayana.

*Ndabiana Jesucristo yochjayana chabe entsá yomna ca
(Lc 12.8-9)*

³² “Nda atšbe entsá yomna ca entsangbe delante tojayanabiana, átšnaca, atšbe Taitá, chë celoca endmënabe delante chanjayana cha atšbe entsá yomna ca. ³³ Pero nda entsangbe delante atšbe entsá ndoñe yondmëna ca tojayanabiana, átšnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca” —Jesús tojanëyana.

*Jesusbe causa, entsángbeñe más jtsentsjanayana
(Lc 12.51-53; 14.26-27)*

³⁴ “Ndoñe šmattsejuabnaye atše quem luaroye tijabo nyëtsca entsanga natjëmbana chamotsiyenama. Atše chama ndoñe chiyátabo; atše sënjabo causa, entsanga más mochántsestsjanaye. ³⁵ Atše sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebinuá chabe uambén mamabe contra chaotsemnama. ³⁶ Y chca, ba entsangbe uayayënga cachëngbe pamíllanga mochántsemna.

³⁷ “Nda cachabe taitá o mamábioye atšbiana más tbojtsebobonshánëse, cha ndoñe ntsomerecénana atšbe entsá jtsemnama. Nda cachabe uaquiñá o bémbëbioye atšbiana más tbojtsebobonshánëse, cha cach ndoñe. ³⁸ Y nda nyëtsca chabe quem luare soyënga ndoñe tonjëseboshjona atše juastama, y atšbiana jasúfriama ndoñe tontseprontana y cruciñe jobanámna, cha ndoñe ntsomerecénana atšbe entsá jtsemnama. ³⁹ Nda tojtsentšena quem luarentše bëtscá soyënga jtsebozna y atšbiana jasúfriama ndoñe tontseprontana, chë nyëtsca tescama yomna tsabe vida echanjobuetše. Pero nda quem luarentša soyënga cachcá tojesonýá atše juastama, masque chaóbana, chë nyëtsca tescama yomna tsabe vida echántsebozna ca” —Jesús tojánayana.

*Chë uacanana soyënga
(Mc 9.41)*

⁴⁰ “Nda tsëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. ⁴¹ Nda canye Bëngbe Bëtsabe juabna oyebuambnayábioye tbojoyeuná, cha chca bëtsemnama, chábioye Bëngbe Bëtsá canye uacanana soye bochantatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyëtsca soyënguiñe tsabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšetaye, mo cach nyëtsca soyënguiñe

tšabá amabe uacanana soycá. ⁴² Y ndánaca, tšëngaftanguentsá canye nduamanábioye masque nye mo base búyeshtema tbojuabuatšetá, atšbe ustóná bétsemnayeca, ndegombre Bëngbe Bëtsá canye uacanana soye chábioye bochantatšetaye ca” —Jesús tojánayana.

11

Juan chë Ubayanabe ichmónënga (Lc 7.18-35)

¹ Jesús tojanpochocá chabe bnëtsana uta uatsjëndayënga jábuayenama, y chentsana tojtsanoñe chë luariñe pueblënguenache oyena entsanga Bëngbe Bëtsabe palabra jabuátambama y jábuayenama.

² Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, ³ mëntsá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínÿabiama jatobátmama ca?

⁴ Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinÿcá. ⁵ Cha šmochjacuénta: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnjémëngbioye chë tšabe noticiënga montsabuayiyná ca. ⁶ ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

⁷ Chënga tmojtsatanoñe ora, Jesús tojanontsé Juanbiamama chë entsanga jáuyanana, mëntsá: “Juan jinÿama šmojánbocana ora, ¿ndayá jinÿama chë entsanga ndoyena luaroye šmojánbocana? ¿Canye entsá ainaniñe tondaye añemo ndbomná, mo canye šëše bínÿiaca shatiyeynëscá? ⁸ Y ndoñese, ¿ndayá jinÿama choye šmojánbocana? ¿Canye boyabása uámana entsayaca bopormaná? Ndoñe. Tšëngaftanga šmondëtatsëmbo chë boyabásenga uámana entsayaca bopormánëngna chë mándayëngbe yebnënguiñe mondbëtsiyenama. ⁹ Y asna, ¿ndayama choye šmojánbocana? ¿Canye Bëngbe Bëtsabe juabna oyebuambnayá jinÿama? Ndegombre, aíñe; y cbéyana, ndegombre cha canye Bëngbe Bëtsabe juabna oyebuambnayabiama más bëtsá endmëna. ¹⁰ Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntsá tojánayana ora:

Cristo, atšbe entsá natsana sënjichmó acbiama chaóyebuambama, entsanga jábuayenama aca jabama ainaniñe tšabe juabnëngaca chamotseprontánama ca.

¹¹ Ndegombre cbéyana: Nÿets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

¹² “Juan chë Ubayaná tojánabo orscana mëntscoñama, bëtská entsanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nÿets añémoca montseboše chë mándayana jtsepochoćama. ¹³ Juan candabëntscuana, nÿetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá. ¹⁴ Y tšëngaftanga chë soyënga jýëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojanná. ¹⁵ Chë jouenama tmojtsobenënga, chamouena ca” —Jesús tojánayana.

¹⁶ Měntšánaca Jesús tojánayana: “¿Ndayacá morsca entsanga imomna? Chēnga mondmēna mo chē plazēngoca mondbetsetbiámána basetemēngcá; chēnga chēngbe enutēngbioye jtsayebuáchana ¹⁷ y mēntšá jtsichámuana: ‘Tšēngaftangbiamá fsēnjaflautá y ndoñe chešmatslantsá; ngménaca fsēnjaversiá y ndoñe chešmatošachna ca.’ ¹⁸ Juan tonjánabo, y bētscá entsángbeñe ndoñe quenjatamana ni jasana, ni jofšiyana, y entsanga montsanichamo chana bacna bayējbe juabna uambayá yojamna ca. ¹⁹ Morna, chē Bēngbe Bētsá Entšá tbojanbemá tonjabo, y chana aíñe entsamana bētscá entsángbeñe jtsesayana y jtsofšēšnayana, y entsanga montsichamo chana yapa uasayá y vinoye tmojá entsemna ca y Romocama impuesto entsángbioye atjanayēnga y bacna soye amēngbe amigo ca. Pero Bēngbe Bētsá endbētsinŷanŷnaye cha nŷets osertánana bomná yomnama, chē ndayá cha tojama ora ndayá chentšana tojóbcna soyēngaca ca” —Jesús tojánayana.

Chē nduauenana entsanga

(Lc 10.13-15)

²⁰ Chentšana Jesús tojanontšé jucácanana chē entsanga, ndēmuanŷenga imojoyena chē pueblēnguiñe ndayenache ba chabe bēts soyēnga tojanma, chēnga bacna soyēnga amana ndoñe tmonsanajbanama y Bēngbe Bētsabe benache ndoñe tmontanishachama. Mēntšá yojtsichamo: ²¹ “¡Tša lastema, Corazín puebloca entsangbiamá! ¡Tša lastema, Betsaida puebloca entsangbiámna! Chē chentše sēnjama bēts soyēnga, Tiro y Sidón bēts pueblēnguentše matēnjochnēnguse, chentša bacna entsanga ya tempo ngménaca matmētenojuabó chēngbe bacna soyēngama y Bēngbe Bētsabe benache matmēntishache; y chca tmojamama chaotsótatšēmbuama uajojēsha entsayangaca matmēntopormanga y chēngbe bestšašīñe jatinyá matmēnjenotbótoto. ²² Pero ndegombre cbēyana, ntšamo entsanga tmojamama, tšabá o ndoñe tšabá bētsemnama jayanama chaojobuache ora, tšēngaftanga más bēts castigo šmochántsebmna, chē Tiro y Sidonoca bacna entsángbe castiguama. ²³ Y tšēngaftanga, Capernaumoca entsanga, ¿šmojtsejuabná celóntscoca atsebánanēnga šmochtsemna ca? ¡Chē uabouana infernoye cmochantsēsetjango! Chē muentše sēnjama bēts soyēnga Sodomoca matēnjochnēnguse, choca entsanga ya tempo ngménaca chēngbe bacna soyēngama matmētenojuabó y Bēngbe Bētsabe benache matmēntishache, y chē bēts pueblo cabá cachcá mēntscuana mantsomñe. ²⁴ Pero ndegombre cbēyana, quem luare jopochócama te, Bēngbe Bētsá puerte jabuache cmochantsacastígaye, y chē Sodoma luaroca entsángbioye ndoñe nŷetšá jabuache quemochatacastígaye ca” —Jesús tojánayana.

“Atšbioye mabēnga y šmochjóchna”

(Lc 10.21-22)

²⁵ Chē tempo, Jesús tojánayana: “Atše cbatschuá, Taita, celoca y quem luarentša Utabná. Aca, chē nŷe batšá tatsēmbēnga tcojanŷanŷé, chē tša tatsēmbēnga y osertánēngbiamá tcojaiytēme soyēnga. ²⁶ Aíñe, chama cbontsadorana, Taita, chca chaotsemnama tcojábošenayeca.

²⁷ “Atšbe Taitá lempe chca šonjatštá. Chē Uaquiñábioye ndocná corente quebnatábuatma; nŷe chē Taitá aíñe. Y chē Taitábioye ndocná corente quebnatábuatma; nŷe chē Uaquiñá aíñe, y ndábioye chē Uaquiñá tojtseboše nda chē Taitá yomnama jinŷanŷiyama, chánaca chē Taitábioye bochantsábuatma.

²⁸ “Atšbioye mabēnga nŷetsca tšēngaftanga uamēntšnayēnga y bētscá trabajo uangménēnga, y atše chanjama tšēngaftanga chašmochnama. ²⁹ Ntšamo canŷe entsá, uacná yuguēšīñe juabatsēcana juanatsama, cachcá, tšēngaftanga

atše šmochjaleséncia jobnatsayama y jabuátambama. Atšbentsana šmochjuatsjinÿe: atše uantado mēná sēndmēna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. ³⁰ Mo canÿe uacnacá, ndoñe tishuta yuguēšeca o ndoñe uauta uasmanēshaca, paselo jama jobenayana, cachcá tšēngaftanga šmochántsemna atše cbojtsabnatsana y cbojtsabuátambase; y chca, tšēngaftanga más oyejuayēnga šmochántsemna y más paselo nÿetsca soyēnga jamama echántsemna ca” —Jesús tojánayana.

12

Jesusbe uatsjēndayēnga ochnayté trigo tmojanátabebe
(Mc 2.23-28; Lc 6.1-5)

¹ Chē tempo, Jesús canÿe ochnayté canÿe jajajana yojtsachnējuana. Chabe uatsjēndayēngna shēntseca imojtsemna, chíyeca tmojanontšé trigo juatabebiana y chē meshēnga jasana. ² Chē fariseunga chca tmojáninÿe ora, Jesús tmojanianya: —Minÿe, acbe uatsjēndayēnga canÿe soye montsama y chē soye ochnayté jamama ndoñe quenátslesenciana ca.

³ As Jesús tojanēyana: —¿Ndoñe šmēndualía y šmondētatsēmbo ndayá David y chabe enutēnga tmojanmama, shēntseca imojtsemna ora? ⁴ Chca orna, David, Bēngbe Bētsabe bēts yebnoye yojámashēngo y chē Bēngbe Bētsá chentše yojamnama inÿinÿnaye tandēšēnga yojase. Chē tandēše nÿe ndánaca jasama ndoñe yonjalesenciana, ni Davidbiana, ni chabe enutēngbiana. Nÿe bachnangbiana belesenciana chē tandēše jasama. Masque David chca tojanma, Bēngbe Bētsá chora ndoñe tonjánayana David canÿe bacna soye tojanma ca.

⁵ ¿O ndoñe šmēndualía y šmondētatsēmbo, Moisesbe leyiñe, chē bachnanga ochnayté Bēngbe Bētsabe bēts yebnentše jtsetrabájayana, pero ndoñe bacna soye ntsemnana chē bachnanga ochnayté ndoñe mondbóchnama? ⁶ Y atše šcuayana: Muentše canÿa entsemna, cha chē Bēngbe Bētsabe bēts yebnentša bachnangbiana más uamaná endmēna y chabe amēndayoca soyēnga más entsámama chē bachnangbe mándayentša soyēngama. ⁷ Bēngbe Bētsabe uabemana palabrenguiñe mēntšá endayana:

Atše sēntseboše tšēngaftanga lastemadēnga chašmotsemna, y ndoñe nÿe bayēnga chašmotsēbánaye Bēngbe Bētsá jētschuayama ca.

Ntšamo chiñe entsayancá ndegombre cmojtsēsertánēse, tšēngaftanga ndoñe chēngbe contra šmattsichamo, chē ochnayté chca tmojtsamēngbiana. ⁸ Chē Bēngbe Bētsá Entšá tbojanbemá, chē entšá ochnayté tojtsama sóynaca jtsemándayana ca —Jesús tojánayana.

Chē buashana cucuatše bomna entšá
(Mc 3.1-6; Lc 6.6-11)

⁹ Chentšana Jesús tojtsanoñe y chentša judiēngbe enefjuana yebnoye tojánamashēngo. ¹⁰ Chentše yojtsemna canÿe boyabása buashana buacuatše bomná. Chē fariseunga imojtsenguaye ndayánaca, as chca chēnga jtsebmnama ndaye sóyeca Jesús mal jaquédama. Chcasna, chora chēnga Jesús tmojantjá: —¿Queojtselesenciana canÿe ochnayté šocá jáshnama ca?

¹¹ Y Jesús tojanējua: —¿Nda tšēngaftanguentšá, canÿe oveshá tbojtsebmna y nÿa chē ochnayté canÿe fshantsentše atēfjnoye chē oveshá tojtsótsatše, chora chē boyabása nanjá o ndoñe chē oveshá jatábocnama? ¹² ¡Entšá oveshabiana puerta más uamaná endmēna! Chcasna, entselesenciana chē ochnayté tšabe soye jamama ca —Jesús tojanēyana.

¹³ Chora Jesús chē buashana buacuatše bomnábioye tbojanianya: “Macuenÿanējaná ca.” Y chē boyabásana tojanacuenÿanējaná y chora chētša

tšabá yojtsatamna mo cach injëtšacá. ¹⁴ Pero chë fariseunga tmojésanbocana ora, tmojanontšé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbiana tojánayana

¹⁵ Jesús chë soye tojántatšëmbona ora, chentšana tojtsanoñe y ba entšanga tmojanasto. Njëtšca šoquënga tojanashná, ¹⁶ y tojanamëndá chabiana entšángbeñe ndoñe chamondëtsóyebuambnama. ¹⁷ Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

¹⁸ Muentše atšbe oserverná entsemna. Atše cha sënjabocacá, atšbe bonshaná, y atše corente chabiana sëntsoyejuá.

Atše chanjama atšbe Espiritu chabe ainaniñe chaotsemnama y entšanga echanjabuayená, Bëngbe Bëtsá njëtšca luarënguentsana entšangbiana yochjayanama chënga tšabá o ndoñe tšabá tmonjamama.

¹⁹ Cha ndoñe queochátayajuatsana, ni queochátšchembumbuana. Chabe oyebuambnayana tsáshenañe ndocná queochatuena.

²⁰ Mo nda chë atcana šëše ndoñe más jatsndbemana, chë ndobenënga cha ndoñe queochátapochocaye.

Mo nda chë quinñenëfjua nje uabojátšena uajuinñenëfjua ndoñe ntsafsanana, chë Bëngbe Bëtsabeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha njëtš añémoca echanjëftsetrabája, entšanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹ Y njëtšca luarënguentsana entšanga chábeñe mochantsobátmana ca —cha tojánayana.

Fariseunga tmojánayana Jesús Satanásbentšana obenana tojanóyëngacñe ca (Mc 3.20-30; Lc 11.14-23; 12.10)

²² Chora, Jesús yojtsemnoye canje boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínynama y chabuatauénanama. ²³ Y njëtšca entšanga ojnánänënga imojtsichamo: “¿Mua yojtsemna chë Davídbentšana Uámana Entšá, chë Cristo ca?”

²⁴ Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

²⁵ Y Jesús yojtsetátšëmbo ntšamo chënga imojtsejuabnayama; as tojanéyana: “Canje amëndayentše entšanga tmojtsenojatá y tmojtsenáyase, cachënga jenpochócana. Cachcá, canje bëts pueblentša entšanga o canje yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá njëtš tempo quemochátsmëna. ²⁶ Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebo mnana? ²⁷ Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebo mnana chë bacna bayëjënga jtëbuacnama? Chíyecna, chënga montsinýinýná ntšamo ndegombre yomnana y tšëngaftanga ndoñe ndegombre soye šmontsichámuama. ²⁸ Y atšna, chë Bëngbe Bëtsabe Espiritbeyeca chë bayëjënga entšángbentšana sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjanguama.

²⁹ “¿Ntšamo nda nanjobenaye canye corente añemo bomna entsabe yebnoye jamashenguana y chabe soyenga jtsebocana, ndoñe natsana chábioye tconjshétsebatsëquëse? Nye tcojshétsebatsëquësna aíñe cuanjobenaye cha jefcana. Atše ya chca Satanásoftaca sënjama.

³⁰ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

³¹ “Chíyeca cbëyana, Bëngbe Bëtsá entsanga echanjáperdonaye nyetsca chëngbe bacna soyenga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámënga. ³² Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá

(Lc 6.43-45)

³³ “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. ³⁴ ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entšá jtsóyebuambnayana. ³⁵ Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana. ³⁶ Y ndegombre cbëyana, chë entsangbiama tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. ³⁷ Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castigáná jtsemnana ca” —Jesús tojánayana.

Chë bacna entsanga Jesús tmojanimpadá canye bëts soye chaoma, chabe obenana jinýama

(Lc 11.29-32)

³⁸ Chentsana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canye bëts soye chacoma, acbe obenana chašcuinýanýema ca.

³⁹ As Jesús tojanëjua: —Quem puerte bacna entsanga y ndošbuáchiyënga montseboše atše canye bëts soye chaima, atšbe obenana jinýanýiyama; pero chca soye ndoñe quemochátinýe, sinó nye chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. ⁴⁰ Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna. ⁴¹ Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiama mochanjayana ndoñe tšabá tmonjama ca; er chënga, Jonás yojtsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. ⁴² Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca

entsangbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanána palabrënga jouenama, y chë mora muentše entsemnana, Salomonbiana más uamaná endmëna ca —Jesús tojánayana.

*Ndayá inopása chë bacna entsángaftaca
(Lc 11.24-26)*

⁴³ Jesús mentsánaca tojánayana: “Canye bacna bayëja canye entsábentšana tojësebozna ora, chë bayëjna bojojo luarënguenache jtsanana ndayentše jóchnama onguayiñe, y canye luare ndoñe tonjínýena ora cha jenójuaboyana: ⁴⁴ ‘Atsbe oyenoye, chë ndayentšana sënjëftseboznoye chanjesshécona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. ⁴⁵ Chorna chë bayëjna jana y inýe canýsëfta bayëjënga chabiana más opëjënga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entsá jtsemnana, chora chë natsanama más bayëjënga abamna causa. Morsca puerte bacna entsángaftaca cachcá echanjochnëngo ca” —Jesús tojánayana.

*Chë Jesusbe ndegombre pamíllanguentsënga
(Mc 3.31-35; Lc 8.19-21)*

⁴⁶ Jesús cabá entsanga yojtsetsëtsnaye ora, chabe mamá y catsátanga tmojánashjajna y imojtseboše Jesúsëftaca jóyebuambayama. Nýe shjoca imojtsemna; ⁴⁷ asna, canye boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojaniana: —¿Nda atsbe mamá yomna, y ndëmuanýenga atsbe catsátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanënyänýe y tojánayana: —Quemënga montsemna mo atsbe mamacá y mo atsbe catsatangcá. ⁵⁰ Er ndánaca, ntšamo atsbe Taitá, celoca endmëná yobóscá tojt sama, jtsemnana atsbe catsata, atsbe uabena y atsbe mamá, atsbe ndegombre pamíllanguentsá ca —Jesús tojánayana.

13

*Chë jenabe cuento
(Mc 4.1-9; Lc 8.4-8)*

¹ Cach te, Jesús yebnentšana tojëftsanbozna y uafjajónaye tsachoca tojanótbema. ² Mallajta entsanga choye tmojanobeconá; as Jesús, chë uafjajónayentše yojanamna canye barquëshoye tojánasëngo, tojanótbema; y chë entsangna tsachoca imojtsemna. ³ Chorna ba soyëngama cuentëngaca chënga tojanabuatambá.

Mentsá tojanëyana: “Canye jená chë jënaye jaujquëshama yojëftsebozna. ⁴ Yojtsejquëshaye orna, básiëfta jënaye benache juachañe yojuatquécjana, pero chë jaja shloftšënga imojástjajna y lempe imojtsósañe. ⁵ Inýe meshëngna ndëtšbenguñe yojuatquécjana, ndoñe yapa fshantse binýentše. Chiña betscó yojuábocna, fshantse ndoñe jashenocana yonjanmëna causa, ⁶ pero shinýe yojábocna ora, puerte yojojënyána y yojtsancta; y yojtsábojo, bëtscá tbëtëjënga tondaye causa. ⁷ Inýe meshëngna uchmëshangañe yojuatquécjana, y chë uchmëshangá yojuájua orna, lempe yojtsatscué. ⁸ Y inýe meshëngna, uanganëshiñe yojuatquécjana y puerte botamana chiñe yojuashajo: ínýenache nýe canye jënayentšana mo patse meshënga yojuashájona, ínýeñna mo chnënguana bnëtsana meshe y ínýeñna mo unga bnëtsana meshe.”

⁹ Jesús chca jacuéntama tojanpochocá ora, mëntśá tojánayana: “Chë joue-nama tmojtsobenënga, šmochjouena ca.”

Ndáyeca Jesús cuentëngaca yojánabuatambaye
(Mc 4.10-12; Lc 8.9-10)

¹⁰ Chora chë uatsjëndayënga tmojanobeconá y Jesús tmojantjá: —¿Ndáyeca entšanga cuentëngaca cojtsabuatambá ca?

¹¹ As Jesús tojanéjua: —Bëngbe Bëtsá tšëngaftanga cmontsinÿanÿná nÿetsca chë mo iytemencá yomna soyënga chabe amëndayama, pero chë ínÿengbioyna ndoñe. ¹² Nda tojtsebomnábioye más jatštayana y chca cha corente bëtská jtsebomnana; pero chë tondaye tondbomnábioyna, chë batšatema tobomna sóynaca mochántseboca. ¹³ Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque beca chë soyënga chamouena, ndoñe tšabá quemochátuenana, ni queochátësertana. ¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá: Masque beca chamouena, ndoñe queochátësertana.

Masque puerte chamotsantješna, ndoñe quemochátinÿe

¹⁵ Quem entšanga ndoñe quemátsboše botamana jajuaboyana; chënga uamatsáhtonënga montsemna y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojëftsanbema.

¹⁶ “Tšëngaftangna oyejuayënga šmochanjoyena, er šmondobomna bominÿe y matscuašënga Bëngbe Bëtsabe soyënga jinÿama y jouenama. ¹⁷ Ndegombre cbéyana, banga Bëngbe Bëtsabe juabna oyebuambnayënga y nÿetsca soyënguiñe tšabá amënga tmonjánbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanéyana.

Jesús chë jenabe cuentama tojanabuayená
(Mc 4.13-20; Lc 8.11-15)

¹⁸ “Chcasna, oído šmochjajajo; chë jenabe cuento mëntśá endayana: ¹⁹ Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabétsabuajuanama, chënga chiñe ndoñe chamondëtsošbuáchema. ²⁰ Y chë ndëtšbenguiñe yojuatquécjana jénaye entsemna mo chë aíñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; ²¹ pero ndoñe nÿets tempo chana jocochájuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. ²² Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. ²³ Pero chë uanguanëshiñe yojuatquécjana jénaye entsemna

mo chë Bëngbe Bëtsabe palabra tmojouena y botamana jósertana entsangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyengna ín'yengbiana más bëtscá soyënga mochántsama, y chca, ín'yenga jtsemnana mo chë patse meshënga tojanshajo jenaycá, ín'yenga mo chë chnënguana bnëtsancá y ín'yengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

²⁴ Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. ²⁵ Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. ²⁶ Y chë trigo yojuájua y ya yojtseshajuana orna, chë bacna shácuana yojuábocna. ²⁷ As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ ²⁸ Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ ²⁹ Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná játbánama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquëcjnaye yebniñe chamotsatsumamá ca’ ” —Jesús tojánayana.

Chë mostaztiye jenayama cuento

(Mc 4.30-32; Lc 13.18-19)

³¹ Jesús mëntšánaca tojanacuntá: “Bëngbe Bëtsabe amëndayana endmëna mo canye mostaza betiye jenaycá, canye boyabása chabe jajañe yojáje. ³² Ndegombre, nyetsca jenayëngama chë mostaza jénaye chë más básetema endmëna, pero tojójua orna, chë jajañentse chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

Chë levadurama cuento

(Lc 13.20-21)

³³ Quem inýe cuétnaca tojanéyana: “Bëngbe Bëtsabe amëndayana endmëna mo levadurcá; canye shembása chana jenájuabana unga medida arninýañe, nyetsana chauabochama ca.”

Ndáyeca Jesús entsanga cuentëngaca yojanabuayiná

(Mc 4.33-34)

³⁴ Jesús nyetsca chë soyëngama lempe cuentëngaca entsanga jtsëtsëtsnayana, y cuentëngaca ndóñesna ndoñe yonjanoyebuambná. ³⁵ Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuentëngaca chanjóyebuambaye;

chanjayana chë iytëmena soyëngama y chë entsanga ndoñe mondëtatšëmbo soyëngámnaca;

Bëngbe Bëtsá quem luare tojanma orscana chë soyënga yomna ca —cha tojánayana.

Chë tríguañe bacna shácuana cuentama Jesús tojanabuayená

³⁶ Chentsana Jesús chë entsanga tojtanichamó y yebnoye tojtanamáshëngo. Chentsna chabe uatsjédayënga tmojanimpadá ndayá chë bacna shacuanama cuento betsayancá chauabuayenama. ³⁷ As Jesús tojanéyana: “Chë tsabe jénaye jená endmëna chë Bëngbe Bëtsá Entsó tbojanbemá, ³⁸ y chë jajaña, quem luare. Chë tsabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuaana entsemna chë bacna bayëjëngbe amëndayabe entsanga, ³⁹ y chë uayayá, chë bacna shácuaana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga. ⁴⁰ Ntsamo chë bacna shácuaana jtsejashtsëtsana y iñoye jtsatmetsana jtsejuinýiyama, cachcá echántsemna quem luare jopochócama te. ⁴¹ Chorna, chë Bëngbe Bëtsá Entsó tbojanbemá chabe angelotémënga echanjichamuá chë ínýënga bacna soye chamomama amënga y chë bacna soyënga amënga chabe amëndayentsana chamotsajuanayama. ⁴² Y chora chëngbioye chë uabouana iñeshoye mochantsësetjango y chentse puerte mochanjenóbošachna y chë tsetšanama juatsašënga mochantsenoftëšjojnaye. ⁴³ Chora, chë ntsamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojt-sobenënga, šmochjouena ca” —chora Jesús tojánayana.

Chë fshantsiñe uaiytëmena bomnanama cuento

⁴⁴ “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuinýëna y chentsana iytëcana cachentse yojesatbontsá. Corente oyejuayá yojtá, nýetsca chabe bomna soyënga yojetsatobuiye y chentsana chë fshantse yojtobuámiñe ca” —Jesús tojánayana.

Chë corente uámana fiantse ndëtsëtémama cuento

⁴⁵ “Mo canýe entsá uámana fiantse ndëtsëtémënga obuamnañacánaca endmëna chë Bëngbe Bëtsabe amëndayana. ⁴⁶ Chana, canýe corente uámana ndëtsëtëma yojinýëna ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

Chë atarraiëshama cuento

⁴⁷ “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nýetsca beonga jashebuáyana. ⁴⁸ Chë atarraiëshá jútjéna tojtsamna orna, chë beonga ashebuánayënga jtsashëbjátsëcana, tsachoye juyambana y chentse juatbemana chë beonga jabocacayama; chë tsábënga sbarëquënguiñe juatsuámana y chë ndoñe tsábëngna jtsëtšanana. ⁴⁹ Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsabe entsángbentsana bacna entsanga jaluárama, ⁵⁰ y chë bacna entsangna chë uabouana iñeshoye mochántsatquëcjaye, y chentse puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjédayënga Jesús tojanatjá: —¿Lempe chama quecmo-jtsësertana ca?

Y chënga tmojanjuá: —Arseñor, aíñe ca.

⁵² As Jesús tojanéyana: —Canýe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntsamo Bëngbe Bëtsabe amëndayana bëtsemnama cha tojtsatsjendá orna, mo canýe yebnentša nduiñcá cha jtsemnana. Chë nduiña chabe grano uaquëcjnaye yebnocana anteo y tsëm uámana bomnana juabocnana. Cachcá chë ley

abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

Jesús Nazaretoca

(Mc 6.1-6; Lc 4.16-30)

⁵³ Jesús chë soyënga jacuéntama tojanpochocá ora, chentšana tojtsanoñe. ⁵⁴ Y cachabe luaroye tojtashjango y chentša judiëngbe enefjuana yebnentše tojanontsé jabuátambama. Entšanga ojnánënga imojtsichamo: —¿Chë lempe yojtsetatšëmbcá ndëmoca mua tojuatsjinýe ca? ¿Ntšamo nantsobena chca bëts soyënga jamama ca? ⁵⁵ ¿Mua ndoñe yondmëna chë calpinterbe uaqiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabëngana ndoñe muentše bëngaftaca mondoyena? ¿Ndayentšana lempe chca mua yojtsebomna ca? — chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nýetsquénache canýe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

⁵⁸ Chýyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

14

Ntšamo Juan chë Ubayaná tojanóbana

(Mc 6.14-29; Lc 9.7-9)

¹ Chë tempo, Rey Herodes, chë Galileoca mandayá tojanuena ntšamo nýetsca entšanga Jesucristbiana imojtsichamcá. ² As cha chabe oservënënga tojanëyana: “Mua Juan chë Ubayaná ctsemna, obanënguentšana tojtayena, chýyeca chca obenana bëts soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipbe shema. ⁴ Juan Heródesbioye mëntšá ibnauácacana: “Ndoñe quenátslesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. ⁶ Pero Heródesbe cumpleaños oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye. ⁷ Chýyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojaniana: “Canýe šcneniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. ¹⁰ Y as tojanmandá chë Juan yojanëtámenoca chabe bestšaše chamuetsëstjanguama. ¹¹ Chentšana, canýe šcneniñe chë bestšaše tmojanamba y chë tobiaše tmojanëntsabuaché y chana, chabe mamábioye.

¹² Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó
(Mc 6.30-44; Lc 9.10-17; Jn 6.1-14)*

¹³ Jesús chca tojanuena ora, canye barquëshañe tojtsanoñe canye bën luaroye, entšanga ndoyena luaroye. Pero entšanga chama imojátatsëmbona y chë pueblënguentshana tmojánbocana shecuátšeca cha juastama. ¹⁴ Chentšana, chë barquëshoicana tojtanastjango ora, Jesús ba entšanga tojánanye, chë cha tmojánguanguënga. Chëngbiana tbojanongmé y chë entšanguentshana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojanianyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

¹⁶ As Jesús tojanējua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjuá: —Muentše tondaye queftsátsbomna; nye shachna tandëse y uta beónata ca.

¹⁸ As Jesús tojaněyana: —Chë soyënga moye miyëbo ca.

¹⁹ Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, cloye tojanontjese y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanējátaye, y chëngna nyetsca entšanga tmojanacaredadó. ²⁰ Nyetsca entšanga tmojanse jtoshachaye nyetsá y cabá chë ojamnëtémëngaca bnëtsana uta sbarëcua tmojanajutjé. ²¹ Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojsaye
(Mc 6.45-52; Jn 6.16-21)*

²² Chentšana, Jesús chabe uatsjëndayënga tojanamëndá chë barquëshoye jtamashjnama y chë uafjajónaye chenguánoica chabe natsana jashjajnana. Chëntscuana Jesús entšanga yojtichamuá. ²³ Nyetscanga tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuëntama. Yojaibétata ora, cha canya chentše yojtsemna, ²⁴ y chë barquëshana tsachocana bënoca yojsamna. Y chë olëshënga chë barquëshoicana yojsántsetaye, chë binyia chëngbe contra yojtsemna causa. ²⁵ Ya bínyanoyna, Jesús chëngbioye vojobeconá; béjaye juatsbuacá yojsaye. ²⁶ Chabe uatsjëndayënga chca cha tmojáninye orna, tša imojocochauatjaná y puerte auatjanánënga tmojanoyó: —¡Canyë añemëse entsemna ca!

²⁷ Pero chora Jesús tojaněyana: —¡Añemo šmochtsebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbioye tbojanianyana: —Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

²⁹ Y Jesús tbojanianyana: —Mabo ca.

Chora Pedro chë barquëshoicana tojánastjango y tojanontsé béjaye juatsbuacá Jesúsbioye jama. ³⁰ Pero chë binyia tša jabuache yojtsemnama tojáninye ora, Pedro puerte yojsauatja y tbojanontsé jtsenatjëmbambana. Chíyeca cha jabuache tojanchembo: —¡Bëngbe Utabná, šmatsbocá ca!

³¹ Y cachora Jesús tbojtanobuácuëtëntsiye y tbojanianyana: —¡Tša batšatema ošbuachiyá! ¿Ndáyeca ndoñe bëtscá átsbeñe contsošbuaché ca?

³² Chentšana chë barquëshoye chata tbojtanamáshëngo y cachora chë binyia bonguana yojsatsmëna. ³³ Y chora, chë barquëshoye imojtsemnënga Jesusbe shecuatšentše tmojanoshamentšé y tmojanianyana: —¡Aca ndegombre Bëngbe Bëtsabe Uaquiñá comna ca!

*Genesaret ca uabáinoca, Jesús ba šoquënga tojanashná
(Mc 6.53-56)*

³⁴ Chë uafjajónaye tmojánenashbuachengo y canýe luare Genesaret ca uabáinoýe tmojánashjajna. ³⁵ Chentša entsãnga Jesús tmojantëmbá ora, chë luarentša nyetsca entsãnga chama tmojántatšëmbona. As chë entsãnga chëngbe šoquënga Jesúsbioýe tmojanënatse. ³⁶ Y imojtseimpadana nýe mo chabe entsáyá sibiájuanaca juabojajuama chë šoquënga chaualesenciama. Y nyetscanga chabe entsáyá sibiájua tmojanábojajënga, šhnánënga imojtsatoquëdaye.

15

*Ndáyeca canýe entsá Bëngbe Bëtsabe delante ndoñe tšabia nántsemna
(Mc 7.1-23)*

¹ Chora básefta fariseunga y judiëngbe ley abuatambayënga, Jerusalenocana tmojánabënga, Jesúsbioýe tmojanobeconá y tmojanianyana: ² —¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënama ca?

³ As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nýe cach tšëngaftangbe bëtsëtsanga imnétsama soyënga jtsamama ca? ⁴ Bëngbe Bëtsá mëntšá tojanmandá: “Acbe bëtsëtsata stëtsoýe ndoñe catjáquedaye”, y “nda cachabe bëtsëtsatbiamá podesca tojóyebuambase, chana jóbanama jtsemnana ca.” ⁵ Pero tšëngaftanga šmondbëtsichamo canýe entsá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; ⁶ y šmondbëtsichamo nýe ndánaca chca tojayanëse, ya ndoñe ntsemnana chabe taitá o chabe mamá stëtsoýe ndoñe ntjaquédana, ni ntjuajabuáchana ca. Y chca, tšëngaftangbiamá tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsëtsanga imojanamancá. ⁷ ¡Bacna entsãnga, ntšamo ndegombre šmojuabnacá ndinýinýnayënga! Nýe tšabá chë Bëngbe Bëtsabe juabna oyebuambnayá Isaías tšëngaftangbiamá tojanoyebuambá, mëntšá tojánayana ora:

⁸ Bëngbe Bëtsá tonjayana: “Quem entsãnga mondbëtsichamo Bëngbe Bëtsá tša tšabia yomna ca; chca nýe uayásaca, pero chëngbe ainanentše atšbiamá ndocna tšabe juabnëngaca.

⁹ Chënga nýe bonamente mondbëtsichamo: Bëngbe Bëtsá tša tšabia yomna ca; chënga nýe entsãngbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

¹⁰ Chentšana Jesús entsãnga tojánachembo y tojanëyana: —Smochjouena y chacmësertá. ¹¹ Ndayá entsá tojtsesacá, ndoñe quebochátsbema Bëngbe Bëtsabe delante ndoñe tšabia. Inýetsá comna: ndayá entsá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

¹² Chora chë uatsjëndayënga Jesúsbioýe tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

¹³ As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nýe entsãngbe buatëmbana soyëngaca. ¹⁴ Cachcá mónýaye; chënga montsemna mo jtanënga inýe

jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentse bochanjetsótsatse ca —Jesús tojánayana.

¹⁵ Chora Pedro, Jesúsbioye tbojaniyana: —Ntšamo chë cuento bétsayanama šmabuayená ca.

¹⁶ As Jesús tojanëjua: —¿Tšëngaftángnaca cabá ndoñe cmontsésertana ca? ¹⁷ ¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana? ¹⁸ Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. ¹⁹ Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostérama y ínÿabiama jtsayátsenayama. ²⁰ Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsoyobenana Bëngbe Bëtsabe delante ndoñe tšabia jabemama ca —Jesús tojánayana.

Canÿe shembása inÿe luarocana ashjanganá Jesúsbeñe yojtsošbuaché (Mc 7.24-30)

²¹ Jesús chentšana, Tiro y Sidón luarëngoye tojtsanoñe. ²² Canÿe shembása Caná luarocá chentše inoyena; cha Jesúsbioye yojobeconá y mëntsá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebomna causa ca!

²³ Jesús ndocá tbojanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanÿenama nÿe chë entšanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

²⁵ Pero chë shembása tojána, Jesusbe shecuatšentše tojanoshamentšé y tbojaniyana: —¡Utabná! Diosmanda pavor šmotsebema. ¡Šmotsajabuache ca!

²⁶ Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tchojuajabuache y chëngbioye ndóñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquëcjanatemënga mondbase, chë nduiñënga tmojt-sesá ora. Chcasna, Diosmanda šmotsajabuache ca.

²⁸ Chora Jesús tbojaniyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

Jesús ba šoquënga tojanashná

²⁹ Jesús chentšana tojëftsanbocna y chë Galilea uafjajónaye tsachoye tojána. Chentšana, canÿe batsjoye tojántsjuá y choca tojanótbema. ³⁰ Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nÿetscanga tojanashná. ³¹ Y chca orna, chë entšanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanënga yojtsëbinÿna; y chama chënga corente

ojnanánënga imojtsemna. Chora chënga tmojanontsé jëtschuayana chë Israe-
lentša entsanga imojánadorana Bëngbe Bëtsá.

Jesús canta uaranga boyabásenga saná tojanacaredadó
(Mc 8.1-10)

³² Chentsana Jesús, chabe uatsjédayënga tojánachembo y tojanëyana: —
Quem entsangbiama šontsengmena, er ya unga te chënga átšeftaca muentše
montsemna y jasama tondaye quemátsbomna. Atše ndoñe quetsátsboše
ntjascá cachëngbe yebnoye chënga jtichamuana, er benachiñe shëntsama
nantsabuatëcja ca.

³³ As chabe uatsjédayënga tmojantjá: —¿Ntsámo muatjobenaye quem
luarentše, ndocna entsá ndoyenentše, chëfta entsangbiama saná jinýenama
ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canýsëfta tandëse y básefta beonatémënga ca.

³⁵ Chora Jesús tojanamëndá nyetsca entsanga fshantsiñe chamotbiamama.
³⁶ As chë canýsëfta tandëse y chë beonatémënga tojanca; Bëngbe Bëtsábioye
chama tbojtanchuá, chë saná tojanjatá y chabe uatsjédayënga tojanëjatá.
Chentsana nyetsca entsángbioye tmojanacaredadó. ³⁷ Nyetsca entsanga tmo-
janse jtoshachaye nyetsá. Y chentsana cabá canýsëfta bëts sbarëcua tmojana-
jutjé chë tojanójamëtemëngaca. ³⁸ Chë tmojansënga imojamna canta uaranga
boyabásenga, shembásenga y básenga ntjacuntacá. ³⁹ Chentsana Jesús, chë
entsanga tojtanichamó, barquëshoye tojánamashëngo y Magadán luaroye
tojtsanoñe.

16

Chë fariseunga y saduceunga tmojánbošena Jesús chaoma canýe bëts soye
(Mc 8.11-13; Lc 12.54-56)

¹ Fariseunga y saduceunga tmojána Jesús jinýama, y jisháchichiyama imojt-
seimpadana canýe bëts soye chaoma, as jtsetatšëmbuama Jesusbe obenana
ndegombre Bëngbe Bëtsábiocana tainóbocanama.

² Pero Jesús tojanëjua: “Tšëngaftanga jetiñoye šmondbëtsichamo: ‘Yëfse
tšabe te echántsemna, er celoca buánganiñe entsemna ca.’ ³ Y cachëse
šmondbëtsichamo: ‘Mënté echanjuafté, er celoca buánganiñe y ibetiñe
entsemna ca.’ Tšëngaftanga cloye jontjeshiyëse, ntsámo chë tempo yochtsem-
nama tša tšabá jayanama šmojtsobenëse, ¿ndáyeca ndoñe šmontsobena jtse-
tatšëmbuana ndaye bëts soye Bëngbe Bëtsá quem tempo cmojtsinýanýnama?

⁴ Quem puerte bacna entsanga y ndošbuáchiyënga montseboše atše canýe
bëts soye chaima, obenana jinýanýiyama; pero ndoñe chca quemochátinýe,
sinó nýe chë ndayá yomna mo chë Bëngbe Bëtsabe juabna oyebuambnayá
Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentsana tojtsanoñe.

Jesús tojanabuayená chë fariseungbe buatëmbana soyëngama
(Mc 8.14-21)

⁵ Chë uafjónoye chenguanoicana chënga tmojtanabo ora, chë uat-
sjédayënga yojésebnëtjomba tandëse jesocñana. ⁶ Chora Jesús tojanëyana: —
Smochtsantjeshna; cuedado smochtsebomna chë fariseunga y saduceungbe
levadurama ca.

⁷ Pero chë uatsjédayëngna imojtsenatsëtsnaye: —Chca entsichamo, bënga
tandëse ndoñe tmonjesocñana ca.

⁸ Jesús chë soye yojtsetátšëmbo; chíyeca mëntsá tojanëyana: —¿Ndáyeca
tandëshama šmojtsenatsëtsná ca? ¡Tša batšatema ošbuáchiyana šmobomna!

9 ¿Cabá ndoñe cmontsésertana y ndoñe šmontsabouínÿna chë shachna tandëšentšana shachna uaranga entšanga sënjanëjuatšema y bnëtsana uta sbarëcua šmonjánajutjema? 10 ¿Y ndoñe šmontsabouínÿna chë canÿsëfta tandëšentšana canta uaranga entšanga sënjanëjuatšema y canÿsëfta sbarëcua šmonjánajutjema? 11 ¿Ndáyeca ndoñe cmontsésertana atše tandëšama ndoñe sëntsóyebuambnama? Cuedado šmochtsebomna fariseunga y saduceungbe levadurama ca —Jesús tojanëyana.

12 As chora chë uatsjéndayënga tojanësertá, Jesús ndoñe tonjánayana chë tandëšentša levadurama cuedado jtsebomnana ca, sinó ndayá chë fariseunga y saduceungbe buatëmbana soyëngama.

*Pedro tojánayana, Jesús chë Cristo bëtsemnama
(Mc 8.27-30; Lc 9.18-21)*

13 Jesús, Cesarea de Filipo luaroye tojánashjango ora, chabe uatsjéndayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

14 Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyeuambnayá ca.

15 As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

16 Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

17 Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná. 18 Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëtš yebna chanjajebo, y ni Satanás, chabe obenánaca entšá jóbanama, queochatobenaye jtsepochócama. 19 Atše cbochanjátsetaye obenana, mo llavëfjca, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanayana.

20 Chentšana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

*Jesús tojánayana cha ibojamna jóbanana y jtayenana ca
(Mc 8.31-9.1; Lc 9.22-27)*

21 Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerta chaopadecema ca. Tojanëyana cha mochjanóba, pero unga tianoye yochtanayena ca. 22 Chora Pedro, Jesúsëftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrëbioye tbojanayana: —¡Satanás, átšbentšana mojuaná! ¡Aca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.

²⁴ Chentšana Jesús chabe uatsjédayënga tojanéyana: —Nda atšbe uat-jendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiana jasúfriama chaotseprontana y cruciñe jobanámnaca. ²⁵ Nda tojtsama quem luarentše bëtscá soyënga jtsebom-nama y atšbiana jasúfriama ndoñe tontseprontana, chë nýetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. ²⁶ ¿Ndayama entšá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida to-jtsoperdese? Ndegombre, canýe entšá chë nýetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnama. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcá ntšamo cada ona tojëftsemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinýcá ca —Jesús tojánayana.

17

Jesús inýetšá tojanobinýná (Mc 9.2-13; Lc 9.28-36)

¹ Chentšana chnënguana tianoye, Jesús tojëftsanëbiatše Pedro, Santiago y chabe catsata Juan, y ínýoye tojanënatse nýe chënga, canýe bëtš tjoye. ² Chentše, chëngbe delante inýetšá cha tojanobinýná. Chabe jubiá shinýcá yojtsebuashinýinýana, y chabe uichëtjonéjuangana mo binýniñcá uafjantsëjuangá yojtsamna. ³ Chca orna, chabe uatsjédayënga tmojáninýe Moisés y Elías tbojanobinýná, Jesúsftaca encuéntaye.

⁴ Chora Pedro, Jesúsbioye tbojanianya: “Bëngbe Utabná, ¡tša tšabá bëngbiana cuanmëna muentše jtsemnana ca! Tcojtsebošëse, unga tambotémënga atše chjapórma: cánýetema acbiana, ínýetema Moisesbiana y ínýetemna Elíasbiana ca.”

⁵ Pedro chca yojtsóyebuambnantscuana, canýe buashinýinýana jantšetëshe nýetscanga yojáutsbotse. Y chë jantšetëshoicana canýe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiana sëntsoyejuá. Cha šmochtseyeunana ca.”

⁶ Y chë uatsjédayënga chca tmojanuena ora, tmojanoshamentsé y jubiaca fshantsóntscoñe tmojanotsejbéna, puerte auatjanánënga. ⁷ Chora Jesús chabe uatsjédayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

⁸ Y tsbanánoye tmojanontjeshé ora, Jesús nýe canýa tmojáninýe, ndocná inýa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentshana candétayenëntscuana, ndocnábeñe chë šmonjinýe soyama šmattsecuéntaye ca.

¹⁰ As chë uatsjédayënga Jesús tmojantjá: —¿Ndáyeca chë ley abuatambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanéjua: —Ndegombre canýa Eliascá natsana echanjabo y ntšamo jtsemnama yomncá, lempe echánjabatsma ca. ¹² Pero atše cbéyana, canýa mo Eliascá ya tonjabo, entšanga ndoñe chematanotëmbá y

cháftaca entsanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšíñe echanjasúfria ca — Jesús tojánayana.

¹³ Chora chë uatsjédayënga tojanësertá, Juan chë Ubayanabiama Jesús chca yojtsëtsëtsnama.

Jesús, canye bacna bayëja tbojanbojuaná
(Mc 9.14-29; Lc 9.37-43)

¹⁴ Entsanga imojtsemnoye chënga tmojtashhajna ora, canye boyabása tojanobeconá, Jesusbe natsanoica yojshamentšiyey y tbojaniyana: ¹⁵ — Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inye ora iñoye jtseshajayana y inye orna, buyeshoye jtsoshbuetšana. ¹⁶ Acbe uatsjédayëngbioye cha sënjuánatse y ndoñe chema-tobená jtseboshnama ca —cha tbojaniyana.

¹⁷ As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tsëngaftangaftaca jëftsemnana? ¿Buetayté uantado tsëngaftangaftaca chjëftsemna? Moye chë básetema mánatse ca.

¹⁸ Chora Jesús, chë basetembeñe bacna bayëjbioye tbojanácacana y chábertšana cha tojésanbocna. Cach orscana chë básetema tsábá yojtsatsmëna.

¹⁹ Chentsana, chë uatsjédayënga luaroca Jesúsëftaca tmojanoyebuambá y tmojaniyana: —¿Ndáyeca bënga ndoñe fsënjobená chë bacna bayëja jtabocnama ca?

²⁰ Y Jesús tojanëyana: —Tsëngaftanga tša batšatema ošbuáchiyana bomna causa. Ndegombre šcuayana: tsëngaftanga batšatema ošbuáchiyana šmojtsebomñese, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tsëngaftanga lempe jamama šmattsobena. ²¹ Pero chca bayëjenga jtëbuacnamna jobenayana nye Bëngbe Bëtsáftaca jencuéntase y chama tondaye ntjascá jtsemñese ca —Jesús tojanëyana.

Jesús cachiñe tojánayana cha ibojamna jóbanana y jtayenana ca
(Mc 9.30-32; Lc 9.43-45)

²² Jesús y chabe uatsjédayënga cányiñe Galilea luaroye imojétsaye ora, cha tojanëyana: “Chë Bëngbe Bëtsá Entšá tbojanbemá entsangbe cucuatšíñe mochanjáboshjona, ²³ mochanjóba, pero unga tianoye echántayena ca.” Chë causa chë uatsjédayënga puerte ngménaca imojtsemna.

Chë Bëngbe Bëtsabe bëts yebnama impuesto jtsatsquëcjnyama

²⁴ Jesús y chabe uatsjédayënga Capernaumoye tmojánashhajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonýbetsatsquëcjnyaye ca?

²⁵ Y Pedro tojanëjua: —Aíñe, cha endbetsatsquëcjnyaye ca.

Chentsana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaoye? ¿Quem luarentša reyënga ndémuanýngbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inye luarocana ashjajnëngbioye ca?

²⁶ As Pedro tbojanjuá: —Chë inye luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca. ²⁷ Pero ndocná mal chabonduínñanamna uafjónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana

cochanjínÿena y chánaca echanjoshjache atšbiama y acbiama jëtsjájuama. Cochjëftsejatsëca y cochjatsboshjona ca —Jesús tbojaninyana.

18

*¿Nda chë más uamaná yomna?
(Mc 9.33-37; Lc 9.46-48)*

¹ Chentšana chë uatsjédayënga Jesúsbioye tmojanobeconá y tmojantjá: — ¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canÿe basetëmbioye tbojanchembo y chëngbe tsëntsaca tbojanatsá. ³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjójyëngacñe, cha ndocna te queochatobenaye Bëngbe Bëtsabe amëndayoye jamashënguama. ⁴ Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. ⁵ Y nda átšbeñe ošbuachiyá bëtsemnayeca, tbojofja canÿa mo quem basetëmbioycá, chana atše jofjana ca —Jesús tojánayana.

*Resjo yomna, nderado bacna soyënga cuanjama
(Mc 9.42-48; Lc 17.1-2)*

⁶ “Nda canÿe básetema átšbeñe ošbuachiyábioye tbojaingñé bacna soye jamama, chabiama más tšabá nántsemna canÿe bëts nantsnëbé chamotsetamošëntšbua y chë mar béjaye shbuatsëntsoye chamotsashbuetše chabotsenatjëmbama. ⁷ ¡Tša lastema quem luarentša entsangbiama, chë ínÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nÿetsca tescama yomna tšabe vida jtsebomnama, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe íñeshoye chacmotsëstjango. ⁹ Nderado acbe bomínÿeca bacna soye tcojinÿe y cachca soye tcojama, chë bomínÿe cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nÿe canÿe bomínÿeca, y ndoñe nÿets uta bomínÿeca infiernoye chacmotsëstjango, chë bëts íñeshoye ca” —Jesús tojánayana.

*Chë ótsëna oveshabiamna cuento
(Lc 15.3-7)*

¹⁰ Mëntsánaca Jesús tojánayana: “Ni mo cánÿabioye quem tsëm ošbuáchiyënguentsana, chë mo basetemëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondëtsemna ca. ¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

¹² “¿Ntsámo tšëngaftanga šmatjájuaboye? Canÿe boyabása patse oveshënga tojtsabamna y ndeolpe canÿe chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesënÿaye, jama chë ótsëna oveshá jetsenguanguama? ¹³ Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiamna, y ndoñe nÿa chca chë inÿe esconëfta bnëtsana y esconëfta oveshëngbiama chë ndoñe tmonjanotsëngbiama. ¹⁴ Cachcá, tšëngaftangbe Taitá,

Bëngbe Bëtsá, chë celoca endmëná, ndoñe quenátsboşe ni canya quem basen-guentšana mo otšenacá chaotsemna, bacna soyënga jtsamëse oyena causa ca” —Jesús tojánayana.

Ntšamo cuanjama inya japerdónama

(Lc 17.3)

¹⁵ “Nderado acbe catšata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatsmëna. ¹⁶ Pero ndoñe tcmónjóyeunasna, inye útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. ¹⁷ Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya Bëngbe Bëtsábioye nduabuatmacá, mo canye ndoñe judiycá ca o canye bacna entsá mo canya Romocama impuesto entsángbioye atjanayacá yomna ca.

¹⁸ “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canye soye aiñe chaotsemna ca, Bëngbe Bëtsá echanjayana aiñe chca chaotsemna ca.

¹⁹ “Mëntsánaca cbëyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. ²⁰ Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

²¹ As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canÿsëfta soye ca?

²² Y Jesús tbojanjuá: —Ndoñe nÿe canÿsëfta soyama quecbatatsëtsná, sinó canÿsëfta bnëtsana soye canÿsëfta ca.

Ndayá inopása chë japerdónama ndëbošëngaftaca

²³ Mëntsánaca Jesús tojanëyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canye réyëftaca tojanopasacá. Cha yojábošena chabe oservénënga crocénana jtsëtjañana. ²⁴ Jtsëtjañama yojóntša orna, canye boyabása imojuánatse, chë réybioye mallajta crocénana ibnandebena. ²⁵ Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nÿets tempo nÿe inÿabiama chaot-soservénama, chabe shema y chabe básengnaca, y lempe ntšamo yojan-bomncánaca, y chca chë ndebénama jtopágama. ²⁶ Chora chë oservená chë reybe shecuatšentše yojoshamentsiye y ibojtseimpáda: ‘Taita, Dios-manda šmotsëuantajema. Atše lempe cbochanjëtsëntsabuachiye ca.’ ²⁷ Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

²⁸ “Chë oservenana chentšana yojésebocna y benachiñe inye oservenáftaca ibojenbetše, cach mandadbiamá trabajayá. Chë inye oservenana nÿe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntsá ibojauyana: ‘¡Ndebénana šmatsëntsabuaché ca!’ ²⁹ Chora cha chë os-ervenabe shecuatšentše yojoshamentsiye y ibojtseimpáda: ‘Diosmanda šmotsëuantajema. Atše lempe cbochanjëtsëntsabuachiye ca.’ ³⁰ Pero chë oservená ndoñe yonjábošena, sinó yojama chë inye oservenábioye

cárceloye chamotsétámiamana, chë ndebénana candëtsjájëntscuana. ³¹ Chë inye oservénenga chca imojinye ora, puerte yojóngmia y imojá lempe ntšamo yojopasacá chëngbe rey jacuéntama. ³² As chë rey yojamánda chë boyabása jobetsana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná. ³³ Acnaca cachcá cmondmëna chë cach aquécá muentša trabájayabiama jóngmiana, ntšamo atše acbiama šonjongmecá ca.’ ³⁴ Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmëná, cachcá tšëngaftangata echanjama, tšëngaftangbe catšata ndoñe ndegombre nyets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtšenama (Mc 10.1-12; Lc 16.18)

¹ Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica. ² Ba entšanga tmojanasto y chentše šoquënga tojanashná.

³ Básefta fariseunga Jesúsbioye tmojanobeconá y jisháchichiyama mëntšá tmojantjá: —¿Queojtselesenciana canye boyá nye ndayámnaca chabe shémbioye cachcá jesonýayama ca?

⁴ As Jesús tojanéjua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”? ⁵ Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canýacá bochántsemna ca.” ⁶ Y chca, ya ndoñe útata quebochátsmëna, sinó mo nye canýacá. Chcasna, entšá ndoñe chaondëndbema ndayá Bëngbe Bëtsá mo canýiñcá tojéftsema soye ca —Jesús tojánayana.

⁷ Chora chë fariseunga tmojanianyana: —¿As, ndáyeca Moisés tojanmandá, chë shémbioye canye uabemana tsbuanácha juiyiyana jtšenëtšenama y cachcá jesonýayana ca?

⁸ Y Jesús tojanéyana: —Tšëngaftanga Bëngbe Bëtsabe mandënga jójëngacñama ndoñe quešmátsboše causa, Moisés tcmojanalesenciá shémbioye jesëtšenana. Pero quem luare jobojátšama orna, ndoñe chca quenjatsmëna. ⁹ Atše cbëyana, nda chabe shémaftaca tbojtsenëtšena y chca tojopasá ndoñe chë shema chabe boyábioye ínýaftaca tbontseingñé causa, y chë boyá ínýaftaca tojtóbouamasna, cha chë natsana shémbioye ínýaftaca jtseingñayana ca —Jesús tojánayana.

¹⁰ Chora chabe uatsjëndayënga tmojanianyana: —Chca chë boyá y shémaftaca tojtsemnësna, ndoñe tšabá yontsemna jobouamayana ca.

¹¹ Y Jesús tojanéyana: —Nyetscanga ndoñe quemátobena chë palabrenga jójëngacñana, nye chë Bëngbe Bëtsá tojama jójëngacñama chamobenama, chëngna aíñe. ¹² Ba soyënga comna ndaye causa chë boyabásenga ndoñe ntsoobenana jobouamayana. Inyënga jónýnana jobouamayama ndobenënga, ínýengbioye cach entšanga jábiamana jobouamayama ndobenënga y ínýengna, nyets tempo nye Bëngbe Bëtsabe amëndayama oservena causa ca — tojanéyana.

Jesús, basetëmëngbiama Bëngbe Bëtsábioye tbojanimpadá (Mc 10.13-16; Lc 18.15-17)

¹³ Entšanga basetémenga Jesúsbioye tmojanénatse, cha chauabojajuama y Bëngbe Bëtsábioye chëngbiamá chaboimpadama. Pero chë uatsjédayëngna tmojanontsé chë basetémenga unachayënga jtsécácanana. ¹⁴ Chora Jesús tojanéyana: “Cachcá mónyaye chë basetémenga átšbioye chamuabo y ndoñe matéuyanana; er Bëngbe Bëtsabe améndayana endmëna mo quem basetémengcá imomnëngbiamá ca.” ¹⁵ As chë basetémenga tojánabojajo, Bëngbe Bëtsá jaimpádase; y chentšana cha tojtsanoñe.

*Canye bomna bobontse Jesúsbioye tojána
(Mc 10.17-31; Lc 18.18-30)*

¹⁶ Chentšana, canye boyabása tojána Jesús jinýama y mëntšá tbojantjá: —Buatëmbayá, ¿ndaye tšabe soye chjama chë nyetsca tescama yomna tšabe vida jtsebmomna ca?

¹⁷ Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nye canya endmëna: Bëngbe Bëtsá. Aca chë nyetsca tescama yomna tšabe vida jtsebmomna tcojtsebošëse, mandënga cochtsobedecena ca.

¹⁸ Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena. ¹⁹ Acbe bëtsëtsata stëtsoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojanijana.

²⁰ Chora chë bobontse tbojanjuá: —Atše lempe chca nyets tempo sëndocumplina. ¿Ndayá más šojtsebuáshbena ca?

²¹ As Jesús tbojanijana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjémenga cochtsatšataye; chca, bëts uacanana soye celoca cochántsebmomna. Chentšana cochjabo y šcochjuasto ca.

²² Chë bobontse chca tojanuena ora, ngménaca yojsatoñe, cha corente bomná bemna causa.

²³ Chora Jesús chabe uatsjédayënga tojanéyana: —Ndegombre cbéyana, puerte totcá entsemna canye bomnabiamá Bëngbe Bëtsabe améndayoye jamashënguama ca. ²⁴ Chë bomnabiamá cachiñe šcuatayana: Más paselo entsemna canye camello chë coshufjentša atëfjnëjana chauachnëngo, y ndoñe canye bomná Bëngbe Bëtsabe améndayoye jamashënguana ca.

²⁵ Chabe uatsjédayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbocaná jtsemnama ca?

²⁶ Jesús chënga tojanënyanýe y tojanéyana: —Entšanga ndoñe quemátobena jamama canya atsbocaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

²⁷ Chora Pedro tbojanijana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjóyëngacñe ca?

²⁸ As Jesús tojanéyana: —Ndegombre cbéyana, nyetsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenësiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiamá mo reyëngcá, chë Israeloca bnëtsana uta bëts pamillentša entsangbiamá jayanama tšabá o ndoñe tšabá tmonjamama. ²⁹ Y ndëmuanýënga, atše jasérviamá tmojëftseboshjona cachëngbe yebna, catšátanga o uabënanga, befta o bebmá, básënga o fshantsënga, chë soyëngama patse soye más mochanjóyëngacñe y chë nyetsca

tescama yomna tšabe vídnaca. ³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

20

Chë trabájayëngbiama cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiña canye te cabá cachëse yojábocna peonga janguanguama, chabe uvas betiyënga jajañe chamotrabajama. ² Chë nduiño peonga yojányena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabajama. ³ Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá. ⁴ As yojáuyana: ‘Tšëngaftángnaca atšbe uvas betiyënga jajoye motsajna jatrabajama y ntšamo chašmojamcá chochtëbuénaye ca.’ Y chë entsanga imojá. ⁵ Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶ Mo la cinco ora, chë nduiño cachiñe yojábocna y chenache ínÿenga yojányena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’ ⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabajama y chochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y chochtëbuénaye. Chë ústonoye tmojáshjajnënguentsana cochjabojátsa y chë natsana tmojáshjajnënga ústonoye ca.’ ⁹ Y chë mo la cinco ora imojáshjajnënga imojobeconá, y cada ona canye denario crocénana yojtáyentšbuachiye. ¹⁰ Chentšana, chë natsana jatrabajama imojáshjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canye denario crocénana yojtëbuénaye. ¹¹ Chca imojóyëngacñe orna, chënga imojóntša chë nduiñbiama bacá ichámuana, ¹² mëntšá: ‘Quemënga chë ústonoye tmonjáshjajnënga nÿe canye horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

¹³ “Pero chë nduiño canya chca yojtsichamuábioye ibojojuá: ‘Sobreno, achiamana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca? ¹⁴ Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabajama tojashjanguá jtabuénayana, cachcá ntšamo aca tcojtabuenacá. ¹⁵ Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebomna, atše tšabia tsmënama ca?’ ” —cha yojayana.

¹⁶ Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

Jesús cachiñe tojánayana cha jóbana y jtayenama (Mc 10.32-34; Lc 18.31-34)

¹⁷ Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: ¹⁸ “Tšëngaftanga šmontsonÿá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšinë mochanjáboshjona, y chënga mochanjayana jóbana cha ibojtsemna ca, ¹⁹ y chë ndoñe judiëngbe cucuatšinë mochanjáboshjona chënga

chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye
(Mc 10.35-45)

²⁰ Chentshana, Zebedeobe uaquiñatbe mamá chabe uaquiñataftaca Jesúsbioye tojanobeconá, chabe shecuatšentše yojoshamentšiyē canyē pavorama jaimpádama. ²¹ As Jesús tbojantjá: —¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, coch-jamánda atšbe uaquiñata chabótbema canya acbe catsbioica y chë inya acbe uañicuayoica, ácaftaca chabotsemándama ca.

²² Y Jesús tojanējua: —Ntšamo šmotsotjanañama, tsëndata ndoñe quešnátstatšēmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

²³ Chora Jesús tojanējua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catsbioica o atšbe uañicuayoica chaótbemama. Chë útentše entsemna ndëmuanyëngbiama atšbe Taitá to-japrontacá ca.

²⁴ Chë inye bnëtsana uatsjédayënga chca tmojanuena ora, chë uta catsátaftaca tmojanotjayaná. ²⁵ Chora Jesús chë uatsjédayënga tojánachembo y tojanējyana: —Tšëngaftanga šmondëtatšēmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inye entšanga sempre chamotsayaunanama. ²⁶ Pero tšëngaftangbeñna ndoñe chca chaondëtsemna. Inyëtšá; masna, nda tšëngaftanguentše chë más uamaná jtsemnama tojtsebošá bontsemna chë inyënga jtsaservénana. ²⁷ Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nye inyabiama nyets tempo oservenacá. ²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviama. Y mo nda inyënga játsebacama cuafjëtšajocá, cha echanjóbana, ba entšanga atsebácanënga chamotsemnama ca —Jesús tojánayana.

Jesús uta jtanata tojanashná
(Mc 10.46-52; Lc 18.35-43)

²⁹ Chënga, Jericó bëts pueblentsana tmojánbocana ora, ba entšanga Jesús imojtsëstona. ³⁰ Uta jtanata benache juachañe ibnatbemana. Jesús chëjana yojtsachnëjuanama chata tbojanuena ora, tbojanontšé uayebuáchana: —¡Utabná, Davídbentsana Entšá, šmotsalastemá ca!

³¹ Entšanga chë jtanátbioye tmojtsanëcácana iytëca chabotsemnama, pero chatna más ibojtsáyebuache: —¡Utabná, Davídbentsana Entšá, šmotsalastemá ca!

³² As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiama chjamama ca?

³³ Y chata tbojanjuá: —Utabná, bëndata chabuatëbínynama ca.

³⁴ Jesús chatbiama tbojanongmé y tojánabuchbojajo. Cachora chë jtanata tšabá yojtëbinyna y Jesús tmojanasto.

21

Jesús Jerusalenoye tojánashjango
(Mc 11.1-11; Lc 19.28-40; Jn 12.12-19)

¹ Ya Jerusalenoca béconana imojtsemna y canyē pueblo Betfagé ca uabáinoca tmojánashjango, canyē tjashe Olivos ca uabáinentše. Chora Jesús

uta chabe uatsjéndayata tojanichamó,² y mēntśá tojanéyana: “Tsēndatbe nat-sana entsemna base pueblotémoye motsata. Cachora canye burrá utsbuana šochanjínýena y cháftaca canye burrotema echántsemna. Sochjuajafjoná y sochjuánatse.³ Nderado nda ndayánaca chacmojáuyanése, sochjauyana: ‘Bēngbe Utabná bontśájaboto y chentśana camuentše echanjabáisabashejuana ca.’”

⁴ Chca tojanopasá, cachcá chaotsemnama ntśamo chē Bēngbe Bētsabe juabna oyebuambnayá tojanayancá. Cha mēntśá tojanábema:

⁵ Jerusalén bēts pueblentše oyenēnga mēyana:

“Minýēnga, tšēngaftangbe Rey chentše tšēngaftangbioye entsabó, ndoñe mo canya cachá bētsá enobiamnayacá; canye búrrbeñe enjaquená; canye burrotēmiñe, canye uatrabájaye bayabe šešónbeñe ca.”

⁶ Chora chē uatsjéndayata tbojána y tbojanma ntśamo Jesús tojanamēndacá.

⁷ Chē uatsjéndayatna chē burrá y chē burrotema tmojanēnatse, entsayējuangá chátbeñe tbojanájatse y chora Jesús chábeñe tojanenoyayé.⁸ Bētscá entsanga chēngbe entsayá chē benachējana imojtsētétsatsana, y ínýengna betiyeshēnguiñe buacuafjēnga imojtsetcoye y chiñe imojtsequēcjná.⁹ Y chē natsana imojtsajnēnga y chē ústonoyēnga mēntśá imojtsaiuáyebuache: “¡Rey Davídbentśana Entśá matschuanga ca! ¡Corente bendición bomná, chē Bēngbe Utabnabe obenánaca tojabá! ¡Bēngbe Bētsá celocá matschuanga ca!”

¹⁰ Jesús Jerusalenoye tojánamashēngo ora, nyetsca entsanga imojtsenboue-nana y banga imojtsenoticiaye: —¿Nda mua yojtsemna ca?

¹¹ Y chē entsanga imojtséjuana: —Chē Bēngbe Bētsabe juabna oyebuamb-nayá Jesús, chē Galileoca pueblo Nazaretocá ca.

Jesús, Bēngbe Bētsabe bēts yebnentśana enēnga y obuámnyēnga tojtanēbuacna (Mc 11.15-19; Lc 19.45-48; Jn 2.13-22)

¹² Chentśana Jesús, Bēngbe Bētsabe bēts yebnoye tojánamashēngo y chē entsanga chentše imojtsena y imojtsobuámnañēnga chentśana tojtanēbuacna. Chéntśnaca imojtsemna entsanga canye crocénana enēnga, y chē crocénana nýe Bēngbe Bētsabe bēts yebnentśama inoservena. Chēngbe mesēshangá tojtsa-nenásatajchquēca y chē palomatema enēngbe tšenēšēngnaca.¹³ Y tojanéyana: “Bēngbe Bētsabe uabemana palabrenguiñe cha mēntśá tojánayana: ‘Atśbe bēts yebna echantsabaina átšeftaca encuéntaye yebna ca’; pero tšēngaftangna, atbēbanēngbe oyeniñe chē yebna šmojtsebema ca” —Jesús tojanéyana.

¹⁴ Chentśana, Jesús yojtsemnoye Bēngbe Bētsabe bēts yebnentše, jtanēnga y coshetēnga tmojanobeconá, y cha tojanashná.¹⁵ Chē bachnangbe más uámna amēndayēnga y ley abuátambayēnga, Jesús bēts soyēnga yojtsamama tmojáninýe ora, y chē basetémēnga Bēngbe Bētsabe bēts yebnentše imojt-sayebuáchama tmojanuena ora, tśa tmojanotjáyanga. Chē basetémēnga mēntśá imojtsáyebuache: “¡Chē Rey Davídbentśana Entśá matschuanga ca!”

¹⁶ As Jesús tmojaniyana: —¿Ntśamo chē basetémēnga montsichamcá quect-suenana ca?

Y Jesús tojanéjua: —Aíñe, sēntsuenana. Pero, ¿tšēngaftanga Bēngbe Bētsabe uabemana palabrenguiñe chē soyama ndoñe šmēndualía? Chiñe mēntśá endayana:

Chē basetémēnga y ochóchaye šešonatémēngbe cantēngaca aca tcojama entsanga chacmotsatschuanama ca.

¹⁷ Chora Jesús chēnga tojésanabashejuana y Jerusalenentśana Betania pueblōye tojtsanoñe; y chentše chē ibeta tbojánbobinýna.

Jesús tojánayana canye higo betiye ndoñe más chaondēshájona ca (Mc 11.12-14, 20-26)

¹⁸ Chë te cachëse, Jesús cach bëts puebloye yojtésa ora, tbojánishëntsena. ¹⁹ Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojinÿena. As Jesús chë higo betiyoye tojánayana: “¡Ndocna te más chacondëshájona ca!” Y betesco chë higo betiye tojtsanbuashá.

²⁰ Chë uatsjédayënga chca tmojáninÿe ora, imojenjnaná y Jesús tmojantjá: —¿Ntsamo chca chë higo betiye canÿe ora tojtsebuashá ca?

²¹ Y Jesús tojanéjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebmna y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana. ²² Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojotjañcá šmochanjóyëngacñe ca —Jesús tojánayana.

Jesusbe obenana

(Mc 11.27-33; Lc 20.1-8)

²³ Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

²⁴ As Jesús mëntšá tojanéjua: —Atšnaca canÿe soye sëntsebmna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama. ²⁵ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanéyana.

Chama chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’” ²⁶ Pero ndoñe quemuátobena jayanana ‘entšanga ca’; muentša entšangbiama bënga montsauatja, er nÿetscanga mondëjuabná Juan ndegombre Bëngbe Bëtsabe juabna oyebuambnáyá yomna ca.” ²⁷ Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanéyana: —Atše cach ndoñe quechocatéyana ndaye deréchoca chca stsama ca.

Chë uta uaquiñátbiana cuento

²⁸ Chora Jesús entšanga tojanatjá: —¿Ntsamo tšëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.”

²⁹ Chë uaquiñá ibojojuá: “¡Jama ndoñe quetsátsoše ca!” Pero botamana yojenójuaboye y pronto choye yojá. ³⁰ Chentšana chë taitá chë inÿe uaquiñábioye cachcá ibojauyana. As cha ibojojuá: “Arseñor, aíñe chanjá ca.” Pero ndoñe yonjá. ³¹ ¿Chë útatentšana ndëmuanÿá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanéyana: —Ndegombre cbëyana, chë Romocama entšangbioye impuesto atjanayënga y chë bacna vida bomna shembásenga, tšëngaftangbiama más montseprontana Bëngbe Bëtsabe amëndayoye jamashënguama. ³² Juan chë Ubayaná tonjánabo tšëngaftanga jábuayenama ntšamo jtsiyenana cmamnama, ntšamo Bëngbe Bëtsá yobošcá, y tšëngaftanga chë tcmojanabuayená soyënguiñe ndoñe chešmatanošbuaché; y chë cuenta,

chë Romocama entsángbioye impuesto atjanayënga y bacna vida bomna shembásengna aíñe chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinýëse, chë juabnayana ndoñe šmonjatrocá, chábeñe jtsošbuáchiyama ca —cha tojanéyana.

Chë puerte bacna trabájayëngbiama cuento
(Mc 12.1-12; Lc 20.9-19)

³³ Mëntšánaca Jesús tojánayana: “Inýe cuento šmochjatuena chašmuatsjínýama: Canýe jajañe nduiño uvas betiyënga yojáje y chë shëconana yojajétja. Chë uvasëšangá juantsëtetjamna canýe base luare yojajutjo y canýe tsbanana jebna soye yojapórma chentse jtsaishanyama. Chentšana, inýe trabájayënga chë jajañe yojárrendaye y chana inýe luaroye yojtsoñe. ³⁴ Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetsá chë nduiño ibojtsotocánama. ³⁵ Pero chë arréndayëngna chë oservénënga imojishëche: inýengbioyna imojtsajantšetaye, inýengbioye imojtsëbaye y chë inýengbioyna ndëtsbéngaca imojtsatëchénganja. ³⁶ As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaquiñá ibojícmua; as mëntšá yojtsejuabnaye: ‘Atsbe uaquiñá cocayé mochanjóyeunaye ca.’ ³⁸ Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá y lempe chabe otocana soyënga bëngbiama echanjoquéda ca.’ ³⁹ As chë uaquiñá imojishache, chë uvas betiyënga jajañentsana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

⁴¹ Y chënga tmojanjuá: —Chë puerte bacna arréndayënga ni mo batšatema ntjalastemaycá echantsëbaye. Chë jajañe inýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

⁴² Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtsbé, mora chë más bëts uashacuanëšentse entsejájona. Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.

⁴³ Ntšamo chë nduiño chë arréndayënga chë fshantse echántsabaca y inýenga echantsatšataye y chënga chabiama bëtská shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y inýengbioye mochantšatšataye. Chënga Bëngbe Bëtsabe soyëngama mochanjouena y chë soyëngama inýengbioye mochanjabuayená, Bëngbe Bëtsabe amëndayoye jamashënguama. ⁴⁴ Ndánaca chë ndëtsbéne chaojotsatsá, chëbé bochantšatcacaye; y chë ndëtsbé ndábeñnaca chaojotsatše, polvëshe bochantšebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatšëmbona chëngbiama chca yojtsóyebuambnama. ⁴⁶ Chora chënga tmojánbošena Jesús jishachana, pero

entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiestama cuento

(Lc 14.15-24)

¹ Chentšana Jesús tojanontsé cachiñe cuentëngaca chënga jabuátambana. Mëntšá tojánayana: ² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canye réyefata tojanopasacá. Chë rey yojamánda canye bëts fiesta jamama, chabe uaquiñabe casamentama. ³ Chora chë rey chabe oservënënga yojichamuá chë ófjanënga jobiatšama, pero chë ófjanëngna ndoñe imonjouena jama. ⁴ As chë rey inye oservënënga yojichamuá y mëntšá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minyicánënga jobáyama y lempe entseprontana; y chamuabo chë casamento fiestama ca.’

⁵ “Pero chë ófjanënga ndoñe imonjouena. Canya, cachabe fshantse inabomnoye yojtsoñe; inyana chabe obuámnayinë trabajuama yojtsoñe; ⁶ y inyëngna, chë reybe oservënënga imojishëche, jabuache imojtsatsetšenaye y imojtsëbaye. ⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservënënga obánayënga chamuetsëbáyama y chëngbe bëts pueblo jetsángbotjuama. ⁸ Chora chabe oservënënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. ⁹ Motsajna tsashenangoye y ndëmuanyëngnaca chašmojányëngna, chë casamento fiestama šmochjúbuaja ca.’ ¹⁰ As chë oservënënga tsashenangoye imojábocana y nyetscanga imojányëngna imojáchembo, cányiñe tšabe y bacna entšanga, y chca, chë tsbocnanoica jútjena yojtsemna entšángaca.

¹¹ “Chë ófjanënga jányama chë rey yojámashëngo ora, chentše cányabioye ibojinye y chana ndoñe yontsemna ntšamo canye casamento fiestama endbetsemncá uichëtjoná. ¹² As chë rey ibojauyana: ‘Sobreno, ntšamo canye casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nye iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinyna luaroye, infiernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ —cha yojayana.”

¹⁴ Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nye báseftanga. Er Bëngbe Bëtsá banga jáchembuana chabe amëndayoye jamashënguama, pero nye báseftanga choca mochántsemna ca.”

Chë Romoca bëts mandadbiama impuesto jtsatsquëcjnyama

(Mc 12.13-17; Lc 20.20-26)

¹⁵ Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. ¹⁶ Chama chënga tmojanichamó básefta cachëngbe usetonënga y inyëngna Heródesbe ústonënga, Jesús jauyanama: —Buatëmbayá, bënga fsëndëtatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nye ntšamo entšanga tmojatichamcá, er acbiamatodaye quenatámana nda más uamaná o nduamaná tomnana. ¹⁷ Chcasna,

¿ntšamo catjájuaboje? ¿Tšabá tayojssemna, César, chë Romoca bëts mandad-biama, bënga impuesto jtsatsquécjnayana o ndoñe ca?

¹⁸ Jesús yojtsetátšëmbo chëngbe bacna juabnëngama; chíyeca tojanëyana: —Bacna entšanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama? ¹⁹ Chë šmatsquécjná crocénana šminÿinÿé ca.

As canÿe crocénana tmojanoyé. ²⁰ Jesús tojanatjá: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojanánënga imojtsemna. As chënga cachcá Jesús tmojanonÿá y tmojtsatanoñe.

Obanënga jtayenama Jesús tmojantjá

(Mc 12.18-27; Lc 20.27-40)

²³ Báseftanga judiëngbe amëndayënga, saduceos ca uabáinënga, imojan-juabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá:

²⁴ —Buatëmbayá, Moisés tojánayana nderado canÿe boyá tojóbana básenga ntjëtšabashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiama básenga jtsabamnama ca.

²⁵ Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachcá tonjanopasá, chë inÿe uabentsáftaca cachcá, y cachcá chë inÿëngaftaca y chë ústonoca uabentsáftacnaca. ²⁷ Y chentšana chë shembásanaca tontsanóbana. ²⁸ Y morna, chë obanënga chamojtayena ora, ¿ndabe chë canÿsëfta catšatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁹ As Jesús tojanëjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mó celoca angelotemëngcá. ³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana: ³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entšanga chca tmojanuena ora, ojanánënga imojtsemna ntšamo Jesús yojsabuátambama.

Chë más bëts uámana mando

(Mc 12.28-34)

³⁴ Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefna, ³⁵ y canÿa chënguentsá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe leyiñe ndayá chë más bëts uámana mando yomna ca?

³⁷ As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.” ³⁸ Chë soye endmëna chë más bëts uámana mando y nÿetsca mandëngama chë natsanoca entsemna. ³⁹ Y

quem inye soye, chë natsana mandcá endenoparecena. Endayana: “Ndëmua entšánaca cochtsebobonshana, ntšamo cach aca cuenobobonshancá ca.”
⁴⁰ Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca —Jesús tbojaniana.

¿Cristo, ndabe entšábentšana yomna?

(Mc 12.35-37; Lc 20.41-44)

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

⁴³ As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

⁴⁴ Bëngbe Bëtsá, atšbe Utabná Crístbioye tbojaniana:

atšbe catšbioica mótbema,

atšbe obenánaca acbe uayayënga acbe cucuatšinë chamoquedama chjamëntscuana ca.

⁴⁵ ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

23

Jesús chë fariseungbiama y ley abuátambayëngbiama tojánayana, chënga ndoñe tšabá montsama ca

(Mc 12.38-40; Lc 11.37-54; 20.45-47)

¹ Chora Jesús, entšanga y chabe uatsjëndayënga mëntšá tojanëyana: ² “Chë fariseunga y chë ley abuátambayënga cmondbétsabuatambaye ntšamo Moisesbe leyënguiñe iuayancá. ³ Chcasna, tšëngaftanga cmonsamna chënga joyaunayana y ntšamo tmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. ⁴ Mo canye entšá, couáybioye uauta uasmanësha juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵ Chënga lempe jtsamana nye entšanga chamotsënyama. Chënga chë ínÿengbiama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšinë chëjënga jenábatsëcana y sibiajana nya tëntša uasebtotonanëjuangá jtsichëtjonana. ⁶ Chënga jtsebošana chë fiestënguiñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entšanga nya respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

⁸ “Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er nyetsca tšëngaftanga mo catsatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá. ⁹ Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondbomna,

chë celoca endmëná. ¹⁰ Ndoñe šmattseboše entšanga ‘mándayënga ca’ chacmotsachembuanama; er nÿe canÿe Mandayá endmëna y cha Cristo endmëna. ¹¹ Nda tšëngaftangbeñe chë más uamaná tojtsemná bontsemna chë ínÿenga jtsaservénana. ¹² Nda cachá bëtsá tojtisenobiamná, nduamaná mochántsebema; y nda cachá nduamaná tojtisenobiamnana, más bëtsá mochanjábema.

¹³ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga šmontsama entšangbiana puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana. ¹⁴ ¡Tša lastema tšëngaftangbiana, ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga chë viudángbioye chë tmobomna soyënga jtsabacayana, y entšangbe delante tšabá chacmotsënyama y chënga šmojtsaingñayama ndoñe chamondëtsetatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tšëngaftanga más jabuache ínÿengbiana cmochanjácastigaye.

¹⁵ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga ba luarënguenache jtsajnana canÿa tšëngaftangbe ustoná onguayiñe, y šmojínÿena ora, tšëngaftanga jamana cha chaotsemna tšëngaftangbiana uta soye más merecido buajoná infierno y chaotsama.

¹⁶ “¡Tša lastema tšëngaftangbiana; tšëngaftanga šmondmëna mo jtanënga entšanga unachayëngcá! Tšëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’ ¹⁷ ¡Obëjémënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiana joserviama jtsemnana, nÿe Bëngbe Bëtsabe bëts yebnocá chë castellano tojtsemnayeca. ¹⁸ Tšëngaftanga mëntsánaca šmondbëtsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’ ¹⁹ ¡Nduabínÿnënga! ¿Ndayá más uámana soye yomna, chë Bëngbe Bëtsabiana tmojacjá soyënga o chë altar? Chë tmojacjá soyënga Bëngbe Bëtsabiana joserviama jtsemnana, nÿe chë altaroca chë soyënga tmojacjáyeca. ²⁰ Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámnaca cha jtsejúraryana. ²¹ Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiana cha jtsejúraryana, cha chë chentše oyená. ²² Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámnaca, chentše yotbemanabiana.

²³ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuatambayënga! Tšëngaftanga Bëngbe Bëtsabiana jtsequëcjnyana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanángnaca. Pero tšëngaftanga nÿe batšá jtsamana chë leyentša más

uámana soyënga, mo chë nyetsca entsanga cachca derechënga chamot-sebomnama, inyënga jtsalastemánana y chë tsabe soyënguiñe jtsiyenana, chca, entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inye tsabe soyënga amana ntjajbanacá. ²⁴ ¡Tjanënga entsanga unachayënga! Tsëngaftanga chë base soyënga jamama puerte jtsenócochinýenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canye entsá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyíñe iuayana causa. Pero šmondmëna mo entsangcá ndëmuanýenga camellbe mëntsëna jasana, y chë leyíñe endayana chcana jasama ndoñe yondëlesenciana ca.

²⁵ “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuatambayënga! Tsëngaftanga šmondmëna mo entsangcá ndëmuanýenga platillëjënga y tazëšënga shjoicajana jtsóbojabiana, pero tsoyna nye cachcá jonýayana. Tsëngaftanga tša jt-sentsénana entsangbiana mo tsabengcá jtsinýnama, pero tsëngaftangbe ainanentše jútjena entsemna nye jtsatbëbanama y nye bëtscá soyënga jésebomnama juabnéngaca. ²⁶ ¡Nduabinýna fariseo! Cochjshetsajbaná ainaniñe bacna soyënga bomnana. Chamna nye tsabe juabnénga chentše cochtsebomna, y lempe ntšamo chacojtsamcá y entsanga chamojtsonýacá tsabá echántsemna.

²⁷ “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuatambayënga! Tsëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tsëngaftanga chca šmondmëna: entsangbe delante tsëngaftanga jtsinýnana mo nyetsca soyënguiñe tsabá amëngcá, pero ndoñe chca quešmátsmëna. Tsëngaftangbe ainanentšna chë bacna entsanga ntšamo ndegombre tmojuabnacá ndinýinýayëngcá y chë bacna soye amëngcá šmontsejuabná.

²⁹ “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuatambayënga! Tsëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnama, chëngbe cuevëshënga jtsatspórmayëse. Tsëngaftanga cachcá jtsamana chë nyetsca soyënguiñe tsabá amëngaftaca, chë chëngbiana jtenójuaboyama pormániñe jtsatsbótamnayëse; ³⁰ y chentšana šmondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmënjanejabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canye buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tsëngaftanga šmontsinýanýná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentšana šmomnana. Y mora cach tsëngaftangbe bëts taitangcá tsëngaftanga šmontsama. ³² ¡Mopochocanga jamama chë bacna soyënga, chë tsëngaftangbe bëts taitanga tmojanbojatsé jamama soyënga!

³³ “¡Mëtscuayënga, mëtscuaye entsanga! ¿Ndayá šmochjama chë infiernoca uabouana castigüentšana jótsbocama? ³⁴ Chiyeca atše tsëngaftangbioye chanjichamuá Bëngbe Bëtsabe juabna oyebuambnayënga, tsabe soye tatsëmbënga y abuatambayënga. Pero tsëngaftangna, inyëngbioye šmochantsëbaye y šmochanjácrucificaye; inyëngbioyna chë enefjuana yebnënguenache šmochanjátsetšenaye y nyetsca bëts pueblënguenache chënga šmochandúcamena. ³⁵ Chiyeca, tsëngaftangbiana nyets castigo

echántsemna chë nÿetsca soyënguñe tšabá amënga tmojëftsóbanama; Abel, chë jóbanama chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. ³⁶ Ndegombre cbëyana, lempe chë soyëngama castigo morsca entsangbiana echántsemna ca” —Jesús tojánayana.

Jesús tojanošachna Jerusalenoca entsangbiana
(Lc 13.34-35)

³⁷ Mëntsánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atše sënjábošena tšëngaftanga átšbioye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. ³⁸ Y šmochjinÿe, atše mora cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y éañe tcojeseboshjoncá. ³⁹ Y atše cbëyana, ndegombre tšëngaftanga morscana atše ndoñe más quešmochátinÿe; y atše šmochántinÿe mëntsá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

24

Jesús tojánayana chë Bëngbe Bëtsabe bëts yebna lempe mochjánpochocama
(Mc 13.1-2; Lc 21.5-6)

¹ Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjéndayënga chábioye tmojanobeconá y tmojanontsé nÿetsca chentša bëts yebnënga cha jinÿinÿiyana. ² Chora Jesús tojanëyana: “Tšëngaftanga lempe šmontsonÿá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canÿe ndëtsbé inÿe ndëtsbé juatsboye. Lempe mochantsepochóca ca.”

Ntšamo yochtsemna quem luare jopochócamo tempo chaojtsobeco ora
(Mc 13.3-23; Lc 21.7-24; 17.22-24)

³ Chentšana chënga Olivos tjashoye tmojána. Jesús choca yojtsetbemana; as, chë uatsjéndayënga tmojanobobeconá nÿe chëngbiana jatjayama, mëntsá: —Smëyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnana y quem luare jopochócamo tempo yojtsobecuama ca?

⁴ As Jesús tojanjuá: —Cuedado šmochtsebmoma ndocná chacmondáingñema. ⁵ Banga mochanjabo y mochantsabíchamo chënga atše imomna ca. Mochántichamo: “Atše chë Cristo sëndmëna ca” y chca, ba entsángbioye mochanjáingñaye. ⁶ Tšëngaftanga šmochanjouena canÿe luarentša entsanga inÿe luaroca entsángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócamo cabá ndoñe queochátsmëna. ⁷ Canÿe luarentša entsanga inÿe luaroca entsángaftaca mochántentsjanaye, y canÿe amëndayábentša entsanga inÿe amëndayábioca entsángaftácna; y ba luarënguñe shëntsana echanjóshjango y chentša fshantsënga echanjuangmëmmana. ⁸ Masque chca jasúfriase, más chcoye cabá más mochanjatssúfria.

9 “Chora, entsanga ínÿengbe cucuatshiñe cmochanjábashejuana chacmatsetšenama y cmochantsébaye; y atšbe ústonënga bétsemnayeca nÿetsca luarënguentša entsanga cmochantsébuayënja. 10 Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama ínÿengbe cucuatshiñe mochántsenboshjuana. 11 Banga Bëngbe Bëtsabe ndoñe ndegombre juabna oyebuambnayënga mochanjábocana y ba entsanga mochanjáingñaye. 12 Nÿetsá bacna juabnënga entsangbe ainaniñe echanjésemna, y chë causa banga ndoñe quemochátenbobonshana. 13 Pero nda nÿets tempo átšbeñe ošbuachiyá totsomñe, atsbocaná echántsemna. 14 Y quem tšabe noticiënga Bëngbe Bëtsabe amëndayama nÿets quem luariñe entsángbioye mochántsabuyiynaye, chca, chë ndegombre soyënga Bëngbe Bëtsabiama chënga chamotsetatsëmbuama. Chentšana cocayé quem luare jopochócama tempo echántsemna.

15 “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tšëngaftanga chë puerte uabouana soye chë uámána ca uabaina luarentse chašmojinÿe ora (nda tojtsalía, chabosertá), šmochántsetatsëmbo chë puerte ngménana tempo tojóshjanguama; 16 entsanga Judeoca chamojtsemnënga, batsjabengoye chamotsacheta. 17 Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama. 18 Y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. 19 ¡Tša lastema chë tempo ngomámanënga chamojtsemnëngbiamana o ochóchaye šešonga chamojtsabamnëngbiamana! 20 Bëngbe Bëtsá šmochtseimpadana chë tšëngaftanga jachetama, uaftena tempo ora o canÿe ochnayté ndoñe chaondëtsemnama. 21 Chca, chora puerte ngménana echántsemna. Tša jabuache ngmenancá, quem luare jabojátšama orscana y mëntscoñama y más chcoye, cachcá ngménana ndoñe ntjamnana. 22 Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minÿënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. 24 Chora mochanjábocana ndoñe ndegombre uámána ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca. 25 Atše ya chama tcbonjabuayená chë tempo cabá ndóshjango ora. 26 Chíyeca, nderado chënga chacmojáuyana: ‘Minÿënga, chentše chë Cristo entsemna, entsanga ndoyenoca ca’, choye ndoñe šmatjá; o chacmojáuyana: ‘Cha canÿe tsoca entsemna ca’, chama ndoñe šmattsayaunana. 27 Er ntšamo chë tojatcuinÿe ora, shinÿe bocanoicana y shinÿe uenatjëmbambanëntscoñe jabuashinÿinÿenancá y ba luarënguenache entsanga jobenayana jinÿama, cachcá, Bëngbe Bëtsá Entšá tbojanbemá quem luaroye chaojésabo te, entsanga nÿets luarentse mochanjobenaye cha jinÿama. 28 Canÿe obanabe cuerpo tojtsemnama chë gallinacënga tmojátatsëmbona y cachora chë béconana jojtana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo
(Mc 13.24-37; Lc 21.25-33; 17.26-30, 34-36)*

²⁹ Měntsánaca Jesús tojánayana: “Chë puerte ngménana tempo chaojochnëngüentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentsa tsbanánoca espíritënga obenana bomnënga echanjángmëmana. ³⁰ Chora canÿe soye celoca echanjónÿna entšanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantšetëshiñe echántsaboye, puerte obenánaca y corente buashinÿinÿaniñe. ³¹ Y canÿe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntsoñe.

³² “Ntšamo higo betíyeca endbétsopasanama šmochjuatsjinÿe: Tojtsaisabuacuana y tojtsaisëjotsana ora, chë tšabe tempo ya tojtsaisobecuama jtsotatsëmbuana. ³³ Cachcá, lempe chë ndayama tšëngaftanga tčbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. ³⁴ Ndegombre cbëyana, lempe chca echanjochnëngo, morsca entšanga cabá ndóbana ora. ³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatsëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotáttsëmbo.

³⁷ “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entšanga imnasaye, imnofšësnaye y imnóbouamnaye; natjëmbana imojtsiyeñe, y chca imojtsomñe Noé chë barquëshoye tojánamashënguentscuana. ³⁹ Chënga tondaye imonjántatsëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entšanga chama mochanjátatsëmbona. ⁴⁰ Chora uta boyabásata jajoca bochántsemna; canÿa mochanjesbetše y chë ínÿana ndoñe. ⁴¹ Uta shembásata bochántsejanÿcoye; canÿa mochanjesbetše y chë ínÿana ndoñe.

⁴² “Chíyeca cuedado šmochtsebomna y yejuana šmochtsantješna, er ndoñe quešmátstatsëmbo ndayté tšëngaftangbe Utabná yochjésabama. ⁴³ Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatsëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tšëngaftánngaca šmochtseprontana, er Bëngbe Bëtsá Entšá tbojanbemá echanjésabo, entšanga chama tondaye chamontsejuabná ora ca” — Jesús tojánayana.

*Chë tšabe oservená y chë ndoñe tšabe oservená
(Lc 12.41-48)*

⁴⁵ “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanÿenama y jasama tojtsemna ora chaújuatšema. ⁴⁶ Chë nduiño tojtashjango ora, chë oservenábioye tbojínÿena ntšamo ibomncá jtsamëse, chë oservená puerte oyejuayá echántsemna. ⁴⁷ Ndegombre cbëyana, chë nduiño chábioye bochanjaimpáda lempe chabe soyënga chabotsinÿeñama. ⁴⁸ Pero chë oservená bacna entšá tomnëšna, jajuaboyana chë nduiño ndoñe betsco yochantabo ca, ⁴⁹ y as, cha jóntšana chë inÿe oservénënga jtsajantšetayana, becá jtsesana y jtsetmuana inÿe

tëmiëngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. ⁵¹ Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinÿinÿnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšësjojnaye ca” —Jesús tojánayana.

25

Chë bnëtsana tobiasëngbiama cuento

¹ Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canÿe casamento fiestentšë tojanopasacá. Mëntsá yojopása: Bnëtsana tobiasënga chëngbe querosine uajuinÿanëshangá imojëftsájaca y imojábocana chë casamentero boyabása jajébenguama. ² Chë bnëtsana tobiasënguentsana, shachnënga sempre enójuabnayënga inmamna, y chë inÿe shachnëngna, ndenójuabnayënga. ³ Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. ⁴ Pero chë sempre enójuabnayëngna chëngbe uajuinÿanëshangá imojëftsájaca y querosínënaca botellëšënguiñe imojuabuyamba. ⁵ Chë casamentero boyabásana ndoñe betesco yonjabo, chíyeca nÿetsca tobiasënga ocnayana yojubuache y imojtsomaná. ⁶ Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajébenguama mobocana ca!’ ⁷ Asna, nÿetsca tobiasënga imojotsbaná y imojóntša chë uajuinÿanëshangá juabopróntana. ⁸ Chorna, chë shachna ndenójuabnaye tobiasënga chë inÿe shachnënga sempre enójuabnayëngbioye imojáuyana: ‘Diosmanda tšëngaftangbe querosinentsana baseytema šmëbuatšatá, bëngbe uajuinÿanëshangá tojontšé jtsafsananana ca.’ ⁹ Pero chë sempre enójuabnayëngna imojayana: ‘Ndoñe. Tcbojubuatšatase, tšëngaftangbiama y bëngbiámnaca querosine echántšashbe. Más tšabá entsemna, chë querosine mondbétsenoye chašma y tšëngaftangbiama chašmauábuamiñe ca.’

¹⁰ “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëšáša imojtatame. ¹¹ Chentšana chë inÿe tobiasënga imojáshhajna y mëntsá imojtsichamo: ‘¡Taita, Taita, šmëbëtafjo ca!’ ¹² Pero chë casamentero boyabása yojójua: ‘Ndegombre cbéyana, tšëngaftanga ndoñe quecbatëbuatma ca.’

¹³ “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento (Lc 19.11-27)

¹⁴ “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservënënga yojáchembo y yojaimpádaye chabe crocénana chamotsinÿenama. ¹⁵ Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. ¹⁶ Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. ¹⁷ Chë uta uaranga yojoyëngacñá cachcá yojama y inÿe uta uaranga yojábotiye.

¹⁸ Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

¹⁹ “Chentsana baytese chë oservénëngbe amëndayá yojtashjango y yojóntša chë crocénanama chënga jatjayana. ²⁰ Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntsá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ ²¹ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’ ²² Chentsana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ ²³ As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

²⁴ “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjujqüeshe luarentše jobuátbanana. ²⁵ Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ ²⁶ As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, ²⁷ aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyëngacñe y chë chentsana tojoboté crocénanënaca ca.’ ²⁸ Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. ²⁹ Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

³⁰ “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftšësjonaye ca’ ” —Jesús tojanëyana.

Ntšamo chë quem luare jopochócama ora, nÿetsca entsangbiama mochjayana

³¹ Mëntsánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nÿetsca chabe angelotëmëngaftaca chaojésabo ora, chë reybiama puerte buashinÿinÿana tbemaniñe echanjót'bema. ³² Chora nÿets luarëngoca entsanga chabe natsanoica mochanjénefjna, y cha, entsanguentsana inÿenga echanjábacacaye, mo chë oveshënga abujajënÿa oveshënga chivëngbentsana endbetsabacacnycá. ³³ Chë abujajënÿana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entsangna chabe uañicuayoica echanjatsaye.

³⁴ “Chorna chë Rey, Bëngbe Utabná, chabe catšbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiama otocana soycá mosháchiñënga; tšëngaftangbiama endëprontana, Bëngbe Bëtsá quem luare tonjanma orscana. ³⁵ Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšë; inÿe

luarocana ashjanganacá sēnjánana y posada šmonjanántšame. ³⁶ Enašá sēnjánana y entšayá šmonjanētšetá jtichētjuama; šocá sēnjanjájona y šmonjanatsētsaye; cárceloca sēnjanētámena y jabēuatsētsayama šmonjánabo ca.’

³⁷ “As chē Bēngbe Bētsá chabe bominyiñe tšábenga tojábiamēnga mochanjatjaye: ‘Bēngbe Utabná, ¿ntseco shēntseca tcbēnjáninýe y tcbēnjanajuatsé? ¿Ntseco uajuendayá tcbēnjáninýe y tcbēnjanafšé? ³⁸ ¿O ntseco inýe luarocana ashjanganacá tcbēnjáninýe y posada tcbēnjanántšame, o enašá y entšayá jtichētjuama tcbēnjanētšetá? ³⁹ ¿O ntseco šocá o cárceloca utamená tcbēnjáninýe y jauatsētsayama tifjána ca?’

⁴⁰ “As chē Utabná echanjójua: ‘Ndegombre cbēyana, lempe ntšamo chē atšbe catšátanguentsana chē más batšá uámanēngaftaca šmojamcá, cach átšeftaca šmonjanma ca.’

⁴¹ “Chentšana chē Utabná chabe uañicuayoica chamojtsemna entšanga echanjáuyana: ‘Atšbentšana mojuánanga atšbe Bētsabe uabotēnēnga. Infiernoye motsajna, chē ndocna te queochátsfsana iñeshoye; choca endēprontana Satanás y chabe ustonēngbiana. ⁴² Er atše shēntseca sēnjánana y tšēngaftanga saná ndoñe chešmatancaredadó; šonjanajuendá y ndoñe chešmatanafšé; ⁴³ inýe luarocana ashjanganacá sēnjánana y ndoñe posada chešmatanántšame. Enašá sēnjánana y ndoñe entšayá chešmatanētšetá; šocá sēnjanjájona y cárceloca sēnjanētámena y ndoñe chešmatanatsētsá ca.’

⁴⁴ “As chēnga mochanjatjaye: ‘Bēngbe Utabná, ¿ntseco tcbēnjáninýe shēntseca o uajuendayá, o inýe luarocana ashjanganacá, o enašá, o šocá o cárceloca utamená y ndoñe tcbēnjanajabuache ca?’

⁴⁵ “Y chē Utabná echanjójua: ‘Ndegombre cbēyana, tšēngaftanga ntšamo chē atšbe catšátanguentsana chē más batšá uámanēngaftaca, ndoñe šmonjanmcá, átšeftaca cach ndoñe chešmánama ca.’

⁴⁶ “Chēngna infiernoye nyetsca tescama mochantsēsetjango, y chē Bēngbe Bētsá chabe bominyiñe tšábenga tojábiamēngna chē nyetsca tescama yomna tšabe vida mochántsebomna ca” —Jesús tojánayana.

26

Entšanga tmojanjuabó ntšamo jamēse Jesús jishachama (Mc 14.1-2; Lc 22.1-2; Jn 11.45-53)

¹ Lempe chca tojánayanentsana, Jesús chabe uatsjéndayēnga tojanéyana:
² “Tšēngaftanga šmondétatšēmo, uta te y chē Bashco fiesta echántsemna y Bēngbe Bētsá Entšá tbojanbemá inýengbe cucuatšiče mochanjáboshjona chamocrucificama ca.” Chē fiesta inamna jtenójuaboyama Bēngbe Bētsá chē judiēngbe bēts taitanga Egiptocana tojánatsebacama.

³ Chēntscuana, chē bachnangbe amēndayēnga y chē judiēngbeñe bētsējemēngcá mándayēnga tmojánenefjna, Caifás, chē bachnangbe más uámana amēndayabe bēts yebnentše. ⁴ Tmojanenojuabó y tmojanenoyeuná jtseíngñase Jesús jishachama, y jtsóbama. ⁵ Pero imojtsichamo: “Quem fiestēntscuana ndoñe, entšanga yapa muanjóntša enbouenanana ca.”

*Canýe shembása botamana uanguētše bėjaye Jesusbe bestšasiñe tbojanbuešcja
(Mc 14.3-9; Jn 12.1-8)*

⁶ Jesús Betania pueblentše yojtsemna, Simón chē bacna nguayanánaca šocá ca uabobuatmabe yebnentše. ⁷ Chēntscuana canýe shembása Jesúsbiroye tojanabeconá. Chē shembásana tojanamba canýe alabastro jarrētema, jútjena canýe puerte uámana botamana uanguētše bėjayeca. Jesús mesēshentše

yojtsemnëntscuana, chë shembása chabe bestšašiñe chë botamana uanguëtse bėjaye tbojanbuešcja.

⁸ Chë uatsjéndayënga chca tmojáninÿe orna, tmojanotjayaná y tmojanontsé ichámuana: —¿Ndáyeca nÿe bonamente chë soye chca yojtsemna ca?

⁹ Chamna, matmënjobenanga chë bėjaye becá crocenánama juiyana y chánaca ndbomnjémënga matmënjújabuache ca.

¹⁰ Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. ¹¹ Er chë ndbomnjémëngna nÿets tempo tšëngaftangbeñe mochanjëftsemna, pero atše tšëngaftangftaca ndoñe nÿets tempo quichásemna. ¹² Ntšamo chë shembása tojamcá, chë botamana uanguëtse bėjaye atšbe cuerpiñe jabuéšcjëse, cha šontseprónta atše juatbontsa tescama. ¹³ Ndegombre cbéyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entšanga chabiamá chamotsenójuabnama ca —Jesús tojanéyana.

Judas tojána bachnangbe amëndayëngbioye, Jesús chamuishachama
(Mc 14.10-11; Lc 22.3-6)

¹⁴ Canÿa chë bnëtsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuéntama. ¹⁵ Y tojanatjá: “¿Ntsachetšá šmatjtabuénaye y Jesús tšëngaftangbe cucuatšiñe cbochjayentšbashejuana ca?”

As chëngna, unga bnëtsana ralbenga tmojtanabuená. ¹⁶ Y cach orscana Judas yojtsenguaye ntšámose y ntseco ora, Jesús chëngbe cucuatšiñe jayentšbashejuanama.

Jesús chabe uatsjéndayëngaftaca Bashco saná tojanse
(Mc 14.12-25; Lc 22.7-23; Jn 13.21-30; 1 Co 11.23-26)

¹⁷ Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjéndayënga Jesúsbioye tmojanobeconá y tmojantjá: —¿Ndëmoca aca cojtseboše bënga fchaiprontama Bashco saná chacosama ca?

¹⁸ Y Jesús tojanéyana: —Chë bëts puebloye motsajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjéndayëngaftaca ca.’ ”

¹⁹ As chë uatsjéndayënga tmojanma ntšamo Jesús tojanamëndacá y chë Bashco fiesta saná tmojanprontá.

²⁰ Y tojanibétata orna, Jesús chë bnëtsana uta uatsjéndayëngaftaca mesëshentše yojtsemna. ²¹ Y imojtsesantscuana, Jesús tojanéyana: —Ndegombre cbéyana, canÿa tšëngaftanguentsá uayayëngbe cucuatšiñe šochanjáboshjona ca.

²² Chora chë uatsjéndayënga puerte ngménaca imojtsemna y tmojanontsé canÿánÿa Jesús jatjayama: —Bëngbe Utabná, ¿nderado atše cha chtsemna ca?

²³ As Jesús tojanéjua: —Canÿa nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšiñe šochanjáboshjona. ²⁴ Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamá iuayancá; pero, itša lastema chë bochjáboshjonabiamá! Más tšabá chabiamá manjamna ndoñe ntjónÿnana ca.

²⁵ As Judas, chë boshjuaná, Jesúsbioye tbojantjá: —Buatëmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

²⁶ Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjédayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

²⁷ Chentsana, canye coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëfsašé. Y mëntšá tojánayana: “Njëtscanga quem coptémentšana mofsënga. ²⁸ Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aïñe yochjochnënguama. Chë buiñe bëtscá entšangbiama echanjuábuashana, chëngbe bacna soyëngama perdonánënga chamotsemnama. ²⁹ Y ndegombre cbëyana, morscana atše ya ndoñe más chë uvasentsana obocniye quichaisofsiye. Chë tsëm vínoye tšëngaftangafaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentsana, Olivos tjashoye tmojëftsanbocana. ³¹ Choca Jesús tojanëyana: —Tšëngaftanga njëtscanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshëngbe abuajënÿa chanjóba y chë oveshënga mochantsáshana ca.” Chca tšëngaftangafaca echanjopása, uayayënga chašmojishache ora. ³² Pero obanënguentsana chaitayenentsana, tšëngaftangbe natsana Galileoye chanjá ca —cha tojanëyana.

³³ Chora Pedro tbojanjuá: —Masque njëtscanga ábeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

³⁴ As Jesús tbojaniyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

³⁵ Pero Pedro tbojaniyana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y njëtsca uatsjédayëgnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá (Mc 14.32-42; Lc 22.39-46)

³⁶ Chentsana, Jesús chabe uatsjédayëngaftaca canye luare Getsemaní ca uabáinoye tojána. Choca tojanëyana: “Muentše motbiama, chëntscuana atše choye chanjá Bëngbe Bëtsáftaca jencuéntama ca.”

³⁷ Y Pedro y chë Zebedeobe uta uaqüñata tojëftsanëbiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefsna ca.”

³⁹ Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

⁴⁰ Chentsana, Jesús chabe unga uatsjédayëngbioye tojtanabo y chëngna imnétsomañe. Chca tojánanÿena ora, Pédrëbioye tbojaniyana: “¿Ni mo canye horatema tšëngaftanga šmonjobená átšeftaca jtsefsnana ca? ⁴¹ Šmochtsefsna y Bëngbe Bëtsáftaca šmochtsencuëntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca

Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mëntsá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondětsemnama jamama ndoñe jopódianësna, nÿe ntšamo aca cojtsebošcá chaotsemna ca.”

⁴³ Y tojtanabo ora, chë uatsjéndayënga cachiñe imnétsomañe; yapa ocnaye causa nÿe imojtsefshétana. ⁴⁴ As Jesús cachcá yojëftsënyaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

⁴⁵ Chora chë uatsjéndayëngbiöye tojtanabo y tojanéyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucuatšine mochanjáboshjona.

⁴⁶ Motsbananga, cuajna. Minÿënga, chë boshjuaná ya entsebeconá ca.”

Uayayënga Jesús tmojánishache

(Mc 14.43-50; Lc 22.47-53; Jn 18.2-11)

⁴⁷ Jesús cabá yojtsóyebuambnantscuana, Judas, canÿe chë bnëtsana uta uatsjéndayënguentšá, tojánashjango, y cháftaca imojtsemna ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. ⁴⁸ Judas, chë boshjuaná, tojanjuabó ntšamo jamana entšanga jinÿanÿiyama ndëmua Jesús bëtsemnana. Chíyeca yojáuyana: “Nda chaijauámocho, cha echántsemna. Smochjishache ca.” ⁴⁹ Cachora Judas Jesúsbiöye tojanobeconá y tbojanчуá: —Buajtana, Buatëmbayá ca.

Y tbojtanámocho.

⁵⁰ Jesús tbojaniyana: —Enutá, moma chë ndayá jabomama tcojabo ca.

Chorna, chë entšanga tmojanobeconá, Jesús tmojánishache y tmojanánatse.

⁵¹ Chca orna, canÿe enutá Jesúsëftaca yojtsemná, chabe espadëja tojanenosëngbotëntšena, y chë bachnangbe más uámana amëndayabe oservenábioye canÿe matscuaše tbojtsanëštjango.

⁵² As Jesús tbojaniyana: “Espadëja matosëngbuajonÿá. Nda espadëjaca tbojóba chana, cach espadëjaca echanjóbana. ⁵³ ¿Aca ndoñe condëtatšëmbo, atše atšbe Taitábiöye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca? ⁵⁴ Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

⁵⁵ Cachora Jesús entšanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? Atše cada te Bëngbe Bëtsabe bëts yebnocá tšëngaftangaftaca sënjántbemana abuátambaye, y choca ndoñe chešmátanishache. ⁵⁶ Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrënguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nÿetsca uatsjéndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonÿá.

Jesús tmojanánatse chë judiëngbe más uámana amëndayëngbiöye

(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefjna. ⁵⁸ Pedro bënocana Jesús tbojanasto, chë bachnangbe más uámana amëndayabe chashjónscoñe;

choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatsëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, ⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, ⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús nÿe iytëca yojtsemna. Chíyeca chë bachnangbe más uámana amëndayá tbojanayana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjabeto Jesusbe contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entse-bomna; jóbanama bontsemna ca.

⁶⁷ Chora tmojanontšé Jesús juebëbuashëtjnayana, jabuache jantšetayana y ínÿengna imojtsejuëbjantšetaye, ⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantšetá ca!”

*Pedro tojánayana Jesúsbioye ndoñe bonjanabuátma ca
(Mc 14.66-72; Lc 22.55-62; Jn 18.16-18, 25-27)*

⁶⁹ Chëntscuana Pédrëna shjoca yojtsemna, chashjoca yojtsetbemanana. Chora, canÿe shembása chentša oservená tbojanobobeconá y tbojanayana: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bësoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanëyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtsejúrayer: —¿Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tmojanayana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontšé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —¿Chë boyabása ndoñe quetsatabuatma ca!

Y cachora canye ngallo yojacánta. ⁷⁵ Y Pedro yojenójuaboye ntšamo Jesús tbojanianama. Cha mentsá tbojanianama: “Cabá ngallo ndécánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngménaca yojtsenóbošachna.

27

Jesús, Pilátbioye tmojanánatse
(Mc 15.1; Lc 23.1; Jn 18.28-32)

¹ Tojanbinýna ora, nyetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. ² As, Jesús tmojanëcuébatsëca y tmojanánatse, y chca, Pilato, chë Judeoca Romano mandadbe cucuatšinë tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnama tojanuena ora, puerte yojtsenócochinýena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, ⁴ y mentsá tojanéyana: —Puerte bacna soye tijama. Atše canye bacna soye ndbomná tšëngafangbe cucuatšinë tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatsëmbñe ca.

⁵ As Judas chë ralbenga Bëngbe Bëtsabe bëts yebnentše yojesëtšana, y yojá y yojétsentsešaye.

⁶ Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiana soyënga quëcjnyëtémiñe chana jasegórana ca.

⁷ Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnama ndayentše chë inye luarëngocana entšanga áshjajnënga jutabuantsama.

⁸ Chiyeca, chë fshantse mëntscoñama Buiñe Luare ca iuabaina. ⁹ Chca, tojanochnëngo ntšamo Jeremías, chë Bëngbe Bëtsabe juabna oyebuambnáyá, tempscá tojanayancá, ndayá yochjanchnënguama. Chana mentsá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamanacá, ¹⁰ y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante
(Mc 15.2-5; Lc 23.2-5; Jn 18.33-38)

¹¹ Chentšana Jesús, chë mandado Pilátbioye tmojanánatse y cha mentsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjemënga Jesús mal imojtsequédantscuana, cha ndocá ntjojuana. ¹³ Chiyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴ Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana
(Mc 15.6-20; Lc 23.13-25; Jn 18.38-19.16)

¹⁵ Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná. ¹⁶ Chë tempo canye uachuana utamená inamna, Jesús Barrabás ca uabainá. ¹⁷ Nyetsca entšanga chentše

imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetatšëmbo, entšangna envidia causa Jesús chabe cucuatšinë tmojánboshjonama.

¹⁹ Pilato chë tribunal ca uabáinentše yojtsetbemanëntscuana, chabe shema canya tbojanichmó mëntšá cha jauyanama: “Chë nyetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

²⁰ Pero chë bachnangbe amëndayënga y chë bëtsëjémënga entšanga tmojanayëñaná, Barrabás jëtsboshjonama y Jesús chaóbana ca chamuayanama.

²¹ Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entšanga más jabuache enbouenanama tmojanontšema Pilato tojáninye ora, cha tojanmandá búyeshe juabuiyëboñana y nyetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nyetsca entšanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinë tbojánboshjona chamocrucificama.

²⁷ Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyetsca soldadënga chabe shëconana tmojanóoto. ²⁸ Chorna, entšayá tmojtšanabotsca y shbuenda uafjatsenga entšayá mo reycá tmojanichëtjo. ²⁹ Canye coronëshu tmojanapormá uchmašëfjangaca y tmojanabestšajó, y catšbioica cucuatšinë canye niñëfja. Chorna, chabe shecuatšentše imojtsofshëntsaméntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

³⁰ Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye. ³¹ Y chca imnaftsáboyejuanentšana, chë shbuenda uafjatsenga entšayá tmojtšanabotsca y cachabe entšayá tmojtanichëtjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

³² Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblocá. As, cha tmojanmandá Jesusbe cruz chauetsocutsama.

³³ Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye hiéloyeca enájuañe tmojanabuiyé chaofšema; pero yojaftántia y ndoñe yonjábosena chiye jofšiyama.

³⁵ Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama.

36 Y chora chënga chentše tmojanotbiama Jesús jtsebojanýama. 37 Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

38 Utata bacna soye ochjajnayátnaca chënga chentše tmojanacrucificá, canýa Jesusbe catsbioica y chë ínýana chabe uañicuayoica. 39 Y chëjana imojtsachnëjuana entsangna, Jesús imojtsóyenguaye, imojtsobestšfshanenaye 40 y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

41 Chë bachnangbe amëndayënga, ley abuatambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: 42 “Cha ínýenga tojëftsatsëbacá, pero cachá jénts bocama ndoñe quenátobena. Cha Israeloca entsangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. 43 Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánësel, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

44 Y chë bacna soye ochjajnayata, Jesúsëftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

45 Nýetsto orscana las tresëntscoñe, nýets quem luare yojtseibétata. 46 Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

47 Chca tmojanuena ora, báseftanga chentše imojtsemna entsanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

48 As chora, chentša canýa tojëftsantótjajo canýe esponjëshe janguanguama, untja vínoyeca chëshe tojanfchecuacué, canýe niñëfjiñe tojananguësëtjo y Jesúsbioye tojanbeconá chaofšema. 49 Pero ínýengna tmojánayana: “Cachcá mochjonýaye, er Elías tayochjabo jabáts bocama ca.”

50 Pero Jesús cachiñe jabuache tojanoyó y tojanóbana. 51 Y cachora, Bëngbe Bëngbe Bëtsabe bëts yebnoca yojújonýana entsëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. Fshantse yojuangmëmana, ndëtsbenga yojtsashtëtšana, 52 y chë cuevëshënga obanëngaca yojtsëtëfjo y banga Bëngbe Bëtsabe entsanga tmojtanayena. 53 Y chënga, Jesús tojtanayenentšana, chë cuevëshënguentsana tmojánbocana, y Jerusalén, chë uámana bëts pueblo ca uabáinoye tmojánamashjna y ba entsángbioye tmojánëbëbuacana.

54 Chë soldadëngbe amëndayá y chë ínýenga, Jesús jtsebojanýama cháftaca tmojanoquedanga, chë fshantse yojuangmëmanama tmojáninýe ora, y nýetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

55 Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. 56 Chë shembásengbeñe imojtsemna María Magdalena; María, Santiago y Josebe mamá; y Zebedeobe uaqiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. ⁵⁹ José chë cuerpo tojanca y canye nduatsenga lino entsëjuaca tbojanandmaná. ⁶⁰ Y canye chabe tsëm cuevëshiñe tbojanjajó. Tempo cha inamánda chë cuevëshna ndëtsbenguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. ⁶¹ Pero María Magdalena y chë inye Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jtsebojanýama

⁶² Yëfsana, chë ochnayté, chë bachnangbe amëndayënga y chë farise-unga cánýiñe tmojána Pilato jinýama. ⁶³ Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanyá unga tentscuana. Chca, chabe uatsjédayënga ndoñe ibeta chamondabo chabe cuerpo jabétsatbëbama, y chentšana chënga entsanga chamúyana, Jesús tojtayena ca. Y chca, chabiana quem ústonoye bostero soye, chë cachabiana tojánayana soyëngama puerte más bacá nántsemna ca — chënga tmojaniana.

⁶⁵ As Pilato tojanéyana: —Tsëngaftanga cach tsëngaftangbiana soldadënga šmondábamna. Motsajna y chë cuevëshe cuedádoca šmochtsashanyá, ntšamo šmondëtatšëmbcá ca.

⁶⁶ Chora chënga tmojána chë cuevëshe jtsashanyama; chë ndëtsbena, tsengájašeca imojuinýnaná, ntsotatsšëmbcá ndocná choye chaondámashënguama, y soldadënga chentše tmojëftsanashejuana.

28

Jesús tojtanyena

(Mc 16.1-8; Lc 24.1-12; Jn 20.1-10)

¹ Ochmayté chentšana, chë inye semana bojatsënté yojtsebínýana ora, María Magdalena y chë inye María tbojána cuevëshoye jarrepárama. ² Ndeolpe fshantse tojanangmëmmana, er Bëngbe Bëtsabe canye ángel celocana tojánstma, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema. ³ Chë ángelna mo canye tcuinýejcá yojtsebuashinýinýana, y chabe uichëtjonëjuangá uafjantsëjuangá mo jantšetëshcá yojtsamna. ⁴ Chë soldadënga chca tmojáninýe ora, de auatja yojtsangmëmnaye y mo obanëngcá imojtsemna.

⁵ Chora chë ángel chë shembásatbioye tojanéyana: “Ndoñe batauatjana. Atše sëntsetatšëmbo tsëngaftanga Jesús, chë tmonjancrucificá cha šmojtsenguama. ⁶ Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinýe cha endëtsesegoranentše. ⁷ Betsco motsata y chë uatsjédayënga šochjáuyana: ‘Jesús tontayena y tsëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tsëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsantotjajo chë soye chë uatsjendayëngbeñe jobuambayama. ⁹ Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtanadorata y chabe shecuatše shëconana imojtbojtcjuá. ¹⁰ Y Jesús tojanéyana: “Ndoñe batauatjana. Motsata atšbe uatsjédayënga, atšbe catsátanga jáuyanama Galileoye chamotsá y choca atše šmochjinýe ca.”

Ntšamo chë soldadënga tmojánayana ndayá tojanochñënguama

¹¹ Chë shembásata ibojtsayëntscuana, básefta soldadënga chë bëts pueblöye tmojána y ntšamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbiöye bëtscá crocénana tmojtanatšatá, ¹³ y mëntsá tmojanabuayená: “Tšëngaftanga šmochjayana, íbeta šmotsomáñëntscuana, Jesúsbe uatsjëndayënga tmojabo y chabe cuerpo tmojabëtsatbëba ca. ¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanëyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbëtsichamo.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama

(Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canye uatsjëndayënga Galileöye tmojána, chë ndëmua tjöye Jesús chënga tojanabuayená choye. ¹⁷ Y Jesús tmojáninye ora, tmojtanadorá. Pero báseftangna imojëtsejuabnaye nderado cha ndoñe Jesús yontsemna ca. ¹⁸ Jesús chëngbiöye tojanobeconá y tojanëyana: “Bëngbe Bëtsá nyëts mando atše šonjatšetá celoca y quem luarentše. ¹⁹ Chcasna, motsajna, nyëts luarënguenache oyenënga atšbe uatsjëndayënga šmochjábiamá. Entšanga šmochjubaye atšbe Taitá, atšbe chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, ²⁰ y šmochjabuatambá lempe ntšamo atšbe tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

San Marcos

Juan chë Ubayaná entsanga yojanabuayiná

(Mt 3.1-12; Lc 3.1-9, 15-17; Jn 1.19-28)

¹ Mëntšá tojanobojatsé chë tšabe noticiënga Bëngbe Bëtsabe Uaquiñá Jesu-cristbiamá.

² Ntšamo bayté entsemna, chë Bëngbe Bëtsabe juabna oyebuambnayá Isaías chabe librëšañe yojëftsayancá, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayinyayá acbe natsana sentsichamná, chë aca jabama lempe echanjaprónta cha.

³ Entšanga ndoyena luaroca cha enduáyebuache mëntšá:

“Bëngbe Utabná echanjabo ca;

mo nda canýe benache tojtseprontacá canýe uámana entsá jashjanguama, cachcá tšëngaftanga, cha jabama ainaniñe tšabe juabnëngaca šmochtseprontana ca” —cha tojanábema.

⁴ Chcase, Bëngbe Bëtsá Juan tbojanichmó, y cha tojánbocna entsanga ndoyena luaroca, Bëngbe Bëtsabe soyëngama abuayinyaye y entsanga ubáyana. Cha entsanga yojanëtsësnaye: “Tšëngaftangbe bacna soyëngama ngménaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁵ Nýets Judea luarocana chábioye entsanga imojánbocana, y Jerusalenentsana nýetsca entságnaca, y Bëngbe Bëtsábioye chëngbe bacna soyëngama jaimpáda chentsana, Juan Jordán ca uabaina béjajiñe chënga yojanëbáyana.

⁶ Juanbe entsayá inauapormana camellbe stjënasheca y bobache yojanas-nana; chapulinatémënga y tjañe méloye inasaye. ⁷ Y mëntšá entsanga yojanëtsësnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitsatobuajoñe, ni mo jotsejbiyana chabe shecochëtjonëshentša corriëja jajafjonama. ⁸ Atšna búyesheca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espíritu tšëngaftangbe ainaniñe cháumashënguama ca.”

Juan, Jesúsbioye tbojanabaye

(Mt 3.13-17; Lc 3.21-22)

⁹ Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán béjajiñe Jesúsbioye cha tbojanabaye.

¹⁰ Bejajoicana yojtashëbëbocna orna, tojáninýe celoca atëfjniñe, y chë Uámana Espíritu chábioye mo palomatemcá yojtsastjajuana. ¹¹ Y celocana Bëngbe Bëtsá mëntšá tbojanianyana: “Acna atšbe bonshana Uaquiñá condmëna; achiamá corente sëntsoyejuá ca.”

Jesús tojanobená Satanás jayëñjanama

(Mt 4.1-11; Lc 4.1-13)

¹² Chentsana chë Uámana Espíritu Jesúsbioye entsanga ndoyena luaroye tbojanánatse. ¹³ Canta bnëtsana te chë entsanga ndoyena luaroca tbojanjëtana, y Satanasma yojanabó jisháchichiyama. Chë luarentše tšátjaye bayënga imnájena; chentsana, Bëngbe Bëtsabe angelënga cha imojtseserverna.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

¹⁴ Juan cárceloye tmojanětámentšana, Jesús Galileoye tojesaná; y chiñe cha yojanabuayiyná chë tšabe noticiënga Bëngbe Bëtsabiamá. ¹⁵ Jesús entšanga yojanëtsëtsnaye: “Ora tocjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngmënaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiamá šmochjýëngacñe ca.”

Jesús tojánachembo canta boyabásenga beonga ashebuánayënga cha chamuas-tama

(Mt 4.18-22; Lc 5.1-11)

¹⁶ Galilea uafjajónaye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraiešhangá ibnetsashbuétsetšañe, er beonga ashebuánayata chata ibnamna. ¹⁷ Chora Jesús tojanëyana: “Atšeftaca mabata. Atše cbochanjábiamá Bëngbe Bëtsabiamá entšanga anguayata; y morscana, nýe beonga ashebuánayata ndoñe quešochátsmëna ca.”

¹⁸ Y cachora chatbe atarraiešhangá cachcá tbojésanaboshjuana y Jesús tmojanasto.

¹⁹ Más chcoye yojátaye orna, Jesús tojánanyë Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiešhangá atapórmayañe. ²⁰ Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúsëftaca tbojtsanoñe.

Jesús, bacna bayëjbe juabna cánýabioye tbojanbojuaná

(Lc 4.31-37)

²¹ Chentšana, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. ²² Entšanga imojtsenjnanaye ntšamo Jesús yojtsabuatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuátambayënga imojanabuatambacá. ²³ Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana: ²⁴ —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatsëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojanianyana: —¡lytëca móbema y chábentšana maisebocna ca!

²⁶ Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. ²⁷ Chama, nýetsca entšanga ojnánánënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsamëndayana y chëngnaca joyeunayana ca!”

²⁸ Y betesco nýets Galilea luarentša pueblënguenache Jesusbiamá yojtsótatsëmbo.

Jesús, Simón Pédrëbe uambén mamábioye tbojanshná

(Mt 8.14-15; Lc 4.38-39)

²⁹ Chentšana, chë enefjuana yebnentšana tmojánbocana y Santiago y Juánoftaca Jesús tojáná, Simón y Andresbe yebnoye. ³⁰ Simonbe uambén mamá šocá inajájona, jabuache calentóraca, y Jesúsbioye chë šocabiamá tmojanianyana. ³¹ As chora, Jesús tojanobeconá, chë šocábioye tbojanábuacueshache

y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Lc 4.40-41)

³² Chë te jetiñe, shinÿe ya yojuenatjëmba ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse; ³³ y nÿetsca entšanga bëšoye imojobeconá. ³⁴ Jesús banga tojanashná, nÿetsca šocana bomnënga, y ba bacna bayëjënga entšanguentsšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnana.

Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyná

(Lc 4.42-44)

³⁵ Yëfsana cabá cachëse, cabá ibetcá, Jesús tojëftsantsbaná, chë pueblentsšana tojëftsanbocna y entšanga ndoyena luaroye tojtsanoñe, choca Bëngbe Bëtsáftaca jencuëntama. ³⁶ Pero Simón y chabe enutëngna tmojána jetsenguan-guama; ³⁷ y tmojtsaninÿena ora tmojanianyana: —Nÿetscanga cmontsenguá ca.

³⁸ Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

³⁹ Y chentsšana, Jesús yojánana Bëngbe Bëtsabiama entšanga abuayiynaye chë judiëngbe enefjuana yebnënguenache, nÿets Galileiñe, y entšángbentsšana bacna bayëjënga yojtëbuacana.

Jesús, canÿa bacna nguayanánaca šocábioye tbojanshná

(Mt 8.1-4; Lc 5.12-16)

⁴⁰ Chentsšana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

⁴¹ Jesús chabiama tbojanongmé; cucuátšeca tbojánbojajo y tbojanianyana: —Aíñe sëntseboše. ¡Šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna. ⁴³ Chora Jesús chábioye tbojtanichmó, pero puerta mëntšá tbojanmandá: ⁴⁴—Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entšanga chamotatšëmbona mora ya tšabá cojtsatsmënama ca.

⁴⁵ Pero chë boyabásana, chentsšana tojëftsanbocna y cachora yojóntša nÿetsquënache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena luarënguiñe yojánana; pero nÿets luarëngocana chábioye entšanga imojánashjajuana.

2

Jesús, canÿe jama ndobenábioye tbojanshná

(Mt 9.1-8; Lc 5.17-26)

¹ Chentsšana, Jesús Capernaumoye tojtanashjango; y entšanga imojátatšëmbona, Jesús yebnentše yojtsatsmënama. ² Mallajta entšanga chentše tmojanófoto; chë causa chë yebnentše ya tondaye más luare entšangbiamana yontsemna, ni mo chë amashjuanentše, y Jesús Bëngbe Bëtsabe soyëngama yojtسابuayiynaye. ³ Chora tojanopasá, canta boyabásenga

tmojánashjango, canÿe entšá jama ndobená imojtsaismana. ⁴ Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango. ⁵ Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojanianyana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: ⁷ “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdonana; nÿe Bëngbe Bëtsana aíñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná? ⁹ ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? ¹⁰ Y chca, mora atše chochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanianyana: ¹¹ “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebcna. Chama nÿetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

Jesús, Levíbioye tbojanchembo chabuastama
(Mt 9.9-13; Lc 5.27-32)

¹³ Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. ¹⁴ Chentšana yojtsataye orna, Jesús tojáninÿe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabañe. Chora Jesús tbojanianyana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámama, Jesús y chabe uatsjéndayëngaftaca; er ba entšanga cha imojústona. ¹⁶ Chë fariseunga y chë ley abuátambayënga, chë entšangftaca Jesús yojtsesama tmojáninÿe ora, chabe uatsjéndayëngbiye tmojanatjá: — ¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

¹⁷ Jesús chca tojanuena; as mëntšá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama
(Mt 9.14-17; Lc 5.33-39)

¹⁸ Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojanianyana: —Juanbe

ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjédayënga ndoñe chca ca?

¹⁹ As Jesús tojanējua: —Chë casamento fiestentše, chë ófjanënga saná ndoñe ntsabuáshebenana. ¿Ntsámo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. ²⁰ Pero ora echanjobuache y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsámo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjédayëngaftacnaca.

²¹ “Ndocná, canye tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. ²² Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámama; chca, chë jasabenga y chë vínoye josérviana ca” —Jesús tojánayana.

Jesusbe uatsjédayënga canye ochnayté trigo tmojanátabebe
(Mt 12.1-8; Lc 6.1-5)

²³ Canye ochnayté, Jesús canye jajajana yojtsaye; y chabe uatsjédayënga chëjana imojtsachñëjuana ora, tmojanontšë trigo juatabebiana. ²⁴ Chë fariseunga chca imojinye ora, Jesúsbiöye tmojanianyana: —Minye. ¿Ntsámo acbe uatsjédayënga montsamcá, ndoñe quenátslesenciana ochnayté jtsamama ca?

²⁵ Pero cha tojanējua: —¿Ndoñe šmëndualía y šmondëtatšëmbo ntsámo Rey David y chabe enutënga tmojanmama shëntseca imojtsemna ora y jasama yojtsëjaboto ora? ²⁶ Chca ora, Abiatar chë judiëngbe bachnangbe más uámama amëndayá inamna ora, David Bëngbe Bëtsabe yebnoye yojámashëngo, y chë larentše Bëngbe Bëtsá yojamnama injinyñayate tandëšënga yojase; y chë cháftaca imojánajna entšángnaca yojátataye. Y chë tandëšna nye bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbonjábema nye chë ochnayté ndoñe chaondëtrabajama. ²⁸ Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

3

Chë buashana cucuatše bomna entšá
(Mt 12.9-14; Lc 6.6-11)

¹ Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná. ² Chë fariseunga chiñe imojtserrondana jinjama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. ³ Chora Jesús chë buashana cucuatše bomnábioye tbojanianyana: —Chentše, entšangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tsabe soye o ndoñe tsabe soye? ¿Jatsbocama o jtsepochócama ca?

Pero chënga ndocá tmonjanjuá, nye iytëca imojobiama. ⁵ Chora Jesús rábiaca y ngmëncaca chë fariseunga tojanënyanýé, chënga ainaniñe josértama

ndoñe montseboše causa; y chë buashana cucuatše bomnábioye tbojanianyana: —Macuenyanëjaná ca.

As chë boyabása tojanacuenyanëjaná, y chora tšabá chëtsa yojtsatamna cach inyetsacá. ⁶ Pero chë fariseungna, chentšana tmojésanbocana ora, Rey Heródesbe ustonéngaftaca tmojanenoyeuná Jesusbe contra, y tmojanontsé juabnaryana ntšamo jamëse Jesús jóbama.

Mallajta entsanga Jesúsbioye tmojanobeconá

⁷ Chentšana, Jesús chabe uatsjéndayéngaftaca tojanoluaré mar béjaye tsa-choye, y Galileocana bëtscá entsanga tmojanasto. ⁸ Inye entsángnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón puebléngocana. Chënga tmojanobeconá, Jesús tša bëts soyënga yojtsamama tmojanuena ora. ⁹ Jesús chabe uatsjéndayënga tojanëyana: “Motsajna y canye barquësha atšbiana smochjuaprónta, tša entsanga ndoñe chašmondëtsatsëntšnama ca.” ¹⁰ Er cha banga tojanashná, y chë causa, nyetscanga šocana bomnënga chábioye tmojanajuatsëntšená cha jabojuama.

¹¹ Y chë bacna bayëjënga uambayëngna, Jesús tmojinye ora, betSCO chabe shecuatšentše imojtsofshëntsaméntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

¹² Pero Jesús puerte tojanamëndá, nda cha bëtsemnama entsangbe delante ndoñe chamondëtsichámuama.

Jesús chë bnëtsana uta uatsjéndayënga tojanabacacá

(Mt 10.1-4; Lc 6.12-16)

¹³ Chentšana, Jesús canye batsjoye tojántsjua, y ndëmuanyënga tšabá tbojanínynanënga tojánachembo. Y chëngna chábioye tmojanobeconá. ¹⁴ Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entsanga chámabuayenama; ¹⁵ y chënga obenana tojanatšatá entsángbentsana bacna bayëjënga jtëbuacanama. ¹⁶ Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye; ¹⁷ Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; ¹⁸ Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; ¹⁹ y Judas Iscariote, chë chentšana ndoñe baytesna, Jesús uayayëngbe cucuatšinë bochjanboshjoná.

Ley abuátambayënga tmojánayana, Jesús Satanásbentsana obenana tojanóyëngacñe ca

(Mt 12.22-32; Lc 11.14-23; 12.10)

²⁰ Chentšana, Jesús yebnoye tojtanamáshëngo, y tša entsanga chentše tmojanójoto; chë causa, ni cha ni chabe uatsjéndayënga, ni mo jasama luare ndoñe imontsebomna. ²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuëntaye cha opá tojtsanóbema ca.

²² Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entsángbentsana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinyanëyama chënga canye ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca? ²⁴ Canye amëndayábentše entsanga tmojtsenojatá y tmojtsenáyase, chë

amëndayana ndoñe ntjatotonana. ²⁵ Cachcá, canye yebnentse pamíllanga tmojtsenojatá y tmojtseñáyase, chë pamíllanga ndoñe tšabá nyets tempo quemochátsmëna. ²⁶ Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canye corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nye tcojshétsebatsëquëse cocayé cuanjobenaye cha jefcana.

²⁸ “Ndegombre cbëyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiama y ínÿengbiama ndoñe tšabá tmontsichamo soyëngnaca; ²⁹ pero chë Uámana Espíritbiama ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojtsambá ca.

Chë Jesusbe ndegombre pamíllanguentsënga
(Mt 12.46-50; Lc 8.19-21)

³¹ Chëntscuana, Jesusbe mamá y catsátanga choye tmojánashjajna, pero nÿe shjoca imojtsemna; y canya tmojanichmó cha jachembuama. ³² Chë ba entsanga chentse chabe shëconana imojtsetbiámanëngna, chora tmojanianyana: —Acbe mamá, acbe catsátanga y uabëngana shjoca montsemna; aca cmontsenguá ca.

³³ Chora cha tojanëjua: —¿Nda atšbe mamá yomna, y ndëmuanÿenga atšbe catsátanga ca?

³⁴ Chentsana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catsátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catsata, atšbe uabena y atšbe mamá, atšbe ndegombre pamíllanguentsá ca.

4

Chë jenabe cuento
(Mt 13.1-9; Lc 8.4-8)

¹ Chentsana, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjajónayentse yojanamna canye barquëshoye Jesús tojánašëngo y tojanótbema; y chë entsanga tsachoca imojtsemna. ² Chora cuentëngaca ba soyëngama tojanabuatambá.

Mëntsá tojanëyana: ³ “Smochjouena; canye jená chë jënaye jaujqüëshama yojëftsebocna. ⁴ Yojtsëjqüëshaye orna, básefta jënaye benache juachañe yojuatquécjana; pero jaja shloftšënga imojástjajna y lempe imojtsósañe. ⁵ Inÿe meshëngna ndëtsbenguiñe yojuatquécjana, ndoñe yapa fshantse binÿnentse. Chiñna betscó yojuábocna, ndoñe yapa jashenocana fshantse yojanmëna causa; ⁶ pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. ⁷ Inÿe meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jënyentšana tondaye yonjuashájona. ⁸ Pero inÿe meshëngna, uanguaniñe yojuatquécjana, y bëtscá tšabe shajuanënga chiñe yojóbocna: ínÿenache, canye meshentsana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” —cha tojánayana.

⁹ Y chentshana, Jesús más tojánayana: “Chë jouenama tmojtsobenënga, smochjouena ca.”

*Ndáyeca Jesús cuentëngaca yojánabuatambaye
(Mt 13.10-17; Lc 8.9-10)*

¹⁰ Chentshana, Jesús canya yojoquéda ora, chë chabe béconana imojtsemnënga chabe bnëtsana uta uatsjéndayëngaftaca, tmojantjá ndayá chë cuento bétsayanama. ¹¹ As Jesús tojanëjua: “Bëngbe Bëtsá tsëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntsëtsëtsná. ¹² Chca, masque beca chamotsafsna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená
(Mt 13.18-23; Lc 8.11-15)*

¹³ Chentshana, Jesús tojanëyana: “¿Quem cuentama ndoñe tcmónjósertase, ntšamo chcase nÿetsca cuentëngama cmochjóserta ca? ¹⁴ Chë jená endmëna chë tsabe noticiëngama abuayiynayá. ¹⁵ Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiana soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabëtsabuajuanama, chënga chiñe ndoñe chamondëtsošbuáchema. ¹⁶ Inÿe entsanga mondmëna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; ¹⁷ pero ndoñe nÿets tempo chana jocháchajuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga mochantsëbuayënja, y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. ¹⁸ Inÿenga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, ¹⁹ pero quem luarentša soyëngaca oyejuayënga jtsemnana yapa mochántseboše, y nÿe bomnana jëftsebomnana yapa mochanjésenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. ²⁰ Pero ínÿenga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nÿets ainánaca mochántseprontana chiñe jtsošbuáchiyama. Mo canÿe betiye beca tsabá tojtseshajuancá, chënga bëtscá tsabe soyënga Bëngbe Bëtsabiana mochántsama. Inÿenga ínÿengbiana más bëtscá soyënga mochanjama; y chca, ínÿenga mochántsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” —Jesús tojánayana.

*Chë uajuinÿanëshama cuento
(Lc 8.16-18)*

²¹ Mëntšánaca Jesús tojánayana: “Ndocná juiyëbana canÿe uajuinÿanëshaca cajonëshe o jutsnëshaca tajsoye juajájuama. Ndoñe; uajuinÿanëshaca juiyëbana tsbanánoca juajájuama, lempe chaotsebínÿnama. ²² Ndocna yoiytëmena soye ntjinÿencá queochaisoquéda, y chë ndótatšëmbo soye ntsotatšëmbcá queochaisoquéda. ²³ Chë jouenama tmojtsobenënga, smochjouena ca.”

²⁴ Y mëntšánaca Jesús tojanëyana: “Tsabá smochjájuaboye ntšamo šmojtsuenanama. Nÿe batšatema šmojouenëse, nÿe batšatema

cmochanjósertaye; pero aínne tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. ²⁵ Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nýe batšá ibosertana soyëngama bochántsebnatjëmba ca” —cha tojánayana.

Chë ojuajna jenayama cuento

²⁶ Jesús mëntšánaca tojanëyana: “Bëngbe Bëtsabe amëndayana endmëna mo ntšamo canýe boyabása jénaye tojuatbontsá ora echandbopasacá: ²⁷ masque cha cada ibeta jtsojájuana y bnëté jotsbanama, ibeta o bnëté, chë jénayentšana juabocnana y juájuana, ntšamo chca yojtsájuañnama chë boyabása ntjatstatšëmbcá. ²⁸ Chë fshantse cachabe ponto jamana ndayánaca chiñe chaójuama; natsana tsbuanachëtëma jóbocnana, chentšana chë espiga, y chentšana chë meshënga jashájonana. ²⁹ Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

Chë mostaztiye jenayama cuento

(Mt 13.31-32; Lc 13.18-19)

³⁰ Jesús mëntšánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? ³¹ Endmëna mo canýe mostaza jénaye jajoca tcojajecá. Ndegombre, nýetsca quem luarentša jenayëngama, mostaza jénaye chë más básetema endmëna; ³² pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

Ndáyeca Jesús cuentëngaca entsanga yojanabuayiyná

(Mt 13.34-35)

³³ Chca Jesús Bëngbe Bëtsabe soyëngama entsanga yojanabuatambá, ba cuentënguentsana, mo chë tmonjouena cuentcá, ntsachetšá chë entsanga josértama tmojobenacá. ³⁴ Tondaye yojanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cánýenga tmojtsemna ora.

Jesús chë binýia y chë béjaye bonguana yojëtsbema

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjëndayënga tojanëyana: “Uafjónaye chengwana cuajna ca.”

³⁶ Chorna, chë entsanga jesabáshejuanëse, chë uatsjëndayënga Jesús tmojtšanánatseñe, cach yojánenjaquena barquëshañe; y inýe entsángnaca inýe barquëshangañe tmojanasto. ³⁷ Chentšana, chë uafjónaye béjajiñe tša jabuache binýia yojóshjango; olëshënga chë barquëshimojtsëtsbotsana, y chë causa chë barquëshimojtsëtsbotsana búyeshca jtsobuajútjiana. ³⁸ Y chëntscuana, barquëshimojtsëtsbotsana stëtsoica, tsëntsenëshañe Jesús yojtsomañe. Chora chë uatsjëndayënga tmojtšanfšená y tmojaniyana: —¡Buatëmbayá! ¿Tondayana cmontsentšamna bënga chašotsënatjëmbama ca?

³⁹ As Jesús tojantsbaná, chë binýia tbojanácacana, y chë bëts uafjónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna. ⁴⁰ Chora chabe uatsjëndayënga tojanëyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

41 Chama, chënga puerte auatjanánënga imojtsemna y mëntśá imojtsenatsëtsnaye: “¿Nda quem boyabása yomna? Cha tonjayana y chë binjia y chë béjaye tmonjoyeuná ca.”

5

Chë Gerasa luaroca bacna bayëja uambayá (Mt 8.28-34; Lc 8.26-39)

1 Chentšana, uafjajónaye chenguánoica tmojánashjajna, Geraseno ca uabaina entšangbe luaroye. 2 Jesús barquëshoicana tojánastjango, y cachora, chë obanëngbe cuevëshënguentsana canyë entśá, bacna bayëjbe juabna uambayá, tojánbocna y tbojanjébengo. 3 Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; 4 er ba soye cadenëjuangaca y inyë soyëngaca cha nyëtsá tmojanbatsëca, pero cha nyëtsca soye yojsátabebe y yojsenájaca, y ndocná yonjobenaye cha bonguana chaotsemnama. 5 Nyëts tempo, bnëtë y ibeta, obanëngbe cuevëshënguenache y tjañenache yojánana yoye, y ndëtsbéngaca enotsetšenaye. 6 Jesúsbioye bënocana tbojáninyë ora, chábioyë tojanójtjajo y chabe natsanoica yoJoshëntsamentšiyë; 7 y mëntśá yojsáyebuache: —¿Ndayá átseftaca cojtseboşe, Jesús, celoca Bëngbe Bëtsabe Uaquiñá? ¡Bëngbe Bëtsabe delante choimpadá, ndoñe şcatjatssetšená ca!

8 Chca tbojanianyana, er Jesús chábioyë tbojanianyana: —¡Bacna bayëjbe juabna, chábentšana maisebocna ca!

9 Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

10 Y tša Jesús ibojtserruana chë luarentšana ndoñe chaondëtëbuacanama. 11 Chentša béconana ba cotšënga imnajena, batsjoca imnétsosañe; 12 as chë bacna bayëjënga Jesúsbioye tmojanimpadá: —Chë cotšëngbiyë şmichamó, chëngbeñe fchayamashjna ca.

13 Y Jesús aíñe tojanalesenciá; as chë bacna bayëjënga chë entśábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëşëjana uafjajónayoye imojtsoshbuetşe y yojsatajo.

14 Chora, chë cotšënga anyëñënga tmojtsanacheta auatjanánënga, y tmojána chama jacuéntama chë pueblaca y chabuenache; y entšanga tmojánabo ntšamo tojanopasacá jinýama. 15 Jesús yojssemnoyë chë entšanga tmojánashjajna ora, tmojáninyë chë tempo bacna bayëjënga uambayá, inétsotbemañe, entśayá uichëtjoná y chabe nyëts juábnaca. Y chë entšanga chama imojtsëuatjaná. 16 Chë tmojáninyënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. 17 Chora chë entšanga tmojanontśé Jesús impadánana chë luarentšana chaotsatoñama.

18 Jesús chë barquëshoyë tojtanáşëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. 19 Pero ndoñe tbonjanlesenciá, sinó mëntśá tbojanianyana: “Acbe yebnoyë motsatoñe, acbe pamíllangbiyë, y cochjácuntaye ndayá Bëngbe Utabná ácaftaca tojamama, y ntšamo cha ácbioyë tmojalastemama ca.”

20 Chentšana, chë entśá yojsatoñe y tojanontśé Decápolis uabaina pueblënguenache jacúntana lempe ntšamo Jesús cháftaca tojanmcá; y nyëtscanga imojtsenjnanaye.

Jesús canÿe shembásabioye tbojanshná y Jairëbe bembetémbioye tbojtanayená (Mt 9.18-26; Lc 8.40-56)

²¹ Chentšana, Jesús cachiñe chë uafjajónaye chenguana tojesaná barquëshañe. Chocna ba entsanga tmojanobuashconá, y Jesús chë uafjajónaye tsachañe yojtsemna. ²² Chorna, tojánashjango chë judiëngbe enefjuana yebnentša canÿe mandayá, Jairo ca uabainá. Jesúsbioye tbojáninÿe ora, chábentše tojanoshëntsamentšé, ²³ y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajájua, salud chauatinÿenama y cháuatayenama ca.

²⁴ As Jesús cháftaca tojána; pero bëtská entsanga imojtsëstona, chábioye imojtsenatsëntšenaye. ²⁵ Chë entsanguentše yojtsaye canÿe shembása šocá; cha ya bnëtsana uta uata oboftjajuanánaca inapadecena. ²⁶ Cha puerte tojansufrí, ba ashnayëngbe cucuatšinë, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nÿe más peor ibojtsobi-amnaye. ²⁷ Chë shembása yojouena ntšamo Jesús ba šoquënga tojánashnama, y as stëtšoicana entsangbe tsëntsajana yojobeconá, y Jesusbe entsayá yojauábojajo. ²⁸ Cha chca tojanma, er yojtsejuabnaye: “Masque nÿe mo chabe entsayá sibiájua chaijuábojajo, y salud chantsatsbomna ca.” ²⁹ Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. ³⁰ Chora Jesús yojasëntia chábentšana obenana yojóbocnama, mo ndábioye tbojashná orcá; as cha tojanobuértana entsángbeñe y tojanatjá: —¿Nda atšbe entsayá tojuabojajo ca?

³¹ Chabe uatsjëndayënga tmojanjuá: —Aca contsonÿá chë entsanga cmontsatsëntšená, y cabá cochjátsnoticiaye nda entsayá tojuabojajo ca.

³² Pero Jesús cátoye yojtserreparana jinÿama nda tbojánbojajuama. ³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniyana. ³⁴ Chora Jesús tbojaniyana: —Bembe, Bëngbe Bëtsábeñe icošbuachéyeca shnaná contsatmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniyana: —Ndoñe matauatjana. Nÿe Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nÿe Pedro, Santiago y Juan, Santiagbe uabentsana, aíñe. ³⁸ Chentšana, chë mandayabe yebnoye tmojánashjajna ora, Jesús tojánanÿe entsanga tša imojtsenbouenana, entsanga imojtsošachiye y puerte ngmënaca imojtseyoye. ³⁹ As chë yebnoye tojánamashëngo y chë entsanga tojanëyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nÿe endëtsomañe ca.”

⁴⁰ Pero entsanga nÿe imojtsáfchaye. As Jesús nÿetsca entsanga shjoye tojtanëbuacna, y tojëftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tbojanábuacueshache y cachëngbe biyañe tbojaniyana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjnanaye. ⁴³ Pero Jesús

corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentšana Jesús tojëftsambocna y cachabe luaroye tojtashjango, y chabe uatsjédayënga cháftaca tmojána. ² Ochnayté tojanobuache ora, Jesús tojanontsé chë judiëngbe enefjuana yebnentše entsanga jabuátambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndémoca quem boyabása lempe chca tojuatsjinýe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaqiñá, y chabe catšátanga ndoñe mondmëna Santiago, José, Judas y Simón; y chabe uabëngnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjyaná, y ndoñe montseboše joyeunayana. ⁴ As Jesús tojanëyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamílangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanajó y tojanashná. ⁶ Jesús ojnananá yojtsemna cachábentša entsanga chábeñe ndoñe montsanošbuaché causa.

Jesús, chabe uatsjédayënga tojanichamó Bëngbe Bëtsabe amëndayama jábuayenama

(Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. ⁷ Y chë bnëtsana uta uatsjédayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatšatayëse; ⁸ y mëntšá yojáuyana: “Benachiñama ton-daye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. ⁹ Nduámanëshe šmochjesóshecochëtjo, y nýe canýájua šmochjesíchëtjo ca.”

¹⁰ Mëntšánaca tojanëyana: “Posada chacmojúyentsame yebnentše šmochtsoquedañe inýe puebloye játantscuana. ¹¹ Canýe luaroye chašmojáshajna y ndocná posada chacmonjuyentsame, y joyeunayama ndoñe chamontsebošëse, chentšana šmochjésebocana, y shecuatšentša polvëshe šmochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

¹² Chentšana, chë uatsjédayënga tmojëftsambocana y entsanga imojánabuayinayey, chë tšabe benache chámuatishachama, bacna soyënga amana jtsajbanase. ¹³ Entšángbentšana ba bacna bayëjënga tmojtanebuacna, y ba šoquënga aceitíyeca tmojananëttojto y tmojanashná.

Ntšamo Juan chë Ubayaná tojanóbana (Mt 14.1-12; Lc 9.7-9)

¹⁴ Rey Herodes Jesusbiamá yojátatšëmbona, er nýetsquénache nýetsca entsanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵ Inyengna imojtsichamo: “Cha entsemna chë Bëngbe Bëtsabe juabna oye-buambnaya Elías ca.”

Y inyengna: “Muana canya Bëngbe Bëtsabe juabna oye-buambnaya, mo chë tempsquëngca ca.”

¹⁶ Heródesna ntšamo entšanga Jesusbiamama imojtsichamca tojanuena ora, tojánayana: “Mua Juan entsemna, chë atše sënjanmandá bestšaše chamotséstjanguamá, mora obanënguentšana tojtayena ca.”

¹⁷ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamama. Herodes chca tojanama Herodíasbe causa, chabe uabentsá Felipebe shema. Herodes chë shëmaftaca tojanobouamá, Felipe cabá ainá ora. ¹⁸ Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

¹⁹ Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, ²⁰ er Herodes yojántatsëmbo, Juan canye nyetsca soyënguiñe tšabá amá, nye Bëngbe Bëtsábioye sempre oservená inamnama. Chama cha yojánauatja y ndoñe yonjanalesencia cha chamóbama. Y Juan Bëngbe Bëtsabe soyëngama Heródesbioye tbojtsebuayiyná ora, ntšamo jajuaboyana ndoñe yontsetátsëmbo, pero masque chca, oyejuayá Juánbioye ibnayeunana. ²¹ Pero Herodías tojáninyena mocna ora Juan chamóbama. Heródesbe cumpleño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. ²² Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyetsca ófanënga chama tša imojtsóyejuaye. As chë rey, chë tobiášbioye tbojanianyana: —Ndayánaca šmotjañe y atše cbochjätsetaye ca.

²³ Y jajúrase, mëntšá tbojanšbuachená: —Ntšamo chašcojotjañcá cbochjätsetaye, masque atšbe amëndayentša bomnantšana tsëntsañnaca ca.

²⁴ Chentsana, chë tobiáše yojëftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

²⁵ Cachora chë tobiáše betscó chë rey yojtsemnoye tojtanamáshëngo, y tbojanianyana: —Atše sëntseboše, cam ora Juan chë Ubayanabe bestšaše canye šcnenësiñe chašcuatšetá ca.

²⁶ Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniancá jebëbuetámenana. ²⁷ Cachora chë rey canye soldado ibojíchmua, Juanbe bestšaše chauiyëbama. ²⁸ As chë soldado cárceloye tojána, Juánbioye bestšaše tbojtsanëštjango, y canye šcnenësiñe tojanamba. Chë tobiášbioye tbojanëntsabuaché, y chana, chabe mamábioye.

²⁹ Juanbe ústonënga chama imojátatsëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó
(Mt 14.13-21; Lc 9.10-17; Jn 6.1-14)*

³⁰ Chë Jesús tojánichamonga chábioye tmojtannashjajna ora, lempe ntšamo tmojanmama y tmojanabuatambama cha tmojancuentá. ³¹ Chora Jesús tojanëyana: “Cuajna inyoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebonna.

³² As cányenga barquëshañe tmojtsanoñe, entsanga ndëbínýnoye. ³³ Pero chënga imojtsoñama entsanga tmojánanýe, y ndëmuanýenga imojamnama imojtsetátšëmbo; chcasna, chë entsanga shecuátšeca betscó tmojána, nýetsca pueblënguentshana, y chëngbe natsana choye tmojánashjajna. ³⁴ Chentshana, chë barquëshoicana tojánastjango ora, Jesús ba entsanga tojánanýe; chëngbiama tbojanongmé, er imojtsemna mo abuaýjénýa ndbomna oveshëngcá; y tojanontsé ba soyëngama jabuátambana.

³⁵ Ya jetiñe yojtsemna orna, chabe uatsjédayënga tmojanobobeconá y tmojaniana: —Ya jetiñe entsemna, y quem luariñe ndocná quenatiyena. ³⁶ Entsanga cuantichamuá, pueblotémëngoye y inýe luarëngoye chamotsoñama, ndayánaca jasama chamobuámiñama ca.

³⁷ Y Jesús tojanéyana: —Tšëngaftanga saná chëngbioye šmochjacaredádaye ca.

Chora chënga tmojaniana: —Crocénana queftsátsbomna, uta patse denario nýetsá, chëfta entsangbiama saná jabuámiyama ca.

³⁸ As Jesús tojanéyana: —¿Bueta tandëse šmojtsebomna? Marrepárange ca.

Ya imojtsetátšëmbo ora, tmojaniana: —Shachna tandëse y uta beónata fsëntsebomna ca.

³⁹ Chora Jesús entsanga tojanamëndá ínýoca ínýoca chamoshëntsjatbiamama. ⁴⁰ As chënga tmojanotbiama patse patsënga y shachna bnëtsátsanënga. ⁴¹ Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentshana chë tandëšënga tojanjatá y chabe uatsjédayënga tojanayentšbuaché chë entsanga jatsatayama. Y chë uta beónatnaca nýetscanga tojanëjátaye. ⁴² Nýetscanga tmojanse jtoshachaye nýetsá. ⁴³ Y chentshana, chë tandëse y chë beonentshana ojamnëtémënga tmojanatbaná, y bnëtsana uta sbarëcua tmojanajutjé. ⁴⁴ Chë saná tmojansënga imojamna shachna uaranga boyabásenga, shembásenga y básenga ntjacuntacá.

Jesús béjaye juatsbuacá yojtsaye
(Mt 14.22-27; Jn 6.16-21)

⁴⁵ Chentshana, Jesús chabe uatsjédayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entsanga yojtichamuá. ⁴⁶ Nýetscanga tojtanadiošoftá ora, tjoye cha tojtsanoñe Bëngbe Bëtsáftaca jencuéntama.

⁴⁷ Yojtseibétatana ora, chë barquëshu uafjajónaye tsëntsaca yojtsamna, y Jesús, canýa fshantsoca. ⁴⁸ Jesús tojáninýe chëngbiama totcá yojtsemna, chë barquëshaca natsanoye jtsayana, er binýia chëngbe contra yojtsemna. Ya binýana ora, chëngbioye yojobeconá, béjaye juatsbuacá yojtsaye, y ya chëngbiajana nýe ndericho jachnënguama yojtsemna. ⁴⁹ Y chënga, chë béjaye juatsbuacá cha yojtsayama tmojáninýe ora, tmojanjuabó cha canýe añemëse yojtsemna ca, y tmojanontsé yoyana; ⁵⁰ er nýetscanga chca tmojáninýe y cochauatjanánënga imojtsemna. Pero Jesús cachora tojanéyana: “¡Añemo šmochtsebomna; atše Jesús sëndmëna; ndoñe matauatjëngana ca!”

⁵¹ Chorna, chënga imojtsemna barquëshoye cha tojánashëngo, y chë jabuache binýia tojanëjbana, y nýetscanga puerte auatjanánënga y ojanánënga imojtsemna. ⁵² Chënga tmojáninýe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

Genesaret ca uabáinoca Jesús ba šoquënga tojanashná
(Mt 14.34-36)

⁵³ Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshu tmojanëtsbua. ⁵⁴ Chë barquëshoicana tmojánastjajna y cachora entsanga Jesús tmojanëtsbua. ⁵⁵ Chíyeca, chë luariñe yebnënguenache betesco chënga tmojána, y tmojanontsé chë shoquënga tjuashënguiñe juyambana, chë ndëmoye tmojanuena Jesús yojtsemna luaroye. ⁵⁶ Y ndayentse cha tojámashëngüentse, pueblënguiñe, bëts pueblënguiñe y base pueblotëmënguiñnaca, chë shoquënga benachoye imojtsëbuacana, y Jesús corente imojtseimpadana chë shoquënga chaualesenciá, nÿe mo chabe entsayá sibuájua juabojajuana. Y nÿetscanga tmojuábojajënga tšabá imojtsatsmëna.

7

Ndáyeca canÿe entsá Bëngbe Bëtsabe delante ndoñe tšabia nántsemna (Mt 15.1-20)

¹ Chentsana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga. ² Chënga tmojáninÿe básefta Jesuse uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. ³ Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábënga jtsatsmënama ca. ⁴ Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. ⁵ Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

⁶ Chora Jesús tojanëyana: —Nÿe tšabá chë Bëngbe Bëtsabe juabna oye-buambnayá Isaías tšëngaftangbiama tojánayana, bacna entsanga chë ntšamo ndegombre šmojuabnacá ndinÿinÿnayënga ca, mëntsá enduabemanentse: Quem entsanga mondbëtsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentse ndocna tšabe juabnëngaca.

⁷ Pero chënga nÿe bonamente mondbëtsichamo Bëngbe Bëtsá tša tšabia yomna ca; chënga nÿe entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

⁸ Chora Jesús tojanëyana: —Ntšamo Bëngbe Bëtsá tojanmandacá stëtšoye tšëngaftanga šmojtsequedá, nÿe ntšamo entsanga monduamancá jtsamama ca.

⁹ Y mëntsánaca tojanëyana: “Tšëngaftanga ntšamo Bëngbe Bëtsá tojanmandacá stëtšoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora. ¹⁰ Moisés tonjánayana: ‘Acbe bëtsëtsata ndoñe stëtšoye catjáquedaye’, y ‘nda chabe bëtsëtsatbiama ndoñe tšabá tonjoyebuambá chana, jóbanama jtsemnana ca.’ ¹¹ Pero tšëngaftanga šmondbëtsichamo, canÿe entsá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”). ¹² Tšëngaftanga šmondbëtsichamo,

nda chca tojayanëse, ya ndoñe obligaciõnaca ntsemnana chabe taitá o mamabiama ndayánaca jamama ca. ¹³ Chca, tsëngaftanga šmõntsama entsãnga Bëngbe Bëtsabe palabra stëtsoye chamoquedama, mo tondaye tõtsamancá, chë cuenta jtsamama ntšamo anteunga imõjanamancá, ntšamo entsãngbeñe tempscana y mëntscoñama yochñëjuancá. Y ba soyënga tsëngaftanga cachcá šmõntsama ca” —Jesús tojánayana.

¹⁴ Chora Jesús, cachiñe entsãnga tojtanachembo y tojanëyana: “Nÿetscanga šmochjouena y chacmësertá. ¹⁵ Ndayá entsá tojtsesacá, ndoñe ntjábemana ndoñe tsãbia Bëngbe Bëtsabe delante. Inÿetsá comna: ntšamo entsá tojtsejuabná y tojtsoyebuambnacá endobena jabemana ndoñe tsãbia Bëngbe Bëtsabe delante. ¹⁶ Chë jouenama tmojtsobenënga, šmochjouena ca” —cha tojánayana.

¹⁷ Jesús entsãnga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama. ¹⁸ As cha tojanëyana: “¿Tsëngaftãngnaca cabá ndoñe cmõntsësertana ca? ¿Cabá ndoñe cmõntsësertana, lempe ntšamo entsá tojascá ndoñe ntsobenana chábioye jabemana ndoñe tsãbia Bëngbe Bëtsabe delante; ¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tsábá jasama yomna ca y chë saná ndoñe ntjamana canÿe entsá bacna soye chaõtsamama ca. ²⁰ Y mëntsánaca tojánayana: “Ntšamo chë entsá tojtsejuabná y tojtsoyebuambnacá, chë soye cocayé endobena entsá jabemana ndoñe tsãbia Bëngbe Bëtsabe delante. ²¹ Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, ²² bacna juabnënga boyá o shëmbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsoyencá jtsiyenama, ínÿabioye jtsántšabošama, ínÿabiama jtsayátsenayama, jtsenábotamnayama y nÿe opënga jtsobiamnayama. ²³ Nÿetsca quem bacna soyënga entsãbe ainanocana jóbocnana, y cha jabemana ndoñe tsãbia Bëngbe Bëtsabe delante ca” —cha tojánayana.

Canÿe shembása inÿe luarocana ashjangoná Jesúsbeñe yojtsošbuaché (Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. ²⁵ Y betscõ, canÿe shembása, canÿe bembe bacna bayëjbe juabna uambayá ibnabomná, Jesusbiamana oye-buambnayana yojouena ora, chábioye tojánabo y chabe shecuatšentše tojanoshëntsamentšë. ²⁶ Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuátábocnama. ²⁷ Pero Jesús tbojanayana: —Atše šõndmëna natsana judío entsãngbiamana chë soyënga jamana; chentšana cocayé chanjobenaye chca inÿe entsãngbiamana jamana. Atše acbiamana, canÿe ndoñe judiá, soyënga stjãmëse, nántsemna mo chë básengbe saná quešënga cuaftsëbuajocá ca.

²⁸ Y cha tbojanjuá: —Arseñor, chca jtsemnana. Pero chë quešëngnaca mondbase chë básenga tmojtsesá ora tmojatquëcjanatemënga. Chcasna, Diosmanda átšnacana šmõtsajabuache ca.

²⁹ As Jesús tbojanayana: —Tsábá tcjayana; chcasna, acbe yebnoye motatoñe. Chë bacna bayëja acbe bembetëmbentšana tonjësebocna ca.

³⁰ Chentsana, chë shembása chabe yebnoye tojtaná, y tbojáninyena chë bembetema jutsnëshentše yojtsojájõe, y chë bacna bayëja ya ndõe chábeñe yontsemna.

Jesús, canye boyabása tësmá y ndëbiábioye tbojanshná

³¹ Tiro pueblentsana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango. ³² Cha chentše yojtsemna ora, chábioye tmojanánatse canye entsá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. ³³ Chorna Jesús entsángbentsana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. ³⁴ Chentsana, Jesús celoye tojanontješé, jabuache yojáshachna, y hebreo palabriñe tbojaniyana: “¡Efata ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. ³⁶ Y Jesús chë entsanga tojanamëndá chama ndocnábeñe ntsecuéntayana. Pero masque tša chama yojtsamëndaye, entsanga más chabiamá imojtsencuéntaye. ³⁷ Chama chë entsanga puerte imojtsenjnanaye, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

8

*Jesús canta uaranga entsanga saná tojanacaredadó
(Mt 15.32-39)*

¹ Chë tempo, ba entsanga Jesúsbioye cachiñe tmojanobeconá, y jasama tondaye imontsebmna. As Jesús chabe uatsjëndayënga tojánachembo y tojanëyana: ² —Quem entsangbiamá šontsengmena, er ya unga te átšeftaca montsemna y mora jasama tondaye quemátsbmna. ³ Cachëngbe yebnoye tondaye ntjascá stichamuase, shëntsama benachëjana nantsabuátëcja; y báseftanga bën luarocana tmojabo ca.

⁴ As chabe uatsjëndayënga tmojaniyana: —¿Ntšamo nda nanjobenaye quem luarentše, ndocna entsá ndoyenentše, chëfta entsangbiamá saná jinÿenama ca?

⁵ Chora cha tojanatjá: —¿Bueta tandëse šmojtsebmna ca?

Y chënga tmojanjuá: —Canÿsëftaše ca.

⁶ Chentsana, Jesús tojanamëndá entsanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentsana tojanjatá, chabe uatsjëndayënga tojanëjatá, y chëngna chë entsángbioye. ⁷ Básefta beonatëmëngnaca immabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entsanga jujátayama. ⁸ Nÿetscanga tmojanse jtoshachaye nÿetsá. Chentsana cabá canÿsëfta bëts sbarëcua tmojanajutjé chë ojamnëtëmëngaca. ⁹ Chë tmojansënga imojamna mo canta uaranga nÿetsá. Chentsana Jesús chë entsanga tojtanadiošoftá. ¹⁰ Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canye bëts soye, chabe ndegombre obenana jinÿama

(Mt 16.1-4; Lc 12.54-56)

¹¹ Chentsana, fariseunga tmojánabo y tmojanontšé Jesúseftaca enatsëtsnayana. Y jisháchichiyama, imojtseimpadana canye bëts soye chaoma, as jtsetatšëmbuama Jesusbe obenana Bëngbe Bëtsábiocana ndegombre

tainóbocanama. ¹² Y Jesús ngménaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canýe bëts soye chaimama tšëngaftanga atšbe obenana jinýanýiyama ca? Ndegombre cbëyana, quem entsanga ndocna chca soye quemochátinýe ca.”

¹³ Chorna chë entsanga cachcá tojesanënyá, chë barquëshoye yojtamáshëngo, y uafjajónaye chenguana yojtsoñe.

*Jesús tojanabuayená fariseungbe buatëmbana soyëngama
(Mt 16.5-12)*

¹⁴ Chë uatsjëndayënga yojésebnëtjomba ndaye soye jasama jesocñama, y chë barquëshoye nýe canýe tandëse imojtsebomna. ¹⁵ Jesús tojanéyana: —Smochtsantješna; cuedado šmochtsebomna fariseunga y Heródesbe levadurama ca.

¹⁶ Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

¹⁷ Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanéyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama? ¹⁸ Bominýe šmondobomna, pero ndoñe quešmátobena jinýana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. ¹⁹ Chë shachna uaranga entsanga shachna tandëšentsana sënjanëjatá chentšana, ¿bueta sbarëcua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

²⁰ —Y chë canýsëfta tandëšentsana canta uaranga entsanga sënjanëjatá chentšana, ¿bueta bëts sbarëcua chë ojamnëtémëngaca šmënjanajutjé ca?

Y chënga tmojanjuá: —Canýsëftácua ca.

²¹ As Jesús tojanéyana: —¿Y cabá ndoñe cmontsësertana ca?

Jesús canýe jtanábioye tbojanshná, Betsaida puebloca

²² Chentšana tmojánashjajna Betsaida puebloca; y chora, entsanga canýe boyabása jtaná Jesúsbioye tmojanánatse, y tmojanimpadá cha jabojuana chabotseshnama. ²³ As, chë jtanábioye tbojanábuacueshache, y chë pueblo chaboje tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinýama tajojtsanobena ca. ²⁴ As chë jtaná yojontješiye y tojánayana: —Boyabásenga sëntsënýa; mo betiyëngcá montsemna, pero montsobonjná ca.

²⁵ Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinýama; ya shnaná yojtoquéda. Y yojtsobena nýetsca soyënga botamana jinýana. ²⁶ Chentšana, Jesús cachabe yebnoye tbojtanichmó y mëntšá tbojanianyana: —Chë puebloye ndoñe catjëftsamashëngo ca.

*Pedro tojánayana, Jesús chë Cristo bëtsemnama
(Mt 16.13-20; Lc 9.18-21)*

²⁷ Chentšana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atše bëtsemnama ca entsanga imojtsichamo ca?

²⁸ Y chënga tmojanianyana: —Inýenga montsichamo Juan chë Ubayaná ca, ínýengna Elías ca, y ínýengna, canýe Bëngbe Bëtsabe juabna oyebuambnayá ca.

²⁹ As Jesús tojanatjá: —Y tšëngaftangna, ¿nda atše bétsemnama ntšamo smochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

³⁰ Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

Jesús tojánayana cha ibojamna jóbanana y jtsayenana ca
(Mt 16.21-28; Lc 9.22-27)

³¹ Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Njëtsçanga catafjoser-taycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. ³³ Pero Jesús yojobuértana, chabe uatsjéndayënga tojanënyänýé, y Pédrëbioye mëntsá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.”

³⁴ Chentšana, Jesús chabe uatsjéndayënga y chë inýe entšanga tojánachembo chamouenama, y tojanëyana: “Nda atšbe uatsjendayá jtsemnana tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. ³⁵ Nda tojt-sama quem luarentše bëtscá soyënga jtsebomnama y atšbiama jasúfriama ndoñe tontseprontana, chë njëtsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuátambaye causa, masque chaóbana, chë njëtsca tescama yomna tšabe vida echántsebomna. ³⁶ ¿Ndayama entšá buanjósërvia njëtsca quem luarentša soyënga jtsebomnana, chë njëtsca tescama yomna tšabe vida tojtsoperdese? ³⁷ Er canýe entšá chë njëtsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë njëtsca tescama yomna tšabe vida jtsebomnama. ³⁸ Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanëyana.

9

¹ Mëntsánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinýcá ca.”

Jesús inýetsá tojanobinýná
(Mt 17.1-13; Lc 9.28-36)

² Chentšana chnënguana tianoye, Jesús tojëftsanëbiatše Pedro, Santiago y Juan, y inýoye tojanënatse nýe chënga, canýe bëts tjoye. Y chëngbe delante Jesús inýetsá tojanobinýná; ³ chabe uichëtjonëjuangá tša yojtsabuashinýinýana; corente uafjantsëjuangá yojtsamna; nýa chca juafjantsama ndocná quem luarentše quentatobenaye. ⁴ Chca orna, chë uatsjéndayënga tmojáninýe, Moisés y Elías tbojanobinýná Jesúseftaca encuëntaye.

⁵ Chora Pedro, Jesúsbioye tbojaniana: “¡Buatëmbayá, tša tšabá bēngbiama cuanmēna muentše jtsemnana ca! Mora fchanjapórma unga tambotémēnga: cányetema achiana, ínyetema Moisesbiana y ínyetema Elíasbiana ca.”

⁶ Chca tojánayana, chē uatsjéndayēnga yapa auatjanánēnga imojtsemna causa, y Pedro ndoñe yontsetátšēmo ntšamo jayanana. ⁷ Chora canye jantšetēshe yojóbema, y chēngbioye yojáutsbotse; y chē jantšetēshoicana canye oyebuambnayana tojanóbocna, mēntšá: “Mua atšbe bonshana Uaquiñá endmēna; cha šmochtseyeunana ca.”

⁸ Y ndeolpe, chēngbe shēconana tmojanrrepará ora, ya ndocná más tmonjáninye; nye Jesús canya chēngaftaca yojtsemna.

⁹ Chē tjocana imojtsatstsmaye ora, Jesús chē uatsjéndayēnga tojanamēndá: —Bēngbe Bētsá Entšá tbojanbemá obanēnguentšana candētayenēntscuana, chē mēnté tjoca šmonjinye soyama ndocnábeñe šmattsecuéntaye ca.

¹⁰ Chē uatsjéndayēnga aíñe chca tmojanuena; pero chēnga imojtsentjanaye ndayá cha yojtsentšáyana, cha yochtanayena ca cha tojánayana ora. ¹¹ Y Jesúsbioye imojtsetjanaye: —¿Ndáyeca chē ley abuatambayēnga mondbétsichamo, canmēna Bēngbe Bētsabe Uámana Uabuayanabe natsana Elías jabana ca?

¹² As cha tojanējua: —Ndegombre, canya Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bēngbe Bētsabe uabemana palabrenguiñe endayancana, Bēngbe Bētsá Entšá tbojanbemá puerta caochjasúfria, y ínñenga puerta camochtsáboyēnja ca.

¹³ Ndegombre chēyana, canya Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnēnguama Bēngbe Bētsabe uabemana palabrenguiñe endayancá.

*Jesús, canye basa bayēbe juabna uambayábioye tbojanshná
(Mt 17.14-21; Lc 9.37-43)*

¹⁴ Chentšana, chēnga tmojtaná chē inye uatsjéndayēngbioye. Chora, Jesús tojáninye ba entšanga chē uatsjéndayēngbe shēconana imojtsemnama, y bāsefta ley abuatambayēngna chēngaftaca imojtsenatsētsnaye. ¹⁵ Nyetsca entšanga cha tmojáninye ora, imojenjnaná y tmojanótjajo cha jachuayama.

¹⁶ Chora Jesús chēnga tojanatjá: —¿Ndayama chēngaftaca šmenatsētsná ca?

¹⁷ Y canya entšanguentšá tbojanjuá: —Buatëmbayá, muentše ácbioye sēnjuánatse atšbe uaquiñá; bacna bayēbe juabna entsambá, y chē causa, jóyebuambayama ndoñe quenátobena. ¹⁸ Nye ndayéntsñaca cha tojtsemnentše, chē bayēja chábioye jishachana y jtsenajuáchesēnjana; chentše uayoicana shashiye jtsabocanana, jtsenoftēšfjojnayana y obanacá jtsatsjajonana. Acbe uatsjéndayēnga sēnjaimpadá chē bacna bayēja chamuatábocnama, pero ndoñe chematobená ca —cha tbojaniana.

¹⁹ As Jesús tojánayana: —¡Nyetsá ndošbuáchiyēnga ca! ¿Buetayté šojtsemna tšēngaftangaftaca jēftsemnana? ¿Buetayté uantado tšēngaftangaftaca chjēftsemna? ¡Moye chē bāsetema mánatse ca!

²⁰ Chora chē bāsetema chábioye tmojanánatse; y chē bayēja Jesúsbioye tbojáninye ora, tojanma chē basa ataque chaboshachama, y chē basa fshantsoye yojashajaye, yojtsojanduounaye y uayoicana shashiye yojtsábocana. ²¹ As Jesús chē básabe taitábioye tbojantjá: —¿Buetayté chca yojtsepása ca?

Y cha tbojanjuá: —Bāsetema orscana chca; ²² ba soye, chē bayēja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiana jamama tcojtsobenēse, bēnga šmotsalastemá y šmotsējabuache ca.

²³ Chora Jesús tbojaniyana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiama lempe endopodena ca.

²⁴ Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

²⁵ Y bëtscá entšanga imojtsójotoma Jesús tojáninýe ora, chë bacna bayëja tbojtsanbochembo mëntšá: —¡Bacna bayëja, chë básetema tësmá y ndëbiá bi-amnayá; chábensana maisebocna y ndocna te más chábeñe catjésamashëngo ca!

²⁶ Y chë bayëja chábensana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. ²⁷ Pero Jesús tbojanábuacueshache y tbojtansbaná; y chë básana yojtëtsaye.

²⁸ Chentšana, Jesús canýe yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹ Y Jesús tojanëjua: —Chca bayëjënga jtëbuacanamna jobenayana nýe Bëngbe Bëtsáftaca jencuëntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca
(Mt 17.22-23; Lc 9.43-45)

³⁰ Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, ³¹ er cha chabe uatsjëndayënga yojsabuátambaye. Mëntšá cachabiamá yojanëtsëtsnaye: “Bëngbe Bëtsá Entšá tbojanbemá entsangbe cucuatšinë mochanjáboshjona; mochanjóba, pero chentšana unga tianoye echántayena ca.”

³² Pero chënga ndoñe yontsósertana ntšamo Jesús yojsanëtsëtsnacá, y chama jatstjanayamna chënga imojtsauatja.

¿Nda chë más uamaná yomna?
(Mt 18.1-5; Lc 9.46-48)

³³ Chora Capernaum puebloye chënga tmojánashjajna; y cach yebnentše imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?” ³⁴ Chëngna nýe iytëca tmojanobiamá, er benachëjana chënga imnayénatsëtsnaye, chënguentsá nda chë más uamaná bëtsemnama. ³⁵ As Jesús tojanótbema, chabe bnëtsana uta uatsjëndayënga tojánachembo y tojanëyana: “Ndánaca nýetscangbiama chë más uamaná jtsemnama tojtsebošëse, cha chë más nduamaná chaóbema y nýetscanga chaotsaserverna ca.” ³⁶ Chora Jesús canýe básetema tbojánishache, chëngbe tsëntsaca tbojanatsá, tbojantbá y chënga tojanëyana: ³⁷ “Ndánaca, átšbeñe ošbuachiyá bëtsemnayeca, tbojofja canýa mo quem basetemcá, chana atše jofjana; y nda atše šojofja, chora cha nýe atše ndoñe ntjofjana, sinó chë šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana
(Mt 10.42; Lc 9.49-50)

³⁸ Juan, Jesúsbioye tbojaniyana: —Buatëmbayá, bënga fsënjinye canýe boyabása, y cha aca jótšëmbonëse, bacna bayëjbe juabna entšángbentšana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

³⁹ As Jesús tbojanjuá: —Ndoñe šmatjuauyaná; er ndocná quenátobena canýe bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana. ⁴⁰ Ndegombre, nda ndoñe bëngbe contra tontsemná, bëngaftaca jtsemnana. ⁴¹ Y ndánaca, masque nýe býeshetema tšëngaftanga tcmojubuatšatá, tšëngaftanga átšbënga bëtsemnayeca,

chábioye Bëngbe Bëtsá canye uacanana soye bochántatsetaye, cha chë tšabe soye tojamama ca.

Resjo yomna, nderado bacna soyënga cuanjama
(Mt 18.6-9; Lc 17.1-2)

⁴² Chentšana Jesús tojánayana: “Canya átsbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canye bëts nantsnëbé chamotsetamošëntšbua y mar béjayoye asentoye chamotsashbuetše chabotsenatjëmbama. ⁴³ Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nyetsca tescama vida jtsebomnama, nye canye cucuatše bomná, y ndoñe nyets útatšeca infierno chacmotocá jama, chë ndocna te yochanjáfsana íñeshoye; ⁴⁴ chocha útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁵ “Nderado acbe shecuátšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nyetsca tescama vida jtsebomnama, y ndoñe nyets útatšeca infierno chacmotsëtšena; ⁴⁶ chocha útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁷ “Nderado acbe bomínýeca bacna soye tcojinýe y cachca soye tcojama, más tšabá nántsemna chë bomínýe chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nye canye bomínýe bomná, y ndoñe nyets útabeca infierno chacmotsëtšena; ⁴⁸ chocha útsenënga puerte nyetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁹ “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nyetsca tšëngaftangbiamama tšábenga chašmotsemnama, chë átsbeñe betsošbuáchema šmojtsepadecena ora šmojuantase. ⁵⁰ Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entsangbiamama šmochtsemna, chëngbeñe jtsiyenëse ntšamo Bëngbe Bëtsá yobošcá, y nyetscángaftaca natjëmbana šmochtsiyena ca” —cha tojánayana.

10

Ndayá Jesús tojanabuatambá bouamnënga tmojtsenëtšenama
(Mt 19.1-12; Lc 16.18)

¹ Chentšana, Jesús chë luarentšana tojéftsanbocna y tojána Judea luaro y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. ² Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shémbioye cachcá jesonýayama ca?

³ Chora cha tojanéjua: —¿Ntšamo Moisés chë soyëngama tcmënjanamëndaye ca?

⁴ Y chënga tmojánayana: —Moisés tojanalesenciá chë boyá chabe shémbioye chabuiyé canye tsbuanácha, ndayëchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

⁵ Chora Jesús tojanéyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga

tcmojéftsanamëndá. ⁶ Pero quem luare jobojátšama orna, “Bëngbe Bëtsá canÿe boyabása y canÿe shembása tonjánabiamá. ⁷ Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama, ⁸ y chë útatna mo canÿacá bochántsemna.” Y chca, ya ndoñe útata quebochátsmëna, sinó nÿe mo canÿacá. ⁹ Chcasna, entsá ndoñe chaondéndbema ndayá Bëngbe Bëtsá mo canÿiñcá tojëftsema soye ca —cha tojánayana.

¹⁰ Ya cach yebnoca imojtsatsmëna ora, chabe uatsjédayënga cach soyama imojtétstjaye. ¹¹ Y Jesús tojanéyana: “Nda chabe shémbioye cachcá tbojesonÿá y ínÿaftaca tojtóbouamase, cha chë natsana shémbioye inÿe shembásaftaca jtseíngñayana; chana canÿe uabuatmá jtsebomnana. ¹² Y chë shema chabe boyábioye cachcá tbojesonÿá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canÿe uabuatmá jtsebomnana ca” —Jesús tojánayana.

*Jesús, basetémëngbiamá Bëngbe Bëtsábioye tbojanimpadá
(Mt 19.13-15; Lc 18.15-17)*

¹³ Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiamá chaboimpadama; pero chabe uatsjédayëngna tmojanontsé chë basetémënga unachayënga jtsécácanana. ¹⁴ Jesús chca tojáninÿe ora, tojánëtna y chë uatsjédayënga tojanéyana: “Cachcá mónÿaye chë basetémënga átšbioye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetemëngcá imomnëngbiamá. ¹⁵ Ndegombre cbëyana, nda Bëngbe Bëtsabe soyënga ndoñe tonjóyëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

¹⁶ Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnama.

*Canÿe bomna entsá Jesúsbioye tojána
(Mt 19.16-30; Lc 18.18-30)*

¹⁷ Jesús jama tojtëtanontsé ora, canÿe boyabása chábioye tojanótjajo, chabe shecuatšentše tojanoshëntsamentsé, y mëntsá tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

¹⁸ Y Jesús tbojanjuá: —¿Ndáyeca “tšabia ca” šcjauyana? Tšabia nÿe canÿa endmëna: Bëngbe Bëtsá. ¹⁹ Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena, ínÿëngbioye ndoñe catjáingñaye ndayánaca jabacama, y acbe bëtsétsata ndoñe stëtšoye catjáquedaye ca.”

²⁰ Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

²¹ Jesús bonshanánaca tbojanonÿinÿé y mëntsá tbojanianyana: —Canÿe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjëmënga cochtsatšataye; chca, celoca canÿe bëts bomnana cochántsebomna. Chentšana, cochjabo y šcochjuasto ca.

²² Pero chë bobóntsbioye inÿëtšá ibojtsínÿnana Jesús chca tbojanianyana; y puerte ngmënacá yojtá, cha puerte bomná inamna causa.

²³ Chora Jesús cátoye tojanrrepará y chabe uatsjédayënga tojanéyana: —¡Puerte totcá entsemna bomnëngbiamá Bëngbe Bëtsabe amëndayoye jamashënguama ca!

²⁴ Chca imojouena ora, chë uatsjédayënga ojanánënga imojtsemna, pero Jesús cachiñe tojanoyebuambá y mëntsá tojanéyana: —Atšbe básënga; ¡puerte totcá entsemna Bëngbe Bëtsabe amëndayoye jamashënguama!

25 Ndegombre, más paselo endmëna chë coshufjentša atëfjnëjana canÿe camello chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

26 Pero chë uatsjëndayënga nÿe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

27 Chora Jesús tojanënÿanÿé y tojanëyana: —Entšanga ndoñe quemátobena jamana canÿa atsbocaná chaotsemnana, pero Bëngbe Bëtsá aíñe; er Bëngbe Bëtsá lempe jamama endobena ca.

28 Chora Pedro tbojanianyana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsaína ca.

29 As Jesús tojánayana: —Ndegombre cbëyana, ndánaca átšbioye jasérviana y chë tšabe noticiënga jábuayenama, tojëseboshjona chabe yebna, catšátanga o uabënanga, bebmá o befta, o básenga, o fshantsënga, 30 cha mora quem luarentše echanjójyëngacñe chama patse soye más yebnënga, catšátanga, uabënanga, bebmanga, básenga y fshantsënga, masque puerte chaosufrima ínÿenga mochántsama; y chë inÿe luarocna, chë nÿetsca tescama yomna tšabe vida echanjónÿena. 31 Pero banga, mora uámanënga imomnënga, nduámanënga mochántsemna; y banga, mora nduámanënga imomnënga, uámanënga mochántsemna ca —Jesús tojánayana.

*Jesús cachiñe tojánayana cha jóbanama y jtayenama
(Mt 20.17-19; Lc 18.31-34)*

32 Chentšana Jerusalenoye imojtsaye, y Jesús yojtsebnatsana. Chë uat-sjëndayënga puerte ojnanánënga imojtsemna, Jesús ndauatjcá choye yojt-sayama; y inÿe becá entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjëndayënga barie tojánachembo y tojanontsé jáuyanana ntšamo cháftaca jopásama yojtsemnana. 33 Mëntšá tojanëyana: “Tšëngaftanga šmontsonÿá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšínë mochanjáboshjona, y chënga mochanjayana cha chaóbana ca; y ndoñe judiëngbe cucuatšínë mochanjáboshjona. 34 Chënga mochantsáboyejuana, mochántsebuashëttojo, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canÿe pavor cháuabiamama
(Mt 20.20-28)*

35 Chora, Santiago y Juan, Zebedeobe uaquiñata, Jesúsbioye tbojanobconá y tmojanianyana: —Buatëmbayá, bëndata fsëntseboše pavor chašcuabiamama ntšamo chachojaimpadacá ca.

36 Y Jesús tojanatjá: —¿Ndayá šojtseboše atše tsëndatbiana chjamama ca?

37 Y chata tbojanianyana: —Aca reycá chacojtsemánda ora, cochjaleséncia bëndata fchayobená jótbemana, canÿa acbe catšbioica y inÿa acbe uañicuayoica ca.

38 As Jesús tojanëjua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriana tašatjobenaye? ¿Y entšanga puerte bacá chacmojtšëbuatsená ora, tašochjauánta, ntšamo atše chjauantacá ca?

39 Y chata tbojanianyana: —Aíñe fchanjobenaye ca.

Y Jesús tojanëyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfriana. 40 Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndëmuanÿengbiana atšbe Taitá to-japrontacá ca.

⁴¹ Chë inÿe bnëtsana uatsjëndayënga chca tmojanuena ora, tmojanontsé Santiago y Juánoftaca jotjáyanana. ⁴² Pero Jesús nÿetsca uatsjëndayënga tojánachembo y tojanëyana: “Tšëngaftanga šmondëtatšëmbo, quem luarentša amëndayënga lempe jtsemándayana, nÿa mo nduiñënga cuaftsemncá; y chë bëtsëtsa entšanga chëngbe obenánaca jtsemándayana, ntšámnaca jtsamëse, chë inÿe entšanga sempre chamotsayaunanama. ⁴³ Pero tšëngaftangbeñe ndoñe chca chaondëtsemna. Inÿetšá; masna, nda tšëngaftangbeñe chë más uamaná jtsemnana tojtseboše, cha bontsemna chë ínÿenga jtsaservénana; ⁴⁴ y ndánaca tšëngaftanguentšá chë más uamaná jtsemnana tojtsebošá, bontsemna jtsemnana nÿetscangbiana, mo nÿe ínÿabiama nÿets tempo oservenacá. ⁴⁵ Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóšana ba entšanga atsebácanënga chamotsemnana ca” —cha tojánayana.

Jesús canÿe jtanábioye tbojanshná
(Mt 20.29-34; Lc 18.35-43)

⁴⁶ Chentšana, Jesús y chabe uatsjëndayënga Jericó uabaina pueblöye tmojánashjajna. Y Jesús chabe uatsjëndayëngaftaca y bëtscá entšangftaca Jericó pueblentsana yojtšaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. ⁴⁷ Y Jesús Nazaretocá chëjana yojtšachnëjuanama cha yojátatšëmbona ora, tojanontsé mëntšá uayebuáchana: —¡Jesús, Davídbentšana Entšá, šmotselastemá ca!

⁴⁸ Chorna, banga chë jtaná imojtsácacana iytëca chaóbemama. Pero cha más yojtšáyebuache: —¡Davídbentšana Entšá, šmotselastemá ca!

⁴⁹ Chora Jesús tojantsá y chë ínÿenga tojanëyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtse-bomna; motsbaná! Jesús cmontsechembuana ca.

⁵⁰ Y chë jtaná, quefsaiya jtsenátsejquëse, yojontsënja y betscó Jesúsbioye yojobeconá. ⁵¹ Chora, Jesús chë jtanábioye tbojantjá: —¿Ndayá cojtseboše atše achiana chjamama ca?

Y chë jtaná tbojanjuá: —¡Buatëmbayá, šmolesenciá atše chašuatabínÿnama ca!

⁵² As Jesús tbojanianyana: —Motsatoñe. Tšabá jtsatsmënana Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtséstona.

11

Jesús Jerusalenoye tojánashjango
(Mt 21.1-11; Lc 19.28-40; Jn 12.12-19)

¹ Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó, ² y mëntšá tojanëyana: “Tsëndatbe natsana entsemna base pueblotëmoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse. ³ Nderado nda, ¿ndáyeca šmojtšanachá ca? chacmojátjase, šochjojuá: ‘Bëngbe Utabná bontsájaboto y chora bochantabáiseboshjona ca.’ ”

⁴ As chata tbojána, y tbojáninÿena chë burrotema tsáshenañe, canÿe bësášañe utsbuaná, y imojuajafjoná.

⁵ Y básefta entšanga chiñe imojtsemnënga, chátbioye tmojanëyana: “¿Ndayá šojtsama? ¿Ndayeca chë burrotema šojtsajafjná ca?”

⁶ As chata tbojanjuá ntšamo Jesús tojanëyancá; y chë entsanga tmojanalesenciá chë burrotema chamuánatsama. ⁷ Chentsana, chë burrotema Jesúsbioye tmojanánatse; chë burrotémeñe chatbe entsáyá tbojanájatse, y Jesús chábeñe tojanenojayé. ⁸ Bëtsá entsanga chëngbe entsáyá chë benachëjana imojtsanëtétsatsana, y ínÿengna chë jajoca imojuatétsetse buacuashangá chiñe imojuacjaye. ⁹ Y chë natsana imojtsajnënga y chë ústonoyënga mëntsá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

*Jesús tojánayana canÿe betiye ndoñe más chaondëshájona ca
(Mt 21.18-19)*

¹² Yëfsana, Betaniocana Jerusalenoye chënga imojtésajna ora, Jesús tbojánishëtsena. ¹³ Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuanáchënga chiñe yojínÿena, chora ndoñe shajo tempo bëtsemna causa. ¹⁴ As Jesús chë higo betiyoye tojánayana: “¡Ndocna te más chaondëshájona entsanga chamosama ca!”

Y chabe uatsjëndayënga imojouena ntšamo cha tojanayancá.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna
(Mt 21.12-17; Lc 19.45-48; Jn 2.13-22)*

¹⁵ Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentsana jtëbuacnana chë chentse imojtsena y imojtsobuámnañënga. Chéntsnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentsama inoserverna. Chë entsanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tšenëšëngnaca; ¹⁶ y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. ¹⁷ Y tojanontsé entsanga mëntsá jabuátambana: “Ndegombre, Bëngbe Bëtsabe uabemana palabrenguiñe cha mëntsá tojánayana: ‘Atšbe bëts yebna echantsabaina nÿetsca luarentša entsangbiamá átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

¹⁸ Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nÿetsca entsanga imojtsenjnanaye ntšamo cha yojanabuátambama. ¹⁹ Pero yojtseibétatana ora, Jesús chabe uatsjëndayëngaftaca chë bëts pueblentsana yojesóbocñe.

*Chë higo betiye tojtsanbuashá
(Mt 21.20-22)*

²⁰ Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjëngaca yojtsebuashá. ²¹ Chora Pedro yojenójuaboye ntšamo yojopásama; as Jesúsbioye tbojaniyana: —¡Buatëmbayá, minÿe; chë tconjayana ndocna te más tšabe betiye chaotsemnama betiye tojtsebuashá ca!

22 Y Jesús tbojaninyana: —Bëngbe Bëtsábeñe šmochtsošbuáchiye. 23 Ndegombre cbëyana, nderado nda quem tjoye tojayana, “¡chentshana mojuaná y bëts uafjajónayoye motsëshbuetše ca!” y chca tojayana ainaniñe inyetsá juabna ntjatsbomncá, y ainaniñe puerte tojtsošbuaché ntšamo tojayancá aiñe yochjochnënguama, ndegombre chca echanjochnëngo. 24 Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmna. 25 Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endméná, tšëngaftangbe bacna soyëngama chacmotsaperdonama. 26 Pero inya ndoñe šmonjaperdonasna, Bëngbe Taitá, celoca endméná, cach ndoñe tšëngaftanga quecmochátaperdonaye ca —cha tojánayana.

Jesusbe obenana

(Mt 21.23-27; Lc 20.1-8)

27 Chca tojanopasá chentshana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, 28 y mëntsá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

29 As Jesús tojanëyana: —Atšnaca sëntsebmna canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. 30 ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

31 Chora chënga tmojanontsé mëntsá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ 32 Pero ndoñe quemuátobena jayanana ‘entsanga ca.’” Chca tojánayana, er chënga entsangbiama imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. 33 Chcasna, chënga tmojanjúá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quechochatëyana ndaye deréchoca atše chca stsama ca.

12

Chë puerte bacna trabájayëngbiama cuento

(Mt 21.33-46; Lc 20.9-19)

1 Chora Jesús tojanontsé cuentëngaca jabuátambana. Mëntsá tojanëyana: “Canye entsá bëtsca uvas betiyënga yojáje, y chë shëconana yojajëtja. Chë uvasësangá juantsëtetjamna canye base luare yojajutjo; y canye tsbanana jebna soye yojapórma chiñe jtsashanyama. Chentshana, inye trabájayënga chë jajañe yojúyentsáme, y chana inye luaroye yojtsoñe. 2 Chë uvasësangá juashacama tempo yojobuache orna, chë jajañe nduiño canye oservená ibojíchmuá chë arrëndayënga jáuyanama ntsachetsá chë nduiño ibojtsotocánama. 3 Pero chëngna, cha imojishache, imojtsejantšetaye, y tondaye ntajatacá imojtichmuá. 4 Chentshana, chë nduiño inye oservená ibojíchmuá; pero chana, bestšaše imojtselísia y podesca imojtsóyenguango. 5 Chentshana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, ínÿengna imojtsajantšetaye y ínÿengna imojtsëbaye.

⁶ “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmua y mēntśá yojtsejuabnaye: ‘Atśbe uaquiñá cocayé mochanjóyeunaye ca.’ ⁷ Pero chë arréndayēnga cha imojinýe ora, imojeniyana: ‘Mua chë fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga, y lempe chabe otocana soyēnga bēngbiama echanjoquéda ca.’ ⁸ Chcasna, cha imojishache, imojtsóba y chë uvas betiyēnga jajañentśana más chcoye imojetsētśena ca” —Jesús tojancuentá.

⁹ Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayēnga echanjetsēbaye, y inýe trabájayēnga chë uvas betiyēnga jajañe echanjárrendaye.

¹⁰ “¿Tśēngaftanga ndocna te Bēngbe Bētsabe uabemana palabra śmēndualía? Chiñe mēntśá endayana:

Chë yebna jebuanēnga tmojtsanaboté ndētśbé,
mora chë más bēts uashacuanēsentśe entsejájona.

¹¹ Chë soye Bēngbe Utabná, Bēngbe Bētsá chca tojama, y bēnga chama ojanánēnga fsēntsemna ca.”

¹² Chora, chë bachnangbe amēndayēnga y chë bētsējemēngcá mándayēnga tmojánbošena Jesús jishachana, er chēnga tmojanenótatśēmbona cha chca tojancuentá jinýanýiyama chēnga mo chë puerte bacna trabajayēngcá imojanmēnama. Pero entśangbiama imojtsauatja, chíyeca cachcá tmojanonýá y chentśana imojtsóñēnga.

*Chë Romoca bēts mandadbiama impuesto jtsatsquēcjnayama
(Mt 22.15-22; Lc 20.20-26)*

¹³ Chentśana chēnga, básefta fariseunga y Heródesbe ústonēnga Jesúsbioye tmojanichamó, ndayá cha tojayaniñe jisháchichiyama, as chca jtseboznama ndaye sóyeca mandadēngbeñe cha mal jaquédana. ¹⁴ Chēnga tmojána y Jesús tmojaniyana: —Buatēmbayá, bēnga fsēndētatsēmbo aca ndegombre soyēnga cnetsabuátambama, y ndoñe jatuenanana nýe ntśamo entśanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tśabe vida jtseboznama, ntśamo Bēngbe Bētsá yomandacá. Chcasna, ¿tśabá tanántsemana, César, chë Romoca bēts mandadbiama bēnga impuesto jtsatsquēcjnayana? ¿Fchtsatsquēcjnaye o ndoñe ca? —chēnga tmojantjá.

¹⁵ Jesús yojtsetátśēmbo, chēnga bacna entśanga ntśamo ndegombre tmojuabnacá ndinýinýayēnga imojamnama; chíyeca tojanéyana: —¿Ndáyeca tśēngaftanga śmojtseboše chë sóyeca atśe jisháchichiyama? Canýe denario crocénana śmiyēboñe, atśe chayobená jinýama ca.

¹⁶ As canýe crocénana tmojanoyé y Jesús tojanéyana: —¿Ndabe jubiá quem crocénaniñe yojtsemna, y ntśamo muentśe entsabemancá nda chca iuabaina ca?

Y chēnga tmojanjuá: —Césarbe jubiá; cha chca enduabaina ca.

¹⁷ Chora Jesús tojanéyana: —Chcasna, César śmochtuyiye cha ibotocana soye; y Bēngbe Bētsana cha ibotocana soye ca.

Y nýetscanga chama imojenjaná.

*Obanēnga jtayenama Jesús tmojantjá
(Mt 22.23-33; Lc 20.27-40)*

¹⁸ Chentśana, báseftanga saduceo ca uabaina entśanga tmojána Jesús jinýama. Chēnga imojanjuabná obanēnga ndocna te ntayenana ca. Chíyeca, Jesús mēntśá tmojaniyana: ¹⁹ —Buatēmbayá, Moisés tojéftsanabema, nderado canýe boyá tojóbana y básēnga ndoñe tonjéftsabáshejuanēsna, canmēna

chë uabentsá chë shémaftaca jtobouamayana, chca, chabe uabochená obanabiamá básenga jtsabamnama ca. ²⁰ Y chcase, canye, canysëfta catsátanga monjamna. Chë natsaná tonjanobouamá y tontsanóbana básenga ntjéftsabashejuancá. ²¹ Chentsana, chë ústona uabentsá chë shémaftaca tonjanobouamá, pero chana tontsanóbana, básenga ntjéftsabashejuancá; chë inye uabentsáftaca cachcá tonjanopasá. ²² Chca, nyetsca canysëfta catsátangaftaca cha tonjanobouamá, pero ndocná básenga ntjéftsabáshejuanana. Y chentsana chë shembásanaca tontsanóbana. ²³ Y morna, chë obanënga chamojtayena ora, ¿ndabe chë canysëfta catsatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

²⁴ As Jesús tojanéyana: —Ntsamo Bëngbe Bëtsabe uabemana palabrenguiñe endayancá ndoñe tcmojosertá, ni Bëngbe Bëtsabe obenanama. Chiyeca ntsamo ndoñe yondmëncá smontsichamo. ²⁵ Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. ²⁶ Y chë obanënga jtayenama, ¿Moisesbe librësañe ndoñe smëndualía ntsamo Bëngbe Bëtsá tbojaniyanama, chë betiyetema yojtsángbototjuana ora? Bëngbe Bëtsá mëntsá tbojaniyana: “Atse sëndmëna Abraham, Isaac y Jacobëbe Bëtsá ca.” ²⁷ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tsëngaftanga canye ndoñe ndegombre soyiñe smontsemna ca —tojanéyana.

Chë más bëts uámana mando
(Mt 22.34-40)

²⁸ Chentse yojtsemna canye ley abuatambayá. Cha yojouena ntsamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbiöye tbojantjá: —¿Ndayá chë más bëts uámana mando yomna ca?

²⁹ Y Jesús tbojanjuá: —Chë más uámana mando mëntsá endmëna: “Israeloquënga smochjouena, Utabná, Bëngbe Bëtsá endmëna, y nye canye Bëngbe Utabná endmëna, ndocná más. ³⁰ Utabná Bëngbe Bëtsá cochtsebobonshana nyets acbe ainánaca, nyets espíritoca, nyets juábnaca y nyets añémoca.” ³¹ Y chentsana quem inye mándnaca: “Ndëmua entsánaca cochtsebobonshana, ntsamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbiöye tbojaniyana: —Buatëmbayá, puerte tšabá tcjayana. Ndegombre yomncá contsichamo, nye canye Utabná endmëna y ndocná más. ³³ Y cha jtsebobonshánana nyets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nyetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

³⁴ Cha nyets juábnaca tbojanjuama Jesús tojáninye ora, tbojaniyana: —Batšatema cmontsebuáshbena jtseprontánama, Bëngbe Bëtsá chacolesseniamama acbe ainanentse jtsemándayama ca.

Y chentsana, ya ndocná yonjenñëmua Jesús más jatstjanayama.

¿Cristo ndabe entsábentšana yomna?
(Mt 22.41-46; Lc 20.41-44)

³⁵ Jesús Bëngbe Bëtsabe bëts yebnentse yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca? ³⁶ Cach David, chë Uámana Espiritbe mándoca mëntsá tojánayana:

Bëngbe Bëtsá, atšbe Utabná Crístbioye tbonjaniyana:
atšbe catšbioica mótbema,
atšbe obenánaca, acbe uayayënga acbe cucuatšifne chamoquedama ch-
jamëntscuana ca.

³⁷ ¿Ntšámose Cristo Davídbentšana Entšá nántsemna, cach David ‘Utabná ca’
chábioye tbojtsabobuátmëse ca?’ —cha tojanëyana.

Y chë bëtská entšanga, oyejuayënga imojtsuenana.

*Jesús chë ley abuatambayëngbiama tojánayana, chënga ndoñe tšabá montsama
ca*

(Mt 23.1-36; Lc 11.37-54; 20.45-47)

³⁸ Mëntšánaca Jesús chënga yojtsabuátambaye: “Cuedado šmochtsebomna
y ndoñe šmattsama chë ley abuatambayëngcá. Chënga jtsogusetánana
bënëna entšayangaca jtsajnana y jtsebošana tsáshenañe entšanga nÿa re-
spétoca chamotsacheuanama. ³⁹ Chë judiëngbe enefjuana yebnënguenache,
chë más uámana luarënguiñe jtsetbiámanana, y chë fiestënguenache nÿa
quëfseroca. ⁴⁰ Pero chënga, viudángbioye chë tmobomna soyënga jtsabacayana,
y entšangbe delante tšabá chamotsënyama, y chëngbioye imojtsaíngñama
ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë
causa, Bëngbe Bëtsá inÿengbiama más chënga echanjácastigaye ca” —Jesús
tojánayana.

Jesús yojtsënyaye chë crocénana quëcjnyënga

(Lc 21.1-4)

⁴¹ Jesús jabuátambama tojanpochocá ora, tojanótbema Bëngbe Bëtsabe
bëts yebnentse, chë crocénana quëcjnyëtema ndirichiñe; y chë
crocénana quëcjnyënga yojtsënyaye. Bëtská bomnëngna becá crocénana
imojtsequëcjnyaye. ⁴² Chora, canÿe viudá ndbomnjëmnaca yojobeconá y nÿe
uta crocénana chëtëmiñe yojaftseseGORá. ⁴³ Chora Jesús chabe uatsjëndayënga
tojánachembo chamobéconama, y mëntšá tojanëyana: “Ndegombre
cbéyana, quem viudá ndbomnjëma, Bëngbe Bëtsabiama nÿetscangbiama
más tonjëftsesegorá. ⁴⁴ Chë bomnëngna chë yojtsóyentsjamentšana
tmonjëftsesegorá, y cabá bomnana imotsóbomñe; y chë viudana
tonjëftsesegorá lempe ntsachetšá yobomncá; masque tša ndbomnjëma,
chë vida jtsebomnama lempe ntsachetšá yobomncá tonjëftsesegorá ca.”

13

Jesús tojánayana chë Bëngbe Bëtsabe bëts yebna lempe mochjápochocama

(Mt 24.1-2; Lc 21.5-6)

¹ Jesús Bëngbe Bëtsabe bëts yebnentšana tojëftsanbocna ora, canÿe chabe
uatsjëndayá tbojaniyana: —Buatëmbayá, minÿe, jtsa bëts ndëtsbenga, y tša
botamana bëts yebnënga ca!

² Chora Jesús tbojaniyana: —Tšabá cochjinÿe tša botamana bëts yebnënga.
Pero muentše ndoñe queochaisoquéda ni mo canÿe ndëtsbé inÿebé juatsboye.
Lempe mochantsePOCHóca ca.

Ntšamo yochtsemna quem luare jopochócamá te chaojtsobeco ora

(Mt 24.3-28; Lc 21.7-24; 17.22-24)

³ Chentšana, Olivos tjashoye chënga tmojána. Bëngbe Bëtsabe bëts yebnentša
ndirichiñe yojamna; y Jesús tojanótbema ora, Pedro, Santiago, Juan y Andrés
iytëcana tmojantjá, ⁴ ntšamo cha tojanayancá ntseco yochjanopásama, y chca
jopásama ya tojtsobecuama entšanga chamotsetatsëmbuama, ndayá Bëngbe
Bëtsá yochjanma ca.

5 Chora Jesús tojanějua: “Cuedado šmochtsebomna ndocná chacmondáingñema. 6 Banga mochanjabo y mochantسابíchamo chënga Jesús imomna ca. Mochántsicamo: ‘Atse chë Cristo sëndmëna ca’, y chca, ba entsanga mochanjáingñaye.

7 “Entsanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna. 8 Canye luarentša entsanga inye luaroca entsángaftaca mochántsentsjanaye, y canye amëndayábentša entsanga inye amëndayábioca entsángaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

9 “Pero tšëngaftangna cach tšëngaftangbiana šmochtsantješna; entsanga cmochanjíshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama. 10 Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entsángbioye chaóshjanguama. 11 Y inyëngbe cucuatšinë jabáshejuana chacmojtsënachá ora, ndoñe šmattsenócochinýena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánýenga ndoñe chora quešmochátoyebuambnaye, ndayá chë Uámana Espiritu tšëngaftangbiajana echantsóyebuambnaye.

12 “Canye catšata cachabe catšata inyëngbe cucuatšinë bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsëbáyama; y chë básengna chëngbe bëtsëtsangbe contra mochántsemna y chamotsëbáyama mochanjábashhejuana. 13 Atšbe ústonënga bëtsemna causa, nyetsca luarënguentša entsanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama inýoca tšëngaftanga chašmojinýe ora (nda tojtsalía, chabosertá), šmochántsetatšëmbo chë puerte ngmënana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; 15 chama, nda cachabe yebnentša tsbanánoca chaojtsemna, chocana ndoñe chaondëtastjango, ni chaondëtamashëngo tsoicana ndayá jesábocnama; 16 y nda jajoca chaojtsemna, yebnoye ndoñe chaondëta ni mo chabe quëfsalíya jesácñama. 17 ¡Tša lastema chë tempo ngomámanënga o ochóchaye šešonga chamojtsabamna shembásengbiamal! 18 Bëngbe Bëtsá šmochtseimpadana chë ngmënana tempo ndoñe chaondóshjango uaftena tempo ora, 19 er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngmënana ndoñe ntjamnana. 20 Chë puerte ngmënana tempo, yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanýeshanayeca, echanjama yapa bën tempo ndoñe chaondëtsemnama.

21 “Chora nderado nda chacmojáuyana: ‘Minýe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. 22 Er mochanjábocana ndoñe ndegombre uámana

ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëgnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëgnaca. ²³ ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo
(Mt 24.29-44; Lc 21.25-36)*

²⁴ Mëntsánaca Jesús tojanëyana: “Pero chë tempo, entšanga puerte chamo-jasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, ²⁵ celocana estrellënga echanjatquécjana, y quem luar-entša tsbanánoca espíritënga obenana bomnënga echanjángmëmana. ²⁶ Y chora, entšanga mochanjinÿe, Bëngbe Bëtsá Entšá tbojanbemá jantsetëshiñe echántsaboye, corente obenánaca y corente buashinÿinÿaniñe. ²⁷ Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntsoñe.

²⁸ “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaiséjotsana, jtsotatsšëmbuana chë tšabe tempo ya tojtsaisobecuama. ²⁹ Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatsšëmbo Bëngbe Bëtsá Entšá tbojanbemá ya jésabama yojtsemnama. ³⁰ Ndegombre cbëyana, lempe chca echanjochnëngo, morsca entšanga cabá ndóbana ora. ³¹ Celoca y quem luare echanjopochóca, pero atšbe palabra ndocna te queochaisopochóca.

³² “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³³ “Chíyeca, cuedado šmochtsebomna y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entšá tbojanbemá jésabama tempo. ³⁴ Echántsemna mo canÿe entšacá; chana inÿe luaroye ya jëftsebocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. ³⁵ Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsšëmbuana, mo nderado jétatana, tsëntseto ora, bínÿanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatsëmbo; ³⁶ ndoñe cuedado šmontsebomnëse, nderado cha nÿe ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta. ³⁷ Chíyeca, ntšamo tšëngaftanga cbochanjauyancá, nÿetscanga chanjáuyana: ¡Puerte cuedado šmochtsebomna ca!” —Jesús tojánayana.

14

*Entšanga imojtsejuabnaye ntšamo jamëse Jesús jishachama
(Mt 26.1-5; Lc 22.1-2; Jn 11.45-53)*

¹ Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. ² Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

Canÿe shembása botamana uanguëtse béjaye Jesusbe bestsasiñe tbojanbuešcja

(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjayeca, ena nardana uanguëtšiye; chana chë jarrëtema yojátsba y chë béjaye Jesusbe bestsasiñe tbojanbuešcja. ⁴ Chca tmojáninÿe ora, báseftanga chentše imojtsemnënga tmojanotjayaná y mëntsá imojtsenatsëtsnaye: —¿Ndáyeca nÿe bonamente chë soye yojtsemna ca? ⁵ Chamna, matmënjobenanga chë béjaye unga patse denario crocénanama juiyana, y chánaca ndbomnjémënga matmënjújabuache ca.

Y chë shembásabiama podesca imojtsichamo.

⁶ Chora Jesús tojanéyana: —¿Ndáyeca quem shembása ndoñe cachca šmochanjonyaye ca? ¡Ndocá matatsana! Atšbiamá tšabe soye tonjama. ⁷ Er ndbomnjémënga nÿets tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiamá jamana; er atše tšëngaftangftaca ndoñe nÿets tempo quichásemna. ⁸ Quem shembása lempe ntšamo tojobenacá atšbiamá tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora. ⁹ Ndegombre cbéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entšanga chabiamá chamot-senójuabnama ca —cha tojanéyana.

Judas tojána bachnangbe amëndayëngbioye, Jesús chamuishachama
(Mt 26.14-16; Lc 22.3-6)

¹⁰ Chentšana, Judas Iscariote, canÿe chë bnëtsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšiñe jaboshjonama. ¹¹ Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšiñe jaboshjonana.

Jesús chabe uatsjendayëngaftaca Bashco saná tojanse
(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatšenté, chë levadúraca ndëpormana tandëše sayté, chë uatsjendayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

¹³ As Jesús uta chabe uatsjendayata tojanichamó y mëntsá tojanéyana: —Chë bëts puebloye motsata. Chašojáshjango ora, canÿe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanÿe yebnentše yochjámashënguama; ¹⁴ y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjendayëngaftaca jasama ca?” ¹⁵ As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjapróna bënga mochjasama ca.

¹⁶ As chë uatsjendayata tbojána y tbojáninÿena lempe ntšamo Jesús tojanéyancá; y chentše chë Bashco saná tbojanprontata.

¹⁷ Tojanibétata ora, Jesús chë yebnoca tojánashjango, chabe bnëtsana uta uatsjéndayëngaftaca. ¹⁸ Y mesëshentše imojtsesaye ora, Jesús tojanëyana: —Ndegombre cbëyana, canya tšëngaftanguentsá, átšeftaca entsesá cha, uayayëngbe cucuatšinë šochanjáboshjona ca.

¹⁹ Chorna chë uatsjéndayënga ngménaca imojtsemna, y tmojanontsé canyánya cha jatjayana: —¿Atše chtsemna ca?

²⁰ Y Jesús tojanëjua: —Canya chë bnëtsana utatentsá entsemna. Chabe tandëse cach atše sëntsefchecuacná šcnenentše cha entsefchecuacná.

²¹ Ndegombre, Bëngbe Bëtsá Entšá tbojanbemáftaca echanjopása ntšamo chabiamna Bëngbe Bëtsabe uabemana palabrenguiñe endayancá. Pero, jtša lastema chë bochjáboshjonabiamna! Chabiamna más tšabá manjamna ndoñe ntjónynana ca —Jesús tojánayana.

²² Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

²³ Chentsana, canye coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanëššasé, y nyetscanga tmojanofšé.

²⁴ Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašebuachenacá ndegombre yochjochnënguama. Chë buiñe bëtscá entsangbe tšabiamna echanjuábuashana. ²⁵ Y ndegombre cbëyana, morscana ya ndoñe más chë uvasëšentsana obocniye quichaisofšiyeye. Chë tsëm vínoye tšëngaftangaftaca chanjofšiyeye, Bëngbe Bëtsabe amëndayoca chamojtsemna ora ca” —tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.30-35; Lc 22.31-34; Jn 13.36-38)

²⁶ Bëngbe Bëtsábioye jëtschuayama tmojancantá chentsana, Olivos tjashoye tmojëftsanbocana. ²⁷ Jesús tojanëyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrenguiñe, cha mëntsá tojánayana: “Chë oveshënga abujëñya chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. ²⁸ Pero obanënguentsana chaitayenentsana, tšëngaftangbe natsana Galileoye chanjá ca —cha tojanëyana.

²⁹ Chora Pedro tbojanianyana: —Masque nyetscanga áceñe ošbuáchiyana chamotsobuetše y chamotsacheta, atše nya ndocna te ca.

³⁰ Chora Jesús tbojanianyana: —Ndegombre cbëyana, cam ibeta, ngallo cabá uta soye ndécánta ora, aca unga soye cochanjayana ndoñe šconduabuatma ca.

³¹ Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

Getsemaní luarentše Jesús, Bëngbe Bëtsáftaca tbojanencuentá (Mt 26.36-46; Lc 22.39-46)

³² Chentsana, canye luare Getsemaní ca uabáinoye tmojána. Chocna Jesús tojanëyana: “Muentše motbiamna, chëntscuana atše choye chanjá, Bëngbe Bëtsáftaca jencuëntama ca.”

³³ Y tojëftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. ³⁴ Chëngbioye tojanëyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

³⁵ Chentsana, Jesús más natsanoye tojána, tojanoshentsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. ³⁶ Mëntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

³⁷ Chentsana, chabe unga uatsjéndayëngbioye tojtanabo, y chëngna innétsomañe. Chca tojánanyëna ora, Pédrëbioye tbojaniyana: “Simón, ¿cotsomañe? ¿Ni mo nÿe canÿe hora jtsefšnama ndoñe tconjobená?

³⁸ Smochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. ⁴⁰ Yojtabo orna, chë uatsjéndayënga cachiñe innétsomañe; chënga imojtsefshétana ocnyaye causa, y ndoñe imontsobena ntšamo jojuana.

⁴¹ Chentsana, tojtesaná y tojtanabo ora tojanéyana: “¿Cabá šmotsomañe y šmotsochnañe? Nÿe nÿetsá; hora tocjobuache, Bëngbe Bëtsá Entšá tbojanbemá bacna soye amëngbe cucuatšinë mochanjáboshjona.

⁴² Motsbananga, cuajna. Minÿënga, atše boshjuaná ya entsebeconá ca.”

Uayayënga Jesús tmojánishache

(Mt 26.47-56; Lc 22.47-53; Jn 18.2-11)

⁴³ Jesús cabá yojtsóyebuambnantscuana, Judas, canÿe chë bnétsana uta uatsjéndayënguentšá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga. ⁴⁴ Judas, chë boshjuaná, tojanjuabó ntšamo jamana entšanga jinÿanyiyama ndëmua Jesús bëtsemnana. Chiyeca, yojáuyana: “Nda chajiauámocho, cha echántsemna; šmochjishache y cuedádoca šmochjuánatse ca.”

⁴⁵ Chcasna, Judas Jesúsbioye tojanobeconá y tbojaniyana: “¿Buatëmbayá ca!”

Y tbojanámocho. ⁴⁶ Chora chë entšanga tmojánishache y tmojanánatse.

⁴⁷ Pero canÿa chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canÿe matscuaše tbojtsanëštjango.

⁴⁸ Y Jesús chë entšanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? ⁴⁹ Atše cada te tšëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te choca chešmátanishache. Pero tšëngaftanga chca átseftaca šmontsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” —tojánayana.

⁵⁰ Chorna, nÿetsca uatsjéndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonÿá. ⁵¹ Canÿe bobontse Jesúsbioye ibojtséstona, nÿe canÿe uafjantse entšëjua uichëtjoná. Cha chë entšanga tmojánishache, ⁵² pero chëngbe cucuatšinë chë entšëjua jesáboshjonëse, chë bobontsna enašá yojtsachá.

Jesús tmojanánatse chë judiëngbe uámana amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

⁵³ Chentsana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga,

bëtsëjemëngcá amëndayënga y ley abuátambayënga tmojánenefjna. ⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninyana. ⁵⁶ Er masque banga Jesusbe contra uayátsenaye soyënga imojtsichamo, nyëtscanga ndoñe cachca soye montsanichamo.

⁵⁷ Báseftanga imojtsaye y mëntsá Jesusbe contra, ndoñe ndegombre betsemncá tmojánayana: ⁵⁸ “Bënga cha fsënjoyeuná mëntsá: ‘Atše quem Bëngbe Bëtsabe bëts yebna, entsangbe pormana yebna, chantsepochóca; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtšjebo ca.’”

⁵⁹ Pero masque chca imojtsichamo, nyëtscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojotsbaná, nyëtscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶¹ Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntsá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjuá: —Arseñor, atše cha sëndmëna; y tšëngaftanga šmochanjinye, atše, Bëngbe Bëtsá Entšá tbojanbemá, chë nyëts obenana bomnabe catšbioica chantsetbemana, y celoca jantšetëshiñe chántsaboye ca.

⁶³ Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjátëjaboto Jesusbe contra chamuayanama ca? ⁶⁴ Tšëngaftanga šmonjouena ntšamo chë entsá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanëyana.

Y nyëtscanga tmojánayana, cha ndegombre bacna soye yojtsebomna y jóbanama ibojtsemna ca.

⁶⁵ Chorna báseftanga tmojanontsé Jesús buashëtjnayana; jubiá imojútsbotse, imojtsejantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebantšetaye.

*Pedro tojánayana Jesúsbioye ndoñe bonjanabuátma ca
(Mt 26.69-75; Lc 22.56-62; Jn 18.15-18, 25-29)*

⁶⁶ Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; ⁶⁷ y Pédrëbioye tbojáninye ora, cha iñe juachaca yojtsanšbonena, yejuana ibojonýinýiye y tbojaninyana: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntsá tojánayana: —Ndayama cojtsichámuama ndoñe quetsátstatšëmbo, ni quešnatësertana ca.

Y shjoye, amashjuanóntscoñe yojábocna; y chora canye ngallo yojacánta. ⁶⁹ Chë oservená cachiñe Pédrëbioye tbojáninye y tojanontsé chë inyënga jauyanana: —Muánaca Jesusbe uatsjendayënguentsá entsemna ca.

⁷⁰ Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsihámese ca! —y yojóntša júrayana— ¡Atše chë entšá ndoñe quetsatabuatma, ndabiama tsëngaftanga šmonsatsëtsná ca!

⁷² Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjyana ndoñe šconduabuatma ca.” Y tojanontsé enóbošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánýentše tmojánenefjna, nýetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšinë tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo; ⁴ chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38-19.16)

⁶ Cada Bashco fiesta ora, Pilato yojanamana canýe utamená jëtsboshjonana, ndánaca entšanga tmojuabuayaná. ⁷ Chë tempo yojamna canýa Barrabás ca uabainá; cárceloye inautámena chabe enutëngaftaca. Chëngna entšanga tmojtšanëbaye, mandadëngbe entšángaftaca imojentsjaná ora. ⁸ Chora, entšanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. ⁹ Y Pilato tojanëjua: —¿Tšëngaftanga šmojtseboše tsëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojánboshjonama. ¹¹ Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiana Barrabás chabuatsboshjona ca. ¹² Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entšanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

¹⁵ As Pilato, entšángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentsana soldadëngbe cucuatšinë tbojánboshjona, chamocrucificama.

¹⁶ Chentsana, chë soldadënga Jesús tmojanánatse chë mandadbe bëtsyebnentša chashjoye, y nýetsca soldadënga tmojánachembo chamobéconama.

¹⁷ Shbuenda uafjatsenga uinýna entšayá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó. ¹⁸ Y chentsana tmojanontsé jachuayana: “¡Bayté judiëngbe Rey cochtsemna ca!”

¹⁹ Canýe niñëfjaca Jesús bestšašinë imojtsëtsjanjnaye, imojtsebuashëtjnaye, y chabe delante imojtsofshëntsamëntšenaye. ²⁰ Y

chca imnaftsáboyejuanentshana, chë shbuenda uafjatsenga entsáyá tmojtsanabotsca y cachabe entsáyá tmojtanichëtjo, y pueblo chaboye tmojanánatse jacrucificama.

Jesús tmojancrucificá

(Mt 27.32-44; Lc 23.26-43; Jn 19.17-27)

²¹ Chora, canýe entsá chëjana yojsatashjajuana, Simón ca uabainá, Cirene pueblóca, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

²² Jesús tmojanánatse Gólgota ca uabaina luaroye (hebreo biyañe endayana “Obanabe Bestsashe Luare ca”); ²³ y tmojanabuiyé vínoye mírraca enájuañiye, pero Jesús ndoñe yonjuáyëngacñe. ²⁴ Y chentšana tmojancrucificá; y chabe entsayangamna, tsbanánoye tmojanétsena jinýama ndayá cada ona yochjëftsanácnama.

²⁵ Cachëse, base mošenana ora Jesús tmojancrucificá. ²⁶ Y chabe bestsaşe juatsboicna canýe uabemana soye tmojananjo. Chiñe yojétsayana ndáyeca cha tmojancrucificama, mëntsá: MUA CHË JUDIËNGBE REY ENDMËNA ca.

²⁷ Y cháftaca útata bacna soye ochjajnayátnaca tmojanacrucificá, canýa chabe catšbioica, y ínýana chabe uañicuayoica. ²⁸ Chca cháftaca tmojanma, chaochnënguama ntšamo Bëngbe Bëtsabe uabemana palabrenguiñe chabiamia iuayancá, mëntsá: “Y chábioye tmonjáninýe mo chë puerte bacna soye amënguentšá canýa cuaftsemncá ca.”

²⁹ Y chëjana imojtsachnëjuana entsanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtsabe bëts yebna cochtsánenasatajchca y nýe unga tese cochtanjebo, ³⁰ cach aca mentsbocá y cruzocana matastjango ca!”

³¹ Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha ínýenga tojëftsatsëbacá, pero cachá jéntsbecama ndoñe quenátobena. ³² ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

³³ Nýetsto orscana y las tresëntscoñe, nýets quem luare yojtseibétata. ³⁴ Chca orna, Jesús chabe biyañe tojanáye buachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

³⁵ Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

³⁶ As chora, canýa tojanótjajo, untja vínoyeca canýe esponjëshe tojanfchecuacuá, canýe niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

³⁷ Pero Jesusna, jabuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonýana entsëjua tsëntsaca yojsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonýana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentše imojtsemna, bēnocana imojtser-reparana; chēnguentše imojtsemna María Magdalena; María, Santiago chē más basa y Josebe mamá; y Salomé. ⁴¹ Chē shembásengna Jesús tmojanasto y tmojanájabuache cha Galileoca yojamna ora; y inye ba shembásengnaca chentše imojtsemna, chē cháftaca Jerusalenoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

⁴² Chē yēfsana ochneytē yojtsémnayeca, cach te yojánamna saná japróntana chē yēfsana jasama. Ya yojtseibétatana ora, ⁴³ Pilato yojtsemnoye tojána canye boyabása, José ca uabainá, Arimatea pueblócá; cha inamna canye chē luarentša uámana mandayēnguentšá. Cha Bēngbe Bētsábeñe yojtsošbuáchiye y yojanobátmana chabe amēndayana chaóshjanguama. Ndauatjca Pilátbioye Jesusbe cuerpo tbojanotjañe. ⁴⁴ Pilato yojenjnaná Jesús tša betscó yojóbanama; as tojanmandá chē soldadēngbe amēndayá chamuachembo, jatjayama Jesús ya bēn obaná tayojétsemnama. ⁴⁵ Chē soldadēngbe amēndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama. ⁴⁶ Chora, José canye uafjantse lino entsējua tojanabuamé, Jesusbe cuerpo cruzocana tbojanéstjango, chē lino entsējuaca tbojanandmaná, y canye cuevēshiñe ndētšbeñe pormánēshiñe tbojanajó; chentšana canye ndētšbé tojansjoná, y chē cuevēshoye amashjuantše tojánachto. ⁴⁷ María Magdalena y María, chē José y Santiagbe mamá, tbojáninye ndayentše Jesusbe cuerpo tbojanjájoma.

16

Jesús tojtanayena

(Mt 28.1-10; Lc 24.1-12; Jn 20.1-10)

¹ Ochneytē tojanopasá ora, María Magdalena, María Santiagbe mamá, y Salomé, botamana uanguētše bėjaye tmojanabuamé, chíyeca jama Jesusbe cuerpo janētjuama; ² y tmenguse, chē semana bojatšéntena, cabá cachēse, shinye yojábocna ora, chē cuevēshoye tmojána. ³ Imojtsaye ora imojtsayénatsēsnaye: “¿Chē cuevēshoye amashjuanentša ndētšbé nda bochtsabua-juána ca?”

⁴ Pero imojontješiyē ora, tmojáninye chē cuevēshoye amashjuanentša bēts ndētšbé, chentšana juanániñe. ⁵ As chēnga choye tmojánamashjna y choye tmojáninye canye bobontse bēn uafjantse entsējua uichētjoná, chē cuevēshentša catšbioica inétsoybemañe; y chē shembásenga imojouatjaná. ⁶ Pero chē bobontse tojanéyana: “Ndoñe matauatjēngana; tšēngaftanga šmondēngué Jesús Nazaretocá, chē tmonjancrucificá cha. Cha ya tontayena; muentše ndoñe quenátsmēna. Minyēnga cha enjéftsejajonentše. ⁷ Motsajna, y Pedro y chē inye uatsjéndayēnga šmochjáuyana: ‘Jesús tšēngaftangbe natsana Galileoye echanjá. Choca cha šmochanjinye, ntšamo cachá tmojanéyancá ca.’ ”

⁸ As chē shembásenga betscó chē cuevēshentšana tmojésanbocana, er puerte auatjanánēnga imojtsemna y ngmēmnyēnga imojtsemna; y chē causa, chē soyama ndocná tmonjaniyana.

Jesús, María Magdalénbioye tbojánēbēbocna

(Jn 20.11-18)

⁹ Jesús tojtanayenentšana, chē semana bojatšénté, Jesús natsana María Magdalénbioye tbojánēbēbocna. Tempo Jesús chábentšana canysēfta bacna bayējēnga tojtanébuacana. ¹⁰ Cha Jesúsbioye ainá tbojáninyentšana, tojána

Jesúseftaca imojánajnënga chama jaúnayama; chëngna ngménaca y šachénaca imojtsemna. ¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

Uta ustonata Jesúsbioye tbojáninýe
(Lc 24.13-35)

¹² Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inýa cuaftsemncá. ¹³ Chora chata tbojésanshëcona chë ínýenga chama jacúntama; pero chëngna cach ndoñe ndegombre ca tmojanjuabó.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama

(Mt 28.16-20; Lc 24.36-49; Jn 20.19-23)

¹⁴ Cabana, Jesús chë bnëtsana canýe uatsjëndayënga tojánëbëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nyëts ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjëndayënga tmojánayana.

¹⁵ Chentšana Jesús tojanëyana: “Nyëts luarëngoye motsajna, y nyëtsca entšanga chë tšabe noticiëngama šmochtsabuayiynaye. ¹⁶ Nda chiñe chaojtsošbuaché y tšëngaftanga chašmojuabayé, cha atsbočaná echántsemna; pero nda ndoñe tontsošbuaché, cha nyëts tempo castiganá echántsemna. ¹⁷ Chë átšbeñe ošbuáchiyënga ndegombre soyënga imojtsabuayiynama, entšanga mëntsá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. ¹⁸ Masque nderado cucuatšinë mëtscuayënga tmojishache o veneno tmojofšenga, ndocá quemochatspása; y šoquëngbeñe cucuatšënga chamojacjá ora, chënga šhnánënga mochántsatšmëna ca” —Jesús tojanëyana.

Jesús Bëngbe Bëtsábioye tojtaná
(Lc 24.50-53)

¹⁹ Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtótbema jtsemándayama. ²⁰ Y chë uatsjëndayëngna tmojánbocana y Bëngbe Bëtsabe soyëngama nyëtsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjëndayënga bëts soyënga jamama obenana chamotsebomnama cha jtsamëse.

San Lucas

Jabojátšama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá. ² Chē historia juabemamna, chēnga tmojanuena ntšamo Jesusbe uatsjēndayēnga y inye entšanga chabiamma innencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená. ³ As, átšnaca sēnjontsé cuedádoca juanotíciana lempe ntšamo Jesusbiamma imojtsichamcá, tojanobojatšentšana méntscoñe. Mora šontsinýana tšabá yojtsemna acbiamma juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá. ⁴ Ba soyēnga Jesusbiamma tmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnama.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá). ⁶ Chatna tšabá amata ibnamna Bēngbe Bētsabe bominiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. ⁷ Bāsenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

⁸⁻⁹ Chē bachnanga Bēngbe Bētsabe bēts yebnentše tmojtsoserverna ora, sempre imojanamana jabocacayana, nda tšabá tbojtsonyená, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnoca, Bēngbe Bētsábentše imojtsoserverna orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰ Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye. ¹¹ Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica. ¹² Zacarías chábioye tbojáninye ora, tojanenjaná y corente uatjana tbojanábuache.

¹³ Chora chē ángel tbojanianyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canye šešona bochántsebomna, boyabásetema, y chana Juan ca cochjuabaye. ¹⁴ Chama aca corente oyejuayá cochántsemna, y bētscá entšanga mochanjóyejuaye acbe uaquiñá tojonýnama. ¹⁵ Er cha, Bēngbe Bētsabiamma canye uámana entšá echántsemna. Ndocna te queochaisofsiye vínoye, ni jabuáchiye. Chē Uámana Espiritu chabe ainaniñe echantsemándaye, cha cabá ndonýna orscana. ¹⁶ Banga Israeloca entšanga, ntšamo cha chaojayanama mochanjontsé joye-unayana Bēngbe Bētsá, chēngbe Utabná. ¹⁷ Cha echanjáshjango chē Bēngbe Bētsabe Uámana Uabuyanabe natsana, y echántsebomna obenana y canye espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjáshjango, bētsétsanga chēngbe básengaftaca ndoñe chamondétsentsjanama, y chē nduauenanēnga cachiñe chamotsatsjuabnama ntšamo chē Bēngbe Bētsabe bominiñe tšabá amēnga mondbetsejuabnacyá. Y chca, entšanga cha echantsapróntaye Bēngbe Utabná jabama orscama ca — chē ángel tbojanianyana.

¹⁸ As Zacarías chë ángelbioye tbojantjá: —¿Ntšamo atše stjobenaye jtsetšëmbuana chë šcontsatsá soye ndegombre bétsemnama? Er atše ya bëtšëjema sëntsemna y atšbe shémnaca cachá ca.

¹⁹ Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtšabioca sëndoservena. Cha šonjichmó chë tšabe noticiënga aca jauyanama y juenayama. ²⁰ Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

²¹ Chë ángel Zacaríaseftaca yojtšóyebuambnantscuana, entšanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtšabe bëtš yebnentše ibojtsobiamná ca?” ²² Zacarías tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtšabiocane atschuanayentše Zacarías mo otjenayoquécá Bëngbe Bëtšabiocana canye soye tojáninýama, er chëngbioye jatšëmbombonana yojáuyana, ndëbiá yojoquéda causa.

²³ Chabe tempo, chë Bëngbe Bëtšabe bëtš yebnentše jtsetrabájayama tojanpochocá ora, Zacarías cachabe yebnoye tojtaná. ²⁴ Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinýe cach tsoca yebnentše totanoquedá. ²⁵ Cha mëntšá yojtšichamo: “Bëngbe Utabná mora atšbiana tojtenujubó, entšángbentše atšbe ngménana jtsebojuánama, básenga tondaye béntsabamna causa ca.”

Canye ángel tojanabuayená Jesús jónýnama

²⁶ Isabel chnënguana ishinýe ngomamaná yojtsemna ora, Bëngbe Bëtšá, ángel Gabriel tbojanichmó Galilea luaroye, Nazaret ca uabaina puebloye, ²⁷ canye shembása María ca uabainá jauatsëtsayama. Mariyna cabá boyabása nduabuatná inamna, pero Joséftaca jobouamayama tbojanšbuachená. Y Josena, rey Davídbentšana entšá inamna. ²⁸ Chë ángel Mariýbioye tojána y mëntšá tbojanchuá: —¡Mouena. Bëngbe Bëtšá tšabe bendición acbiana tonjama! ¡Bëngbe Utabná ácaftaca entsemna ca!

²⁹ Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanhuama.

³⁰ Chora chë ángel tbojaniana: —María, ndoñe matauatjana, Bëngbe Bëtšá entsama tšabe bendicionënga chacotsebomnama. ³¹ Aca ngomananá cochanjoquéda y canye šëšona boyabásetema cochántsebomna, y chana Jesús ca cochjuabaye. ³² Cha puerte echantsámana, y entšangna Bëngbe Bëtšabe Uaquiñá ca chábioye mochantsábobuatma. Y Bëngbe Bëtšá chë Utabná, chábioye canye rey bochanjábema, ntšamo David yojamncá, ³³ y Jacóbëbentšana entšanga nýetsca tescama echántsamëndaye, y chabe mándayana ndocna te queochaisopochóca ca —chë ángel tbojaniana.

³⁴ Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomnése ca?

³⁵ Y chë ángel tbojanjuá: —Chë Uámana Espíritu echanjabo nýets ácheñe, y Bëngbe Bëtšabe obenánaca ngomamaná cochanjoquéda. Chabe obenana mo jantšetëshcá cmochanjabouútsbotse; chíyeca chë echanjónýna šëšona Uamaná echántsemna, y chábioye Bëngbe Bëtšabe Uaquiñá ca mochantsábobuatma. ³⁶ Mouena, Isabel, acbe primá, canye šëšona bochantsebomna, masque ya bëtšananá cha entsemna; chë “šëšona ndbomná ca” monjanabobuatná, mora ya chnënguana ishinýe ngomamaná entsemna, ³⁷ er Bëngbe Bëtšá lempe jamama endobena ca —cha tojánayana.

³⁸ Chora María chë ángelbioye tbojanियana: —Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentsana chë ángel tojtsatanoñe.

María tojána Isabel jabuáchama

³⁹ Chentsana, María tojanoprontá y tojanochëmo canye puebloye, Judeoca tjañenache luariñe. ⁴⁰ Chocna cha, Zacaríasbe yebnentše tojánamashëngo y Isabélbioye tbojanchuá. ⁴¹ Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama. ⁴² Chcasna, Isabel jabuache tojánayana: —¡Bëngbe Bëtsá acbiana más tšabe bendicionënga entsama nyetsca shembásengbiana, y chë cochántsebomna šešonbiámnaca cachcá! ⁴³ Atše merecido taitatobuajoñe, atšbe Utabnabe mamá chašuabobuáchama; ⁴⁴ er atše sënjouena ntšamo sconjachuá, y cachora atšbe šešona oyejuayá atšbe uafsbioye tonjobonjó. ⁴⁵ ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

⁴⁶ Chora María tojánayana:

“Nyets ainánaca Bëngbe Utabná chantsadorana,

⁴⁷ y Bëngbe Bëtsá, atšbe Atsbocayabiama corente chanjóyejuaye.

⁴⁸ Bëngbe Bëtsá atšbiana tojtenujabó, atše chabe oservénëjema.

Er morscana muentša entsanga nyetscanga puerte oyejuayá ca smochantsábobuatma.

⁴⁹ Bëngbe Bëtsá, chë nyets obenana bomná, chabe obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

⁵⁰ ¡Morsca entsanga y más chcoyënga, chábioye yeunanëngbiana, cha sempre bochántsensengmena!

⁵¹ Cha, chabe obenánaca bëts soyënga tojama,

y chë nye cachënga bëtsétsanga enobiamnayëngbe juabna tojtsepochozá;

⁵² reyëngbioye chëngbe mándayentsana tojtsatsatše;

pero chë nye cachënga bëtsétsanga ndenobiamnayëngbioye, uámanënga tojábiana.

⁵³ Chë shëntseca imomnëngbioye, chamosama bëtscá cha tojatšatá, pero chë bomnëngbioyna tondaye tonjatšatá.

⁵⁴ Cha tojanëjabuache chabe entsanga Israeloca, chabe oservénënga, y ndoñe tbonjánebnatjëmbo jtsalastemánana,

⁵⁵ nyetsca tescama chë Abraham y chábentsana entsángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

⁵⁶ Mariyna unga ishinye Isabélaftaca tojanoquedá, y chentsana cachabe yebnoye tojtaná.

Juan chë Ubayaná tojanonýná

⁵⁷ Isabel jtsešócanama tojanóntšabuache ora, canye šešona boyabásetema tojanonýná. ⁵⁸ Isabelbe juachañe oyenënga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyeuanga. ⁵⁹ Chë šešona posuftayté yojtsebomna ora, tmojánashjango y chëtémbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; ⁶⁰ pero chabe mamá tojanéyana: —Ndoñe. Quem šešona echantsabaina Juan ca.

⁶¹ As chënga Isabélbioye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. ⁶³ Zacaríasna jatšëmbombonana canÿe tablëbé tojanëyá y chiñe tojanábema: “Cha entsabaina Juan ca”. Y chë causa, nÿetscanga ojnánënga imojtsemna. ⁶⁴ Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana. ⁶⁵ Chë juachañe oyenënga nÿetscanga tmojanëuatjaná, y Judeoca nÿetsca chë tjañenache luariñe entsanga chë soyëngama imojtsencuëntaye. ⁶⁶ Nÿetscanga chë soyëngama tmojántatsëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábioye jëtschuayama

⁶⁷ Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

⁶⁸ “¿Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacama!

⁶⁹ Cha bochanjíchmuá canÿe atsebacyá puerte obenana bomná, y cha echántsemna Bëngbe Bëtsabe oservená Davídbentšana entsá;

⁷⁰ ntšamo Bëngbe Bëtsá bayté entsemna, chë chabe juabna oyeuambnayanëngbiajana,

chë chábenga imomnëngbiajana bënga šojanašebuachenacá, mëntšá:

⁷¹ Cha canÿa bochanichmuá bëngbe uayayënga y nÿetsca uaboyënjëngbiama bënga jabátsebacama;

⁷² bëngbe bëtsëtsangbioye jálastemama, y jenójuaboyama y jamama chabe uámana trato,

⁷³ ntšamo Bëngbe Bëtsá, bëts taitá Abrahámioye tbojanšbuachenacá.

⁷⁴ Cha tbojanšbuachená bëngbe uayayëngbiama bënga jabátsebacama, chca, bënga ndauatjá Bëngbe Bëtsá jaserviama,

⁷⁵ y chabe entsangcá, nÿetsca soyënguiñe tšabá amënga, Bëngbe Bëtsabe delante nÿetsca te bëngbe vidënguiñe jëftsiyename.

⁷⁶⁻⁷⁷ Y aca, atšbe básetemna, Bëngbe Bëtsabe juabna oyeuambnayá ca cmochantsábobuatma,

entsángbioye Bëngbe Bëtsabe soyëngama cochtsabuayiynama,

Bëngbe Utabná cabá ndáshjango ora, bacna soyënga amana chamuajbanama; as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

⁷⁸⁻⁷⁹ Bëngbe Bëtsá bënga puerte šualastemánayeca,

canÿa bëngbe juabnënga binÿnayá bochanjíchmuá,

bënga chë bacna soyënga causa mo ibetiñcá y obanëngbe luarentscá vida bomnëngbioye jabátsebacama,

y jabuátambama ntšamo natjëmbana jtsiyenana ca” —cha tojánayana.

⁸⁰ Chë básetema yojontsé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninÿanÿentscuana. Chentšana, chamuábuatmanamna tojanontsé Israeloca entsángbeñe jóyebuambayana.

2

Jesucristo tojanonÿná
(Mt 1.18-25)

¹ Chë tempo yojamna canÿe Romoca bÿets mandado, Augusto ca uabainá; y cha, chë natsanama tojanmandá nÿetsca entšanga chamuenábemama. ² Chë soye tojanochnÿengo Cirenio ca uabainá Sirioca mandado yojamna ora. ³ Chamna, nÿetscanga tojanotocá jtangana jenábemÿengama, cada ona ndëmoca chÿengbe bÿets taitanga imojÿftsiyena puebloye.

⁴ As, Josénaca Galilea luarentšana Nazaretocana yojÿftsebocna y Judeoye, Belén puebloye, tojtaná. Tempo, Josebe bÿets taitá rey David, Belenoca inoyena. Y José, Davídbentšana entšá inámnayecna, choye jenábemama tojtaná. ⁵ Mariáftaca tojána jenábemama, y muana tbojanšbuachená Joséftaca jobouamayama. Mariá ngomamaná yojtsemna, ⁶ y Belenoca ibojtsemnÿentscuana, chë ora tbojanóntšabuache jtsešócanama. ⁷ Y chentše Mariá ibojtsebomna chabe natsana šešona, canÿe boyabásetema. Posadoca tondaye luare yontsemna causna, chata nÿe uacnÿengbe átana tambuentše tbojanoquedá. Y Jesús tojanonÿná orna, Mariá tbojtanÿentsacjuá y canÿe bachetëmiñe tbojanajó.

Chë angelotëmÿnga y chë oveshÿnga abujÿÿyanga

⁸ Belén béconana, chë ibeta, oveshÿnga abujÿÿyanga shÿentsjoca cachÿengbe oveshÿngaftaca imojtsemna. ⁹ Nÿe ndeolpe, Bÿengbe Bÿetsábíocana canÿe ángel tojánëbÿebuacna, y Bÿengbe Bÿetsábentšana corente yojtsebuashinÿinÿana chÿengbe shÿeconániñe. Chama chÿenga puerte imojocochauatjaná.

¹⁰ Chora chë ángel tojanÿyana: “Ndoñe matauatjÿengana. Sÿenjabo tšabe soyÿnga tonjopasama jábuayenama, nÿetscanga chamóyejuama. ¹¹ Mora chë David tonjanonÿná pueblentše canÿe šešona tonjonÿná. Cha tšÿengaftangbe atsebacayá echántsemna y tšÿengaftangbe entšangbíámnaca. Cha endmëna chë Bÿengbe Bÿetsabe Uámana Uabuayaná, Cristo ca uabainá, y Bÿengbe Utabná. ¹² Ndegombre chca entsemnana mÿentsá šmochanjátatšëmbona: canÿe šešona ntsacjuaná y uacnÿengbe bachetëmiñe jajoná šmochanjínÿena ca” —cha tojanÿyana.

¹³ Cachora, celocana mallajta angelÿnga chë natsana ángelbentše tmojánbocana y Bÿengbe Bÿetsábíoye mÿentsá imojtsatschuanaye:

¹⁴ “¡Bÿengbe Bÿetsá, celoca entsemná matschuanga!

Bÿengbe Bÿetsábíoye yeunanÿngbiama, Bÿengbe Bÿetsá corente entsoyejuá; quem luariñe chÿengbeñe puerte tšabá chaotsemna ca.”

¹⁵ Chentšana chë angelÿnga celoye tmojésanshÿcuana. Y chora chë oveshÿnga abujÿÿyanga tmojanontšë jeniyanana: “Belenoye cuajna, chë quem tojopasá soye jinÿama. Ndegombre, Bÿengbe Bÿetsá chë soye šojanÿanjÿe ca.”

¹⁶ As betesco tmojána y tmojánanÿena Mariá, José y chë šešonatema bachetëmiñe jajoná. ¹⁷ Chë šešona tmojáninÿe ora, chÿenga tmojanacuntá Jesusbe bÿetsétsata y chë ínÿengbioye, ntšamo chë šešonbiama chë ángel tojanÿyancá. ¹⁸ Nÿetscanga chë tmojanuenÿnga tmojanenjnáná ndayá chë oveshÿnga abujÿÿyanga imojtsacúntama. ¹⁹ Pero Mariyna nÿe cachabe ainanoca quem soyÿngama más bÿen inÿetsenjuabnañe.

²⁰ Chentšana, chë oveshÿnga abujÿÿyanga tmojtaná Bÿengbe Bÿetsá atschuanaye, ndayá tmojáninÿyama y tmojanuenama. Nÿetsá tojanopasá lempe ntšamo chë ángel tojanÿyancá.

Bÿengbe Bÿetsabe bÿets yebnoye Jesús tmojanamba

²¹ Posufta te tojánashjache ora, chë basetëmbíoye chë más delicadentše base bobachtema tmojantÿtše, Bÿengbe Bÿetsabe entšá bÿetsemnana chaotsinÿyama,

ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

²² Y chë tempo tojanóshjango, ndaye ora José y María yojtšamna jamana ntšamo Moisesbe leyiñe iuayancá, ndayá jamama yojanmëncá, canye shembása Bëngbe Bëtsabe delante tšabia jtsatsmënema, canye šešona tbojtse-bomnentšana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, ²³ ntšamo chë Bëngbe Utabná Moisésbioye tbojaníyë leyënguiñe iuayancá, mëntšá: “Canye yebnentše chë natsana šešona boyabása tojtsemnësna, Bëngbe Bëtsábíoye cha jinýinýiyana chábíoye chabotseservénema ca.” Chcasna, chë básetema Bëngbe Bëtsabe bëts yebnoye tmojanamba. ²⁴ Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šešona chaojonýná ora, boyabásetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

²⁵ Jerusalenoca inamna canye bacó, Simeón ca uabainá; cha inamna nyetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canya Israeloca entšanga cháuatsebacama. Y chë Uámana Espíritu chabe ainaniñe yojtsemna; ²⁶ chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinýcá. ²⁷ Chë Uámana Espíritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë básetema tmojanamba ora, ntšamo Moisesbe leyiñe iuayancá chabíama jamama ora, ²⁸ Simeón tbojanocutsá y Bëngbe Bëtsábíoye tbojtanchuá. Cha mëntšá tojánayana:

²⁹ “Bëngbe Utabná, mora šmolesenciá, atše acbe oservená natjëmbana jóbanana,

er ya tconjama ntšamo šconjansbuachenacá;

³⁰ atše chë entšangbe Atsebacayá sënjinýe.

³¹ Aca cha tcojichmó nyets luarenache entšangbiamana.

³² Cha chë ndoñe judiëngbe juabnënga binýnaya echántsemna;

y chábeyeca, nyets quem luarentše mochanjátatšëmbona, chë acbe entšangbiamana, Israeloquëngbiamana ca” —cha tojánayana.

³³ José y María ibojenjanata ntšamo Simeón Jesusbiamana yojtšichámuama. ³⁴⁻³⁵ Chentšana, Simeón Bëngbe Bëtsábíoye tbojanimpadá tšabe bendicionënga chata chabotsebomnama chaomama; y María, chë Jesusbe mamábíoye tbojanianca: “Quem soyënga corente cmochanjacochtsetšenaná, mo ainana espadējaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantšábotena y chabe palabrëngnaca ca” —cha tbojanianca.

³⁶ Chéntšnaca yojtsemna canye shembása Bëngbe Bëtsabe juabna oye-buambnaya, Ana ca uabainá; cha yojamna Fanuelbe bembe y Aserbe pamil-lentšá; ya bëtsananá cha inamna. Nye canýsëfta uata cha yojtšebouamna; ³⁷ y chabe boyá tojanóbanentšana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bnëtë y ibeta, Bëngbe Bëtsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. ³⁸ Simeón, María y Josébioye yojtšetsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábíoye tbojtanchuá chentšana, Jerusalenoca

entsángbioye, chë canÿe atsebacayá Israeloca entsangbiana imojanobatmanéngbioye tojanéyana, chana Jesús yojétsemna ca.

Jesús Nazaret puebloca

³⁹ José y María lempe ntšamo chë Utabnabe leyënguiñe iuayancá tbojanma ora, Galilea luaroye tbojtanata, cachëngbe puebloye, Nazaretoye. ⁴⁰ Y chë básetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendicionënga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. ⁴² Jesús bnëtsana uta uata tojánashjache ora, Jerusalenoye tmojána, ntšamo imojanamancá. ⁴³ Chë fiesta tojanopochocá chentsana, chabe bëtsëtsata yebnoye ibojtsataye, y chata ntsetatšëmbcá, Jesusna Jerusalenoca yojtsoquedañe. ⁴⁴ Chata ibojëtsejuabnaye Jesús chë inÿe entsángaftaca yojtsataboye ca; chcasna, canÿe te nÿetsá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana, ⁴⁵ pero ndoñe ibonjobenaye jtsinÿenana. As, chata chora Jerusalenoye tbojésanshëcona choca cha jetsenguanguama.

⁴⁶ Unga tianoye chata tbojanobená Bëngbe Bëtsabe bëts yebnentše cha jetsinÿenana. Chana chë Moisesbe ley abuatambayëngbe tsëntsaca inétsofbemañe, chëngbioye inayaunana, inatjanaye. ⁴⁷ Nÿetsca ouenanënga imojtsenjnanaye Jesús tša osertaná inamnama, y tša tšabá jojuama cha yojtsobenama. ⁴⁸ Chabe bëtsëtsata chca tbojáninÿe ora, chátnaca ibojenjnaná. Chora, chabe mamá tbojaniyana: —Uaquiñá, ¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

⁴⁹ As Jesús tojanéyana: —¿Ndáyeca atše šmonguá? ¿Ndoñe šondëtatšëmbo atše šomna atšbe Taitabe yebnentše jtsemnana ca?

⁵⁰ Pero chë bëtsëtsata ndoñe tonjanësertá ntšamo cha tojanéyancá.

⁵¹ Chentsana Jesús chë bëtsëtsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenojuabnañe. ⁵² Jesús yojtsobóchaye y más juabna yojtsebomna; y Bëngbe Bëtsá y nÿetsca entsanga corente oyejuayënga chabiana imojtsemna.

3

Juan chë Ubayaná entsanga yojanabuayiná (Mt 3.1-12; Mc 1.1-8; Jn 1.19-28)

¹ Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. ² Anás y Caifás chë bachnangbe más uámana amëndayata ibojamna. Cach tempo, canÿe luare entsanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá. ³ As Juan nÿetsca luarënguëjana Jordán béjaye béconana tojánachnëngo, entsanga mëntsá utsëtsnaye: “Tšëngangbe bacna soyëngama ngmënaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntsá tojanábema: Entšanga ndoyena luaroca canÿa enduáyebuache:

“Bëngbe Utabná echanjabo ca; mo nda canye benache tojtseprontacá canye uámana entšá jashjanguama, cachcá, tsëngaftángnaca, Bëngbe Utabná jabama ainantse tsabe juabnéngaca šmochtseprontana.

⁵ Nýetsca jachañe echantojútjia, y tjañe y batsjabenga mochantenájachibiaye. Chë scundma benachënga ndirichëjënga echántsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháushjanguama, tsëngaftángnaca bëtscá šmochtseprontana tsëngaftangbe ainaniñe, Bëngbe Utabná jabama.

⁶ Y nýetsca entšanga mochanjinye chë Atsebacayá Bëngbe Bëtsábentšana jabanaca —cha tojanábema.

⁷ Chë entšanga Juan chaubáyama imojánbocana ora, Juan yojanëtsësnaye: “¡Mëtscuaye entšanga! ¿Nda tcmënjáyana chë echanjóshjango uabouana castigüentšana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna, tsëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tsëngaftangbiana jayanama: ‘Bëngna Abrahámbentšana entšanga, Bëngbe Bëtsabe entšanga fsëndmëna ca’. Er atse chanjayana, Bëngbe Bëtsá quem ndëtšbéngacnaca Abrahámbentšana entšanga nanjábiana. ⁹ Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tsëngaftangaftácnaca cachcá, tsabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsësnaye.

¹⁰ —¿Y as, ndayá jamama šojtsamna ca? —chora chë entšanga tmojantjá.

¹¹ Y Juan tojanëjua: —Chë uta quëfsaiya uabomná bontsemna canyiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

¹² Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

¹³ Y Juan tojanëyana: —Nye ntšamo chë leyiñe yomandancá entšángbioye crocénana šmochtsayëngacaye ca.

¹⁴ Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanëyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchëse; y nýe ntsachetšá šmacaná crocénanaca oyejuayënga šmochtsomñe ca.

¹⁵ Entšanga chë Bëngbe Bëtsabe Uámana Uabuayanabiana imojtsobátmana, y chëngna Juanbiana imojëtsejuabnaye nderado cha chë Bëngbe Bëtsabe Uámana Uabuayaná nanjamna ca; ¹⁶ pero Juan tojanëyana: “Ndegombre, atse béjayeca cbondubáyana. Pero chë echanjabá atšbiana corente más obenana endbomna, y atse merecido taitsatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiana, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë ndoñe chamontishachëngbiana, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá. ¹⁷ Canye entšá chabe mëtštá cucuatšinë jiyëbana, chabe trigo jtsóbobemama, y chë ndoservenana shácuanënga jtsejashtsëtsana. Chabe trigo chë grano uaquëcjnaye tsañe

jtsabuájuaana, y chë ndoservena shácuanëngna íñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna íñeshiñe echantsacastígaye, y chë iñe ndocna te queochátsfsana ca” —cha tojanëyana.

¹⁸ Chca y inye palabrëngaca Juan chë tšabe noticiëngama yojanabuayiyná.
¹⁹ Tempo, Juan Heródesbioye tbojanácacana, cha tojanobouamama cachabe catšata Felipbe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámna.
²⁰ Pero Herodes Juánbioye joyeunaye luariñna, cabá inye más bëts bacna soye tojatanma: Juánbioye cárceloye tbojtsanëtame.

Juan, Jesúsbioye tbojanabaye
(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entšanga tojanëbaye, y Jesúsnaca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, ²² y chë Uámana Espíritu mo canye palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atsbe bonshana Uaquiñá condmëna. Acbiana corente sëntsoyejuá ca.”

Jesusbe bëts taitanga
(Mt 1.1-17)

²³⁻³⁸ Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontšé ora. Entšanga imojanjuabná Jesús Josebe uaquiñá yojamna ca.
 José yojamna Elibe uaquiñá.
 Elí Matatbe uaquiñá
 y Matatna Levibe uaquiñá.
 Leví yojamna Melquibe uaquiñá,
 Melqui Janabe uaquiñá
 y Jana Josebe uaquiñá.
 José yojamna Matatíasbe uaquiñá,
 Matatíasna Amosbe uaquiñá.
 Amós Nahumbe uaquiñá,
 Nahúm Eslibe uaquiñá
 y Esli yojamna Nagaiibe uaquiñá.
 Nagai yojamna Maatbe uaquiñá,
 Maatna Matatíasbe uaquiñá.
 Matatías Semeibe uaquiñá,
 Semei Joseche uaquiñá
 y Josec yojamna Judabe uaquiñá.
 Judá yojamna Joananbe uaquiñá
 y Joanán Resabe uaquiñá.
 Resa Zorobabelbe uaquiñá,
 Zorobabel Salatielbe uaquiñá,
 y Salatielna Neribe uaquiñá yojamna.
 Neri yojamna Melquibe uaquiñá,
 Melqui Adibe uaquiñá.
 Adi Cosambe uaquiñá,
 Cosam Elmadambe uaquiñá,
 y Elmadamna yojamna Erbe uaquiñá.
 Er yojamna Jesusbe uaquiñá
 y Jesús Eliezerbe uaquiñá.

Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.
Eliaquim yojamna Meleabe uaquiñá,
Melea Menabe uaquiñá.
Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaíbe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabëbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobëbe uaquiñá,
Jacob Isaacbe uaquiñá
y Isaacna Abrahambe uaquiñá.
Abraham Tarebe uaquiñá
y Taré yojamna Nacorbe uaquiñá.
Nacor yojamna Serugbe uaquiñá,
Serug Ragaube uaquiñá
y Ragauna Pelegbe uaquiñá.
Peleg Heberbe uaquiñá,
y Heber yojamna Salabe uaquiñá.
Sala yojamna Cainanbe uaquiñá,
Cainán Arfaxadbe uaquiñá
y Arfaxadna Sembe uaquiñá.
Sem Noebe uaquiñá
y Noé yojamna Lamechebe uaquiñá.
Lamec yojamna Matusalenbe uaquiñá,
Matusalén Enoche uaquiñá
y Enocna Jaredbe uaquiñá.
Jared Mahalaleelbe uaquiñá,
y Mahalaleelna yojamna Cainanbe uaquiñá.
Cainán yojamna Enosbe uaquiñá,
Enós Setbe uaquiñá,
Set Adanbe uaquiñá
y Adán Bëngbe Bëtsabe uaquiñá.

4

Jesús tojanobená Satanás jayénjanama
(Mt 4.1-11; Mc 1.12-13)

¹ Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemándaye. Jesús Jordán bejayoicana tojtaná y chë Uámana Espíritna entsanga ndoyena luaroye tbojanánatse. ² Chentse canta bnétsana te tbojanjétana, y Satanasna yojanabó Jesús jisháchichiyama. Chë canta bnétsana tentscuana Jesús tondaye tonjanse, y cabana ibojeshéntsena.

³ Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtšbenga tandëse chaobiama ca.

⁴ As Jesús tbojanjuá: —Bëngbe Bëtsabe uabemana palabrënguiñe mëntšá endayana: “Entšá nýe tandëšeca ndoñe vida ntsebomnana ca.”

⁵ Chentšana, Satanás canýe bëts tjoye tbojanánatse y betscó nýetsca quem luarentša amëndayëngbenache tbojaninýinýé. ⁶ Chora Satanás tbojaniyana: —Atše nýets obenana cbochjätsetaye y lempe quem amëndayëngbenache yobinýna soyëngnaca. Atše lempe chca sënjóyëngacñe y sëntsobena jatsetayama nda stsebošábioye. ⁷ Aca chacojoshëntsamentšé y chašcojadorase, lempe nýetsá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrënguiñe mëntšá endayana: “Acbe Bëtsá, chë Utabná cochtsadorana y nýe cha cochtseservena ca.”

⁹ Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, ¹⁰ er Bëngbe Bëtsabe uabemana palabrënguiñe endayana: Bëngbe Bëtsá chabe angelënga echanjichamuá, chacmotsinýenama.

¹¹ Chënga buacuatsëngaca cmochanjishache, shecuatše ndocá ndëtšbeñe chacondomama ca —cha tbojaniyana.

¹² Chora Jesús tbojanjuá: —Bëngbe Bëtsabe uabemana palabrënguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

¹³ Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús bentsana tojtsanojuánañe.

Jesús tojanontšé Galileoca chabe trabajo jamana
(Mt 4.12-17; Mc 1.14-15)

¹⁴ Chentšana, Jesús Galileoye tojesaná chë Uámana Espíritbe obenánaca, y nýetsca entsanga chë luariñe chabiama imojtsencuéntaye. ¹⁵ Jesús yojtsabuátambaye chë judiëngbe enefjuana yebnënguenache, y nýetscanga cha imojtsatschuanaye.

Jesús Nazaret puebloca
(Mt 13.53-58; Mc 6.1-6)

¹⁶ Chentšana Jesús Nazaretoye tojtashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama. ¹⁷ Chë Bëngbe Bëtsabe juabna oyebuambnayá Isaíasbe librëša tmojaninýé chaualiama. Chë librëša yojutëfjona orna, tojáninýena mëntšá uábemanentše:

¹⁸ “Chë Utabnabe Espíritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë nd-bomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínÿnama;

jamama chë ínÿengbe causa imosufrínënga, tempcá cachcá tšabá chamot-satsmënama;

¹⁹ y entšanga jáuyanama ndëmua ora chë Utabná chabe entšanga yochjatsebacye ca.”

²⁰ Jesús jualíama tojanpochocá y chora chë uajabuachanábioye chëša tbojtaniyé y tojtanoítbema. Nÿetsca entšanga chë enefjuana yebnentše imojtsemnënga Jesúsbioye imojtsobuáuatja. ²¹ Chora Jesús tojanontšé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

²² Nÿetscanga Jesusbiamá tšabá imojtsencuéntaye y ojanánënga imojtsemna tša botamana cha yojtsoýebuambnama. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

²³ Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

²⁴ Y cachora Jesús más tojanoyebuambá, mëntšá: “Ndegombre cbëyana, ni canÿe Bëngbe Bëtsabe juabna oyebuambnayábioye cachabe pueblentše tšabá quematonjá. ²⁵ Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nÿetsá ndoñe tonjanafté y bëts shëntsana chë luariñe yojtsebinÿna. ²⁶ Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aïñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye. ²⁷ Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aïñe canÿe šocábioye, Naamán ca uabainá, cach bacna nguayanánaca, Siriocá ca” —cha tojánayana.

²⁸ Chë judiëngbe enefjuana yebnentše imojtsemna entšanga chca tmojanuena ora, puerte tojánëtëna. ²⁹ As, chora chënga tmojantsbaná, chë pueblentšana Jesús imojtábocna y más tsjuanoye canÿe peñëšëjana imojjuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. ³⁰ Pero Jesusna chëngbe tsëntsajana tojánachnëngo y ínÿoye tojtsanoñe.

Jesús, bayëjbe juabna cánÿabioye tbojanbojuaná
(Mc 1.21-28)

³¹ Chentšana, Jesús cach Galileoye tojesaná, Capernaum puebloye, y choca tojanontšé, chë ochnayté, chë judiëngbe enefjuana yebnentše entšanga jabuátambana. ³² Entšanga imojtsenjnanaye ntšamo Jesús yojtسابuátambama, er chamna mo canÿe mando bomnacá yojtsoýebuambnaye.

³³ Chë enefjuana yebnentše, canÿe boyabása bacna bayëja uambayá yojtsemna, y chabe causa chë boyabása tojanontšé mëntšá uayebuáchana: ³⁴ —¿Cachcá šmonÿá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

³⁵ Chora Jesús chë bacna bayëjbioye tbojtsanácacana y tbojanianyana: — ¡Iytëca móbema y chábentšana maisebocna ca!

As chora chë bayëja entsanguentše chë boyabásabioye tbojanshajayé, y ndocá ntjëftsemcá chábentšana yojésebocna. ³⁶ Chë soyama nyetsca entsanga imojénjanayey y mëntšá imojtsenatsëtsnaye: “¡Tša chca palabrénga! ¡Quem entšá mandayacá y obenacá chë bayëjenga entsamënda, y chënga montsaisébocana ca!”

³⁷ Y Galileoca nyetsca pueblënguiñe Jesusbiamay yojtsótatšëmbo.

Jesús, Simón Pédrëbe uambén mamábioyey tbojanshná
(Mt 8.14-15; Mc 1.29-31)

³⁸ Chentšana, Jesús chë judiëngbey enefjuana yebnentšana tojëftsanbocna y Simonbey yebnentše tojánamashëngo. Simonbey uambén mamá šocá inajájona jabuache calentóracay, y chë chentšey imojtsemnay entsangay chabiamay Jesúsbioyey tmojanimpadá. ³⁹ Chora Jesús chë šocábioyey yojotsejbéna y tojánayana: “¡Calentoray mojuaná ca!” Y chë calentoray tbojtsanóbojuanañey. Y cachoray, chay tojtantsbaná y tojanontšey chëngay jobuácuedana.

Jesús bay šoquëngay tojanashná
(Mt 8.16-17; Mc 1.32-34)

⁴⁰ Shinýey yojuenatjëmbay oray, bangay inýey y inýey šocanay bomnëngay Jesúsbioyey tmojanënatsey, y chay nyetscay šoquëngbeyne cucuatšëngay tojanajáyo y tojanashná.

⁴¹ Chora, bay šoquëngbeyntšana bacnay bayëjëngay imojtsaisébocnay y mëntšá imojtsanchembumbuanay: “¡Acay chë Bëngbey Bëtsabay Uaquiñá condmënay ca!” Pero Jesusnay yojtsëcácanay y ndoñey tonjanalesenciáy chamóyeyebuambamay, er chë bayëjëngay imnatátšëmbo chay chë Cristo bëtsemnabay.

Chë judiëngbey enefjuana yebnënguyenachey, Bëngbey Bëtsabay soyëngamay Jesús entsangay yojanabuayiyná
(Mc 1.35-39)

⁴² Yëfsanay tojanbinýnay oray, Jesús chë pueblentšana tojëftsanbocnay, y canýey luaroyey, entsangay ndoyenoyey tojtsanoñey. Pero entsangay tmojánay chay jetsenguanguamay, y chay yojtsemnoyey tmojánashjaynay. Chëngay imojëtsebošey Jesús cach pueblentšey chaotsoquedáñamay, ⁴³ pero Jesús tojanéyanay: “Atšey šontsemnay chë tšabay noticiëngay Bëngbey Bëtsabay amëndayamay inýey pueblënguyenáchnacay jábuayenana. Chamay Bëngbey Bëtsáy šonjichmó ca.”

⁴⁴ Y chentšana, Jesús yojánanay Bëngbey Bëtsabiamay entsángbioyey abuayiynayey, chë judiëngbey enefjuana yebnënguyenachey Judeocay.

5

Canýey te mallajtay beongay ashebuánayey te
(Mt 4.18-22; Mc 1.16-20)

¹ Canýey te, Jesús, Genesaret cay uabainay uafjajónayey tsachañey yojtsemnay oray, bay entsangay tmojánashjaynay, y chëngay tšay imojtsenajuatsëntšnayey Bëngbey Bëtsabay palabray jouenamay. ² Jesús, chë uafjajónayey tsachañey bécoñey tojáninýey utay enay barquëshay; chë beongay ashebuánayëngnay barquëshanguentšana tmojëftsanbocnay atarraiëshangáy jetsáboshabiamay. ³ Jesús canýey barquëshañey tojánamashëngo; chëshay Simónbeshay inauamnay. Chora Simónbioyey mëntšáy tbojanianyana: “Quem tsacháñentšana chcoyey mëyambay ca.”

⁴ Tojanótbemay oray, Jesús chë barquëshoicamay tojanontšey entsangay jabuátambamay. Jabuátambamay tojanpochocáy ornay, Simónbioyey tbojanianyana: —Shbuatsëntsoyey barquëshay mëyambay y tšëngaftangbey atarraiëshangáy šmochjushbuetšey, beongay jashebuáyamay cay.

⁵ Pero Simón tbojanjuá: —Buatëmbayá, nÿets ibeta fsëndanguá y ton-daye chibiátashebuaye. Pero aca chca tcjayánayecna, cachiñe atarraiešha chantëtëshbuetše ca.

⁶ Tmojanëshbuetše orna, bëscá beonga tmojánishëche y chëngbe atarraiëshangá tojanontšé jtsatanëcanana. ⁷ As, chë inÿe barquëshañe imojtsemna enutëngbioye tmojánëfjatsëmbo, jabújabuachama chamuábama. Chora chënga tmojánabo, y nÿets uta barquësha beóngaca tmojanajutjé. Tša chëftanga causa, tojanontšé chë uta barquësha jtsenatjëmbambana. ⁸ Simón Pedro chca tojáninÿe ora, Jesús bentše tojanoshëntsamentšé y tbojanianyana: — ¡Bëngbe Utabná, atše bacna soye amá sëndmëna, chíyeca átšbentšana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. ¹⁰ Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojanianyana: —Ndoñe matauatjana. Morscana, entšanga Bëngbe Bëtsabiamá cochántanguaye, y nÿe beonga ashebuanayá ndoñe quecochátsmëna ca.

¹¹ As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná

(Mt 8.1-4; Mc 1.40-45)

¹² Jesús canÿe pueblentše yojtsemna ora, chentše tojánashjango canÿe entšá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentšé y jubiaca fshantsóntscoñe yojotsejbéna y tbojanimpadá: — Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

¹³ As Jesús cucuátšëca tbojánbojajo y tbojanianyana: —Aíñe, sëntseboše. ¡šocana cbotsebojuaná ca!

Y cachora chë šocana tbojtsanóbojuanañe. ¹⁴ Chora Jesús tbojanmandá: —Ndocnábeñe chë soye cattsecuëntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entšanga chamotatsëmbona mora ya tšabá cojtsatsmënama ca.

¹⁵ Pero ndayá Jesús yojtsamama más entšanga imojátatsëmbona, y ba entšanga imojtsójoye chábioye joyeunayama y chëngbe šocanëngama chauashnama. ¹⁶ Pero Jesús yojanamana jtsoñana entšanga ndoyena luarëngoye y choca Bëngbe Bëtsáftaca ibnëcuentaye.

Jesús, canÿe jama ndobenábioye tbojanshná

(Mt 9.1-8; Mc 2.1-12)

¹⁷ Canÿe te, Jesús yojtsabatambá ora, chentše básefta fariseunga y ley abuatambayënga imojtsetbiámana, Galileoca nÿetsca pueblënguëntšana áshjainënga, Judeoquënga y Jerusalenoquënga. Y chora Jesús šoquënga yojtsashnaye, Bëngbe Bëtsabe obenánaca. ¹⁸ Chora tojanopasá, básefta boyabásënga canÿe šocá, jama ndobená, tjuashiñe choye imojuamba. Chënga imojëtseboše tsoye cha juambana, Jesús yojtsemnoye, ¹⁹ pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanëštjango, entšangbe tsëntsaca, Jesusbe natsanoica. ²⁰ Jesús tojáninÿe cha chë šocá jáshnama bëtsoyënama chënga puerte imojtsošbuáchema. As, chë jama ndobenábioye tbojanianyana: “Bacó, acbe bacna soyënga tcbontsebojperdoná ca.”

21 Chora chë ley abuátambayënga y chë fariseunga mëntsá tmojanontsé juabnayana: “Quem boyabása ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entsá quenátobena bacna soyëngama inya japerdonana; nye Bëngbe Bëtsá aíñe ca.”

22 Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná? 23 ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? 24 Y chca, morna atše cbochanjínyanÿiye, chë Bëngbe Bëtsá Entsá tbojanbemá quem luariñe obenana yobomnama, entsanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanियana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

25 Cachora chë jama ndobená tojtantsbaná entsangbe delante, chë cha inajájona tjuashe yojesocñe y Bëngbe Bëtsábioye atschuanaye chentsana yojtsatoñe. 26 Chama nyetsca entsanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinÿe ca.”

*Jesús, Levíbioye tbojanchembo chabuastama
(Mt 9.9-13; Mc 2.13-17)*

27 Chca yojochnëngüentšana, Jesús chentsana tojëftsanbocna y canÿe entsábioye tojáninÿe, Leví ca uabainá, chë entsángbioye impuesto Romocama atjanayentše inétsotbemañe. Chora Jesús tbojanियana: “Smasto ca.”

28 Y Leví lempe tojésanboshjona, tojantsbaná y Jesús tbojanasto.

29 Chentsana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inÿe entsángnaca mesëshentše imojtsetbiámana. 30 Chora, chë fariseunga y chë ley abuátambayënga tmojanontsé chë Jesusbe uatsjëndayëngbiana podesca oyebuambnayana; y chëngbioye mëntsá tmojanëyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojtsesá y šmojtsofsëšná ca?

31 Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe. 32 Y atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama
(Mt 9.14-17; Mc 2.18-22)*

33 Chora chënga Jesúsbioye tmojanियana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nye nyets tempo jesosañana y jesofšëšnañana ca.

34-35 Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtská jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ofjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

³⁶ Jesús mēntšánaca tojanacuntá jabuátambama: “Ndocná queonÿbatatētse basájua tsēm entšayañe, tanguá entšayá jtarméndama. Chca tcojamēse, chē tsēm entšayá jtsandbemana, y chē tcojuatētse entšējua chē tanguájuañe ndoñe tšabá ntsinñana. ³⁷ Y cach ndoñe, chē tojtseshayana vínoye tanguá jasabenguiñe ntjataftsuámayana. Tcojuaftsuamasna, chē jasabenga jtse-shébēfjuana y chē vínoye jtsabuáshanana; y chca, chē vínoye y chē jasabenga tondayama ntjatoservénana. ³⁸ Chíyeca co, chē tojtseshayana vínoyna tsēm jasabenguiñe juaftsuámana. ³⁹ Ndocná, chē bóchena vínoye tojatēmo y chentšana játsbošana chē tojtseshayana vínoye jatofšiyana; cha jayanana: ‘Chē bóchena vínoye tša tšabeye ca’.”

6

Jesusbe uatsjéndayēnga ochnayté trigo tmojanátabebe (Mt 12.1-8; Mc 2.23-28)

¹ Canÿe ochnayté, Jesús canÿe jajajana yojtsaye; chabe uatsjéndayēnga trigo imojtsaiuatabnaye, imojtsaiúshenēcaye, y imojtsaiuasaye. ² Chē causa, básefta fariseunga tmojanatjaye: —¿Ndayeca šmojtsama chē ochnayté ja-mama ndoñe quenátslesenciana soye ca?

³ Y Jesús tojanējua: —¿Ndoñe šmēndualía y šmondētatsēmo, ntšamo rey David y chabe enutēnga tmojanmama shēntseca imojtsemna ora y jasama yo-jtsējaboto ora? ⁴ Chca orna, David Bēngbe Bētsabe bēts yebnentše yojámashēngo y chē Bēngbe Bētsá chentše yojamnama inÿinñayē tandēsēnga yojase, y chē cháftaca imojánajna entšángnaca yojátsataye. Y chē tandēsna nÿe bachnanga belesenciana jasama. Masque David chca yojama, Bēngbe Bētsá chora ndoñe tonjánayana David canÿe bacna soye tojanma ca —Jesús tojanējua.

⁵ Y Jesús más tojanéyana: “Chē Bēngbe Bētsá Entšá tbojanbemá, chē entšá ochnayté tojtsama sóynaca jtsemándayana ca.”

Chē buashana cucuatše bomna entšá (Mt 12.9-14; Mc 3.1-6)

⁶ Inÿe ochnayté, chē judiēngbe enefjuana yebnoye Jesús tojánamashēngo y tojanontsé jabuátambana. Y chentše yojtsemna canÿe entšá, catšbioica cucuatše buashanētše bomná; ⁷ y chē ley abuátambayēnga y fariseunga chiñe imojtserrondana jinÿama nderado Jesús chē ochnayté chábioye tabuan-jashna, as chca chēnga jtsebomnama ndaye sóyeca Jesús mal jaquédana. ⁸ Pero Jesús chēngbe juabna yojtsetátšēmo; asna chē buashana cucuatše bomna boyabásabioye tbojanianana: “¡Motsbaná y chentše tsēntsaca motsa ca!” Y chē entšá yojtsbaná y entšangbe tsēntsaca yojotsaye. ⁹ Chora Jesús chē inÿengbioye tojanéyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochócana ca?”

¹⁰ Y nÿetscanga chabe chabuajana imojtsemnēnga tojanēñanÿé, y chē buashana cucuatše bomnábioye tbojanianana: “Macuenñanējaná ca.” Y chē boyabása tojanacuenñanējaná, y tšabá chētša yojsatamna. ¹¹ Pero chē inÿengna puerte tmojanotjyaná, y tmojanontsé enatsētsnayana ndayá muan-jobenaye Jesusbe contra jamana ca.

Jesús chē bnētsana uta uatsjéndayēnga tojanabacacá (Mt 10.1-4; Mc 3.13-19)

¹² Chē tempo, Jesús tjoye tojána Bēngbe Bētsáftaca jencuéntama; y nÿets ibeta cháftaca tbojanencuentá. ¹³ Tojanbinÿna ora, chabe ústonēnga tojánachembo, y chēnguentšana tojanēbuáyana bnētsana uta uatsjéndayēnga, chē ndēmuanÿēnga “chabe ichmónēnga cánaca” tojanēbobaye. ¹⁴ Chēnga imojamna: Simón, chē

Pedro cánaca Jesús tbojanabobayá; Andrés, Simonbe catsata; Santiago y Juan, Felipe y Bartolomé, ¹⁵ Mateo y Tomás, Santiago, Alfeobe uaquiñá; Simón, chë celote ca uabobainá; ¹⁶ Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

Jesús ba entsanga yojanabuatambá y yojánashnaye
(Mt 4.23-25)

¹⁷ Chentsana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsana, Jesúsbiyoye oído jabuájuama y chëngbe šocanëngama chauashnama. ¹⁸ Y chábeyeca chë bacna bayëjbe juabna uambayënga tšabá imojtsatsmëna. ¹⁹ Njyetsca entsanga tša imojtseboše y ndayánaca imojtsama Jesús jabojuama, er chábensana bëts obenana yojtšobocana y njyetscanga yojtsashnaye.

Chë ndegombre oyejuayana bomnënga y ndëmuanjengbiana tša lastema yochtsemna
(Mt 5.1-12)

²⁰ Jesús chabe uatsjëndayëngbiyoye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiana entsemna ca.

²¹ “Puerte oyejuayënga tšëngaftanga chë mora oshëntsiyënga, er beca šmochantóshachaye ca.

“Puerte oyejuayënga tšëngaftanga chë mora šmošachenga, er chentsana šmochántatenbiajuaye ca.

²² “Puerte oyejuayënga šmochtsemna, entsanga chacmojtsëbuayënja ora, chacmojtsatëbuacana ora, chacmojtsëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. ²³ Chë te puerte šmochjòyejuaye, er celoca canye bëts uacanánana šmochántsebmna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

²⁴ “Pero jtša lastema tšëngaftanga bomnëngbiana, er mora oyejuayënga jtsemnama ya bëtscá šmojóyëngacñe ca!

²⁵ “¡Tša lastema tšëngaftanga chë mora shachanëngbiana, er shëntsana šmochántsebmna ca!

“¡Tša lastema tšëngaftanga chë mora oyejuayëngbiana, er ngménama šmochanjenóbošachna ca!

²⁶ “¡Tša lastema tšëngaftangbiana njyetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

Chë uayayëngbiana bonshánana jtsebmna
(Mt 5.38-48; 7.12)

²⁷ “Pero tšëngaftanga, átšbiyoye ouenanënga cbëyana: Tšëngaftangbe uayayënga šmochtsababuánjëshana; chë tcmojtsëbuayënjëngbiana tšabe soyënga šmochtsama; ²⁸ chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana. ²⁹ Nderado ndánaca cánjóica tcmojajuebjantsetase, cochjomiye chë ínjóica cachcá chacmomama; nderado ndánaca quëfsáiya tcmojuábocana, cachcá cochjonjaye acbe shabuanguanëjuanaca chauetsacñama. ³⁰ Ndánaca chacmojtjañábioyna, jatsetayana; y nda ndayánaca chacmojefcábioyna,

ndoñe catjontšínjēna chacmatoyema. ³¹ Injēngaftaca šmochtsama, ntšamo chē ínŷenga tšēngaftangaftaca chamotsamama šmojtsebošcá.

³² “Tšēngaftanga, nŷe chē tcmojtsababuánŷeshanēnga šmojttsababuánŷeshanēse, ¿ndaye tšabe soye chca šmattsama?; er chē bacna entšágnaca chca mondbétsama. ³³ O nderado, nŷe chē tšēngaftangbiama tšabe soyēnga tmojttsamēngbiama tšabe soyēnga šmojttsamēse, ¿ndaye tšabe soye chca šmattsama?; er bacna entšágnaca chca mondbétsama. ³⁴ O nŷe chē cmochtēchenanguama šmojtsejuabnángbioye šmojúyentsamēse, ¿ndaye tšabe soye chca šmattsama?; er chē bacna entšágnaca mondbetsenántšamiana, chēngbentsana cachcá jtóyēngacñama jtsobátmanēse. ³⁵ Pero tšēngaftangna cmontsamna chē uayayēnga jtsababuánŷeshanana; y tšabe soyēnga chēngbiama jtsamana y júyentsamiana, chēngbentsana ndayánaca jtóyēngacñama ntjatobatmancá. Chca, tšēngaftanga uacanánana cuenta canŷe bēts soye šmochanjóyēngacñe, y celoca endmēna Bēngbe Bētsabe básēnga šmochántsemna; Bēngbe Bētsá chē ndochuanayēngaftaca y bacna entšangaftácnaca tšabia comna. ³⁶ Inŷengbiama lastemadēnga šmochtsemna, ntšamo tšēngaftangbe Taitá yomncá ca” —Jesús tojánayana.

*Ndoñe ntsichámuana chē ínŷenga tšabá o ndoñe tšabá tmonjamama
(Mt 7.1-5)*

³⁷ “Ndocá ínŷengbiama šmattsichamo chē ndoñe tšabá tmontsamama, y Bēngbe Bētsá ndoñe queochátichamo tšēngaftanga ndoñe tšabá šmonjama ca. Inŷengbiama ndoñe šmattsichamo ndoñe tšabá tmonjama ca, y Bēngbe Bētsá ndoñe queochátichamo tšēngaftanga ndoñe tšabá šmonjama ca. Inŷenga šmochjáperdonaye y Bēngbe Bētsá cmochanjáperdonaye. ³⁸ Inŷengbioye šmochjatsataye y Bēngbe Bētsá cmochántatsataye. Mo nda canŷe biaco medidiñe bētscá tojajutjé, uashēshe y cmojtiyecá, Bēngbe Bētsá cachcá cmochántatsataye. Ntšamo tšēngaftanga ínŷengbioye chašmojábiama, uabouana o ndoñe jabuache soyēnga, Bēngbe Bētsá cachcá tšēngaftangbioye cmochanjábiama ca” —Jesús tojánayana.

³⁹ Jesús quem cuétnaca tojánayana jabuátambama: “¿Canŷe jtaná nantsobena inŷe jtaná jtsanachayama? ¿Chca ndoñe nŷets útata ndaye tšuabentše buanjótsatše? ⁴⁰ Chē uatsjendayá ndoñe ntsemnana chē buatēmbayabiama más bētsá. Pero chabe uatsjéndayana chaojapochocá ora, cach buatēmbayacá jtsemnana.

⁴¹⁻⁴² “Canŷa chabe bominjīñe canŷe niñēfja tojtsebomnēse, cha ndoñe ntsoobenana chabe catšátbioye jauyanana: ‘Acbe bominjēntšana canŷe polvēshtema jtsebuchjátsēcama šmolesenciá ca’. Natsana cha bontsemna cachabe bominjēntšana chē niñēfja jtsenobuchjátsēcana, tšabá jinŷama jobenayama, chabe catšatbe bominjēntšana chē polvotema jtsebuchjátsēcama. ¡Cachcá entsemna acbiama, bacna entšá chē ntšamo ndegombre tcojuabnacá ndinŷinŷayá! Chē tša bacna soye cojtsama ca acbe catšátbioye tcojauyana ora, cach aca tša bēts bacna soyēnga cojtsamama ntjenojuaboycá; y chca, aca jamana canŷe bacna soye. Natsana cmontsemna chē cach aca ndoñe tšabe soyēnga cojtsamama ngmēnaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmēnama, jtsotatsēmbuana ntšamo tojashajoncá
(Mt 7.17-20; 12.34-35)*

⁴³ “Ndoñe queonýbatsmëna, chë canýe tšabe betiyiñe podesca soye jashájonana; ni canýe ndoñe tšabe betiyiñe tšabe soye jashájonana. ⁴⁴ Betiyënga jtsabuatomana ntšamo cada betiye tojtseshajcá. Uchmašëshentsana quenátópodena higuëbé jocñana; ni uvašëša, shëshëntša betiyentsana. ⁴⁵ Chë tšabe entsana, chabe ainanoca tšabe juabnënga bomnentsana jtsóyebuambnayana; y chë bacna entsana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entsá jtsóyebuambnayana ca” —Jesús tojánayana.

Chë uta ucuatjoniñe

(Mt 7.24-27)

⁴⁶ “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷ Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: ⁴⁸ Cha endmëna mo canýe entsacá, nda canýe yebna jajebuamna becá fshantse jashenoye yojajutjo y ndëtšbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguiñe jabuache yojáucuatjona. ⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canýe entsacá, nda canýe yebna yojajebo nýe fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canýe Romano soldadëngbe amëndayabe bochichnayábioye tbojanshná

(Mt 8.5-13)

¹ Entšángbioye chca jáuyanana tojanpochocá ora, Jesús Capernaum puebioye tojána. ² Chentše yojoyena canýe romano soldadëngbe amëndayá. Cha ibnabomna canýe bochichnayá puerte bonshaná, y chora cha šocá yojtsemna, ya jtsóbanama. ³ Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. ⁴ Chënga Jesúsbioye tmojánashjango y tša imojtseimpadana, mëntsá: “Quem soldadëngbe amëndayá merecido entsebuájona chacotsájabuachama; ⁵ er cha bëngbe luarentša entsángbioye corente endábabanýeshana, y cachá chë bëngbe enefjuana posada šonjayentšjebo ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atšbe Utabná, ndoñe yapa matenócochinýenana átšbioye jabama. Atše merecido taitsatobuajoñe aca atšbe yebnoye chacua-mashënguama; ⁷ chíyeca ni mo añemo chiyatentšetá jama aca jajëbenguama. Morna nýe cochjayana y atšbe bochichnayá tšabá echántsmëna. ⁸ Er atše sëndábamna átšbioye mándayënga y átšnaca soldadëngbe amëndayá sëndmëna. Atše canýe soldádbioye stjauyana ‘motsa ca’, cha cachora jana; y ínýabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiama yojenjnaná, y jobuértanëse chë ba entsanga cha ustonëngbioye tojanéyana: “Ndegombre cbëyana, ni mo nýets Israelentše, ni canýa quem boyabasacá tša ošbuachiyá chiyátinýena ca.”

¹⁰ Y chë ichmónënga yebnoye tmojtaná orna, tmojáninÿena chë bochich-nayá ya tšabá yojtsatsmëna.

Jesús tojanma canÿe viudabe uaquiñá cháuatayenama

¹¹ Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjédayënga y ba entšanga imojtsaye. ¹² Chë pueblo amashjuanoye yojtsebeconá orna, entšanga chë pueblentsana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëtská entšanga chë obanabe mamá imojtsetjëmbambnaye. ¹³ Bëngbe Utabná chë viudábioye tbojáninÿe ora, chabiamá tbojanongmé y tbojanianá: “Ndoñe matošachena ca.”

¹⁴ Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojanianá: “Bobontse, atše cbëyana: ¡Matëtsbaná ca!”

¹⁵ Chora chë obaná tojtantsbaná y tojanontsé oyebuambnayaná; y chabe mamábioye Jesús chë bobontse tbojtánatse. ¹⁶ Nÿetsca entšanga tša uatjana yojubua che chca tmojáninÿe ora, y Bëngbe Bëtsá imojtsatschuanaye, mëntsá jayanëse: “Bëngbentše canÿe Bëngbe Bëtsabe juabna oyebuambnayá cuatënjonÿná ca.” Y mëntsánaca: “Bëngbe Bëtsá tojabo chabe entšanga jabújabuachama ca.”

¹⁷ Y nÿets Judea luarëjana y chë chábuañe luarenache entšanga imojátatsëmbona ndayá Jesús tojanmama.

Juan chë Ubayanabe ichmónënga

(Mt 11.2-19)

¹⁸ Juan, lempe ntšamo Jesús yojtsamama yojátatsëmbona; er chabe ústonënga chama tmojancuentá. As Juan, chënguentšana útata tojánachembo, ¹⁹ y Jesúsbioye yojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o ínÿabiamá jatobátmama tayojétsamna ca. ²⁰ As chë Juanbe ichmónënga Jesúsbioye tmojanobeconá y tmojanianá: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiamá jatobátmana ca.

²¹ Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna. ²² Chora Jesús mëntsá tojanëjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnéjëmëngbioye chë tšabe noticiënga montsabuayiná. ²³ ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

²⁴ Chë Juanbe ichmónata chentšana tbojésanbocnentšana, Jesús tojanontsé Juanbiamá entšanga jáuyanana, mëntsá: “Juan jinÿama šmojánbocna ora, ¿ndayá jinÿama šmojánbocana entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëscá?

²⁵ Y ndóñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondétatsëmbo chë uámana entšayaca bopormánënga y chë bëtská bomnánaca nÿe tondayama ntsecochinÿencá vida bomnëngna, reyëngbe yebnënguiñe mondbëtsiyenama.

²⁶ Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna oyebuambnayá? Ndegombre; y cbëyana, canÿa Bëngbe Bëtsabe juabna oyebuambnayabiamá más bëtsá. ²⁷ Cha, Juan, endmëna ndabiamá Bëngbe

Bëtsá chabe uabemana palabrenguiñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiamá chaóyebuambama, entšanga jábuayenama aca jabama ainaniñe tšabe juabnëngaca chamotseprontánama ca.

²⁸ Ndegombre cbéyana: Nÿets tempo entšángbeñe, ndocná quenátsmëna Juan chë Ubayanabiamá más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

²⁹ “Nÿetsca entšanga chca Juánbioye tmojanóyeunanga y chë Romocama entšángbioye impuesto atjanayëngnaca, nÿets ainánaca tmojánayana Bëngbe Bëtsá nÿetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. ³⁰ Pero chë fariseunga y ley abuatambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiama jamama yojanjuabnacá.”

³¹ Jesús mëntšánaca tojánayana: “Cbochanjáuyana ndayacá morsca entšanga imomna, y ndayëngcá chënga imomna. ³² Chënga mondmëna mo chë plazëngoca mondbetsetbiámama basetemëngcá; chëngna mëntšá jabuache jtse-natsayana: ‘Tšëngaftangbiama fsënjaflautá y ndoñe chešmatlantšá; ngmënaca fsënjaversiá y ndoñe chešmatenóbošachna ca.’ ³³ Juan chë Ubayaná tonjánabo y ndoñe quenjatamana bëtscá entšángbeñe jtsemnana, ni tandëse jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca. ³⁴ Morna, chë Bëngbe Bëtsá Entšá tbojanbemá tonjabo y chana aíñe entsamana bëtscá entšángbeñe jtseyayana y jtsofsëšnayana, y tšëngaftanga chabiamá šmontsichamo: ‘Chana yapa uasayá y vínoye tmojá entsemna y Romocama entšángbioye impuesto atjanayënga y bacna soyënga amëngbe amigo ca’. ³⁵ Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

Jesús, chë fariseo Simonbe yebnentše

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentše yojótbema. ³⁷ Chë pueblentše yojamna canÿe shembása, bacna vida bomná. Jesús chë fariseobe yebnentše yojtsesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëse, jútjena canÿe botamana uanguëtše béjayeca. ³⁸ Jesusbe shecuatšentše yojoshëntsamentsiye, šachénaca; shëchbuíyeca chabe shecuatšënga yojtsefchecuaená y cachabe stjënashaca ibojtsatsshéchojuaye. Chabe shecuatšënga yojtonguëtsëntsiye y chë botamana uanguëtše béjaye ibojtshëcbuëscacja. ³⁹ Chë fariseo Jesúsbioye ofjaná chca tojáninÿe ora, mëntšá Jesusbiamá yojtsejuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.” ⁴⁰ As Jesús chë fariséobioye tbojanianya: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

⁴¹ Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana. ⁴² Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojaniyana: —Mora šmëyana, ¿chë útatentšana nda más chë uyentšamianábioye buantsebobonshana ca?

⁴³ Y Simón tbojanjuá: —Atše šontsinýana chë más bëtscá ndebená ca.

Y Jesús tbojaniyana: —Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëse, Simónbioye tbojaniyana: —Minýe quem shembása. Atše acbe yebnoye sënjámashëngo y aca búyeshe ndoñe chešcatabuatsëtá atšbe shecuatsëngama. Y quem shembásana, cachabe shëchbuíyeca šontseshecjabebé y chabe stjënashaca šontseshebojó. ⁴⁵ Ndoñe chešcatámocho, pero cha tonjámashëngo orscana ndoñe ntjájbanana atšbe shecuatsënga onguëtsëntšnaye.

⁴⁶ “Aca bestšašíñe aceitiye ndoñe chešcatsbuešcja, y chana aíñe botamana uanguëtse béjaye šonjashcebuešcja. ⁴⁷ Chcasna atše cbëyana, cha šonjinýanjé atšbiama corente bonshánana yojtsebomna, er atše chabe bëtscá bacna soyënga sëntseboperdoná; pero nda nýe básefta bacna soyëngama stjaperdóna chana, nýe batšatema bonshánana jtsebomnana ca.”

⁴⁸ Y chora Jesús chë shembásabioye tbojaniyana: “Acbe bacna soyëngama perdonaná contsemna ca.”

⁴⁹ Chora chë ófjanënga chentše innatbiámanëngna tmojanontsé enatsëtsnayana: “¿Nda quem entšá yojtsemna, chë bacna soyëngámna entšángbioye jtsaperdónayana ca?”

⁵⁰ Y Jesús más chë shembásabioye tbojaniyana: “Aca átšbeñe icošbuachéyeca, atsbocaná cochántsemna; natjëmbana motsatoñe ca.”

8

Chë Jesúsbioye imojanájabuachana shembásenga

¹ Chca tojanopasá chentšana, Jesús bëtš y base pueblënguëjana yojánana, tšabe noticiënga Bëngbe Bëtšabe amëndayama entšanga abuátambaye y abuayiynaye. Chë bnëtsana uta uatsjëndayëngna cháftaca imojtsajna. ² Básefta shembásengnaca imojtsetjëmbamnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayëjënga tojtanëbuacna; ³ Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

⁴ Ba pueblënguëntšana mallajta entšanga tmojánbocana Jesús jinýama. Ba entšanga jouenama tmojanobeconá ora, Jesús mëntšá tojanacuntá: ⁵ “Canýe, canýe jená jénaye jaujquëshama yojëftsebocna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástjajna y imojtsósañe. ⁶ Inýe meshëngna ndëtsbenguíñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. ⁷ Inýe meshëngna uchmëshangañe yojuatquëcjana y chë uchmëshangá lempe yojtsatscué, chë jénayeca cánýiñe yojuábocna ora. ⁸ Inýe meshëngna, uanguaniñe yojuatquëcjana. Yojuájua orna, bëtscá yojuashájona; canýe jénayentšana nýa mo patse meshënga yojuashájona.”

Jesús chca jacuëntama tojanpochocá ora, tojanáyebuachena: “Chë jouenama tojtsobenënga, šmochjouena ca.”

Ndáyeca Jesús cuenténgaca yojánabuatambaye
(Mt 13.10-17; Mc 4.10-12)

⁹ As chora chabe uatsjédayénga tmojantjá: —¿Ntsamo chë cuento yojt-sayana ca?

¹⁰ Y Jesús tojanéyana: —Béngbe Bëtsá tšëngaftanga cmontsinÿanÿná nyetsca chë mo iytémencá yomna soyénga chabe améndayama, pero chë ínÿengbioyna ndoñe; chë soyéngama chénga lempe cuenténgaca sentsëtsëtsná. Chca, masque corente chamotsafšna, ndoñe chamondobená Béngbe Bëtsabe soyénga jinÿama; y masque becá quem soyénga chamouena, ndoñe queochátësertana ca.

Jesús chë jenabe cuentama tojanabuayená
(Mt 13.18-23; Mc 4.13-20)

¹¹ “Chë cuento mëntsá endayana: Chë jénaye Béngbe Bëtsabe palabra entsemna. ¹² Chë benache juachañe yojuatquécjana básefta jénaye endayana chë básefta entšanga Béngbe Bëtsabiana soyénga tmojouenénga; pero chora Satanás betsko jabana chénga Béngbe Bëtsabe palabra jabëtsabuajuanama, chca, chénga ndoñe chamondëtsošbuáchema y bacna soyénguentšana ndatsebácanénga chamotsemnama. ¹³ Inÿe entšanga mondmëna mo chë ndëtšbenguiñe yojuatquécjana jenaycá. Chë entšangna Béngbe Bëtsabe palabra jouenana y oyejuayénga jtsemnana. Pero ndoñe nyets tempo chana jocochájuana; y chca, ndoñe bayté Béngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantsëbuayënja y Béngbe Bëtsábeñe betsošbuáchiyama mochanjasúfrianga; chë causa, Béngbe Bëtsabe palabra cachcá chénga mochanjesonÿaye. ¹⁴ Inÿe entšanga mondmëna mo chë uhmëshangañe yojuatquécjana jenaycá. Chéngna Béngbe Bëtsabe palabra jouenana, pero quem luarentša soyéngaca oyejuayénga jtsemnana yapa jesenójuabnayana, y mallajta crocénana y ba soyénga jtsebomnama yapa jésebošana; chama y ba soyéngama yapa enócochinÿena causa, Béngbe Bëtsabe soyéngama echantsebnëtjomba y ndoñe quemochátama ntsamo Béngbe Bëtsá tojayancá. ¹⁵ Inÿe entšangna mondmëna mo chë uanguaniñe yojuatquécjana jenaycá. Chéngna Béngbe Bëtsabe palabra botamana mochanjouena; tšabe ainánaca Béngbe Bëtsabe palabriñe jtsošbuáchiyama jtseprontánëngana. Mo canÿe betiye puerte tšabá tojtseshajuancá, chénga bëtscá tšabe soyénga Béngbe Bëtsabiana mochántsama. Chca mochántsama, Béngbe Bëtsábeñe jtsošbuáchiyëse y nyetsca soyénguiñe puerte uantadënga jtsemnëse ca” — Jesús tojanabuayená.

Chë uajuinÿanëshama cuento
(Mc 4.21-25)

¹⁶ “Ndocná canÿe uajuinÿanësha juajuinÿenana, chentšana ndaye sóyeca chësha jtsëstama o jutsnësha tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiana chaotsebínÿnama. ¹⁷ Er ndocna yoiytëmena soye, ntjinÿcá queochaisoquéda, y chë entšangbiana ndótatsëmbo soye, ntsotatsëmbcá queochaisoquéda.

¹⁸ “Chcasna, botamana šmochjouena, er nda Béngbe Bëtsabe soyéngama tšabá tbojosertá, Béngbe Bëtsá echanjama cha más ba soyéngama chaboser-tama; pero nda chë soyéngama ndoñe tontsebošá, chë nÿe batšá ibosertana soyéngama bochántsebnatjëmba ca” — Jesús tojánayana.

Chë Jesusbe ndegombre pamíllanguentšënga
(Mt 12.46-50; Mc 3.31-35)

19 Chora, chabe mamá y chabe catsátanga chë Jesús yojtsemnentse tmojánashjajna, pero ndoñe imontsobena chábioye jobéconana, yapa entšanga causa. 20 As canya Jesúsbioye mentsá tbojaniyana: —Acbe mamá y acbe catsátanga shjoca montsemna y montseboše aca jinýama ca.

21 As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamíllanguentsënga ca.

Jesús chë binýia y chë béjaye bonguana yojëtsbema
(Mt 8.23-27; Mc 4.35-41)

22 Canye te, Jesús chabe uatsjëndayëngaftaca canye barquëshoye tojánamashëngo y chënga tojanéyana: “Uafjajónaye chenguana cuajna ca.”

As tmojána; 23 y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontsé béjaye chë barquëshoye jtsobuajútjiana. Y chca, chëngbiana puerte resjo yojtsemna. 24 Chora chë uatsjëndayënga tmojána Jesús jetsefšenama y mentsá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana šochtsemna ca.” Y chë binýiayana tojanëjbana y lempe bonguana yojtsatsmëna.

25 Chentsana Jesús chabe uatsjëndayënga tojanéyana: —¿Bëngbe Bëtsá tsëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mentsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binýia y chë béjaynaca joyeunayana ca!

Chë Gerasa luaroca bacna bayëja uambayá
(Mc 8.28-34; Mc 5.1-20)

26 Chentsana Gerasa ca uabaina luaroye tmojánashjajna, Galilea ndirichiñe. 27 Jesús fshantsoye tojánastjango ora, chë pueblcana canye entšá chábioye tojánabo. Cha ya bayté bayëjbe juabna yojtsebomna, ndocna entšayá yonjanichëtjona; y yebniñe ndoñe yonjaniyena, sinó obanëngbe cuevëshënguenache. 28 Chë entšá, Jesúsbioye tbojáninýe ora, chabe natsanoica yojoshëntsamentšiye y mentsá yojtsáyebuache: —¿Ndayá átseftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

29 Chca tbojaniyana, er Jesús tojanmandá chë bacna bayëjbe juabna chábentsana chauesebocnama. Ba soye chë bayëja yojánama chë entšá ndoñe tsabá chaotsemnama. Chë entšanga imojuamana cucuatšentsana y shecuatšentsana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mândoca entšanga ndoyena luarëngoye yojánachana. 30 Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. 31 Y chë bayëjënga Jesús tmojanimpadá, chë corente uabouana tboye ndoñe chaondíchamuama. 32 Chentsa béconana ba cotsënga imnajena, tjoca innétsosañe; as chë bayëjënga Jesús tmojanimpadá chë cotsëngbeñe jamashjnama chaualesenciama, y Jesús aíñe chca tojanalesenciá. 33 As chë bayëjënga chë entšábentsana tmojésanbocana y chë cotsëngbeñe tmojánamashjna; y chentsana, chë cotsënga batsjocana peñësëjana uafjajónayoye imojtsoshbuetše y yojtsatajo.

34 Chë cotsënga anýenënga chca yojopásama tmojáninýe ora, chentsana tmojtsanacheta y tmojána chë soye jacuéntama chë pueblca y chiñe luarenache.

³⁵ Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninýe chë entšá chë ndábentšana bayëjënga tmojtambocna, Jesusbe shecuatšentše yojtsótbemañe, entšayá uichëtjoná y chabe nyets juábnaca. Y chë entšanga chama corente imojouatjana. ³⁶ Ntsamo yojopasacá tmojáninýëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana. ³⁷ Chentšana, nyetscanga chë Gerasa luarentše oyenënga Jesúsbioye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. ³⁸ Chë entšá chë ndábentšana bacna bayëjënga tmojtambocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniyana: ³⁹ “Acbe yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nyets pueblëjana tojanacuntá ntšamo Jesús chabiama tojanmcá

Jesús canýe shembásabioye tbojanshná y tojanma Jairëbe bembetema cháuatayenama

(Mt 9.18-26; Mc 5.21-43)

⁴⁰ Jesús chë uafjajónaye chenguánoica tojtanashjango ora, nyetsca entšanga oyejuayënga tmojtanoñja, er nyetscanga chabiama imojanobátmana. ⁴¹ Chora tojánashjango canýe entšá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojshëntsamentšiyë y ibojtseimpadana chabe yebnoye cháuama; ⁴² er chë nýe canýe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entšanga chábioye imojtsojuatsëntšenaye. ⁴³ Chë entsanguentše yojtsaye canýe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayiñe yojtsepochóca, y ndocná yonjobenaye cha jáshnana. ⁴⁴ Chë shembásana stëtšoicana Jesúsbioye yojobeconá y chabe entšayá sibujua tojanábojajo. Y cachora chë oboftjajuanana ibojtsobojuána. ⁴⁵ Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatëmbayá, entšanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sënjasentë obenana átšbentšana jóbocnana, mo nda stjashna orcá ca.

⁴⁷ Chë shembása tojáninýe Jesús yojtsetátšëmbo cha tbojánbojajuama. As chora, ngmëmnyayá tojána y Jesusbe shecuatšentše yojshëntsamentšiyë; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. ⁴⁸ Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentša mandayábicocana canýa tojánashjango, y chë mandayábioye tbojaniyana: —Acbe bembe ya tontsóbana; ndoñe más chë Buatëmbayábioye matëbéyabomana ca.

⁵⁰ Pero Jesús chë soye tojanuena; as chë mandayábioye tbojaniyana: —Ndoñe matauatjana. Nýe Bëngbe Bëtsábeñe cochtsošbuáchiye y acbe bembe tšabá echántsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjajna, nýe Pedro, Juan y Santiago y chë shembásetembe bëtsëtsatna aíñe. ⁵² Nyetscanga imojtsenóbošachiye y ngmënaca

imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nñe endètsomañe ca.”

⁵³ Chë entsanga Jesúsbioye nñe imojtsáfchaye, er chënga imojtsetátšëmbo chë shembásetema obaná yojétsemnama. ⁵⁴ Chora Jesús chábioye tbojanábuacueshache y jabuache tbojaniyana: “¡Shembásetema, matètsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bètsètsata puerte ojnanánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

9

Jesús, chabe uatsjéndayënga tojanichamó, Bëngbe Bëtsabe amëndayama jábuayenama

(Mt 10.5-15; Mc 6.7-13)

¹ Chentšana, Jesús chabe bnètsana uta uatsjéndayënga tojánachembo, y mando y obenana tojanatšatá bacna bayëjënga entsángbentšana jtëbuacanama y šocanëngama jashnayama. ² Tojanichamó Bëngbe Bëtsabe amëndayama jábuayenama y entsángbioye jashnayama. ³ Y mëntšá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inñe entsëjua jenotrócama cach ndoñe. ⁴ Canñe yebnentše posada chacmojúyentšame ora, chentše šmochjoquéda inñe puebloye játantscuana. ⁵ Nderado ndayentše posada ndoñe chacmonjuyentšame, chentšana šmochjésebocana y shecuatšentša polvëshe šmochjésenstoto, chca, chëngbioye jinñanñiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjéndayënga tmojëftsanbocana y tmojána, nñetsca chë base pueblotémënguenache chë tšabe noticiënga abuayiynaye y entsanga šocanëngama áshnaye.

Herodes y Jesús

(Mt 14.1-12; Mc 6.14-29)

⁷ Jesusbiana y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, ⁸ inñyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inñyëngna canña chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. ⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sèntsuenana ca?”

Chíyeca Herodes yojtsenguaye ntšamo jamëse Jesús jinñyama.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nñe chënga jëftsëbiatšese inñoye tojtsanoñe, Betsaida ca uabaina puebloye. ¹¹ Pero chë entsanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsëtsnaye, y chë šoquënga imojtsemnëngbioye tojanashná.

¹² Ya jetiñe yojtsobiamná orna, chë bnètsana uta uatsjéndayënga Jesúsbioye tmojanobeconá y mëntšá tmojaniyana: —Chë entsanga

cuantichamuá, jóchnama y saná jonguangoñama chamotsama chë béconana pueblotémenguenache y luarënguenache; er quem luariñe ndocná quenatiyena ca.

¹³ Jesús chora tojanëyana: —Tšëngaftanga saná chëngbioye smochjacaredádaye ca.

Pero chënga tmojanjuá: —Nýe shachna tandëse y uta beónata fsëntsebomna; nýetscangbiana saná jabuámiyama nderado nda tojasna, aíñe cuanjacaredádaye ca.

¹⁴ Er mo shachna uaranga boyabásenga imnamna. Pero Jesusna chabe uatsjéndayënga tojanëyana: —Mamëndá nýetscanga chamotbiamama shachna bnëtsátsanënga ca.

¹⁵ As chënga chca tmojanma y nýetsca entšanga tmojanotbiana. ¹⁶ Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entšángbioye chamuatsatama. ¹⁷ Nýetsca entšanga tmojanse jtoshachaye nýetsá, y cabá bnëtsana uta sbarëco tmojanajutjé chë ojamnëtémëngaca.

*Pedro tojánayana, Jesús chë Cristo bétsemnama
(Mt 16.13-19; Mc 8.27-29)*

¹⁸ Canýe te, Jesús canýa Bëngbe Bëtsáftaca ibojtsencuëntaye ora, chabe uatsjéndayënga cháftaca imojtsemna. Chora tojanatjá: —¿Nda atše bétsemnama entšanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínýengna Elías ca, y ínýengna canýe Bëngbe Bëtsabe juabna oyebuambnayá tempscá mora tojtayena ca.

²⁰ As Jesús tojanatjá: —Y tšëngaftangna, ¿nda atše bétsemnama ntšamo smochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana
(Mt 16.20-28; Mc 8.30-9.1)*

²¹ Pero Jesús corente chënga tojanamëndá ndocnábeñe chama ntse-cuëntayana. ²² Y mëntšá cachabiana tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtšëjemëngcá amëndayëngbiana, chë judiëngbe bachnangbe más uámana amëndayëngbiana y ley abuátambayëngbiana uabotená jtsemnana. Entšanga mochanjóba, pero unga tianoye cha echántayena ca.

²³ Chentšana nýetsca entšanga tojanëyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriama, y cruciñe jobanámnaca. ²⁴ Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nýetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. ²⁵ Er ¿ndayama entšá buanjósërvia nýetsca quem luarentša soyënga jtsebomnana, cha pochocaná jtsemnama tojtsá y chë nýetsca tescama yomna tšabe vida tojtsoperdese? ²⁶ Er ndëmuanýe entšá, atšbiana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiana echantsëuatja, cha chabe bëtš buashinýinýaniñe chaojésabo ora, chabe Taitabe bëtš obenánaca y chabe angelotémëngaftaca

adoraná. ²⁷ Ndegombre cbéyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjéftsinýcá ca” —cha tojánayana.

Jesús inýetsá tojanobinýná

(Mt 17.1-8; Mc 9.2-8)

²⁸ Mëntsá tojanopasá: Chca palabrënga tojanoyebuambá chentšana posuftaytese, Jesús tojéftsanëbiatše Pedro, Santiago y Juan, y canýe tjoye tojánstjua, Bëngbe Bëtsáftaca jencuéntama. ²⁹ Bëngbe Bëtsáftaca ibojtsencuéntantscuana, chabe jubiá inýetsá yojtsinýna, y chabe uichëtjonëjuangá tša uafjantsëjuangá yojtsamna y tša yojtsabuashinýinýana. ³⁰ Chora uta boyabásata tbojanonýná, Jesúseftaca ibojtsencuéntaye. Chata ibojamna Moisés y Elías; ³¹ corente buashinýinýaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana. ³² Masque Pedro y chabe enutata tša ocnayënga imojtsemna, nýe imojtsefsna y tmojáninýe Jesusbe juachañe tša yojtsebuashinýinýana y chë uta boyabásata cháftaca ibojtsemna. ³³ Chë uta boyabásata Jesúsbentšana ibojoluára ora, Pedro, Jesúsbioye tbojanianyana: “Buatëmbayá, ¡tša tšabá bëngbiamana cuanmëna muentše jtsemnana ca! Mora fchanjapórma unga tambotëmënga: cánýetema acbiamana, ínýetema Moisesbiamana y ínýetemna Elíasbiamana ca.”

Pero Pedro ndoñe yontsetátšëmbo ntšamo yojtsichámuama. ³⁴ Y chca yojtsóyebuambnantscuana, canýe jantšetëshe yojóbema, y chëngbioye yojáutsbotse, y chënga chë tsoye imojtsemnama tmojáninýe ora, chë uatsjëndayënga chama imojtsauatja. ³⁵ Chora chë jantšetëshoicana canýe oyebuambnayanana tojanóbocna, mëntsá: “Mua atšbe Uaquiñá endmëna, atšbe uabuayaná; cha šmochtseyeunana ca.”

³⁶ Chë oyebuambnayanana tmojanuenentsana, tmojáninýe Jesús canýa yojtsemna. Chë uatsjëndayënga iytëca imojtsemna, y chë tempo ndocnábioye chama imonjuenaye.

Jesús, canýe basa bacna bayëjbe juabna uambayábioye tbojanshná

(Mt 17.14-21; Mc 9.14-29)

³⁷ Yëfsana, chë tjocana tmojtantsmá ora, ba entsanga tmojánbocana Jesús jajëbenguama. ³⁸ Chora, chë entsanguentsana canýe boyabása tojanontšë mëntsá uayebuáchana: —Buatëmbayá, Diosmanda atšbe uaquiñá minýe. Nýe cha atšbe uaquiñá endmëna; ³⁹ y mora, bayëjbe juabna chábioye bontsësháchichana, y nýe ndeolpe jóntsana yoyana, ataque joshachana y uayoicana shashiye jtsabocanana. Y chábentšana chë bayëja ndoñe betscó ntjésebocnana, y cuerpiñe corente maltrataná jeseboshjonana. ⁴⁰ Acbe uatsjëndayënga sënjaimpadá chë bayëja chábentšana chamuatábocnama, pero ndoñe chematobená ca.

⁴¹ As Jesús tojánayana: —¡Nýetsá ndošbuáchiyënga y bacna entsanga! ¿Bue-tayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojanianyana: —Moye chë uaquiñá mánatse ca.

⁴² Chë basa yojtsebeconá ora, chë bacna bayëja chábioye tbojanshajayé y inýe ataque tbojanëshache. Pero Jesús chë bayëjbioye tbojanácacana, chë basetëmbioye tbojanshná y chabe taitábioye tbojtanëntregá. ⁴³ Y nýetscanga puerte ojnanánënga imojtsemna, Bëngbe Bëtsá tša obenana bomná inamnama.

Jesús cachiñe tojánayana cha ibojamna jóbanana y jtayenana ca

(Mt 17.22-23; Mc 9.30-32)

Nýetsca entsanga, ndayá Jesús yojtsamama ojnanánënga imojtsemnëntscuana, chabe uatsjëndayënga cha tojanëyana: ⁴⁴ “Quem soye

tšabá šmochjouena y ndoñe chacmondébnětjomba: Chë Bëngbe Bëtsá Entšá tbojanbemá entšangbe cucuatšiče mochanjáboshjona ca.”

⁴⁵ Pero chënga ndoñe yontšósertana ntšamo Jesús yojtsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?

(Mt 18.1-5; Mc 9.33-37)

⁴⁶ Chë tempo, chë uatsjéndayënga tmojanontšé enatsëtsnayana, nda chë más uamaná bëtsemnama. ⁴⁷ Jesús yojtsetátšëmbo ntšamo chënga imojtsejuabnayanama; asna, canye básetema tbojánishache, chabe juachaca tbojántbema, ⁴⁸ y chëngbioye tojanëyana: “Nda átšbeñe ošbuachiyá bëtsemnama, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chýyeca, tšëngaftanguentše chë más nduamaná, cha chë más uamaná entsemna ca.”

Nda bëngbe contra ndoñe tontsemná, bëngaftaca jtsemnana

(Mc 9.38-40)

⁴⁹ Juan, Jesúsbioye tbojanianana: —Buatëmbayá, bënga fsënjinye canye boyabása y cha aca jótšëmbonëse, entšángbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjësauyaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojanëcácana

⁵¹ Jesús celoye jtama yojtsobeco ora, nyets añémoca cha yojtsejuabnaye Jerusalenoye jama. ⁵² Natsana báseftanga tojanichamó, y chënga tmojána canye base pueblotémoye Samaria luaroca, posada chabiamana janguangoñama; ⁵³ pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebioye. ⁵⁴ Chabe uatsjéndayata, Santiago y Juan, chë soye tbojáninye ora, Jesús tmojanianana: “Bëngbe Utabná, ¿quetseboše bëndata fchaimandá celocana ñeshe chaótsatše y quem entšanga chaotsapochóca ca?”

⁵⁵ Pero Jesús yojobuértana y chátbioye tojtsanëcácana, chca juabna bomna causa. ⁵⁶ Chentšana chënga inye pueblotémoye tmojtsanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canye boyabása Jesúsbioye tbojanianana: —Atšbe Utabná, atše sëntseboše aca juastana ndémoye chacojtsá choye ca.

⁵⁸ Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

⁵⁹ Jesús inye entšábioye tbojanianana: —Smasto ca.

Pero cha tbojanjuá: —Atšbe Utabná, šmolestenciá atšbe taitá chjshesabotbontsañe ca.

⁶⁰ As Jesús tbojanianana: —Chë Bëngbe Bëtsabiamana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe. Acna, motsa y Bëngbe Bëtsabe amëndayama entšanga cochjabuayená ca.

⁶¹ Inyana Jesúsbioye tbojaniana: —Atsbe Utabná, atse séntseboše aca juastama, pero šmolesenciá natsana atsbe pamíllangbiana jaisodiósoftama ca.

⁶² As Jesús tbojaniana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntsoservénana; er cha jtsemnana mo canye arayacá, chë tojtsetrabája ora, stëtsoye tojtsaisantješncá ca.

10

Jesús canyëšëfta bnëtsana y uta entsanga tojanichamó Bëngbe Bëtsabe soyëngama jábuayenama

¹ Chë soyënga chentšana, Bëngbe Utabná Jesús inye canyëšëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

² Mëntšá chënga tojanëyana: “Canyë bëts jajañe bëts cá játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chë jaja saná játbanama. Cachcá, quem luarentse bëts cá entsanga montsemna Bëngbe Bëtsábioye nduabuátmënga, y chëngbioye chabiana abuayinyayënga nye báseftanga. Chíyeca, Bëngbe Bëtsá moimpadanga ba abuayinyayënga chauichamó quem entsanga chábioye júbuajama.

³ Motsajna; šmochjinye, atse tšëngaftanga cbontsichamná mo oveshënga cuenta, tjañe quešëngbeñe. ⁴ Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisënobiamnaye.

⁵ “Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca’. ⁶ Y chë yebnentše chca juabna bomna entsanga tmomnësna, chë tšabiana ndegombre chentše echántsemna; pero ndoñese, chca tšabiana chentše ndoñe queochátsmëna. ⁷ Canyë yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canyë pueblentše nye inye y inye yebnënguenache ndoñe matajnana.

⁸ “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá; ⁹ chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’. ¹⁰ Pero canye pueblentše chašmojáshjango y ndoñe chacmonjúbuaja, chentša tsashëngoye šmochjábocana y mëntšá šmochjayana: ¹¹ ‘¡Chë tšëngaftangbe pueblentša polvëshe, chë bëngbe shecuatšënguñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetatšëmbo chë Bëngbe Bëtsabe amëndayana tšëngaftangbeñe entsemnama ca.’ ¹² Ndegombre cbëyana, quem luare jopochócama te, chë luarentša entsángbioye Bëngbe Bëtsá puerte jabuache echantsacastigaye, y Sodoma puebloca bacna entsángbioye ndoñe nya nyetsá jabuache ca” —Jesús tojánayana.

*Chë nduauenana entsanga
(Mt 11.20-24)*

¹³ “¡Tša lastema Corazín puebloca entsangbiana! ¡Tša lastema Betsaida puebloca entsangbiana! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entsayangaca matmëntopormanga y

jatinÿashiñe matmënjotbiama. ¹⁴ Pero ntšamo entšanga tmojamama, tšabá o ndoñe tšabá bétsemnama jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entšangbe castiguama. ¹⁵ Y tšëngaftanga, Capernaum pueblentša entšanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infernoye cmochantséssetjango!

¹⁶ “Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canÿsëfta bnëtsana y uta entšanga tmojtanashjajna

¹⁷ Chë canÿsëfta bnëtsana y útatna Jesús yojtsemnoye tmojtanashjajna, puerte oyejuayënga; y chábioye mëntšá tmojaniana: —¡Bëngbe Utabná, aca jótšëmbonëse, chë bacna bayëjëngnaca šonjoayauná ca!

¹⁸ Y Jesús tojanëyana: —Ndegombre. Y tšëngaftanga Satanásbioye chca šmontseyëñjaná ora, entsemna mo Satanás celocana canÿe tcuinÿcá jtsotsatsana stjinÿcá. ¹⁹ Atšna obenana tcbonjatsatá mëtscuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñjanama, tšëngaftanga ndocá ntjapasacá. ²⁰ Pero móyejuanga, ndoñe chë bacna bayëjënga chacmóyaunama obenana šmojtsebmnama, sinó tšëngaftangbe uabaina celoca ya yojtsábemanama, er tšëngaftanga chë nÿetsca tescama yomna tšabe vida šmochántsebmna ca —cha tojanëyana.

Jesús puerte tojanoyejuá (Mt 11.25-27; 13.16-17)

²¹ Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nÿe batšá tatsëmbënga tconjanÿanÿé, chë tša tatsëmbënga y osertánëngbiana tcojaiytëme soyënga. Aíñe, chama cbontsadorana, Taita, aca chca chaotsemnama tcojábošenayeca.

²² “Atšbe Taitá lempe chca šonjatsetá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndëmuanÿëngbioye chë Uaquiñá tojtseboše nda chë Taitá yomnama jinÿanÿiyama, chëngnaca chë Taitábioye mochantsábuatma ca.”

²³ Chentšana, Jesús chabe uatsjëndayëngbioye tojanobuértana y nÿe chëngbioye tojanëyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsobenënga! ²⁴ Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entšabiama cuento

²⁵ Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nÿetsca tescama yomna tšabe vida jtsebmnama ca?

²⁶ Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

²⁷ Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

²⁸ Chora Jesús tbojaniyana: —Tšabá šconjojuá. Chca cochtsama y chë nyetsca tescama yomna tšabe vida cochántsebomna ca.

²⁹ Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndëmua entšánaca yomna ca?

³⁰ As Jesús tbojanjuá: —Canÿe, Jerusalenocana Jericó benache canÿe entšá yojtsetsamá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatóñënga, y chë entšá batsá obaná imojéseboshjona. ³¹ Ndeolpe, chë benachëjana canÿe judiëngbe bachna yojtsachnějuana. Chë entšábioye ibojinÿe ora, nÿe chabuacá yojtsëchnënguañe. ³² Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnějuana; y chë entšábioye ibojinÿe orna, nÿe chabuacá yojtsëchnënguañe.

³³ “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia. ³⁴ Chábioye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayiñe ibojëftsenjayiye, canÿe yebnoye posada uyentšamianoye ibojuánatse, y chentše chábioye ibojëftsinÿena. ³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nyetsá, y chë posada nduíñbioye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiama chacojenábojafjonasna, mëjana chaitísachnějuana ora, cbochjabáisabuenaye ca.’ ³⁶ Y chcasna, ¿chë unguentšana nda cmojtsinÿana chë entšabiama yojtsejuabnaye cha cachacá entšá inamnana ca?”

³⁷ Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniyana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachëjana yojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentše tbojanofja. ³⁹ Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; ⁴⁰ y chëntscuana Marta ba soyënga yojtsama. Cha Jesúsbioye tojanobeconá y tbojaniyana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

⁴¹ Chora Jesús tbojanjuá: —Marta, Marta, bëtscá soyëngama contsenócochinÿena y contsenomantšná; ⁴² pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

11

Ntšamo Bëngbe Bëtsáftaca cuanjencuénta (Mt 6.9-15; 7.7-11)

¹ Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayënguentsá tbojaniyana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjendayëngaftaca tojanmca ca.

² Y Jesús tojanëyana: —Bëngbe Bëtsáftaca chašmojtsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

³ Mënté šmiyatšatá, cada te šnetsëjaboto tandëše.

⁴ Bacna soyënga fsënjama: šmotsaperdónaye; er bëngnaca nyëtscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocochëngo ora, šcochjujabuache chca nde-nobuíyama.

⁵ Jesús mëntšánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëse šmotsemná, ⁶ er canÿe atšbe amigo yebnoca tonjáshjango y tondaye quetsátsbomna cha jonánjama ca.’

⁷ Ndegombre, cha tsocana tcmojojuá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëse jámnana ca.’ ⁸ Ndegombre, chë bacó ndoñe tonjotsbaná chë tandëse jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. ⁹ Chcasna, atše cbëyana: Smochjotjañe y Bëngbe Bëtsá cmochanjátšataye; šmochjáanguango y šmochanjínÿena; šmochjachembo y cmochanjébëtafjo. ¹⁰ Er ndánaca ndayá tojtsotjanañá, jóyëngacñana; y tojtsen-guá cha, jónÿenana; y nda tojtsechembuanábioye jebiatëfjuana ca.

¹¹ “¿Nda tsëngaftanguentšana nantsobena, taitá tojtsemnëse, cachabe uaquiñábioye canÿe mëtšcuaye jatštayana, beona tbojtsotjanañe ora; ¹² o canÿe alacránashe joyiyana, shëmnëbé tbojtsotjanañe ora? ¹³ Y chca, tsëngaftanga, bacna soyënga amënga, tsëngaftangbe basetemëngbioye tšabe soyënga jatšatayama šmojtsamanëse, ¡más chë celoca Taitá, chë Uámana Espíritu echanjátšataye, chca tmojtsotjanañëngbioye ca!” —Jesús tojánayana.

Fariseunga tmojánayana Jesús Satanásbentšana obenana tojanóyëngacñe ca (Mt 12.22-30; Mc 3.20-27)

¹⁴ Jesús canÿe entšábentšana canÿe bacna bayëja tbojtanábocna. Chë bayëja ndëbiá chë entšábioye tbojánbema, y chábentšana tojésanbocna ora, chë ndëbiá tojtanontšé oyebuambnayana. Y chë entšanga chama imojenjnaná; ¹⁵ pero báseftanga imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatšetá chë bayëjenga chau-atëbuacnama ca.”

¹⁶ Y ínÿenga, Jesús jisháchichiyamna tmojanimpadá canÿe bëts soye chaoma, jinÿanÿiyama cha celoca obenana inabomna o ndoñe. ¹⁷ Pero Jesús yojtsetátšëmbo ntšamo chëngbe juabna bëtsemnana. As tojanëyana: “Canÿe amëndayábentše entšanga tmojtsenojatá y tmojtsenáyase, cachënga jtsen-pochócana; y canÿe yebnentše oyenënga tmojtsenojatá y tmojtsenáyase, chë pamíllanga tšabá nyëts tempo ndoñe quemochátsmëna. ¹⁸ Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebomnana? Chca séntsichamo, er tsëngaftanga šmotsichamo Beelzebube obenánaca chë bayëjenga stsatëbuacana ca; ¹⁹ pero chca ndegombre tojtsemnëse, ¿ndábeyeca tsëngaftangbe usetonënga obenana imojtsebomna chë bacna bayëjenga jtëbuacnama? Chiyecna, cachënga montsinÿinÿná ntšamo ndegombre yomnana, y tsëngaftanga ndoñe ndegombre soye šmotsichámuama. ²⁰ Y atšna, Bëngbe Bëtsabe obenánaca entšángbentšana chë bayëjenga sëndëtëbuacana; y chë soye entsinÿinÿná, Bëngbe Bëtsabe amëndayana tsëngaftangbioye tojóshjanguama.

²¹ “Canÿe corente añemo bomna entšá, bëtská ármangaca chabe yebna tojtsinÿenëse, chë tsoca tomna soyënga ndoñe ntjotsana. ²² Pero inÿa chabiama más añemo bomná tojabo y tbojabetseyënjaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

23 “Nda ndoñe átseftaca tontsemná, atšbe uayayá jtsemnana. Y nda átseftaca ndoñe tontsetrabája, chana atšbe contra jtsetrabájayana ca” —Jesús tojánayana.

Ndayá inopása chë bacna entsángaftaca

(Mt 12.43-45)

24 “Canye bacna bayëja canye entsábentsana tojësebozna ora, bojojo luarënguenache chë bayëja jtsanana, ndayentse jóchnama onguayiñe. Ndoñe tonjinyena ora, jenójuaboyana: ‘Atšbe oyenoye, chë ndayentsana sënjëftseboznoye chanjesshécona ca.’ 25 Y choye tojtashjango ora, jinýenana lempe tšabá cha jtesamashënguama, mo tsjajniñe y prontániñe cuaftsemncá. 26 Chora chë bayëja jana y inye canýsëfta bayëjenga, chabiamá más opëjenga jobiatsana, nyetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

Chë ndegombre oyejuayana

27 Jesús chë soyënga yojsichamëntscuana, entsanguentse canye shembása yoyuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

28 As Jesús tbojanianana: —Más oyejuayana bomnëngna, chë Bëngbe Bëtsabe palabra tmojouena y chca tmojsamënga ca.

Chë bacna entsanga Jesús tmojanimpadá canye bëts soye chaoma, chabe obenana jinýama

(Mt 12.38-42; Mc 8.12)

29 Entsanga más imojtsójoye Jesús yojtsemnentse, y Jesús tojanontsé jáuyanana: “Morsca entsanga puerte bacna entsanga; chënga montsotjanañe atse canye bëts soye chaima atšbe obenana jinýama, pero ndoñe chca quemochátinye, sinó nye chë ndayá yomna mo chë Jonásoftaca tojanopasá soycá. 30 Er chca, ntšamo Jonás Nínive puebloca entsanga canye bëts soye tojaninýanýe Bëngbe Bëtsá obená yomnama chamotsetatšëmbuama, chë Bëngbe Bëtsá Entsá tbojanbemánaca entsinýanýná morsca entsángbioye, Bëngbe Bëtsabe amëndayana tojóshjanguama. 31 Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsángbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentse entsemnana, Salomonbiama más uamaná endmëna. 32 Chë entsanga tšabá o ndoñe tšabá tmonjamama jayanama te, chë Nínive bëts puebloca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayinye ora, tmojanoyeuná y chë tšabe benache tmojtanishache, y chë mora muentse entsemnana, Jonasbiama más uamaná endmëna ca” — Jesús tojánayana.

Chë cuerpama uajuinýanëshá

(Mt 5.15; 6.22-23)

33 “Ndocná canye uajuinýanëshá juajuinýenana, canye iytemena luaroye juajájuama, ni canye cajonëshé tajsoye, sinó canye tsbanana luaroca juajájuama, chca, chë luaroye amashjuanëngbiama chaotsebínýnama. 34 Acbe bominye tšabá totsomñëse, acbe cuerpama mo canye uajuinýanëshacá jtsemnana; chíyeca aca jtsoobenana, ntšamo tcojtsamcá chë bominyeca jtsonýayana. Chë bominye ndoñe tšabá tontsemnësna, chë bominye tondaye ntsoobenana jamana, ntšamo tcojtsamcá chacobená jinýama. Cachcá, acbe

ainaniñe tšabe juabnënga tcojtsebomñese, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomñesna, lempe ntšamo chacojtsamcá ndoñe tšabá queochátsmëna. ³⁵ Cuedado šmochtsebomna, tšëngaftangbe ainaniñe nýe tšabe juabnënga chaotsemnama, chca, lempe ntšamo chašmojtsamcá tšabá chaotsemnama, y bacna juabnënga ndoñe chaondëtsemnama. ³⁶ Chcasna, lempe ntšamo šmojtsamcá tšabá tojtsemñese y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canýe uajuinýanësha puerte tšabá tojtsebinýnacá ca” —Jesús tojánayana.

Jesús chë fariseungbiana y ley abuátambayëngbiana tojánayana, chënga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canýe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. ³⁸ Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama. ³⁹ Pero Bëngbe Utabná tbojaniana: “Tšëngaftanga fariseunga šmondmëna mo entšangcá ndëmuanýenga chë tazëšënga y šcnenënga shjoicajana jtsóbojabiana, pero tsoyna nýe cachcá jonýayana. Tšëngaftanga becá jtsamana entšangbiana mo tšabengcá jtsinýnama; pero tšëngaftangbe ainanentše jútjena entsemna nýe jtsatbëbanama y bacna soyënga jtsamama juabnëngaca. ⁴⁰ ¡Juabna ndbomnënga! Tšëngaftanga ndoñe šmondétatsëmbo, chë tšëngaftangbentsana entšanga ndayá jinýama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámana ndayá tšëngaftangbe ainanoye yomna soyënga, y chë entšangbe delante šmojama soyënga. ⁴¹ Tšëngaftanga cmontsamna, chë soyënguiñe ndayá ainaniñe yomnentšana ínýengbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcnayana chë jajañentša sananga bnëtsanentšana canýe soye nýetsá, y chë binche matatëmënguentshana menta, ruda y nýetsca binche matatëmënguentsánënaca; pero nýe batšá jtsamana chë nýetscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inýe tšabe soyënga ntjajbanacá ca.

⁴³ “¡Tša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nýa puerte respétoca entšanga chacmotsacheuanayama ca.

⁴⁴ “¡Tša lastema tšëngaftangbiana! Smondmëna mo obanënga uatbontsaniñcá, ndoñe ntsinýnana, y entšanga ntsetatsëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entšangbiana ndoñe chca quešmátinýna ca.”

⁴⁵ Jesús chca tojánayana ora, canýe ley abuatambayá tbojaniana: — Buatëmbayá, chca palabrënga contsoyebuambná ora, bëngbiámnaca ndoñe tšabá quecátichamo ca.

⁴⁶ Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canýe entšá, couáybioye canýe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšangbioye jtsamëndayana bëtscá mandënga

chamotsocumplínama, pero cach tsëngaftanga ni mo batsatémnaca jtsamana chë mandënga jtsocumplínama ca.

⁴⁷ “¡Tša lastema tsëngaftangbiam! Tsëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnana, chëngbe cuevëshënga jtsatspórmayëse; pero chë mo chëngcá, canye buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tsëngaftangbe bëts taitanga tmojtsanëbaye. ⁴⁸ Chca jtsamëse, tsëngaftanga šmontsinÿanÿná, ntšamo chë bëts taitanga tmojanmcá tsabá yomna ca tsëngaftanga šmojtsejuabnama, er chënga chë oyebuambnayëngbioye tmojtsanëbaye y tsëngaftangna chëngbe cuevëshënga jtsatspórmayana.

⁴⁹ “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiamabuayinayënga, y báseftangbioye mochantsëbaye y ínÿengbioyna mochantsëcamiye ca.’ ⁵⁰ Y chca, nÿets castigo morsca entsángbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; ⁵¹ Abëlbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entsángbeñe nÿets castigo chaotsemnana ca.

⁵² “¡Tša lastema tsëngaftangbiam, chë ley abuátambayënga! Tsëngaftanga jtsamana, Bëngbe Bëtsabe soyëngama jtsetatšëmbuama entsangbiam yapa totcá chaotsemnana. Cach tsëngaftanga ndoñe quešmatobena chë soyëngama tsabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

⁵³ Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtšaisebocana ora, tmojanontšé chábioye becá tjanayana, y imojtsama ba soyëngama chaóyebuambama, ⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

12

Jesús, chë bacna entsanga ntšamo ndegombre tmojuabnacá ndinÿinÿayëngbiam tojanabuatambá

¹ Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatséntšenaye. Chora Jesús tojanontšé jóyebuambayama, y natsana chabe uatsjéndayëngbioye tojanëyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tsabá tontsemncá chamotsamama. ² Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsotatšëmbcá queochaisoquéda. ³ Chíyeca, chë mora nÿe tsëngaftangbiam šmojtsichamo soyënga, chë entsangbiam mo ibetiñcá cuaftsemna soyënga, entsanga chama botamana mochanjátatšëmbona. Y chë iytëcana šmojtsichamo soyënga, nÿetsca entsángbioye mochántsbuayinayey, mo nda canye yebnentša tsbanánocana noticiënga tojtsayebuachcá ca” —cha tojanëyana.

Nda ndegombre cuantsebiauatja
(Mt 10.26-31)

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntso benana. ⁵ Cbochanjabuayená ndábioye cmojt-samna jtsebiauatjana: šmochtsebiauatja chë nda vida jtsabuajuánama y chentšana infernoye jtsichámuama obenana endbomnábioye; chábioye cocayé šmochtsebiauatja ca.

⁶ “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. ⁷ Y tšëngaftangbiana Bëngbe Bëtsá lempe endétatšëmbo, y bueta stjënëjënga tšëngaftangbe bestšašinë yomnámnaca. As ndoñe matauatjëngana; tšëngaftanga ba jaja shloftšëngbiana corente más šmonduámana ca” —Jesús tojánayana.

Ndabiama Jesucristo yochjayana chabe entšá yomna ca
(Mt 10.32-33; 12.32; 10.19-20)

⁸ “Atše chëyana, nda atšbe entšá yomna ca entšangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; ⁹ pero nda entšangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

¹⁰ “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espíritbiana ndoñe tšabá tontsichamuábioyna ndoñe.

¹¹ “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenëuyanama, o ndayá šmochjayanama; ¹² er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojt-samna ora ca” —Jesús tojánayana.

Entsabiama resjo yomna, nÿe yapa bomnana jesejuabayana

¹³ Chentšana, canÿa entšanguentšá Jesúsbioye tbojanianana: —Buatëmbayá, atšbe catšata momandá chë átšbioye otocana soyënga chašuatoyé ca.

¹⁴ Y Jesús tbojanianana: —Bacó, ¿nda atše šojábema tsëndatbe ujatanayá ca?

¹⁵ Y entšángbioye tojanëyana: —Smochjinÿe y cuedado šmochtsebomna chë nÿe yapa soyënga jtsebomnama bošama; er masque bëtscá soyënga chašmotsóbomñe, chca ndoñe quešmochátstatšëmbo aínë tšabe vida taišmochjónÿenama ca.

¹⁶ Y chora mëntšá tojanacuntá: “Inamna canÿe bomna entšá, y chabe fshantsënguiñe tša jaja saná yojtso podena. ¹⁷ Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtso bocjayama ca.’ ¹⁸ Y mëntšá yojenianana: ‘Chë grano uaquëcñaye yebnënga chantsendbiana, y inÿe más bëts yebnënga chanjëtšjebo, y chiñe nÿetsca atšbe jaja saná chantsóbocjaye y nÿetsca atšbe soyëngnaca. ¹⁹ Y chora atše chjenianana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ ²⁰ Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’ ”

²¹ Y Jesús chora tojánayana: “Chca endbopása chë nÿe chabiamna bomnana tojtsejuabá y bëtsá Bëngbe Bëtsabe soyënga ndoñe tonjëftsashjacháftaca ca.”

Bëngbe Bëtsá chabe básenga jtsanÿenana
(Mt 6.25-34)

²² Chentšana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinÿena ndayá šmochjase o šmochjofsiye vida jtsebomnana, ni ndaye entšayá šmochjuíchëtjuama cach ndoñe. ²³ Ndegombre, vida chë sanama más enduámana y cuerpo chë entšayama más. ²⁴ Chë ftsenga shloftšënga šmochjanÿe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatsatnayana. ¡Y tšëngaftanga chë ftsenga shloftšëngbiama puerta más šmonduámana! ²⁵ Masque chca endmëna, masque canÿa tša tojesenócochinÿena, ¿ntšamo nanjobenaye jamana, chë ntsachetšá vida yochtsebomnentsana canÿe hora vida más jabotiyana? ²⁶ Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama šmochjatenócochinÿena?

²⁷ “Šmochjuinÿe chë lirio uantšefjushangá jtsajuajnana: ndoñe ntse-trabájayana, ni ntsehabiamnayana. Pero atše cbéyana, ndegombre ni mo rey Salomón, nÿetsca chabe bomnánaca, chë lirio uantšefjushangacá nÿetšá botamana quenjatspormana. ²⁸ Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentsanga Bëngbe Bëtsábeñe nÿe batšá ošbuáchiyënga! ²⁹ Chíyeca, ndoñe šmattsenócochinÿena ndayá jasama o jofšiyama onguayiñe; ³⁰ er chë soyëngama quem luarentša entšanga mondbétsenocochinÿena, pero tšëngaftanga ndoñe. Tšëngaftangna canÿe Taitá šmondobomna, y cha endëtatsëmbo ndayá cmëjabótama. ³¹ Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtšëjaboto soyënga nÿe šmochanjóyëngacñe ca” — Jesús tojánayana.

Chë celoca bomnana
(Mt 6.19-21)

³² “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuinÿnana chabe amëndayana tšëngaftanga jatšatayama. ³³ Lempe ntšamo šmobomncá šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴ er chë ndayentšë tšëngaftangbe bomnana tojtsemnentsa soyëngama, ainánaca tšëngaftanga šmochántsejuabnaye ca” — Jesús tojánayana.

Bëngbe Utabná yochjésabama jtseprontánana

³⁵ “Mo chë oservënënga, chë entšayá uichëtjonënga y uajuinÿananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. ³⁶ Chca, tšëngaftanga šmochántsemna mo chë oservënënga, tšabe entšayaca bopormánënga y uajuinÿananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservënënga jtebiatëfjuama. ³⁷ Puerte oyejuayënga chë oservënënga, chë nduiño tojtashjango ora tmojtsefšnënga. Ndegombre

cbéyana, chora chë mandayá sëndorëche echantásnaye, mesëshentše chë oservénënga echanjátbiama, y saná echanjuuatšiye. ³⁸ Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye. ³⁹ Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. ⁴⁰ Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená
(Mt 24.45-51)*

⁴¹ Pedro, Jesúsbiye tbojanayana: —Utabná, ¿chë tconjayana cuento nýe bëngbiama o nýetscangbiama yochtsemna ca?

⁴² Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nýets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama, y jasama tojtsemna ora chaújuatšema. ⁴³ Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. ⁴⁴ Ndegombre cbéyana, chë nduiño chábioye bochanjaimpáda nýetsca chabe soyënga chabotsinýeñama. ⁴⁵ Pero chë oservená, chabe nduiño betseco ndoñe yochantabo ca tojtsejuabná, y tojontsé chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, ⁴⁶ cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. ⁴⁸ Y chë oservená, ntsetatšëmbcá ntšámncaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëtš trabajo tmojabonýébioyna jauyanana, más bëtš trabajo chaoma ca.”

*Jesube causa, entšángbeñe más jtsentsjanayana
(Mt 10.34-36)*

⁴⁹ “Atše sënjabo quem luariñe jabojuinýiyama, y jtša sëntseboše malaye ya ctsangbototjuana! ⁵⁰ Atše šontsemna puerte jasúfriana, y ipuerte ngménaca sëntsobátmana chca chaotsemnana! ⁵¹ ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsejtsjanaye. ⁵² Er mëntescana, canýe yebnentše, shachnënga ndoñe quemochátenýeyunana, únganga útatbe contra y útata úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra, y bembë bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

*Ndaye tempo yochtsemnana ntšamo inétsotatšëmbo
(Mt 16.1-4; Mc 8.11-13)*

⁵⁴ Mëntšánaca Jesús entšanga tojanéyana: “Tšëngaftanga, chë jantšetëshënga shinýe uenatjëmbambanoicana tojóboचना šmojinýe ora šmondbétsichamo ‘echanjuatfé ca’, y ndegombre chca jopásana. ⁵⁵ Y tsmoicano tojtsebínýia orna, tšëngaftanga šmondbétsichamo ‘echanjojënýana ca’, y ndegombre chca

jopásana. ⁵⁶ ¡Bacna entsanga, chë ntšamo ndegombre šmojuabnacá nd-injinyayënga! Ntšamo quem luarentše yochtsemnama, ndayá celoca šmojinýama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinýanýnama ca?” —Jesús tojánayana.

Chë uayayáftaca natjëmbana jtenbemana
(Mt 5.25-26)

⁵⁷ “¿Ndáyeca cach tšëngaftanga ndoñe šmondábáyana ndayá tšabá bëtsemnana? ⁵⁸ Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cárceloye cmochanjutame. ⁵⁹ Ndegombre cbëyana, chentšana ndoñe quecochtëtsbocna, nyets ndebénana candesopagantscuana ca” —Jesús tojánayana.

13

Bëngbe Bëtsabe benache jtishachana

¹ Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojt-sanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

² Y Jesús chënga tojanéyana: “¿Tšëngaftanga šmojtsejuabná, chë Galileoca entsanga chca tmojapasá, chë luarentša inye boyabásengbiama chënga más bacna soye amënga imojamna causa ca? ³ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴ O, ¿tšëngaftanga šmnëtsejuabnaye, chë Jerusalenentša bnëtsana posufta entsanga tmojanóbanënga, chë Jerusalenoca binche uafjónaye Siloé béconana tsbanana jebna soye tojtšanáshajaye ora, chënga imojamna chë inýenga Jerusalenentše oyenëngbiama más bacna soyënga amënga ca? ⁵ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

Chë ndëshajona higo betiyama cuento

⁶ Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjinyëna. ⁷ Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinyëna; chíyeca, motsetëtše. ¿Ndayama quem jajañe yochjátsjena ca?’ ⁸ Pero chë jajañe inýená ibojauyana: ‘Bacó, inye uata cachcá monýá, fshantse chanjáboplojua y uanguanëshe chanjabotboto. ⁹ Nderado chca jamëse, nanjashájona; y ndóñesna, chora cocayé cuantsetëtše ca.’ ”

Jesús canýe ochnayté, canýe tsëštjona shembásabioye tbojanshná

¹⁰ Canýe, canýe ochnayté Jesús yojontšë entsanga jabuátambana, chë judiëngbe enefjuana yebnentše, ¹¹ y chentše yojtsemna canýe shembása; cha ya bnëtsana posufta uata yojtsešoca. Canýe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. ¹² Jesús chábioye tbojáninyë ora, tbojanchembo y mëntšá tbojaniyana: “Batá, mora ya ndoñe šocá quecátsmëna ca.”

13 Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšë Bëngbe Bëtsábioye jëtschuayama. 14 Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entšanga tojanéyana: —Chnënguana te comna jatrabájama; chora šmochjabo jenóshnama; ochnaytese ndoñe ca.

15 Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinÿinÿnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? 16 Chcasna, quem shembása, canÿa Abrahábentšana entšá, y Satanasbe causa bnëtsana posufta uata šocá yojtsemna, ¿ndoñe tšabá yondmëna canÿe ochnayté chë bayëja jtsebojuánana ca?

17 Jesús chca tojánayana ora, chabe uayayënga imojtsëuatja, y nÿetsca entšanga imojtsóyejuaye Jesús tša bëts soyënga yojtsamama.

Chë mostaztiye jenayama cuento

(Mt 13.31-32; Mc 4.30-32)

18 Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? 19 Endmëna mo canÿe mostaza jénaye, canÿe entšá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

Chë levadurama cuento

(Mt 13.33)

20 Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? 21 Endmëna mo levadurcá; canÿe shembása chana jenájuaabana unga medida arninÿañe, nÿetsana chauabochama ca.”

Chë base utëntšá bësásá

(Mt 7.13-14, 21-23)

22 Jerusaleno ye benache, Jesús entšanga yojtsabuátambaye bëts pueblënguiñe y base pueblotëmënguiñe. 23 Canÿa chábioye tbojantjá: —Bëngbe Utabná, ¿ñye báseftanga imomna chë atsebácanënga mochtsemnënga ca?

Y Jesús tbojanjuá: 24 —Puerte šmochtsentšena chë base utëntšá bësásajana jamashjnama; er ndegombre cbëyana, banga mochántseboše chëjana jamashjnama, pero ndoñe quemochatobenaye. 25 Chë yebnentša nduiño chaojotsbaná y chë bësásá chaojtatámentšana, tšëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatsëmbo ndëmoquënga tšëngaftanga šmomnana ca.” 26 Chora tšëngaftanga šmochanjontšë ichámuana: “Acaftaca cánÿiñe fsënjase y fsënjofsé, y aca bëngbe tsáshenañe tconjabuatambá ca.” 27 Pero cha cmochanjójuaye: “Ya tcbonjáuyana, ndëmoquënga šmomnana ndoñe tstátšëmbo ca. ¡Atšbentšana mojuánanga, bacna soyënga amënga ca!

28 “Chora chentše puerte šmochanjenóbošachna y tsetšanama juatsašënga šmochantsenofhtëšjojnaye, Abraham, Isaac, Jacob y nÿetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chašmojinÿe ora, y tšëngaftanga chentšana cmochtëbuacanama. 29 Y shinÿe bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiama Bëngbe Bëtsabe amëndayentše. 30 Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalenentša entsangbiama
(Mt 23.37-39)*

³¹ Jesús chë soyënga tojanëyana ora, básefta fariseunga tmojánashjajna y tmojanियana: —Muentšana motsatoñe; Herodes entseboše aca jtsóbama ca.

³² Y Jesús tojanéjua: —Motsajna y šmochjauyana chë corente studio bomná, mo tjañe mesetcá: “Minÿe, mënté y yëfse entsángbentšana bacna bayëjenga sëndëtëbuacana y šoquënga sëndáshnaye, y baseftaytesna chanjapochóca ca.” ³³ Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canÿa Bëngbe Bëtsabe juabna oyebuambnayá Jerusalenentša chábuañe chaóbana ca.

³⁴ “¡Jerusalenentša entsanga, Jerusalenentša entsanga, tsëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtšbéngaca jtsatëchënganjana jtsëbáyama! ¡Bueta soye atše sënjábošena tsëngaftanga átšbioye júbuajama, mo canÿe tuamba chabe bolletotémënga juatëngmiáša tajsoye cuaftajayecá, pero tsëngaftanga ndoñe chešmátsbošena! ³⁵ Y šmochjinÿe, mora atše cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y éañe tcojeseboshjoncá. Y ndegombre, tsëngaftanga morscana ndoñe más atše quešmochátinÿe; y atše šmochántinÿe, chë: ‘¡Corente bendición bomná, Bëngbe Útabnabe obenánaca tojabá ca!’ chašmojtsichamo ora ca” — Jesús tojánayana.

14

Jesús, canÿe uafshachanáncá šocábioye tbojanshná

¹ Canÿe ochnayté, Jesús tojána jasama fariseungbe canÿe amëndayabe yebnoye; y chë fariseunga yejuana imojtserreparana, er ndayá Jesús nanjama.

² Chéntšnaca, chabe delante yojtsemna canÿe entsá uafshachanáncá šocá.

³ As Jesús chë ley abuatambayënga y fariseunga tojanatjá: “¿Quenlesenciana canÿe ochnayté canÿe šocá jáshnama o ndoñe ca?”

⁴ Chëngna ndocá tmonjanjuá. As Jesús chë šocábioye tbojánishache, tbojanshná y tbojanियana chaotsatoñe ca. ⁵ Y chë fariseunga tojanëyana: “¿Nda tsëngaftanguentsá, nderado chabe uaquiñá o uacná canÿe tboye tojtsótsatše, cachora ndoñe nanjá jetsejátsëcama, masque ochnayté totsomñëse ca?”

⁶ Y chëngna ndocá tmonjanobená cha jojuana.

Chë casamentoye ófjanënga

⁷ Jesús tojáninÿe ntšamo chë ófjanënga quëfseroye imojtsachnëjuana jotbiamama; as mëntšá chënga tojanabuayená: ⁸ “Canÿe casamentama nda chacmojojfa ora, quëfseroca ndoñe catjót'bema, er nderado inÿe ofjaná achiana más uamaná ústonoye nandaboye; ⁹ y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. ¹⁰ Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše tmojtsetbiámanëngbiama uamaná cochántsemna. ¹¹ Er nda cachá bëtsá tojtsenobiámná, nduamaná mochántsebema; y nda cachá nduamaná tojtsenobiámná, aíñe bëtsá mochanjábema ca.”

¹² Y chë tbojanofja entsábioynaca Jesús mëntšá tbojanियana: “Fiesta chacojama o sananga chacojtsebomna ora, ndoñe cattsëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya

acbe uacanana soye cochántsebmoma. ¹³ Chamna, canye fiesta chacojama ora, cochjúbuaja ndbomnjémenga, jama ndobenenga, coshetenga y jtanenga, ¹⁴ y aca corente oyejuayá cochántsemna; er chenga ndoñe quemochatobenaye cachcá aca jtëtofjana, pero acna acbe uacanana soye cochántsebmoma, chë Bëngbe Bëtsabe bominyiñe tsábenga imomnenga chamojtayena ora ca” —cha tbojaniyana.

*Chë bëts sanama cuento
(Mt 22.1-10)*

¹⁵ Chca tojanuena ora, canya chë mesëshentse tbemaná tojánayana: — ¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

¹⁶ Chora Jesús tbojaniyana: —Canye bacó canye bëts saná yojaprónta y ba entšanga yojúbuaja. ¹⁷ Juasama ya yojobuache ora, canye oservená ibojíchmua chë ófjanenga jáuyanama chamotsajna, ya lempe yojtseprontana ca. ¹⁸ Pero chorna nyetscanga imojontsé jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” ¹⁹ Inya yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” ²⁰ Y inya yojayana: “Cabá mora sentsobouamá, y chë causa, ndoñe quichatobenaye jama ca.” ²¹ Chora chë oservená yojesshëcona y lempe chabe nduiñbioye ibojauenaye. Chë nduiño tša ibojtsetna, y chë oservenábioye ibojauyana: “Cam ora motsa tsashengoye y benachëngoye, y moye cochjunatse ndbomnjémenga, jama ndobenenga, jtanenga y coshetenga ca.” ²² Chentša bënëntscose, chë oservená chë nduiñbioye ibojauyana: “Bacó, ya sënjama ntšamo šconjamandacá, y cabá ínÿengbiama luare entsemna ca.” ²³ As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjiamá; ²⁴ er ndegombre cbéyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama
(Mt 10.37-38)*

²⁵ Mallajta entšanga Jesús imojtséstona; as cha tojanobuértana y tojanéyana: ²⁶ “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabéninga tu-ababuánÿeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsoberenana atšbe uatsjendayá jtsemnana. ²⁷ Y nda, atšbiama ndoñe tontseprontana jasúfriama y cruciñe jobanámnaca, y nyetsca chabe quem luare soyënga ndoñe tonjëseboshjona atše juastama, cha ndoñe ntsoberenana atšbe uatsjendayá jtsemnama.

²⁸ “Nderado nda tsëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinÿama ntsachetšá crocénana chentše yochjuába, y japochócama nyetsá crocénana tayojtsebomnama? ²⁹ Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinÿenga, muantsáfchaye y mëntšá muantsichamo: ³⁰ ‘Quemëjema jajebuama tonjontsé, y japochócama ndoñe chenatobená ca.’

³¹ “O ¿ndaye rey inÿe réyefraca jéntsama tbojotocase, natsana ndoñe nanjót'bema jajuaboyama, nderado nanjobenaye bnëtsana uaranga soldadëngaftaca chë ínÿabioye jayëñjanana, chë inÿa uta bnëtsana uaranga soldadëngaftaca tojtsabose? ³² Y ndóñesna, chë inÿe rey cabá bënoca tojtsemna

ora, básefta entsanga echanjichamuá, cha jauyanama más tsabá yomna ndoñe jatentsjanayana ca.

³³ “Chcasna, ndánaca tsëngaftanguentsá, lempe ntšamo tobomncá ndoñe cachcá tonjesonýá, cha ndoñe ntsoobenana atšbe uatsjendayá jtsemnama ca” —Jesús tojánayana.

Chë tamó fténana tojtsebocna ora
(Mt 5.13; Mc 9.50)

³⁴ “Tamó tsabe soye endmëna; pero chë tamó fténana tojtsóbemëse, tsëngaftanga ndoñe quešmátobena jamana tempcá sanana cachiñe chaot-satsmënana, ni saná jatamuama. Chë ftëna tamó tondayama ntoservénana, cachcá, chë atšbe uatsjëndayënga jtsemnama tmojtsebošënga, pero lempe jéseboshjonama ndoñe tmontseboše, cach ndoñe chama ntoservénana. ³⁵ Chë ftëna tamó ndoñe ntoservénana ni fshantsama, ni uanguanëshama. Nýe jtsëtšenana. Chë jouenama tmojtsobenënga, šmochjouena ca” —Jesús tojánayana.

15

Chë ótsëna oveshábama cuento
(Mt 18.10-14)

¹ Nýetsca chë Romocama impuesto entsángbioye atjanayënga y inýe bacna soyënga amënga, Jesúsbioye imojánajna chabe palabra jouenama; ² y chë fariseunga y ley abuatambayënga chama Jesusbiamana podésca imojtsoyebuambná, mëntsá: —Mua bacna soyënga amëngaftaca entsenuta y chëngaftaca entsesá ca.

³ As Jesús mëntsá tojanacuntá, chënga jabuatambama: ⁴ —¿Nda tsëngaftanguentsá, canýe patse oveshënga tojtsabamna, y canýa tbojtsobuëtsëse, chë inýe esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónýeñëntscuana? ⁵ Y tbojtsinýena ora, oyejuayá chë oveshá jesotantšajúana; ⁶ y yebnoye tojtashjango orna, chabe amiguënga y juachañe oyenënga jáchembuana y mëntsá jáuyanana: “Atšeftaca móyejuanga, er chë sëntsanobuetše oveshá sëntsinýena ca.” ⁷ Atše cbëyana, cachcá, celócnaca más oyejuayana jtsebínýnana, canýe bacna soyënga amá tsabe benache tojtishachabiamana, y ndoñe nýa yapa, esconëfta bnëtsana y esconëfta tsabe soyënga amëngbiamana, chë ndoñe yondujaboto bacna soyënga amana jtsajbanana ca.

Chë crocénana tojtsónýena shembásabiamana cuento

⁸ “O mëntsá, ¿ndëmua shembása, bnëtsana uámana crocénana tojtsebomna y canýana tojtsobuëtsëse, chora ndoñe canýe uajuinýanëshana nanjuajuinýená, y cuedádoca chë yebna nantsetsjajo y botamana chë crocénana nantsenguango candëtsónýeñëntscuana? ⁹ Y tojtsinýena ora, chabe amiguënga y juachañe oyena shembásënga jáchembuana, y mëntsá jáuyanana: ‘Atšeftaca móyejuanga, er chë sëntsanobuetše crocénana sëntsinýena ca.’ ¹⁰ Atše cbëyana, cachcá, chë Bëngbe Bëtsabe angelotémëngbeñe oyejuayana jtsebínýnana, nýe canýe bacna soyënga amá chë tsabe benache tojtishachabiamana ca” —Jesús tojánayana.

Chë uaquiñá bacna benachiñe ayá

¹¹ Jesús mëntsánaca tojanacuntá: “Canýe entsá uta uaquiñata yojánabamna; ¹² y canýe, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjáyaye.

13 “Chentshana baseftaytesna, chë más bobontse uaquiñá lempe ntšamo ibojobuachcá yojsatobuiye y chë crocenánaca bën luaroye yojtsoñe, y choca, cha nÿe ntšamo ibojocochëngcá, mocá yojenobuiye, y chca, lempe yojtse-pochóca. 14 Lempe crocénana yojsoshañe orna, bëts shëntsana chë luarentse yojóshjango, y chë causa cha ibojotóca shëntseca jtsejétanana. 15 As, cha yojá trabajo jonguangoñama y yojínÿena chë luarentsa canÿe entšábentse; chana, chabe jajoye ibojíchmua cotšënga jtsanÿenama. 16 Chë bobontsna yojtseboše chë cotšbe saná jtsesana, pero ndocná tondaye ibonjanájuatšnaye.

17 “Cabana, botamana yojinÿe ntšamo yojtsepasacá, y mëntšá yojenójuaboye: ‘¡Bueta trabájayënga atšbe taitabe yebnentse bëtscá saná mondëtsóbomñe, y atšbe muentse shëntsama chanjóbana ca! 18 Chantá atšbe taitabe yebnoye y mëntšá cha chanjauyana: Taita, šmotseperdoná. Atšbe tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. 19 Mora ya merecido taitatobuajoñe acbe uaquiñá jtsabáinama; nÿe canÿe acbe trabajayacá Diosmanda šmatofja ca.’ 20 Chca jëftsenójuaboyëse, yojontsé cachabe yebnoye jtana.

“Cabá bënoca yojtsemna ora, chabe taitá chábioye ibojinÿe, y chabe uaquiñabiama ibojóngmia, y jajébenguama betscó yojá; ibojajebengo, ibojtot-sejcuá y tša yojsóyejuayayama chë uaquiñábioye ibojtámochó. 21 Chora chë uaquiñá ibojauyana: ‘Taita, šmotseperdoná. Atšbe tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’ 22 Pero chë Taitana chabe oservénënga yojámëndaye: ‘Betsco chë más tšabe entšayá mauaca y matspormanga, montšabuechëtjo y matsshecochëtjo. 23 Mora chë más minÿica uacná šmochjuánatse y šmochjášhua. ¡Mochjase y mochjóboyejuaye ca! 24 Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinÿena ca.’ Y chentshana imojontsé joboyejuayama.

25 “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojsataye y ya béconana yojtsemna orna, cha yojouena imojtsabuastoye y imojtselántsaye. 26 As chora cha canÿe oservenábioye ibojachembo y mëntšá ibojatjaye: ‘¿Ndayá bëngbe yebnentse yojsopasana ca?’

27 “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minÿica uacná jáshbuama, cha tšabá tojtashjanguama ca.’ 28 Pero chë uabóchena catšatna corente ibojtsetna y ndoñe yontseboše tsoye jtamashënguana. As cach befta yojábocna chë catšátbioye jaimpádama chauatamashënguana. 29 Chora cha chë taitábioye ibojauyana: ‘Taita, aca condëtatšëmbo bueta uata cbetsajabuáchanama, nÿets tempo cbet-seyeunanama, pero ndocna te ni mo canÿe chivotema chešcaisatštá atšbe amiguëngaftaca joboyejuayama. 30 Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabiama tcojášhua ca’ —chë uaquiñá ibojauyana.

31 “Chora chë befta ibojojuá: ‘Atšbe uaquiñá, aca sempre átšeftaca condëtssemna y lempe ntšamo atšbe tsbomncá acbiámnaca endmëna. 32 Pero mora tšabá entsemna joboyejuayama y joyejuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinÿena ca.’ ”

16

Chë nduiñbe ndoñe tšabe uajabuachanábiama cuento

1 Jesús mēntšánaca chabe uatsjéndayēnga tojanacuntá: “Inamna canye bomna entšá, y cha ibnabomna canye uajabuachaná chabe soyēnga chaotsinýenama; y chē nduiño imojuenaye chē uajabuachaná chabe soyēngaca ndoñe tšabá yontsamama. 2 Asna, chē nduiño ibojachembo y mēntšá ibojauyana: ‘¿Ntšamo acbiama šmotsatsētsnacá ndegombre yojtsemna ca? Mora cuenta šmatatštá ntšamo atšbe soyēngaca tcojamama, er morscana ya ndoñe atšbe soyēnga inýená quecochátsmēna ca.’ 3 Chē uajabuachaná yojontsé jenójuaboyana, y mēntšá yojeniyana: ‘¿Y mora ntšamo chtsemana, chē nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sēntsēuatja. 4 Ya sēntsetatšēmbō ndayá chjama, chca, atšbe trabajuentšana chašojtábocna ora, atše jtsabamnama ndēmuanýenga chēngbe yebnentše chašmofjama ca.’

5 “Chentšana, canýánýa chē chabe nduíñbioye ndebénēnga yojáchembo. Cányabioye ibojatjaye: ‘¿Ntsachetšá atšbe nduiño icondebena ca?’ 6 Y cha ibojojuá: ‘Canyē patse barrilēšangá aceitiye ca.’ As cha ibojauyana: ‘Muentše acbe recibēcha entsamna; mora mótbema y inýácha nýe shachna bnētsana barrilēšangama matapormá ca.’ 7 Chentšana inýabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canyē patse medida trigo ca.’ As cha ibojauyana: ‘Muentše acbe recibēcha entsamna; chiñe nýe posufta bnētsanama mábema ca.’ 8 Chentšana, chē nduiño tšabá yojayana chē ndoñe tšabá ama mayordombiama, cha stúdioca yojamama. Chē nýe quem luarama enójuabnaye entšanga, cachēngbe soyēngaca puerte studio bomnēnga mondmēna; y chē entšangbe juabnēnga binýnayábenga ndoñe nýa yapa ca.

9 “Atše cbabuayená, quem luarentše, chē bacna soyēnga amēngbe luarentša bomnánaca amiguēnga šmochjábiamá, inýenga jtsējabuáchanēse. Chca, chē bomnana tojtsopochocá ora chašmotsabamna ndēmuanýenga chē nýetsca tescama oyenoye chacmúbuajama ca.

10 “Nda básefta soyēnguiñe lempe tšabá tojama, bētská soyēnguíñnaca lempe tšabá echanjama; y nda básefta soyēnguiñe ndoñe tšabá tonjama, bētská soyēnguíñnaca cach ndoñe tšabá queochatsma. 11 Chcasna, quem luarentše, chē bacna soyēnga amēngbe luarentša bomnánaca ndoñe tšabá šmonjamēse, ¿nda chē ndegombre bomnana, chē Bēngbe Bētsabe soyēnga cmochjábanýiye? 12 Y chē ndoñe tšēngaftangbe sóyeca ndoñe tšabá šmonjamēse, ¿nda cmochjantšabuáchiye ndayá tšēngaftangbiamá yomncá ca?

13 “Ndocná ntsoybenana uta mandayata jtsaservénana; er cányabioye bochantšáboyēnja y chē inýabioyna bochantšebobonshana, o cányabiamá tšabá echántsetrabajaye, y chē inýabiamna ndoñe tšabá. Ndoñe quecátobena Bēngbe Bētsá jtsebobotshánana, nýe quem luarentša soyēnga jtsebomnama tcojtsebošēse ca” —Jesús tojánayana.

14 Chē fariseunga, becá crocénana jtsebomnama bošēnga imnamna, lempe chca chēnga tmojanuena, y Jesúsbioye imojtsáboyejuana. 15 As Jesús tojanéyana: “Tšēngaftanga entšangbe delante mo tšábenga cuaftsemncá jtsenobiamnayana, pero Bēngbe Bētsá endētatšēmbō ndayá tšēngaftangbe ainaniñe yomnama; er ndayá entšanga más tojtsebošcá, Bēngbe Bētsá jtsáboyēnjana ca.

Moisesbe ley y Bēngbe Bētsabe amēndayana

16 “Moisesbe ley y chē Bēngbe Bētsabe juabna oyebuambnayēnga tšēngaftanga cmonjanabuayiyná, Juan chē Ubayaná quem luaroye tonjánabēntscuana. Cha tonjánabo orscana montsabuyaiyná chē tšabe noticiēnga Bēngbe Bētsabe amēndayocama, y nýetscanga tša montseboše choye jamashēnguama ca.

17 “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canye punto ndoñe chca chaondëtsemnama ca” —Jesús tojánayana.

*Ndayá Jesús tojanabuatambá chë bouamnënga tmojtseñtšenama
(Mt 19.1-12; Mc 10.1-12)*

18 “Nda chabe shémbioye cachcá tbojesonýá y ínÿaftaca tojtóbouamase, cha chë natsana shémbioye ínÿaftaca jtseíngñayana; y nda chë útsena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” —Jesús tojánayana.

Chë bomná y chë ndbomnjëjema Lázaro

19 “Canye bomna entsá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fi-estënga yojánama. 20 Canye ndbomnjëjëmna inamna, Lázaro ca uabainá, bacna nguayanánaca šocá; y cha yojanamana chë bomnabe bësásëntse fshantsiñe jótbemana. 21 Quem ndbomnjëjema yojtseboše chë bomná yojtsesayentsana yojatquëcjana sanángaca jtoshachayana; y chë quešënga innaboje chabe nguaye cuerpo jajáñjuama. 22 Canye te Lázaro yojtsóbana, y Bëngbe Bëtsabe angelënga Abrahámboje cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infernoca puerte ngmëniñe yojtsesufrina ora, tsbanánoye yojontješiyë y bënoca Abraham ibojinÿe, y Lázaro cháftaca yojtsemna. 24 As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem iñeshoca tša sëntsesufrina ca.’ 25 Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënanana contsebomna. 26 Y inÿe soye, canye bëts tũañe entsemna tšëngaftangbiocana mëntscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

27 “Y chë bomná ibojauyana: ‘Masque chca, Taita Abraham, Dios-manda Lázaro michmó atšbe taitabe yebnoye; 28 choca sëndábamna shachna catsátanga; as chaúyana ntšamo moca atšbe stsepasana y ntšamo jamëse chënga ndoñe chaondëtsamna quem ngmëñënga luaroye jabama ca.’ 29 Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ¡chëngbioye chamoyauná ca!’ 30 Chë bomná ibojojuá: ‘Ndoñe, Taita Abraham; nderado obanënguentšana canÿa chëngbioye tojase, aíñe chë tšabe benache muan-tishache ca.’ 31 Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

17

*Resjo yomna, nderado bacna soyënga cuanjama
(Mt 18.6-7, 21-22; Mc 9.42)*

1 Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tša lastema chë entsabiama ndabe causa ínÿënga bacna soyënga tmojama! 2 Más tšabá chabiama nántsemna canye nantsnëbé chamotsetamošëntšbua y mar béjayoye chamotsashbuetše,

y ndoñe chë canya Bëngbe Bëtsábeñe ošbuachiyá bacna soye chaomama juanatsana. ³ Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴ Masque nÿe canÿe te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbólra ca’ tcmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsábeñe jtsošbuáchiyëse, corente obenana jtsebomnana

⁵ Chë uatsjéndayënga Bëngbe Utabnábioye tmojaniana: —Ošbuáchiyana šmababaté ca.

⁶ Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojé ca”, y quem betiye chca nanjama ca.

Chë oservená ndayá ibomna jamana

⁷ “Nderado canya tšëngaftanguentsá canÿe bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca’? ⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentsana aca cochjase y cochjofsiye ca.’ ⁹ Y chë bochichnayábioye ndoñe quebochtétschuaye ndayá tbojuatarieca cha tojamama. ¹⁰ Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalemoye benache, Jesús tojánachnëngo Samaria y Galilea luarëjana. ¹² Y canÿe pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentsana bënoca chënga tmojanoquedá, ¹³ y mëntšá imojtsáyebuache: —¡Jesús, Buatëmbayá, šmotsalastemá ca!

¹⁴ Jesús chënga tojánanÿe ora, tojanëyana: —Jerusalenoca bachnángbioye motsajna, y chënga šmochjínÿanÿiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. ¹⁵ Canya chënguentsá, shnaná yojtsemnama tojáninÿe ora, yojeshëcona Bëngbe Bëtsábioye jabuache atschuanaye; ¹⁶ y Jesusbe delante yojshëntsamentšiyë, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá inamna.

¹⁷ Chora Jesús tbojaniana: —Bnëtsanënga mondmëna chë shnánënga tmontoquedanga. ¿Ndayentšë chë inÿe esconëftanga imojtsemna? ¹⁸ ¿Nÿe quem boyabása, inÿe luarocana ashjanganá, tojeshëcona Bëngbe Bëtsá jëtschuayama? ¿Ndáyeca chë inÿyënga ndoñe ca?

¹⁹ Y chë entšábioye tbojaniana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatsmëna ca.

Ntšamo Bëngbe Bëtsabe amëndayana yochjóshjango (Mt 24.23-28, 36-41)

²⁰ Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinÿana. ²¹ Chora ndoñe quemochátichamo ‘Muentšë entsemna’ o ‘Choca

entsemna ca'; er Bëngbe Bëtsabe amëndayana ya tsëngaftangbeñe entsemna ca" —cha tojánayana.

²² Jesús chabe uatsjéndayënga tojanëyana: "Canye tempo echanjóshjango, y chora tsëngaftanga šmochántseboše canye te jtsebomnana, ntšamo chë Bëngbe Bëtsá Entśá tbojanbemá tsëngaftangbeñe enjëftsemna orcá; pero chora ndoñe chca queochatóshjango. ²³ Chora báseftanga mochántsicamo: 'Muentše entsemna' o 'Choca entsemna ca'; pero choye ndoñe šmatjá, ni šmatjúseto. ²⁴ Er chë tojatcuinye ora, ntšamo celoca catoica juachoica tojabuash-inyinyenacá, chca echántsemna chë Bëngbe Bëtsá Entśá tbojanbemá quem luaroye chaojésabo te. ²⁵ Pero natsana cha bontsemna puerte jasúfriana, y morsca entšangbiama uabotená jtsemnana.

²⁶ "Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entśá tbojanbemá quem luaroye chaojésabo ora. ²⁷ Chë tempo, entšanga imnasaye, imnofšësnaye, imnóbouamnaye; natjëmbana imojtsiyëñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá. ²⁸ Cachcá ntšamo Lot yojaniyena ora tojanopasacá: entšanga imnasaye, imnofšësnaye, imnóbouamnaye, imojtsena, sananga imnajena y imnajebuana; ²⁹ pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana ñeshe y azufre chauaftema, y chentša entšanga tojtsanapochocá. ³⁰ Cachcá echántsemna chë Bëngbe Bëtsá Entśá tbojanbemá chaojtonyá ora.

³¹ "Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomnëse, chocana ndoñe chaondëstastjango chë soyënga jesabobocnama; y nda jajoca chaojtsemna, yebnoye ndoñe chaondëta. ³² Menójuabonga ntšamo Lotbe shémaftaca tojanopasama. ³³ Nda tojtsentšena quem luarentše bëtscá jtsebomnana y atšbiana jasúfriama ndoñe tontseprontana, chë nyetsca tescama yomna tsabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tsabe vida echántsebomna.

³⁴ "Atše cbëyana, chë ibeta, chë Bëngbe Bëtsá Entśá tbojanbemá chaojtonyá ora, útata canye jutsnéshañe bochántsemna; canya mochanjesbetše y chë ínýana ndoñe. ³⁵ Uta shembásata cánýiñe bochántsejanýcoye; canya mochanjesbetše y chë ínýana ndoñe. ³⁶ Uta boyabásata jajoca bochántsetrabajaye; canya mochanjesbetše y chë ínýana ndoñe ca" —cha tojanëyana.

³⁷ Chora chë uatsjéndayënga Jesús tmojantjá: —Utabná, ¿ndëmoca chca yochjopása ca?

Y cha tojanjuá: —Chë obanabe cuerpo tojtsemnentše chë gallinacënga jojotana ca.

18

Chë viudá y chë mandadbiama cuento

¹ Jesús mëntśá tojanacuntá, entšanga jabuátambama, Bëngbe Bëtsáftaca nyets tempo jtsencuëntayana yomnama, ainaniñe añemo jtsebomnana ndocna te ntjajbanacá. ² Mëntśá tojánayana: "Canye pueblentše canye mandado inamna; chana ni Bëngbe Bëtsábioye ndoñe bonjánebiauata, ni entšanga yonjánayaunana. ³ Chë pueblentše canye viudánaca inamna; chana canye demanda yojánbomna. As chë mandádbioye yojobeconá y mëntśá ibojauyana: 'Diosmanda atšbe uayayá motsecastigá ndayá šojaborlama ca.' ⁴ Bayté chë

mandado ndoñe yonjábošena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana, ⁵ pero quem viudá cada ora endabó causa, aiñe chanjóyeunaye, chabe uayayá chanjacastíga; ndóñesna cada te nandaboye y cabana ya šochanjanaméntša ca.’ ”

⁶ Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. ⁷ Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora inyëngbe causa montsesufrina y cada te Bëngbe Bëtsá mondbétseimpadana chaujúabuachama. ¿Más chamuato-batmá ca yochjáuyana? ⁸ Atše cbëyana, Bëngbe Bëtsá betesco tšëngaftanga cmochanjátsebacaye, tšëngaftanga chë inyëngbe causa mora šmojtseufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánýena ca?” —Jesús tojánayana.

Chë fariseo y chë Romocama impuesto atjanayabiama cuento

⁹ Báseftanga imojtsanjuabná chënga tšabe entšanga imnamna ca, pero chë inyëngbioye imojtsëbuayënja; chíyeca Jesús mëntšá tojanacuntá jabuátambama: ¹⁰ “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canya yojamna fariseo, y chë inýana, canye Romocama entšángbioye impuesto atjanayá. ¹¹ Chocna chë fariseo, tsanana Bëngbe Bëtsábioye mëntšá ibojtsecuëntaye: ‘Bëngbe Bëtsá, cbontsatschuaná atše chë inyëngcá ndoñe quetsatsmënama: atbëbanënga, puerte bacna soye amënga y shëmbioye inýaftaca ingñayënga; y ni quem Romocama impuesto atjanayacá ndoñe quetsatsmënama. ¹² Atše sënduamana, ácaftaca jencuéntamna, canye semaniñe uta soye tondaye ntjascá jtsemnana; y lempe stjonýenentšana, bnëtsanentšana canye soye acbiamna sëndëquëcñá ca.’ ¹³ Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’ ”

¹⁴ Chentšana Jesús tojánayana: “Atše cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aiñe bëtsá mochanjábema.”

Jesús, basetëmëngbiamna Bëngbe Bëtsábioye tbojanimpadá (Mt 19.13-15; Mc 10.13-16)

¹⁵ Entšanga imojanamana Jesúsbioye basetëmënga junatsana chauabájajuama, y Bëngbe Bëtsábioye chëngbiamna chaboimpadama; pero chë uatsjëndayënga chca tmojáninýe ora, tmojanontsé chë basetëmënga unachayënga jtsëcácanana. ¹⁶ Pero Jesusna chë basetëmënga tojánachembo, y mëntšá tojánayana: “Cachcá mónýaye chë basetëmënga átšbioye chamuabo, y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiamna. ¹⁷ Ndegombre cbëyana, nda Bëngbe Bëtsabe soyënga ndoñe tonjóyëngacñe mo canye basetëmá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

Canye bomna entšá Jesúsbioye tojána (Mt 19.16-30; Mc 10.17-31)

¹⁸ Canye mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

19 Y Jesús tbojanjuá: —¿Ndáyeca šcjauyana “tšabia ca”? Tšabia nýe canýa endmëna: Bëngbe Bëtsá. 20 Aca condétatšëmbo ntšamo Bëngbe Bëtsá tojanmandacá: “Ache shema ínÿaftaca ndoñe cattseíngñaye, inýa ndoñe catjóba, ndoñe catjatbëba, ndoñe catjuaboínýena y acbe bëtsëtsata ndoñe stëtsoye catjáquedaye ca.”

21 Chora chë boyabása tbojanjuá: —Atše lempe chca básetema orscana sëndocumplina ca.

22 Jesús chca tojanuena ora, tbojaniana: —Cabá canýe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnjémënga cochtsatsataye; chca, celoca canýe bëts bomnana cochántsebomna. Chentšana, cochjabo y šcochjuasto ca.

23 Chë entsá chca tojanuena ora, puerta ngménaca yojtsemna, er cha corente bomná inamna. 24 Chca ngmená tbojáninýe ora, Jesús tojánayana: —¡Yapa totcá bomnëngbiana entsemna Bëngbe Bëtsabe amëndayoye jamashënguama! 25 Ndegombre, más paselo endmëna canýe camello chë coshufjentša atëfnëjana chauachnëngo, y ndoñe canýe bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

27 Y Jesús tojanëjua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

28 Chora Pedro, Jesúsbioye tbojaniana: —Bëngbe Utabná, aca contsonýá, bënga lempe chë fsëndbomna soyënga fsënjéseboshjona, y áaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábioye jaserviama, chabe amëndayama jtsabuayiyayëse, cachcá tojëftseboshjona chabe yebna, shema, catsátanga, bëtsëtsanga o básenga, 30 cha mora quem luarentše chë soyëngama más echanjóyëngacñe, y chë inýe luarocna, chë nýetsca tescama yomna tšabe vida ca.

*Jesús cachiñe tojánayana cha jóbanama y jtayenama
(Mt 20.17-19; Mc 10.32-34)*

31 Jesús chabe bnëtsana uta uatsjëndayënga barie tojánachembo, y mëntšá tojanëyana: “Smontsetátšëmbo mora Jerusalenoye bënga montsajnama, y choca lempe echanjóchnëngo ntšamo chë Bëngbe Bëtsabe juabna oye-buambnayënga, chë Bëngbe Bëtsá Entšá tbojanbemabiana tmojanabemcá; 32 er choca cha chë ndoñe judiëngbe cucuatšinë mochanjáboshjona, y mochantšáboyejuana, mochanjóyenguango, mochántsebuashëtoto; 33 y chamojátjanjentsana, mochanjóba, pero unga tianoye cha echántayena ca.”

34 Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtsëtsëtsnacá, er chëngbiana yojamna josértama ndopodena soyënga.

*Jesús, Jericó puebloca canýe jtanábioye tbojanshná
(Mt 20.29-34; Mc 10.46-52)*

35 Tojanopasá, Jesús Jericó puebloye yojtsebëconaye ora, canýe jtaná benache juachañe inatbemana, lemošna otjanañe. 36 Entšanga chëjana imojtsachnëjuanama tojanuena ora, yojanotícia ndayá yojtsopasana ca, 37 y chë entsanga tmojaniana, —Jesús Nazaretocá entsebecóna ca.

38 As cha yojontšë uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajnënga chë jtaná imojtsácacana, iyteca chaóbemama; pero cha más yojtsáyebuache: —¡Davídbentšana Entšá, šmotselastemá ca!

⁴⁰ As Jesús tojantsá y tojanmandá cha chamobetsama. Cha ya bécoñe yojtsemna ora, Jesús tbojantjá: ⁴¹ —¿Ndayá cojtseboše atše acbiamama chjamama ca?

Y chë jtaná tbojanjuá: —Atšbe Utabná, atše sëntseboše chašuatábínñnama ca.

⁴² Chora Jesús tbojaniyana: —Matinñe, Bëngbe Bëtsábeñe betsošbuachéyeca shnaná contsatmëna ca.

⁴³ Y cachora cha tšabá ibojtabinñna, y Jesúsbioye ibojtsëstona, Bëngbe Bëtsá atschuanaye. Y nyetsca entšanga, chca tmojáninñe ora, Bëngbe Bëtsá imojtsatschuanaye.

19

Jesús y Zaqueo

¹ Jesús Jericó pueblaca tojánashjango ora, chë pueblëjana cha yojtsachñëjuana. ²⁻³ Chora, canñe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinñama. Pero ndoñe yontsobena jinñama, bëtsá entšanga causa y cha becu inamna causa. ⁴ Chcasna, cha betscó natsanoye tojaftsantjajo y canñe sicomoro betiyeshoye tojánashjango, chca, Jesús chëjana tojtsachñëjuana ora, jinñama jobenayama. ⁵ Jesús chë betiyeshoye tojánashjango ora, tsbanánoye tojanontješé y Zaqueobioye tbojáninñe. As Jesús tbojaniyana: “Betscó chocana matastjango, Zaqueo, er mënté chanjá acbe yebnoye jatema ca.”

⁶ Chora Zaqueo betscó tojtastjango y chentšana puerte oyejuayá Jesúsbioye tbojanofja. ⁷ Entšanga chca tmojáninñe ora, tmojanontsé Jesusbe contra mëntšá ichámuana: “Jesús tonjá canñe bacna soyënga amabe yebnentše jatema ca.”

⁸ Chora Zaqueo tojantsá, Bëngbe Utabná Jesús bentše, y mëntšá tbojaniyana: —Mouena, atšbe Utabná, atšbe bomna soyënguentsana tsëntsañe ndbomñëjëmënga chanjátataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

⁹ As Jesús tbojaniyana: —Mënté, aca acbe bacna soyënguentsana atsbocaná contsemna, er Zaqueo, ácnaca Abrahám bentšana entšá condmëna. ¹⁰ Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguanguama y jabátsebacama ca.

Chë crocenánama cuento (Mt 25.14-30)

¹¹ Entšanga chë soyënga imojtsuenana, y Jesús inñe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

¹² Jesús tojanëyana: “Canñe luarentša uámana entšá inñe bën luaroye yojá, cachabe luarentša rey chamobemama y chentšana cachábioye jtama. ¹³ Cabá nda ora, chabe bnëtsana oservénënga yojáchembo y bëtsá crocénana cada cánñabioye yojëftsayentšbuachiye, y mëntšá yojëftsëyana: ‘Quem crocenánaca trato šmochjábema atše candëtabëntscuana ca.’ ¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inñe bën luaroca mëntšá chamuayanama: ‘bënga ndoñe queftsátsoše cha bëngbe rey chaotsemnama ca’.

¹⁵ “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama. ¹⁶ Chë natsaná yojáshjango y yojayana: “Taita, acbe crocénana bnëtsana soye más

tonjoboté ca.’ ¹⁷ Y chë rey ibojojuá: ‘Tša tšabá, tšabe oservená. Aca quem base soyiñe ntšamo tcojoramandacá tšabá tcojámayeca, bnëtsana pueblentša mandado chacotsemnama cbojayé ca.’ ¹⁸ Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ ¹⁹ Y chë rey ibojauyana: ‘Acnaca shachna pueblentša mandado cochántsemna ca.’

²⁰ “Chorna inya yojobeconá y mëntšá yojayana: ‘Taita, muentše acbe crocénana entsatsmëna; canye pañueléjuañe bonguana sëntsejajo. ²¹ Atše acbiama uatjana šonjuábuache, er aca canye tšátjaye entšá condmëna; aca chë ndoñe condbuajonentsana jocñana y chë ndoñe tconjajé luarentšana jaja saná jobuátbanana ca.’ ²² As chë rey ibojauyana: ‘Bacna oservená, cach acbe palabréngaca chanjínyanñiye aca ndoñe tšabá tconjamama. Atše chë ndoñe sëndbuajonentsana jocñana y chë ndoñe sënjajé luarentšana jobuátbanana tsuamanama icojátatsëmbëse, ²³ ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, maštoyé chë crocénana y chë chentšana tojoboté crocénanënaca ca?’ ²⁴ Y chë chentše imojtsemna entšanga yojáuyana: ‘Chë crocénana motseboca y chë bnëtsana soye más tojabotébioye chana motsatšetá ca.’ ²⁵ As chënga imojojuá: ‘¡Pero cha ya bnëtsana soye más entsebomna ca!’ ²⁶ Y chë rey yojójuá: ‘Atše cbëyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca. ²⁷ Y chë atše uayayënga, chë chëngbe rey atše chaitsemnama ndoñe monjánbošëngna, moye mënatse y atšbe delante šmochtsëbaye ca’ ” —cha chora yojayana.

Jesús Jerusalenoye tojánashjango
(Mt 21.1-11; Mc 11.1-11; Jn 12.12-19)

²⁸⁻²⁹ Chca tojëftsananayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjédayata tojanichamó, ³⁰ mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínñena. Chábeñe cabá ndocná tonjenojayé. Sochjuafjoná y šochjuánatse. ³¹ Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

³² Chë uatsjédayata tbojána y lempe ntšamo Jesús tojanëyancá tbojáninñena. ³³ Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

³⁴ Chora chata tbojánayana: —Bëngbe Utabná bontsajabótoyeca ca.

³⁵ Chentšana Jesúsbioye chë burrotema tmojanánatse, y chë burrotémbeñe chatbe entšayá tbojanátatse, y chábeñe Jesús tmojanenjayé. ³⁶ Y cha yojtsachnëjuana ora, entšanga chëngbe entšayá benachëjana imojtsëtétsatsana.

³⁷ Olivos tjashe tsmanoye yojtsebeconá ora, chë bëtská entšanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. ³⁸ Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

³⁹ Chë entšanguentše básefta fariseunga imojtsemnënga, Jesús tmojanianyana: —Buatëmbayá, acbe ústonënga mëcácana chca ndoñe chamondëtsáyebuachama ca.

⁴⁰ Pero Jesús mëntšá tojanëjua: —Ndegombre cbëyana, mënga iytëca tmojobiamëse, chë ndëtsbënga muanjuayebuáchena ca.

⁴¹ Jesús Jerusalén béconana tojánashjango, y chë bëts pueblo tojáninÿe ora, chentša entsangbiama tojánenobošachna. ⁴² Y mëntšá tojánayana: “¡Malaye šmëntsetátšëmbo, nÿe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bom-inÿama entsëitëmena. ⁴³ Er Jerusalemoca bacna tenga echanjóshjango; chora uayayënga chentša shëconánëjana canÿe tapiëse mochantsepórma, mochantsejëtja y nÿetsca juachoicana mochanjontšé tšëngaftanga jtsatsejana, ⁴⁴ y lempe mochantsepochoáca. Muentša oyenënga mochantšëbaye, y ni mo canÿe ndëtšbé inÿebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentšana enënga y obuámnayënga tojtanëbuacna (Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontšé chë chentše imojtsenënga chentšana jtëbuacnana, ⁴⁶ y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átseftaca encuëntaye yebna ca’, pero tšëngaftangna, atbëbanëngbe oyeñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entsanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. ⁴⁸ Pero ndoñe tmonjáninÿena ntšamo, er nÿetsca entsanga corente imojtseyeunana ntšamo cha yojtsoyebuambnacá.

20

Jesusbe obenana

(Mt 21.23-27; Mc 11.27-33)

¹ Canÿe te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánÿiñe; ² y Jesús tmojanianyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

³ Chora Jesús tojanëjua: —Atšnaca canÿe soye sëntsebomna tšëngaftanga jatjayama. Smochjojuanga. ⁴ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca?

⁵ Chora chënga tmojanontšé enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

⁶ Y ndoñe quemuátobena jayanana ‘entsanga ca’; entsanga ndëtšbéngaca buattsëbaye, er nÿetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” ⁷ Chcasna, chënga tmojanjuá ndoñe monjántatšëmbo nda Juan tbojanichmó entsanga jubáyama ca.

⁸ Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

Chë puerte bacna trabájayëngbiama cuento

(Mt 21.33-44; Mc 12.1-11)

⁹ Chentšana Jesús tojanontšé entsanga jáuyanana, y quem cuëntoca tojanabuatambá: “Canÿe entsá uvas betiyënga yojáje y chë fshantse inÿe trabájayënga yojúyentsame, y baytescama bën luaroye yojtsoñe. ¹⁰ Chë uvasëšangá juashacama tempo yojobuache orna, chë jajañe nduiño canÿe

oservená ibojíchmua chë trabájayënga jáuyanama ntsachetsá cha ibojtso-tocánama. Pero chëngna cha imojtsejantsetaye, y tondaye ntoyiyá imojtichmuá. ¹¹ Chentsana inya ibojíchmua; pero chë trabájayënga cha imojtsejantsetaye, imojtsóyenguango, y tondaye ntoyiyá imojtichmuá. ¹² Chë nduiño inya ibojatichmuá; pero chánaca chënga imojtsejantsetaye, imojtselísia, y chentsana imojtábocna.

¹³ “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíne mochanjóyeunaye ca.’ ¹⁴ Pero chë trabájayënga, chë uaquiñá imojinye orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquéda ca.’ ¹⁵ Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? ¹⁶ Cha co echanjá y chë trabájayënga echanjetsëbaye, y chë uvas betiyënga jajañe inye trabájayënga echanjárrendaye ca.

Chë entsanga chca tmojanuena ora, tmojánayana: —¡Bëngaftaca ndocna te chca chaondopasá ca!

¹⁷ Pero Jesús tojanënyanýe y tojánayana: —As ¿ndayama Bëngbe Bëtsabe uabemana palabrënguiñe iuayana?:

Chë yebna jebuanënga tmojtsanaboté ndëtšbé, mora chë más bëts uashacuanësentse entsejájona ca.

¹⁸ Ndánaca chë ndëtšbeñe chaojotsatsá, chëbé bochántsatcacaye; y chë ndëtšbé ndábeñnaca chaojótatsë, polvéshe bochántsebema ca —Jesús tojánayana.

¹⁹ Chë bachnangbe amëndayënga y ley abuatambayënga tmojanenótatsëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entsangbiama imojtsauatja.

*Chë Romoca bëts mandadbiama impuesto jtsatsquëcjnyama
(Mt 22.15-22; Mc 12.13-17)*

²⁰ Chentsana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. ²¹ As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabatambá ndegombre tšabe vida jtsebomnama, ntšamo Bëngbe Bëtsá yomandacá. ²² Chcasna, šméyana, ¿tšabá tayojtsemna bënga, César, chë Romoca bëts mandadbiama, impuesto jtsatsquëcjnyana o ndoñe ca?

²³ Jesús yojtsetatšëmbo, ntšamo cha tojayaniñe jisháchichiyama chënga imojtsebošama; as tojanéyana: ²⁴ —Chë šmatsquëcjná crocénana šminýinýënga ca; ¿ndabe jubiá chë crocenániñe yojtsemna, y ntšamo muentse entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

²⁵ Y Jesús tojanéyana: —César šmochtoyiye cha ibotocana soye; y Bëngbe Bëtsana cha ibotocana soye ca.

²⁶ Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanéjuama, ojnánënga iytëca imojbiama.

Obanënga jtayenama Jesús tmojantjá
(Mt 22.23-33; Mc 12.18-27)

²⁷ Chentšana, báseftanga saduceo ca uabaina entšanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntšá tmojantjá: ²⁸ —Buatëmbayá, Moisés bëngbe leyënguifne tojëftsanabema, nderado canýe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca. ²⁹ Chcase, canýe bëngbentse canýsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá; ³⁰ chentšana chë inýa chë shémaftaca tonjanobouamá, y cachcá tonjanopasá. ³¹ Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentsëngnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. ³² Cabana, chë shembásanaca tontsanóbana. ³³ Y chcasna, chë obanënga chamojtayena ora, ¿ndabe chë canýsëfta catsatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

³⁴ Chora Jesús tojanëjua: —Quem luarentse boyabásenga y shembásenga mondbétsobouamnaye; ³⁵ pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, ³⁶ ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsana mochtayénayeca. ³⁷ Y Moisésnaca, chë yojtsángbototjuana betiyetémama tojanábementse, bënga šontsinýanýná chë obanënga innátayenama; chentse Bëngbe Bëtsá tojánayana cha yomna Abraham, Isaac y Jacobëbe Bëtsá ca. ³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuatambayënga Jesús tmojanianyana: —Buatëmbayá, tsabá tcjayana ca.

⁴⁰ Y ya ndoñe más montsenñémua inýe soyëngama jatstjanayana.

¿Cristo ndabe entsábentšana yomna?
(Mt 22.41-46; Mc 12.35-37)

⁴¹ Jesús tojanatjá: “¿Ndáyeca tsëngaftanga šmnëtsichamo chë Uámana Uabuayaná, chë Cristo, Rey Davídbentšana iuabó ca? ⁴² Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanianyana:
‘Atšbe catšbioica mótbema,

⁴³ atšbe obenánaca, acbe uayayënga acbe cucuatšifne chamoquedama chjamëntscuana ca.’

⁴⁴ ¿Ntsámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuatambayëngbiama tojánayana chënga ndoñe tsabá montsama
ca
(Mt 23.1-36; Mc 12.38-40; Lc 11.37-54)

⁴⁵ Nyetsca entšanga imojtsuenana, y Jesús chabe uatsjëndayënga tojanëyana: ⁴⁶ “Cuedado šmochtsebomna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entšanga beca respétoca chamotsacheuanayama. Chënga

chë judiëngbe enefjuana yebnënguenache chë más uámana luarënguiñe jtsetbiámanana, y fiestënguiñe nÿa quëfseroca. ⁴⁷ Pero chë viudángbioye chë tmobomna soyënga jtsabacayana; y entsangbe delante tšabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiana más chënga echanjácastigaye ca” —Jesús tojánayana.

21

Jesús yojtsënyaye chë crocénana quëcjnyënga
(Mc 12.41-44)

¹ Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcjnyayana chë crocénana quëcjnyëtémiñe; ² y canÿe viudá ndbomnjëmnaca tbojáninÿe, uta crocénana chëtémiñe yojaftseseGORá. ³ Chora Jesús tojánayana: “Ndegombre cbëyana, quem viudá ndbomnjëjema, Bëngbe Bëtsabiana nÿetscangbiana más becá tonjëftseseGORá; ⁴ er nÿetscanga tmonjëftseseGORá chë yojtsóyentsjamentšana, pero chana, masque tša ndbomnjëjema, cha vida jtsebomnama lempe ntsachetšá yobomncá tonjëftseseGORá ca.”

Jesús tojánayana Bëngbe Bëtsabe bëts yebna lempe mochjánpochocama
(Mt 24.1-2; Mc 13.1-2)

⁵ Báseftanga imojtsichamo chë Bëngbe Bëtsabe bëts yebnama, tša yojtsebomnana puerte uámana ndëtsbéngaca y chë entsanga imojanamana juambana Bëngbe Bëtsábioye uátsëmbona soyëngaca ca. As Jesús tojánayana: ⁶ —Canÿe tempo echanjóshjango, y lempe ntšamo mora muentse šmontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsePOCHóca ca.

Ntšamo yochtsemna quem luare jopochócoma te chaojtsobeco ora
(Mt 24.3-28; Mc 13.3-23)

⁷ Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

⁸ Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. ⁹ Y tšëngaftanga, entsanga imojtsentsjanama y entsanga mandadëngbe contra imojtsemnama chašmojtsuenana ora, ndoñe šmattsauatja, er entseyta natsana chë soyënga chaohnëngo; pero masque chca, chë quem luare jopochócoma tempo cabá ndoñe queochátsmëna ca.

¹⁰ Y mëntsánaca Jesús tojanëyana: “Canÿe luarentša entsanga, inÿe luaroca entsángaftaca mochántsentsjanaye; y canÿe amëndayábentša entsanga, inÿe amëndayábioca entsangaftácnaca. ¹¹ Ba luarënguiñe jabuache echanjuangmëmana, bëts shëntsana, y entsanga pochócaÿe šocanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtsopochócoma.

¹² “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjutatse jätsetšenama y cárceloynacá cmochanjáutame, y reyënga y mandadëngbióynaca cmochanjutatse, atšbe ústonënga bëtsemna causa. ¹³ Chca šmochanjapása, ntšamo atšbiana šmotatšëmbcá chënga chašmëyanama. ¹⁴ Natsana ndoñe šmatjätšjuabnaye

jenëuyanama ntšamo chora jóyebuambayana, ¹⁵ er atše chanjama puerte tšabá y osertanánaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye. ¹⁶ Pero uayayëngbe cucuatšinë cmochanjábashejuana cach tšëngaftangbe bëtsétsanga, catsátanga, pamíllanga y amiguënga; y tšëngaftanguentsana báseftanga cmochantsëbaye. ¹⁷ Y nyetsca entsanga cmochantsëbuayënja, atšbe ústonënga bëtsemna causa. ¹⁸ Pero tšëngaftangbe bestšašentsana ni mo canye stjënëja quecmochátabajajo. ¹⁹ Tšëngaftanga nyets tempo átšbeñe ošbuáchiyënga chašmojtsemnëse, chë nyetsca tescama yomna tšabe vida šmochántsebmna ca.

²⁰ “Jerusalén nyets shëconana soldadënga chašmojanýe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamotsacheta; Jerusalemntše chamojtsemnënga, chentsana chamuaisebocana; y chë jajenache chamojtsemnëngna, Jerusalemoye ndoñe chamondésamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrengüñe endayancá chora echanjochnëgo. ²³ ¡Tša lastema chë tempo shembásenga ngomámanëngbiana o ochóchaye básenga chamojtsabamnëngbiana! Er chora corente ngménana quem luarentše echántsemna, y quem luarentša entsangbiana chë uabouana castigo. ²⁴ Inyënga espadéjaca mochanjóbana, y ínýengbioye nyetsca luarënguëjana utámenënga mochanjunatse; y chë ndoñe judiëngna, Jerusalemoca entsángbioye mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mt 24.29-35, 42-44; Mc 13.24-37)

²⁵ Mëntsánaca Jesús tojánayana: “Chora bëts soyënga echantsinýna shinýiñe, juashconiñe y estrellëngüñe; y quem luarentša entsanga tša mochántsauatja, ndayá jamama ntsetatšëmbcá, chë mar béjaye y olëshënga corente echantsefshauenana causa. ²⁶ Entšanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espírituënga obenana bomnënga echanjángmëmana. ²⁷ Y chora entsanga mochanjinýe, chë Bëngbe Bëtsá Entšá tbojanbemá jantšetëshiñe echántsaboye, puerte obenánaca y corente buashinýinýaniñe. ²⁸ Chë soyënga jochnënguama chaojobojatšé ora, añemo šmochjentsetaye y bestšaše játsbanase šmochjarrepára, er chora echántsemna chë tšëngaftangbe atsebacayana ca” —Jesús tojánayana.

²⁹ Mëntsánaca Jesús tojanëyana jabuátambama: “Smochjinýe canye higo betiye o ndaye inye betínaca. ³⁰ Tojtsaisëjotsanama šmojinýe ora, jtsetatšëmbuana chë tšabe tempo ya yojtsaisobecuama. ³¹ Cachcá, chë soyënga yojsëchnëjuanama chašmojinýe ora, smochtsetátšëmbo chë Bëngbe Bëtsabe amëndayana ya yojtsobecuama.

³² “Ndegombre cbëyana, lempe chca echanjochnëgo, morsca entsanga cabá ndóbana ora. ³³ Celoca y quem luare echanjopochóca, pero atšbe palabra ndocna te queochaisopochóca.

³⁴⁻³⁵ “Cuedado smochtsebmna y ndoñe šmatjaleséncia tšëngaftangbe ainana bacna juabnéngaca chaotsemnama, jenomándama ntsobencá mocá enobuena causa, tmoye causa y nýe quem luarentša soyëngama enócochinýena causa; y tšëngaftanga prontánënga smochtsemna, nýe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiana canye uachmaniñe cuaftsemncá.

Er nÿetsca quem luarentša entsangbiamana chca echántsemna. ³⁶ Cuedado šmochtsebomna y yejuana šmochtsantješna; nÿe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanéyana.

³⁷ Jesús, bnëté Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama. ³⁸ Y nÿetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

22

Entsanga tmojanjuabó ntšamo jamëse Jesúsbioye jishachama (Mt 26.1-5, 14-16; Mc 14.1-2, 10-11; Jn 11.45-53)

¹ Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. ² Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiamana imojtsauatja.

³ Chora Satanás, Judas chë Iscariote ca uabobuatmabe ainaniñe bacna juabnënga tojanajó. Chánaca yojamna chë bnëtsana uta uatsjendayënguentsá; ⁴ y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatšine jayentšbáshejuanama. ⁵ As chënga imojóyejuaye, y Judas tmojanšbuachená crocénana chama jtatšetayana. ⁶ Y Júdasna añe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entsanga ora.

Jesús chabe uatsjëndayëngaftaca Bashco saná tojanse (Mt 26.17-29; Mc 14.12-25; Jn 13.21-30; 1 Co 11.23-26)

⁷ Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canÿe oveshá jóbana chora jasama. ⁸ As Jesús, Pedro y Juánbioye tojanéyana: —Motsata y saná šochjaprónta Bashco fiestama bënga mochjasama ca.

⁹ Chora chata tbojantjá: —¿Ndëmoca cojtseboše chë saná fchjapróntama ca?

¹⁰ Y Jesús tojanéjua: —Jerusalenentše chašojámashëngo ora, canÿe bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonÿaye ndëmuanÿe yebnentše cha yochjámashënguama; ¹¹ y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” ¹² As cha cmochanjínÿanÿiye canÿe bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

¹³ As chë útata tbojána, y tbojáninÿena lempe ntšamo Jesús tojanéyancá, y chentše chë Bashco saná tbojanprontata.

¹⁴ Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. ¹⁵ Chora Jesús tojanéyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. ¹⁶ Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

¹⁷ Chorna canÿe coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana, ¹⁸ chë

uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

¹⁹ Chentsana, tandëse tojanca y Bëngbe Bëtsábioye tbojtanchuá; tojan-jatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

²⁰ Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšàngaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. ²¹ Pero chë uayayëngbe cucuatšinë šochjaboshjoná, mesëshentše átšeftaca entsemna. ²² Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

²³ Chorna chë uatsjëndayënga tmojanontšé entjanayana, chënguentsá nda chë boshjuaná bëtsemnana.

Nda chë más uamaná yomna

²⁴ Chë uatsjëndayënga imojtsenatsësnaye chënguentsá nda chë más uamaná bëtsemnana. ²⁵ As Jesús tojanëyana: “Chë ndoñe judiëngbeñe, chë reyënga chëngbe entšàngbioye nýe ntšámñaca jtsamëndayana, y chentsa amëndayënga jtsamana, entšanga chëngbioye tšabe soye amënga ca chamotsëbobuátmama. ²⁶ Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservernacá. ²⁷ Er, ¿ndase chë más uamaná yomna, chë mesëshentše jasama tojotbemá o chë uajuatšnayá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservernacá.

²⁸ “Atšbe padecéniñe tšëngaftanga sempre átšeftaca šmondëtsemna. ²⁹ Chíyeca, atšbe bariëna, canýe amëndayana cbochanjátšataye, ntšamo atšbe taitá canýe amëndayana šojatštacá; ³⁰ chca, atšbe amëndayoca mesëshentše átšeftaca šmochanjase y šmochanjofsiye, y uámana tbemaniñe mo reyëngcá šmochanjotbiama, chë Israeloca bnëtsana uta pamíllanga entšangbiama chašmuayanama tšabá o ndoñe tšabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)

³¹ Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangaftaca nýe ntšámñaca jamama, mo chë trigo matënga tcojtsashatiyeynacá; ³² pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nýets ošbuáchiyana átšbeñe chacojtsatsbomna ora, chë inýe ošbuáchiyënga cochjújabuache átšbeñe sempre chamotsošbuáchema ca.

³³ Chora Simón tbojanayana: —Bëngbe Utabná, atše sëntseprontana ácaftaca cárceloye jámnaca y jobanámñaca ca.

³⁴ Y Jesús tbojanayana: —Pedro, atše cbëyana, cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuátma ca.

Chë más jabuache ora yojtsobeco

³⁵ Chentsana Jesús tojanatjá: —¿Chë ni shecnájaca, ni crocenánaca, ni she-cochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

³⁶ Chora tojanéyana: —Mora ndoñe chca; shecnaja tobomná, chëja chaue-socñe y crocenánama shecnébénaca; y nda ndoñe espadëja tondbomna, chabe quëfsaíya chaotsatábuiye y canye espadëja chauatobuámiñe. ³⁷ Er cbéyana, entseyta átseftaca chaopasá, ntšamo Bëngbe Bëtsabe uabemana palabrenguiñe atšbiama iuayancá, mëntsá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiama iuabemancá, mora ya echanjochnëngo ca —Jesús tojanéyana.

³⁸ As chënga tmojaniana: —Bëngbe Utabná, muentse uta espadëja entsemna ca.

Y japochócamna cha tojánayana: —Nye nyetsá ponto ca.

Getsemani luarentse, Jesús Bëngbe Bëtsáftaca tbojanencuentá
(Mt 26.36-46; Mc 14.32-42)

³⁹ Chentsana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. ⁴⁰ Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentsana yojoluára, mo canye ndëtsbé jutšenëntscoca nyetsá, y yojoshëntsamentšiye Bëngbe Bëtsáftaca jencuéntama. ⁴² Jesús mëntsá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

⁴³ Chca orna celocana canye ángel tbojánébëbocna, añemo chaotsebomnama juajabuáchama. ⁴⁴ Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosesse yojtsemna mo fshantsiñe buiñe cuaftsebuastëtjuancá.

⁴⁵ Bëngbe Bëtsáftaca jencuéntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnétsomañe, tša ngmënaca imojtsemna causa. ⁴⁶ Chora tojanéyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

Uayayënga Jesús tmojánishache
(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsoyebuambnantscuana, ba entšanga chentše tmojánashjajna. Chë Judas ca uabainá, canya chë bnëtsana uta uatsjëndayënguentsá, chë entšangbe natsana yojtseye. Cha yojobeconá Jesús juamóchama; ⁴⁸ pero Jesús tbojaniana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšinë cochjaboshjona ca?”

⁴⁹ Chë Jesúseftaca imojtsemnënga tmojáninye ntšamo chora yochjanopásama; as tmojaniana: —Bëngbe Utabná, ¿espadëjaca fšcotsatsejaye ca?

⁵⁰ Y canya chënguentsá, chë bachnangbe más uámana amëndayabe bochichnayábioye catsbioica matscuaše tbojtsantëtše, y tbojtsanëštjango. ⁵¹ Chora Jesús tojanéyana: —Cachcá monyá; nye nyetsá ponto ca.

Y chë bochichnayábioye chë matscuaše tbojánbojajo y tbojanshná. ⁵² Chentsana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadëjangaca y ngarotbéngaca šmojabo atše jishachama, mo atše canye bacá uamana entšá cuaftsemncá ca? ⁵³ Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora

tojobuache tsëngaftanga chca chašmomama, y Satanás ntšamo yojtsebošca tsëngaftangbeñe echantsemándaye ca” —Jesús tojanéyana.

Pedro tojánayana Jesúsbioye ndoñe bonjanabuátma ca
(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Chentšana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bēnocana ibojtséstona. ⁵⁵ Choca, chashja tsēntsaca, canye íñeshe tmojanangbotjó y entšanga chë shēconana imojtsetbiámána; y Pédrēnaca chentše chēngaftaca yojótbema. ⁵⁶ Chora, canye shembása chentša oservená, Pédrēbioye tbojáninýe chë íñe juachaca yojtsetbemana; tbojanonýinýe y tojánayana: —Muánaca cháftaca endánmēna ca.

⁵⁷ Pero Pedro ndoñe ca tojánayana, y chë shembásabioye mēntšá tbojanianya: —Sobrená, atše cha ndoñe quetsatabuatma ca.

⁵⁸ Ndoñe yapa bēn y inýa chábioye tbojataninýe y tbojanianya: —Acnaca chë uatsjendayēnguentsá condmēna ca.

Pero Pedro tbojanjuá: —Bacó, atše ndoñe quetsátsmēna ca.

⁵⁹ Chentša benēntscosna, inýa más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátstatšēmo ca.

Cachora, y Pedro cabá yojtsóyebuambnantscuana, canye ngallo yojacánta. ⁶¹ Chora Bēngbe Utabná yojobuértana y Pédrēbioye tbojanonýinýe; y Pedro chora yojenójuaboye ntšamo Bēngbe Utabná tbojanianama: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.” ⁶² As Pedro shjoye tojánbocna, y corente ngménaca yojtsenóbošachna.

Jesús imojtsáboyejuana
(Mt 26.67-68; Mc 14.65)

⁶³ Chë Jesús imojtsebojanýá entšanga cha imojtsáboyejuana y imojtsejantšetaye; ⁶⁴ y jtsabuchēntsacjuase, imojtsetjanaye: “¡Momalisiá, nda tcmēnjajantšetá ca!” ⁶⁵ Y imojtsóyenguaye, nýe mocá soyēnga jtsatsētsnayēse.

Jesús, chë judiēngbe uámana mándayēngbe delante
(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bētsējemēngcá amëndayēnga, bachnangbe amëndayēnga y ley abuátambayēnga tmojánenefna, y chēngbioye Jesús tmojanánatse. Choca tmojantjá: ⁶⁷ —Sméyana, ¿aca Bēngbe Bētsabe Uámana Uabuayaná, chë Cristo comna ca?

Y Jesús tojanéjua: —Aíñe ca tcojojáuyanēse, tsëngaftanga chama átšbeñe ndoñe quešmochatošbuáchiye. ⁶⁸ Y nderado tcojótjasna, tsëngaftanga ndoñe quešmochatojuá ca. ⁶⁹ Pero cam orscana, chë Bēngbe Bētsá Entšá tbojanbemá, chë Bēngbe Bētsá nýets obenana bomnabe catsbioica echántsatsbemana ca.

⁷⁰ Chora nýetscanga tmojantjá: —¿As, aca chë Bēngbe Bētsabe Uaquiñá comna ca?

Y Jesús tojanéjua: —Cach tsëngaftanga chca šmontsichamo; atše cha sēndmēna ca.

⁷¹ As chora chēnga tmojánayana: —¿Ndayama más entšanga šochjátējaboto Jesusbe contra chamuayanama? Er cach bēnga chabe uayásentšana chca tmonjouena ca.

23

Jesús, Pilatbe delante

(Mt 27.1-2, 11-14; Mc 15.1-5; Jn 18.28-38)

¹ Nÿetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. ² Y chentše tmojanontsé cha mal jaquédana, mëntśá: —Bënga fsënjínÿena mua entsabuatambá bacna soyënga, quem luarentśa entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canÿe reycá ca.

³ Chora Pilato Jesúsbioye mëntśá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atše ni mo canÿe soye chiyátinÿena, quem boyabása castiganá chaotsemnama jayanama ca.

⁵ Pero chënga más tmojanáyebuachena: —Nÿets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroa chca tonjabojatśé y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileocá tayojamnama. ⁷ Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalemntše cha yojtsemna. ⁸ Herodes Jesúsbioye tbojáninÿe ora, corente tojanoyej Juárez. Chana tempscana inaboše Jesús jinÿama. Cha ba soyënga Jesusbiama tojanuena, y yojtseboše jinÿama Jesús jamana canÿe bëts soye, Bëngbe Bëtsabe obenánaca. ⁹ Heródesna ba soyënga tbojantjá, pero cha ndocá tbojanjuá. ¹⁰ Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canÿe reycá; chentśana cachiñe Pilátbioye tmojesanichmó. ¹² Cach te Herodes y Pilato tbojtananenatsëtsaye; tempna chata ibojenáyata.

Jesusbiama chaóbana ca tmojánayana

(Mt 27.15-26; Mc 15.6-15; Jn 18.39–19.16)

¹³ Chentśana Pilato, chë bachnangbe amëndayënga, chë pueblentśa amëndayënga y nÿetsca entsanga tojánachembo, ¹⁴ y mëntśá tojanëyana: —Tšëngaftanga quem entśá átsbioye šmojuánatse, mo bacna soye entsángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiama šmonjayana, pero atśna ni mo canÿe soye chiyátinÿena, quem boyabása castiganá jtsemnama ibojtsemna ca jayanama. ¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canÿe ndoñe tonjobuachjanguá jóbanama chabotsemnama. ¹⁶ Chcasna, jabuache chamotsecastigá y chentśana chanjëtsboshjona ca —cha tojánayana.

¹⁷ Yojamna canÿe utamená jëtsboshjonana, ntšamo Bashco fiesta ora jamana imojanamancá. ¹⁸ Pero chora entsanga cánÿiñe tmojanáyebuachena: —¡Jesús chaóbana! ¡Barrabás matsboshjona ca!

¹⁹ Barrabás inautámena, mandadëngbioye ndëtsayaunanama chë bëts pueblentše entsanga tojánenautanama y entśá óbanaye causa. ²⁰ Pilato cachiñe

tojánayana Jesúsbioye jëtsboshjonama yojtšanboše ca; ²¹ pero entšangna más tmojtétanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtétanayana: —¿Ntsamo bacna soye mua tojobuachjanguá ca? Ni mo canye bacna soye chiyátinýena, mua jóbanama chabotsemnana. Chcasna, chanjacastíga y chora chanjëtsboshjona ca.

²³ Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyënjáná Jesús chamóbama. ²⁴ As Pilato tojanmandá ntsamo chë entšanga imojtsotjanañcá chaotsemnana; ²⁵ as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entšangbioye tojánenautanama y entšá óbanaye causa. Y Jesusna entšangbe cucuatšinë tbojánboshjona, ntsamo chënga tmojtsebošcá chamomama.

Jesús tmojan crucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojan cutsá, Jesusbe ústonoye chaotsambama.

²⁷ Y banga chë pueblentša entšanga imojtsëstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama. ²⁸ As Jesús chëngbioye tojanobuértana y tojanéyana: “Jerusalenentša shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna. ²⁹ Canye te echanjóshjango y chë te šmochántsicamo: ‘Tša tšabá chë shembásenga šëšona ndbomnëngbiana, chë quem luaroye šëšonga ndoñe tmonjëftsëshejajngbiana, y chë šëšonga ndoñe tmonjëftsabachengbiana ca.’ ³⁰ Chora entšanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ ³¹ Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betiyeca chca tmojtsamëse, ntsamo chë tojtsebuashá betiyeca mochjama ca?” —cha tojanéyana.

³² Jesúseftaca cruciñe jóbanama, útata bëts bacna soyënga ochjajnayátnaca imojtsënachaye. ³³ Chë “Obanabe Bestšashe ca” uabaina luaroye tmojánashjajna ora, Jesús tmojan crucificá y chë bëts bacna soyënga ochjajnayátnaca, canya chabe catšbioica y chë ínýana chabe uañicuayoica.

³⁴ Chora Jesús mëntšá tojánayana: “Taita, mëngbe bacna soye motsaperdónaye, er ntsamo montsamama chënga ndoñe quemátstatšëmbo ca.”

Chë soldadënga Jesusbe entšayamna, tsbanánoye tmojanëtšena, chënga jtenájatayama. ³⁵ Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mëntšá imojtse-natsëtsnaye: “Inýengna aíñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

³⁶ Soldadëngnaca Jesús imojtsáboyejuana; tmojanobeconá y untja vínoye imojtsefsëšnaye, ³⁷ y mëntšá imojtsatsaye: “¡Chë judiëngbe Rey tcomnëсна, cach aca mentsbocá ca!”

³⁸ Jesusbe bestšaše juatsboicna canye uabemana soye tmojananjo; chiñe mëntšá yojtšanábemana: MUA CHË JUDIËNGBE REY ENDMËNA ca.

³⁹ Canye bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnëсна, mentsbocá y bëndátnaca šmatsebocá ca.

⁴⁰ Pero chë inye bëts bacna soyënga ochjajnayana mëntšá tbojanácacana: — ¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbanama. ⁴¹ Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

⁴² Y chorna, quem bëts bacna soyënga ochjajnyá Jesúsbioye tbojanianyana: —Jesús, atšbiamna cochtenójuaboye aca reycá jabomándama chacojtabo ora ca.

⁴³ Y Jesús tbojanjuá: —Ndegombre cbëyana, mënté átšeftaca celoca, chë nyëtscanga oyejuayënga mondbetsemnoca, aca cochantsatsmëna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Nyëtsto orscana las tresëntscoñe nyëts quem luare yojtseibétata. ⁴⁵ Y shinye yojtsajbaná binynayana, y Bëngbe Bëtsabe bëts yebnentše yojújonýana entšëjua tsëntsaca yojtsenájataye. Chëjua bënëjua inauamna y chë tsatsëntsaca inaujonýana. ⁴⁶ As Jesús tojanáyebuachena: “Taita, atšbe espíritu acbe cucu-atšinë šcoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninýe ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Nyëtscá entšanga chë soye jinýama tmojánabënga, chca tojanopasama tmojáninýe ora, tmojanontšé jtangana enocochjantšetaye, ngménama. ⁴⁹ Pero Jesusbe nyëtscá ubuátmënga y chë shembásenga Galileocana tmojanastëngna, chaboca tmojanoquedá chë soyënga onýayiñe.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmëna canye boyabása, José ca uabainá, canye Judeoca pueblócá, Arimatea ca uabaina; cha inamna canya chë pueblentsá uámana amëndayënguentsá y canye tšabe entšá y nyëtscá soyënguiñe tšabá amá.

⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inye amëndayënga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe.

⁵³ José chë cruzocana Jesusbe cuerpo tbojtanëstjango, canye lino entšëjuaca tbojanandmaná y canye cuevëshiñe, peñëshiñe pormániñe, tbojanjajó. Chentše cabá ndocná mondëjajo. ⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínýana.

⁵⁵ Chë shembásenga, Galileocana Jesús tmojantjëmbabanga, tmojána y chë cuevëshe tmojáninýe, y tmojanrrepará ntšamo Jesusbe cuerpo tmojanjajoma.

⁵⁶ Yebnoye tmojtaná orna, tmojanprontá botamana uanguëtše béjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyíñe yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chë inye semana bojatšéntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtše soyënga. ² Pero choye tmojánashjajna

orna, tmojáninÿena chë cuevëshoye amashjuanentša ndëtšbé chentšana juanániñe, ³ y choye tmojánamashjna ora, Bëngbe Utabná Jesusbe cuerpo ndoñe tmonjáninÿena. ⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entšayá uichëtjonata chentše tbojabántsaye. ⁵ Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndayeca obanëngbentše chë vida totsobomñá šmojtsenguá ca? ⁶ Muentše cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: ⁷ ‘Chë Bëngbe Bëtsá Entšá tbojanbemá bontsemna bacna soye amëngbe cucuatšiniñe chamoboshjonama, chamocrucificama y unga tianoye cháuatayenama ca’ ” —chata tbojánayana.

⁸ Chora chë shembásenga Jesusbe palabréngama imojtenójuaboye, ⁹ y chë cuevëshentšana tmojtaná ora, chë tšabe noticiënga chë bnëtsana canÿe uatsjëndayënga y inÿe entšángbioye tmojanacuntá. ¹⁰ Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga. ¹¹ Pero chë uatsjëndayëngna mëntšá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

¹² Pero chentšana, Pedro tojëftsantsbaná y ochamanana chë Jesús tmojanjajó cuevëshoye tojána. Y choca yojtsemna ora, yojtsejbéna tsoye jontješiyama, pero nÿe ena entšëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe (Mc 16.12-13)

¹³ Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canÿe kilómetroca. ¹⁴ Chata ibojtsayencuëntaye lempe ntšamo tojanopasama. ¹⁵ Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobeconá y chátaftaca cánÿiñe yojtsaye; ¹⁶ masque imojtsonÿaye, ndoñe ibontsobena cha jótëmbana. ¹⁷ Jesús tojanéyana: —¿Ndayama benachiñe šuabanencuëntaye ca?

As chata ngmënaca ibojtsaye, ¹⁸ y canÿa, Cleofás ca uabainá, tbojanianya: —¿Nÿe aca cojtsemna, inÿe luarocana ashjanganoná Jerusalenentše oyená, ndayá chentše quem diënga yopasánama ndëtatsëmbuá ca?

¹⁹ Chora cha tojanéyana: —¿Ndaye soyënga ca?

Y chata tbojanianya: —Chë Jesús Nazaretocáftaca tonjopasá soyëngama. Cha enjamna canÿe Bëngbe Bëtsabe juabna oyebuambnaya, puerte obenana bomná ndayá jamama y jayanama, Bëngbe Bëtsabe delante y nÿetsca entšangbe delante. ²⁰ Y ntšamo, chë bachnangbe amëndayënga y chentša mandadënga inÿengbe cucuatšiniñe tmonjáboshjona, jóbanama ibojtsemna ca entšanga chamuayanama y chamocrucificama. ²¹ Bënga chabiamá fsënjanobátmana, Césarbe cucuatšentšana Israeloca entšangbe atsebacayá chaotsemnana; pero morna ya unga te entsemna chca tonjopasá. ²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá, ²³ y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanÿe y chënga catmënjayana cha ainá yojtsatsmëna ca. ²⁴ Bëngbentšana baseftángnaca chentšana chë cuevëshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmonjëftsiniñe ca —chata ibojtsichamo.

²⁵ As Jesús chata tojanéyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! ²⁶ ¿Mo ndoñe yonjamna chë Uámana Uabuayaná chë soyënga chaosufrima, y chentšana nyëtsca entšanga corente cha chamuatschuama ca?

²⁷ Chentšana Jesús tojanontsé chata jábuayenana, lempe ntšamo chabiana yojanoyebuambnacá chë Bëngbe Bëtsabe uabemana palabrënguiñe; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangañnaca.

²⁸ Chë ibojétsaye puebloye imojtsebeconá ora, Jesús tojanma mo más chcoye cuaftsacá. ²⁹ Pero chatna tmojanatarié chentše chaotsoquedáñama, mëntšá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. ³⁰ Chentšana tojanopasá, juasama mesëshentše imojtsetbiámama ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjédayata ibojobenaye Jesús jótëmbana; pero chana nyë ndeolpe yojuenatjëmbe. ³² Chora chata ibojtsenatsëtsnaye: “Chë benachiñe Bëngbe Bëtsabe uabemana palabrëngama šondabuayiyná ora, ndegombre bëngbe ainaniñe más bontseboše cha más chašotsabuayiynama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojáninýena chë bnëtsana canýe uatsjédayënga cánýentše imojtsemna y chëngbe enutëngnaca; ³⁴ y mëntšá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjédayënga tojánebübuacna
(Mt 28.16-20; Mc 16.14-18; Jn 20.19-23)*

³⁶ Chë uatsjédayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanéyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canýe añemëse imojétsonýaye ca imojtsejuabnaye. ³⁸ Pero Jesús tojanéyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? ³⁹ Atšbe cucuatšënga y atšbe shecuatšënga minýënga; šmobjoajo y šmochanjinye. Cach atše séntsemna. Canýe añemësna, ni mëntšena ni betašënga ntsebomnana; pero tšëngaftanga šmontsonýá, atšna aíñe ca” —tojanéyana.

⁴⁰ Chca yojsichámëse, chabe cucuatšënga y chabe shecuatšënga tojaninýanyé. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canýe tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentšana Jesús tojanéyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiamama iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

⁴⁵ Y chora chë uatsjédayënga, Jesúsbeyeca tmojanobená chë Bëngbe Bëtsabe uabemana palabrëngama josértana. ⁴⁶ Chentšana Jesús tojanéyana: “Ntšamo atšbiamama iuabemancana yomna, chë Bëngbe Bëtsá Entšá tbojanbemá

chaosufrí y unga tianoye chauatayena ca. ⁴⁷ Y morna atšbe uabaina jayanëse, átšbeñe betsošbuáchema, nyets quem luarentše šmochjontša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalenentše chaobojatsé. ⁴⁸ Tšëngaftanga atšbiana soyënga šmonjinÿe y šmondétatsëmbo. ⁴⁹ Atšbe Taitabe šbuachenaná, tšëngaftangbiana chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

Jesús celoye tojtantsjuá
(Mc 16.19-20)

⁵⁰ Chentšana, Jesús chabe uatsjëndayënga ínÿoye tojanënatse, Betania pueblo béconana. Y chabe buacuatsënga játsbanase, Bëngbe Bëtsá tbojanimpadá chë uatsjëndayënga tšabe bendicionënga chamóyëngacñama. ⁵¹ Chca yojtsamëntscuana, cha chëngbentšana tojanoluaré y tojanontšé celoye játsjuana. ⁵² Chë uatsjëndayëngna, Jesús tmojtanadorá chentšana, Jerusalenoye oyejuayënga tmojtaná; ⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

¹ Quem luare ndobojátša ora, Cristo, chë Bëngbe Bëtsabe Uámana Oye-
buambnayana ya yojtsemna; chora cha, chë chca uabainá, Bëngbe Bëtsáftaca
yojtsanmëna, y cachá Bëngbe Bëtsá inamna. ² Ndegombre cha, chë temp-
scana Bëngbe Bëtsáftaca yojtsanmëna. ³ Cháftaca, Bëngbe Bëtsá lempe to-
janma; cháftaca ndóñesna, lempe ntšamo mora yomncá, Bëngbe Bëtsá tondaye
matënjanna. ⁴ Cachábeñe nÿets vida inamna, y quem vídaca tojánabo quem
luarentša entsangbe juabnënga jabuábinÿayama. ⁵ Cha tonjánabo moye, chë
entsangbe juabnënga ndoñe binÿniñe yonjamnoye, chiñe jacobínÿayama.
Cha sempre chca yobínÿna, y Satanás chë entsangbe juabnënga ndoñe
binÿniñe chaondëtsemnama amá, ndoñe yondobena chë binÿnayabe obe-
nana jtsejuánana.

⁶ Inamna canÿe boyabása, Juan ca uabainá; y Bëngbe Bëtsá tbojanichmó,
⁷ binÿnayabiama chaóyebuambama; entsángbeñe binÿnayabiama cháuyanama,
chca, ntšamo Juan chë binÿnayabiama tojayana soyëngaca, nÿetscanga
Jesúsbeñe chamotsošbuáchema. ⁸ Juan ndoñe yonjamna chë binÿnayá.
Cha inamna canÿe ichmoná, chë nda binÿnayá yomnabiama entsángbeñe
chauabáyanama. ⁹ Chë ndegombrá quem luaroye tonjánabo chë entsangbe
juabnënga jabuábinÿayama.

¹⁰ Chë Bëngbe Bëtsabe Uámana Oyebuambnayana quem luariñe yojt-
sanmëna; masque cháftaca Bëngbe Bëtsá quem luare tojanma, nda cha
yojamnama muentša oyenënga ndoñe monjántatsëmbo. ¹¹ Cachabe lu-
are entsángbioye tonjánabo, y entsanga ndoñe tmonjánbošena cha jofjana.
¹² Nÿetscanga, ndëmuanÿenga cha tmojanëbuaja y chábeñe tmojtsošbuáchenga,
cha derecho tonjanatsatá jtsobenama Bëngbe Bëtsabe básenga ca jtsabáinama.
¹³ Quem ošbuáchiyëngna, chca jtsemnama ndoñe tmonjanobená entsangbe
buiñentsana tmojanonÿáyeca, o ndaye entsabe juabnentsana. Nÿe Bëngbe
Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oyebuambnayana, entsá tojanóbema,
y quem luare bëngaftaca yojëftsiyena. Cha yomna chë Bëngbe Bëtsabe
nÿe canÿe Uaquiñá; chíyeca bënga tifjáninÿe chabe bëts obenana y chabe
tsabe juabna, chë Bëngbe Bëtsábentsana tojanóyëngacñana. Cha corente
jtsababuánÿeshanëse šojánanÿena y yojëftsiyena ntšamo ndegombre inamncá.
¹⁵ Juan mëntsá chabiama yojanáyebuache: “Chabiama sënjanoyebuambná, chë
ndabiama chora atše sënjánayana, chë átšbentsana jabamana atšbiamá más
uamaná endmëna, er atše cabá ndonÿna orna, cha ya yojtsemna ca.”

¹⁶ Cha tša tsabe ainana bómnayeca, bënga nÿetscanga mallajta tsabe ben-
dicionënga tmojóyëngacñe. ¹⁷ Moisesbiajana tifjanóyëngacñe chë Bëngbe
Bëtsá tojanmandá soyënga. Pero Jesucristbeyeca, Bëngbe Bëtsá tsabe bendi-
cionënga bëngbiamá tojama y chë ndegombre soyënga bënga tmojëftsashjache.
¹⁸ Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá
ibobomná, cach Bëngbe Bëtsá yomna; y cha, Bëngbe Bëtsá chë Taitáftaca
cánÿiñe mo canÿacá yomna. Mua, chë Uaquiñá, bëngbiamá tojama, Bëngbe
Bëtsá juabuátmanama chaotsopodénama.

*Juan chë Ubayaná Jesucristbiamá tojanabuayená
(Mt 3.11-12; Mc 1.7-8; Lc 3.15-17)*

¹⁹ Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. ²⁰ Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanējua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanējua: —Ndoñe ca.

²² Chora chënga tmojanियana: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

²³ Y Juan mëntsá tojanējua: —Atše sëntsemna chë ndabiama Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canÿe abuayiynayá echántsemna, y entšanga mëntsá echántsubuayiynaye: Bëngbe Uabná echanjabo ca. Mo nda canÿe benache tojtseprontacá, tšëngaftángnaca cachcá, cha jabama tšabe juabnëngaca šmochtseprontana ca.”

²⁴ Chorna, báseftanga chë fariseungbe ichmónënguentsana, ²⁵ Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnésna, ni Elías, ni chë Bëngbe Bëtsabe juabna jabóyebuambayama jabamá ndoñesna, ¿ndáyeca entšanga cojtsëbayana ca?

²⁶ Chora Juan tojanējua: —Atšna, béjayeca entšanga sëndëubáyana. Pero tšëngaftangbeñe canÿa entsemna; cha ndoñe quešmatábuatma; ²⁷ y cha atšbe ústonoye echanjáshjango. Atše mercedo taitsatobuajoñe, ni mo jotsejbiyama, chabe shecochëtjonëshentsa corriëja jajafjonama ca.

²⁸ Chca tojanopasá, canÿe pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

Jesús chë Bëngbe Bëtsabe Oveshatema ca uabainá

²⁹ Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinÿe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna. ³⁰ Atše chabiama cbonjutsëtsná, mëntsá sënjánayana ora: ‘Atšbe ústonoye canÿa echanjáshjango. Cha atšbiama más uamaná endmëna, er atše cabá ndonÿna ora, cha ya yojtsemna ca.’ ³¹ Tempna, cach atše ndoñe quetsjátantatsëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

³² Chentšana Juan mëntsánaca tojanobuambá: “Chabiama mëntsá bom-inÿe sënjanajó: chë Uámana Espíritu, mo canÿe palomatemcá, celocana tonjánastjango y quem boyabásabe juatsbuañe tonjanototoná. ³³ Atše cabá ndoñe quetsjátantatsëmbo nda cha bëtsemnana, pero chë béjayeca jubáyama šonjanichmó cha, mëntsá šonjanियana: ‘Nda chacojinÿe, chë Uámana Espíritu jastjanguana y chabe juatsbuañe jototonana, chábeyeca atše chanjíchmu chë Uámana Espíritu entšangbe ainaniñe cháuamashënguama ca.’ ³⁴ Y morna, atše aíñe chca tijinÿe, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

Chë Jesusbe natsana ústonënga

³⁵ Yëfsana, Juan chabe uatsjéndayënguentsana útataftaca cachoca yojtésemna. ³⁶ Jesús yojtsachnëjuanama, Juan tbojáninÿe ora, tojanëyana: “Sochjinÿe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

³⁷ Chora chë Juanbe uta uatsjéndayata, chca tbojanuena ora, Jesús tmojanasto. ³⁸ Jesús tojesanontješé y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojaniana: —¿Rabí, ndayentše icoyena ca? (Rabí endayana “Buatëmbayá ca”.)

³⁹ Chora Jesús tojanëjua: —Mabo y sochjinÿe ca.

As chata tbojána y tbojáninÿe ndayentše cha yojaniyenana. Y chentše cháftaca tojéftsana jëtana, ya jetiñe mo las cuatro ora yojtsemna causa.

⁴⁰ Chë Jesusbiana oyebuambnayana Juánbioye tbojanóyeunata y Jesús tbojanasto útatentšana cánÿana Andrés ca yojanabaina; cha yojamna Simón Pédrëbe catšata. ⁴¹ Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniana: “Chë Bëngbe Bëtsabe Uámana Uabuayaná, Cristo, fsënjínÿena ca.”

⁴² Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtsbé ca”.)

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniana: “Smasto ca.”

⁴⁴ Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. ⁴⁵ Chentšana Felipe tojána Natanael janguanguama; y tbojaniana: —Chë ndabiana leyënga librëšangañe Moisés tojanábema cha fsënjínÿena ca. Cachabiana, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojaniana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsíngña ca.

⁴⁸ Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetšoye condëtsomñe ora ca.

⁴⁹ As, Natanael tbojaniana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

⁵⁰ Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetšoye tcbójinÿe ca tcbójauyanama? Ndegombre, chë soyama más bëts soyënga cochanjinÿe ca.

⁵¹ Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

2

Canÿe casamento Galilea luaroca, Caná pueblentše

¹ Chentsana unga tianoye, canye casamento inamna, canye pueblentse Caná ca uabáinentse, Galileoca. Chë oboyejuayoca Jesusbe mamá yojtsemna.

² Jesús y chabe uatsjéndayëgnaca chë casamentoca ófjanënga imojtsemna.

³ Chë oboyejuayentse, vínoye yojtsopochóca y Jesusbe mamá tbojaniana: — Ya tondaye vínoye quemátsbomna ca.

⁴ As, Jesús tbojanjuá: —Mama, ¿ndáyeca chca atse šcojtsatsá? Atšbe ora cabá ndoñe ntjoshjanguana ca.

⁵ Chentsana, chabe mamá, chentsa oservénënga tojanéyana: —Lempe šmochjama, ntšamo cha chacmojayuancá ca.

⁶ Chocna, chnënguana ndëtsbé matbaja inamna. Chca matbajënguentša béjayeca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábenga jtsatsmënana. Cada matbajiñe, mo shachna o canyëfta bnëtsanájua béjaye yojanába.

⁷ Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë béjaye Jesús vínoye tojanbemiye tojanftantiá, ndémocana yojóbcnana ntsetatšëmbcá. Pero chë oservénëngna aíñe imojtsetátšëmbo ndémocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, ¹⁰ y tbojaniana: “Nyetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

¹¹ Ntšamo Jesús tojanmcá Caná pueblentse, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanýé; y as, chabe uatsjéndayënga chábeñe imojtsošbuaché.

¹² Chca tojanopasá chentsana, Jesús canye pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjéndayënga cha tmojantjëmbambá, y choca baseftatescama tmojanoquedá.

Jesús Bëngbe Bëtsabe bëts yebnentšana bacna entsanga tojtanëbuacna

(Mt 21.12-13; Mc 11.15-18; Lc 19.45-46)

¹³ Ya canye judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. ¹⁴ Jerusalenoca, Bëngbe Bëtsabe bëts yebnentse, Jesús tojánanyëna uacnënga, oveshënga y paloma enënga, y entsángbioye crocénana atrócyënga, chëngbe luarënguenache imojtsetbiámana. ¹⁵ Jesús chca tojánanyë ora, biajënga tojanaca, tjanjanëja tojanobopormá, y Bëngbe Bëtsabe bëts yebnentšana nyetscanga tojtanëbuacna, chëngbe oveshënga y uacnëngaca. Chentsana Jesús, Bëngbe Bëtsabe bëts yebnentšama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. ¹⁶ Chë paloma enëngna Jesús tojanéyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentse, mo cánýentse jiyama luarentse cuaftsemncá ca!

¹⁷ Y as, chabe uatsjéndayënga tmojanenojuabó ntšamo Bëngbe Bëtsabe uabemana palabrënguñe iuayanama: “Bëngbe Bëtsabe yebna jtseboguianama juabna, nyets átšbeñe entsemna ca.”

18 Chora, judiënga Jesús tmojantjá: —¿Ndaye bëts soye cochjama bënga chaščuinÿanÿema, aca ndaye deréchoa bëngaftaca chca cojtsobenama ca?

19 As Jesús tojanéjua: —Quem Bëngbe Bëtsabe yebna menásatajchca, y atše unga tese chtëtsbaná ca.

20 Chora chë judiënga tmojaniana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

21 Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. 22 Chama, Jesús obanënguentsana tojtana ora, chabe uatsjëndayënga tmojanenojuabó ntšamo muentše cha tojanéyanama. Chca ora, Bëngbe Bëtsabe uabemana palabrënguñe y Jesús chora tojánayana palabrënguñe más chënga imojtsošbuaché.

Jesús nÿetsca entsangbe juabna iuábuatma

23 Jesús Jerusalenoca chë Bashco fiestama yojtsemnëntscuana, entsanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché. 24 Pero Jesús chëngbeñe ndoñe yontsošbuaché, cha nÿetscanga yojanëbuatma causa. 25 Y Jesús ndoñe bonjanájaboto chë entsangbe soyëngama chabotsebuaiynama, er cachá entsangbe ainaniñe nÿetsca juabnënga yojanábuatma.

3

Jesús y Nicodemo

1 Inamna canÿe boyabása Nicodemo ca uabainá. Cha yojamna farise-unguentšá y judiëngbe canÿe amëndayá. 2 Chana ibeta Jesúsbiocyte tojána y tbojaniana: —Buatëmbayá, bënga fsëntsetatsëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatsëmbo ca —cha tbojaniana.

3 Chora Jesús tbojanjuá: —Ndegombre cbëyana, nda ndoñe cachiñe ton-tonÿná, cha ndoñe quenátobena Bëngbe Bëtsabe amëndayana jinÿama ca.

4 Y Nicodemo tbojantjá: —¿Ntšamo, canÿe entsá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoobenana cachabe mamabe cuerpiñe jtamashënguana cachiñe jtónÿnama ca.

5 Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama. 6 Nda bëtsëtsabentsana tojonÿná cha, quem luarentša entsangcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espíritu ainaniñe bomná. 7 Ndoñe matenjnanana ntšamo tcbonjauyanama: “Nÿetscanga entsamna cachiñe jtónÿnama”. 8 Chë binÿia ndëmuajana tojtseboše jtsemnana, chëjana jtsanana. Masque entsanga, chë binÿiayama jtsuenanana, ndoñe ntsetatsëmbuana ndëmocana yobama y ndëmoye yojtsoma. Cachcá, tsëngaftanga ndoñe quešmátstatšëmbo ntšamo entsanga chë Uámana Espíritbeyeca tmojtsónÿnama; pero tsëngaftanga šmontsetátšëmbo aíñe chca yomnama ca —Jesús tbojaniana.

9 Chora Nicodemo tbojantjá: —¿Ntšamo chca nántsemna ca?

10 Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatsëmbo ca? 11 Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinÿe soyëngama ndegombre bëtsemnana fsëntsichamo. Pero tsëngaftangna, chë cbontsëtsëtsná soyënguñe ndoñe quešmatošbuaché. 12 Atše, quem luarentša soyëngama sënjoyebuambá y

tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsëtsnase?

¹³ “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aíñe, chë Bëngbe Bëtsá Entšá tbojanbemá. ¹⁴ Y chcase, ntšamo Moisés entšanga ndoyenoca bronce mëtšcuaye tsbanánoca tbojananguësëtjca, šoquënga tšabá chamotsatsmënema; cachcá entsemna, Bëngbe Bëtsá Entšá tbojanbemá entšanga chamuatsbanama; ¹⁵ chca, nÿetscanga chábeñe tmojtsošbuáchenga, chë nÿetsca tescama yomna tšabe vida chamotsebomnama ca” —Jesús Nicodémbioye tbojaniyana.

Ntsachetšá Bëngbe Bëtsá entšanga iuababuánÿeshana

¹⁶ Mëntšánaca Jesús tojánayana: —Bëngbe Bëtsá quem luare entšangbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnama. ¹⁷ Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiamababáyanama ntšamo tmojamama castigánënga chaotsamnama ca, sinó, entšanga chábeyeca atsebácanënga chamotsemnama.

¹⁸ “Nda Bëngbe Bëtsabe Uaquiñábeñe tojtsošbuáchebiamabababáyanama ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamabababáyanama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. ¹⁹ Chca, chë ndoñe tmontsošbuáchengbiamabababáyanama cha ya tojayana, ntšamo tmojamama castigánënga chamotsemna ca; er chë entšangbe juabnënga binÿnayá quem luaroye tojabo, pero ba entšanga tmojábošena jtsomñana, chë entšangbiamabababáyanama juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana. ²⁰ Chë bacna soyënga tojtsamá ndoñe ntsebošana, chë binÿnayá chabe bacna soyënga chabuñÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana. ²¹ Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiamabababáyanama chabuñÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachiñe Jesucristbiamabababáyanabuayená

²² Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entšanga ubáyana. ²³ Cach tempo, Juanënaca entšanga yojanëbáyana Enonoca, Salim béconana, er choca bëtscá béjaye inabinÿna. Ba entšanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontšé inÿe judíoftaca enatsëtsnayana ntšamo tempo judiënga chë jtsacuéntšabiamabababáyanama imojanámanama. ²⁶ Chora, chënga Juánbioye tmojánabo y tmojaniyana: —Buatëmbayá, chë Jordán chenguánoica ácaftaca enjamná, ndabiamabababáyanama tša tšabá conjanoyebuambná, mora entšanga entsëbayana y nÿetscanga chamontsëstona ca.

²⁷ As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. ²⁸ Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe

Uámána Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamá entšanga jabábuayenama. ²⁹ Chë tobiasë tojtsohouamá ora, chë bobontse chábioye jtsebomnana; y chabe amigna, chabiamá jtsobátmanana y chë bobontse bouamnabe oye-buambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtšamama y yojtšóyebuambnama sëntsuenana ora, átšnáca corente oyejuayá sëntsemna. ³⁰ Cha bontsemna más uamaná jtsemnana, pero atše šontsemna más nduamaná jtsemnana ca — Juan tojanéyana.

Ntšamo yomna chë celocana tojabá

³¹ Mëntsánaca Juan tojánayana: “Chë tsbanánocana tojabá, nÿetsca entšangbiamá más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiamá más uamaná endmëna. ³² Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. ³³ Nda ntšamo cha tojtšóyebuambnañe tojtšošbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámána Espíritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábioye bondbobonshana, y chë Uaquiñábioye obenana tbojatšetá nÿetsca soyënguiñe jtsemándayama. ³⁶ Nda chë Uaquiñábeñe tojtšošbuaché, chë nÿetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

4

Jesús y chë Samaria luaroca shembása

¹ Chë fariseunga tmojanuena Jesús, Juanbiamá más ústonënga yojtšabamnama, y más entšanga yojtšébáyanama. ² Pero ndegombre, cach Jesús ndocnábioye bonÿanábayana, sinó chabe uatsjédayënga. ³ Bëngbe Uabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

⁴ Choye jtamna ibojamna Samaria luarëjana jachnënguana. ⁵ Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojëftsanlargá fshantse béconana. ⁶ Choca yojamna cánÿentše atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nÿetsto ora, chentše Jesús yojtsemna, aniñe uamëntsñayá, chë atëfjóniñe batsjaca yojótbema. ⁷⁻⁸ Chabe uatsjédayëngna chë pueblöye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuatšetá ca.

⁹ Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

¹⁰ Chora Jesús tbojanjuá: —Aca mo cojtsetátšëmbo nÿe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

11 Y chë shembása tbojaniyana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente boca endmëna; y as, ¿ndayentsana cochjobenaye béjaye vida bomniye atse juabu-atsetayama? 12 Bëngbe tempsca bëts taitá Jacob, quem atëfjóniñe bëngbiamatojéftsanboshjona. Cachá, chabe básenga y chabe bayënga muentšana búyeshe tmojëftsanofsé; y ¿aca chabiamat más bëtsá comna ca? —chë shembása yojtsichamo.

13 As Jesús tbojanjuá: —Nýetscanga chë quem búyeshentsana tmojofšenga, chënga cachiñe echantëtëjuendaye. 14 Pero chë chanjuabuátsetaye búyeshentsana tojofšé chana ndocna te cachiñe quebochëtajuendaye. Cha chanjuabuátsetaye búyeshna, chábeñe echántsemna mo cánýentše béjaytema obocaniñcá, chë nýetsca tescama yomna tšabe vida jtsebomnama ca —cha tbojaniyana.

15 Chora chë shembása tbojaniyana: —Señor, chca búyeshe šmabuatšetá, as atse ndoñe cachiñe chašondetsajuendama, ni búyeshe juafcama moyejtsaboyama ndoñe chašondëtsemnama ca.

16 As Jesús tbojaniyana: —Motsa acbe boyá jachembuama y cochjésabo ca.

17 Chora chë shembása tbojanjuá: —Boyá ndoñe quetsátsbomna ca.

As Jesús tbojaniyana: —Tšabá tcjayana boyá ndoñe condbomna ca. 18 Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

19 Chë shembása chca tojanuena ora, Jesúsbioye tbojaniyana: —Señor, mora atse sëntsetatšëmbo, aca canya Bëngbe Bëtsabe juabna oyebuambnaya comnama. 20 Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

21 Chora Jesús tbojanjuá: —Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana. 22 Tšëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentsana endabó. 23 Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnéngaca chábioye mochántadorana. Er chë Taitá entseboše chë chábioye adórayënga chca chamotsamama. 24 Bëngbe Bëtsá, Espiritu endmëna; y chë chábioye adórayënga entsamna, chë Uámana Espiritbeyeca y ndegombre juabnéngaca cha jtsadoránana ca —Jesús tbojaniyana.

25 Chora chë shembása tbojaniyana: —Atse sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášhjangor na, cha nýetsca soyëngama cašochjabuayená ca.

26 As Jesús tbojaniyana: —Atse, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtanashjajna, y tmojt-sanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

28 Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entšanga tojanëyana: 29 “Mabënga canye boyabása jinýama ca. Cha atse šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

³⁰ As chë entsanga chë pueblócana tmojánbocana y Jesús yojtsemnoye tmojánashjajna. ³¹ Chca yojtsopasánentscuana, chë uatsjéndayënga Jesúsbioye imojtseimpadana: —Buatëmbayá, batsatema mose ca.

³² Pero cha tojanéyana: —Atše canýe soye jasama sëntsebmna. Tšëngaftanga chë soyama ndoñe quešmátstatšëmbo ca.

³³ Chora chë uatsjéndayënga tmojanontsé entjanayana: —¿Nderado nda jasama chabiama tojiyëbo ca?

³⁴ Y Jesús tojanéyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna.

³⁵ Tšëngaftanga šmondbétsichamo: “Cabá canta ishinye entsashbena jaja saná chaotsebínýnama ca”; pero atše cbéyana: Minýënga tša entsanga moye montsabëbana; chënga montsemna mo jajañe saná játbanama tojtseprontancá.

³⁶ Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tšëngaftanga cmontsamna atšbiana entsanga júbuajana, chë nyetsca tescama yomna tšabe vida chamotsebmnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsanga átsbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánýiñe oyejuayënga mochántsemna. ³⁷ Quem entsangbe ichámuana, canýe ndegombre soye endmëna: “Chë jená canýa jtsemnana, y atbanayana inýa ca.” ³⁸ Atše tšëngaftanga cbonjichamó canýe soye játbanama, y tšëngaftanga tondaye chešmatsma chca chaotsebínýnama. Inýënga chiñe bëtscá tmonjëftsetrabája, y tšëngaftangna, chëngbe trabajënguentsána šmojologañe ca —Jesús tojánayana.

³⁹ Bëtscá entsanga, Samarioca pueblentšënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.” ⁴⁰ As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjëtana. ⁴¹ Y más entsanga, cach ntšamo Jesús yojtsanëtsëtnacá tmonjanuena ora, chábeñe imojtsanošbuaché.

⁴² Y chë shembása chë entsanga tmojanianyana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entsangbiana Atsebacayá ca.”

Jesús, canýe mandado uajabuachanabe básabioye tbojanshná

⁴³ Uta te chentšana, Jesús Samariocana tojáisanbocna y Galileoye tojataná. ⁴⁴ Cach Jesús mëntšá tojánayana: “Canýa Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.”

⁴⁵ Galileoca oyenënga Jerusalenoye tmojána, y tmojáninýe nyetsca bëts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtashjango ora, chënga tšabá tmojtanfja.

⁴⁶ Galileocna, Jesús cachiñe Caná pueblöye tojéshanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum pueblöca šocá yojtsejájona. ⁴⁷ Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuet-seshnáñama, er ya jtsóbanama yojtsemna ca. ⁴⁸ As Jesús tbojanianyana: —Tšëngaftanga, Bëngbe Bëtsabe obenana jinýanýiyama bëts soyënga atše jamama ndoñe šmonjinýëse, átsbeñe ndocna te ntsošbuáchiyana ca.

⁴⁹ Chora, chë mandadbe uajabuachaná Jesúsbioye tbojaniyana: —Taita, betscó mabo, atšbe uaquiñá cabá ndóbana ora ca.

⁵⁰ As Jesús tbojaniyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniyancá y tojtaná.
⁵¹ Cha yojtsataye orna, chabe oservénenga tmojánbocana jajébenguama y tmojaniyana: —Acbe uaquiñá tšabá entsatsmëna ca.

⁵² As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

⁵³ Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nyëtsanga chabe yebnentše oyenënga Jesúsbeñe imojtsanošbuaché.

⁵⁴ Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinÿanÿiyama, Galilea luaroca.

5

Jesús canÿe jama ndobenábioye tbojanshná

¹ Baseftayté chentšana, chë judiënga canÿe oboyejuaye te imojtsebomna ora, Jesús Jerusalenoye tojána. ² Choca, chë Oveshëngbe amashjuana ca uabáinentše yojamna canÿe binche uafjónaye, entsangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. ³ Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. ⁴ (Nderado nderado, Bëngbe Bëtsábica canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) ⁵ Chë šoquënguiñe canÿe boyabása inamna, unga bnëtsana y posufta uatama jama ndobená. ⁶ Jesús chë jajonábioye tbojáninÿe ora y ba uatama chca yojamnana tojántatšëmbona ora, tbojantjá: —¿Quecojtseboše tšabá jtsatsmënana ca?

⁷ Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

⁸ Y Jesús tbojaniyana: —Matëtsbaná, acbe tjuashe mesocñe y matontšé jóyenana ca.

⁹ Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna. ¹⁰ Chíyeca, chë tbojanshnábioye chë judiënga tmojaniyana: —Mëntena ochnayté. Mënté ndoñe quenátópodena aca tjuashe jtsecutsnana ca.

¹¹ Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

¹² As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojauyaná ca?

¹³ Pero chë shnaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjëmba.

¹⁴ Chentšana, Jesús Bëngbe Bëtsabe bëts yebnentše chë boyabásabioye tbojáninÿena y tbojaniyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamana puerte mal echanjopása ca.

¹⁵ Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

¹⁶ Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. ¹⁷ Pero Jesús tojanéyana: “Atšbe Taitá nÿets tempo tšabe soyënga endbëtsama; cachcá, átšnaca tšabe soyënga sëntsama ca.”

¹⁸ Jesús tojanma ntšamo ochnayté ndoñe yonjanapodencá, y Bëngbe Bëtsabiamama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

¹⁹ Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nÿe cachabe cuenta tondaye quenátobena jamana. Cha jtsonÿayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. ²⁰ Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinÿinÿná; y más bëts soyënga bochanjinÿinÿiye, chë soyëngama tšëngaftanga chašmenjanama. ²¹ Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanÿenga cha tojtsebošcá. ²² Chë Taitá ndocnabiamama jatichámuana tšabá o ndoñe tšabá yontsama ca. Chabe Uaquiñábioye nÿets obenana tbonjatšetá nÿetscangbiamama jayanama tšabá o ndoñe tšabá tmontsamama. ²³ Chca, chënga chamuinÿinÿé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nÿetscanga mondbetsinÿinÿinaycá. Nda chë Uaquiñábioye ndoñe más uamaná tbontsebiámna, cach ndoñe más uamana ntsebiámnyana chë Taitábioye, nda chë Uaquiñá tbojichmóbioye.

²⁴ “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nÿetsca tescama yomna tšabe vida jtsebomnana. Chabiamama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamama cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nÿetsca tescama castiganá queochátsmëna. Y aíñe, chë nÿetsca tescama yomna tšabe vida echántsebomna.

²⁵ “Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabiamama mo obanëngcá imomnënga mochanjouena Bëngbe Bëtsabe Uaquiñá jtsóyebuambnyana. Nda chca tšabá chašojoyeuná cha, tšabe vida echántsebomna. ²⁶ Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. ²⁷ Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nÿetscangbiamama jayanama tšabá o ndoñe tšabá tmontsamama. ²⁸ Chama ndoñe matenjnanana. Er canÿe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. ²⁹ Tšabe soyënga tmojëftsemënga, obanënguentšana mochántayena, chë nÿetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nÿetsca tescama castigánënga jtsemnama ca” —Jesús tojanéyana.

Jesús, ndegombre Bëngbe Bëtsabe ichmoná inamna

³⁰ Mëntšánaca Jesús cachatbiamama tojánayana: “Nÿe átšbeyeca tondaye quetsátobena jamama. Chë Taitá šontsemánda ntšamo nÿetscangbiamama jayanama tšabá o ndoñe tšabá tmontsamama. Nÿe chca atše sëntsobena

chë soye jamama. Ndoñe quetsátsboše jamana n̄ye ntšamo cach atše stseboščá; pero sempre sēndbétseboše jamama, ntšamo Taitá, chë šonjichmó cha tojtseboščá. Chíyeca atše n̄yetscangbiana sēntsichamo tšabá o ndoñe tšabá tmontsamama; y ntšamo n̄yetscangbiana sēntsichamcá, ndegombre endmēna.

³¹ “Ntšamo cach atšbiana tijayanama, ndegombre entsemna ca stsihámēse, ntšamo stsihámca, n̄yetscangbiana tondaye ntsámanana. ³² Pero in̄ya entsemna. Cha endētatsēmbo y entsichamo ntšamo ndegombre atšbiana yomncá; y sēntsetatsēmbo ntšamo cha atšbiana yojtsichamcá, n̄yetscangbiana aín̄e yojtsámanama. ³³ Tšēngaftanga ín̄yenga šmojanichamó atšbiana Juan jatjayama; y ntšamo cha tcmojauyancá ndegombre endmēna. ³⁴ Masque chë soyēnga cha tcmojáuyana, ndoñe quešnatájaboto ndocna entšá atšbiana chaotsichamo ‘cha aín̄e chca endmēna ca’. Atše quem soyēnga sēntsichamo ndayá n̄ye tšēngaftanga atsebácanēnga chašmotsemnama. ³⁵ Juan enjamna mo can̄ye uajuin̄yanēsha tojtsajuin̄yana y tojtsabuashin̄in̄yancá. Tšēngaftanga chabe buashin̄in̄yanana šmonjin̄ye, y šmonjábosena rato cháftaca oyejuayēnga jtsemnama. ³⁶ Pero chë atše sēnjama soyēngacna más entsin̄in̄yena ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabon̄yé jamama, ntšamo atše sēntsamcá, entsin̄in̄yná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátin̄ye. ³⁸ Pero tšēngaftangbe ainanoye chabe palabra ndoñe tonjómashēngo, cha tbojichmóbeñe tšēngaftanga ndoñe quešmatošbuaché causa. ³⁹ Tšēngaftanga, Bēngbe Bētsabe palabra tša jtsatsjēndayana, er šmondobátmana, chca jtsamēse chë n̄yetsca tescama yomna tšabe vida jón̄yēnama. Y Bēngbe Bētsabe uabemana palabrenguiñe atšbiana endayana ntšamo ndegombre yomncá; ⁴⁰ pero masque chca, tšēngaftanga ndoñe quešmátsboše atše jtsēstonana, y chca, tšabe vida jtsebonnama.

⁴¹ “Atše ndoñe quetsátsboše entšanga yapa tšabá atšbiana chamotsichámuama. ⁴² Y in̄ye soye, atše puerte cbondēbuatma, y sēndētatsēmbo tšēngaftanga Bēngbe Bētsá ndoñe šmondobonshánama. ⁴³ Atšna atšbe Taitabe cuenta sēnjabo, y tšēngaftanga ndoñe quešmátsboše atše jofjana. Pero in̄ya, cachabe cuenta tojabábioye cocayé aín̄e šmatjofja. ⁴⁴ Tšēngaftanga corente jésebošana, ín̄yenga tšēngaftangbiana tšabá chamotsichámuama, y ín̄yengbiana tšabá jtsichámuama; pero ndoñe ntsebošana chë n̄ye can̄ye Bēngbe Bētsá tšēngaftangbiana cachcá chaotsichámuama. Chca šmojtsamēse, ¿ntšamo šmochtsovena Bēngbe Bētsábeñe jtsošbuáchiyana? ⁴⁵ Ndoñe šmattsejuabnaye, atšbe Taitabe delante tšēngaftangbe contra atše chjayana ca ntšamo tšēngaftanga šmojtsamama. Tšēngaftanga tša jtsobátmanana atsebácanēnga jtsemnama, chë ntšamo Moisesbe leyiñe endayancá šmojtsamama; pero ndegombre, ntšamo cha tojayancá, cach tšēngaftangbe contra entsemna. ⁴⁶ Tšēngaftanga, chë Moisés tojéftsanabema soyiñe šmojtsošbuachese, átšbeñnaca šmattsošbuáchiye, er cha atšbiana tojanábema. ⁴⁷ Pero chë tojanábema soyiñe tšēngaftanga ndoñe šmontsošbuachesna, ¿ntšamo šmochjobenaye chë atše sēntsichamo soyēnguiñe jtsošbuáchiyana ca?” — Jesús tojanéyana.

6

*Jesús shachna uaranga boyabásenga saná tojanacaredadó
(Mt 14.13-21; Mc 6.30-44; Lc 9.10-17)*

¹ Chë soyënga tojanopasá chentsana, Jesús chabe uatsjéndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. ² Ba entsanga imojtsëstona, er chënga tmojáninÿe cha bëts soyënga jtsamana, šoquënga jtsashnayëse. ³ As Jesús tjoye tojántsua, y choca chabe uatsjéndayëngaftaca tojanótbema. ⁴ Ya judiëngbe canÿe fiesta, chë Bashco fiesta, yojétsobeco.

⁵ Jesús tojanótbema ora, tojanontješé y tojánanÿe ba entsanga chábioye imojtsebëconaye. As Felípbioye tbojaniyana: —¿Ndayentše saná cuanjabuámiye nÿetsca quem entsanga chamosama ca?

⁶ Jesús chca tbojaniyana, ana Felípbioye jinÿama ntšamo cha tabuanjuama; er cach Jesús tšabá inatátsëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nÿetsca entsanga nÿe mo batšatémnaca chamuëtsesama ca.

⁸ Chorna, Jesusbe canÿe uatsjendayá, Andrés ca uabainá, Simón Pédrëbe catšata, Jesúsbioye tbojaniyana: ⁹ —Muentše entsemna canÿe básistema y cha shachna cebada tandëse y uta beónata entsebomna. Pero, ¿ndayase nÿe nÿetsatema chëfta entsangbiama ca?

¹⁰ As Jesús tojánayana: —Entsanga mëyana chamotbiama ca.

Becá shácuana chë luariñe inamna, y nÿetsca entsanga chiñe tmojanoshëntsjatbiama. Chë entsanguentše shachna uaranga boyabásenga imojtsemna. ¹¹ Chora Jesús, chë tandëse chabe cucuatšinë tojanca, y Bëngbe Bëtsábioye chë tandëšama tbojtanchuá; y chabe uatsjéndayënga tojanëjatá, y chë uatsjéndayëngna nÿetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojanbošcá tmojanatšatá. ¹² Nÿetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtmënga šmochtsatbananga, tondaye nÿe cachcá ntjëftsonÿayama ca.

¹³ As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjé. ¹⁴ Chë entsanga quem bëts soye Jesús jamama tmojáninÿe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

¹⁵ Jesús yojtsetátsëmbo entsanga chëngbe rey jabemama imojtsebošama. Chíyeca cach tjoye tojtsaisanoñe canÿa jtsomñama.

Jesús béjaye juatsbuacá yojtsaye

(Mt 14.22-27; Mc 6.45-52)

¹⁶ Tojanibétata ora, Jesusbe uatsjéndayënga chë uafjajónayoye tmojantšmá; ¹⁷ barquëshañe tmojtanenojayé, y tmojanontšé jenashbuachënguana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana. ¹⁸ Chca imojtsenashbuachnëjuana orna, chë béjayiñe jabuache binÿia tojanóshjango y bëts olëshënga chë barquëshoye yojtsóyantšetaye. ¹⁹ Shachna o chnënguana kilómetro chënga tmojána ora, tmojáninÿe Jesús chëngbioye yojtsebëconaye, béjaye juatsbuacá yojtsaye. Chënga chca tmojáninÿe ora tša tmojanocochauatjaná, ²⁰ pero Jesús tojanëyana: “Atše sëndmëna; ndoñe matauatjëngana ca.”

²¹ Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

Entsanga Jesús tmojánguango

22 Yěfsana, n̄yetsca entšanga, chē uafjajónaye chenguánoica tmojanoquedanga tmojánin̄ye, chē in̄ye yěfsana chē n̄ye can̄ye barquēsha yojuamnēshañe Jesusbe uatsjéndayēnga tmojtsanoñama, y Jesús chēngaftaca ndoñe tonjánama. 23 Pero chēntscuana, Tiberias pueblentsana in̄ye barquēshangá tojanáshjajna can̄ye luarentše, chē Bēngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. 24 Asna, ni Jesús ni chabe uatsjéndayēnga chentše ndoñe montsemnana chē entšanga tmojánin̄ye ora, chē barquēshangañe tmojtanenojayé y Capernaumoye tmojána Jesús jetsenguanguama.

Jesús, chē n̄yetsca tescama yomna tšabe vida jtsebomnana tandēse

25 Chē uafjajónaye chenguánoye tmojánashjajna ora, Jesús tmojánin̄yena y mēntšá tmojantjá: —¿Buatēmbayá, ntseco ora muentše tcojášjango ca?

26 Y Jesús tojanēyana: —Ndegombre cbēyana, tšēngaftanga ndoñe atše quešmatsnguá, chē bēts soyēnga tijamama, sinó n̄ye chē jtoshachaye n̄yetsá tandēse šmojasama. 27 Ndoñe matenángmenana chē n̄ye ndoñe bēn y jopochócana sanama; chē ndmopochócaye saná, chē n̄yetsca tescama yomna tšabe vida jtsebomnana saná šmochjúanguango. Chē saná, Bēngbe Bētsá Entšá tbojanbemá cmochanjátšataye, er Bēngbe Bētsá chē Taitá tonjin̄yan̄yé, tšabe soyēngaca, cha chábioye tbojuábuayanama ca —tojánayana.

28 Chora chē entšanga tmojantjá: —¿Ndayá fchjama ntšamo Bēngbe Bētsá yojtsebošcá chaotsemnana ca?

29 Chca tmojantjá ora, Jesús tojanēyana: —Chē Taitá entseboše tšēngaftanga chabe ichmonábeñe chašmotsošbuáchema ca.

30 Chora chēnga tmojanian̄yana: —¿Ndaye tšabe soye cochjama acbe obenana bēnga jin̄yan̄iyama ca? Chē soye chaftsjin̄yēse, ácebeñe fchantsošbuáchiye. ¿Bēngbiana taicochjama ca? 31 Bēngbe tempsca bēts taitanga entšanga ndoyenoca maná ca uabaina saná tmojanse. Bēngbe Bētsabe uabemana palabrenguiñe mēntšá endayana: “Cha celoca tandēse tonjanatsatá chamosama ca” —chēnga tmojánayana.

32 Chora Jesús tojanēyana: —Ndegombre cbēyana, Moisés chēnga ndoñe chē celoca tandēse tonjanatsatá; Bēngbe Bētsá Bēngbe Taitá chēngbioye tojanatsatá chē maná ca uabaina tandēse; y cha endmēna nda celocana chē ndocna te ndmopochócaye tandēse ndegombre cmondatsatná. 33 Er Bēngbe Bētsábicana tandēse entsemna chē celocana tojastjanguá; y cha quem luare entšangbiana entsama chē n̄yetsca tescama yomna tšabe vida chamotsebomnana ca —cha tojanēyana.

34 Chora chēnga tmojanimpadá: —Taita, chē tandēse sempre šcochtsatšatnaye ca.

35 Y Jesús tojanējua: —Atše sēndmēna entšanga chē n̄yetsca tescama yomna tšabe vida jtsebomnana tandēse. Nda atše chašojtsēstona, sempre oyejuayá echanjēftsemna y Bēngbe Bētsabe soyēnga n̄yets tempo echanjesóbomñe, mo nda n̄yets tempo saná totsobomñicá, y ndocna te tbontsishēntsanca.

36 Pero ntšamo ya tchonjauyancá, tšēngaftanga atše šmonjin̄ye y cabá ndoñe átšbeñe quešmatošbuaché. 37 Nda atšbe Taitá atšbiana tbojabocacá, cha atše šochantsēstona; y nda átšbioye šojtsēstona, átšbentšana quichtētábocna.

38 Er atšna celocana sēnjabo chē šojichmó cha ntšamo yojtsebošcá jamama, y ndoñe n̄ye ntšamo atše stsebošcá. 39 Y chē šojichmó cha entseboše, ni mo can̄ya chē atšbiana tojabacacá chentšana, atše chailesenciá pochocaná chaotsemnana; y quem luare jopochócama tena, n̄yetscanga atšbiana tojábacacangbiana chámuatayenama atše chaimama. 40 Er atšbe Taitá entseboše, nda chabe Uaquiñábioye tbojin̄ye y chábeñe tojtsošbuaché, chē

n̄yetsca tescama yomna t̄sabe vida chaotsebomna, y quem luare jopochócama tena, cha cháuatayenama at̄se chaimama ca —Jesús tojanéyana.

⁴¹ “At̄se s̄entsemna ch̄e celocana tojóshjango tand̄ese ca” Jesús tojanéyana causa, ch̄e judiēnga tmojanont̄sé chabiama podesca ichámuaana. ⁴² Ch̄enga m̄ent̄sá imojtsichamo: —¿Mua ndoñe Jesús yondm̄ena, ch̄e Josebe uaquiñá? Chabe b̄ets̄sata b̄enga tmotsábuatm̄ñe. ¿Nt̄samo cha mora yochjátichamo celocana tojástjango ca?

⁴³ As Jesús tojanéyana: —At̄sbiamana ndoñe podesca matichámuaana. ⁴⁴ Ndocná quenátobena at̄se juastana, ch̄e Taitá, ch̄e šojichmó cha, ainaniñe chca chaotsebošama ndoñe tbonjuajabuách̄ese; y at̄se chanjama cha cháuatayenama quem luare jopochócama te. ⁴⁵ Ch̄e tempsquēnga B̄engbe B̄etsabe juabna oyebuambnayēnga m̄ent̄sá tmojanábema: “Cach̄ B̄engbe B̄etsá n̄yetscanga echanjabuatambá ca.” Chcasna, nda at̄sbe Taitábioye tbojoyeuná, y nt̄samo ch̄e Taitá tbojabuatēmbacá tojuatsjin̄ye, cha at̄se šochanjuasto.

⁴⁶ “Ndocná at̄sbe Taitá tbonjin̄ye. N̄ye ch̄e B̄engbe B̄etsábíocana tojabá aíñe. ⁴⁷ Ndegombre šcuayana: Nda át̄sbeñe tojtsošbuaché, ch̄e n̄yetsca tescama yomna t̄sabe vida echántsebomna. ⁴⁸ At̄se s̄endm̄ena ent̄sanga ch̄e n̄yetsca tescama yomna t̄sabe vida chamotsebomnana tand̄ese. ⁴⁹ Masque t̄šēngaftangbe b̄ets̄ taitanga, ent̄sanga ndoyenoca ch̄e maná ca uabaina saná tmojanse, pronto tmojanóbana. ⁵⁰ Pero at̄se s̄entsoyebuambná ndayá ch̄e celocana tojóshjango tand̄esama. Nda ch̄e tand̄ese tojase, ndoñe queochatóbana. ⁵¹ At̄se s̄entsemna ent̄sanga ch̄e n̄yetsca tescama yomna t̄sabe vida jtsebomnana tand̄ese, ch̄e celocana tojóshjanguēse. Nda quem tand̄ese tojase, n̄yetsca tescama n̄ye ainá echanjesomñe. Ch̄e chanját̄sataye tand̄esna, cach̄ at̄sbe cuerpo entsemna. Chca chanjama quem luare ent̄sanga ch̄e n̄yetsca tescama yomna t̄sabe vida chamotsebomnana ca” —Jesús tojánayana.

⁵² Chora ch̄e judiēnga tmojanont̄sé enats̄etsnayana: —¿Nt̄samo cha yochjobenaye cachabe cuerpo jat̄satayana b̄enga jasama ca?

⁵³ As Jesús tojanéyana: —Ndegombre šcuayana: T̄šēngaftanga B̄engbe B̄etsá Ent̄sá tbojanbemabe cuerpo ndoñe šmonjase y chabe buiñe ndoñe šmonjof̄sese, ndegombre t̄sabe vida ndoñe quešmochátsbomna. ⁵⁴ Nda at̄sbe cuerpo tojase y at̄sbe buiñe tojof̄sé, ch̄e n̄yetsca tescama yomna t̄sabe vida echántsebomna, y quem luare jopochócama te at̄se chanjama cha cháuatayenama. ⁵⁵ At̄sbe cuerpo ndegombre saná endm̄ena, y at̄sbe buiñe ndegombre of̄š̄šnayie. ⁵⁶ Nda at̄sbe cuerpo tojase y at̄sbe buiñe tojof̄sé, át̄seftaca cán̄yiñe mo can̄yacá echántsemna, y át̄šnaca cháftaca. ⁵⁷ At̄sbe Taitá, ch̄e šojichmó cha, vida endbomna, y at̄se chábeyeca vida s̄endbomna; cachcá, nda at̄sbe cuerpo tojase, chana át̄sbeyeca vida jtsebomnana. ⁵⁸ Ch̄e ndaye soyama at̄se s̄entsoyebuambná, at̄sbe cuerpo y at̄sbe buiñe, entsemna ch̄e celocana tojóshjango tand̄ese. Masque t̄šēngaftangbe b̄ets̄ taitanga ch̄e maná ca uabaina tand̄ese tmojanse, pronto tmojanóbana; pero quem tand̄ese ndoñe cachcá quenát̄sm̄ena. Nda quem tand̄ese tojase, n̄ye n̄yets tempo vida echanjesóbomñe ca —Jesús tojánayana.

⁵⁹ Ch̄e soyēngna Jesús tonjanabuatambá Capernaum pueblent̄se, ch̄e judiēngbe enefjuana yebnent̄se.

Ch̄e n̄yetsca tescama yomna t̄sabe vida jtsebomnana palabr̄ēnga

⁶⁰ Chca tmojanuena ora, banga Jesusbe ústonēnga imojtsichamo: —Nt̄samo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? ⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinÿese, ¿ntšamo šmattsejuabnaye? ⁶³ Bëngbe Bëtsabe Espiritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espiritbe uajabuáchenana y chë tšabe vida. ⁶⁴ Pero masque chca entsemna, tšëngaftangbentsana banga átsbeñe ndoñe quešmatošbuaché ca — Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátšëmbo ndëmuanÿenga chábeñe ndoñe mochanjanošbuáchiye, y nda chë uayayëngbe cucuatšinë yochjéftsayentšbashejuana. ⁶⁵ Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶ Chë causa, chentšana, ba chabe ústonënga cachcá tmojesanonÿá, y cháftaca ya ndoñe imontsajna. ⁶⁷ Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

⁶⁸ Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe aca šcontsëtsëtsná chë nÿetsca tescama yomna tšabe vida jtsebomnama palabrenga. ⁶⁹ Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

⁷⁰ Chora Jesús tojanëyana: —Atše tcbonjabacacá, chë bnëtsana útata; pero canÿa tšëngaftanguentsana, mo Satanasbe canÿe trabajayacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque canÿa chabe bnëtsana uta uatsjëndayënguentsá inamna, Jesús uayayëngbe cucuatšinë yochjéftsayentšbashejuana.

7

Jesusbe catšátanga chábeñe ndoñe montsanošbuaché

¹ Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. ² Chora, judiëngbe canÿe bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana. ³ As chora Jesusbe catšátanga tmojanianana: —Muentse ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminÿama. ⁴ Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamëсна, motsa y nÿetscangbe delante chca cochjama ca —chënga tmojanianana.

⁵ Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojanianana.

⁶ Chora Jesús tojanëjua: —Atšbe ora cabá ndoñe quentóshjango, pero tšëngaftangbiamama mocna órnaca tšabá endëtsomñe. ⁷ Chë nÿe quem luarama enójuabnaye entsanga ndoñe quemátobena tšëngaftanga jtsëbuayënjana, pero átsbioyna aíñe, er atše puerte tšabá sentsinÿanÿná ntšamo chënga imojtsamcá ndoñe tšabá yontsemnama. ⁸ Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

⁹ Jesús chë soyënga tojanëyana y cach Galileoca tojtsanoquedañe.

Chë tambënguñe jtsiyenama fiesta

¹⁰ Chabe catsátanga chë fiestoye tmojána chentšana, Jesúsna tojána, masque ndoñe entšangbeñe, sinó mo iytëcana cuenta. ¹¹ Chë fiestocna, judiënga Jesús imojtsenguaye y imojtsichamo: —¿Ndayentse chë boyabása yojtsemna ca?

¹² Entšangbeñe ba soyënga chabiama iytëcana imojtsichamo. Inyënga chabiama imojtsichamo: “Cha tšabia endmëna ca”; pero ínënga: “Cha entšanga entsaíngña ca”.

¹³ Pero ndocná Jesusbiam a becá añémoca yontsoyebuambná, chë judiëngbe amëndayëngbiam a imojtsauatja causa.

¹⁴ Chë fiesta semana tsëntsañe yojtsó ora, Jesús Bëngbe Bëtsabe bëts yebnentse tojánamashëngo, y tojanontsé jabuátambana. ¹⁵ Chentse chë judiënga, ntšamo Jesús tojanabuatambacá tmojanuena ora, ojnánënga imojtsichamo: —Bëtsá ntjuatsjinýcá, ¿ntšamo nyetsá nantsetatsëmbo ca?

¹⁶ As Jesús tojanëjua: —Atsbe buatëmbayana ndoñe nyë átšbentšana quenatóbocana, ndayá chë sonjichmó chábentšana. ¹⁷ Nda tojtseboše jamama ntšamo chë šojichmó cha yojtsebošcá, cha echántsetatsëmbo atsbe buatëmbayana Bëngbe Bëtsábocana yóbocanama o nyë átšbentšana. ¹⁸ Nda nyë cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

¹⁹ “Ndegombre, Moisés tšëngaftangbiam a ley tojëftsanaboshjona. Pero masque chca, tšëngaftanguentsá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

²⁰ Chora entšanga tmojanjúá: —¿Ndegombre aca bacna bayëjbe juabna contsbámá! ¿Nda yojtseboše aca jóbama ca?

²¹ Chora Jesús tojanëyana: —Nyetsca tšëngaftanga ojnánënga atše šmontsonýá, atše canye ochnayté canye entsá tijashnama. ²² Pero, Moisés tcmónjanamëndá bášetema base bobachtema chë más delicadentse jatëtšana, chaotsinýnama (ndoñe nyë Moisésbeyeca chca, sinó Moisesbiam a más tempsca bëts taitanga chca jamama imojanamánayeca); y tšëngaftanga canye bášetema base bobachtema chë más delicadentse jatëtšana, masque chë te canye ochnayté totsomñëse. ²³ Y mora, ntšamo Moisés tcmojëftsanamëndacá ndoñe cachcá ntjonýayama, canye bášetema chca jatëtšana masque ochnayté; as, ¿ndáyeca atše šmojtsayaná, atše ochnayté canye entsabe nyets cuerpo tijashnama? ²⁴ Nyë batšá jinýëse, ínëngbiam a ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana lempe tšabá jshétsetatsëmbëse, šmochjayana tšabá o ndoñe tšabá tmonjama ca —Jesús tojánayana.

Jesús tojánayana ndëmocana cha tojánabama

²⁵ Chora báseftanga Jerusalenoca oyenënga tmojanontsé ichámuana: —¿Mua ndoñe yontsemna chë jóbama montsenguá cha ca? ²⁶ Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? ²⁷ Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

28 Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: —¡Tšëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nÿe atšbe cuenta, ndoñe chiyátabo, ndayá canÿa šojichmóyeca, nda ntšamo ndegombre yomncá nÿetsca soyëngama endbëtsoyebuambnaye; y tšëngaftanga cha ndoñe quešmatábuatma. 29 Atšna aíñe cha sënduábuatma, er atše chá bentšana sënjabo y cha quem luaroye šonjichmó ca —Jesús tojánayana.

30 Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango.

31 Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

Chë fariseunga tmojánbošena Jesús jishachama

32 Chë fariseunga tmojántatsëmbona ntšamo entsanga Jesusbiamia iytëcana imojtsencuéntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama.

33 Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa. 34 Chora tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca.”

35 Chora chë judiënga tmojanontšé entjanayana: “¿Ndémoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? 36 ¿Ntšamo yojtsentšáyana cha šonjauyancá, chë ‘tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca?’” — chënga imojtsichamo.

Béjayënga vida bomniye

37 Chë fiesta jopochócama te yojamna chë más uámana te. Chë te, Jesús entsángbentše tojantsá y jabuache tojánayana: “¡Nda tbojtsajuendá, átšbioye chauabo y chaofšé! 38 Ntšamo Bëngbe Bëtsabe uabemana palabrenguiñe endayancá: ‘Nda átšbeñe tojtsobocancá, cha echántsemna mo ndabe ainantšana vida bomna béjayënga tojtsobocancá.’ Chca echántsemna átšbeñe ošbuáchiyëngbiamia ca” —cha tojánayana.

39 Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnama cabá ndoñe tmonjaninÿinÿé causa.

Nÿetsca entsanga ndoñe cachcá Jesusbiamia imontsejuabnaye

40 Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

41 Inÿenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo. 42 Ndegombre, Bëngbe Bëtsabe uabemana palabrenguiñe endayana, chë Cristna rey Davidbentšana entsá canmëna, y Belenocana caochjabo ca, cach pueblocana ndayentšá David inamna ca —chënga imojtsichamo.

43 Y chca, ínÿengna Jesusbe pavor imojtsemna, y ínÿengna chabe contra.

44 Inÿenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanošbuaché

⁴⁵ Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtanashjajna ora, tmojanatjá: —¿Ndáyeca ndoñe Jesús šmonjuánatse ca?

⁴⁶ Chora chë josticiënga tmojanějua: —Ndocná quenatoyebuambná ntšamo chë boyabása tonjoyebuambacá ca.

⁴⁷ Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca? ⁴⁸ ¿Nderado bëngbe amëndayënguentsá o bënga fariseunguentšá nýe mo canýa chábeñe tajojtsošbuaché? ⁴⁹ Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

⁵⁰ Chora Nicodemo, canýa fariseunguentšá, chë Jesúseftaca jencuéntama ibeta tojána cha, tojánayana: ⁵¹ —Ntšamo bëngbe leyiñe endayancá, bënga ndoñe quemuátobena jayanana canýe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

⁵² Chora chënga Nicodemo tmojanjuá: —¿Acnaca chábeñe cojtsošbuaché y mo canýe Galileoca entšacá cojtsejuabná ca? Bëngbe Bëtsabe uabemana palabrenguiñe cochjuatsjinýe, y cochanjinýe ni canýa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

⁵³ Fariseunga y bachnangbe amëndayënga chë josticiëngbioye tmojanécácanentsana, cada ona cachabe yebnoye imojtsatónënga.

8

¹ Pero Jesusna canýe tjoye, Olivos ca uabáinoye tojtsanoñe. ² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entšanga tmojanobeconá jouenama, y Jesús tojanótbema y tojanontsé jabuátambama.

³ Chorna, báseftanga ley abuátambayënga y fariseunga tmonjánashjajna, y canýe shembása tmojanëshjango. Chana tmojáninýena chabe boyábioye ínÿaftaca ibnetsoíngñañëntscuana; nýetscangbe tsëntsaca tmojanatsá, ⁴ y Jesús tmojanianyana: —Buatëmbayá, quemuá fsënjínýena chabe boyábioye ínÿaftaca bondëtsoíngñañëntscuana. ⁵ Leyiñe Moisés šonjanamëndá mëntšá uamana shembásengna ndëtšbéngaca jtsëbáyama. ¿Aca ntšamo catjayana ca?

⁶ Jesús chca tmojanianyana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojotsejbéna y yojóntša ntšabuáfjaca fshantsiñe juabemama. ⁷ Chënga nýe imojtsetjanaye causa, Jesús tojantsbaná y tojanéyana: —Nda tšëngaftanguentsá tondaye bacna soyënga tondbomná, chaobojatšë ndëtšbeca jatëchënjama ca.

⁸ Chentšana Jesús cachiñe fshantsoye yojotsejbéna, y yojtëtóntša fshantsiñe jtëtabemama. ⁹ Chca tmojanuena ora, entšanga tmojanontsé canýánýa chentšana jésebocanana; natsana chë más bëtsanánënga y chë ínÿengna ústonoye. Canýa Jesús tonjanoquedá y chë shembásanaca. ¹⁰ As, Jesús tojtantsá y tbojantjá: —¿Shembása, ndayentse chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

¹¹ Ndoñe, Taita, ndocná ca —chë shembása tbojanjuá.

Chora Jesús tbojanianyana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cátsama ca.

Jesús yomna quem luarentša entšangbe juabna binýnayá

¹² Jesús cachiñe Bëngbe Bëtsabe bëts yebnentše yojtسابوأتambaye, y entsanga mëntšá tojanéyana: —Atše sëndbínýna quem luare entsangbe juabnënga. Nda atše chašojséstona, cha echantsiyena atše chë binýnayáftaca; y ndoñe mo ibetiñcá queochátaye, y chca, tšabe vida echántsebomna ca.

¹³ Chora chë fariseunga Jesús tmojanianyana: —Aca nýe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴ As chora Jesús tojanéjua: —Ntšamo cach atšbiana sentsichamcá aínne entsámana, masque nýe atše stsihamo ntšamo atšbiana ndegombre yomncá. Er atše sëndétatšëmbo ndëmocana tijabo y ndëmoye tštsá. Pero tšëngaftanga ndoñe chca quešmatatšëmbo. ¹⁵ Tšëngaftanga šmondbétsichamo ínýëngbiana tšabá o ndoñe tšabá tmontsamama, chca, nýe ntšamo entsanga mondbetsejuabnaycá. Pero atšna ndocnabiana chca quetsátichamo. ¹⁶ Atše ndoñe nýe canýa quetsátsmëna ínýabiana jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chýeca, atše ínýabiana tšabá o ndoñe tšabá tonjama ca stsihamo ora, ntšamo stsihamcá ndegombre jtsemnana. ¹⁷ Tšëngaftangbe leyiñe enduábemana, uta entsata ndayámnaca cachcá tbojayanëse, ntšamo chata tbojayancá puerte jtsámanana ca. ¹⁸ Y morna, atše sentsichamo chë ntšamo cach atšbiana ndegombre yomncá, y atšbe Taitá, chë šonjichmó chánaca entsichamo ntšamo atšbiana ndegombre yomncá ca —Jesús tojánayana.

¹⁹ Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atše ni atšbe Taitá. Atše šmojtšábuatmëna, atšbe Taitánaca šmattsábuatma ca.

²⁰ Bëngbe Bëtsabe bëts yebnoca, chë crocénana jacjayama luarentše yojtسابوأتambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

“Chë chanjá luaroye, tšëngaftanga ndoñe quešmatobena jama”

²¹ Chora Jesús yojtëtóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca —Jesús tojánayana.

²² Chora chë judiënga tmojanontšé enatsëtsnayana: —¿Mo nderado yojtsejuabná jtsenóitanama, y chýeca yojttsichamo chë cha yochjá luaroye bënga ndoñe montsobena jama ca?

²³ Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nýe quem luarama enójuabnayënga šmondmëna, pero atše ndoñe. ²⁴ Chýeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

²⁵ Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatšé orscana chama tcbonjáuyana. ²⁶ Atše ba soyënga sëntsebomna tšëngaftangbiana jayanama, tšëngaftangbe contra jayanama; pero chë šonjichmó cha nýetsca soyëngama ndegombre endbétsichamo, y atšna ntšamo chábentšana tijouencá, cachcá quem luare oyenënga sentsëtsëtsná ca —cha tojanéyana.

²⁷ Pero chënga ndoñe tonjanësertá Jesús cachabe Taitabiana chca tojanéyanama. ²⁸ As Jesús tojanéyana: —Bëngbe Bëtsá Entšá tbojanbemá

chašmojatsbaná ora, šmochántsetatsšëmbo nda sëndmëná atše bétsemnama. Cachcá, tšëngaftanga šmochántsetatsšëmbo, nÿe cach atšbe juábnaca atše ton-daye jamama sëndobenama. Nÿe ndayá atšbe Taitá šojabuatëmbacá atše sëndoyebuambná. ²⁹ Y chë šonjichmó cha ndoñe nÿe canÿa quešnátšboshjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soye jtsamama vida bomnënga

³¹ Chora Jesús, chë chábeñe imojtsošbuaché judiënga tojanëyana: — Ntšamo cbontsëtsëtsnacá tšëngaftanga sempre šmojtsemna, ndegombre atšbe uatsjëndayënga šmochántsemna. ³² Ntšamo ndegombre yomncá šmochántsetatsšëmbo; y ntšamo ndegombre yomncá jtsetatsšëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahábentšana entšanga fsëndmëna, y ndocná ndocna te chešnáisishëche nÿe chabiama nÿets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

³⁴ Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

³⁵ Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá. ³⁶ Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. ³⁷ Atše sëndëtatšëmbo tšëngaftangna Abrahábentšana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jóyëngacñama ndoñe quešmátšboše causa. ³⁸ Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsama ca —tojanëyana.

³⁹ Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanëyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama. ⁴⁰ Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenausobuachjanguá. ⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaneyana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

⁴² Chora Jesús tojanëyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. ⁴³ ¿Ndáyeca tšëngaftanga ndoñe šmontsobena atšbe palabrenga josértana? Co, ntšamo cbontsëtsëtsnacá joyeunayama ndoñe quešmátšboše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanásbe juabnoca, ndocna tšabe soyënga ni ndegombre soyënga ntsebínÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábentšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnama jtsichámuana. ⁴⁵ Atšna sempre ntšamo ndegombre

yomncá cbondutsëtsná; chíyeca, chë sentsichamo soyiñe tsëngaftanga ndoñe quešmatošbuaché. ⁴⁶ ¿Nda tsëngaftanguentsá nanjobenaye jinñanyiyana atše ndaye bacna soye tijamama? Y atše, nñe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? ⁴⁷ Nda Bëngbe Bëtsabe entsá tomna, ntšamo Bëngbe Bëtsá tojtsichamcá jtsuenanana. Pero tsëngaftangna ndoñe Bëngbe Bëtsabe entsanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanëyana.

Cristo Abrahambiana más natsana ya yojtsemna

⁴⁸ Chora chë judiënga tmojanianana: —Ajá, bënga co ndegombre fstsichamo, aca nñe samaritano y bacna bayëjbe juabna uambayá comna ca fstsichamo ora cá.

⁴⁹ Y Jesús tojanëjua: —Atše ni mo canñe bayëjbe juabna quetsatambá. Ntšamo atše sentsamcá, endmëna jinñanyiyama atšbe Taitá Bëngbe Bëtsá uamaná yomnana; pero tsëngaftangna, atše chca tsmënama ndoñe quešmatinñyñá. ⁵⁰ Atše ndoñe quetsátsboše ínñenga atše más uamaná chašmobemama. Pero inña endmëna; cha aíñe endboše atše bëtsá bëtsemnama chaminñanyëma. Y chánaca endmëna chë ínñengbiana tšabá o ndoñe tšabá tmontsamama endbetsichamuá. ⁵¹ Ndegombre šcuayana, nda ntšamo atše sentsichamcá tojouena y chca tojama, ndocna te queochatóbana ca —Jesús tojánayana.

⁵² Chora chë judiënga tmojanianana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nñetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sentsichamcá tojouena y chca tojama, cha ndocna te queochatóbana ca”? ⁵³ ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

⁵⁴ Chora Jesús tojanëjua: —Atše nñe cach atše más bëtsá stsenobiamnasna, chë soye tondaye nantsámana. Pero chë más bëtsá šojtsebiamná cha, atšbe Taitá endmëna, cach ndabiana tsëngaftanga šmondbétsichamo tsëngaftangbe Bëtsá canmëna ca. ⁵⁵ Pero tsëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámëse, átsnaca cach tsëngaftangcá canñe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbétsama. ⁵⁶ Tsëngaftangbe uámana bëts taitá Abraham, chë atše jabama te jinñama yojtsejuabnaye ora, puerte oyejuayá yojtsemna. Y pronto tojëftsaninñe, y puerte tojanoyejuá ca —Jesús tojánayana.

⁵⁷ Chora chë judiënga tmojanianana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinnñe ca?

⁵⁸ Chora Jesús tojanëjua: —Ndegombre cbëyana, Abraham cabá ndoñe ainá quenjatsmëna ora, atše ya sënjetsemna ca.

⁵⁹ Jesús chca tojanëjua ora, chënga ndëtšbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentsana tojésanbocna.

9

Jesús tojanma, canñe boyabása jtaná onñnaná chabuabínñama

¹ Canÿe luarëjana yoÿtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna. ² Chë uatsjédayënga Jesús tmojantjá: — Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinÿanÿiyama ntšamo Bëngbe Bëtsá yobencá. ⁴ Cabá yoÿtsësháchena ora, šontsamna jamana ntšamo chë šonjichmó cha yoÿtsebošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵ Quem luariñe chjëftsemnëntscuana, atše quem luare entsangbe juabnënga binÿnayá chanjëftsemna ca —tojanëyana.

⁶ Chca tojánayanentsana, Jesús fshantsiñe tojanbuashëtjo, y chë yebuáyeca batsá ngüiche tojانبema, y chë jtaná chë ngüicheca tbojanbucharëtjo. ⁷ Chora chë jtaná tbojaniana: —Motsa y metsobúchjabebiyë, chë binche uafjónaye entsangbe pormániñe, Siloé ca uabániyoca ca. (Siloé, judiëngbe biyañe endayana “Ichmoná ca”.)

Y chë jtaná tojána; choca yoÿetsobúchjabebiyë, y yebnoye tojtaná ora, ya iboÿtsabinÿna. ⁸ Chë juachañe oyenënga y chë jtaná tempo lemošna otjanañana tmojáninÿënga, imoÿtsentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inÿënga imoÿtsichamo: —Cha entsemna ca.

Y ínÿënga: —Cha ndoñe quenátsmëna, pero chacá entsábona ca.

Y cach shnaná yoÿtsichamo: —Atše cha sëndmëna ca.

¹⁰ As chë entsanga tmojantjá: —¿Ntšamo chca mora cmoÿtsabinÿna ca?

¹¹ Y cha tojanëjua: —Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjónayañe metsobúchjabebiyë ca”. Chcasna, atše sënjá, sënjetsobúchjabebiyë y cachora šontsabinÿna ca.

¹² Chora chënga tmojantjá: —¿Ndayentše cha yoÿtsemna ca?

Y chana: —Atše ndoñe quetsátstatsëmbo ca —tojanëjua.

Chë jtana shnanábioye fariseunga imoÿtsetjanaye

¹³ Chora chë entsanga, chë jtaná inamná fariseúngbioye tmojanánatse. ¹⁴ Chë Jesús batsá yebuáyeca ngüiche tojانبema, y chë jtaná tojanma te, canÿe ochnayté inamna. ¹⁵ As chë fariseunga chë boyabása tmojantjá: — ¿Ntšámoyeca mora cmoÿtsabinÿna ca?

Chora cha tojanëjua: —Cha ngüiche yebuáyeca tonjábema y šonjabucharëtjo. Sënjetsobúchjabebiyë, y cachora šonjuabinÿna ca.

¹⁶ As chora básefta fariseunga imoÿtsichamo: —Chë jtaná chabotsabinÿnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inÿënga imoÿtsichamo: —Cha canÿe bacna soyënga amá toÿtsemnëse, ¿ntšamo nantsobena canÿe bëts soye Bëngbe Bëtsabe obenánaca jamama ca?

Y chca, ínÿënga Jesúsbe pavor imoÿtsemna, y ínÿënga chabe contra. ¹⁷ Chama chënga cachiñe chë jtaná inamná tmoÿtëtantjá: —Er aca mora chacmotsabinÿnama cha tojamëse, ¿chabiama ntšamo catjayana ca?

Chora cha tojanëjua: —Chana canÿa Bëngbe Bëtsabe juabna oyebuambnayá entsemna ca.

¹⁸ Pero chë judiënga ndoñe montsanošbuaché, cha chë jtaná inamnama y chora iboÿtsabinÿnama. As chënga, ínÿënga tmojanichamó chë boyabásabe bëtsëtsata jobiatšama. ¹⁹ Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre

tašojtsichamo cha jtaná inonýnama? Chcase, ¿ntšamo mora cha ibojtsabinýnama ca?

²⁰ Chora chë bëtsétsata tmojanéjua: —Aíñe fsëndétatsëmbo cha bëndatbe uaquiñá endmënama y jtaná tonjanonýnama. ²¹ Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

²² Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsétsatna chama ibojtsauatja;

²³ chíyeca tmojanéyana: “Cha ya bëtsá entsemna. Cachá motjanga ca”.

²⁴ As cachiñe chë judiënga chë jtaná inamná tmojanchembo y tmojaniyana: —Bëngbe Bëtsabe delante cach acbiama ndegombre mobuambá. Bënga fsëndétatsëmbo chë boyabása canýe bacna soyënga amá yomnama ca.

²⁵ Chora cha tojanéjua: —Cha canýe bacna soyënga amá o ndoñe tondmënama, atše ndoñe quetsátstatsëmbo. Atše nýe mëntšá sëntsetatsëmbo: Atše jtaná sënjanmëna, pero mora šontsabinýna ca.

²⁶ Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

²⁷ Y cha tojanéjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnana ca?

²⁸ Chora chënga cha tmojtsanóyenguango y tmojaniyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna. ²⁹ Bënga fsëndétatsëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatsëmbo ni mo ndémocana cha tojabama ca —chënga imojtsichamo.

³⁰ Chora chë boyabása tojanéjua: —¿Ntšamo chca nántsemna! Tšëngaftanga ndoñe šmontsetatsëmbo ndémocana cha tojabama; pero chašubinýnama cha tonjama. ³¹ Bënga tšabá mondétatsëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntšamo cha tojtsebošcá amábioye joyeunayana. ³² Quem luare jobojátšama orscana ndocna te quenaisótatsëmbo canýe jtaná onýnanabiama ndánaca cha chabotsabinýnama tojéftsemama. ³³ Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

³⁴ As chë fariseunga tmojaniyana: —¿Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátuabuatambaye ca?

Y chora chë judiëngbe enefjuana yebnentsana cha tmojtanábocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojaniyana: —¿Aca Bëngbe Bëtsá Entšá tbojanbemábeñe quecojtsošbuaché ca?

³⁶ Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

³⁷ As Jesús tbojaniyana: —Aca ya tconjinýe; chë ácaftaca entsoyebuambná cha entsemna ca.

³⁸ Chora, chë boyabása Jesús bentše tojanoshamentšé jëtschuayama y tbojaniyana: —Atšbe Utabná, aíñe sëntsošbuaché ca.

³⁹ Chora Jesús chë entsanga tojanéyana: —Atše quem luaroye tijabo ndayá entsanga jinñanñiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínñanñiyeye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínñanñiyeye, nñe batšá Bëngbe Bëtsabe soyëngama imotátšëmbuama. Y chca, chënga, masna mo jtanëngcá mochántsemna y ndoñe mo chë jinñama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanéjua: —Tšëngaftanga Bëngbe Bëtsabe soyëngama ndëtatsëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queocháttonñaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca — Jesús tojanéyana.

10

Chë oveshënga abujénñya y chabe oveshënga

¹ As Jesús tojanéyana: “Ndegombre šcuayana: Nda chë oveshëngbe luaroye bëšáshajana ndoñe tonjámashëngo, pero aíñe inñajana tojtsamáshëngo, chana canñe atbëbaná y abacayá jtsemnana. ² Pero chë bëšáshajana tojamashënguana, chë oveshënga anñená jtsemnana. ³ Chë bëšásha ebtafjuaná, chë bëšásha jebëtafjuana, y chë oveshënga abujénñya ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujénñya yojtsachembuanama; y chë luarentšana cha jubuacnana. ⁴ Nñetsca oveshënga tmojábocana ora, chë abujénñya chënga jtsebënatsanana, y chë oveshënga jtséstonana, er chabe oyebuambnayana chënga joyátëmbana. ⁵ Pero chë tmonduabuatmábioyna chë oveshënga ndoñe ntjuastana; nñe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

⁶ Jesús entsanga chca tonjanacuntá, pero chënga ndoñe ntjosértana ntšamo yojtsentsayancá.

Jesús, chë oveshënga tšabe abujénñya

⁷ As Jesús cachiñe tojanéyana: “Ndegombre cbëyana: Atše sëndmëna chë bëšásha oveshënga mondbétsamashjuanéjana. ⁸ Nñetscanga chë atšbe natsana tmojánabënga, atbëbanënga y abacayënga innamna, pero chë oveshënga ndoñe chëngbioye ntjóyaunayana. ⁹ Atše chë bëšásha sëndmëna. Nda quem bëšáshajana tojamashënguá, atsbocaná echántsemna. Canñe oveshá jamashënguana y jabocnana, y shácuana jónñenana. Cachcá, chë quemëjana tojamashënguá, lempe echanjónñena.

¹⁰ “Chë atbëbaná jabana nñe jatbëbama, jóbama y lempe jtsepochócama; pero atšna, entsanga vida chamotsebomnama y átšeftaca bëtscá tšabe vida chamotsebomnama tijabo.

¹¹ “Atše sëndmëna chë oveshënga tšabe abujénñya. Chë oveshënga tšabe abujénñya sempre jtseprontánana chëngbiamá jóbana, chabe oveshënga ababuánñeshanayeca. ¹² Pero nda nñe crocenánama totrabája y chë oveshënga ndoñe chábënga tmontsemna, cha nderado tojinñe canñe tjañe queše chë oveshëngbioye tojtsobécocnama, cachora nñe cachcá jesëññayana y jtsachana.

Chë tjañe queşe oveshënga jtsacamiyana, y chë oveshëngna nÿe cátoye jtsa-chetana. ¹³ Cha jtsemnana nÿe crocenánama trabajayá; chabiamana nÿe chë uacanánana más uámana soye jtsemnana, y chë oveshëngbiamana tondayana ntsentsamnana; chíyeca cha jtsachana.

¹⁴ “Atşe sëndmëna chë oveshënga tşabe abujénÿa. Atşe chënga sëndëubuatma, y chëngnaca atşe şmonduábuatma. ¹⁵ Cachcá, chë Taitá Bëngbe Bëtsá atşe şonduábuatma y atşe chábioye. Atşe sempre sëndétseprontana jóbanama, atşbe oveshënga sëndababuanÿeshánayeca. ¹⁶ Atşe inÿe oveshënga sëndábamna, pero chënga ndoñe quem luariñe oveshënga quemátsmëna. Atşe şontsemna chëngnaca moye junatsana. Chëngnaca atşbe oyebuambnayana mochanjouena, y muentşsa oveshëngaftaca cánÿiñe mochántsemna, y atşna nÿetsca chë oveshëngbiamana chë abujénÿa chántsemna.

¹⁷ “Atşe siempre sëndétseprontana jóbanama, chora jtayenama. Chíyeca chë Taitá şondbobonshana. ¹⁸ Ndocná atşbe vida queşochatsbojuána, pero chënga sëndababuanÿeshánayeca siempre sëndétseprontana jóbanama, cach atşe chca sëndboşeyeca. Derecho sëndétsóbomñe chëngbiamana jóbanama, y chora jtayenama. Chca endmëna ntşamo atşbe Taitá şonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y inÿengna Jesusbe pavor imojtsemna. ²⁰ Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

²¹ Pero inÿengna imojtsanichamo: —Ndocna bacna bayëjbe juabna uambayá ntsoobenana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

Chë judiënga ndoñe imontsoşbuáchiye Jesús Bëngbe Bëtsabe Uaquiñá bétsemnama

²² Canÿe uaftena tempo inamna, y Jerusalenentşe canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entşanga jtenójuaboyama. ²³ Jesús Bëngbe Bëtsabe bëts yebnocca yojétsana, canÿe amashjuana otsbojebniñe, Salomonbe Amashjuana ca uabáinentşe. ²⁴ Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiamana ndegombre soye ntsetatşëmbcá? Aca chë Cristo cojtsemnëse, chama lempe tşabá şmanÿanÿé ca.

²⁵ As Jesús tojanëjua: —Ya tchbonjáuyana y tşëngaftanga átşbeñe ndoñe ntsoşbuáchiyana. Chë atşe sëndama soyënga, atşbe Taitá Bëngbe Bëtsabe obenánaca, cmontsinÿanÿná nda atşe bétsemnana. ²⁶ Pero tşëngaftanga átşbeñe ndoñe queşmatoşbuaché, er tşëngaftanga atşe ndoñe queşmatéstonca, ntşamo chë oveshënga chë tşabe abujénÿa mondbetsëstoncá. ²⁷ Chë atşe şmondústonënga, atşe şmondbóyeunaye y şmondbëuasto. Atşe chënga sëndëubuatma. ²⁸ Atşe chanjama, quem entşanga chë nÿetsca tescama yomna tşabe vida chamotsebomnama; chënga ndocna te pochocánënga quemochátsmëna, y ndocná quenátobena átşbentşana chënga jefcana. ²⁹ Atşbe Taitá Bëngbe Bëtsá, chë entşanga atşe chaşmuastama tojamá, nÿetscangbiamana más bëtsá endmëna, chíyeca ndocná quenátobena chábentşana chënga jefcana. ³⁰ Chë Taitá y atşe canÿa fsëndmëna ca —Jesús tojánayana.

³¹ Chora, chë judiënga cachiñe ndëtşbenga tmojanájaca Jesús jtsatëchënganjama. ³² Pero Jesús tojanëyana: —Atşe tşëngaftangbeñe, ba bëts soyënga sënjama atşbe Taitá Bëngbe Bëtsabe obenánaca. ¿Ndëmua chentşsa soyama atşe şmochtsatëchënganja ca?

³³ Chora chë judiënga tmojanjúá: —Ni canýe quem bêts soyëngama bënga queftsátsboşe aca jtsatëchënganjama. Aca Bëngbe Bëtsabiama ndoñe tšabá quecátichamo; mo chábioye cuafjoyenguangcá entsemna. Aca nýe canýe entsá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboşe ndëtsbéngaca aca jtsatëchënganjama ca —chënga tmojaníyana.

³⁴ Chora Jesús tojanëyana: —Bëngbe Bëtsabe uabemana palabrenguiñe mëntsá endayana: “Atşe sënjayana tšëngaftanga diosënga šmomna ca.”

³⁵ Bëngbe Bëtsá chca tojánayana chë chabe palábraca y cha chamotseservénama tojánamandangiama; ndocná quenátobena jinýanýiyana ni mo canýe soye Bëngbe Bëtsabe uabemana palabrenguiñe, ndoñe ndegombre soye yomnama.

³⁶ Y atšbiamá, Bëngbe Bëtsabiácá uabuayaná y quem luare ichmoná, ¿ntsamo tšëngaftanga šmojtsobena jayanama, “aca Bëngbe Bëtsabiama ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atşe tijayanama? ³⁷ Ntsamo atšbe Taitá endamcá atşe ndoñe séntsamëse, tšëngaftanga átšbeñe ndoñe šmattsošbuáchiye. ³⁸ Pero, ntsamo atšbe Taitá endamcá atşe aíñe stsamëse, masque ndoñe átšbeñe šmونتsošbuaché, nýe chë Taitabe obenánaca soyënga tijamama šmochtsošbuáchiye. As, canýe ora chašmotsetátšëmbo y chacmësertá, chë Taitá átšbeñe yomnama y atşe chábeñe tsmënama ca —Jesús tojanëyana.

³⁹ Chora chënga cachiñe tmojánbošena Jesús jishachama, pero cha chëngbentsana tojanotsbocá.

⁴⁰ Chentšana, Jesús Jordán béjaye chenguana tojesaná y choca tojtsanoquedañe. Chentşe Juan tempo entsanga yojanëbáyana. ⁴¹ Ba entsanga tmojána Jesús jinýama, y mëntsá imojtsichamo: “Ndegombre, masque Juan ni mo canýe bêts soye Bëngbe Bëtsabe obenánaca tonjëftsema, lempe ntsamo quem boyabásabiama tonjanoyebuambacá, ndegombre yojamna ca.” ⁴² Y chentşe, ba entsanga Jesúsbeñe imojtsanošbuaché.

11

Lázaro tojanóbana

¹ Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentşe, Marta y Mariáftaca, chabe uabénata. ² Quem María inamna nda Bëngbe Utabná Jesusbe shecuatšíñe botamana uanguëtsiye tbojanáshecbuešcja, y chabe stjënashaca tbojtanshecbójó cha. ³ Chë uta uabénatna ínýenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aíñe entsemna Bëngbe Bëtsabe obenana entsanga jinýanýiyama, y Bëngbe Bëtsabe Uaquiñá chamuatschuama ca.

⁵ Jesús corente yojánababuanýeshana Marta, María y chatbe uaftşe Lázaro.

⁶ Masque chcasna, Lázaro šocá yojtsemna ca Jesús tmojaníyana ora, cabá uta te más cha yojétsemna luarentşe tojtsanoquedañe. ⁷ Chentšana, chabe uatsjëndayënga tojanëyana: —Judeoye cachiñe cuajna ca.

⁸ As chë uatsjëndayënga tmojaníyana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboşe ca?

⁹⁻¹⁰ Chora Jesús tojanëyana: —Bnëtsana uta hora bnëté endmëna. Nda bnëté tojtsana, ndoñe ntjojéstjiana, binýniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atşe jóbana cabá ndoñe tonjobuache ora. Pero ibeta tojtsanëse, cha jtsojéstjiana, ndoñe

binÿniñe causa. Cachcá, bēnga šontsamna yojsēsesháchenēntscuana jatrabájana. Atšbe jóbanama tempo chaojóshjango ora, ya ndoñe queochátēshachena jatrabájama ca —tojánayana.

¹¹ Chentsana tojanēyana: —Bēngbe amigo Lázaro tojtsomaná, pero atše choye chanjá jetsefsenama ca.

¹² Chora chē uatsjéndayēnga tmojanjuá: —Bēngbe Utabná, tojtsomanase yojsayana chana tšabá yochtsatsmēna ca.

¹³ Pero Jesús yojsanētsētná ndayá Lázaro tojtsanóbana ca, y chabe uatsjéndayēngna imojtsejuabnaye Lázaro ndegombre yojsomáñama. ¹⁴ As Jesús tšabá tojanēyana: —Lázaro tontsóbana. ¹⁵ Atše sēntsoyejuá choca atše ndoñe tsmēnama, tšēngaftangbe tšabíama chaotsemnana; chca, tšēngaftanga más átšbeñe chašmotsošbuáchema. Pero cuajna cha jinÿama ca.

¹⁶ Chora Tomás, chē Gemelo ca uabobainá, chē inÿe uatsjéndayēnga tojanēyana: “Bēngnaca cuajna, cháftaca mochjóbana ca.”

Jesús iuama entšanga chámuatayenama y chē nÿetsca tescama yomna tšabe vida chamotsebomnana

¹⁷ Jesús chē béconana tojánashjango ora, tojántatšēmbona Lázaro ya canta te uatbontsána yojssemnana. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiēnga tmojána Marta y María jautsētsayama y jatjēmbambayama ndoñe tša ngmēnaca chabondētsemnana, chatbe uaftše tojanóbana causa. ²⁰ Jesús yojsashjajuanama Marta tojántatšēmbona ora, tojánbocna cha jajébenguama, pero María cach yebnentše tojanoquedá.

²¹ Chora Marta Jesúsbioye tbojaniyana: —Bēngbe Utabná, aca muentše macmēnēse, atšbe uaftše ndoñe matēnjóbana. ²² Pero atše sēntsetatšēmbo, masque ndayánaca mora Bēngbe Bētsá chacojotjañe, y cha lempe chca cmochjátsetaye ca.

²³ Y Jesús tbojanjuá: —Acbe uaftše echántayena ca.

²⁴ Chora Marta tbojaniyana: —Aíñe, atše sēndētatsēmbo cha yochtayenama, pero quem luare jopochócama te, nÿetsca obanēnga mochtayena ora ca.

²⁵ As Jesús tbojaniyana: —Atše sēndmēna chē entšanga chámuatayenama y chē nÿetsca tescama yomna tšabe vida chamotsebomnana endamá. Nda átšbeñe tojtsošbuaché, masque chaóbana, echántayena. ²⁶ Y nda cabá ainá totsomñe y átšbeñe tojtsošbuaché, ndocna te queochatóbana. ¿Chē cbontsatsá soyiñe quecojtsošbuaché ca? —Jesús tbojantjá.

²⁷ Chora Marta tbojaniyana: —Aíñe, Bēngbe Utabná, atše ábeñe sēntsošbuaché, aca chē Cristo, chē Bēngbe Bētsabe Uaquiñá y chē quem luaroye jabamá comnana ca.

Jesús, Lázaro yojsátbontsana cuevēshentše yojenóbošachna

²⁸ Chca tojánayanentšana, Marta tojtaná chabe quenata María jachembuama, y iytēcana tbojaniyana: “Buatēmbayá tonjášhango y entseboše aca jinÿama ca.”

²⁹ María chca tojanuena y cachora tojéftsanbocna y tojána Jesús jinÿama. ³⁰ Jesús cabá ndoñe chē puebløye tonjánamashēngo; yojétsemna Marta tbojanjébengo luarentše. ³¹ Chē yebnentše imojtsemna judiēnga, María tša ngmēnaca ndoñe chaondētsemnana tjēmbambayēnga, tmojánbocana María juastama; er chē tojéftsantsbaná y tojéftsanbocna ora, chē judiēnga imojtsejuabnaye, Lázaro yojsátbontsana luaroye María yojsaye, choca jošachnama ca.

³² Jesús yojtsemnentše María tojánashjango ora, chábentše tojanoshamentšé y tbojaniyana: —Bëngbe Utabná, aca muentše macménëse, atšbe uaftše ndoñe matënjóbana ca.

³³ María y cháftaca tmojánashjajna judiënga, nyetscanga imojetsenóbošachiye; y Jesús chca tojáninýe ora, corente tbojancochtsetšena y puerte ngménaca yojtsemna. ³⁴ Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

³⁵ Chora Jesús tojánenobošachna. ³⁶ As chë judiënga tmojánayana: — ¡Minýënga, tša ibnabobonshana ca!

³⁷ Pero inýe judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanyena

³⁸ Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentše canýe bëts ndëtsbeca yojtsatámena. ³⁹ Chora Jesús tojanéyana: —Chë ndëtsbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtsé, er ya canta te entsemna cha tontsóbana ca.

⁴⁰ Y Jesús tbojanjuá: —Ndegombre, ya tbonjauyana, aíñe átsbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

⁴¹ Chora chë ndëtsbé tmojanjuaná; Jesús celoye yojontješiye y Bëngbe Bëtsábioye tbojaniyana: “Taita, chatschuá atšbe opresido tcojouenama.

⁴² Atše sëndétatšëmbo aca sempre šcondbëtseyeunanama; atše chca tbonjauyana, muentše montsemna entsangbe tšabiama, chca, aca atše šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana matsbocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

Chë judiëngbe amëndayënga tmojanenoyeuná Jesúsbioye jóbama (Mt 26.1-5; Mc 14.1-2; Lc 22.1-2)

⁴⁵ Chë soyëngama, banga chë judiënguentsána, María jatjëmbabayama tmojánanga, y ntšamo Jesús tojanmcá tmojáninýënga, Jesúsbeñe imojtsošbuaché. ⁴⁶ Pero inýe judiënga fariseúngbioye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefna inýe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nýe cachcá chamojonýase, nyetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoáca, Bëngbe Bëtsabe bëts yebna y bëngbe luare Israel ca — chënga imojtsichamo.

⁴⁹ Pero canýa chënguentsá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. ⁵⁰ Y ndoñe quešmatsjuabná, tšëngaftangbiana más tšabá yojtsemna nýe canýe boyabása Israeloca entsangbiana chaóbana, y ndoñe nyets bëngbe luare chamotsepochoáca ca —cha tojanéyana.

⁵¹ Pero Caifás chë soye nýe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espiritbe obenánaca tojánayana Jesús ibojamna Israeloca entsangbiana

jóbanama ca. ⁵² Y ndoñe n̄ye Israeloca entsangbiama, sinó ch̄e in̄ye luarēnguiñe Bēngbe Bētsabe básenga tmojanáshanēnga chamuatábama, as chca, n̄yetscanga n̄ye can̄ye luarentša entsanga chamotsemnama. ⁵³ Chcasna, cach tescana judiēngbe amēndayēnga tmojanenoyeuná Jesús jóbama.

⁵⁴ Chíyeca Jesús entsángbeñe, Judea luariñe ya ndoñe yontsana. Ch̄e luarentšana tojēftsanbocna y can̄ye luaroye tojtsanoñe, entsanga ndoyeniñe béconana, can̄ye pueblo Efraín ca uabáinoe. Y chentse chabe uatsjēndayēngaftaca tojtsanoquedañe.

⁵⁵ Judiēngbe Bashco fiestama batsá yojsájamna, y ba entsanga pueblēnguentšana Jerusalenoye imojtsajna, soyēnga choca jamama ntšamo tempo inamncá, chca, Bēngbe Bētsabe bominyama tšábenga jtsemnama, ch̄e Bashco fiesta cabá ndobuache ora. ⁵⁶ Chocna, judiēnga Jesús imojtsenguaye, y Bēngbe Bētsabe bēts yebnentse imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Ch̄e fariseunga y ch̄e bachnangbe amēndayēnga tmojanmandá, nderado nda Jesús ndayentse tojtsemnama tojtsetatšembēsna, chaobuambá ca, as Jesús jishachama.

12

María, botamana uanguētsiye Jesúsbeñe tbojanáshecbuešcja
(Mt 26.6-13; Mc 14.3-9)

¹ Chnēnguana te ch̄e Bashco fiestama yojsájamna ora, Jesús Betania pueblōye tojtaná. Lázaro, ch̄e Jesús tbojtanayená cha, choca inoyena.

² Chentšana bēts saná Jesusbiamama tmojanábua. Marta tojanējuatšé, y Lázaro yojtsemna ch̄e Jesúsēftaca juasama mesēshañe imojtsetbiámanēnguentse. ³ As María can̄ye jarrētema tojanaca; chiñe yojanaftsuamna can̄ye botamana uanguētsiye, bētsca uámaniye, ena nárdoca pormániye. Ch̄e uanguētsiye, María, Jesusbe shecuatšēnguiñe tbojanáshecbuešcja, y cachabe stjēnashaca tbojtanshechójó. Chora, ch̄e yebnentse ena nardiyana yojsonguētsiye.

⁴ Chora, can̄ya Jesusbe uatsjēndayēnguentšá, Judas Iscariote, ch̄e Jesús uayayēngbe cucuatšīñe yochjanayentšbashejuaná, tojánayana: ⁵ —Quem botamana uanguētsiye unga patse denario crocénana enduámana. ¿Ndáyeca ndoñe šmonjuiye y ndbomnjémēnga ch̄e crocénana mašmēntsatsatá ca?

⁶ Pero Judas chca tojánayana, ch̄e ndbomnjémēngbeñe ntsejuabnaycá, sinó cha atbēbaná inamna causa. Judas chēngbe crocénana shecnēšiñe yojánatbēna, y ba soye, ch̄e shecnēsoye imojanatsuáma crocénanentšana cha yojánatbēbana.

⁷ As Jesús tbojanjuá: —Cachcá monyá. María mēntscoñe ch̄e botamana uanguētsiye iuabofjájona, cha jobenayama átšbeñe jabuēšcjama, er ndoñe bēn y atse šmochanjaitēme. ⁸ Ch̄e ndbomnjémēngna tšēngangbeñe sempre mochanjesomñe, pero atse ndoñe ca —tojánayana.

Judiēnga tmojanenoyeuná Lázaro jóbama

⁹ Ba judiēnga tmojántatšēmbona Jesús Betanioca yojtsemnama, y choye tmojána, ndoñe n̄ye Jesús jin̄yama, sinó Lázarnaca, ch̄e Jesús tbojtanayená cha. ¹⁰ As ch̄e bachnangbe amēndayēnga tmojanenoyeuná Lázarnaca jóbama.

¹¹ Chabe causa, ba judiēnga chēngbioye cachcá tmojesanēñya y Jesúsbeñe imojtsošbuaché.

Jesús Jerusalenoye tojánashjango
(Mt 21.1-11; Mc 11.1-11; Lc 19.28-40)

¹² Chë yëfsana, mallajta entsanga, Jerusalenoca fiestama tmojánashjajnënga, tmojánatšëmbona Jesús choye yochjánashjanguama. ¹³ As chëngna palma betiye buacuafjënga tmojanatëtsetše, y Jesús jajébenguama tmojánbocana, y mëntšá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israelo-quëngbe Rey ca!”

¹⁴ Jesús canye burrotema tbojáninÿena y chábeñe tojanenoyayé. Ntšamo Bëngbe Bëtsabe uabemana palabrënguifne iuayancá, cachcá tojanopasá. Chiñe mëntšá endayana Jerusalenoca entsangbiama:

¹⁵ Sión bëts puebloca oyenënga, ndoñe matauatjëngana.

Minÿënga, tsëngaftangbe Rey burrotëmiñe enjaquená entsabó ca.

¹⁶ Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninÿanÿé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrënguifne iuayancá y cachcá Jesúsëftaca tojanopasama.

¹⁷ Chë Jesúsëftaca imojtsemna entsanga, Lázarbïoye uatbontsánoye tbojanchembo ora y chentšana tbojtanayená ora, ntšamo tmojáninÿama chora imojtsecuëntaye. ¹⁸ Chíyeca, ba entsanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca. ¹⁹ Pero chë fariseunga imojtsenatsëtsnaye: “Tsëngaftanga šmontsonÿá bënga tondaye jamama quemuátobenama y más, inÿetscanga cha montsëstona ca!”

Básefta Grecia luaroca entsanga Jesús tmojánanguango

²⁰ Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entsángnaca imojtsemna. ²¹ Chëngna, Felipe chë Galilea luarocá, chë Betsaida pueblócábïoye, tmojanobeconá y tmojanimpadá: “Señor, bënga fsëntseboše Jesús jinÿama ca.”

²² Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama. ²³ Jesús chata tojanëyana: “Chë Bëngbe Bëtsá Entšá tbojanbemá corente bëtsá yomnama jinÿanÿiyama te ya tocjebuache. ²⁴ Ndegombre šcuayana: Canÿe trigo jénaye ndoñe fshantsiñe tmonjuatbontsá y ndoñe tonjóbanëse, nÿe cach canÿe trigo jénaye jesomñana. Pero tmojuatbontsá y tojóbanase, bëts cá jashájonana. ²⁵ Cachcá, nda nÿe cachá tojtsenóbobonshana, cha chabe vida echanjëftsobuetše. Pero nda nÿe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nÿetsca tescama yomna tsabe vida echántsebomna. ²⁶ Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjinÿanÿiye bëtsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšëftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. ²⁸ Taita, šminÿanÿé aca puerte bëtsá y obená comnama ca.”

Y cachora, celocana canÿe oyebuambnayana tojanóbocna mëntšá: “Ya tcbonjinÿanÿé atše puerte bëtsá y obená tsmënama, y mora cachiñe cachcá chanjama ca.”

²⁹ Entsanga chca tmojanuena ora, ínÿënga imojtsichamo nÿe tojanjuésase ca; pero ínÿëngna imojtsichamo: —Canÿe ángel chábiyoye tbonjuatsëtsá ca.

³⁰ Chora Jesús tojanéyana: —Ntšamo šmonjouencá, atšbiana ndoñe quenátsmëna, sinó tšëngaftangbiana. ³¹ Mora chë tempo entsemna, chë quem luare entsanga tmojëftsema bacna soyënga jinÿanÿiyama y chëngbe castiguama jayanama. Y mora, chë nyetsca bacna soyënga mandayá, quem luarentšana mochantábocna. ³² Pero atše fshantsocana atsbananá chaitsemna ora, nyetsca entsanga átšbioye chanjúbuaja ca —Jesús tojánayana.

³³ Chca cha yojtsichamo, ana jinÿanÿiyama ntšamo jóbanama ibojamnana. ³⁴ Chora chë entsanga tmojanjúá: —Bëngbe Bëtsabe uabemana palabrenguiñe endayana, y chíyeca bënga fsëndétatšëmbo chë Cristo nyetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

³⁵ Y Jesús tojanéyana: —Nyë baseftatescama chë entsangbe juabnënga binÿnáyá tšëngaftangbeñe entsemna. Chë binÿnáyá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatšëmbuana ndëmuajana yojtsana. ³⁶ Chë binÿnáyá cabá tšëngaftangbeñe endëtsemnëntscuana, chábeñe šmochtsošbuáchiye; as, tšëngaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entsangbiana yojetsóitana.

Ndáyeca chë judiënga Jesúsbeñe ndoñe montsanošbuaché

³⁷ Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, ³⁸ ntšamo Bëngbe Bëtsabe juabna oyebuambnáyá Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama

y chabe soyënga ainaniñe ndoñe chamondóyëngacñama,

as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjátsebacama;

y chca, chënga mochantsemna mo ndëshnana entsangcá ca.”

⁴¹ Isaías chca tojánayana, er tojáninÿe Jesús puerte bëtsá y obená yojamnana, y chca chë uabemaniñe Jesusbiana yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe chamondëtëbuacnama. ⁴³ Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesusbe palabrengaca yochtsótatšëmbo entsanga tšabá o ndoñe tšabá tmonjamama

⁴⁴ Chora Jesús mēntśá jabuache tojánayana: “Nda átśbeñe tojtsošbuaché, ndoñe n̄ye átśbeñe ntsošbuáchiyana; chē nda šojichmó chábeñnaca cha jtsošbuáchiyana. ⁴⁵ Cachca, nda atśe šojtsonyá, chē šojichmó chábioynaca cha jtsonyayana. ⁴⁶ Atśe quem luaroye tijabo entsangbe juabnēnga jacobín̄yname, chca, nda átśbeñe tojtsošbuaché, mo ibetiñcá ndoñe chaondētsemnama. ⁴⁷ Pero nda atśbe soyēngama tojouena, pero ntśamo sēntsichamcá ndoñe tontsama, atśe chabiamana ndocá quichátayana tśabá o ndoñe tśabá tonjama ca. Atśe ndoñe chiyátabo, ntśamo quem luarentśa entsanga tmojamama tśabá o ndoñe tśabá yontsemna ca jatichámuama; quem luaroye sēnjabo ndayá chēnga jabátsebacama. ⁴⁸ Nda atśe šojtsaboté y atśbe palabrēngama ndoñe šonjoyeuná, ya entsebomna nda chabiamana yochjayana bēts castigo jtsebomnama ibojtsemna ca. Atśe tijanoyebuambá palabrēngaca, quem luare jopochócama te chabiamana chca echántsayana. ⁴⁹ Er atśe ndoñe n̄ye atśbe juábnaca quetsatoyebuambná. Chē Taitá, chē šonjichmó cha, šonjamandá ntśamo jayanana y ndayá jabuátambana. ⁵⁰ Atśe sēndētatsēmbo, atśbe Taitá tojamandá orna, cha jamándana entsanga chē n̄yetsca tescama yomna tśabe vida chamotsebomnama. Chíyeca, ndayá sēntsichamcá, endmēna ntśamo atśbe Taitá Bēngbe Bētsá šojamandacá ca” —Jesús tojánayana.

13

Jesús chabe uatsjéndayēnga tojanashecjabebé

¹ Bashco fiesta cabá ndobuache ora, Jesús yojtsetátśēmbo chabe tempo tojanóshjanguama, quem luarentśana jēftsebocnama y chabe Taitábioye jtama. Ntśamo Jesús chábēnga yojanababuan̄yeshancá, chē quem luare imojamnēnga, chórna yojtseboše chē bēts bonshánana puerte más jin̄yan̄iyana.

² Pero Satanás, Júdasbe ainaniñe bacna juabnēnga tojanajó, uayayēngbe cucuatśiñe Jesús jayentśbáshejuanama. Judas Iscariote, Simonbe uaquiñá. ³ Jesús yojtsetátśēmbo chabe Taitá Bēngbe Bētsá n̄yets obenana tbojánatśetama. Cachcá, Jesús yojtsetátśēmbo, Bēngbe Bētsábíocana cha tojánabama y cachábioye jtama ibojtsemnama. ⁴ Chcasna, chē ibeta jasama tmojanpochocá ora, mesēshentśana tojantsbaná, chabe juatsboye uichētjoníya tojanenátsejca y can̄ye tuallējua tojanenasná. ⁵ Chentśana, can̄ye bachešiñe búyeshe tojanbuešcja y tojanontśé chabe uatsjéndayēnga jushecjabebiyana y jtēshechojuana cha yojtsasnana tuallējuaca.

⁶ Pero, Simón Pedro tbojanobuache ora, Jesúsbioye tbojaniyana: —Atśbe Utabná, ¿aca šcochjuashecjabiá ca?

⁷ Chora Jesús tbojanjuá: —Atśe sēntsama soye mora ndoñe quecmátēsertana; pero más chcoye aíñe cmochanjósérta ca.

⁸ As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atśbia ndoñe que-cochátsmēna ca.

⁹ Y Simón Pedro tbojaniyana: —¡Atśbe Utabná, as n̄ye atśbe shecuatśēnga ndoñe, ndayá atśbe cucuatśēnga y bestśáñnaca ca!

¹⁰ Pero Jesús tbojanjuá: —Nda bebená tojtsemna, n̄ye shecuatśe jtsashecjabiama jtsajabótana, ndoñe n̄yetsá cachiñe. Nda tojtsobebé, ndoñe tsengá ntsemnana. Cachcá, mo bebēnēnga cuenta tśēngaftanga šmontsemna; pero can̄ya muentśe entsemna, y cha mo bebenacá ndoñe quenátsmēna.

¹¹ Jesús yojtsetátśēmbo nda chē uayayēngbe cucuatśiñe boshjuaná yochtsanmēnama, chíyeca tojánayana: “Tśēngaftanguentśá can̄ya entsemna, cha mo bebenacá ndoñe quenátsmēna ca”.

¹² Jushecjabebiyama tojanpochocá ora, chabe juatsboye uichëtjoníya tojtánichëtjo, y mesëshentše tojtánótbema. Chora tojanéyana: — ¿Chë tcbonjábíama soyama quecmojsésertana ca? ¹³ Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna. ¹⁴ Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana. ¹⁵ Ntšamo quem sóyeca tcbonjanýanýecá, tšëngaftanga cachcá šmochtsama. ¹⁶ Ndegombre šcuayana, chë oservená chabe nduiñbíama ndoñe más uamaná ntsemnana. Cachcá, chë ichmoná chë tbojichmobíama ndoñe más uamaná quenátsmëna. ¹⁷ Quem soyënga chašmojuatsjinýe y chca chašmojamëse, tšëngaftanga puerte oyejuayënga vida šmochanjéftsebmna.

¹⁸ “Atše sëndétatšëmbo chë tijábacacangbíama, chíyeca atše nyetscangbíama ndoñe chca quetsatoyebuambná. Y ntšamo Bëngbe Bëtsabe uabemana palabrënguiñe endayancá cachcá chaotsemnana, chë ‘canýa átseftaca tandëse tonjasá, atšbe contra echántsemna ca’, cachcá echanjopása. ¹⁹ Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

Jesús tojánayana uayayëngbe cucuatšíne Judas bochjáboshjonama
(Mt 26.20-25; Mc 14.17-21; Lc 22.21-23)

²¹ Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canýa tšëngaftanguentšá uayayëngbe cucuatšíne šochanjáboshjona ca.

²² Chora, chabe uatsjëndayënga tmojanontsé enonýinýnayana, y ndoñe montsetátšëmbo ndabíama Jesús chca tojánayanama. ²³ Canýe uatsjëndayá, chë Jesús puerte ibnabobonshaná, Jesusbe juachaca inatbemana. ²⁴ As, Simón Pedro chábioye tbojánefjatsëmbo, ndabíama Jesús chca tojánayanama Jesúsbioye chabotjama. ²⁵ Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjuá: —Atše canýe base tandëtema chanjafchécuacuaye y ndábioye chajoyé, cha entsemna ca.

As Jesús canýe base tandëtema tojanfchecuacuá, y Judas, Simón Iscariotbe uaquiñábioye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaníyana: “Chë cochanjama soye, cam ora moma ca.”

²⁸ Pero ni canýa chë jasama imojtsetbiamanënguentsá tbojanësertá, ndayama Júdasbioye chca tbojaníyanama. ²⁹ Judas inamna chëngbe crocénana shecnësiñe uambayá; chíyeca ínýenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjémënga ndayánaca chauatšatama ca.

³⁰ Júdasna chë base tandëtema tojanóyëngacñe, y cachora chentšana tojëftsanbocna. Chora ya ibeta yojtsemna.

Chë tsëm mando

³¹ Judas tojëftsanbocnentsana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinýanýiyama; y mua echanjínýanýiye Bëngbe Bëtsá corente bëtsá y obená yomnama. ³² Cha echanjínýanýiye Bëngbe Bëtsá chca yomnama, chíyeca Bëngbe Bëtsánaca

echanjínjányiye corente bētsá y obená yomnama, y mora entsemna chē ndaye ora Bēngbe Bētsá chca chabiama yochjínjányiye. ³³ Atsbe básenga, baseftatescama tsēngaftangaftaca sēntsemna. Chora šmochántsenguaye, pero ntšamo judiēnga sēnjauyancá, mora cachcá tsēngaftanga cbēyana: Chē chanjá luaroye, tsēngaftanga ndoñe quešmatobena jama ca. ³⁴ Canye tsēm soye cbetsamēndá: Njetscanga šmochtsenbobonshana. Ntšamo atše tsēngaftanga cbondábabuanjeshana, cachcá tsēngaftanga šmochtsenbobonshana. ³⁵ Tsēngaftanga šmojtsenbobonshánēse, njetsca entšanga mochántsetatsēmbo, tsēngaftanga atšbe uatsjéndayēnga šmomnama ca —Jesús tojanēyana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Lc 22.31-34)

³⁶ Chora Simón Pedro tbonjantjá: —Bēngbe Utabná, ¿ndēmoye cochjá ca? As Jesús tbojanjuá: —Atše sēntsá luaroye, mora aca ndoñe quecátobena atše juastana, pero más chcoye aīñe šcochanjuasto ca.

³⁷ As Pedro tbojanayana: —Atšbe Utabná, ¿ndáyeca ndoñe sēntsobena mora aca juastama? ¡Atše sēntseprontana acbiama jóbanama ca!

³⁸ Chora Jesús tbojanayana: —¿Ndegombre cojtseprontana atšbiama jóbanama? Ndegombre cbēyana, cabá ngallo ndécánta ora, aca unga soye atšbiama cochanjayana: “Cha ndoñe quetsatabuatma ca”.

14

Jesús beyeca entšanga jobenayana Bēngbe Bētsábioye jama

¹ Mēntsánaca Jesús tojánayana: —Ndoñe ainana tsetšanēnga matsmēnana. Tsēngaftanga Bēngbe Bētsábeñe šmondošbuaché; átšbeñnaca šmochtsošbuáchiye. ² Atšbe Taitá Bēngbe Bētsá endmēnoca, ba luarēnga joyénanama endmēna. Ndoñe chca tontsemnēse, atše chca matchbēnjáuyana. Morna, cha endmēnoye atše chanjá tsēngaftangbiama canye luare joyénanama jabuáprontama. ³ Atše chajjá y chē luare chacbojabuaprontá ora, cachiñe moye chanjésabo, tsēngaftanga átšeftaca junatsama. As, atše chaitsemnoye, tsēngaftángnaca chašmotsá joyénanama. ⁴ Atše chanjá choye ntšamo jama y jashjanguama ya šmontsetátšēmbo ca —Jesús tojánayana.

⁵ Chora Tomás Jesús bioye tbojanayana: —Bēngbe Utabná, ndēmoye cochjama ndoñe queftsátstatšēmbo. As, ¿ntšamo bēnga fchtsetátšēmbo ntšamo choye jama ca?

⁶ Chca tbojanayana ora, Jesús tbojanjuá: —Atše sēndmēna benachcá; chējana tcojtsase, pronto jashjanguana. Atše sēndmēna ntšamo ndegombre yomncá sempre oyebuambnayá, y entšanga chē njetsca tescama yomna tsabe vida chamotsebomnama endamá. Nye átšbeyeca endopodena ndayējana jama, y atšbe Taitá Bēngbe Bētsábioica jashjanguama. ⁷ Tsēngaftanga atše šmojtsábuatmēse, atšbe Taitánaca šmattsábuatma. Morscana ya cha šmonsábuatma y cha šmontsonyá ca —tbojanayana.

⁸ Pero Felipe tbojanayana: —Atšbe Utabná, nye chē Taitá šmanjanyé, ndayama más ca.

⁹ Chora Jesús tbojanayana: —Chēfta te tsēngaftangaftaca sēntsemna, y ¿cabá ndoñe atše šcontsábuatma, Felipe? Nda atše šojinye, chē Taitá Bēngbe Bētsábioynaca jinýana. As, ¿ntšamo atše šcojtsatsá, chē Taitá šmanjanyé ca? ¹⁰ ¿Ndoñe condošbuaché, atšbe Taitá átšbeñe y átšnaca chábeñe nye canýacá ftsmēnana? Chē cbontsētsētná soyēnga, ndoñe nye atšbe juábnaca chca quetsatoyebuambná. Atšbe Taitá, chē átšbeñe vida endbomná jtsamana lempe ntšamo stsamcá. ¹¹ Muiñe šmochtsošbuáchiye: Atšbe Taitá átšbeñe endmēna, y átšnaca chábeñe mo nye canýacá sēndmēna.

Chama ndoñe šmontsošbuachese, as nýe chë tijama soyëngámnaca átšbeñe šmochtsošbuáchiye. ¹² Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama. ¹³ Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínýanýiye chë Taitá corente bëtsá y obená yomnama. ¹⁴ Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

Jesús tojanašebuachená chë Uámana Espíritu jíchmuama

¹⁵ Mëntšánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. ¹⁶ Chca chašmojamëse, atšbe Taitá Bëngbe Bëtsá tšëngaftangbiana chanjaimpáda, tšëngaftanga jabújabuachama y jabáñemuayama inýa cha chabuichmoma, chë Uajabuachaná nýetsca tescama tšëngaftangaftaca chauétsemnama. ¹⁷ Cha, chë Uámana Espíritu endmëna chë nýetsca soyënguiñe ntšamo ndegombre yomncá oyebuambnayá. Chë nýe quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

¹⁸ “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo. ¹⁹ Muentšana baseftaytese, chë nýe quem luarama enójuabnaye entšanga ndoñe más quešmochátónýaye; pero tšëngaftangna aíñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebmoma. ²⁰ Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nýe canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nýe canýacá šmomnama y átšnaca tšëngaftangaftaca. ²¹ Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjínýinýiye ca” —Jesús tojánayana.

²² Chora, inýe Judas, ndoñe Judas chë Iscariote, Jesúsbioye tbojaniana: — Bëngbe Utabná, ¿ntšamo chca yojtsemna, nýe bënga šcochjínýanýiye ntšamo cach aca comnama, y nýetsca quem luarentšëngbioye ndoñe ca?

²³ Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebmoma. ²⁴ Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nýe atšbe juábnaca quenátsmëna, sinó chë Taitá, chë šonjichmó chabe juábnaca.

²⁵ “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. ²⁶ Chë Uajabuachaná, chë Uámana Espíritu, atšbe impadanánaca atšbe Taitá bochanjíchmuama. Cha lempe cmochántsabuatambaye, y echanjama nýetsca chë tcbonjáuyana soyëngama chašmuatenójuaboma.

²⁷ “Chë atšbe ainaniñe puerte tšabe ebionana tšëngaftangbiana šcuétseboshjona, cbetsatšatá. Chë nýe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná

ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. ²⁸ Ya šmonjouena ntšamo tčbonjauyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiana más bëtsá endmëna. ²⁹ Quem soyënga tčbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

³⁰ “Chë quem luarentša bacna soyënga mandayá endabó; chíyeca atše ya ndoñe bëtská tšëngaftangaftaca quichaisóyebuambaye. Pero cha tondaye quenátobena atše jabórlana. ³¹ Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

15

Jesús yomna mo chë tšabe uvas betiyká

¹ Mëntšánaca Jesús tojánayana: “Atše sëndmëna mo chë tšabe uvas betiyká, y atšbe Taitá Bëngbe Bëtsá chë tšabe uvas betiye inyënacá. ² Chë inyëná, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtská chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³ Tšëngaftanga šmonjouena ntšamo tijayancá; bëtská chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. ⁴ Atšeftaca cányiñe mo canyáca šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoobenana nye cachabe ponto jashájonana. Cachcá, tšëngaftanga átšeftaca ndoñe cányiñe mo canyáca šmontsemnëse, ndoñe šmattsobena Bëngbe Bëtsabiana bëtská soyënga jamama.

⁵ “Atše chë tšabe uvas betiyká sëndmëna y tšëngaftanga chë buacuafjëngcá. Nda átšeftaca cányiñe mo canyáca tojtsemna y atše cháftacnaca, cha Bëngbe Bëtsabiana bëtská soyënga echanjama, mo canye buacuafja becá tojtshajuaná. Er, tšëngaftanga atšbe uajabuáchenana ndoñe šmontsebonnëse, átšeftaca cányiñe mo canyáca ndoñe šmontsemna causa, tondaye šmattsobena jamama. ⁶ Canya átšeftaca cányiñe mo canyáca ndoñe tontsemnëse, cha jtsemnana mo canye buacuetëtšena buacuafja, utšenëfja y buashánëfjácá. Chca buacuafjënga, entšanga jtsatbanana, íñeshoye jtsëtšenana y chentše jtsejuinÿiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

⁷ “Tšëngaftanga átšeftaca cányiñe mo canyáca šmojtsemna y ntšamo atše tijayancá šmojtsemnëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸ Chë shajuana buacuafjëngcá tšëngaftanga chašmojtsemna ora, šmochanjínÿanÿiye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjëndayënga šmochántsemna. ⁹ Ntšamo chë Taitá šondbobonshancá, átšnaca cachcá tšëngaftanga cbondábabuanÿeshana. Chíyeca, šmochtsiyena atšbe bonshánama jtsejuabnayëse. ¹⁰ Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsemnëse, atšbe bonshánama jtsejuabnayëse šmochantsiyena.

11 “Atše chca cbontsëtsëtsná, chë atše sëntsebmoma oyejuayana tšëngaftángnaca chašmotsebmoma, y tšëngaftanga puerte chašmotsóyejuama. 12 Mëntsá cbetsamëndá: Ntšamo atše cbondababuanÿeshancá, cachcá šmochtsenbobonshana. 13 Chë chabe amiguëngbiama tojóbanabiama, ndocna quenátobena chabiama más bonshánana jtsebmoma. 14 Ntšamo atše tijamandacá tšëngaftanga šmojtsamëse, atšbe amiguënga šmochántsemna. 15 Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservënga ca ndoñe quecbatëtsëtsná. Morscana mëntsá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinÿcá, tšëngaftanga tcbonjinÿanjé. 16 Tšëngaftanga ndoñe atše chešmatábuayana, pero atše aiñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canÿe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemna. Chca, lempe ntšamo atšbe Taitá šmojtjañcá, y chca šmojama atše jótsëmbonëse, átšbeñe šmošbuachéyeca, cha lempe cmochanjátataye. 17 Mëntsá atše cbetsamëndá: Smochtsenbobonshana ca” —Jesús tojanéyana.

Jesús y chabe entsanga, chë nÿe quem luarama enójuabnaye ngbiama uaboyënjanga

18 Mëntsánaca Jesús tojánayana: “Pero chë nÿe quem luarama enójuabnaye entsanga tcmojtsëbuayënjëse, šmochjenójuaboye, natsana chënga atše šmonjanáboyënjama. 19 Tšëngaftanga, chë nÿe quem luarama enójuabnaye entsanguentsana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsana quešmátsmëna, y atšna, chë quem luare oyenënguentšana tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsëbuayënja. 20 Smochjenójuaboye ntšamo tcbonjáuyanama: ‘Chë oservená chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entsanga ntšamo atše tijayanentsana ntsachetsá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsana. 21 Chë chacmojtsëbuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

22 “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’ 23 Nda atše šojtsáboyënja, atšbe Taitábioynaca jtsáboyënjana. 24 Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinÿëse, chënga atše šmontsáboyënja y atšbe Taitábioynaca. 25 Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nÿe tondayama chënga šmonjanáboyënja ca.’

26 “Atše, atšbe Taitábentsana chë Uajabuachaná y añemuayá tšëngaftangbioye chanjíchmua. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tsabe soyënga cmochantsëtsëtsnaye. 27 Chorscana, tšëngaftángnaca atšbiama entsanga šmochantsëtsëtsnaye, er tšëngaftanga átšeftaca šmondétsemna, entsanga jábuayenama atše sënjanbojatsé orscana ca” —Jesús tojánayana.

16

¹ Měntsánaca Jesús tojánayana: “Atše quem soyënga cbontsëtsëtsná, tsëngaftanga átsbeñe ošbuáchiyana ndoñe chašmondájbanama, atšbe causa chašmojtseufrina ora. ² Chëngna, chë judiëngbe enefjuana yebnënguentshana cmochantëbuacana. Chca tempo chaojobuache ora, chë tsëngaftanga chacmojtsebáyënga mēntsá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ ³ Chënga, chë Taitá Bëngbe Bëtsá ndoñe quematábuatma, y átsbioye cach ndoñe. Chíyeca, chca cmochanjáborlaye. ⁴ Atše chca tsëngaftanga cbontsëtsëtsná, ntšamo tcbonjáuyana chašmuenójuaboma, chca tempo chaojobuache ora ca” — Jesús tojánayana.

Ndayá chë Uámana Espíritu inétsama

Měntsánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsëtsná, er atše tsëngaftangaftaca sënjëtsemna. ⁵ Pero morna, chë šojichmó cha yomnoye chantá; y tsëngaftanguentsá ndocná šochanjatjaye, ‘¿ndëmoye cojtsá ca?’ ⁶ Mora, tsëngaftangbe ainana ngménaca entsemna, atše chca tcbonjáuyana causa. ⁷ Pero ndegombre šcuayana: Atše chanjá y chca tsëngaftangbe tšabiama echántsemna. Atše ndoñe quetsjase, chë Uajabuachaná y añemuayá ndoñe tsëngaftangbioye queochátabo. Pero aiñe chanjá, y chora cha tsëngaftangbioye chanjíchmu. ⁸ Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominyiñe tšabia jtsemnana, y ndayá yomna chë Bëngbe Bëtsá entšangbiama jayanana tšabá o ndoñe tšabá tmonjamama. ⁹ Entšanga átsbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. ¹⁰ Chë Taitábioye chanjá y atše ndoñe más quešmochátinýe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominyiñe tšabia jtsemnana. ¹¹ Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiama jayanana tšabá o ndoñe tšabá tmonjamama.

¹² “Atše cabá ba soyënga sëntsebmoma tsëngaftanga jáuyana. Masque chcasna, mora tsëngaftanga ndoñe quešmatobena chë soyëngama josértana. ¹³ Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojauyancá, tsëngaftanga cachcá cmochanjáuyana, y cha cmochanjábuayenaye ntšamo yochjopásama. ¹⁴ Atšbe soyënguentshana cha echanjójyëngacñe, y cach soyëngama cmochanjabuatambá. Chcase cha cmochanjínýanýiye atše bëtsá y obená bëtsemnana. ¹⁵ Lempe ntšamo chë Taitá endbmncá, atšbe soyëngnaca endmëna. Chíyeca atše tcbonjáuyana, chë Uámana Espíritu atšbe soyënguentshana yochjójyëngacñe y cach soyëngama cmochjabuatambá ca.”

¹⁶ “Baseftayté y atše ndoñe más quešmochátinýe. Inýe baseftayté y cachiñe šmochantëtínýe ca” — Jesús tojanéyana.

“Tsëngaftangbe ngménana, oyejuayana echanjóbema”

17 Chora Jesusbe básefta uatsjéndayënga imojtsentjanaye: —¿Ntšamo yojtsentšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantétinÿe, er atše chë Taitábioye chanjá ca”? 18 ¿Ntšamo yojtsentšáyana, chë “baseftayté ca”? Ndoñe quemuátstatsëmbo ntšamo yojtsentšáyanama ca —chënga imojtsichamo.

19 Jesús yojtsetátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantétinÿe ca.” ¿Chë soyëngama šmojtstentjáná ntšamo stsentšáyanama? 20 Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nÿe quem luarama enójuabnaye entsanga corente oyejuayënga mochántsemna. Masque tša ngménënga šmochántsemna, chentsana tšëngaftangbe ngménana, oyejuayana echanjóbema. 21 Canÿe shembása tbojontšabuache šešona jónÿnama ora, tša ngménaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetsama. Canÿe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. 22 Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbioye chaijésabo ora, atše šmochantétinÿe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

23 “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. 24 Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanéyana.

Jesucristo, quem luarentše mandayábioye yëñjanayá

25 Mëntsánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana. 26 Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbëyana; chca, chë te ndoñe quešochatájaboto tšëngaftangbiana atšbe Taitá jatsimpadánana. 27 Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábocana atše tijabama šmojtsošbuáchema, chë Taitá cmondábabuanÿeshana. 28 Atše chë Taitábocana sënjabocna y quem luaroye sënjabo. Pero mora quem luare chanjëftsebhjona atšbe Taitábioye jtama ca” —Jesús tojánayana.

29 Chora chabe uatsjéndayënga tmojanianayana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. 30 Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábocana tcojabama ca —chënga tmojanianayana.

31 As Jesús tojanéyana: —¿Mora chiñe šmojtsošbuaché ca? 32 Ya tempo tocjobuache y cam ora entsemna, tšëngaftanga nÿetsquénache šmochanjuáshana y atše nÿe canÿa šmochanjésebhjona. Pero atše ndoñe nÿe canÿa quichátsmëna, chë Taitá átšeftaca entsëmnyeca. 33 Atše lempe quem soyënga cbontsëtsësná, tšëngaftangbe ainaniñe tšabe ebionana

chašmotsebomnama, átšeftaca cánÿiñe mo canÿacá jtsemñese. Quem luarentše šmochanjasufrina; pero añemo šmochtsebomna, atše ya chë quem luarentša mandayá sënjayëñaná ca —Jesús tojánayana.

17

Jesús chabe uatsjéñdayëngbiama Bëngbe Bëtsábioye tbojanimpadá

¹ Jesús chë soyënga tojánayanentšana, celoye tojanontješé y Bëngbe Bëtsábioye tbojanayana: “Taita, atšbe te ya tojobuache. Minÿanÿé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainÿanÿema. ² Mora aca nÿets obenana šconjatšetá nÿetsca entšángbeñe, nÿetscanga chë atšbiama tcojábacacanga chë nÿetsca tescama yomna tšabe vida chamotsebomnama atše chaimama. ³ Chë nÿetsca tescama yomna tšabe vida jtsebomnana endmëna aca, chë nÿe canÿe y ndegombre Bëngbe Bëtsá jtsabuutmana, y atše Jesucristo, acbe ichmoná.

⁴ “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinÿanÿiyama. ⁵ Taita, quem luare cabá ndoñe quenjatsmëna ora, aca tconjaninÿanÿé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

⁶ “Aca quem luarentša entšanguentšana quem boyabásenga tconjabacacá y atšbiama šconjinÿinÿé. Atše chënga sënjanÿanÿé ntšamo ndegombre aca comnama. Chënga acbe entšanga mondmëna; y acna, chë atšbiama chënga šconjinÿinÿiyá. Chënga acbe palabra tmonjouena y tšabá tmonjeyeuná. ⁷ Chíyeca chënga mondétatsëmbo, lempe ntšamo atše tsbomncá ácbentšana tijóyëngacñama. ⁸ Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondétatsëmbo atše acbiocana tijabama, y montsošbuaché aca chë atše šcojichmó cha comnama.

⁹ “Atše chëngbiama cbontseimpadana. Chë nÿe quem luarama enójuabnaye entšangbiama ndoñe quecbátsimpadana, pero aíñe chë atšbiama šcojinÿinÿiyëngbiama, er chënga acbe entšanga mondmëna. ¹⁰ Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinÿanÿé atše corente bëtsá y obená bëtsemnama.

¹¹ “Atše ndoñe quem luarentše quešocháisetotona, pero chënga aíñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiama šconjinÿinÿiyënga acbe obenánaca cochtsanÿena. Chca ntšamo bëndata mo canÿacá bondmëna, chëngnaca cachcá chamotsemnama. ¹² Atše chëngaftaca sëntsemnëntscuana, chënga sëntsanÿena, aca šconjatšetá obenánaca. Atše chënga sëndánÿena, y ni canÿa queochátsmëna infiernoca pochocaná, nÿe chë infiernoca pochocaná jtsemnama ibomná chana aíñe, ntšamo acbe uabemana palabrénguiñe endayancá, cachcá chaotsemnama.

¹³ “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtsá oyejuayana chëngnaca chamotsebomnama. ¹⁴ Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. ¹⁵ Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentsana chacuatsebacama. ¹⁶ Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. ¹⁷ Cochjama

chënga acbe entsãnga chamuétsemnama, y chca, nÿe acbiama vida chamotsebonna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. ¹⁸ Ntšamo aca quem luaroye šconjanichmocá, cachcá átšnaca chënga sëntsachamná, quem luare entsãnga jábuayenama. ¹⁹ Chëngbiama atše cachiñe mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entsãnga chamotsemna, y chca, nÿe acbiama vida chamuétsebonna, ntšamo ndegombre yomncá chënga imoyenama.

²⁰ “Pero nÿe chëngbiama ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiama šconjínÿinÿiyënga, chëngbioye atšbiama ínÿenga chamojtsabuayiyná ora; ²¹ as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entsãnga, atše šcojichmoma chamotsošbuáchema. ²² Ntšamo chë obenana y uámanana šconjatšetacá, cachcá átšnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. ²³ Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnama. Y chca, quem luarentša entsãnga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

²⁴ “Taita, atšbiama chënga šconjínÿinÿiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatšmëna orscana, šconjánbobonshana; chíyeca, cachora tconjaninÿanÿé atše corente bëtšá y obená bëtsemnama. ²⁵ Taita, nÿetsca soyënguiñe tšabá amá, masque chë nÿe quem luarama enójuabnaye entsãnga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. ²⁶ Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

18

Uayayënga Jesús tmojánishache
(Mt 26.47-56; Mc 14.43-50; Lc 22.47-53)

¹ Chë soyënga Jesús tojëftsanayanentsãna, chabe uatsjëndayëngaftaca tojëftsanbocna, chë binche bėjaye Cedrón ca uabáiniye chenguana jama. Chentše inamna canÿe tjšašetema; y Jesús chabe uatsjëndayëngaftaca choye tojánamengo. ² Y Judas, chë Jesús uayayëngbe cucuatšíñe boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. ³ Chora Judas tojánashjango, y cháftaca ba soldadënga y básefta Bëngbe Bëtšabe bëtš yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëšhangaca, lamparëšhangaca y espadëjangaca uajátënga.

⁴ Jesusna yojtsetátšëmbo lempe ntšamo cha yochjanpásama; chíyeca, natšanoye tojánbocna y chë entsãnga tojanëyana: —¿Nda šmojtsenguá ca?

⁵ Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna. ⁶ Jesús tojanéyana: “Atše cha sëndmëna ca”, y cachora chë entsanga tmojanostëtšánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

⁸ As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónyaye chamotsóñengama ca.

⁹ Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínýinyiye entsanguentsana ni canya pochocaná queochátsmëna ca”.

¹⁰ Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uámana amëndayabe canye oservenábioye catsbioica matscuashe tbojtsanëštjango. Chë oservená Malco ca inauabaina. ¹¹ As Jesús, Pédrëbioye tbojanianyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngmënanana jtsebomnama, ¿ndoñe chca chaondëtsemna ca?”

Jesús, Anasbe yebnoca

(Mt 26.57-58; Mc 14.53-54; Lc 22.54)

¹² Chentsana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca. ¹³ Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. ¹⁴ Caifás yojamna nda judiënga tojanéyana: “Tšëngaftangbiana más tšabá entsemna canye boyabása Israeloca entsangbiana chaóbana ca.”

Pedro tojánayana Jesúsbioye ndoñe bonjanabuátma ca

(Mt 26.69-70; Mc 14.66-68; Lc 22.55-57)

¹⁵ Simón Pedro y inye uatsjendayá Anasbe yebnoye Jesús imojtsëstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. ¹⁶ Pero Pédrëna nýe shjoca, amashjuanentše tojanouedá. Chcasna, chë inye uatsjendayá tojánbocna y chë bësása ebtajjuana shembásaftaca tojanoyebuambá. Chora Pedro tbojanëmashëngo. ¹⁷ As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

¹⁸ Tša yojtsesësna causna, chë oservénënga y chë josticiënga shjoca tmojaninié y chentše imojtósboniye. Y Pédrënaca chëngaftaca yojtsešbonena.

Ntšamo chë bachnangbe más uámana pasado amëndayá, Jesúsbioye tbojantjá

(Mt 26.59-66; Mc 14.55-64; Lc 22.66-71)

¹⁹ Chora, chë bachnangbe más uámana pasado amëndayá tojanontsé Jesús jatjayama chabe uatsjëndayëngbiana y ndayá cha entsanga yojánabuatambamnaca. ²⁰ Y Jesús tbojanjuá: —Atše nýetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nýetsca judiënga mondbétsenefjuanentše; y chca, iytëmencá tondaye chiyatoyebuambá. ²¹ ¿Ndáyeca chca šcojtsetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondëtatšëmbo ntšamo atše tijayancá ca —Jesús tbojanjuá.

²² Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojanianyana: —¿Chca chë bachnangbe más uámana amëndayá cuanjojuá ca?

²³ Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

²⁴ Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

Pedro cachiñe tojánayana Jesúsbioye ndoñe bonjanabuátma ca

(Mt 26.71-75; Mc 14.69-72; Lc 22.58-62)

²⁵ Chëntscuana, Pedro yojtsešbonena, tsanana chë iñe juachaca. Chora chë entšanga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

²⁶ Chora, chë bachnangbe más uámana amëndayabe canÿe oservená Pédrëbioye tbojanianyana: —¿Atše ndoñe cháftaca chë tjashetémo ca tcbonjinÿe ca?

Chë oservená inamna chë Pedro tbojtsanmatstëtšabe pamillo.

²⁷ Y Pédrëna cachiñe ndoñe ca tojánayana, y cachora canÿe ngallo yojacánta.

Jesús Pilatbe delante

(Mt 27.1-2, 11-14; Mc 15.1-5; Lc 23.1-5)

²⁸ Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámashënguse. ²⁹ Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

³⁰ Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

³¹ As Pilato tojanéyana: —Tšëngaftanga matánatse, y ntšamo cach tšëngaftangbe leyíne iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátšbomna ndocná jóbama ca.

³² Chca tojanopasá, ana ntšamo Jesús cachá jóbana tojanayancá cachá chaotsemnama. ³³ As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiana tcmojacuentáyeca ca?

³⁵ Chora Pilato tbojanianyana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmonjúshjango. ¿Ndayá tcojama ca?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšíne ndoñe chašmondhoshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

³⁷ As Pilato tbojanianyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmojenënga, atše jtseyeunanana ca.

³⁸ Chora Pilato tbojanियana: —¿Y ndayase chë ndegombre soye yomna ca?

Jesusbiana tmojánayana chaóbana ca
(Mt 27.15-31; Mc 15.6-20; Lc 23.13-25)

Chca tbojantjá chentsana, Pilato cachiñe tojánbocna judiëngaftaca jóyebuambayama, y tojanéyana: —Atse ni mo canye soye chiyátinyena, quem boyabása castiganá chaotsemna ca jayanama. ³⁹ Pero tsëngaftanga šmondétatšëmbo, Bashco fiestama atse canye utamená cachcá jëtsboshjonama. ¿šmojtseboše chë judiëngbe Rey chjëtsboshjona ca?

⁴⁰ Chorna nÿetsca entšanga cachiñe tmojanáye buachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

19

¹ Chora Pilato, Jesús tbojanánatse y tojanmandá chamotsetjanjama. ² Y canye coronësha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichëtjo. ³ Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

⁴ Pilato cachiñe tojánbocna y entšanga tojanéyana: —Šmochjouena; cha chanjuábocna, chë boyabása castiganá chaotsemna ca jayanama atse ni mo canye soye ndoñe sënjinÿenama chašmotsetatšëmbuama ca.

⁵ As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanéyana: —¡Muentše chë boyabása entsemna ca!

⁶ Chë bachnangbe amëndayënga y chëngbe josticiënga cha tmojáninye ora, tmojanontšë uayebuáchana: —¡Motsecrucificá! ¡Motsecrucificá ca!

Chora Pilato tojanéyana: —Cach tsëngaftanga mánatse y šmochjacrucificá; atse ni mo canye soye chiyátinyena quem boyabása castiganá chaotsemna ca jayanama ca.

⁷ Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobiamná causa ca.

⁸ Pilato chca tojanuena ora, más yojtšauatja. ⁹ Cachiñe chabe yebnoye tojtšanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbonjanjuá. ¹⁰ Chora Pilato tbojanियana: —¿Ndoñe šcochanjojuá ca? ¿Ndoñe condétatšëmbo, aca jacrucificá o jëtsboshjonama atse tsobenama ca?

¹¹ As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšinë šonjaboshjoná, acbiana más bëts bacna soye tonjama ca.

¹² Cach orscana Pilato yojtšenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonëсна, Césarbe amigo ndoñe condmëna! ¡Nda rey tojtšenobiamná chana, Césarbe uayayá jtsemnana ca!

¹³ Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjaña hebreo biyañe Gabata ca inauabaina, y endayana “ndëtsbéngaca pormániñe ca”. ¹⁴ Bashco fiestama canye te yojtšajamna, y mo nÿetsto ora yojtsemna. Chora Pilato chë judiënga tojanéyana: —¡Muentše tsëngaftangbe rey entsemna ca!

¹⁵ Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucifica ca?

Y chë bachnangbe amëndayënga tmojanjuá: —Bëngbe rey nyë César endmëna, ndocná más ca.

¹⁶ Chentsana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

Jesús tmojancrucificá

(Mt 27.32-44; Mc 15.21-32; Lc 23.26-43)

¹⁷ Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina).

¹⁸ Chentše cha tmojancrucificá y inye útatnaca cátoico tmojanacrucificá; Jesusna tsëntsaca. ¹⁹ Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca.

²⁰ Y ba judiënga chë uabemana soye tmojanalía, er chë Jesús tmojancrucificá luare Jerusalemó béconana inamna, hebreo, latín y griego biyañe yojetsábemana. ²¹ Chca juabemama tojanmandáyeca, chë bachnangbe amëndayënga Pilato tmojanianya: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanéjua: —Ntšamo tijuábema cachcá chaotsábemana ca.

²³ Chë soldadënga Jesús tmojancrucificá chentsana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjua tmojanaca; chëjuana yojanamna nduajonanéjua, nyetsëjua uabianánëjua. ²⁴ As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiama yochjuáquedama chaotso-tatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoye tmonjanétšena, ndabiama jauquédama jtso-tatšëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninye, y chabe juachacna chë Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaquiñá entsemna ca.”

²⁷ Y chë bonshana uatsjendayá tbojanianya: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetátšëmbo ya lempe tojanchnënguama, chíyeca chentsana y ntšamo Bëngbe Bëtsabe uabemana palabrenguiñe endayancá cachcá chaotsemnama, tojánayana: “Sontsajuendá ca.”

²⁹ Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayásoye tmojanbeconá.

³⁰ Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

Canye soldado chabe lanzësaca costillaca Jesúsbioye tbojanashacuá

³¹ Bashco fiestama canye te yojsájamna, y chë judiënga ndoñe imontseboşe chë crucificánënga cachentşe chë ochnayté chamotsemnana, chë te puerte uámana te bétsemnayeca. As Pilato tmojanimpadá chë crucificánënga shecuatsënga jetsatcacayama y chë cuerpënga chentsana jtsejuánama chaomandama. ³² As chë soldadënga tmojána y shecuatsënga imojsatcacaye, natsana canya y chentsana chë inya, Jesúsftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninye; chíyeca chabe shecuatsënga ndoñe tmonjanatcacá. ³⁴ Masque chca, canye soldado Jesúsbioye costillaca canye lanzësaca tbojanashacuá. Y cachora buiñe y búyeshe chentsana tonjanóbocna. ³⁵ Chë mëntsá cuentayá chentşe enjamna y tonjáninye, y ndegombre entsichamo; cha endëtatšëmbo ndegombre yojsichámuama, chca, tsëngaftángnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachá chaotsemnana. Chiñe endayana: “Ni mo canye betaşe cha quemochatsëntšátca ca.” ³⁷ Y ínÿoca, Bëngbe Bëtsabe uabemana palabrenguiñe endayana: “Chë tmojenachentšá bominye mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentsana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nye iytëcana, chë judiëngbiana auatja causa. Pilato aíñe tbojanlesenciá; as José tojána y Jesusbe cuerpo yojsámbañe. ³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. ⁴⁰ As José y Nicodemo Jesusbe cuerpo tbojanca y tmojanandmaná chë botamana uanguëtşe soyëngaca unëtjona entsëjuangaca. Judiënga chca innauamana, obaná juatbontsama ora. ⁴¹ Jesús tmojancrucificá luarentşe canye base jajañe inamna, y chiñe canye tsëm cuevëshe, entsangbe pormánëshe, obanëngbiana; chëshiñe cabá ndocna obaná mondëjajo. ⁴² Asna, nye chentşe Jesusbe cuerpo tmojansegorá, chë Bashco fiestama canye te yojsájamna causa, y chë cuevëshe chë béconana inámnayeca.

20

Jesús tojtanyena

(Mt 28.1-10; Mc 16.1-8; Lc 24.1-12)

¹ Chë inye semana bojatsenté, cabá cachëse, cabá ndëbinyna ora, María Magdalena chë cuevëshoye tojána y tojáninye ínÿoca yojtsemna chë cuevëshoye amashjuanentsa ndëtsbé. ² Asna, tojëftsantójtajo y tojána chë Simón Pedro y chë inye uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojsámbañe y ndayentşe tmotsejájoma ndoñe queftsátstatšëmbo ca.”

³ Chora Pedro y chë inye uatsjendayá chentsana tbojëftsanbocna y chë cuevëshoye tbojánata. ⁴ Nyets útata ibojtsëchamana, pero chë inye uatsjendayá Pédrëbiana más betso tojanótjajo y natsana chë cuevëshoye tojánashjango. ⁵ Tojanotsejbé y chë chentşe tmojanacjá entsëjuangá tojáninye, pero choye ndoñe tonjánamashëngo. ⁶ Chentsana, Simón Pedro chabe ústonoye tojánashjango y chë cuevëshoye tojánamashëngo, y tojáninye chë chentşe tmojanacjá entsëjuangá. ⁷ Y chë Jesús juabestšëntsacjuama tojanaservé entsëjuana ndoñe chë inyájua yontsamna, sinó ínÿoca botamana uandmanánëjua. ⁸ Chora chë inye uatsjendayá, chë cuevëshoye natsana tojanashjanguá, choye tojánamashëngo. Tojáninye y Jesús tojtanyenama yojsanošbuaché.

⁹ Chěntscoñe chë útata cabá ndoñe yontsósertana ntšamo Běngbe Bětsabe uabemana palabreñguiñe endayancá, chë Jesús obaněnguentšana jtayenama ibojamnama. ¹⁰ Chentšana chë uatsjédayata chatbe oyenoye tbojtaná.

Jesús, María Magdalébioye tbojánebēbocna

(Mc 16.9-11)

¹¹ Pero María chentše tojanouquedá, chë cuevėshe juachaca šachénaca; yojtsošachentscuana tojanotsejbé cuevėshoye jarrepárama. ¹² Y tojáninye uta angelotémata uafjantsějua uichětjonata, Jesusbe cuerpo yojětsejajóntěse ibojtsetbemana. Canya tsěntsěněshoica y chë ínyna matsěscoica. ¹³ Chora chata tmojaniana: —Shembása, ¿ndayama cošaché ca?

As cha tojanúa: —Atšbe Utabná tmojtsámabáne, y ndayentše tmojtsejájoma ndoñe quetsátstatsēmbo ca.

¹⁴ Chca tojánayana ora, tojanostěšantješé y tojáninye chentše Jesús yojtsemna, pero María ndoñe yontsetátšēmbo cha Jesús bétsemnama. ¹⁵ Chora Jesús tbojaniana: —Shembása ¿ndayama cošaché? ¿Nda congúa ca?

María yojtsejuabnaye chë boyabásana yojtsemna chentša base jajañe uaishanýa ca; chíyeca tbojantjá: —Bacó, aca tcojuambėsna, šmėyana ndayentše cojtsejájó, as atše cha jesocñama ca.

¹⁶ As Jesús tbojaniana: —¡María ca!

Chora María chábioye tojanontješé y tbojaniana: —¡Rabuni ca! (hebreo biyañe chca endayana “Buatēmbayá ca”).

¹⁷ Chora Jesús tbojaniana: —Ndoñe šcatábojajo, er atše cabá ndoñe atšbe Taitábioye quetstětstsjua. Pero motsa atšbe catšátangbioye y cochjáuyana, atše stsetsjuá atše y tšěngaftangbe Bětsábioye, atše y tšěngaftangbe Taitábioye ca.

¹⁸ As María Magdalena tojana y Jesusbe uatsjédayēnga tojanėyana cha chë Utabnábioye tbojáninye ca y cha chë palabrenga tojánayana ca.

Jesús chabe uatsjédayēnga tojánebēbuacna

(Mt 28.16-20; Mc 16.14-18; Lc 24.36-49)

¹⁹ Tojanibétata ora, cach semana bojatsenté, chë uatsjédayēnga tmojánenefjna canye luarentše, pero lempe tmojtanatame, chë judiēngbiama auatja causa. Chora Jesús tojánamashēngo, chēngbe tsěntsaca tojantsá y měntšá tojanacheuá: “Chë atšbe ainaniñe tšabe ebionana tšěngaftangaftaca chaotsema ca.”

²⁰ Y chca tojanėyana ora, chabe cucuatšēnga y costillaca tojaninyanýe. Chora chë uatsjédayēnga oyejuayēnga imojtsemna, chēngbe Utabná tmojáninýama. ²¹ As Jesús cachiñe tojanėyana: “Chë atšbe ainaniñe tšabe ebionana tšěngaftangaftaca chaotsemna. Ntšamo atšbe Taitá Běngbe Bětsá šojichmocá, átšnaca cachcá tšěngaftanga cbontšachamná ca.”

²² Chca tojánayana ora, chēngbioye tojangouo y tojanėyana: “Chë Uámana Espíritu šmochjójyēngacñe. ²³ Ndėmuanýēnga chēngbe bacna soyēngama chašmojáperdonanga, perdonánēnga mochántsmėna; y ndoñe chašmonjáperdonasna, ndėperdonánēnga mochántsemna ca.”

Tomás, Běngbe Utabnábioye ainá tbojáninye

²⁴ Pero Tomás, chë Gemelo ca uabobainá, canya chë bnětsana uta uatsjédayēnguentšá, chë uatsjédayēngaftaca ndoñe yontsemna, Jesús tojánashjango ora.

²⁵ Chíyeca, “bēnga chë Utabná fsějninýe ca”, chë inye uatsjédayēnga tmojaniana ora, Tomás tojanějua: “Atše chabe cucuatšiče chë uajabonjana uinýniñe ndoñe sějninýe, y chiñe atšbe ntšabuafja ndoñe sějnjajué y atšbe cucuatše chabe costillaca ndoñe, ndoñe quichátošbuachiye ca.”

²⁶ Canÿe semana tojanochnëngo ora, chë uatsjëndayënga cachiñe canÿe luarentşe tmojánenefjna. Y Tomásna chëngaftaca yojtsemna. Masque chentşe atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atşbe ainaniñe tşabe ebionana tşëngaftangaftaca chaotsemna ca.

²⁷ Chora Tomásbioye tbojanियana: —Acbe ntşabuafja muentşe mojué y atşbe cucuatşe minÿe; acbe cucuatşe miyëbo y atşbe costillaca mojué. Y ndoşbuachiyá ndoñe matsmënana, sinó atşe tijtayenama cochtsoşbuáchiye ca.

²⁸ As Tomás tbojanियana: —¡Atşbe Utabná y atşbe Bëtsá ca!

²⁹ Chora Jesús tbojanियana: —Tomás, nÿe şconjínÿeyeca cojtsoşbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojoşbuachenga ca!

Ndayama quem librëşa tmojanábema

³⁰ Jesús, chabe uatsjëndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëşañe ndoñe quenatábemana. ³¹ Y quem librëşañe soyëngna, entsábemana tşëngaftanga chaşmotsoşbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chaşmojtsoşbuachese, chábeyeca chë nÿetsca tescama yomna tşabe vida chaşmotsebonnama.

21

Jesús, canÿsëfta chabe uatsjëndayënga tojánëbëbuacna

¹ Chca tojanopasá chentşana, Jesús inÿe soye chabe uatsjëndayënga tojánëbëbuacna, Tiberias mar béjaye tsachañe. Chora mëntsá tojanopasá: ² Cánÿentşe imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjëndayata. ³ Simón Pedro chënga tojanëyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. ⁴ Ya yojtsebínÿana orna, Jesús chë tsachoca yojtsemna, pero chë uatsjëndayënga ndoñe imontsetátşëmbo cha Jesús yojamnama. ⁵ Chora Jesús tojanatjá: —Básenga, ¿tondaye şmonjashbuá ca?

Y chënga tmojanjuá: —Tondaye ca.

⁶ As Jesús tojanëyana: —Barquëshu catşbioica chë atarraieşha mëtsena y beonga şmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetsá beonga tmojánishëche causa. ⁷ As chë Jesusbe bonshana uatsjëndayá, Pédrëbioye tbojanियana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtaníchëtjo, er nduichëtjoná yojtsemna, y chë béjayoye tojanoshbuetşe. ⁸ Chë inÿe uatsjëndayëngna chë barquëshañe tmojána, y chë atarraieşha jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. ⁹ Fshantsoye tmojánastjajna ora, chënga tmojáninÿena canÿe chebániñe pormániñe, y chentşna canÿe beona y tandëşnaca yojtsesegorana. ¹⁰ Chora Jesús tojanëyana: “Chë şmonjáshebuaye beonguentşana báseftanga miyëbo ca.”

¹¹ Simón Pedro chë barquëshoye tojánamashëngo, y chë atarraieşha jútjena bëts beóngaca, uasjojónana tsachóntscoñe tojanëyamba. Mo canÿe patse y

shachna bnětsana y unga beóngaca; pero masque n̄yetśá beonga, chě atar-
raiěsha ndoñe ntjuataněcanana. ¹² Chora Jesús tojaněyana: “Maběnga,
šmochjase ca.”

Chě uatsjéndayēnguentśana ni can̄ya yontsenñémua cha jatjayama nda
cha yojamnama, er n̄yetścanga imojtsetátśēmbo cha chě Utabná bétsemnama.
¹³ Chora Jesús tojanobeconá, chě tanděse tojanca y chěnga tojanatśatá, y chě
beónacnaca cachcá tojanma.

¹⁴ Chóracna, Jesús ya unga soyama chabe uatsjéndayēnga yojtsanebēbuacana,
obanēnguentśana tojtanayenentśana.

Jesús, Simón Pédroftaca tojanoyebuambá

¹⁵ Jasama tmojanpochocá ora, Jesús, Simón Pédrēbioye tbojantjá: —Simón,
Juanbe uaquiñá, ¿quemēngbiamama más quešcbobonshana ca?

Y Pedro tbojanjuá: —Atśbe Utabná, aíñe. Aca condětatsēmbo atśe aíñe
cbondbobonshánama ca.

As Jesús tbojanijana: —Atśbe entśanga, mo oveshatemēngcá imomnēnga,
cochtsan̄yena ca.

¹⁶ Chora cachiñe tbojantjá: —Simón, Juanbe uaquiñá, ¿quešcbobonshana
ca?

Y Pedro tbojanjuá: —Atśbe Utabná, aíñe. Aca condětatsēmbo atśe aíñe
cbondbobonshánama ca.

As Jesús tbojanijana: —Atśbe entśanga, mo oveshēngcá imomnēnga, cocht-
san̄yena ca.

¹⁷ Y unga soyama tbojtětantjá: —Simón, Juanbe uaquiñá,
¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbon-
jantjá causa; y tbojanjuá: —Atśbe Utabná, aca lempe condětatsēmbo. Aca
condětatsēmbo atśe aíñe cbondbobonshánama ca.

As Jesús tbojanijana: —Atśbe entśanga, mo oveshēngcá imomnēnga, cocht-
san̄yena. ¹⁸ Ndegombre cbēyana: Más bobontse conjamna ora, conjanamana
cach aca jtichětjuana y ndēmoye jama cojtseboše choye jtsoñana; pero tanguá
chacojtsemna orna, buacuatśēnga cochanjatsbaná, y in̄ya cmochantichětjo
y ndēmoye jama ndoñe chacontseboše choye cmochanjuánatse ca —Jesús
tbojanijana.

¹⁹ Chca tojánayana, ana jtsotatsēmhuama ntśamo Pedro jóbanama ibojam-
nama, y chě chca jóbaněse, Běngbe Bětsá corente bětsá y obená bétsemnama
Pedro yochjánin̄yan̄iyama. Y chca tojánayanentśana, Pédrēbioye tbojanijana:
—Smasto ca.

Jesusbe bonshana uatsjendayá

²⁰ Pedro tojesanenostětśantjeśé y tojánin̄ye, Jesusbe bonshana uatsjendayá
ústonoye yojtsaye. Cha enjamna chě monjansá ora, Jesús cabá ndóbana ora,
chě Jesúsbioye más tonjanosjoná y tbonjantjá: “Běngbe Utabná, ¿nda chě
boshjuaná yochtsemna ca?” ²¹ Pedro chábioye tbojánin̄ye ora, Jesúsbioye
tbojantjá: —Atśbe Utabná, y cháftaca, ¿ntśamo yochjopása ca?

²² Chora Jesús tbojanjuá: —Atśe quem luaroye jesabáměntscuana cha ainá
chauesomñama atśe stsebošěse, ¿aca ndayá chama cmatjátsěntśamna? Acna
n̄ye śmasto ca.

²³ Chíyeca, chentśana, Jesucristbeñe ošbuáchiyēngbenache n̄yetścanga
imójánichamo, chě uatsjendayá ndoñe yochanjanóbana ca. Pero Jesusna
ndoñe chca tonjánayana, sinó “atśe quem luaroye jesabáměntscuana cha ainá
chauesomñama atśe stsebošěse, ¿aca ndayá chama cmatjátsěntśamna? ca”.

²⁴ Mua endmëna chë uatsjendayá; cha entsichamo quem soyënga ndegombre yojamnama, y camuá quem librësañe lempe tonjuábema. Y bënga mondëtatšëmbo cha ndegombre soye endóyebuambnama.

²⁵ Jesús inye ba soyënga tonjëftsema; tša bëtská soyënga endmëna, nderado lempe cada canye soye tcojuábema y librësangá tcojuapormá, atše sëntsejuabná, nyetsca chësangá quem luarentše ndoñe nanjuába.

Hechos

Jesús tojanašebuachená chë Uámana Espíritu jíchmuama

¹ Teófilo, atšbe natsana librëšaňe tčbonjuábobema lempe ntšamo Jesús tojanmama y tojánabuatambama, chca tojanbojatsé orscana, ² y Bëngbe Bëtsá celoye tbojtanatsbanantscuana. Cabá celoye ndëta orna, chë chabe ichmonëngcá tojanabacacá boyabásengna Jesús tojëftsanamëndá, chë Uámana Espíritbiajana, ndayá jamama yojánamnama. ³ Jesús cruciňe tojanóbana y tojtanayenentsana, ba soye chë ichmónënga yojánebëbuacana, chca, chënga jinÿanÿiyama cha ndegombre tojtanayenama. Canta bnëtsana tentscuana cha yojánebëbuacana y Bëngbe Bëtsabe amëndayama chënga yojanabuatambá.

⁴ Canÿe, Jesús chabe ichmónëngaftaca yojétsemna ora, mëntšá tojanamëndá: —Jerusalenentsana ndoňe šmatjábocana. Camuentše šmochjobátma, ntšamo atšbe Taitá tčmonjanašebuachenacá chaóshjanguentscuana, ndayama atše tčbonjáuyana. ⁵ Ndegombre, Juan entsanga béjayecca tonjanëbaye; pero ndoňe baytesna, Bëngbe Bëtsá chë Uámana Espíritu bochanjíchmuama, tšëngaftangbe ainaniňe jtsemándayama cháuamashënguama ca.

Jesús celoye tojtantsjuá

⁶ Canÿe, chë ichmónënga Jesúseftaca cánÿiňe imojtsemna ora, chënga tmojantjá: —¿César y chë Romoquëngbe amëndayentsana tašcochjatsebacá, y mora bënga, Israeloca entsanga, canÿe Rey quemochtsatsbomna ca?

⁷ As Jesús tojanëyana: —Tšëngaftanga ndoňe quecmátamna chë soyëngama jtsetatšëmbuana. Nÿe atšbe Taitá aiňe; y cha, chabe obenánaca echanjamánda mocna ora y ndayté chca chaopasama. ⁸ Chë Uámana Espíritu tšëngaftangbe ainaniňe jtsemándayama chaojabo ora, tšëngaftanga obenana šmochanjóyëngacňe. Chentšana, ntšamo atšbiama šmotatšëmbcá, chë tčbonjabuatambá soyënga, entsanga šmochjáuyana Jerusalenentsë, nÿets Judea luariňe, Samarioca y quem luarentša nÿets luarënguenáchnaca ca.

⁹ Chë soyënga tojánayanentsana y chabe uatsjëndayënga imojtsonÿaye ora, Bëngbe Bëtsá, Jesúsbioye tbojtanatsbaná y canÿe jantšetëshe chábioye ibojútsbotse y ndoňe más tmonjanobená cha jinÿama. ¹⁰ Jesús celoye yojtsetsjuama chënga bën imojtserreparánentscuana, nÿe ndeolpe, uta boyabásata uafjantse entsayaca bopormánata chëngbe juachaca tbojabántsaye, ¹¹ y chëngbioye tmojanëyana: “Galileoca entsanga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinÿcá cha celoye jtama, cachcá quem luaroye cha echanjësabo ca.”

Júdasbe cuenta Matías tmojanábuayana

¹² Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoňna bécoňe inamna, ndayëntscoca canÿe ochnayté jama yojanlesenciana nÿetšá. ¹³ Jerusalenoye tmojtanashajna orna, chë yebnentša tsbanánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. ¹⁴ Chënga sempre imojanamana jteneffnana Bëngbe Bëtsáftaca jencuëntama básefta shembásengraftaca, María Jesusbe mamá y Jesusbe catšátangraftaca.

¹⁵ Chë tempo tmojáneneffna canÿe patse y uta bnëtsana Jesucristbeňe ošbuáchiyënga, y canÿe, Pedro tojantsá y tojanëyana: ¹⁶ “Jesucristbeyeca

atšbe catšátanga, endánëyta ntšamo Bëngbe Bëtsabe uabemana palabrënguifne iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama. ¹⁷ Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiñe jtsoservénama. ¹⁸ Tšëngaftanga šmondëtatsëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtšanótsatše y chabe bestšaše tsëntsaca tbojtšanashtëtšena y chabe uafsbentšana nyetsca chabe chunchullëjuangá tojtšanáshana. ¹⁹ Jerusalenentše oyenënga chë soyama tmojántatsëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. ²⁰ Salmos librëšañe, Jesucristo uayayëngbe cucuatšifne boshjuanabiama mëntšá enduábemana:

Chabe yebna énañe chaotsemna
y ndocná chentše chaondëtsiyena ca.
Y mëntšánaca endayana:

Chabe cuenta inya chabe trabajo chaoma ca.

²¹ “Chcasna, mora muentše montsemna taitanga bëngaftaca monde-nutënga, Bëngbe Utabná Jesús bëngaftaca enjamnëntscuana, ²² Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbon-tanatsbanantscuana. Y mora šontsamna canya mënguentšá juabuáyanama, Jesús tojtanayenama entšángbioye bëngaftaca jábuayenama ca.”

²³ As chora útata tmojanabocacá: José, nda Barsabás ca imojanábobuatma y inyënga Justo ca; y chentšana Matías. ²⁴ Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminyanýé nda quem útatentšana cochjuábuayanana, ²⁵ canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

²⁶ Y nda chë ichmoná yochtsemnama jtsotatsëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canye Jesusbe ustonacá, cachcá ntšamo chë bnëtsana canye uatsjëndayëngbiama chënga imojanjuabnacá.

2

Chë Uámana Espiritu ošbuachiyëngbeñe tojánamashëngo

¹ Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cányiñe canye luarentše imojtsemna. ² Ndeolpe, celocana mo canye jabuache binýiëcá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. ³ Y chora bichtajënga mo iñeshcá yojónýna y canyanýabeñe yojojátaye. ⁴ Chca chë Uámana Espiritu tojánamashëngo chëngbe ainaniñe jtsemándayama; chora nyetscanga tmojanontšë inyetšá biyangana, chënga tempo ndmabiyañe, ntšamo chë Uámana Espiritu yojtsamcá chënga inyetšá chamotsebiyama.

⁵ Chë tempo Jerusalenentše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. ⁶ Entšanga chë shauenanana tmojanuena ora, tmojanójoto y ndoñe imontsetatsëmbo ntšamo jtsejuabnayana ndayá yojtsopasánama, er chë inye luarocana áshjajnënga imojtsuenana chë Jesucristbeñe ošbuáchiyënga

inÿetsá biyangana jtsóyebuambnayana, ntšamo cada ona chënga imojan-biyacá. ⁷ Chë soyëngama entšanga puerte imojenjaná y mëntšá imojt-senatsëtsnaye: “Chë chca montsóyebuambnanga Galileoquënga mondmëna. ⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? ⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, ¹⁰ Frigioquënga, Panfilia, Egiptó y Libia, chë Cirene béconana luaro-quënga. Báseftangna Romoquënga montsemna; ¹¹ chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

¹² Chë causa nÿetscanga imojtsenjanaye y ntšamo jtsejuabnayama ntsetatsëmbcá imojtsemna y imojtsentjanaye: “¿Ndayá chë soye yojsayana ca?”

¹³ Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴ Chentsana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nÿetscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama. ¹⁵ Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. ¹⁶ Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

¹⁷ Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nÿetscangbe ainaniñe cháumashënguama.

Chentsana, tšëngaftangbe uaquiñënga y bemianga atšbe soyëngama entšanga mochantsëtsësnaye;

tšëngaftangbe bobontsëngna, atše chanjama soyënga mochantsonÿaye mo otjenayoquëcá;

y tšëngaftangbe bëtsëjëmëngna atšbe soyënga mochantsotjénaye.

¹⁸ Chca ora, atše chanjama nÿetsca atšbe oservénëngbiama, boyabásenga y shembásenga,

chëngbe ainaniñe atšbe Espíritu cháumashënguama, as chënga atšbe soyëngama entšanga mochantsëtsësnaye.

¹⁹ Atše chanjama bëts soyënga celoca;

y quem luariñe echántsemna buiñe, iñeshe y ngona mo jantšetëshcá, atšbe obenana jinÿanÿiyama.

²⁰ Cabá chë puerte uámana te, chë Bëngbe Utabná bëts soyënga jamama ndobuache ora,

shinÿe ndoñe queochátsbuashinÿinÿana

y juashcona buánganëtema mo buiñcá echántsemna.

²¹ Y as, ndánaca Bëngbe Utabná tbojtsotsëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

²² Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmonjaninÿanÿé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmonjaninÿanÿé, Jesús chë Nazaretocáftaca cha tojanma bëts soyëngaca y

ójnanana soyëngaca, Bëngbe Bëtsabe obenana jinÿanÿiyama. Cach tšëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca. ²³ Ndegombre tšëngaftangbe cucuatšinë Jesús tmonjáboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámna cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. ²⁴ Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

²⁵ Chora Pedro tojatanëyana: “Rey David tempo Jesusbiamama mëntšá tojëftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna,
y sempre átšeftaca condboquedá atše juajabuáchama,
chíyeca ndocná queochatobenaye atše jauátjanama.

²⁶ Chíyeca atše corente oyejuayá sëntsemna,
y atšbe uayásaca cbontsatschuaná.

Atše masque chanjóbana, tšabá sëndëtatšëmbo aca atšbe Bëtsá, atše chaitayenama cochjamama.

²⁷ Aca, Bëngbe Bëtsá, obanëngbe luarentše ndoñe quešcochátšboshjona,
y ndoñe queochatsleséncia acbe uámana oservenabe cuerpo chaot-sopochocama.

²⁸ Aca chë tšabe benache šconjaninÿinÿé, ntšamo tšabe vida jtsebomnama.
Aca átšeftaca condbétsemnama, atše puerte oyejuayá sëntsemna ca —David tojëftsanabema ca.”

²⁹ Chentšana Pedro tojatanëyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana. ³⁰ Cach David canÿe Bëngbe Bëtsabe juabna oyebuambnaya inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentšana canÿa, Cristo, cach Davidcá rey jabemama.

³¹ David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bëngbe Bëtsá ndoñe ntjalesénciana chabe cuerpo chaot-sopochocama ca. ³² Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fsëntsetatšëmbo chca ndegombre bétsemnama. ³³ Bëngbe Bëtsá, Jesús celoye tfontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonÿá y šmontsuenancá entsemna, Jesucrísoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca.

³⁴ David ndoñe Jesuscá celoye tonjána, pero mëntšá tojëftsanábema:
Bëngbe Bëtsá atšbe Utabná Crístbioye tbonjanianama:
‘Atšbe catšbioica cochtsetbemana,

³⁵ acbe uayayënga acbe cucuatšinë chamoquedama atšbe obenánaca chamëntscuana ca.’ ”

³⁶ Chora Pedro tojatanëyana: “Tšëngaftanga nÿets Israeloquënga šmochtsetatšëmbo, atše ndegombre cach Jesusbiamama sëntsoyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

³⁷ Chë soyënga tmojanuena ora, entsanga cochtsetsenánënga imojtsemna, y Pedro y chë inye ichmónëngbioye tmojanëyana: —Baconga, ¿ndayá mora jamama šojtsamna ca?

³⁸ As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháuamashënguama.

³⁹ Bëngbe Bëtsá chë soyënga tcmonjanašebuachená tšëngaftangbiamá, tšëngaftangbe básëngbiamá y nyëts chë bën luarënguenache imomna entsangbiamá, nyëtsçanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inye palabrëngnaca Pedro tojatanëyana y bëtscá tojanabuayená mëntsá: “¡Bëngbe Bëtsá chë Israeloca bacna entsanga echanjácastigaye. Chašmótsbocamna, chëngbentsána šmochtsojuánañe ca!”

⁴¹ Ba entsanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entsanga nyëtsá tmojanoboté, Jesucristbeñe ošbuáchiyënga jtsemnama. ⁴² Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtsacochebiona nyëtsçanga cányiñe jtsemnama y imojanamana mo chë Jesucristbeñe ošbuachiyëngcá cányiñe jtsesayana y cányiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuáchiyënga vida innabomna

⁴³ Nyëtsçanga imojtsenjanaye, chë ichmónënga bëts soyënga y inye soyënga chabe obenana jinýanýiyama chamomama Bëngbe Bëtsá tojánmayeca.

⁴⁴ Nyëtsca chë Jesucristbeñe ošbuáchiyënga sempre cányiñe mo canýacá imojtsemna y nyëtsca chëngbe bomna soyënga nyëtsçangbiamá yojtsemna. ⁴⁵ Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínýënga tojtsëjabotcá. ⁴⁶ Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cányiñe imojtsesaye oyejuayënga y ndoñe ojëndayënga.

⁴⁷ Chënga imojanamana Bëngbe Bëtsá jtsatschuanayana, y nyëtsca entsanga imojtsejuabnaye chë Jesucristbeñe ošbuáchiyëngbiamá tšabe entsanga imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanýënga cha yojtsatsebacayënga.

3

Pedro canýe coshëtbioye tbojanshná

¹ Canýe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuéntayana. ² Bëngbe Bëtsabe bëts yebnentše canýe cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canýe luaroye, Bëngbe Bëtsabe bëts yebnocá, Botamana Amashjuana ca uabáinoye, chë tmojtsachnëjuanënga lemošna chaótejañama. ³ Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canýe lemošna chátbioye yojótejañe. ⁴ Chatna chë šocá imojtsonýaye, y Pedro tbojanianyana: “Scochtsënyë ca.”

⁵ As cha yojtsënyë y yojtsejuabnaye ndayá chjójyëngacñe ca. ⁶ Chora Pedro tbojanianyana: “Quetsátsbomna ni crocénana, ni castellano aca jatšëtayama,

pero atše chanjama Jesucristbe obenánaca ndayá acbiama jamama atše tsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

⁷ Pedro chca tbojanियana ora, tbojanábuacueshache catšbióicatše y tbojtanatsbaná, y cachora chë cosheto shecuatšíñe y shëmiabeñe añemo yojsatsbomna. ⁸ As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojsayontsënjnaye y Bëngbe Bëtsá ibojsatschuanaye, tbojanshnama. ⁹ Chë Bëngbe Bëtsabe bëts yebnëntše imojëtsemnënga nyetscanga cha tmojáninye tšabá jtsanana y Bëngbe Bëtsá jtsatschuanayana. ¹⁰ Chënga innatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojsatsmënamna entšanga ojanánënga imojtsemna.

Ntšamo Pedro tojanoyebuambá Salomonbe Amashjuana ca uabáinentše

¹¹ Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entšanga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojëtsemnoye. ¹² Pedro chë entšanga tojánanye ora, tojanëyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nyë šcojtsëbuáutja? ¿Šmojtsejuabná nyë bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? ¹³ Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinñanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjáboshjona chamóbama. Pilato enjëtseboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. ¹⁴ Jesús uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama. ¹⁵ Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndëtatšëmbo. ¹⁶ Jesús puerte obená endmënayeca, quem cosheto añémoca entsatsmëna. Ntšamo šmonjinye y šmonjatatšëmbonca ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

¹⁷ “Taitanga y mamanga, atše sëndëtatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojëtšamama ntsetatšëmbcá. ¹⁸ Tempo, Bëngbe Bëtsá chë chabe juabna oyeuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngmënanana yochtsanbomnama. Morna, ntšamo Bëngbe Bëtsá tojanayancá ya tonjochnëngo. ¹⁹ Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, ²⁰ y tšëngaftangbiye bochanjíchmua Jesús, chë tempo chabe Uámana Uabuayaná Bëngbe Bëtsá tbojanbemá. ²¹ Canye te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna

oyebuambnayëngbiajana entšanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmua. Cha tsëngaftangbentsana echanjábocna y tsëngaftanga cmontsamna ntšamo chacmojtsëtsëtsnacá cha jtseyeunanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentsana luaroca jtsemnama y chamotsepochocama ca’ —cha tojánayana.

²⁴ “Y nyetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonýacá. ²⁵ Chabe juabna oyebuambnayëngaftaca Bëngbe Bëtsá tojanašebuachená bëts soyënga tsëngaftangbiama, y tsëngaftangbe bëts taitángaftaca canye trato tojánbema; chë soyënga cabá tsëngaftangbiama entsemna. Bëngbe Bëtsá Abrahámioye mëntsá tbojaniyana: ‘Chë ácbentsana entšángbeyeca tšabe bendicionënga chanjama nyetsca quem luarentša entšangbiama ca.’ ²⁶ Bëngbe Bëtsá tojama chabe oservená cháuatayenama y natsana tsëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tsëngaftangbeñe tšabe bendicionënga chaotsemnama ca” —Pedro tojánayana.

4

Pedro y Juan Jerusalenentša mandadëngbe delante

¹ Pedro y Juan cabá entšanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. ² Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna. ³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. ⁴ Masque chca, banga entšanguentšana, ntšamo Pedro y Juan tbojanayancá tmojanuenënga, aiñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nye boyabásenga jacuéntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. ⁶ Chéntsñaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nyetsca pamíllangnaca. ⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntsá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

⁸ As Pedro, chë Uámana Espiritu chabe ainaniñe corente jtsemándayëse, mëntsá tojanéjua: —Israeloca mándayënga y bëtsëjemënga, ⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama. ¹⁰ Chcasna, ntšamo tojopasama cbochanjabuayená, chca, tsëngaftanga y nyetsca Israeloca entšanga chë soyënga chašmotsetatšëmbuama. Quem boyabása, chë tsëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatmëna. Y Jesús endmëna nda tsëngaftanga šmonjancrucificá y ndabiama Bëngbe Bëtsá tojanma cháuatayenama. ¹¹ Jesusbiamá Bëngbe Bëtsabe uabemana palabrënguiñe mëntsá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tsëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más

uamaná entsemna. ¹² Nye cha yobena tsëngaftanga jätsebacama. Bëngbe Bëtsá ndocna inye entsábioye tbonjatsetá chabe obenana chca jamama; chíyeca quem luarentse ndocná más quenátobena bënga jätsebacama. Nye Jesucristbe obenánaca aíñe ca —Pedro tojánayana.

¹³ Chënga imojenjaná Pedro y Juan tša añémoca ibojtsóyebuambnama tmojáninye ora, y chata tempo nduatsjínyenata y librësa nduabuatmata bëtsemnama tmojántatsëmbona ora. Chca chë mándayënga tmojántatsëmbona chata Jesúseftaca bayté ibojamnama. ¹⁴ Y entsanga imojtsonyaye chë tmojanshná cha chentse chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵ As chora tmojanamëndá chentšana chábuaisebocnama y chentse tmojanoquedangna chë soyama imojtsenatsëtsnaye. ¹⁶ Chënga imojtsentjanaye: “¿Ndayá chátaftaca mochjama ca? Jerusalenentse oyenënga montsetátëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷ Pero entsanga chama ndoñe más chamondëtsencuëntamna, chata mochjáuyana: ‘Ndoñe más entsángbeñe Jesús smattsebáyana; y ndoñe chašmonjouenëse, jabuache castigo šochántsebomna ca.’ ”

¹⁸ As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamama entsángbeñe jtsabuátambayana. ¹⁹ Pero Pedro y Juan tbojánayana: “¿Ntsamo tsëngaftanga šmatjayana ntšamo fchanjayanama ca? Ndegombre, Bëngbe Bëtsabe bominyiñe ndoñe tsabá quenátsmëna tsëngaftangbioye aíñe joyaunayana y chábioye ndoñe. ²⁰ Er bënga queftsátobena jtsajbanana oyebuambnayana chë tifjinye y tifjouena soyëngama ca.”

²¹ Chë mandayëngna chátbioye tojtsanautatjá, pero chentšana tmojtanabáshejuana. Nyetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinyenana ntšamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojanimpadá más añemo chauatsatama

²³ Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninyenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá. ²⁴ Chënga chca tmojanuenentšana, nyetscanga cányiñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nyetsca béjayënga y lempe ntšamo chenache yomncá, ²⁵ chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entsanga yapa imojtsetšátjaye ca?

¿Ndáyeca imojtsejuabná nye bonamentiamama soyënga jamana?

²⁶ Quem luarentša reyënga y amëndayënga imoprontánënga, nyetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bëts pueblentse, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. ²⁸ Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama,

y chënga chca Jesúseftaca tmonjama. ²⁹ Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama, ³⁰ y cochjama acbe obenánaca šoquënga tšabá chamot-satsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

³¹ Bëngbe Bëtsáftaca jencuéntama tmojanpochocá orna, chë tmojánenefjntse tojanangmëmmana; y nÿetscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

Nÿetsca bomna soyënga nÿetscangbiamá yojtsemna

³² Jesucristbeñe ošbuáchiyënga, nÿetscanga canÿe juabna imojtsebomna y ainaniñe cach canÿe ebionana. Ndocná ntjatichamuana chabe soyënga nÿe chabiamá yojtsemna ca, pero aiñe imojtsichamo, “atše sëndbomna soyënga nÿetscangbiamá entsemna ca”. ³³ Chë Jesusbe ichmónëngna puerte obenánaca mëntšá imojtsichamo: “Fsënjinye y fsëntsetatšëmbo Bëngbe Útabná Jesús obanënguentšana tojtayenama ca.” Y Bëngbe Bëtsá yojtsama chë ichmónënga bëtsá tšabe bendicionënga chamotsebomnama. ³⁴ Jesucristbeñe ošbuachiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuíyana, y chë crocénana ³⁵ chë ichmónëngbiyoye jayentšbuáchiyana, ntšamo tojtsëjabotcá nÿetscanga jujátayama. ³⁶ Chca tojanma canÿa Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷ Chana, fshantse yojtsatobuiye, y chë crocénana Jesusbe ichmónëngbiyoye yojáyentšbuachiye, chë uajabótëngbiamá chaoservema.

5

Ntšamo Ananías y Safíraftaca tojanopasá

¹ Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojániye. ² Ananías y Safirna tbojanenóyeunata; chcasna, batšá crocénana cachatbiamá tbojanobuajó y chë tojanójama crocénana ichmónëngbiyoye Ananías tojanamba, pero tojanëyana chana canjamna nÿets crocénana ntsachetšá chë fshantsama tbojanosháchiñe ca. ³ As Pedro tbojanianyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocenánama jabuambayama ca? Acna chë fshantsama tcmojtabuená crocenánentšana cach acbiamá batšá tcontábojama. ⁴ Cabá ntsatobuiye ora, chë fshantse ábeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nÿe entšángbiyoye quecatabuambná, sinó Bëngbe Bëtsánaca ca” —Pedro tbojanianyana.

⁵ Ananías chë palabrenga tojanuena ora, obaná tojánshajaye. Y nÿetscanga chama tmojántatšëmbonënga corente imojtsauatja. ⁶ Chentšana, básefta bobontsënga tmojánashajna y Ananíasbe cuerpo entšëjuaca tmojanandmaná y jauátbontsama tmojanamba.

⁷ Mo unga horéntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama. ⁸ Chora Pedro tbojantjá: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aíñe, nyetšnama fsënjiye ca.

⁹ Pedro tbojaniana: —¿Ndáyeca tsëndata šojenoyeuná Bëngbe Utabnabe Espiritu jabuambayama, y cabá castigo jtsebomnama ndoñe šontsobatmana ca? Acebe boyá jauátbontsama tmonjuambënga muentše bësoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninyëna; asna, chentšana tmojanamba y cachabe boyabe juachaca tmojanatbontsá. ¹¹ Y nyetsca Jesucristbeñe ošbuáchiyënga chentše imojtsemnënga y nyetscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama

¹² Chë Jesucristbe ichmónëngaftaca ba bëts soyënga entšángbeñe yojtsebinÿna Bëngbe Bëtsabe obenana jinÿanÿiyama; y nyetsca Jesucristbeñe ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše. ¹³ Chë ínÿënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiana tšabá imojtsencuëntaye. ¹⁴ Bëngbe Utabnábeñe ošbuáchiyënga más imojtsóbotena, bëtscá boyabásënga y shembásëngnaca. ¹⁵ Tša bëts soyënga chë ichmónëngaftaca yojtsebinÿna; chíyeca entšanga imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnëjuana ora, nÿe mo chabe sómbrëncaca chëngbe cuerpëjana chaochnënguama, shnánënga jtsatsmënana. ¹⁶ Jerusalén chábuañe pueblënguentsana ba entšanga imojanamana jabana, y šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama

¹⁷ Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. ¹⁸ As chë ichmónëngbioye tmojánishëche y chë bëts pueblentša cárceloye tojtsanëtame. ¹⁹ Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanébuacna y mëntsá tojanëyana: ²⁰ “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nyetsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëse ca.” ²¹ Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtšëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. ²² Pero chë soldadënga chë utámenoye tmojánashjajna ora, chënga chentše ndoñe tmonjánanÿëna. Chcasna, chënga tmojtaná chë mándayënga chca jaúnayama. ²³ Y tmojánayana: “Chë utámenoca fsënjínÿëna lempe tšabá endëtsëtámeñe y soldadënga nyetsca

bëšašangá monduabojanýanga; pero fsënjatëfjo y tsoye fsënjámashjna orna ndocná chibiátinýena ca.”

²⁴ Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsetëmnana y imojtsentjanaye ndayá chentšana yochjanopásama. ²⁵ Chorna, chënga imojtsemnentše canýe boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnocá montsemna, entšanga montsabuatambá ca.”

²⁶ Chë soldadëngbe amëndayá tojána soldadëngaca, chë Jesusbe ichmónënga junatsama; pero nýe tšabá tmojanënatse, er chënga entšangbiama imojtsauatja, nderado cachëngbioye ndëtšbéngaca muantsëbaye. ²⁷ Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana: ²⁸ —Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nýetsca chë Jerusalemntša oyenënga chabe soyëngama šmojtšabuatambá y šmojtseboše, cha tojanóbanama castigo bëngbeñe chaotsemnama ca.

²⁹ Chorna, Pedro y chë inýe ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entšángbioye. ³⁰ Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canýe cruciñe juajabonjëse. ³¹ Bëngbe Bëtsá tbontatsbaná y chabe catšbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngménaca chamuenójuaboma bacna soyënga imojtsamama y chca amana chamotšajbanama, y chëngbe bacna soyëngama perdonánënga chamotsemnama. ³² Bënga fsëntsichamo ndayá bënga ndegombre tifjinýe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbétsama chë Uámana Espiritu cháuamashëngo chë tmojtseyeunanëngbe ainaniñe jtsemándayama ca —chënga tmojánayana.

³³ Chë mándayënga chca tmojanuena ora, puerta tmojanotjayaná y tmojánbošena chë ichmónënga jtsëbáyama. ³⁴ Pero chë mándayënguentše yojtsemna canýe fariseo, Gamaliel ca uabainá. Chana canýe ley abuatambayá inamna y entšanga puerta innarrespetana. As cha tojantsá y tojanmandá chë ichmónënga ratotema chentšana jubuacnama. ³⁵ Chentšana chë inýe mándayënga tojanéyana: “Israeloca taitanga, puerta cuedado šmochtsebmna ntšamo quem boyabásëngaftaca šmochjamama. ³⁶ Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canýe uámana entšá canjamna ca, y mo canta patse entšanga cha tmojanasto. Pero chora inýenga cha tmontsanóba y chabe ústonënga tmontsanáshana, y chca lempe tontsanopochocá. ³⁷ Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inýenga tmontsanóba y nýetsca chabe ústonënga tmontsanáshana. ³⁸ Chíyeca atše cbéyana, quem boyabásënga matabáshejuana y ndocá mataborlánana. Ntšamo chënga montsamancá, nýe entšangbe juabna y nýe chëngbe trabajo tojtsemnëse, betesco echanjopochóca. ³⁹ Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná. ⁴⁰ Chcasna, chë ichmónëngbioye tmojánachembo, tmojtšanachebuánganja y tmojanéyana Jesusbe uabáinaca entšángbeñe ndoñe chamondëtsoyebuambná ca; y chentšana

tmojtanabáshejuana. ⁴¹ Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservénënga bëtsemnayeca. ⁴² Chentsana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entsángbioye imojanabuayiyná, Bëngbe Bëtsabe bëts yebnentše y yebnënguenáchnaca.

6

Chë ichmónëngbiana ujabuáchanënga tmojanëbuáyana

¹ Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuachiyëngbentše, chë judiënga griego biyanga batšá imojtsetsátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

² Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjamoto soyënguiñe. ³ Chcasna, baconga y batanga, tšëngaftanguentsana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. ⁴ Y bëngna šontsamna nyets tempo Bëngbe Bëtsáftaca jtsencuéntayana y Bëngbe Bëtsabe palabra entsanga jtsabuayiynayana ca” —chënga tmojánayana.

⁵ Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentsana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëts pueblócá, y cha yojanamana Bëngbe Bëtsá jtsadoránana mo cachjudiëngcá). ⁶ Chentsana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentše jajajuase.

⁷ Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betesco imojtsóbotena. Y ba judiëngbe bachnángnaca tmojanontsé Jesucristbeñe jtsošbuáchiyana, ntšamo chë ínÿenga imojtsanošbuachecá.

Esteban tmojánishache

⁸ Esteban, Bëngbe Bëtsabe obenana y chábentsana tšabe bendicionënga yojtsebomnëse, entsángbeñe bëts soyënga yojtsama. ⁹ Báseftanga “Ya Cachcá Atabashejuana Oservénënga ca” uabainëngna tmojanontsé Estebanoftaca enatsëtsnayana. Chënga imojamna judiënga Cirenoquënga, Alejandroquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”. ¹⁰ Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. ¹¹ As chënga báseftanga tmojanëbuénaye Estebanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiama ndoñe tšabá jtsóyebuambnayana, mo cuafjoyanguangcá ca.” ¹² Chcase chënga tmojanma entsanga, bëtšëjemëngcá mándayënga y ley abuátambayënga Estebanbe contra

chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo. ¹³ Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. ¹⁴ Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochóca y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabuatambacá ca.”

¹⁵ Chë mándayënga y nÿetscanga chentše imojétsetbiamanënga Esteban tmojanonÿinÿé ora, tmojáninÿe chabe jubiá yojtsebuashinÿinÿana mo canÿe ángelbe jubiacá.

7

Ntšamo Esteban tojanenëuyaná

¹ Chora chë bachnangbe más uámana amëndayá, Estébanbioye tbojantjá: — ¿Ntšamo acbiamá montsichamcá ndegombre yojtsemna ca?

² As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts pueblóca joyéanama cabá nda ora, ³ y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.”

⁴ As Abraham chabe luare Caldea tojëftsanboshjona y tojána Haránoca joyéanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše. ⁵ Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama. Pero aiñe Abrahámbioye tbojanšbuachená chë fshantse jatšëtayama, chabiamá y chabe básengbiamá, Abraham tojóbanentšana. Chca tbojanšbuachená ora, Abraham ni canÿe šešona bonjánbomna. ⁶ Y Bëngbe Bëtsá mëntšá tbojaniyana: “Chë ácbentšana entsanga, ínÿengbe luaroca áshjajnënga mochántsemna, y choca oyenënga chëngbe oservénënga chëngbioye mochanjábiamá y canta patse uatëntscuana jabuache mochanjasufrina ca.” ⁷ Y mëntšánaca tbojaniyana: “Pero atše chanjácastigaye chca oservénënga chacmojábiamá luarentša entsanga; y as, chentšana chë ácbentšana entsanga mochanjésebocana y mora bontsemna luaroye mochanjésabo y muentše atše šmochántšadorana ca.” ⁸ Bëngbe Bëtsá Abrahámbioye tbojanšbuachená nÿe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinÿnamna tbojanmandá chabe šešona, boyabásetema tojonÿná ora, base bobachtema chë más delicadentše jatëtšana. Chíyeca, chabe uaquiñá Isaac tojanonÿná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

⁹ “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia innabomna y tmojtsatanobuiye, Egiptoeye canÿe oservenacá chamotsánatseñama. Pero Bëngbe Bëtsá Josébioye nÿets tempo ibnauájabuachana, ¹⁰ chíyeca nÿetsca chabe ngmenënguentšana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyeuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnënguentše oyenëngbiámnaca.

11 “Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónyënama. 12 Pero Jacob tojántatsëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. 13 Uta soyama chënga tmojtësaná ora, José chabe catsátanga tojanéyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatsëmbona. 14 Chentšana, José tojanmandá chabe taitá Jacob y nýetsca pamíllanga Egiptoye chamotsama. Canýsëfta bnëtsana shachnënga imojamna chë Egiptoye tmojánanga. 15 Chcasna, Jacob Egiptoye tojána choca joyéanama. Choca cha tojanóbana y chë inýe bëngbe bëts taitángnaca. 16 Jacob y chabe básënga, ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canýe crocénánama Hamorbe uaquiñëngbioye, chëshënga yojtëyentsbuamiñe Siquem puebloca.

17 “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. 18 Cabana, Egiptoca inýe rey tojanojayé y cha Josébioye ndoñe tbonjanabuátmana. 19 Chëreyna, bëngbe entšanga, chë bëngbe bëts taitángbioye tojanaingñé y tojanma chënga puerte chamosufrima; tojanamëndá, chë tmojtsónýna šëšonatémënga cachcá jtsënyayana chamotsóbanama. 20 Chë tempo canýe básëtema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsétsata cach yebnentše tmojanboché unga ishinýentscuana. 21 Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. 22 Chca, chë Egiptoquënga imnatátšëmbo soyënga Moisés tmojanbuatëmbá y canýe uámana entšá tojánbocna jóyebuambayama y ndayánaca jamama.

23 “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnama. 24 Canýe, Moisés tojáninýe canýe Egiptocá canýe Israelocábioye ibojtsetantšetaye ora; as Moisés tbojanoboguiyaná y chë Egiptocábioye tbojtsanóba. 25 Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentšana chëngbioye játsëbacama ca. Pero chë Israeloquënga ndoñe yontšësertana. 26 Yëfsana, Moisés tojánanyëna útata, cach Israelocata, ibojtsentsjanaye; chora cha betscó tojána jetsëuyanama y tojanéyana: ‘Tsëndata catsata šondmëna, ¿ndáyeca šojtsentsjanata ca?’ 27 As, chë inýabioye ibojtsetsjanayá Moisésbioye tbojtsanjuatsëntše y tbojanianyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ 28 ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ 29 Moisés chca tojanuena ora, Madián luaroye tojtsanachá y choca yojoyena inýe luarocana ashjanganacá. Chentše uta uaquiñata yojéftsabamna.

30 “Chentšana canta bnëtsana uatëse, entšanga ndoyena luariñe, Sinaí tjañe béconana, canýe ángel tbojánëbëbocna zarzësha yojtsángbototjuanentše. 31 Moisés yojenjnaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntsá ibojtsatsëtsnaye: 32 ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebmna choye jon-tjëšiyama. 33 As Bëngbe Utabná tbojanianyana: ‘Motsenóshecbotsca, er aca contsemnentše nýe atšbiana luare endmëna, er átšnaca chentše sëntsemna.

³⁴ Ndegombre sēnjinye ntšamo atšbe entšanga Egiptoca montsesufrina y sēnjouena chēngbe oyabojuayana, y atše sēnjabo chēnga jabátsebacama. Chcasna, mabouena, Egiptoje cbochanjíchmuca ca' —Bēngbe Bētsá tbojaniyana."

³⁵ Chentšana Esteban tojanéyana: "Quem Moisés entšanga tmojtsanaboté y tmojaniyana: '¿Nda bēngbeñe tcmēnjajayé mandado y chē tšabá o ndoñe tšabá ftsamama chacuayanama ca?' Masque chca, Bēngbe Bētsá mo mandayacá y atsebacayacá tbojesanichmó, chē zarzēshentše tojanobinyá ángeloftaca. ³⁶ As Moisés, bēngbe bēts taitanga Egiptocana tojésanébuacna y bēts soyēnga tojanma, y inye soyēnga Bēngbe Bētsabe obenana jinyanīyama Egiptentše, chē Buángana ca uabaina mar bējayentše y entšanga ndoyena luarentše, canta bnētsana uatēntscuana. ³⁷ Cach Moisés Israeloca entšanga mēntšá tojanéyana: 'Bēngbe Bētsá tšēngaftanguentšana canya bochanjábema atšcá Bēngbe Bētsabe juabna oyebuambnayá ca.' ³⁸ Moisés Israeloca entšangaftaca yojēftsemna chē entšanga ndoyena luaroca. Choca chē entšanga tmojánenefjna Sinaí tjañe béconana. Chentšna canye ángel Moisésoftaca tojanoyebuambá, bēngbe bēts taitángbiyoye chē buayenana soye Moisés chaóyebuambama, chē entšanga tšabe vida jónyēnana palabrenga; y Moisés chca tojanma, bēngnaca chē palabrenga jouenama jobenayama.

³⁹ "Pero bēngbe bēts taitanga ndoñe tmonjánbošena joyeunayama, masna nye tmojtsanaboté y Egiptoje jeshēconama imojtsaiseboše. ⁴⁰ Moisés cabá chē tja tsjuanoca chē ángeloftaca yojtsemna ora, chēngbe bachnangbe más uámana amēndayá Aarónbiyoye mēntšá tmojaniyana: 'Bēngbe Bētsabe cuenta šmayentšpormá canye buashinyinyana soye jadórama, bēnga chašúnatsama. Er bēnga quemátstatšēmo ndayá yojtsopasana Moisés, chē Egiptocana šonjēftsebuacnáftaca ca.' ⁴¹ As tmojanma canye buashinyinyana soye mo canye uacnabecá y cha jadórama ba bayēnga tmojanēbaye, y tmojanóboyajuanga cachēnga chē soye tmojanpormáyeca. ⁴² Chē causa, Bēngbe Bētsá chēngbentšana tojtsanojuánañe y cachcá tojesanēnyaye chēngbe bacna soyēnga causa, estrellatēmēnga chamotsadoránama. Chca jochnēnguama, Bēngbe Bētsabe juabna oyebuambayēngbe libréšañe mēntšá endayana, ntšamo Bēngbe Bētsá tojanayancá:

Israeloca entšanga,

¿Atše jētschuayama bayēnga chešmēnjanēbaye y chē soyēnga chešmēnjanátšēmbona, chē canta bnētsana uata entšanga ndoyena luarentše tšēngaftanga šmonjēftsemna ora?

⁴³ Atše jadóra cuentna, chē Molochbiana jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórama.

Mora chē causa atše chanjama, Babilonientšana más chcoye tšēngaftanga chacmotsēnatsama ca" —chiñe endayana.

⁴⁴ "Bēngbe tempsca bēts taitanga entšanga ndoyena luaroca, chē jatsjacama opodena yebna innabomna; chē yebnentše Bēngbe Bētsá chēngaftaca tojanoyebuambá. Inajebna ntšamo Bēngbe Bētsá Moisésbiyoye tbojanmandacá, y cha tojanma ntšamo chaojebuama Bēngbe Bētsá tbojaninīnyēcá. ⁴⁵ Bēngbe bēts taitangna chēngbe taitángbentšana chē jatsjacama opodena yebna chēngbiana tmojanóyēngacñe, y chēnga chē Canaán luaroye Josuéftaca, chē inye luaroquēngaftaca jēntsjama tmojána ora, chē jebna soye tmojanamba y

chocna, Bëngbe Bëtsábeyeca chentša entsángbioye Israeloquëngbentšana tmojtanébuacna; y chë jebna soyna chë tmojanayënjana luarentše tojanoquedá, rey David yojëftsiyenëntscuana. ⁴⁶ David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. ⁴⁷ Pero Salomón inamna nda chë Bëngbe Bëtsabe bëts yebna tojanjebuá. ⁴⁸ Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

⁴⁹ ‘Celoca endmëna chë luare ndayentšana atše tsmánda, y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntšamo atšbiamá jebna yebna šmochjajebo ca?’ —chë Utabná jayanana

‘o ¿ndaye yebnentše atše jóchnama chjobenaye,

⁵⁰ ndegombre cach atše nÿetsca chë soyënga tijamëse ca?’ ”

⁵¹ Esteban mëntsánaca tojanéyana: “Tšëngaftanga nÿets tempo josértama ndëbošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjanियencá, tšëngaftángnaca cachcá. ⁵² ¿Bëngbe Bëtsabe juabna oyebuambnayënguëntšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtsanébaye, y mëngna entsángbioye imojtanabuayiyiná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšíñe cha šmojábošhona y šmojóba. ⁵³ Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

Esteban ndëtsbéngaca tmojanóba

⁵⁴ Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnana. ⁵⁵ Pero chë Uámana Espíritu Estébanbe ainaniñe corente yojtsemándaye. Celoye yojntješiye y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana. ⁵⁶ As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja. ⁵⁸ Chentšana, chënga chë pueblentsana tmojtsanábočna y ndëtsbéngaca tmojtsanatëchénganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojesanábonÿiñe chaotsinÿenama.

⁵⁹ Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰ Chentšana Esteban tojanoshamentsé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

¹ Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, ínÿenga tmojanontsé Jesucristbeñe ošbuáchiyënga Jerusalenentše ucamenana y jtsamana puerta chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbeñe ichmónënga ndócnoye tmonjánacheta. ² Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerta tmojánenobošachna. ³ Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

Felipe Samaria luaroca tšabe noticiëngama yojanabuayiyiná

⁴ Y Jesucristbeñe ošbuáchiyënga tmojanáshanëngna nÿetsquénache imojánabuayiyenaye Jesusbe tšabe noticiënga. ⁵ Chca, Felipe Samarioye tojána y tojanontsé chë Bëngbe Bëtsabe Uámama Uabuayaná, Cristbiamana, chentša entšanga jábuayenama. ⁶ Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. ⁷ Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna. ⁸ Chë soyama chë pueblentša oyenënga corente imojtsóyejuaye.

⁹ Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entšanga chabe soyëngama imojánenjnanaye. Cha yojánichamo cha canÿe uámama entšá canjamna ca. ¹⁰ Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

¹¹ Y ndegombre chënga corente imnayeunana, er cha chë bocjuanana soyëngaca bayté chë entšanga ingñénënga y ojnánánënga yojtsabamna. ¹² Pero chë luarentša entšangna, Felipe tmojanoyeuná chë cha yojtsëtsëtná tšabe noticiënga Bëngbe Bëtsabe amëndayama y chë Jesucristbiamana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. ¹³ Y cach Simónëngna Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴ Chë Jerusalenoca imojtsemna ichmónënga tmojántatsëmbona Samarioca entšanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵ Pedro y Juan Samarioye tbojánashjango ora, chentše Jesucristbeñe ošbuáchiyëngbiamana Bëngbe Bëtsá tmojanimpadá, as chë Uámama Espíritu chëngbeñe cháumashënguama jtsemándayama. ¹⁶ Er cabá ni mo cánÿabeñe chë Uámama Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chabeñe ošbuáchiyënga jtsemnama imojtsebóseyeca. ¹⁷ As Pedro y Juan chëngbe bestšašinë cucuatšënga tbojancjá, y chca, chë Uámama Espíritu tojánamashëngo chëngbe ainaniñe jtsemándayama.

¹⁸ Simón tojáninÿe, chë ichmónënga entšangbeñe cucuatšënga tmojacjá ora, chë Uámama Espíritu chëngbeñe jamashënguana. As chora Simón chë ichmónënga tojanëyana: —Quem crocénana mosháchiñe, ¹⁹ y átšnaca chë obenana šmatšetá, y ndábeñnaca cucuatšënga chajajajó ora, chabeñnaca chë Uámama Espíritu cháumashëngo ca.

²⁰ As Pedro tbojanianya: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca

tcojajuabó causa! ²¹ Ndegombre, aca bēngaftaca ndoñe quecátsmēna, ni bēngbe trabajo acbiama quenátsmēna, Bēngbe Bētsabe delante acbe ainaniñe tšabe juabnēnga ndoñe quecátbomna causa. ²² Ngménaca cochjenójuaboye quem bacna soye tcojamama y chca amana cochtsajbaná y Bēngbe Bētsá cochjaimpáda, aca chca tcojájuaaboma nderádose cmatjaperdóna. ²³ Atše sēntsetatšēmbó, acbe ainaniñe tša bacna juabnēnga ínŷengbiamama yojtsemnama; y bacna soyēnga amana jtsajbanama ndoñe quecátobena causa, aca mo canŷe ntsacjuanacá contsemna ca —Pedro tbojanianyana.

²⁴ As chora Simón tojanēyana: —Bēngbe Utabná atšbiamama šochjaimpáda, ntšamo šmonjauyancá ndoñe chandēpasama ca.

²⁵ Pedro y Juan, ntšamo Bēngbe Utabná Jesucristbiamama tbojaninŷcá y ibnatatšēmbcá entšanga imojtsētsētsnaye. Chentšana, Jerusalenoye tbojésanata y tbojánachnēngo ba Samarioca pueblēnguējana, tšabe noticiēnga entšanga abuayinyaye.

Felipe y chē Etiopía luaroca reinabe uajabuachaná

²⁶ Chentšana, Bēngbe Utabnabe canŷe ángel Felípbioye tbojanianyana: “Moprontá y tsmana luarēngoye motsa, Jerusalenentšana Gaza ca uabaina bēts puebloye benachējana ca.” Chē benachna entšanga ndoyena luarējana yojanachnēngona. ²⁷ As Felipe yojētsētsbaná y tojána. Benachiñe tbojáneninŷyena canŷa Etiopía luarocáftaca. Etiopía luaroca canŷe reiná inamna y chē boyabásana chabe uajabuachaná y chabe crocénana bojanŷá inamna. Chana Jerusalenoye tojánabo Bēngbe Bētsá jadórama. ²⁸ Chora Etiopía luaroye yojtsataye, chabe cochēshañe inayésenotbemañe, y chē Bēngbe Bētsabe juabna oyebuambnayá Isaíasbe uabemana librēša yojtsaiualíaye.

²⁹ Chora chē Uámana Espíritu Felípbioye tbojanianyana: “Mobeconá y chē cochēsha juachaca cochtsaye ca.” ³⁰ As Felipe betesco yojobeconá. Chora yojouena chē Etiopía luarocá, Isaíasbe uabemana librēša yojtsaiualíaye; as tbojantjá: —¿Chē contsalía soye quecmojtsosertana ca?

³¹ Y chē Etiopía luarocá tbojanjuá: —¿Ntšamo šochjosérta, ndocná šonjabuayenase ca?

Y Felípbioye tbojanianyana: —Diosmanda, atšbe cochēshoye másēngo y atšbe juachaca mabótbema ca.

³² Isaíasbe uabemana librēšañe mēntšá yojtsalíaye:

Cha tmojanánatse mo canŷe oveshá jóbama cuafjuanatscá;
y chē mo canŷe oveshá tmojtsētsbotjná ora, cha iytēca jtsemnana,
chánaca cachcá, chacá tondaye chenátanayana.

³³ Entšanga tmonjanma cha puerte chaosufrima,
mo cha canŷe nduamaná cuaftsemncá y ntšamo ndoñe betsomerecencá
cháftaca tmonjanma.

Ndocná nanjobenaye chabe básengbiamama jacuéntana,
quem luarentša chabe vida tmonsanbojuaná causa ca.

³⁴ Chora chē Etiopía luaroca uajabuachaná Felípbioye tbojanianyana: —Diosmanda, šmobuayená, ¿ndabiamama Bēngbe Bētsabe juabna oyebuambnayá chca yojtsichamo, cachabiamama o ínŷabiamama ca?

³⁵ As Felipe tojanontsé, chē Isaíasbe librēšañe yojtsayana sóyeca, Jesusbe tšabe noticiēnga jábuayenama.

³⁶ Chentša bēnēse, canŷe bējaye obējniñe juachañe ibojtsachnējuana. Chora chē uajabuachaná tojánayana: —Muentše bējaye entsemna. ¿Ndáyeca ndoñe nanjopódia atše muentše uabainá jtsemnamama ca? Diosmanda, šmabaye ca.

³⁷ As Felipe tbojanianyana: —Jesucristbeñe nŷets acbe ainánaca tcojtsošbuáchese, añe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnama ca.

³⁸ As chë Etiopiocá tojanmandá chë cochësha chauátotonama. Chentšana, nÿets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

³⁹ Chë béjayentšana tbojtancocna ora, chë Uámana Espíritu Felipe ibotsánatseñe y chë uajabuachaná ya ndoñe más Felípbioye ibontsonÿaye, pero corente oyejuayá yojtsatoñe. ⁴⁰ Felipe tojántatsëmbona Azoto bëts pueblaca yojtsemnama, y chentšana tojána nÿetsca pueblënguenache chë tšabe noti-ciënga abuyaynaye, Cesarea puebloye jashjanguëntscuana.

9

Ntšamo Saulo Crístbeñe ošbuachiyá tojanóbema (Hch 22.6-16; 26.12-18)

¹ Saulo chëntscuana cabá Bëngbe Utabnábeñe ošbuachiyënga yojanautatjñá jtsëbáyama. Chama cha tojána chë bachnangbe más uámana amëndayábioye, ² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninÿanÿé Benache ustoniñe, boyabásenga o shembásenga tojánÿenëse, jótabayama y Jerusalenoye junatsama. Y chca jamama tojánbocna. ³ Pero ya Damasco béconana yojtsaye orna, nÿe ndeolpe chabe juachañe celocana canÿe bëts tcuinÿe tojanbuashinÿinÿena. ⁴ Chora Saulo fshantsoye tojánshajaye y canÿe oyebuambnayana tojanuena, mëntšá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entšanga chamotsesufrínama. ⁶ Pero matëtsbaná y Damascoye mamáshëngo; chentše canÿa cmochanjabuayená ndayá jamama cmojtsemnama ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nÿe chë oyebuambnayana tmojanuena, pero ndocná tmonjáninÿe. ⁸ As Saulo fshantsentšana tojtantsbaná y tojtanobuchatéfjona ora, tondaye yontsobena jinÿana. Chcasna, chë inÿenga tmojëftsanobuacuetëntsé y chca, Damascoye tmojanánatse. ⁹ Chentše yojëftsemna unga te, jinÿama ntsobencá, ni ntjascá y tondaye ntjofšiyá.

¹⁰ Damascoca Jesucristbeñe canÿe ošbuachiyá inoyena, Ananías ca uabainá. Cha Bëngbe Utabnábioye mo otjenayoquëcá tojáninÿe y Bëngbe Bëtsá tbojaniyana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniyana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canÿe boyabásabiama, Saulo ca uabainábiami, Tarso pueblócá; cha mora Bëngbe Bëtsáftaca bentsencuënta. ¹² Saulo ya tonjinÿe mo otjenayoquëcá, canÿe entšá Ananías ca uabainá entsamashjuana y chabe cucuatšënga chabe bestšašinë entsejájua, chca, cha chabuatabínÿnama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiama šmonjacuentá; Jerusalenoca tša bacá acbe entšanga imomnënga tojaborlaye. ¹⁴ Y mora entsebomna mando chë bachnangbe amëndayëngbentšana, muentše aca otšëmbuanënga jótabayama ca.

¹⁵ As Bëngbe Utabná tbojaniyana: —Motsa, er atše cha sënjuábuayana atšbiama chaotrabajama; chaóyebuambama ndoñe judiëngbeñe, reyëngbeñe

y Israeloca entsángbeñnaca, y chca, chënga atšbiamama chamotatsšëmbonama.
¹⁶ Atše cha chanjinÿinÿiye ntsachetšá ibojtsemna átšbeyeca jasúfriama ca.

¹⁷ As Ananías tojána Saulo yojtšanmëna yebnoye. Tojánamashëngo ora, Saulëbe bestšašifne chabe cucuatšënga tojanjajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjan-abó ora cmonjanebëbocná, šonjichmó aca chacmatabínÿnama y chë Uámana Espiritu acbe ainaniñe jtsemándayama cháuamashënguama ca.”

¹⁸ Cachora, Sálëbe bominÿentšana mo beonbe bobachëshëngcá tojan-tquécjana, y chca, ibojtsatabinÿna; chora tojantsbaná y tojanenábaye.

¹⁹ Chentšana, Saulo tojanse y añemo yojtatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damascopuebloca Saulo entsanga yojanabuayiná

²⁰ Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. ²¹ Chë imojtsuenanënga nÿetscanga imojtsenjanaye y mëntšá imojtsichamo: “Mua entsemna chë Jerusalenoca Jesusbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšifne jabáshejuanama.”

²² Pero Saulo cada ora más añémoca yojtsoyebuambnaye y puerta tšabá yojaninÿanÿná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentšana tojtšanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatsšëmbona. Bnëtë y ibeta, chë bëts pueblentša bëšašanguenache chënga chabiamama imojananÿá, jtsóbama; ²⁵ pero chë Jesucristbeñe ošbuáchiyënga, ibeta, cha canÿe bëts sbarëcuiñe tmojtšanatsumá, y chë pueblentša shëconana tapiëšëjana tmojtšanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nÿetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷ Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojanianama y ntšamo cha Damascoca tša añémoca Jesusbiamama entsanga tojánabuayenama. ²⁸ As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiamama bëts añémoca entsanga yojanabuayiná y ²⁹ yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. ³⁰ Jesucristbeñe ošbuáchiyënga chca tmojántatsšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nÿetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espiritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³² Pedro yojánabuache n̄yetsca ch̄e Jesucristbeñe ošbuáchiyēngbenache. Y chca, Lida puebloca Bēngbe Bētsabe entšanga jabuachámnaca tojána. ³³ Lida pueblentse can̄ya tbojánin̄yena, Eneas ca uabainá. Cha jama ndobená inamna y posufta uata jutsnēshañe chca inajájona. ³⁴ Pedro tbojaniyana: “Eneas, Jesucristo tcmónjashná. Matētsbaná y acbe tjuashe motsejacaná ca.” Y cachora ch̄e jama ndobená tojtantsbaná.

³⁵ N̄yetscanga ch̄e Lida pueblentse y Saronoca oyenēnga ch̄e entšá shnaná tmojánin̄ye. Y as, chēnga bacna soyēnga amana tmojtsanajbaná y cach orscana tmojanontsé Bēngbe Utabnábeñe ošbuáchiyana.

Pedro tojanma Dorcas cháuatayenama

³⁶ Ch̄e tempo, Jope puebloca yojaniyena can̄ye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha n̄yets tempo tšabe soyēnga yojánama y yojanamana ch̄e tojtsējabotēnga jujabuáchana. ³⁷ Pero chora, šocana tbojanshache y tojtsanóbana. Tmojtsanbebé chentšana, can̄ye tsoye tsbanana tsañoca chabe cuerpo tmojtanaajó. ³⁸ Jope inamna Lida béconana, y Lidentse Pedro yojtsemna; y ch̄e Jope pueblentse Jesucristbeñe ošbuáchiyēnga tmojántatsēmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscó Jope puebloye mabo ca.”

³⁹ As Pedro tojēftsantsbaná y ch̄e uta boyabásaftaca tojána. Choye tmojánashjajna ora, tmojanánatse ch̄e Dórcasbe cuerpo yojtsemnoye, tsbanánoca; chorna, n̄yetsca viudanga šachénaca Pédrēbioye tmojanóbobuashcona y imojtsin̄in̄ynaye ch̄e Dorcas yojuajonaná entšayangá y cmešējuangá, cabá chēngaftaca yojēftsemna ora. ⁴⁰ Pedro tojanmandá n̄yetscanga chentšana chamotsebocanama; chora Pedro yojoshēntsamentšiyē y Bēngbe Bētsáftaca ibojencuentá. Chentšana, Pedro ch̄e obanábioye tbojanon̄in̄yé y tbojaniyana: “Tabita, matētsbaná ca.”

As Dorcas tojtanoBuchatēfjona y Pédrēbioye tbojánin̄ye ora, tojanótbema. ⁴¹ Chora Pedro tbojanábuacushache y tbojtanatsbaná. As Pedro tojánachembo n̄yetsca ch̄e Jesucristbeñe ošbuáchiyēnga, ch̄e viudanga y ch̄e ín̄yenga, y Dorcas ainá tojtanin̄yan̄yé. ⁴² Ch̄e soye n̄yets Jope pueblentse tojanótatsēmbona y banga Bēngbe Utabnábeñe imojtsošbuáchiye. ⁴³ Y Pedro bayté Jope pueblentse tojanoquedá, Simón ch̄e bobáchēshiñe trabajayabe yebnentse.

10

Pedro y Cornelio

¹ Cesarea pueblentse inamna can̄ye boyabása Cornelio ca uabainá; cha inamna ch̄e Italiano ca uabaina soldadēngbe amēndayá. ² Cornelio Bēngbe Bētsábioye ibnarrespetana y n̄yetsca chabe yebnentša oyenēngaftaca Bēngbe Bētsá puerte imojánadorana. Becá crocénana inaquēcnaye ch̄e judiēnga nd-bomnjémēnga jujabuáchama y sempre Bēngbe Bētsáftaca ibnēncuentaye.

³ Can̄ye te, mo bēts mošenana ora, cha botamana tojánin̄ye mo otjenayoquécá, mēntšá: Bēngbe Bētsabe can̄ye ángel Cornelio yojtsemnoye yojtsamashjuana y tbojaniyana: —¡Cornelio ca!

⁴ Cornelio ch̄e ángelbioye ibojtson̄yaye y auatjananá tbojaniyana: —Taita, ¿ndayá yojtsemna ca?

Y ch̄e ángel tbojaniyana: —Bēngbe Bētsá condbétseimpadanama y ch̄e ujabótēnga condbétsējabuachanama, Bēngbe Bētsá ácaftaca entsoyejuá y lempe cmochanjóyeunaye. ⁵ Chcasna, mora básefta boyabásenga Jope bēts puebloye michamó y Simón, ch̄e Pedro ca monduabobuatmá, moye chamuánatse. ⁶ Cha

posada entsebomna inye Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

⁷ Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canye soldádnaca, chabe uajabuachaná, Bëngbe Bëtsá adorayá; ⁸ lempe ntšamo yojopasacá chënga tojanacuntá y chentsana Jope puebloye tojanichamó.

⁹ Yëfsana mo nyetsto ora, chënga benachiñe Jope béconana imojtsajñentscuana, Pedro yebnentša tsbanánye tojánashëngo, Bëngbe Bëtsáftaca jencuéntama. ¹⁰ Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquécá mëntsá tojáninye: ¹¹ Celoca yojtsatëfjna y mo canye bëts entsayëjuacá yojtsabá y nyets canta sibientsana yojtsëjonýana. ¹² Chë entsayëjuañe imojtsemna nyetscna bayënga, ósjoynaye bayënga y nyetscna shloftšëngnaca. ¹³ Y tojanuena canye oyebuambnayana mëntsá: —Motsbaná, Pedro; mobaye y quem bayënga mose ca.

¹⁴ Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyiñe ndoñe yondëlesenciana jasama bayënga y chë jasama ndoñe tšabá imomna bayënga ca.

¹⁵ Y cachiñe tojtëtanuena chë oyebuambnayana mëntsá: —Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

¹⁶ Chë soye unga soyama chca tojanopasá chentsana, chë entsayëjua celoye tojtanátsjua. ¹⁷ Pero Pedro ndoñe yontsetátšëmbo ntšamo tojaninýcá ndayá chabiamá yojtsayanama. Chëntsacuana, chë Cornéliëbe ichmónënga noticiánana Simónbe yebnocá tmojánashjajna y shjoca bëšoca imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentše taibojatanama.

¹⁹ Pedro, ndayá tojáninyama chabosertama yojtsenójuabnantscuana, chë Uámana Espíritu tbojaniyana: “Mouena, muentše mora unga boyabásenga cmontsenguá. ²⁰ Motsbaná, mocana matastjango y yapa ntjatenójuabnayscá chëngaftaca cochjá, er atše chënga sënjichamó ca”.

²¹ As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

²² Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canye tšabá mándbomna entsá y Bëngbe Bëtsábioye adorayá, y nyetsca judiënga chabiamá tšabá mondbëtsoyebuambnaye. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

²³ As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentsënga Pedro tmojantjëmbambá.

²⁴ Chë inye yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanëbuaja pamíllanga y tšabe amiguëngnaca chentše imojtsemna. ²⁵ Pedro tojánashjango ora, Cornelio tojánbocna jajëbenguama y chabe shecuatšentše yojshëntsamentšiye cha jadórama. ²⁶ Pero Pédrëna tbojtanatsbaná y mëntsá tbojaniyana: —Matëtsbaná, atše cach aquécá nye canye entsá sëndmëna ca.

²⁷ Pedro Cornélioftaca encuéntaye chë yebnentše tojánamashëngo y ba entsanga tojánanyëna, chentše tmojanójtënga. ²⁸ Chora Pedro tojanëyana: —Cach tsëngaftanga šmondëtatšëmbo chë judiëngbe leyënguiñe endayana ndoñe

yondopodena canye judío ndoñe judío entsángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna ínÿabiama jatsjuabnayana cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuéntaye y ndeolpe sënjinÿe atšbe delante canye boyabása uabuashinÿinÿana entsáyaca bopormaná. ³¹ Cha šonjauyana: “Cornelio, Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. ³² Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.” ³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntšamo Pedro tojanoyebuambá Cornéliëbe yebnentše

³⁴ Pedro chora tojanontšé mëntšá jóyebuambayama: —Mora atše šontsosertana, ndegombre Bëngbe Bëtsabiama nÿetscanga cachcá uámanënga imomnama. ³⁵ Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. ³⁶ Tšëngaftanga šmondétatšëmbo, Bëngbe Bëtsá Israeloca entsanga tojánabuayenama, tšabe noticiënga jtsóyebuambnayëse, chënga nÿetscanga ainaniñe tšabe ebionana chamotsebomnama, Jesucristbeyeca; y cha endmëna nÿetsca entsangbe Utabná. ³⁷ Tšëngaftanga šmondétatšëmbo ntšamo nÿets Judeoca tonjanopasama. Chë soye Galilea luaroca tojanobojaťšé, Juan entsanga yojanabuayiyná orscana, chënga bacna soyënga amana chamotsajbanama y chamuenábayama. ³⁸ Smondétatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháuamashënguama, y tojanma Jesús corente obená chaotsemnama; y šmondétatšëmbo ntšamo Jesús enjánana entsangbiama tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninÿe y fsëndétatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canye cruciñe jacrucifícase. ⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama. ⁴¹ Cha nÿetsca entsangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentšana bënga cháftaca fsënjanse y fsënjanoťsé. ⁴² Cha šonjichamó entsanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama. ⁴³ Bëngbe Bëtsabe juabna oyebuambnayënga nÿetscanga cach Jesusbiama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espíritu tmojanóyëngacñe

⁴⁴ Pedro chë palabrënga cabá vojtsóyebuambnantscuana, chë Uámana Espíritu tojánamashëngo nyetsca chë imojtsuenanëngbe ainaniñe jtsemándayama. ⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháumashënguama Bëngbe Bëtsá tojanmama. ⁴⁶ Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espíritu tmonjójyëngacñe ntšamo bënga tmonjoyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” ⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

11

Ntšamo Pedro chë Jerusalemoca imojánenefjuana ošbuachiyëngbioye tojanëyana

¹ Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsosbuáchemá. ² Pero Pedro Jerusalemoye tojesaná ora, báseftanga chabiamá ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: ⁵ —Atše Jope pueblóca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nyets canta sibiocana enjétsëjonýana. ⁶ Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósjojnaye bayënga y nyetscna shloftšëngnaca. ⁷ Y sënjanuena canýe oyeambuamnyana mëntsá: “Motsbaná, Pedro; mobaye y quem bayënga mose ca.” ⁸ Chora atše sënjánayana: “Bëngbe Utabná, ndoñe; atše ndocna te chiyáisesse chë Moisesbe leyiñe ndoñe yondëlesenciana jasama bayënga y jasama ndoñe tšabá imomnënga ca.” ⁹ Chentšana cachiñe sëntëtanuena chë celocana oyeambuamnyana mëntsá: “Bëngbe Bëtsá tojalesenciá y canýe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” ¹⁰ Chë soye unga soyama chca tonjanopasá y chentšana chë entšëjua celoye tontanátsjua. ¹¹ Y cachora unga boyabásenga Cesarea pueblócana ichmónënga, chë posada sëndbomnentse tmonjánashjajna, atše janguanguama. ¹² Y chë Uámana Espíritu šonjanmandá atše yapa ntjatenojuanycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyetscanga canýe entšá Cornelio ca uabainabe yebnoye fsënjánamashjna; ¹³ y chana bënga šonjanacuntá ntšamo tojáninýe, cachabe yebnentse canýe ángel ibojtsebiatsana y mëntsá tbojanijana: “Básefta boyabásenga Jope bëts pueblóye michamó y moye chamuánatse Simón, chë Pedro ca monduabobuatmá, ¹⁴ y cha cmochanjabuayená ntšamo aca y acbe yebnentša oyenënga šmochjotsbocá ca.” ¹⁵ As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

16 “Chora sēnjanenojuabó ntšamo Bēngbe Utabná tonjánayanama: ‘Ndegombre, Juan entsānga bėjayeca tonjanēbaye; pero Bēngbe Bētsá chē Uámana Espíritu bochanjíchmuā, tšēngaftangbe ainaniñe jtsemándayama cháumashēnguama ca.’ 17 Chcasna, chēngnaca Bēngbe Bētsá chē Uámana Espíritu tonjatšatá, ntšamo bēnga, chē Utabná Jesucristbeñe ošbuáchiyēnga, šonjanatšatacá. Y chca, atše ndoñe quetsátsmēna canye tša uamaná, Bēngbe Bētsá jauyanama ntšamo cha yobošcá ndoñe chaondētsemna ca.”

18 Jerusalenoca Jesucristbeñe ošbuáchiyēnga chē soyēnga tmojanuena ora, ndocá más tmonjantjá y Bēngbe Bētsá tmojtanchuá, mēntšá: —¡Asna, Bēngbe Bētsá chē ndoñe judiēngnaca tojalesenciá chēngbe bacna soyēngama ngmēnaca chamuatenójuaboma y chca amana chamotsajbanama, chē nyetsca tescama yomna tšabe vida chamotsebomnana ca!

Ntšamo Antioquía puebloca tojanobojatšé, entsānga Jesucristbeñe ošbuáchiyana

19 Esteban tmojanóba chentšana, tmojanontšé chē Jesucristbeñe inye ošbuachiyēngnaca jatēcamiyama. As chentšana báseftanga yojtsamna bēn luarēngoye jtsachetēngana Fenicioye, Chipre y Antioquía luarēngoye, y chenache chēnga Jesucristbe soyēngama imojanoyebuambná, pero nye judiēngbiama. 20 Pero báseftanga imojamna Chipre y Cirene luaroquēnga, y chēnga Antioquía bēts puebloye tmojánashjajna orna, chē ndoñe judiēngbeñnaca tmojanoyebuambá, Jesús, chē Utabnabe soyēngama jabuayenase. 21 Bēngbe Utabnabe obenana chēngaftaca yojtsemna, y chca, ba entsānga tmojanajbaná bacna soyēnga amana y tmojanontšé Bēngbe Utabnábeñe jtsošbuáchiyana.

22 Jerusalenoca Jesucristbeñe ošbuáchiyēnga chē soye tmojántatšēmbona ora, Antioquía luaroye Bernabé tmojanichmó. 23 Bernabé choye tojánashjango orna, tojáninye ntšamo Bēngbe Bētsá tšabe bendicionēnga chēngbeñe tojanmama y chama corente tojanoyejuá. Nyetscanga tojanabuayená chamot-siyena nyets ainánaca Bēngbe Utabnábeñe jtsošbuáchiyēse. 24 Bernabé inamna canye entšá tšabe soyēnga amá, chē Uámana Espíritu chabe ainaniñe yojtsemándaye y bētscá ošbuachiyá inamna. Y banga tmojanontšé Bēngbe Utabnábeñe jtsošbuáchiyana.

25 Chentšana, Bernabé Tarso puebloye tojána Saulo janguanguama, 26 y tbojáninyena ora, Antioquía luaroye tbojēftsanbetše. Antioquía luarentšna canye uata nyetšá Jesucristbeñe ošbuáchiyēngaftaca cányiñe ibojēftsemna y ba entsānga tmojanabuatambá. Antioquioca inamna chē ndayentše nat-sanama Jesucristbeñe ošbuáchiyēnga Cristbe ústonēnga ca imojtsēbuatma.

27 Chē tempo, básefta Bēngbe Bētsabe juabna oyebuambnayēnga Jerusalenocana Antioquía luaroye tmojána. 28 Chēnguentšana canya Agabo ca uabainá tojantsá y chē Uámana Espíritbeyeca tojánayana, mēntšá: “Nyets luariñe entsānga oyeniñe bēts shēntsana echanjóshjango ca.” Y ndegombre chca tojanopasá, Claudio Romoca bēts mandado inamna ora. 29 Chcasna, chē Antioquía bēts pueblentša Jesucristbeñe ošbuáchiyēnga imojenóyeunaye ntsa-chetšá crocēnanēnaca juíchmuana, ntšamo cada ona tojobenacá, Judeoca Jesucristbeñe ošbuáchiyēnga jujabuáchama. 30 Chca tmojanma, y Bernabé y Sáuloftaca chē crocēnana tmojanichmó chē Judeoca Jesucristbeñe ošbuáchiyēnguentše bētsējemēngcá amēndayēngbioye.

12

Santiago tmojanóba; Pedro tmojanētame

¹ Chë tempo, rey Herodes básefta Jesucristbeñe ošbuáchiyënga tojánishëche jutámiamia y játssetšenama. ² Tojanmandá espadéjaca chamóbama Santiago, Juanbe catsata; ³ y Herodes tojántatšëmbona judiënga chë soye tojanogúsetama; as, cha tojanmandá Pédrënaca chamutámiamia. Chca tojanopasá chë levadúraca ndëpormana tandëse sayté, Bashco fiesta ora. ⁴ Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenojatá cántentšë cha chamotsebojanýama. Herodes yojétsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama. ⁵ Chcasna, Pedro yojtsëtámena y chë soldadëngna corente imojtsebojanýá. Pero Jesucristbeñe ošbuáchiyëngna bëtsá Bëngbe Bëtsá imojtseimpadana Pédrëbiamia.

Bëngbe Bëtsá tojanma Pedro natjëmbana cárcelocana cháuaisebocnama

⁶ Canýe te yojtsájamna Herodes entsangbe delante Pedro juabocnama. Chë te íbetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utámeniñe imojtsebojanýá. ⁷ Ndeolpe, Bëngbe Utabnabe canýe ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacuatsënguentshana tojanatquécjana, ⁸ y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojanianyancá, y chora chë ángel tbojátaniyana: “Mataquëfsayé y šmasto ca.”

⁹ Pedro utámenocana chë ángel ibojtsëstona, pero ndoñe yontsetátšëmba aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canýe otjénayoca cuaftsemncá ca. ¹⁰ Y útentšë chë soldadënga imojtsebojanýajana chata tbojánachnëngo y yerëša bëšášoye tbojánashjango, chë ndayëša yojanamna tsáshenoye jabocnama; y chë bëšášana nýe cachabe ponto yojotëfjo. Chentshana tbojëftsanbocna ora, canýe tsáshenëjana ibojtsaye, y nýe ndeolpe chë ángel Pédrëbentshana yojtsojuánañe.

¹¹ Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atšë jatsbocama Heródesbe cucuatšentshana y lempe ntšamo judiënga átšëftaca jamama imojuabnámnaca ca.”

¹² Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentšë banga cánýiñe imojtsemna, Bëngbe Bëtsáftaca encuéntaye. ¹³ Pedro chë tsashenoica bëšášoca tojanchembo ora, canýe oservená, Rode ca uabainá, tojánbocna jarrepárama. ¹⁴ Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëšoca yojtsemna ca. ¹⁵ Chë tsoca imojtsemnëngna chora tmojanianyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianyana: “¡Chabe ángel ctsemna ca!”

¹⁶ Chëntscuana Pedro cabá yojtsechembuana; tmojánëbiatëfjo y tmojáninýe ora, chënga puerte imojenjaná. ¹⁷ Pero Pedro tojánëfjatsëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentshana tojanéyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínýoye yojáta.

18 Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. 19 As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luarëntšana tojéftsanbocna y Cesarea luaroye tojtsanoñe, y choca tojt-sanoquedañe.

Herodes tojanóbana

20 Herodes corente yojtsetsátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuanamá, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida imnabomna Heródesbe luaroca sanángaca. 21 Chcasna, rey Herodes inýe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé. 22 Chora entšanga tmojanontsé mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canýe dios entsemna ca!” 23 Cachora, Bëngbe Bëtsabe canýe ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

24 Pero chë tempo más bëtscá entšanga Bëngbe Bëtsabe palabra imojtsue-nana y Jesucristbeñe imojtsošbuáchiye.

25 Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

13

Bernabé y Saulo tbojanbojatsé Bëngbe Bëtsabe trabajo jamama

1 Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnáyënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefraca) y Saulo. 2 Canýe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canýe trabajuama sënjabacacá ca.”

3 Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tmo-jancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

4 As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. 5 Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

6 Nýets chë luarëjana tmojánachnëngo orna, Pafos puebloye tmojánashjajna; y chentše tmojáninýena canýe judío tatšëmbuá, Barjesús ca uabainá. Cha

yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna. ⁷ Chë tatsëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. ⁸ Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. ⁹ Chora, Saulo chë Pablo ca imojanábobuatmabe ainaniñe chë Uámana Espíritu corente yojtsemándaye; as chë tatsëmbuábioye yejuana ibojonýinýiye, ¹⁰ y tbojaniyana: “¡Abuambnayá, puerte bacna entšá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nyetsca ndegombre soyëngama aca contsichamo uayátsenaye soyënga yojtsemna ca. ¹¹ Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canya buacuetëntšnana chabuánatsama, jtaná yojtsemna causa. ¹² Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

Pablo y Bernabé Antioquía pueblentse, Pisidia luaroca

¹³ Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. ¹⁴ Pergentšana Antioquía puebloye tbojátanata; chë pueblo inamna Pisidia luare béconana. Chentšana, ochnayté, chë judiëngbe enefjuana yebnoye tbojánamashëngo y tbojanótbema. ¹⁵ Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga jáuyanama: — Israeloquënga, bënga fsëntseboše entšanga chašmabuayená, nderado ndayá jayanama šmojtsebošbomñe, muentša entšanga añemo chamotsebošbomnama ca.

¹⁶ As Pablo tojantsá y entšángbioye cucuátseca tojánéfjatsëmbo iyteca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. ¹⁷ Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnama, chënga Egiptoca inýe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. ¹⁸ Canta bnëtsana uata nyetsá, Bëngbe Bëtsá entšanga ndoyena luaroca chënga yojanëuantana, ¹⁹ y cha tojanma chë Canaán luaroca canýsëftentša entšanga chamopochocama y bëngbe bëts taitanga chëngbe fshantsënga nduiñënga tojánabiama. ²⁰ Chë tempo, chë Bëngbe Bëtsá Abrahámbioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojéftsemna tempëntscuana. ²¹ Chentšana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. ²² Más chcoyna, Bëngbe Bëtsá Saúlbioye chë mándayentšana tbojtsanjuaná, y chentšana Davidbioye mo chëngbe reycá tbojánbema. Chabiama Bëngbe Bëtsá tojánayana: ‘Atše sëndëtatšëmbo, David, Isaibe uaquiñá, canye tšabe entšá yomnama y chama atše sëndoyejuá, y cha

sempre endēprontana ntšamo atše stsebošcá jtsamama ca.’ ²³ Davídbentšana canýe entšá Jesús enjamna, nda Běngbe Bětsá tbojanichmó Israeloca entšanga jabátsebacama, ntšamo cach Běngbe Bětsá chěngbe běts taitanga tojanašebuachenacá. ²⁴ Cabá Jesús nděbocna ora, Juan nýetsca Israeloquēnga tojanabuayená bacna soyēnga amana chamotsajbanama y chamuenábayama. ²⁵ Juanbe trabajo jopochócama yojtsobeco ora, cha tojánayana: ‘¿Nda atše tsmēnama tšēngaftanga šmojuabná ca? Chě tšēngaftanga šmontsejuabná atše tsmēna ca cha, atše ndoñe quetsátsmēna. Pero átšbentšana echanjabo canýa, y atše merecido taitatobuajoñe ni mo jotsejbiyama chabe she-cochētjonēshentša corriēja jajafjonama ca.’

²⁶ “Chcase morna, Abrahámbentšana entšanga y ndoñe judiēnga Běngbe Bětsá adórayēnga; bēngbiana entsemna quem buayenana soye, chě Běngbe Bětsá entšanga játsebacana. ²⁷ Masque cada ochnayté, Běngbe Bětsabe juabna oyebuambnayēngbe uabemana palabra monjanalía chěngbe enefjuana yebnentše, Jerusalenentša oyenēnga y chentša mándayēnga ndoñe quenjátanēsertana nda Jesús bétsemnama, y chě tmojtsalía soyēngama cach ndoñe. Y chca, chēnga Jesús chamóbama tmojānboshjona ora, chě chca amēnga tmojanma ntšamo Běngbe Bětsabe juabna oyebuambnayēngbe libřēšangañe iuabemancá. ²⁸ Y masque ndocna bacna soye tmonjáninýena Jesús jóbana chabotsemnama, Pilato tmojanimpadá chaomandá chábioye jóbama. ²⁹ Chentšana, lempe ntšamo Běngbe Bětsabe uabemana palabrēnguiñe iuayancá Jesúseftaca tojanochñēngo ora, chabe ústonēnga chě cruzocana tmojtanēstjango y tmojanatbontsá. ³⁰ Pero Běngbe Bětsá tojanma Jesús cháuatayenama. ³¹ Chě Galileocana Jerusalenoye cháftaca tmojánanga, baytentscuana Jesús yojánebēbuacana; y morna, lempe ntšamo Jesusbiana tmojaninýcá, chēnga entšángbeñe montsoyebuambná.

³² “Y chca, mora bēnga chě tšabe noticiēnga cbontsētsētsná. Ntšamo Běngbe Bětsá bēngbe běts taitanga tojanašebuachenacá, ³³ cha tonjama, bēnga chě chěngbe entšanguentšēngbiana, chca chaotsemnama. Y Běngbe Bětsá chca tojama, Jesús cháuatayenama cha jamēse. Rey David, Běngbe Bětsabe uabemana palabrēnguiñe, segundo salmentše mēntšá tojanábema, ntšamo Běngbe Bětsá Jesúsbioye tbojaniyanama:

Aca atšbe uaquiñá condmēna.

Mēnté entšanga sēnjinyanýe aca atšbe Uaquiñá comnama ca.

³⁴ Y tempo Běngbe Bětsá chabe uabemana palabrēnguiñe tojaninýanýe cachá jamama Jesús cháuatayenama y ndoñe cachiñe chaondóbanama, mēntšá tojánayana ora:

Chě ndegombre soyēnga y chě tšabe bendicionēnga ntšamo David sēnjansbuachenacá,

tšēngaftanga cbochanjátšataye ca.

³⁵ Inýoca Běngbe Bětsabe uabemana palabrēnguiñe, Salmos librēša uabi-amnayá, mēntšá tojanábema ntšamo Jesús Běngbe Bětsábioye tbojaniyanama:

Aca ndoñe quecochatslesencia atšbe cuerpo,

chě acbe Uámana oservenabe cuerpo chaotsopochocama ca.

³⁶ David, chabe tempo imojoyenēngbiana tojanma, ndayá cha chaomama Běngbe Bětsá tojanjuabocá. Cha tojanóbana y tmojanatbontsá chě chabe běts taitángbioye tmojanētabuantsá luarentše, y chabe cuerpo tojanopochocá.

³⁷ Pero chě Běngbe Bětsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atše sēntseboše tšēngaftanga quem soye chašmotsetátšēmo: Ndayá Jesús tojanmama, entšanga chěngbe bacna

soyëngama perdonánënga montsemna. Jesúsbeýeca, nyëtsca chábeñe tmojtsošbuáchënga, bacna soyëngama perdonánënga mochántsemna. Ntšamo Moisesbe leyinë iuayancá tmojanmama, chënga ndoñe tmonjanobená chca perdonánënga jtsemnana; nyë Jesúsbeñe jtsošbuáchiyëse chënga perdonánënga jtsemnana. ⁴⁰ Cuedado šmochtsebomna, ntšamo Bëngbe Bëtsabe juabna oye-buambnayënga tmojanayancá, tšëngaftangaftaca ndoñe chaondochnënguama.

⁴¹ Bëngbe Bëtsá mëntšá tojánayana:

Smochjouena. Tšëngaftanga chë ntšamo atše tijayancá šmojtsábotenga, ojnánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtsacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

⁴² Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbioye tmojanaimpadá, chë inyë ochnaytescama chë soyëngama más jábuayenama. ⁴³ Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyëts tempo chamotsejuabnama, Bëngbe Bëtsá chëngbiamá tšabe soyënga yojtsamama.

⁴⁴ Chë inyë semana, chë ochnaytena, nya mo nyëtsca chë pueblentše oyenënga tmojanobeconá Bëngbe Bëtsabe palabra jouenama. ⁴⁵ Pero ba entšanga choye jouenama tmojánama chë judiënga tmojáninye ora, tmojanotjyaná, ba entšanga Pablo imojtseyeunanama; as chënga tmojanontšé mocá ichámuana ndayá cha yojtsóyebuambnama, y chábioye oyenguayana. ⁴⁶ As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiamá ndoñe tšabá yontsemna chë nyëtsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. ⁴⁷ Er Bëngbe Bëtsá chama šjanichamó, mëntšá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiamá cochántsemna mo canyë binyñayacá.

Chca, ácbeyeca nyëts luarënguenache entšanga atše chanjatsebacá ca.”

⁴⁸ Chë ndoñe judiënga chca tmojanuena ora, puerte imojtsóyejuaye y tmojanontšé mëntšá ichámuana: “Bëngbe Utabnabe palabra tšabá bëngbiamá entsemna ca.” Y chora, chë nyëtsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontšé Jesúsbeñe jtsošbuáchiyana.

⁴⁹ Y chca, nyëts chë luariñe más entšanga Bëngbe Bëtsabe palabra imojtsuenana. ⁵⁰ Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama. ⁵¹ As, Pablo y Bernabé tbojésanshecstëtonata, judiënga jinyanñiyama chënga ndoñe tšabá tmojanmama; y chentšana, Iconio puebløye tbojtsanoñe. ⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espiritu chëngbe ainaniñe corente yojtsemádaye.

14

Pablo y Bernabé Iconio puebloca

¹ Iconioca, Pablo y Bernabé cányiñe tbojánamashēngo chē judiēngbe enefjuana yebnentše y corente obenánaca Bēngbe Bētsabe palabra tbojanoyebuambá. Chíyeca, ba judiēnga y ndoñe judiēnga Jesucristbeñe imojtsošbuaché. ² Pero chē judiēnga Jesucristbeñe ndošbuáchiyēnga, chē ndoñe judiēngbiōye tmojanayēñaná, Pablo y Bernabebíama podesca chamotsejuabnama. ³ Chíyeca, Pablo y Bernabé bayté chentše tbojanototoná y ndauatjca Bēngbe Utabná Jesucristbíama tbojanoyebuambá. Bēngbe Utabná obenana chata tojanatsatá bēts soyēnga jtsamama, y chē soyēngaca Bēngbe Utabná entšanga tojaninñanýé, ndayá chē ichmónata ibojtsoyebuambnacá ndegombre bētsemnama, chē Bēngbe Bētsá nyētsanga iuababuánñeshanana. ⁴ Pero nyētsca chē pueblentša entšanga ndoñe cachcá imontsejuabnaye; ínñyēnga chē judiēngaftaca imojtsemna, y ínñyēngna chē Jesucristbe ichmonátaftaca. ⁵ As, chē judiēnga y ndoñe judiēnga chentša mandayēngaftaca tmojanenoyeuná chata jtsatsetšenama y ndētšbēngaca jtsébáyama. ⁶ Pero Pablo y Bernabé chama tbojántatsēmbona orna, tbojtsanéchañe Litra y Derbe pueblōye, Licaonia luaroca, y choca chábuañe luarēngoye; ⁷ y chē luarēnguenáchnaca, chata Jesucristbe tšabe noticiēnga entšanga tmojanabuayená.

Litra puebloca, ndētšbēngaca Pablo tmojtsanatēchēnganja jtsóbama

⁸ Litra puebloca inamna canñe boyabása jama ndobená. Ndocna te yondobena jana, chca cosheto inónñyana causa. Chē boyabásana yojtsetbemana ⁹ ouenana ntšamo Pablo yojtsichamcá. Y Pablo chábíoye tbojanonñinýé ora, tojántatsēmbona chē šocá tša yojtsošbuáchemá, shnaná jtsatsmēnama; ¹⁰ as Pablo, juayebuáchenēse tbojaníyana: “¡Motsbaná y acbe shecuatšēngaca tšabá motsa ca!”

Chora chē boyabása, canñe jontsēñjēse tojantsá y yojóntša anana. ¹¹ As chē entšanga, ndayá Pablo tojanmccá tmojáninñyē ora, tmojanontšé uayebuáchana chē Licaonia luarentša biyañe, mēntšá: “¡Bēngbe diosēnga bēngbiōye tbojátšma mo entšatcá ca!”

¹² Bernabé imojtsábobuatma Zeus ca, mo chē chēngbe diosēnga amēndayacá; y Páblēna Hermes ca, mo chē inñyē diosēngbíama oyebuambnayacá. Páblēbiōye chca imojtsábobuatma, er cha más yotsoyebuambná. ¹³ Zeusbíama chentša bachna inabomna canñe yebna chē pueblo chaboca, chábíoye jadórama. Chē bachna, uacnēnga tojanēnatse y uantšefjushangá tojanēyamba chē Zeus jadórama yebnentša amashjuanoye; y cha y chē entšanga imojtseboše chē uacnēnga jashebuáyana y jajuinñiyana, chca, chē ichmonátbiōye jadórama.

¹⁴ Bernabé y Pablo chama tbojántatsēmbona ora, entšayá tbojtsanenántšajatanēca, entšanga jinñanñiyama, ntšamo chēnga imojtsamcá chata tondaye yonjógusetama, y tbojéftsanotjajo entšangbe tsēntsajana y mēntšá ibojtsaychembumbuana: ¹⁵ “Baconga y batanga, ¿ndáyeca chca šmojtsama ca? Bēndata cach tšēngaftangcá entšata fsēndmēna. Muentše bēndata fsēntsemna nñyē jábuayenama Bēngbe Utabná Jesucristbe tšabe noticiēnga, tšēngaftanga chē quem ndoservená soyēnga, vida ndbomna soyēnga adórayana chašmotsajbanama, y Bēngbe Bētsá Ainabe benache chašmatishachama. Ndegombre, cha tojanma celoca, fshantse, nyētsca bējayēnga y lempe ntšamo chenache yobinñncá. ¹⁶ Masque tempo, Bēngbe Bētsá entšanga tojanalesenciá cada ona chaoma ntšamo tojtsejuabnacá, tšabá cachēngbíama yojtsémnayeca, ¹⁷ Bēngbe Bētsá ndocna te ntjájbanana tšēngaftanga jtsinñanñayana, cachá tojama tšabe soyēngaca, mocna Bētsá cha yomnana. Cha endama tšēngaftangbíama chauaftema y chē matēnga botamana chaoshájonama, y beca saná cmondatsatná; y cha endama

tšëngaftangbe ainaniñe corente oyejuayana chašmotsebomnama ca” —chata tbojánayana.

¹⁸ Masque chë soyënga tbojánayana, nÿe batsatema más bën y ya ndoñe matbënjanobenata chë entsanga jtsëuyanana uacnënga jashebuáyama, chca, chátbioye jadórama.

¹⁹ Chca ora, básefta judiënga tmojánashjajna Pisidioca, Antioquíocana y Iconiocana, y chentša entsángbioye tmojanayëñjaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

²¹ Derbe puebloca Jesucristbe tšabe noticiënga entsanga tmojanabuayená, y chca, entsanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiöye. ²² Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entsángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentse bëtská jëftsepadecénana ca.” ²³ Nÿetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšine chamotsemnama, ndábeñe chënga imojtsošbuaché.

Pablo y Bernabé, Sirioca Antioquia puebloye tbojtanata

²⁴ Pisidia luarëjana tbojánachnëngo ora, Panfilia luaroye tbojánashjango. ²⁵ Perge pueblentše Jesucristbe tšabe noticiënga entsángbioye tmojanabuayená, y chentšana Atalia puebloye tbojánata. ²⁶ Chentšana, Bernabé y Pablo, bejaycá tbojtanata Sirioca Antioquia puebloye. Chentša entsanga Bëngbe Bëtsá tmojanimpadá chata chabe cucuatšine chabotsemnama, chë trabajuiñe chaotsanÿenama; y chorna, chë trabajo ya tbojanpochocá. ²⁷ Choye tbojtanashjango ora, nÿetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninÿanÿé, chë ndoñe judiëngnaca chamotsobenama Jesucristbeñe jtsöšbuáchiyama. ²⁸ Y Pablo y Bernabé baytë chentše tbojanototoná Jesucristbeñe ošbuáchiyëngaftaca.

15

Ichmónënga y bëtsëjemëngcá mándayënga Jerusalemoca tmojánenefjna jencuéntama

¹ Chë tempo, báseftanga Judeocana áshjajnënga tmojanontsé, Antioquia pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyine endayancá, ndoñe quenátopodena tšëngaftanga atsebácanënga jtsemnama ca.” ² Chiyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y ínÿënga Jerusalemoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalemoye chënga tmojanichamó. Fenicia y Samaria luarëjana

imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguifne ošbuáchiyana tmojtsanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

⁴ Pablo y chë ínÿenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentse base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguifne iuayancá chamotsamama ca.”

⁶ As, chë Jesucristbe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga aíñe o ndoñe yonjánamnama chë más delicadentse base bobachtema tëtšenënga jtsemnana, ntšamo chë judiënga imojanamancá. ⁷ Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catšátanga, tšëngaftanga šmondëtatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. ⁸ Bëngbe Bëtsá jtsetatšëmbuana lempe ntšamo entsanga tmojtsejuabnacá. Y cha šonjaninÿanÿé, chë ndoñe judiëngnaca imnobena chabe entsanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnama, Bëngbe Bëtsabe palabriñe jtsošbuáchiyëse. ¹⁰ Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntšobenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna šojaninÿanÿéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

¹² Chorna, chentše imojtsemna entsanga nÿetscanga iytëca tmojanobiamana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsanga jinÿanÿiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

¹³ Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, šmochjouena: ¹⁴ Simón šonjabuayená ntšamo Bëngbe Bëtsá natsana tojaninÿanÿé, chë ndoñe judiëngnaca cha iuanÿenama, y chíyeca cha chënguentsana banga tojubuáyana chabe entsanga chamotsemnana. ¹⁵ Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyeambuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrënguifne endayancá, mëntšá:

¹⁶ Chentšana atše chanjésabo

y chë Rey Davidbe pamíllanga cachiñe uámanënga chantabiamana;

mo nda canye uáshajayena yebna tojětsjebcá, atše, Davidbe pamíllanga cachiñe uámaněnga chantabiamana;

¹⁷ Chca, chě inye entsanga chamonguango ndayá jamana atše, tšěngaftangbe Utabná, más chašmotsábuatmama, nyetsca ndoñe judiěnga, chě atšbe entsanga chamotsemnama atše tijábacacanga.

¹⁸ Chca atše, tšěngaftangbe Utabná sěntsichamo, nda ya bayté entsemna tonjanma entsanga chě soyěnga chamotsetatšěmbuama ca —chiñe endayana.”

¹⁹ Chentšana Santiago měntšá tojaněyana: “Chíyeca atše sěntsejuabná, běnga ndoñe šontsamna chě ndoñe judiěngbiamana jamana más totcá chaotsemnama Jesucristo jtsěstonama. ²⁰ Chamna, šontsamna chěnga juabuábiamana y jáuyanana ndoñe chamondětsesá, sananga chě ndaye soyěnga entsanga tmojuabná diosěnga yomna ca jadórana tmojuiyěbana; bacna soyěnga shembásenga o boyabásengaftaca ndoñe chamondětsama y ndoñe chamondětsesá tsešana bayěngbe měntšena, y buiñe cach ndoñe ca. ²¹ Er chě natsana tempěnga orscana, nyetsca pueblěnguenache mondměna chě Moisés tojětsanayana soyěnga entsángbioye abuayiyayěnga; y chabe leyěnga, nyetsca ochnayté mondbetsalíaye chě běnga judiěngbe enefjuana yebněnguenache ca” —cha tojaněyana

Chě Jerusalenoca ichmóněnga y bětsějeměngcá mándayěnga canye tsbuanácha tmojanichmó chě ndoñe judiěngbiamana

²² Chentšana, chě Jesucristbe ichmóněnga y bětsějeměngcá mándayěnga, nyetsca chě Jesucristbeñe ošbuáchiyěngaftaca tmojanenoyeuná chěnguentšana báseftanga jabacacayama, Pablo y Bernabéftaca Antioquía pueblöye jíchamuama. Chcasna, tmojaněbuáyana Judas, chě Barsabás ca uabobuatmá, y Silas; chata ibnamna uámanata chě Jesucristbeñe ošbuáchiyěnguentše. ²³ Y chěngaftaca canye tsbuanácha tmojanichmó, y chiñe měntšá yojětsayana:

Běnga chě Jesucristbe ichmóněnga y chě bětsějeměngcá mándayěnga, cach tšěngaftangcá Jesucristbeñe ošbuáchiyěnga, fsěntseboše Běngbe Bětsá salúdoca chacmotsábouamna, tšěngaftanga chě ndoñe judiěnga, Jesucristbeñe ošbuáchiyěnga, Antioquía pueblöca y Siria y Cilicia luarěngoca oyeněnga.

²⁴ Běnga fsěntsetatšěmbo běngbentšana báseftanga choye tmojángama, běnga ntjaměndacá, y fsěntsetatšěmbo mocna soyěnga cmojtsabuátambama y chě causa, tšěngaftanga ndoñe šmontsetatšěmbo ntšamo jtsejuabnayana ndayá jamama yomnana, Jesucristbe canye ndegombre ustóná jtsemnama. ²⁵ Chcasna, běnga fsěnjenoyná y šonjúnynana tšabá yojtsemna báseftanga běnguentšana jabacacayana tšěngaftangbioye jontješiyama chamotsama, y Pablo y Bernabé, chě Jesucristbeyeca běngbe bonshana catšátataftaca, choye chamotsama. ²⁶ Chě útatna ba soye tbojotsbocá vida jáshbiamana, Běngbe Utabná Jesucristbiamana oservěniñe.

²⁷ Chátaftaca Judas y Silas fsěnjichamó; y chatna cach tšěngaftangaftaca bochanjóyebuambaye ntšamo quem tsbuanáchañe yojtsábemanama. ²⁸ Chě Uámana Espíritu y běnga cachcá fsěntsejuabná, běnga ndoñe šontsamna tšěngaftanga jaměndana bětscá jabuache manděnga Moisesbe leyěnguiñe chašmotsocumplínama. Nye quem uámana soyěnga chiñe aĩne cmontsamna jtšobedecénana: ²⁹ Ndoñe šmattsesaye měntšena, chě ndaye soyěnga entsanga tmojuabná diosěnga yomna ca jadórana tmojóba bayěngbiana; ndoñe šmatjofšiye buiñe, ni šmatjase tsešana bayěngbe měntšena; y shembásenga y boyabásengaftaca bacna soyěnga ndoñe šmattsama. Chě soyěnga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

³⁰ Chcasna, chë quem Jerusalenocana ichmónënga tmojésanodiošoftanentšana, Antioquía puebloye tmojana; y chocna, nýetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché ³¹ Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. ³² Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyëngbioye ba soyënga tmojanëyana, chënga añemo chamotsatsbomnama y Jesucristbeñe corente chamotsošbuáchema. ³³ Chentšana baseftaytese, chentša Jesucristbeñe ošbuáchiyënga chëngbioye tmojtanadiošoftá, chë ndëmuanyënga tmojanichamóngbioye jtama. ³⁴ Pero Sílasna tšabá ibojtsinýana cachentše más jëftsajëtanama. ³⁵ Pablo y Bernabé baseftayshinýe Antioquía pueblentše tbojanotoná y ba ínýengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

Pablo cachiñe inýe luarëngoye tojana, Bëngbe Bëtsabe trabajo jamama

³⁶ Chentšana baseftaytese, Pablo Bernabébioye tbojanianya: “Bëngbe Utabnabe palabra tbojanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnama ca.”

³⁷ Bernabé yojtseboše, Juan chë Marcos ca uabobuatmábioye chátaftaca jëftsbetšama. ³⁸ Pero Páblëna ndoñe tšabá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. ³⁹ Y chë palabrama tondaye tbojanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata; ⁴⁰ y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnama, chatbe trabajuiñe chaotsanýenama. Chentšana, Pablo Sílasftaca tbojánbocna y ⁴¹ Siria, Cilia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

16

Pablo Timotéobioye tbojáninýena

¹ Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entšá inamna. ² Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. ³ Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga imnatátšëmbo Timoteobe taitá griego inamnama. ⁴ Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. ⁵ Nýets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsošbotena.

Pablo mo otjenayoquécá canýe Macedonioca entšábioye tbojáninýe

6 Chë Uámana Espíritu, Pablo y Sílasbioye tojaninÿanÿé, chata ndoñe yontsanamna Asia luaroca Bëngbe Bëtsabe palabra entsanga jábuayenana; asna, tbojánachnëngo Frigia y Galacia luarëjana. 7 Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondétsama. 8 Misia luarëjana tmojánachnëngo ora, Troas luaroye chënga tmojána. 9 Chë te ibeta, Pablo mo otjenayoquécá tojáninÿe canÿe Macedonioca boyabása ibojtsebiatsana y mëntśá ibojtseimpadana: “Diosmanda Macedonioye mabo y śmabëjabuache ca.” 10 Pablo chca tojáninÿe y cachora lempe tmonjanprontá Macedonioye jama. Atśnaca, chë quem soyënga uabiamnayá, chënga sënjétsatjëmbambnaye. Bënga fsënjétsajuabnaye ndegombre Bëngbe Bëtsá šojtsanachembuana choye jama ca, Jesucristbe tśabe noticiënga chocha entsanga jábuayenama.

Pablo y Silas Filipos puebloca

11 As, Troasentsana bejaycá fsënjána Samotracia luaroye, y yëfsana Neápolis puebloye, 12 y chentśana Filíposoye. Filipos enjamna canÿe uámana bëts pueblo Macedonioca y bëtscá romanënga oyeniñe. Chë luarentşe baseftayté fsënjanoquedanga. 13 Canÿe ochnaytena, chë pueblentsana fsënjéftsanbocna y chë fshájaye tsachoye fsënjána. Fsënjanuena chentşe canjamna canÿe luare Bëngbe Bëtsáftaca jencuéntama ca, y fsënjána janguanguama. Fsënjáninÿena ora, chentşe fsënjanotbiamna y Bëngbe Bëtsabe palabra fsënjanoyebuambá chentşe tmojanójoto shembásengbiamna. 14 Enjamna canÿe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsayá uená. Cha inamna Bëngbe Bëtsábioye adorayá y chentşe Páblëbioye ibotseyeunana. Bëngbe Bëtsá tojanma cha chabosertá lempe ntśamo Pablo yojtsoyebuambnacá, Jesucristbeñe chaotsošbuáchema. 15 Cha y chabe yebnentşe oyenënga tmonjánenabayora, Lidia mëntśá šonjanaimpadá: “Tśëngaftanga šmonjayana atşe Jesucristbeñe ndegombre tsošbuaché ca; chcasna, mabënga yebnoye, átśbentşe chašmoquedama ca.”

Y šonjanëtarié bënga chentşe joquédama.

16 Canÿe te, chë Bëngbe Bëtsáftaca encuéntaye luaroye fsënjétsajna orna, šonjanëbiatşe canÿe tobiáşe, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáşe yojanmalísiaye soyëngama. 17 Chë tobiáşe tonjanontśé Pablo y bënga usetonana y mëntśá enjétsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tśëngaftanga cmontsabuyayiná ntśamo Bëngbe Bëtsá yobena tśëngaftanga játsebacama ca!”

18 Y bayté chca enjanchembumbuana; chë causa, Pablo bonjétssetana y cabana, tonjanobuértana y chë bacna bayëjbioye mëntśá tbonjanianana: “¡Jesucristbe obenánaca y cha jótśëmbonëse, cbontsemánda chë tobiásbentśana chacuaisebocnama ca!”

Y cachora chë bacna bayëja chë tobiásbentśana tojésanbocna.

19 Pero, chë bayëjbe juabna chábentśana tojésanbocnama y chëngbiamna más crocénana jabemama chora chë tobiáşe ndoñe yontsobenama, chë tobiáşe nduiñënga tmojáninÿe ora, Pablo y Sílasbioye tmojánishëche y tmojtsanasjojyep plazoye, mandayëngbioye.

20 Chë mandayëngbioye tmojanënatse ora, chënga mëntśá imojtsichamo: “Quem boyabásata judío entsata bondmëna, y muatbe causa bëngbe pueblentsa entsanga montsenbouenana, 21 y bontsabuatambá soyënga jamama ntśamo chë judiënga imuamancá y bëngbe leyënguiñe chë soyënga

jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bétsemnayeca ca” —chënga imojtsichamo.

²² Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsëtsejqüëcana y niñëfjëngaca jtsachebuánganjana.

²³ Jabuache tmojanachebuánganjentsana, cárceloye tmojanautame y chë utámenënga shanyá tmojanmandá yejuana chaotsabuajënyama. ²⁴ Chca tmojanmandá ora, chë utamianá chata tojanënatse chë más tsoye utámenoye y shecuatšentsana tsbuanësiñe tojanatsebuá.

²⁵ Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana.

²⁶ Ndeolpe, corente jabuache yojtsëbánjua y chë utámena yebna fshantsocana yojtsábonjnaye. Cachora, nyetsca chë utámenentsa bëšašangá tojantëfjo y nyetsca utámenënga chë cadenëjuangá yojtsayentšjafjona.

²⁷ Pero chë utámenënga shanyá tojanofšená y chë utámenentsa bëšašangá yojtsatëfjnama tojáninye ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama. ²⁸ Pero Pablo tbojánbochembo: —¡Acbe cuerpo ndocá matená bomana; nyetscanga camuentše fsëndëtsomñe ca!

²⁹ Asna, chë utámenentsa shanyá canye uajuinyanësha tojanëyá y chë utámenoye ochamanana tojánamashëngo y auatja causa ngmëmnyáy Pablo y Sílasbe shecuatšentše yojoshëntsamentšiyë. ³⁰ Chentsana tojtanëbuacna y tojanëyana: —Señórata, ¿ndayá šojtsemna jamama atše ats bocaná jtsemnama ca?

³¹ Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

³² Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. ³³ Cach ora chë ibeta, chë utamianá chata tojanënatse chë lisianënguiñe jetsajabiama. Chentsana, cha y chabe pamíllanga tmojánenabaye. ³⁴ Chentsana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchemá.

³⁵ Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶ Chë utamianá Páblëbioye tbojanianyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinyanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

³⁸ Chentsana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. ³⁹ Chcasna, cach mándayënga tmojána chata perdón jatëtejañama; chentsana tmojtanëbuacna y tmojanëyana: “Diosmanda, muentšana inye luaroye motsoñata ca.” ⁴⁰ As chata chë utámenentsana tbojëftsanbocna y Lídiëbe yebnoye tbojëftsanata. Chentsna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentsana, chata inýoye tbojtsanoñe.

17

Tesalónica puebloca, Pablo y Silas bioye ndoñe tšabá tmonjaněbuaja

¹ Pablo y Silas inye luaroye ibojtsaye ora, Anfípolis y Apolonia bēts pueblēnguējana tbojánachnēngo y canye bēts pueblo, Tesalónica ca uabáinoye tbojánashjango. Chentše, chē judiēnga canye yebna imnabomna chēnga jénefnama. ² Páblēna, ntšamo enjanamancá, cada ochnayté chē jénefnama yebnoye yojánaye, unga semanētscuana, y chentše chē judiēngaftaca yojanoyebuambná y imojánētsētsnaye. Bēngbe Bētsabe uabemana palabrenguīñe iuayana soyēngaca, ³ chēnga yojanabuayiyná y ndegombre yojaninñanñá, Bēngbe Bētsabe Uámama Uabuayaná jóbana y chentšana jtayenama ibojamnama. Y mēntšá yojanētsētsná: “Chē Cristo, Jesús endmēna, ndabiama atše cbontsabuyiyná ca.”

⁴ Judiēnguentšana báseftanga chiñe imojtsošbuáchiye y Pablo y Silas tmonjanēseto más jouenama. Ba grieguēnga, Bēngbe Bētsá adórayēnga, Jesucristbeñe imojtsošbuáchiye y ba uámama shembásengnaca. ⁵ Pero chē judiēnga ndošbuáchiyēnga chca tmojáninñe ora, puerte envidia imojtsebomna. Asna, chēnga tmojánachembo banga, tondaye amēnga y bacna entšanga, y chēnga tmojanenutaná jamama nyetsca chē pueblentša entšanga chamotsenbouénanama; y canye entšá, Jasón ca uabainabe yebna chēnga tmojtsanabuache, Pablo y Silas jtsanguanguama, chentšana jesēbuacnama y entšangbe cucuatšīñe jabáshejuanama. ⁶ Pero chentše ndocná tmonjáninñena; as chē entšanga Jasón imojtsesjoye y chentša mándayēnga imojtsemnoye tmojanánatse y Jesucristbeñe inye ošbuachiyēngnaca choye tmojanēnatse, y mēntšá imojtsáyebuache: “¡Chē boyabásata, chē ndēmuanñyata ibojtsama nyetsca luarentša entšanga chamuenbouénanama, quem luaróynaca tbojabo, ⁷ y Jasón chabe yebnentše chata tojúbuaja ca! ¡Chēnga montsama ntšamo chē Romoca bēts mandadbe mandēnguīñe ndoñe quenatslesenciancá, er chēnga montsichamo inye rey canmēna, Jesús ca, y cha, César chē Romoca mandadbe cuenta nyetscángbeñe yojtsemánda ca!” —chēnga imojtsáyebuache.

⁸ Chē entšanga y chē pueblentša mándayēnga chca tmojanuena ora, corente imojenbouéna. ⁹ Pero Jasón y chē inñyēnga, cháftaca imojtsemnēnga, crocénana tmojtanjajó, y as tmojtanabáshejuana.

Pablo y Silas Berea Puebloca

¹⁰ Ya ibeta yojtsemna orna, chē Jesucristbeñe ošbuáchiyēnga tmojanma cachora Pablo y Silas Berea bēts puebloye chabuétsebocnama. Y chata choye tbojánashjango ora, chē judiēngbe enefjuana luaroye tbojánata. ¹¹ Chentša judiēnga imojamna más tšabe ainana bomnēnga chē Tesalonicoca judiēngbiana; chcasna, oyejuayēnga chē buayenana soye Jesucristbiana tmojanóyēngacñe, y cada te Bēngbe Bētsabe uabemana palabra imojanalía, jtsetatšēmbuama, ntšamo Pablo y Silas ibojtsētsētsnacá aiñe o ndoñe ndegombre yojtsemnama. ¹² Y chca, ba chentša judiēnga chatbe palábraca Jesucristbeñe imojtsošbuáchiye, y Grecia luaroca ba uámama shembásenga y boyabásengnaca. ¹³ Pero, Pablo Bereoca chē Bēngbe Bētsabe buayenana soyama entšanga yojtsabuayiynama chē Tesalonicoca judiēnga tmojántatšēmbona ora, chēnga choye tmojána y tmojanma chentša entšanga chamuenbouénanama. ¹⁴ Chcasna, banga Jesucristbeñe ošbuáchiyēnga tmojanma cachora Pablo chentšana chauétsebocnama y bėjaye tsachoye chaotsoñama; chēntscuana, Silas y Timoteo Bereoca tbojanoquedá. ¹⁵ Pablo tmojantjēmbambá entšangna, Atenas ca uabaina bēts pueblóntscoñe cháftaca

tmojána. Chentšana, Pablo chënga tojanabuayená chamuauisshëconama Silas y Timoteo jaúnayama betesco jtsayana, Pábloftaca jateninýenama.

Pablo Atenas puebloca

¹⁶ Pablo Atenas bëts puebloca Silas y Timoteo yojtsëbatmanëntscuana, puerte tbojanongmé, er cha tojáninýe chentša entsanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca. ¹⁷ Chíyeca, chë judiëngbe enefjuana yebnentse, judiënga y ndoñe judiënga Bëngbe Bëtsá adorayëngaftaca imojänenatsëtsnaye, y cada te chentša plazoca chë ndëmuanýenga chentse imojanashjauanëngaftácnaca. ¹⁸ Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojänenatsëtsnaye. Inýenga imojtsichamo: “¿Ndayama quem bostero yojtsoyebuambná ca?” Y ínýengna: “Chana inýe luarëngoca entsangbe diosëngbiana muentse entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná. ¹⁹ Asna, chentša entsanga cha tmojanánatse canýe luaroye, entsanga jénefnama y oyebuambnayënga joyaunayama luare, Areópago ca uabáinoye. Chentse imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabatambá soyënga ndayá bétsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bétsayanana.

²¹ Er nyetscanga Atenasentša oyenënga y inýe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

²² As Pablo tojantsá chëngbe tsëntsaca chë Areópago ca uabáinentse y tojánayana: —Atenasentša entsanga: ntšamo bominýe sënjajajcá, atše sëntsetatšëmbo tšëngaftanga ba diosënga puerte šmayaunana y šmadoránama. ²³ Atše sëndánrreparana tšëngaftangbe diosënga šmétsadorana luarënguenache y sënjinýena canýe altar y chentse mëntsá iuábemana: “Chë Bëtsá nduabu-atmabiana ca”. Y morna, chë Bëtsá chë nda ntsabuatmcá šmadoránabiana, atše cbontsabuayinýa.

²⁴ “Chë Bëtsá quem luare y lempe ntšamo chentse yomncá tojanma; cha endmëna quem luarentse y celoca Utabná, y cha ndoñe quenatiyena cha jadórana entsangbe jebna yebnënguiñe, ²⁵ ni quebnatájaboto ndocná chabiana tondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

²⁶ “Cha nýe canýe boyabásabentšana nyets luarënguentša entsanga tojánabiana, nyets quem luarentse chamotsiyenama; y cha quem soyënga cabá ndëma ora, tojanjuabó mocna ora y ndayentse entsanga chamuetsiyenama; ²⁷ chca, Bëngbe Bëtsá chamonguanguama, masque chabiana ndoñe corente tmontsetatšëmbo, y chamuinýena y chábeñe chamotsošbuáchema; pero ndegombre, Bëngbe Bëtsá bëngbentse cada cánýabentšana ndoñe bënoca quenátsmëna. ²⁸ Ntšamo canýa tojanayancá: ‘Bënga Bëngbe Bëtsáftaca cánýiñe mo canýacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëngnaca tmojanayancá: ‘Bënga nyetscanga Bëngbe Bëtsabe básenga mondmëna ca’. ²⁹ Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entsangbe castellano, medio o

chë ndëtšbeca pormana soyëngcá ca, er chë soyëngna nÿe ntšamo entšanga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonÿayana chë entšangbe tempsca ndosertánana, y morna, nÿetsca luarënguentša entšanga entsaménda, ndaye bacna soyënga tmojtsamama ngménaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canÿe te tojuinÿaná, y chë tena, ndocnábioye ínÿabiama más tšabá ntjatonÿaycá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanyé, chë bocacaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entšanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentšana tojésanbocna. ³⁴ Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chë soyënga tojanochnëngüentšana, Pablo Aténasentšana Corinto bëts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsësayama, ³ y ntšamo chata jamama Páblëna jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana. ⁴ Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnama.

⁵ Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayiynaye y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. ⁶ Pero chë judiënga Páblëbe contra imojtsemna y tmojanontsé podesca chabiamama ichámuana. Asna, Pablo chabe uichëtjonyangá yojtsenántšasajaye, chënga jinÿanÿiyama chënga ndoñe tšabá tmonjáchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷ Chorna, chë judiëngbe enefjuana yebnentšana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. ⁸ Y Crispo, canÿe chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. ⁹ Canÿe ibeta, Bëngbe Bëtsá Páblëbioye mo canÿe otjenay-
oquécá tbojanianayana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. ¹⁰ Er atše ácaftaca sëntsemna

y ndocná quecmochátsbojajo ntšámnaca jáborlama; atše bētská entsānga quem pueblentše sēndábamna ca.” ¹¹ Chcasna, Pablo Corintentše canye uata y chnēnguana shinye tojanototoná, Bēngbe Bētsabe palabra entsānga abuátambaye.

¹² Pero, Galión chē Acaya luarentša mandado inamna orna, chē judiēnga imojenóyeunaye Páblēbe contra; cha tmojánishache y chē tribunaloye tmojanánatse. ¹³ Chocna, chē mandado tmojanianya: —Mua entsānga entsētsētsná y entsama chēnga Bēngbe Bētsá chamotsadorana, pero ndoñe ntšamo bēngbe leyēnguiñe endayancá ca.

¹⁴ Pablo jóyebuambayama uatajanóntša orna, Galión chē judiēnga tojanēyana: —Quem entsá nderado ínñabioye matbēnjóba o ndayánaca chca matēnjobuachjanguá, as cocayé atše matijótbema tšēngaftanga judiēnga yejuana joyaunayama; ¹⁵ pero ntšamo šmontsichamcá entsemna nye buatēmbana soyēngama, nye tšēngaftanga šmēbuatma entsāngbiana y cach tšēngaftangbe leyēngama; chcasna, cach tšēngaftanga cmontsamna jenóyeunayana y jamana ntšamo chašmojenoyeunacá. Atše quem base soyēngama ndoñe quetsátsboše ngoberna jtsemnana ca.

¹⁶ As Galión tojanamēndá chē tribunal luarentšana chē judiēnga jtēbuacnama. ¹⁷ Chorna, chē entsānga tmojánishache chē judiēngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chē soye tondayana ibontsentšamna.

Pablo Antioquioye tojtaná y chentšana cachiñe inye luarēngoye tojána, Bēngbe Bētsabe trabajo jamama

¹⁸ Pablo cabá bayté Corintentše tbojánatona. Chentšana, Jesucristbeñe ošbuachiyēngbentšana tojesanodiošoftá y bejaycá Siria luaroye tojána, Priscila y Aquilaftaca. Cabá Sirioye nda ora, Cencrea puebloca nyets stjēnashe yojtsenátsbotje, Bēngbe Bētsábioye jinñinñiyama canye soye tojanšbuáchenama. ¹⁹ Efeso puebloye tmojánashjajna ora, Páblēna Priscila y Aquila tojésanabashejuana. Chentšana, cha tojána chē chentša judiēngbe enefjuana yebnoye y chentše chē judiēngaftaca yojanoyebuambná y imojānenatsētsnaye. ²⁰ Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauná; ²¹ chentšana, chēngbentšana tojesanodiošoftá, mēntšá jēftsēyanēse: “Nderádose cachiñe chantésabo tšēngaftanga jabábuachama, Bēngbe Bētsá šojalesenciase ca.”

Chora, Pablo bejaycá Efesocana tojēftsānbocna. ²² Cesarea puebloye tojánashjango ora, tojána jacheuayama Jesucristbeñe ošbuáchiyēnga Jerusalenoca; y chentšana Antioquioye tojána. ²³ Chentše baseftayté yojēftsemna; y chentšana, Pablo tojesaná Galacia y Frigia luarēnguenache, Jesucristbeñe ošbuáchiyēnga añemo atšatnaye.

Apolos, Efeso puebloca Bēngbe Bētsabe soyēngama yojanabuayiná

²⁴ Cach tempo, Efesoye tojánashjango canye judío, Apolos ca uabainá, Alejandría bēts pueblócá; cha puerta obená inamna jonguamiyama y corente inatátsēmo Bēngbe Bētsabe uabemana palabrēngama. ²⁵ Bētská tojánatsjinye chē Bēngbe Utabná tojaninñanyé benachama; añémoca yojanoyebuambná y Jesusbe soyēngama botamana yojanabuatambá, masque cha nye ntšamo Juan entsānga tojánabuatambama y tojanēbáyama inatátsēmo. ²⁶ Nduatjca Apolos tojanontsé jóyebuambayama chē judiēngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bēngbe Bētsabe inñinñena benache bētsemnana. ²⁷ Apolos Acaya luaroye jama yojtseboše orna, Jesucristbeñe

ošbuáchiyënga bëtscá tmojanañemó y choca Jesucristbeñe ošbuáchiyëngbiama canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanéjabuache. Bëngbe Bëtšá chëngbe tšabiama yojanjuabnáyeca, chënga Jesucristbeñe corente imojtsošbuáchiye. ²⁸ Entšangbe delante chë judiëngaftaca jajuachana imojánenatsëtsnaye y nyetscanga tojaninñanyé, ntšamo ndoñe tšabá inamncá chë judiënga imnatatšëmbuama; y Bëngbe Bëtšabe uabemana palabrengaca chënga tojaninñanyé, Jesús Bëngbe Bëtšabe Uámana Uabuayaná bëtsemnama.

19

Pablo Efeso puebloca

¹ Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanyëna, pero chëngna nye ntšamo Juan chë Ubayaná tojanabuatambacá imnatatšëmbo. ² Pablo chënga tojanatjá: —¿Uámana Espiritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiamana ora ca?

Chora chënga tmojanjuá: —Ni mo queftsátstatšëmbo chë Uámana Espiritu yomnama ca.

³ Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

⁴ As Pablo tojanéyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtšabe benache tmojánishachënga, y entšanga yojanëtsëtsná chë chábentšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵ Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. ⁶ Pablo chëngbe bestšašinë chabe cucuatšënga tojanajó ora, Uámana Espiritu chëngbe ainaniñe tojánamashëngo jtsemándayama; tmojanontsé inyetsá biyangana, chënga tempo ndmabiyañe, y Bëngbe Bëtšabe juabna imojtsoyebuambná. ⁷ Chentše imojtsemna bnëtsana uta entšanga.

⁸ Unga shinjëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entšangftaca imojánenatsëtsnaye y entšanga yojanëtsëtsná Bëngbe Bëtšabe amëndayama, chënga chábeñe chamotsošbuáchema. ⁹ Pero ba nduauenanënga ndoñe imontsošbuaché y Bëngbe Utabná tojaninñanyé Benachama entšangbeñe bacna soyënga imojtsichamo. Chcasna, Pablo chëngbentšana tojtsanojuánañe y nye chë Jesucristbeñe ošbuáchiyënga tojanëbuaja canye scueloye, canye entšá Tirano ca uabainabe yebnoye. Chentše cada te chë ue-nanëngaftaca yojanoyebuambná, ¹⁰ y chca yojánama uta uatëntscuana; y chca, nyetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. ¹¹ Y Bëngbe Bëtšá puerte bëtš soyënga Pábloftaca yojtsama. ¹² Tša bëtš soyënga tojanma; chíyeca, nyetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšangbentšana jésebocanana.

¹³ Pero básefta judiënga tsáshenañe bacna bayëjënga entšangbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe

Utabná Jesús jótšëmbonëse. As, chë bacna bayëjëngbioye mëntšá imo-jtsëtsësnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentsana chašmuaisebocnama ca.”

¹⁴ Chca imojánama chë judío Esceva ca uabainabe canyësefta uaquiñënga. Esceva inamna bachnangbe amëndayá. ¹⁵ Pero canyë, Escévëbe uaquiñënga chca tmojánayana orna, chë bacna bayëja mëntšá tojanëjua: “Atšë Jesús sënduábuatma y sëndëtatšëmbo nda Pablo yomnana; pero tšëngaftanga, ¿ndëmuanyënga šmomna ca?”

¹⁶ As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayënjáná, jabuache jtsajantšëtayëse; chë causa, chënga chë yebnentsana tmojtsanacheta enašënga y lisiánënga. ¹⁷ Nyetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entsanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashjajuana y entsangbe delante imojtsecompšaye, tempo bacna soyënga tmojanmama; ¹⁹ banga, chë bocjuanana soyënga jamama imojanëntšënënga, chëngbe bocjuanana librëšangá tmojaniyëbo y entsanga imojtsantješna ora, chëšangá imojtsajuinÿiye. Tmojanjuabó ntsachetsá chë librëšangá betsámanama y tojanóbocna shachna bnëtsana uaranga crocénana nyetsá. ²⁰ Y chca, Bëngbe Utabnabe palabra más ba entsanga imojtsuenana y chiñe imojtsošbuáchiye y Bëngbe Bëtsá chabe obenana entsángbeñe yojtsinÿinÿnaye.

²¹ Chca tojanochngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsana Romoye jama ca. ²² Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

Efesoca entsanga tmojánënbouenana

²³ Chë tempo, Efesoca entsanga corente tmojánënbouenana, chë Bëngbe Utabná yojtsinÿanÿná Benache imojtsisháchichanëngbe causa. ²⁴ Chë entsanga chca tmojanma, er canyë entsá mídioca soyënga pormayá, Demetrio ca uabainá, chënga tojanayënjáná chca jamama. Cha yojanamana binche soyetëmënga japórmana y chëtëmënga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. ²⁵ Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntšá tojanëyana: “Baconga, tšëngaftanga šmondëtatšëmbo, bënga bëts cá crocénana jtsebomnamna quem trabajuentsana chca jopódiana. ²⁶ Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aíñe montseyëunana. Chë soyna ndoñe nÿe muentše Efesentše chca quenátopasana; nyets Asia luaríñnaca chca entsopasana. ²⁷ Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsicamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabuatma, nda Asientše y nyets luaríñnaca mondadorana ca.”

²⁸ Chca tmojanuena ora, chca pórmayënga puerta tojanëtëna y tmojanáyëbuachena: “¡Efesoquëngbe Artemisa corente bëtsá endmëna ca!”

²⁹ Y chca, n̄yetsca ch̄e pueblent̄sa ent̄sanga tmojánenbouenana. Tmojanotabá Gayo y Aristarquēbioye, Macedonioca boyabásata, Páblēbe tjēmbambayata; y sjojónana tmojanēnatse chēngbe enefjuana yebnóntscoñe. ³⁰ Pablo tojánbošena choye jamashēnguama ch̄e ent̄sangaftaca jóyebuambayama, pero Jesucristbeñe ošbuáchiyēnga ndoñe tmonjanlesenciá. ³¹ Ch̄e Asioca mándayēngbent̄se báseftanga imnamna Páblēbe amiguēnga, y chēnga Páblēbioye palabra tmojanafja ch̄e jénefnama yebnoye ndoñe chaondámashēnguama.

³² Chēntscuana, ent̄sanga imojtsejotonocna, ín̄yēnga imojtsechembumbuana can̄ye soye y ín̄yēngna in̄ye soye, chēnga corente imojtsebouenana causa, y banga chent̄se imojtsemnēnga ndoñe imontsetát̄sēmo ndayama choye tmojanobéconama. ³³ Pero básefta judiēnga, can̄ye ent̄sá, Alejandro ca uabainá, ch̄e ent̄sangbe natsanoye tmojanajuatsēnt̄se, y báseftanga cha tmojanbuayená nt̄samo yojsopasánama. Asna, Alejandro tojánēfjatsēmo cucuát̄seca iytēca chamobiamama, er cha yojtseboše ent̄sangbe delante ch̄e judiēnga jobuauyanama. ³⁴ Pero, Alejandro judío bemnama ch̄e ent̄sanga tmojántatsēmbona ora, n̄yetscanga tmojanáyebuachena uta horēntscuana, mēnt̄sá: “¡Efesoquēngbe Artemisa corente bētsá endmēna ca!”

³⁵ Ch̄e pueblent̄sa mándayēngbe uajabuachaná, ent̄sanga iytēca jábiamama tojanobená ora, tojanéyana: “Efesoquēnga, n̄yets luariñe endótatsēmo, quem pueblent̄se oyenēnga iuamna jtsin̄yēnana ch̄e Artemisa jadórama bēts yebna y ch̄e cha jadórama celocana otsat̄sena ndētsbē. ³⁶ Ndocná quenátobena chama jayanama ndoñe ndegombre yondmēna ca. Chcasna, natjēmbana motsomñēnga y tondaye matamēngana corente t̄sabá nt̄shajuaboycá. ³⁷ T̄sēngaftanga quem boyabásenga moye šmojunatse, masque Artemisbe yebnent̄se tondaye tmonjatbēba y bēngbe Artemisbiamama ndoñe podēca tmonjoyebuambá. ³⁸ Demetrio y cháftaca šmotrabájanga, nderado ndabiamama ndaye demanda šmojtsebomnēsna, cabildoca endatēf̄jna y chent̄se mándayēnga montsemna ch̄e demandēnga jouenama, y chēngbent̄se cada ona šmochjēftsendemánda. ³⁹ Y t̄sēngaftanga in̄ye soye šmojtseenguasna, cmontsamna nt̄samo bēngbe leyēnguiñe yomandancá, n̄yetsca quem pueblent̄se oyenēngaftaca jenóyeunayana. ⁴⁰ Ndayá mēnté tojopasá causa, resjo entsemna bēngbiamama chamuayana, nt̄samo leyēnguiñe yomncá bēnga ndoñe montsama ca; y bēnga ndoñe quemuátobena ndayá jojuana, ndáyeca quem enbouenanana tojopasá ca šoját̄jayēse ca” —cha tojanéyana. ⁴¹ Y chca jayanēse, ch̄e ent̄sanga tojtanichamó.

20

Pablo, Macedonia y Grecia luaroye tojána

¹ Ch̄e enbouenanana tojanochnēngo ora, Pablo ch̄e Jesucristbeñe ošbuachiyēngbioye tojanēbuaja jábuayenama, añemo chamotsatsbomnama; tojesanodiošoftá y Macedonioye tojēftsanbocna. ² Ch̄e luarēnguējana cha tojánachnēngo Jesucristbeñe ošbuáchiyēnga becá añemo atat̄sat̄naye, ba chabe palabrēngaca; chent̄sana, Grecia luaroye tojánashjango, ³ y chent̄se unga ishinyē tojanoquedá. Barquēshañe Sirioye játama Pablo yojtseprontana orna, tojántatsēmbona ch̄e judiēnga cha jtsóbama tmojanenóyeunama. Asna, tojanenojuabó jeshēconama, cach Macedonia luarējana jésachnēnguse. ⁴ Pablo quem boyabásenga tmojantjēmbambá: Sópater, ch̄e Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata. ⁵ Chēnga tmonjanonatsé y šonjanēbatma Troasoca. ⁶ Ch̄e levadúraca ndēpormana tandēse saye fiestent̄sana, Filíposent̄sana barquēshañe fsēnjēftsanbocna y shachna

tianoye, Troasoca chë tmonjanonatsenga fsëntanishëche, y chentše canye semana fsënjanouedanga.

Ntšamo tojanopasá Troas puebloca

⁷ Chë inye semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama; y Pablo entšanga enjétsëtsësnaye. Cha bonjamna yëfsana chentšana jéftseboconana; chë causa, más bën chëngaftaca tonjanoyebuambá, tsëntsetëntscuana. ⁸ Fsënjamna canye tsoye tsbanana tsañoca y chentše ba uajuinñanëshangá enjanamna; ⁹ y canye bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná. ¹⁰ As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entšanga tonjanëyana: “Ndoñe nýetsá matauatjëngana; ainá cha entsatsmëna ca.”

¹¹ Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšángaftaca tonjanse y tontëtanontšë oyebuambnayana, jabinñnëntscuana. Chora Pablo chentšana tontsanoñe. ¹² Y chë otsatšena bobontsna ainá imojtsatánatseñe, y chama chë entšanga corente oyejuayënga imojtsemna.

Pablo Troasentšana Mileto puebloye tojana

¹³ Bëngna fsënjanonatsé y barquëshañe fsënjána Aso pueblóntscóñe, chentšana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fsëntaneninýena ora, bëngaftaca barquëshañe cha tonjána Mitilene puebloye. ¹⁵ Chentšana fsënjéftsanbocna y yëfsana Quío luarëjana fsënjánachnëngo, y chë inye yëfsana Samos luaroye fsënjánashjajna. Chentšana fsënjána y yëfsana Mileto puebloye fsënjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnama. Chca tojánbošena er cha enjétsëboše betesco Jerusalenoca jtsatsmënanana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyëngbeñe bëtsëjemëngcá mándayënga tojanëyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. ¹⁸ Chënga tmonjánashjajna ora, Pablo tonjanëyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Nýets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijéftsoyerdé y ba soyënguiñe tijasufri, chë judiënga atše jóbama mondboše causa. ²⁰ Y lempe ntšamo tšëngaftangbe tšabiama yomncá tconjabuayená; tondaye ntjatsbuetamencá. Nýetscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënacá chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. ²² Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo. ²³ Nýe mëntsá aiñe sëndëtatšëmbo: Nýetsca bëts pueblënguenache ndayëjana atše chandbétsana, Uámana Espíritu šondbëtsebuayiyñaye entšanga cašmochjutame y puerte chaisufrima camochjama ca. ²⁴ Atšbe vida cach atšbiama ndoñe yapa quenatámana, chaitsaina o chayóbana. Pero atšbiama iuámanana

endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnama jábuayenama.

²⁵ “Y mora atše ndegombre sëntsetatšëmbo, tšëngaftangbentsana, chë ndëmuanÿengbentše Bëngbe Bëtsabe amëndayama sënjabuayená, ndocná atše más quešmochátinÿe. ²⁶ Chíyeca, atše ndegombre mënté cbetsëyana: Atše tondaye quetsátstatsëmbo nderado nda ndatsbocaná chaojóbanabiamá, ²⁷ er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebuetamencá. ²⁸ Chcasna, cach tšëngaftangbiamá šmochtsantjesna y nÿetscanga muentše Jesucristbeñe ošbuachiyëngbiámna. Chëngbeñe mo chëngbe abujänÿangcá Uámana Espíritu tcmonejáyé, Bëngbe Bëtsabe entsanga chašmotsanÿenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëse y jóbanëse, mo bëtscá cuafjopagacá. ²⁹ Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuachiyënga chábeñe ošbuachiyana chamotsajbanama chënga jamama. ³⁰ Y tšëngaftangbentsánënaca báseftanga mochanjábocana y entsángbioye uayátsenaye soyënga mochanjabuatambá, chca, báseftanga Jesucristbeñe ošbuachiyënga chë ínÿengbentsana chamotsoluarema y nÿe chë abuátambayëngbioye chamotsésetonama. ³¹ Chcasna, sempre šmochtsantjesna; ndoñe chacmondébnëtjomba, atše unga uatëntscuana, bnëté y ibeta, tšëngaftanga cada ona cbondétsabuayiyenama y chama atše puerte tijasufrí.

³² “Y morna, Jesucristbeyeca catšátanga, Bëngbe Bëtsabe cucuatšinë cbétsabashejuana y ntšamo tšëngaftangbiamá chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entsángbioye, ndëmuanÿenga cha tojáchembo chabe entsanga chamotsemnana. ³³ Atše ndocnabe crocénana, o castellano o entsayá atšbiamá quetsatántšaboše; ³⁴ más inÿetsá, y tšëngaftanga lempe šmondétatšëmbo, atše cach atšbe cucuátšeca tijëftsetrabajama, atšbiamá y átšeftaca imojamnëngbiamá opresido enjamna soyënga janguanguama. ³⁵ Atše nÿets tempo sëndinÿanÿná entsá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnayëse: ‘Canÿe entsá más oyejuayá jtsemnana ndayánaca ínÿabioye tbojtsatšetná ora, y ínÿabioye tbojtseyëngacá ora ndoñe nÿa nÿetsá ca’ ” —Pablo tonjanoyebuambá.

³⁶ Pablo chë soyënga tonjánayanentsana, tonjanoshamentšé y nÿetscanga chentše monjëtsemnëngaftaca Bëngbe Bëtsá tmonjanótšëmbona. ³⁷ Nÿetscanga tmonjánenobošachna y Pablo tmontanotsejcuá y tmontanámocho. ³⁸ Y entsanga corente ngménaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquësha enjetsamnëntscoñe cha tmonjantjëmbambá.

21

Pablo Jerusalenoye tojána

¹ Chë Jesucristbeñe ošbuachiyënga fsënjëftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye. ² Pátara pueblentše canÿe barquësha fsënjáninÿena, Fenicioye enjétsaye; asna, chëshañe fsënjanojayé y chentšana

fsënjëftsanbocna. ³ Fsëntsachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentse chë barquëshentša uasmanëshangá jëftsáboshjonama yojámnayeca, chë puebloye bënga fsënjëftsanamashjna. ⁴ Chentšna, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjaniyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama. ⁵ Chë canÿsëfta te tonjanochnëngo ora, chentšana fsënjëftsanbocna y nÿetscanga parejo chëngbe shémangaftaca y básangaftaca šonjanatjëmbambá chë pueblo chabóntsoñe; y chentše, chë chëñÿañe fsënjanošamentšé y Bëngbe Bëtsá fsënjanimpadá. ⁶ Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

⁷ Tirentšana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiama bejaycá chë te ayana. Tolemaidentše Jesucristbeñe ošbuáchiyënga fsënjancheuá y chëngaftaca canÿe te fsënjanoquedanga. ⁸ Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiamá tšabe noticiënga abuyaynayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentšá, Jerusalenoca ubuáyanënga. ⁹ Felipe enjánabamna canta ndëbouamna bembiana y chënga monjamna Bëngbe Bëtsabe juabna oyebuambnayënga. ¹⁰ Ya bayté chentše fsënjëtsemna orna, Judeocana tonjánashjango canÿa Bëngbe Bëtsabe juabna oyebuambnayá, Agabo ca uabainá. ¹¹ Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduññbioye chë judiënga mëntšá camochjama y ndoñe judiëngbe cucuatšë camochjáboshjona ca.”

¹² Chca fsënjanuena ora, bënga y chentša entsanga Pablo fsënjanimpadá Jerusalenoye ndoñe chaondëtsama. ¹³ Chora Pablo tonjánayana: — ¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše sëntseprontana y ndoñe nÿe chašmobatsëcama; Jerusalenoca jobanámnaca sëntseprontana, Bëngbe Utabná Jesusbiamá ca —cha tonjánayana.

¹⁴ Jáyëñjanama ndoñe chibiatanobená ora, ndoñe más chibiatanimpadá; nÿe mëntšá fsënjaniyana: —Ntšamo Bëngbe Utabná yojtsebošcá chaotsemna cá.

¹⁵ Chë soyënga tonjanochnëngüentšana, fsënjano prontá y Jerusalenoye fsënjána. ¹⁶ Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canÿe Chipre luaroca entsabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷ Jerusalenoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. ¹⁸ Yëfsana, Pablo bëngaftaca tonjána Santiago jábuachama, y chentše, nÿetsca chë ošbuachiyëngbeñe bëtsëjemëngcá mandayëngnaca monjëtsemna. ¹⁹ Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanamá.

²⁰ Chca tmonjanuena ora, Bëngbe Bëtsá tmontanчуá y Pablo mëntšá tmonjaniyana: “Morna, Jesucristbeyeca bëngbe catsata, contsonÿá ntšamo ba uaranga judiënga Jesucristbeñe imojtsošbuáchema, y chënga nÿetscanga

montsantješna nÿetsca Jesucristbeñe ošbuáchiyënga chë Moisesbe leyentša nÿetsca mandënga chamotsocumplínama. ²¹ Y entšanga chëngbioye noticia tmojatšatá, aca chë inÿe luarënguenache imoyena judiënga cojtsabatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentse ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatsëmbcá ndoñe chamondëtsamana ca. ²² Y morna, ¿ntšamo chë soyëngama cochtsemana? Ndegombre, chënga mochanjátatsëmbona aca moye tcojabama. ²³ Chcasna, ntšamo cbochanjabuayenacá cochjama: Bëngbentse canta boyabásenga montsemna y chënga entsamna Bëngbe Bëtsabiama canÿe šbuachenana soye jamama. ²⁴ Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájua chaojtsamncá, aca cochjëtšájua, as chënga chamobená nÿets stjënashe jtsenátšbotjama, jinÿanÿiyama, ntšamo Bëngbe Bëtsábioye tmojašbuachenacá ya tmojamama. Y chca, nÿetsca judiënga mochanjinÿe ndoñe ndegombre yontsemna chë ntšamo chëngbioye acbiama tmojacuntacá; masna, chënga mochanjátatsëmbona aca ndegombre ntšamo Moisesbe leyinë yomandancá icuamama. ²⁵ Y chë ndoñe judiënga Jesucristbeñe imojtsošbuachengbiamna, bënga ya fsënjubuábiamna y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšena, chë entšanga tmojtsejuabná diosënga imomna soyënga jadórama tmojiyëbana; ni buiñe, ni tsešana bayëngbe mëntšena; y ndoñe chamondëtsama bacna soyënga shembásenga y boyabásengaftaca ca’ ” —chënga tmojánayana.

Bëngbe Bëtsabe bëts yebnentše judiënga Pablo tmojánishache

²⁶ As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnyama, ndayténtscóñe yojamna chë cantangbiamna soyënga jtsamama, Bëngbe Bëtsabe delante tšábënga jtsatsmënama, y jayanama ndayté chëngbiamna yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiama juatšëmbonama.

²⁷ Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouënanama. Y cha tmojánishache, ²⁸ mëntšá jtsayebuáchëse: “¡Israeloca entšanga, šmabëtsëjabuache ca! Quem boyabása entsemna chë nÿets luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashëngo, y chca cha tonjama chë Bëngbe Bëtsabe bëts yebna Bëngbe Bëtsabe bominÿiñe ndoñe tšabá chaondëtsemnama ca” —chënga imojtsichamo.

²⁹ Chca imojtsichamo, er entšanga Pablo tmojáninÿe chë bëts pueblentše Tróximo Efesocáftaca; y imojëtsejuabnaye chábioye Bëngbe Bëtsabe bëts yebnoye Pablo tbojánánatse ca.

³⁰ Nÿetsca chë pueblentša entšanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. ³¹ Jtsóbama ya imojtsebuachéta ora, chë Romoca soldadëngbe mandayá tojántatsëmbona nÿetsca chë bëts pueblentša entšanga

imojtsenbouenanama. ³² Asna, chë mandayá chabe soldadënga y inÿe chentša amëndayënga tojánachembo y cánÿiñe chë entsanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanÿe ora, tmojtsanajbaná Pablo jantsetayana.

³³ Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?” ³⁴ Pero chë entsángbeñe, ínÿenga canÿe soye imojtsáyebuache y ínÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. ³⁵ Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entsanga tša rábiaca imojtsemna causa, ³⁶ er chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entsangbe delante tojanenëuyaná

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

³⁸ As, ¿aca ndoñe condmëna chë Egiptocá, chë ndoñe bayté quenátsmëna entsanga yojanëtsëtsná chë mándayëngbe contra chamotsemnama y chë canta uaranga podesca uamana entsanga puñálaca uajatëngaftaca, entsanga ndoyena luaroye tojanbocná ca?

³⁹ Chora Pablo tbojanjuá: —Atše judío sëndmëna, Tarso pueblota onÿnaná, canÿe uámana pueblentše Cilicia luaroca; Diosmanda šmolesenciá entsanga jáuyanama ca.

⁴⁰ As, chë soldadëngbe amëndayá chca tbojanlesenciá. Páblëna chë gradabenguiñe tojantsá y cucuatše tojanatsbaná entsanga iytëca chamobiamama. Nÿetscanga iytëca imojtsemna orna, Pablo hebreo biyañe mëntšá entsanga tojanëyana:

22

¹ “Baconga y taitanga, mora šmochjouena atše jenëuyanama ntšamo chjayancá ca.”

² Pablo cachëngbe biyañe, hebreo biyañe yojtsóyebuambnana entsanga tmojanuena ora, más iytëca tmojanobiama. As Pablo tojanëyana: ³ “Atše judío sëndmëna. Tarso pueblentše, Cilicia luaroca sënjanonÿná, pero muentše Jerusalenentše sënjanoboché y sëndétatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšbe ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. ⁴ Atše sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. ⁵ Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjanijé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)

6 “Pero canye te benachiñe Damasco béconana sēnjétsaye orna, mo nýetsto ora, nýe ndeolpe atšbe juachañe canye bēts tcuinýe celocana tonjanbuashinýinýena. 7 Y fshantsoye sēnjétseshajaye y canye oyebuambnayana sēnjanuena mēntšá: ‘Saulo, Saulo, ¿ndáyeca šcojtsacmena ca?’ 8 Atše sēnjantjá: ‘¿Nda comna, Bēngbe Utabná ca?’ Y chē oyebuambnayana šonjanjuá: ‘Atše sēndmēna Jesús Nazaretocá, y aca condama atšbe entšanga chamot-sesufrínama ca.’ 9 Chē átšeftaca monjánajnēnga chē bēts tcuinýe tmojáninýe y tmojanouatjananga, pero chē oyebuambnayana ndoñe tmonjanuena. 10 Chora atše sēnjantjá: ‘¿Bēngbe Utabná, ndayá jamama šojtsemna ca?’ Y cha šonjanianya: ‘Matētsbaná y mētētontsé Damascoye jama. Chentše canya cmochanjabuayená ndayá jamama cmojtsemnama ca.’ 11 Chē tcuinýe yapa tonjanbuashinýinýena causa, atše jtaná sēnjanoquedá. Chcasna, chē ínýenga šmontanobuacuetēntsé y chca, Damascoye sēnjánashjango.

12 “Chentše enjamna canye bacó Ananías ca uabainá; cha inoyena ntšamo Bēngbe Bētsá yobošcá y yojánama ntšamo bēngbe leyēnguiñe iuayancá, y nýetsca chentša judiēnga monjanamana chabiana tšabá jtsóyebuambnayana. 13 Cha tonjánabo atše jinýama y tonjánashjango ora, šonjanianya: ‘Jesucristbeyeca atšbe catšata, Saulo, chacmotsatabinýna ca.’ Cachora y cha sēnjáninýe.

14 “Chentšana cha tonjánayana: ‘Bēngbe bēts taitangbe Bētsá aca tcmojuábuayana, ntšamo cha acbiana yobošcá chacotsetatšēmbuama, chē nýetsca soyēnguiñe Tšabá Amá chacuinýama y cachabe uayásentšana chacóyeunama. 15 Bēngbe Bētsá chca tojama, aca chē chabe buayenana soyēngama entšángbeñe chacóyebuambama, y chamna nýets luarentša entšángbeñe cochjacuénta, ntšamo tcojinýe y tcojouencá. 16 Y mora, ¿ndoñe más matobátmanana! Motsbaná y cochjenábaye Jesucristo jótšēmbonēse, chca, acbe bacna soyēngama perdonaná chacotsemnama ca.’ —cha šonjanianya.

Pablo tojanacuntá ntšamo chē ndoñe judiēngbioye tmojánichmoma

17 “Jerusalenoye sēntaná ora, Bēngbe Bētsabe bēts yebnoye sēnjána cháftaca jencuéntama, y ndeolpe atše mo otjenayoquécá sēnjanoquedá. 18 Chca orna, Bēngbe Utabná sēnjáninýe y cha mēntšá šonjanianya: ‘Betsco motsa y cam ora Jerusalenentšana métsebocna; quemuentša entšanga ndoñe quecmochatóyeunaye ntšamo atšbiana condētatsēmbó y contsētšētsnacá ca.’ 19 Atše sēnjanjuá: ‘Bēngbe Utabná, chēnga mondētatsēmbó atše sēnjánana nýetsca chēngbe enefjuana yebnēnguenache y chē ácebeñe ošbuáchiyēnga sēnjanētámiana y sēnjánatsetšenaye; 20 y acbiana ndegombre oyebuambnayá Esteban tmonjanóba ora, átsnaca chentše sēnjamna y tšabá imojtsama ca chama sēnjétsejuabnaye, y cabá chē monjanóbanangbe entšayējuangá atše chora sēnjanabojanyá ca’ —atše sēnjanjuá. 21 Pero chca sēnjánayana ora, Bēngbe Utabná šonjanianya: ‘Motsa; atše bēn luarēngoye, ndoñe judiēngbioye cbochanjíchmuca ca.’ ”

Pablo y chē soldadēngbe amēndayá

22 Chē entšanga chēntscoñe tmojanuena; pero chē ndoñe judiēngbiana tojanoyebuambá orna, chēnga tmojanontsé uayebuáchana: “¿ndoñe tšabá quenátsmēna cha vídaca chaotsemnama! ¡Motsóba ca!” 23 Y chēnga más imojtsáyebuache; puerte rábiaca chēngbe uichētjonējuangá tsbanánoye imojtsēbéntaye y tsbanánoye polvēshe imojtsētšana; 24 chē causa, chē mandayá tojánayana chē soldadēngbe oyenoye Pablo chamotsēmashēngo ca, y tojanmandá chamotsetjanja chaobuambama ndáyeca entšanga chca chabe contra

imojtsáyebuache. ²⁵ Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canye entšá derecho bomná mo canya Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶ Chë básefta soldadëngbe mandayá chë soye tojanuena ora, tojána y nýetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entšá derecho bomna mo canya Romoca onýnanacá canmëna ca.

²⁷ As chë amëndayá tojána Pablo yojtsemnoye y tbojanijana: —Smëyana, ¿aca derecho bomná mo canya Romoca onýnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atše beca crocénana sënjetsajó mo canya Romoca onýnanacá derecho jtsebomnama ca.

As Pablo tbojanjuá: —Y atšna derecho bomná mo canya Romoca onýnanacá sëndmëna atše tijanonýná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentsana tmojanjuaná; y chë mandayánaca tojanjuaná y yojtsauatja, Pablo derecho bomná mo canya Romoca onýnanacá yojamnama tojántatšëmbona ora, er cha tojanmandá Pablo chamotsebátsëcama.

Pablo, Jerusalenentša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nýetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

23

¹ Chora Pablo, nýetsca chë mandayëngbioye tojanënyanýe y tojanéyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. ³ Pero chora Pablo Ananíasbioye tbojanjuá: —¿Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinýinýnayá! Aca chentše contsetbemaná tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

⁴ As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

⁵ Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguiñe mëntšá endayana: “Entšangbe mandayabe contra ndoñe catjayana ca.”

⁶ Pablo tojáninýe chë mándayënguentše báseftanga saduceunga y ínýengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tsobátmana causa, atše ndoñe tšabá séntsama ca tšëngaftanga šmochjayana ca.

⁷ Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nýetsca entšanga ndoñe cachcá imontsejuabnaye.

⁸ Er chë saduceunga jtsichámuana chë obanënga ndoñe ntyenana ca, y ni

angelënga, ni espíritënga ndoñe mondmëna ca; pero chë fariseunga aïñe chë soyënguiñe jtsošbuáchiyana. ⁹ Y nyetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canye ángel o espíritu muábioye ndegombre tbojauyana ca.”

¹⁰ Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentsana jaisábocnama y chë soldadëngbe oyenoye cachiñe jesánatsama.

¹¹ Yëfsana ibeta, Bëngbe Utabná Páblëbioye tbojánëbëbocna y tbojaninyana: “Pablo, ainaniñe añemo cochtsebmna. Ntšamo aca atšbiama condétatšëmbo y muentše Jerusalenentše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inye yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana.

¹³ Chca jamama tmojanjuabó entšanga imojamna canta bnëtsanëngama más. ¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana.

¹⁵ Morna, tsëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. ¹⁷ Chorna, Pablo canye básefta soldadëngbe mandayábioye tbojanchembo y tbojaninyana: “Dios-manda quem basa mánatse chë nyetsca soldadëngbe amëndayábioye; canye soye entsebmna chábioye juenayama ca.”

¹⁸ As, cha chë bobontse tbojëftsantbetse, chë nyetsca soldadëngbe amëndayábioye tbojanánatse y tbojaninyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canye soye aca jauyanama ca.”

¹⁹ Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebmna atše jauyanama ca?

²⁰ As chë bobontse tbojaninyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. ²¹ Pero ndoñe catjóyaunaye; chënguentsana canta bnëtsanëngama más entšanga iytemenënga Pablëbiama montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaninyana.

²² Chentsana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentsana tbojtanichmó.

Pablo tmojanánatse Félix, chë Cesareoca mandádbioye

²³ Chentsana, chë soldadëngbe amëndayá tojánachembo útata chë inye soldadëngbioye mándayënguentsana, y tojanamëndá chamoprontama uta

patse soldadënga, inÿe canÿsëfta bnëtsanënga couayënguiñe y inÿe uta patse lanzëšangaca, Cesarea pueblöye ibeta, las nueve ora jabocanama; ²⁴ y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵ Y canÿe tsbuanácha chëngaftaca tojanichmó y chëchañe mëntsá yoÿtsábemana:

²⁶ Claudio Lisias, chë bëts uámana mandado Felixbiama: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjåtatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá. ²⁸ Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye; ²⁹ y chentšana, atše sënjåtatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárcelöye jutámiamama. ³⁰ Pero atše sënjåtatsëmbona chë judiënga tmojenoyeuná cha jtsóbama; chíyeca, cam ora cha ácbioye sëntsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

³¹ Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris pueblöye tmojanánatse. ³² Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayíñe enjaquenënga Pábloftaca tmojána. ³³ Cesareoye chënga tmojánashjajna ora, chë tsbuanácha chë mandádbioye tmojanantsabuaché, y Páblënaca chabe cucuatšíñe tmojáboshjona. ³⁴ As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, ³⁵ tbojanianyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanÿama.

24

Ntšamo Pablo chë mandado Félixbe delante tojanenëuyaná

¹ Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentšana y canÿa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

² Pablo tmojanábocna ora, Tértulo tojanontsé chabe contra jayanama y Félixbioye tbojanianyana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tšabe soyënga quem luarentša entšangbiama yoÿtsebinÿna. ³ Nÿets tempo y nÿetsquénache chë soyënga fsëndóyëngacañe, bëts uámana mandado, y bënga chama corente cbon-detsechuaná. ⁴ Pero ndoñe yapa bën jatenbiamnayamna, Diosmanda ratotema šmotsoyauná. ⁵ Bënga fsëntsetatšëmbo quem boyabása entšanguentše entsemna mo bacna shacuancá, nÿets luarënguenache yoÿtsana y yoÿtsama chë judiënga nÿetscanga cachca soye ndoñe chamondëtsejuabnama, y cha yoÿtsemna chë Nazaretocabe ustonëngbe uanatsaná. ⁶ Y tonjábošena jamama Bëngbe Bëtsabe bëts yebna, Bëngbe Bëtsabe bominiñe ndoñe tšabá

chaondětsemnama; chíyeca bēnga cha fsēnjotbá. Bēnga fsēnjábošena chabiama jayanana tšabá o ndoñe tšabá tonjamama, ntšamo bēngbe leyēnguiñe endayancá; ⁷ pero chē soldadēngbe amēndayá Lisias tonjontremeté y jabuachana bēngbe cucuatšentsana tbojtsánatseñe, ⁸ y tonjayana chē chabe contra ichámēngna caojtsamna ácbioye chama jabana ca. Cach taitá chacojatjá ora, ndegombre soyēnga cochántsetatšēmbó ndáyeca bēnga muabe contra fstsichámuama ca” —cha tojánayana.

⁹ Y chē judiēnga chentše imojětsemnēngna imojtsanichamo aiñe chca tojanopasá y lempe ndegombre yojtsemna ca.

¹⁰ Chentšana, chē mandado Páblēbioye tbojánefjatšēmbó chaóyebuambama; as Pablo tojánayana: “Atše sēndětatsēmbó aca ba uatama comna muentša entšangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenēuyaná. ¹¹ Ntšamo cach aca jtsetatšēmbuama contsobencá, cabá bnētsana uta te entsemna atše Jerusalenoye sēnjá, Bēngbe Bētsá jadórama. ¹² Y quemēnga ndoñe chešmátinýena nderado ndáftaca jabuachana enatsētsnayıñe, ni entšanga chamuenbouénanama amiñe, Bēngbe Bētsabe bēts yebnoca, ni chēngbe enefjuana yebnēnguenache, ni inýe luarēnguenache chē bēts pueblentše. ¹³ Quem entšanga tondaye quemátsbomna ntšamo jayanama, atšbe contra montsichamo soyēnga ndegombre yojtsemna ca. ¹⁴ Pero ndegombre endmēna y chanjayana, atše bēngbe taitangbe Bētsá sēndēserveda, jt-siyenēse ntšamo Bēngbe Bētsá šonjaninýanýé benache yomncá; y quem entšanga montsichamo, básefta soyēnga ntšamo bēnga quem Tsēm Benache ústonēnga fstsošbuachecá, ndoñe ndegombre yondmēna ca. Pero atšna nýetsca chē Moisesbe leyíñe y Bēngbe Bētsabe juabna oyebuambnayēngbe uabemana librēšanguentša soyēnguiñe sēndošbuaché; ¹⁵ y atše cach chēngcá, puerte jtsošbuáchiyēse Bēngbe Bētsábeñe sēndobátmana cha yochjama chē mochjóbanēnga chámuatayenama, nýetsca entšanga, lempe tšabá amēnga y chē ndoñe tšabá amēngnaca. ¹⁶ Chíyeca, atše nýets tempo puerte tšabá sēndama, tondayama ntjatenócochinýenama y atšbe ainana natjēmbana chaotsomñama, Bēngbe Bētsabe delante y entšangbe delántnaca.

¹⁷ “Básefta uatama inýe luarēnguenache atše sēndánana; ndoñe bayté quenátsmēna cach atšbe luaroye sēntashjango, chentša ndbomnjémēnga jujabuáchama ndayánaca jatšatayama y bayēnga jobáyama, Bēngbe Bētsá jētschuayama. ¹⁸ Atše sēnjama soyēnga Bēngbe Bētsabe delante tšabá jtsatsmēnama; chentšana, básefta Asioca judiēnga Bēngbe Bētsabe bēts yebnentše šmonjínýena, pero ndoñe chešmátinýena ni ba entšángaftaca, ni enbouenaniñe. ¹⁹ Chē šmonjínýenēnga entsamna ácbioye jabana y acbe delante atšbe contra chamuayana, nderado ndayá tmojtsebomnēse. ²⁰ O ndóñesna, cach quemēnga, muentše montsemnēnga chamuayana, chē judiēngbe amēndayēngbioye atše šmonjuánatse ora, atše ndayá tijobuáchjanguama chešmēnjínýena, atše castiganá jtsemnama šojtsemna ca chēnga chamuayanama; ²¹ o nderado nántsemna chē atše chēngbentše sēntsemna ora, mēntšá tijuáyebuachenama: ‘Atše chē obanēnga mochtayenama puerte jtsošbuáchiyēse sēndobátmana causa, tšēngaftanga atšbe contra šmochjayana ca.’ ”

²² Félix bētsca inatátšēmbó Bēngbe Utabná tojaninýinýé Benache ústonēnga imojanošbuaché soyēngama; as, Pablo chca yojtsoyebuambná ora, cha tojanmandá ndoñe más chē soyama chē te jatóyebuambnayana, y chē entšanga tojanéyana: “Chē soldadēngbe amēndayá Lisias chaojášhango ora, chanjayana ntšamo quem tšēngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

²⁴ Chentšana baseftaytese, chë mandado Félix Cesareoye tojtashjango, chabe shema Drusíaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojttsichamo, ntšamo canÿa nanjobenaye Jesucristbeñe ošbuachiyá jtsemnama. ²⁵ Pero, nÿetsca soyënguñe tšabá jtsamama, cachá jenomándama jtsoybenama y ntšamo tmojamama nÿetsca entsangbiamama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianana: “Mora, mata; luare quëtstse bomna ora, cbochjachembo ca.”

²⁶ Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuéntama. ²⁷ Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

25

Pablo Festbe delante

¹ Festo chë luaroye tojánashjango y unga tianoye, Cesarea pueblentšana Jerusalenoye cha tojána. ² Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama. ³ Y tmojanimpadá, mo chëngbiamama canÿe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. ⁴ Pero Festo tojanëyanama, Páblëna Cesareoca utamená yojtsemna y baseftaytese cha choye jtama ca. ⁵ Y tojanëyanama: “Chamna, tšëngaftangbe amëndayënga átseftaca Cesareoye chamua y chë boyabásan daye bëts soye tojobuáchjanguase, choca chabe contra šmochjayanama ca.”

⁶ Festo Jerusalenentše posufta o bnëtsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷ Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canÿe chë soyëngama tmonjanobená jinÿanÿiyana chca ndegombre bëtsemnama.

⁸ Y Pablo, cachá jenëuyanama mëntšá yojttsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹ Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰ As Pablo tojánayanama: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. ¹¹ Nderado atše ndaye bëts soye tijobuachjanguá y chama atše jóbana šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayanama.

¹² As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábosënësna, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³ Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. ¹⁴ Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntsá tbojaniyana: —Muentše endmëna canýe entsá, Pablo ca uabainá; Félix utamená tbonjëftseboshjona, atše mandadca sënjontsé ora. ¹⁵ Jerusalemoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶ Y atše sënjáuyana: “Chë romanënga ndoñe quematamana ndocnabiama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.” ¹⁷ Chýeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetšana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canýe bëts soye chabe contra chemátayana, chënga jóyebuambayama tonjóyentsbuache ora. ¹⁹ Chënga chabe contra montsichamo, nýe cachëngbe Dios ntšamo jadórama yomnana y canýa Jesús ca uabainábiana; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstétsetatsëmbo ntšamo chë soyiñe jamana; asna, Pablo sënjantjá Jerusalemoye jama tayojétseboše ca, choca atše jayanama tšabá o ndoñe tšabá cha tonjanmama. ²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” —Festo tbojancuentá.

²² Chca tbojanencuentá ora, Agripa Féstbioye tbojaniyana: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentsa uámana taitanga. Chentšana Festo tojanmandá Pablo jobetšana; ²⁴ y chora cha tojánayana: “Rey Agripa y nýetsca taitanga bëngaftaca šmojtsemnënga: Chentše entsemna chë boyabása. Nýetsca judiënga chabe contra átšbentše montsabíchamo, Jerusalemoca y quem Cesarea puebléntšnaca, y nýa jtsayebuáchëse tša šmontseimpadana cha chaóbanama; ²⁵ pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶ Pero atše, atšbe bëts uámana mandádbioye quem boyabásabiama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebomnama. ²⁷ Er atše sëntsejuabná ndoñe corente juabnayabe soye yomna, canýe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

26

Pablo tojanontsé rey Agripbe delante jóyebuambayama

¹ Chentšana, Agripa Páblēbioye tbojanianyana: —Jóyebuambayama contselesenciana, cach aca chacuenēuyanama ca.

As Pablo, chē réybioye jachuyayama cucuatše tojanatsbaná y jenēuyanama tojanontsé mēntšá jayanama: ² —Atše ndegombre sēntsoyejuá mora chjobenaye acbe delante jóyebuambayama, uámana rey Agripa, chca, atše jenēuyanama nyetsca soyēngama ntšamo judiēnga atšbe contra montsichámuama; ³ y más sēntsoyejuá, taitá conduábuatmama lempe ntšamo judiēnga monduamancá y condétatšēmo chē judiēnga ndayama imuenoboyebuambnana. Chcasna, Diosmanda uantádoca šmotsoyeuná.

Pablo tojanacuntá ntšamo cha tempo inamnana

⁴ “Nyetsca judiēnga mondétatšēmo ntšamo atše tempšana chēngbeñe tsiyenama, bobontse sēnjamna orscana, atše sēnjanonýná luarentše y Jerusale-
nentše. ⁵ Chēngnaca mondétatšēmo y montsobena jayanana, chēnga tmojtsebošēse, chca ndegombre yomnana; atše nyets tempo fariseucá vida sēndbomna, y chē fariseunga mondoyena más soyēnga jtsamēse chē judiēngbe leyēngaca chē inýe judiēngbiana. ⁶ Y mora, ntšamo Bēngbe Bētsá bēngbe bēts taitanga tojanašebuachenacá, chē obanēnga jtayenama cha yoch-
jamama puerte jtsošbuáchiyēse atše obatmana causa, šmojuánatse atšbe con-
tra jayanama. ⁷ Bēngbe bnētsana uta Israeloca bēts pamíllanga mondobátmana
chē šbuachenana soye chēngbiana chaóshjanguama y chíyeca, cada te bnēté y
ibeta chēnga Bēngbe Bētsá mondadorana y mondēservena. Y atše cach soyama
obatmana causa, bēts rey Agripa, judiēnga mora atšbe contra montsabíchamo.
⁸ ¿Ndáyeca tšēngaftanga judiēnga šmojtsichamo, chē obanēnga chámuatayenama
Bēngbe Bētsá yochjamama jtsošbuáchiyama ndoñe šmontsobena ca?”

Pablo tojanacuntá, ntšamo tempo cha Jesucristbeñe ošbuáchiyēnga yojan- aborlánana

⁹ “Y cach átšnaca sēnjanjuabná atše šojamna lempe ntšamo stjobenacá
jamana, Jesús chē Nazaretocábeñe ošbuáchiyēnga corente chamosufrima,
¹⁰ y chca Jerusalenentše atše sēnjanma. Chē bachnangbe amēndayēnga
mando šmonjanatšetá, y chca, banga Jesucristbeñe ošbuáchiyēnga cárceloye
sēnjanētame; y jtsēbáyama ca chēngbiana montsanichamo ora, átšnaca aínē
chca chamoma ca sēnjánichamo. ¹¹ Y ba soye, chē judiēngbe enefjuana
yebnēnguenache jabuache chēnga sēnjanatsetšená, chēnga Jesucristo ústonana
chamotsajbanama, y chēngaftaca tša etonaná sēnjétsemna causa, chē inýe
luarēngoca bēts pueblēnguenáchnaca chēnga sēnjanécamena.”

Pablo tojanacuntá ntšamo cha Jesucristbeñe ošbuachiyá tojanóbema (Hch 9.1-19; 22.6-16)

¹² “Y cachcá jamama canýe te Damascoye sēnjétsaye; chē bachnangbe
amēndayēnga uabemanēchangá šmonjanēntšabuaché chca jamama y,
cachēnga choye šmonjanichmó. ¹³ Pero, uámana rey, chē benachējana
mo nyetsto ora, sēnjáninýe canýe bēts tcuinýe celocana, shinýama corente
más enjétsebinýnaye, y atše y chē átšeftaca ajnēngbe shēconana corente
enjétsebuashinýinýana. ¹⁴ Nyetscanga fsēnjánshajaye y atše sēnjanuena canýe
oyebuambnayana, hebreo biyañe, mēntšá šonjétsatsaye: ‘Saulo, Saulo,
¿ndáyeca chca šcojtsacmena ca? Cach aca bacá contsenabomá, atšbe
entšanga chamosufrima tcojtsama ora, mo uacná ngmēche niñēfjiñe cha
tojtsoscunýná orcá, cachá jenótsetšenana ca.’ ¹⁵ As atše sēnjánayana: ‘¿Nda
comna, Bēngbe Utabná ca?’ Y chē Utabná šonjanjuá: ‘Atše sēndmēna Jesús, y

aca condama atšbe entšanga chamosufrima ca. ¹⁶ Pero matëtsbaná y matëtsá. Atše cbonjébëbocna jinÿinÿiyama aca tchojuábuayanama atše ſcochjaserviama, y chacotsetatšëmbuama y entšanga chacuacuntama, mora tconjinÿe soyama y más chcoye atšbiama cbochanjinÿinÿiye soyëngámnaca. ¹⁷ Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, ¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmoma, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entšangbe juabnënga binÿnayá. Satanasbe cucuatšinë ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmoma canÿe luare entšángaftaca, chë ndémuanÿengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca' ” —cha ſonjaniana.

Pablo tojanma ntšamo chë mo otjenayoquëcá tojaninÿcá

¹⁹ “Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo ſonjaniancá; ²⁰ y natsana, Damascoca entšanga chë tšabe noticiëngama sënjanabuayená; chentšana, Jerusalenoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama. ²¹ Chca sënjánama causa, judiënga Bëngbe Bëtsabe bëts yebnoca ſmonjanishache y tmonjánbošena atše jtsóbana. ²² Pero Bëngbe Bëtsá sempre ſonduájabuachana, y chca, cada te mëntscoñama, nÿetscanga Bëngbe Bëtsabiamá sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe. ²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

Pablo tojanma rey Agrípbioye jáyëñanama, Jesucristbeñe ošbuachiyá chaóbemama

²⁴ Pablo, cachá jenëuyanama chë soyënga tojánayana ora, Festo mëntsá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

²⁵ Pero Pablo tbojanjuá: —Opá ndoñe quetsátsmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga. ²⁶ Chentše rey Agripa entsuenana, y cha puerta tšabá chë soyëngama endëtatsëmbo, chíyeca, tondayama ntjatauatjca, atše chabe delante sëntsoyebuambná; atše corente sëndëtatsëmbo chánaca chë soyëngama yotatsëmbuama, er ndayá Jesús tojanmcá, ndoñe tonjopasá ndaye iytëmena chaboje. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatsëmbo aíñe chiñe cošbuáchema ca —Pablo tbojaniana.

²⁸ Chora Agripa tbojanjuá: —Batšatema más y mašcjayëñaná Jesucristbe ustoná atše jóbemama ca.

²⁹ As Pablo tojánayana: —Nÿe batšatema más o bëtsca más, atše Bëngbe Bëtsá sëntseimpadana, ndoñe nÿe bëndatbe barie, sinó nÿetscanga chë mora

šmojtsuenanënga, atšcá Cristbe ústonënga chašmobiamama, pero utámenënga ndoñe chamondétsemna, ntšamo mora atše sëntsemncá ca.

³⁰ Chorna, chë rey, chë mandado, Berenice y chë chëngaftaca imojant-biámanënga tmojantsbaná, ³¹ y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnátsmëna ca.

³² Y Agripa Féstbioye tbojanियana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

27

Roma bëts puebloye Pablo tmojanichmó

¹ Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utámenënga Julio ca uabainabe cucuatšinë tmonjánabashejuana. Julio enjamna canya chë Romoca bëts mandadbe soldadënguentsá mandayá. ² Asna, fsënjánašëngo canye Adramitio puebloca barcuñe; ya chë Asioca bëts pueblëngoye juama enjétsamna. Cesarea pueblentsana fsënjánbocna y Aristárncana bëngaftaca enjétsamna; cha enjamna Tesalónica bëts pueblócá, Macedonia luaroca.

³ Chë inye yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjétsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama. ⁴ Sidonocana fsënjéftsanbocnentsana, bëngbe contra corente enjétsëbinýiaye. Chíyeca, Chipre fshantsënga catšbioicajana, ndoñe yapa quentétsëbinýiyëjana bënga fsënjána. ⁵ Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

⁶ Chë soldadëngbe amëndayá, canye Alejandría puebloca barco chentše tonjáninýena, Italia luaroye yojétsaye; asna, šonjanamëndá chë barcuñe jenójayiyana. ⁷ Baseftaytentscuana uenana fsënjánana y pordonto fsënjánobená Gnido pueblentsá ndirichiñe jashjanguana. Cabá bëngbe contra enjétsëbinýiaye causa, Salmón luarëjana fsënjánachnëjna, Creta fshantsënga béconana, ndoñe yapa quentétsëbinýiyëjana. ⁸ Y chca, pordonto bejaycá fsënjánana, fshantsënga béconana; chentšana, canye pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

⁹ Chca, bayté tonjanochnëngo y chora chë bejaycá jama puerte resjo enjétsamna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjétsobeco.

¹⁰ Chíyeca Pablo chë entšanga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca.”

¹¹ Pero chë soldadëngbe amëndayá Páblëbioye ndoñe ntjoyeunayana; más, chë barcuentsá mandayá y chë barco nduíñbioye aíñe. ¹² Ndoñe tšabá yonjamna, chë barco chora enjétsëmnentše chë uaftena tempëntscuana jëftsemnana; chë causa, nya mo nyëtscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo

Creta luaroca enjamna; y choye jamashënguamna enjamna shinÿe endbetse-
natjëmbambana juachoica tsjuanoicajana y tsmanoicajana.

Mar bëjayiñe puerte uaftena y binÿia tojanóshjango

¹³ Chentšana tonjanontšé tsmanoicana batšá binÿiayana, chíyeca chë entsanga tmonjanjuabó ya yojtsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. ¹⁴ Pero baseftayté chentšana, chë fshantsëngocana tonjanontšé corente jabuache binÿiayana y chë barquëshoye enjëtsoshjajuana. Chë binÿia yojanabaina Nordeste binÿia ca. ¹⁵ Chë barcna nÿe chë bínÿiëbe ponto tonjanontšé uayana; chë binÿia enjëtsobayëjana jama ndoñe quentétsopodena causa, šonjanotocá nÿe ntšamo tojtsebinÿiacá chašúyambama. ¹⁶ Chentšana fsënjánachnëjna Cauda ca uabaina stëtsoicajana, base fshantsënga mar bëjayoca; chiñe ya ndoñe tša jabuache quentétsëbinÿiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama. ¹⁷ Ya chë barquëshoye fsëntanëšëngo orna, chë entsanga lazëjangaca chë barquëshasha tmontsanabatsécaca, más uamorochësha chaotsamnama. Pero chënga monjëtsauatja nderado chë barco chë Sirte ca uabaina cascajuentše nanjëtsánjua; asna, chë barcuentsa ancla tmonjanashëbëútsena, chë barco ndoñe betscó chaondëtsábonjnama, y ntšamo enjëtsanbinÿiaycá fsënjána. ¹⁸ Chë inÿe yëfsana y chë binÿiayana cabá jabuache enjëtsemna causa, chënga tmonjanontšé chë barcuentsa uasmanëshangá jtsëshbuëtsetsana; ¹⁹ y unga tianoye bëngnaca šonjanotocá, cach bëngbe cucuátšeca, chë barcuentsa soyënga buyeshoye jtsëtšanana. ²⁰ Baytentscuana bënga ndoñe chibiatanobená jinÿana ni shinÿe, ni estrellatëmënga, tša tonjëtsëibetata causa; y tša jabuache enjëtsëbinÿiaye causa, bënga ya ndoñe quefstëtsanobatmana chentšana jótsbocana.

²¹ Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoeyuná y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nÿa nÿetsá matmënjobuëtše. ²² Pero mora ngmënaca ndoñe matsmëñëngana; masque chë barco echantsenatjëmba, tšëngaftanguentsá ndocná queochatóbana. ²³ Ibeta canÿe ángel šonjëbëbocna; Bëngbe Bëtsá, ndabia atše sëndmëna y nda sëndësverena, cha tbojichmó; ²⁴ y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsca quem barcuñe ajnënga jobanámentšana cha echanjatsebacá ca.’ ²⁵ Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbocna. ²⁶ Pero mora entseyta canÿe fshantse mar bëjayiñe chašúshejanguama ca” —cha tonjanëyana.

²⁷ Canÿe ibeta, uta semana fsënjánana chentšana chë Adriático ca uabaina mar bëjayiñe fsënjëtsemna, y nÿe ínÿoye y ínÿoye chë binÿia šonjëtsëyambaye. Y mo tsëntseto yojëtsemna orna, chë barcuentsa trabájayënga tmojanjuabó ya fshantse béconana imojëtsemna ca. ²⁸ As chënga tmonjanmedidá ntsachetsá chë búyeshe buatjoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canÿsëfta metro tonjanóbocna. ²⁹ Chënga monjëtsauatja nderado bëts ndëtšbëngaca nanjëtsántšëtjama; asna, chë barco stëtsoicajana canta ancla buyeshoye tmonjanashëbëútsena, chë barco ndoñe más chaondëtsábonjnama,

y tša monjétsseboše betscó chaobínýnama. ³⁰ Chéntsçuana, ché barcuentsá trabájayénga tmojánbošena chentšana jtsachetana; chamna, chénga tmojanontsé ché canouše buyeshoye justjanguana, pero chca imojétsama, mo ché anclénga ché barco natsanoica cuafstséstjajuancá. ³¹ Pero Pablo ché soye tojáninýe, y ché soldadéngbe améndayábioye y ché soldadéngbioye tonjanéná y mēntšá tonjanéyana: “Ché barcuentsá trabájayénga cach quem barcuentsé ndoñe chamonjoquedase, tšéngaftanga ndoñe quešmochatobenaye muentšana jótsbocama ca.”

³² As, ché soldadénga tmonjána y ché canoušentsá lazéjénga tmontsantétsetse y buyeshoye chése tmontsantsatše.

³³ Enjétssebinýana ora, Pablo nýetscanga tonjanaimpadá ndayánaca chamoséngama, mēntšá jáuyanése: “Ya uta semana entsemna y tšéngaftanga ni mo batšatema chešmatamaná, y tondaye chešmatsbmuananga.

³⁴ Diosmanda, masque nýe mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵ Pablo, chca tonjánayanentšana, canýe tandése tonjanca y nýetscangbe delante Bēngbe Bētsábioye tbontanchuá. Chorna, tonjanjatá y tonjanontsé jasama. ³⁶ Chentšana nýetscanga tmonjanenñemó y chéngnaca tmonjanse.

³⁷ (Ché barcuentsé nýetscanga fsēnjamna uta patse y canýsēfta bnētsana y chnénguanénga.) ³⁸ Ntšamo imnabošcá tmonjansentšana, buyeshoye trigo tmontsanashaná, chca, ché barco ndoñe yapa chaondétsautama.

Ché barco tojtsanenatjēmba

³⁹ Ya tonjanbinýna ora, ché barcuentsá trabájayénga ndoñe quemēntétsetatsēmbo ndaye fshantse chentše bétsemnama, pero tmonjáninýe ché fshantsentse canýe luare jachañe, ché bėjaye ché luaroye omashjuanentse, y chiñe canýe chēnyañe enjamna; as chénga tmonjanjuabó jarrepárana nderado cuanjobenaye chējana ché barco ché fshantsoye juyambana. ⁴⁰ Asna, ché anclentsá lazéjénga tmontsantétsetse y ché anclénga buyeshoye tmontsanboshjuana, y ché timón, ché barco juyambama oservena soyentsá uabatsēcnējéngnaca tmontsanjafjoná. Chorna, ché barcuentsá natsanoica niñēšiñe entšējua tsbanánoye tmontanēšēngo, y ché binýia tonjanma ché barco chaontsé ché chēnyoye juabéconama.

⁴¹ Pero ché barco canýe luaroye tonjánashjango, y chentše ché bėjaye catatoicajana enjetsobuá y ché barco cánýentše, bētscá cascajo buyeshiñe binýnentše tontsanajo. Ché barcuentsá natsanoica lado ché cascajuñe entsanajuena, ndócnoye juabónjuama ntsopodencá, y ché stētsóica lado puerte entsanashatiyíná y lempe entsanandbiamná, yapa binýia causa y búyeshe chentše enjétsojantšetaye causa.

⁴² Chora, ché soldadénga tmonjanjuabó ché utámenénga jtsébáyana, jachbabēse chénga ndoñe chamondétsachetama. ⁴³ Pero ché soldadéngbe améndayá inaboše Pablo jatsbocama, y chíyeca ché soldadéngbioye ndoñe chenatanalesenciá chca jamana; y tojanmandá nýetscanga ché jachbabama obenéngna natsana ché buyeshoye joshbuetšana tsachoye chamuashjanguama, ⁴⁴ y ché ínýengna tablēshēnguiñe o ché barcuentsá pedazēnguiñe chamoshbuetšama. Y chca, nýetscanga fsēnjanobená tšabá y ndocá ntjapasacá fshantsoye jashjanguama.

28

Pablo Malta luaroca

¹ Ya nýetscanga fshantsoca tšabá fsēnjétssemna ora; fsēnjántatsēmbona ché luare Malta ca yojanabaina. ² Ché luarentšá entsanga bēngaftaca

corente tšabá mándbomnënga monjëtsemna; canÿe iñeshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtsešesna. ³ Pablo tojanatbaná básefta buashana chamesëfjënga y chë iñeshoye enjëtsešacjnaye ora, canÿe mëtšcuaye tojánbocna y enjetsachaye, chentše yapa obonÿaye causa, y Páblëbe cucuatšinë tontsanonjã. ⁴ Chë luarentša entsanga, chë mëtšcuaye Páblëbe cucuatšinë yojtsajonÿanama tmonjáninÿe ora, monjëtsešatsësnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

⁵ Pero Pablo tontsanenacuestëtoná y iñeshoye chë mëtšcuaye tbontsantsatše y Pablo ndocá chenatanpasá. ⁶ Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtsanjuabnaye y tmonjanontšë ichámuana Pablo canÿe dios inamna ca.

⁷ Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. ⁸ Chë tempo, Públiëbe taitá šocá jutsnëshañe inajájona, calentóracá y buiñeca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjëtšatsmëna. ⁹ Chca tonjanopasá chentšana, chë luarentša inÿe šoquënga Páblëbioye monjánajna y cha enjánashnaye. ¹⁰ Bëtscá tšabe soyënga chentše bëngbiama tmonjanma, y cachiñe játama ya chë barcuiñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

Pablo Romoye tojánashjango

¹¹ Chë fshantsentše mar béjayoca unga ishinÿe fsënjëftsemna, y chentšana canÿe Alejandriocana yojanabá barcuiñe fsënjanenojayé; chë barco nÿets uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catsatcá. ¹² Chentšana, Siracusa bëts puebloye fsënjánashjajna y chentše unga te fsënjëftsemna; ¹³ y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjëtsebinÿiaye, y chca, chë inÿe yëfsana Puteoli puebloye fsënjánashjajna. ¹⁴ Chentše básefta Jesucristbeñe ošbuáchiyënga fsënjánanÿena, y šonjanëbuaja chëngaftaca canÿe semana chentše jëftsajëtanama; y chentšana Romoye fsënjëftsanbocna. ¹⁵ Romoca Jesucristbeñe ošbuáchiyënga ya imojëtsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canÿe luare Foro del Apio y Unga Tabernënga ca uabainóntscoñe. Pablo chënga tonjánanÿe ora, Bëngbe Bëtsá tbontanchuá y puerte añémoca enjëtsemna. ¹⁶ Romoye fsënjánashjajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canÿe soldado chabotsebojanÿama.

Ndayá Pablo Romoca tojanma

¹⁷ Choye fsënjánashjajnantsana unga tianoye, Pablo tonjanmandá chentše inmoyena judiënga más uámanënga chamobéconama; y nÿetscanga ya tmojánenefjna ora, cha tojanëyana: —Catsátanga judiënga, masque atše tondaye chiyatsma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalenoca šmonjanishache y romanëngbe cucuatšinë šmonjánboshjona. ¹⁸ Chë

romanënga lempe šmonjantjá chentšana, monjëtseboše atše jëtšboshjonana, er ndocna bacna soye chemátaninÿena atše jóbanama chašotsemnana. ¹⁹ Pero chë judiënga ndoñe quemtëtseboše atše chašmuatsboshjonama; chíyeca, šonjanotocá jáimpadana cach Romoca bëtš uámana mandado cháuyana atše tšabá o ndoñe tijanmama, masque atše tondaye quetsátšbomna, cach atšbe luarentša entšanga, judiëngbe contra jayanama. ²⁰ Chíyeca, atše tčbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanëyana.

²¹ Chora chënga tmojanianyana: —Bënga ni mo canÿe tsbuanácha Judeocana fchiyatáyëngaca acbiama noticiëngaca, y ni canÿe catšata judío, chocana moye ashjajnënguentšá, ndocna bacna soye acbiama chešnatacuntá. ²² Bënga fsëntseboše jouenana ntšamo aca cojuabnama, er ntšamo Jesucristbe ustönëngbiama fstsëtátšëmbcá, entsemna ana nÿets luarenache chëngbe contra entšanga imojtsichamo ca.

²³ Asna, canÿe tescama Pablo tmojanianyana chca chaotsemnana; y chë tena, ba entšanga chë Pablo posada inabomnoye tmojanobeconá. Y cachëscana tojanjéтанэntscuana, Pablo entšanga yojanëtsëtná Bëngbe Bëtšabe amëndayama, ndayama cha ininÿe y inatátšëmbo; y yojtsentšena chënga jáyënjanama Jesúsbeñe chamotsošbuáchema, Moisesbe leyënguentšá soyëngaca y Bëngbe Bëtšabe juabna oyebuambnayëngbe uabemana librëšangañe soyëngaca. ²⁴ Báseftanga aíñe imojtsošbuáchiye ntšamo Pablo yojtsanëtsëtnacá ndegombre bëtsemnana, pero ínÿengna ndoñe. ²⁵ Nÿetscanga ndoñe cachcá montsanjuabnaye causa, tmojanontšé chentšana jésebocanana. As Pablo tojanëyana: “Nÿets razónaca chë Uámana Espíritu tšëngaftangbe taitanga tojanëyana, Bëngbe Bëtšabe juabna oyebuambnayá Isaiásbiajana, mëntšá:

²⁶ Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

²⁷ Muentša entšanga ainánaca josértama ndoñe quemátšboše causa, chënga nduauenanënga montsemna y nduabinÿnëngnaca; chënga bomínÿeca ndoñe chamondobená jinÿama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjätsebacama ca.’ ”

²⁸ Pablo chora mëntšá tojanëyana: “Ndegombre šmochtsetátšëmbo, cach quem Bëngbe Bëtšabe buayenana soyënga entšanga bacna soyënguentšana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.” ²⁹ (Pablo chca tojánayana ora, chë judiënga chentšana imojésebocana y tša imojtsenatsëtnaye.)

³⁰ Pablo uta uata chentše tonjanoquedá canÿe uántšamena yebnentše; y nÿetscanga cha jauatsëtsayama monjánajnënga cha enjanëbuájajana.

³¹ Nÿetscangbe delante puerte añémoca entšanga enjanabuayiyiná Bëngbe Bëtšabe amëndayama, y enjanabuatambá soyënga Bëngbe Utabná Jesucristbiama, y ndocna Romoca mandayá quebënjatanauyá chca jtsamama.

Romanos

Pablo Romoca ošbuáchiyënga jacheuayama

¹ Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

² Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëtsanábema Bëngbe Bëtsabe uabemana palabrenguiñe. ³⁻⁴ Chë tšabe noticiëngna, chabe Uaquiñá Bëngbe Utabná Jesucristbiana jtsóyebuambnayana. Entšá quetsomñecana, tojanonýná canye rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

⁵ Chábeyeca, Bëngbe Bëtsá atše canye bëtš soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyëts luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. ⁶⁻⁷ Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiana sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

Pablo tša inaboše Roma bëtš puebløye jama

⁸ Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentšabiana, er nyëts quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. ⁹ Bëngbe Bëtsá, nda nyëts ainánaca sëndëserveda, tšabe noticiënga chabe Uaquiñabiana abuayinayañe, endëtatšëmbo atše nyëts tempo Bëngbe Bëtsáftaca stsencuénta ora, tšëngaftangbiana sëndëtseimpadanama; ¹⁰ y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. ¹¹ Er atše tša sënjëseboše tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëtš añemo chašmotsebomnama, y Jesucristbeñe corente chašmotsošbuáchema; ¹² o más tšabá jayanamna, tšëngaftanga y átšeftaca mochjenájabuache ainaniñe bëtš añemo jtsebomnama, tšëngaftanga y átšnaca Jesucristbeñe tša imošbuachéyeca.

¹³ Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero mëntscoñama ndoñe tsjobenaye. Atše sëntseboše ndayá chayobená jamana ínýenga tšëngaftangbioca Jesucristbeñe chamotsošbuáchema, ntšamo ínýengbeñe ndoñe judiëngbeñe tonjopasacá. ¹⁴ Atše Jesucristbiana canye oservená sëndmëna, y chíyeca nyëtscángaftaca obligaciónaca sëntsemna, chë pueblënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. ¹⁵ Chíyeca atše tša sëntseboše tšëngaftanga chë Romoca šmoyenëngnaca chë tšabe noticiënga jábuayenama.

Chë tsabe noticiënga Bëngbe Bëtsabe obenana jtsinÿanÿnayana

¹⁶ Atse ndoñe quetsátëuatja chë tsabe noticiënga jtsabuayiynayama, er chë noticiënga jtsinÿanÿnayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnana, natsana chë judiënga chca ošbuáchiyënga, pero chë ndoñe judiëngnaca. ¹⁷ Er chë tsabe noticiënga jtsinÿanÿnayana ntšamo Bëngbe Bëtsá inétsama entšanga chabe bominiñe tsábenga chamotsemnana. Y entšanga chabe bominiñe tsábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrenguiñe endayancá: “Nÿe ndabiamana Bëngbe Bëtsá tojama chabe bominiñe tsábia chaotsemnana, cha Bëngbe Bëtsabeñe betsošbuáchema, cha ndegombre chë nÿetsca tescama yomna tsabe vida echántsebomna ca.”

Bëngbe Bëtsabe delante nÿetscanga culpa bomnënga mondmëna

¹⁸ Bëngbe Bëtsá celocana tojinÿanÿé, chë uabouana castigo, tša tbojetnama entšangbiamana chaotsemnana, ainaniñe bacna juabnënga bomnëngbiamana y chë bacna soyënga amëngbiamana y ndëmuanÿengbiamana, masque Bëngbe Bëtsabe ndegombre soyënga jtsotatsëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. ¹⁹ Bëngbe Bëtsá echanjácastigaye, er ntšamo entšanga imobencá Bëngbe Bëtsabiamana jtsetatsëmbuama soye, chëngaftaca sempre endétsemna. Y chca endmëna, Bëngbe Bëtsá chë soye tojinÿanÿeyeca. ²⁰ Bëngbe Bëtsá quem luare tojanma orscana, entšanga mondesobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnana. Chë soyënga Bëngbe Bëtsabiamana entšanga quemuátobena jinÿana; nÿe jtsetatsëmbuamna aíñe. Entšanga mondobena chë soyënga Bëngbe Bëtsabiamana jtsetatsëmbuana, cachá tojanma soyëngaca. Chcasna, chënga ndoñe quemuátobena jayanana bacna soye tmojama, cha nduabuatma causa ca. ²¹ Chënga Bëngbe Bëtsabiamana mondétatsëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. ²² Chënga jtsichámuana corente osertánënga imomna ca, pero ndegombrna juabna ndbomnënga mondmëna. ²³ Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

²⁴ Chíyeca, Bëngbe Bëtsá cachcá tojónÿa, cachëngbe ainaniñe puerta bacna juabnëngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna.

²⁵ Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

²⁶ Entšanga chca ndoñe tsábá tmonjámayeca, Bëngbe Bëtsá cachcá tojónÿa, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tsábá yomncá, inÿe

shembásengaftaca bacna soyënga jtsamama. ²⁷ Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inye boyabásengaftaca bacna soyënga jtsamama. Chënga chë inye boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

²⁸ Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. ²⁹ Chënga nyetscna bacna soye jtsamana: ainaniñe nyetscna bacna juabna jtsebomnana, nye cachëngbiana bëtscá soyënga jtsebomnana tša jésebošana, y inyëngbioye ntšámnaca jáborlama jtsebošana; chënga nye játsbošana inya tojtsebomna soyënga jtsebomnana, inyënga jtsëbánayana. Mondmëna penzentserënga, inyënga áingñayënga, puerta bacna soyënga inyëngbiana bošënga, y uayátsenayënga. ³⁰ Chënga inyëngbiana podesca jtsóyebuambnayana, Bëngbe Bëtsá jtsáyayana, inyënga jtsóyanguayana, nye cachëngbe soyënga más iuámaca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsetsangbioye ndoñe ntsayauanana. ³¹ Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. ³² Y chënga corente mondëtatšëmbo chca soyënga amëngbiana, Bëngbe Bëtsá chabe leyíñe tojayana jóbanama yojtsëmerecenaca; pero masque chca, chënga nyets tempo chca jtsamana, y oyejuayënga jtsénayana inyënga cachcá tmojtsama ora.

2

Bëngbe Bëtsá echanjama chë ndoñe tšabe soye amënga bëtscastigo chamotsebomnana

¹ Chcasna tsëngaftanga, chë inyënga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tsëngaftanga šmojama soyëngama. Tsëngaftanga chca inyëngbiana šmojtsichamo ora, jtsinyanynayana cach tsëngaftángnaca ndoñe tšabá šmonjamama, y castigánënga jtsemnama cmontsamna, er tsëngaftanga cachëngcá šmojtsiyena. ² Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnama yojtsamna ca cha tojayana ora. ³ Y tsëngaftanga, chë inyënga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentsana šmochjotsbocá ca? ⁴ Bëngbe Bëtsá tsëngaftangbiana corente tšabe juabna endbomna; mora ndoñe quecmátacastigaye, y tsëngaftangaftacna puerta uantado nye chca endëtsemna. ¿Chama tsëngaftanga cha šmojtsábotena? ¿Ndoñe šmondëtatšëmbo Bëngbe Bëtsá chca corente jtsababuányëshanëse cmojtsénya, tsëngaftanga juabna chašmotrocama y chabe benache chašmuishachama cha yobóseyeca? ⁵ Er tsëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëtscastigo chašmotsebomnana, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëtscastigo chamotsebomnana, y chë tšabe soye amëngna, uacanana soye; y chca echanjama ntšamo ndegombre yomncá, y echanjínyanyiye cha tša tbojetna,

entsanga ndoñe tšabá tmonjamama. ⁶ Chca, chë te, ntšamo cada ona tojéftsemama, Bëngbe Bëtsábentsana echanjóyëngacñe. ⁷ Ndëmuanyënga nyëts tempo tšabá jtsamëse imoyena, y chca imonguá Bëngbe Bëtsá más uámanënga chauabiana, cha chëngbiana tšabá chaotsoyebuambná y tšabe vida jtsebomnama chaoma; chë te chëngbiana Bëngbe Bëtsá echanjama, chë nyëtsca tescama yomna tšabe vida chamotsebomnama. ⁸ Inyënga imoyena, nyë cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyëtsca tescama castigánënga jtsemnana chënga yojtsamna ca. ⁹ Bëngbe Bëtsá echanjama, chca amëngna puerte chamosufrima y lastemcá chëngbiana chaotsemnana, er yapa tsetšënanana chëngbiana echanjëftsemna; chca echántsemna chë chcángbeñe judiënga imomnëngbiana natsana, y ndoñe judiëngbiámnaca. ¹⁰ Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiana corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiana natsana, pero ndoñe judiëngbiámnaca.

¹¹ Er Bëngbe Bëtsabiama nyëtscanga cachcá monduámana. ¹² Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojtsamna jamama chauyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca. ¹³ Chca endmëna, er Bëngbe Bëtsá ndoñe queonybatsma entsanga chabe bominyiñe tšábënga chamotsemnana, nyë ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse. ¹⁴ Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinyanynayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chauyanama. ¹⁵ Ntšamo tmojtsiyencá chënga jtsinyanynayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinyanynayana chënga ntšamo chë leyiñe yomandánama cachcá imojuabnama. Inyë ora, chëngbe juabnënga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyëtscangbiana ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínyanyiye ndayá tšabá o ndoñe tšabá tmonjamama. ¹⁶ Chë te, Bëngbe Bëtsá nyëtscangbiana echanjayana chëngbe juabnëngama y ntšamo tmojamama, ndayá entsanga tempo ndoñe tmonjáninyama; cha chca echanjama Jesucrísoftaca; y chë atše sëndabuayiyná tšabe noticiënga entsichamo ndegombre chca yochtsemnana.

Judiënga y Moisesbe ley

¹⁷ Y mora tšëngaftangbiana, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnayana Bëngbe Bëtsabe ubuáyana entsanga šmomna ca; ¹⁸ tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinýe jobocacayana ndayá más tšabá jamama tojtsemncá. ¹⁹ Tšëngaftanga tša jésejuabnayana,

šmobena ínÿenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binÿniñcá oyenëngbe juabnënga binÿnayëngcá; ²⁰ tšëngaftanga jtsejuabnayana chë ntšamo tšabá yomncá ndosertánëngbiana abuayiynayënga šmomna ca, y mo chë basengcá tondaye nduatsjínÿenëngbiana abuátambayënga ca. Tšëngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. ²¹ Y chcasna, tšëngaftanga chë ínÿenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínÿengbioye jtsabuayiynayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? ²² Tšëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínÿenga tmojtsichamo diosënga yomna ca y jtsadóraryana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana? ²³ Tšëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiana podessa chamotsóyebuambnama, tšëngaftanga chë leyentsa mandënga jobedésama ndocna te ntsebošana causa? ²⁴ Chama, Bëngbe Bëtsabe uabemana palabrenguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

²⁵ Tšëngaftanga ntšamo leyiñe yomandancá šmojtsamëse, Bëngbe Bëtsábenga šmomnama jinÿanÿiyama, chë más delicadentše base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšenënga jtsemnana, tondayama ntoservénana, y chca, tšëngaftanga jtsemnana mo chë más delicadentše base bobachtema ndëtëtšenëngcá. ²⁶ Y chë ndoñe judiënga chë más delicadentše base bobachtema tëtšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entsangcá. ²⁷ Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinÿnama Bëngbe Bëtsábenga šmomnama. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmontsama ntšamo leyiñe iuayancá, ndayá jamama cmojtsamnama.

²⁸ Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canÿe ndegombre judío. Y canÿe entsá ndoñe Bëngbe Bëtsábia ntsemnana nÿe ínÿenga chë más delicadentše base bobachtema tmojatëtšama. ²⁹ Y canÿe entsá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entsá yomnama tojtsinÿanÿnase. Y chca, canÿe ndegombre judío, Bëngbe Bëtsabe entsá yomnama chaotsinÿnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínÿnama. Bëngbe Bëtsabe Espíritu jamana entsá chca ainana chaotsebomnama, ndayá inétsinÿanÿnaye cha canÿe ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entsabiana ichamuá; entsanga ndoñe.

3

¹ Chcase, ndánaca suatjatjaye, as ¿Bèngbe Bètsabe entsá jtsemnama jéftsashjáchama, más tšabá yojtsemna canye judío jtsemnana ca? ¿Base bobachtema chë más delicadentše tètšená jtsemnana beca yojtsámana ca?

² Aíñe, chca jtsemnana corente enduámana y nyetsca soyènguiñe; natsana chjayana, Bèngbe Bètsá, judiënga chabe palabra tojanabanýe, nyetscangbiama chamotsinýenama.

³ Y morna, ¿ndayá yochjopása nderado judiënguentše báseftanga ya ndoñe chca tmonsentsénese? Y chë causa, ¿Bèngbe Bètsánaca yochtsajbaná ntšamo tojašebuachenacá amana? ⁴ ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatsëmbo Bèngbe Bètsá sempre endbétsama ndayá jamama tojašebuachenacá, masque nyetsca entsanga bosterënga chamotsomñe. Er Bèngbe Bètsabe uabemana palabrenguiñe Bèngbe Bètsabiama mëntšá endayana:

Aca ntšamo chacojayana ora, nyetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

⁵ Pero bënga ndoñe tšabe soye montsama ca báseftanga tmojayana ora, Bèngbe Bètsá sempre tšabá inétsamama entsanga más tšabá jinýama tmojt-sobenëse, ¿ntšamo bënga mochjayana? ¿Bënga imojtsobena jayanana Bèngbe Bètsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entsanga jóyebuambayama monduamancá.) ⁶ ¡Ndoñe, ndegombre ndoñe! Ndoñe quemuátobena chca jayanama. Bèngbe Bètsá nyets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nyetsca quem luarentša entsangbiama, ntšamo tmojamcá tšabá o ndoñe tšabá bétsemnama.

⁷ Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bèngbe Bètsá puerte uamaná y bëtsá yomnama jinýanýiyama, y Bèngbe Bètsá sempre ntšamo ndegombre yomncá tojtsamama jinýama entsanga tmojtsobenëse, ¿ndáyeca Bèngbe Bètsá cabá iuichamo ntšamo atše tijamcá ndoñe tšabá yontsemna ca y atše canye bacna soye amá stsemna ca?” ⁸ Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entsanga chámuinýe Bèngbe Bètsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bèngbe Bètsá chca abuatambayënga echanjácastigaye, ntšamo castigánënga jtsemnama imomerecencá.

Ntšamo entsá tojtsamama, Bèngbe Bètsabe bominiñe ndocná tšabia ntsemnana

⁹ Y asna, ¿Bèngbe Bètsá bënga judiënga ínýengbiama más tšabá šonýa? ¡Ndoñe, ndegombre ndoñe! Atše ya sënjinýinýe judiënga y ndoñe judiëngnaca, chë bacna soyënga jamama juabnëngaca mandánënga imomnana. ¹⁰ Er Bèngbe Bètsabe uabemana palabrenguiñe mëntšá endayana:

Ntšamo entsá tojtsamama, ndocná Bèngbe Bètsabe bominiñe tšabia quenátsmëna.

¡Ndoñe, ndegombre ndoñe, ni mo canýa chca quenátsmëna!

¹¹ Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bèngbe Bètsáftaca jtsemnama!

¹² Nyetscanga ndoñe tšabe benache tmojishache y chiñe montsajna.

Chënga nyetscanga Bèngbe Bètsabe bominiñe tondayama quemátoserverna.

Ndocná quenátsmëna ntšamo tšabá yomncá chaotsamama, ¡ni canýa ndoñe!

- 13 Ntšamo tmojtsichamcá puerte bēts bacna soye jtsemnana, mo canye obanabe cuevēshe atēfjnēshe puerte bacá tojtsonguētsecá. Chēnga tmojtsoyebuambná soyēngaca ín̄yēngbiōye jtsaíngñayana. Chē tmojtsichamo soyēngaca puerte bacna soye ín̄yēngbiāma jtsamana, mo canye mēt̄scuaye tbojtseftēt̄se orcá, chē veneno canye ent̄sábīoye jóbana.
- 14 Chēnga, n̄yets tempo ín̄yēngbiāma podēscā jtsichámuana, y sempre jtsóyebuambnayana chē ín̄yēnga nt̄sámnaca jáborlama.
- 15 Siempre jtseprontánana ín̄yēngbiōye nt̄sámnaca jáborlama y jobáyama.
- 16 Chēnga siempre jtsiyenana ín̄yēnga chamotsesufrínama jtsamēse, y n̄ye nt̄sámnaca jtsaborlánana.
- 17 Chēnga ndocna te tondaye ntjamana n̄yetscanga natjēmbana chamotsiyenama;
- 18 Chēnga ndoñe ntsiyenana Bēngbe Bētsabiāma jtsejuabnayēse, cha chē más bētsá n̄yetscangbiāma yomnama ca —chiñe endayana.
- 19 Er bēnga mondētatsēmbo, lempe ntšamo leyīñe iuabemancá, chē leyēngaca mandánēnga imoyenēngbiāma yomnama. Chcasna, chē ley endmēna, Bēngbe Bētsabe delante ndocná chaondobená jayanama, cha ndoñe t̄sabá tonjama, chama ndoñe yonjātatsēmbo causa ca; y endmēna jin̄yan̄iyama, ntšamo tmojamcá t̄sabá o ndoñe t̄sabá bētsemnama Bēngbe Bētsá n̄yetscangbiāma yochjayana ora, n̄yetscanga yojtsamna chabe delante jayanama, ndáyecca ntšamo t̄sabá yomncá ndoñe tmonjama ca. ²⁰ Er, Bēngbe Bētsá ndoñe queochatsma ndocná chabe bominyīñe t̄sabia chaotsemna, ntšamo leyīñe yomandancá cha tojamama; chē ley bēngbiāma jamana, n̄ye bēnga bacna soye tmojamama chamotsetatšēmbuama.

Ntšamo Bēngbe Bētsá inama ent̄sanga chabe bominyīñe t̄sábēnga chamotsemnama

- ²¹ Pero mora, Bēngbe Bētsá tonjin̄yan̄yé ntšamo cha inama ent̄sanga t̄sábēnga chabe bominyīñe chamotsemnama; y Bēngbe Bētsá ndoñe ntjamana canya chabe bominyīñe t̄sabia chaotsemnama, ntšamo ibomncá cha tojtsamama, ntšamo chē leyēnguiñe y mandēnguiñe yomncá. Pero masque mora chca, Bēngbe Bētsá tonjin̄yan̄yé, Moisesbe leyīñe y Bēngbe Bētsabe juabna oyebuambnayēngbe libréšangañe yopodena jin̄yenana chca yochtsemnama. ²² Bēngbe Bētsá jamana ent̄sanga chabe bominyīñe t̄sábēnga chamotsemnama, chēnga Jesucristbeñe tmojtsošbuáchema. Bēngbe Bētsá n̄yetscanga Cristbeñe ošbuáchiyēngbiāma chca jamana, y chabiāma n̄yetscanga cachcá monduámana; ²³ er n̄yetscanga bacna soye tmojama, y chē causa, ndocna ent̄sá tonjobená jashjáchana ndocna bacna soye ndbomná jtsemnama y puerte bētsá jtsemnama, ntšamo Bēngbe Bētsá tojanjuabocá ent̄sanga chamotsemnama. ²⁴ Pero Bēngbe Bētsá chēngbiāma corente t̄sabe juabna bómnyeyeca, mo ndayá cuafjat̄satacá, cha jamana chēnga chabe bominyīñe t̄sábēnga chamotsemnama. Bēngbe Bētsá chca tojanma, Cristo Jesúsbeyeca, ent̄sanga atebácanēnga chamotsemnama y ya ndoñe más bacna soyēnga jamama juabnēngaca mandánēnga chamondētsemnama cha tojanma ora. ²⁵ Bēngbe Bētsá cha tbojanábuayana, chabe buiñe juabuáshanēse y jóbānēse, cha chaotsemna ndábeyeca Bēngbe Bētsá ent̄sanga bacna soyēngama jáperdonama; Jesucristbeñe jtsošbuáchiyēse ent̄sanga jobenayana perdonánēnga jtsemnama. Bēngbe Bētsá chca tojanma, jin̄yan̄iyama cha inétsama ent̄sanga t̄sábēnga chabe bominyīñe chamotsemnama, chē ent̄sanga bacna soyēnga tmojanmama chē tempo ntjatōnyaycá, er cha chē tempo corente uantado chēngaftaca yojtsemna y chēngbe bacna soyēngama ndoñe yonjánacastigaye.

²⁶ Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyenga chabe bominiñe tšábenga chamotsemnana inétsamama.

²⁷ Chcáyeca, entsá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominiñe jabemana, ndoñe ntšamo leyiñe tomandancá cha tojtsamama, sinó nÿe Jesucristbeñe tojtsošbuáchema. ²⁸ Y chca jayanëse, mora bënga tšabá montsetátšëmbo, Bëngbe Bëtsá inétsama canÿe entsá tšabia chabe bominiñe chaotsemnana, nÿe Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

²⁹ ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; ³⁰ er nÿe canÿe Bëtsá nÿetscangbiama endmëna, y cha echanjama chë más delicadentse base bobachtema tëtšenënga imomnëngbiama y ndoñe chcangbiámnaca, chabe bominiñe tšábenga chamotsemnana, Jesucristbeñe tmojtsošbuáchema. ³¹ Chcasna, Bëngbe Bëtsá jamana entsanga chabe bominiñe tšábenga chamotsemnana, Jesucristbeñe tmojtsošbuáchema; ¿chca yojtsayana chë ley nÿe tondayama yondoservena ca? ¡Ndoñe, ndegombre ndoñe! Inÿetšá, chca jamana chë ley más chaotsámanama.

4

Ntšamo Abrahánofaca tojanopasá

¹ Morna Abrahamiama mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeñe ošbuáchiyana bomnentsana. ² Abraham chabe bominiñe tšabia chaotsemnana, ndayá cha tojanmama Bëngbe Bëtsá matënjanmëse, cha matënjanobená entsángbeñe ndayama jtšenábotamnayana, pero Bëngbe Bëtsabe delante ndoñe; ³ er Bëngbe Bëtsabe uabemana palabrenguiñe mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.”

⁴ Canÿe entsá trabajayá, crocénana josháchiñana ndayá tojamama, pero chë crocénana ndoñe nÿe tšetanana ntsemnana, sinó chana jtsemnana ntšamo cha tojtsomerecencá. ⁵ Er menójuabonga, nda tondaye tontsama Bëngbe Bëtsá cháuyanama cha chabe bominiñe tšabia yomna ca, pero aíñe tojtsošbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiama Bëngbe Bëtsá echanjama chabe bominiñe tšabia chaotsemnana, chabe ošbuáchiyama. ⁶ Rey David cachcá chabe librësañe tojánayana, chë ndabiama Bëngbe Bëtsá jayanana chabe bominiñe tšabia chaotsemna ca, masque chabiama chca cháuyanama tondaye tonjamëse. David chca entsabiama tojánayana, cha puerte echantsoyejuaye ca. ⁷ Chabe librësañe mëntšá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga,
chë Bëngbe Bëtsá chëngbe bacna soyënga tojabuajuánanga!

⁸ ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonÿá cha ca!

⁹ ¿David tojánayana nÿe chë más delicadentse base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmënëngbiámnaca. Y muentse tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominiñe tšabia yojamna ca. ¹⁰ Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna

ora? Ndegombre, Abraham cabá ndoñe chca tětšená yontsemna ora. ¹¹ Y cabá chentšana, Abraham base bobachtema chë más delicadentše tětšená yojtsemna; y chca yojamna jinŷanŷiyama, Bëngbe Bëtsá tempo ya chabiana tojánayana cha chabe bominiŷiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinŷanŷiyama Abraham mo taitacá yomnama Bëngbe Bëtsábeñe imošbuachéngbiana, masque ndoñe base bobachtema chë más delicadentše tětšenënga mondmëna. Y cachcá Bëngbe Bëtsá chë ošbuáchiyëngbiana tojánayana, chënga chabe bominiŷiñe tšábenga imomna ca. ¹² Y Abrahámnaca endmëna mo chë taitacá, chë más delicadentše base bobachtema tětšenënga imomnëngbiana, pero aĩne Bëngbe Bëtsábeñe corente jtsošbuáchiyëse imoyenëngbiana, cachcá ntšamo bëngbe bëts taitá Abraham Bëngbe Bëtsábeñe yojtsošbuachecá. Y cha cabá chë más delicadentše base bobachtema ntsetëtšena ora, ya chca yojtsošbuáchiye.

Jtsošbuáchiyëse, ntšamo Bëngbe Bëtsá tojanašebuachenacá jóshjanguana

¹³ Bëngbe Bëtsá tojanašebuachená Abrahambiana y chárentšana entšangbiana, quem luare chëngbiana yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominiŷiñe tšabia yojamna ca. ¹⁴ Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsošservena, y ntšamo Bëngbe Bëtsá tojanašebuachenacá tondaye ntsámanana. ¹⁵ Chë ley juabocnana, Bëngbe Bëtsá puerte etonaná entšanga cháuacastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsošenana chë ndoñe tontsayancá ndoñe ntjamana.

¹⁶ Y chca, Bëngbe Bëtsá Abrahámbioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahámbentšana entšangcá imomnëngbiana; y Bëngbe Bëtsá chca tojanašebuachená, cha chëngbe tšabiana iuantjéšnayeca. Chë mo Abrahámbentšana entšangcá imomnëngbeñe, ndoñe quemnatsmëna nŷe chë ntšamo ley yomandacá imnétsamënga, sinó nŷetscanga chë ntšamo Abraham tojanošbuachecá Bëngbe Bëtsábeñe imošbuachéngnaca. Y Abraham nŷetscanga bëngbiana, Bëngbe Bëtsábeñe ošbuáchiyënga, mo taitacá endmëna. ¹⁷ Ntšamo Bëngbe Bëtsábeñe uabemana palabrënguiñe endayancá, Bëngbe Bëtsá Abrahámbioye ibojtsatsësnaye ora: “Atše sënjama aca ba luariñe entšangbiana atšbe bominiŷiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinŷama ndayá ndocna te tmonjaninŷcá.

¹⁸ Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjásjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Acbentšana entšanga tša mallajta mochántsemna, ndocná queochatobenaye jacúntana ca”. ¹⁹ Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonŷaye ya bëtsanánëjema yojtsemnama, er ya mo patse uata yojtsebomna, y chabe shema, Sara, ndoñe yonjobena šešonga jtsabamnama. ²⁰ Abraham

ndocna te tonjanajbaná Bèngbe Bètsábeñe ošbuáchiyana, y ni mo canye ndoñe yonjanjuaboye chë ntšamo Bèngbe Bètsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bèngbe Bètsábioye ibojtsatschuanaye, ²¹ er cha tšabá inatátšëmbo, ntšamo tbojanšbuachenacá jamama, ndegombre Bèngbe Bètsá obená inamnama. ²² Chíyeca, Bèngbe Bètsá tojánayana cha chabe bominyiñe tšabia yojamna ca.

²³ Pero, chabe bominyiñe tšabia yojamna ca Bèngbe Bètsá tojánayana ora, ndoñe nye Abrahambiana chca ntsóyebuambnayana; ²⁴ ndayá bēngbiámna, ndēmuanyēngbiana Bèngbe Bètsá yochjayana chabe bominyiñe tšábenga imomna ca, bēnga Bèngbe Bètsábeñe imošbuachéyeca; Bèngbe Bètsá, nda tojanma Bèngbe Utabná Jesús cháuatayenama. ²⁵ Bèngbe Bètsá tojanalesencia entšanga Jesús chamóbama, bēnga bacna soyēnga tmojanma causa, y Bèngbe Bètsá tojanma cha cháuatayenama. Bèngbe Bètsá chca tojanma jobenayama, bēnga chabe bominyiñe tšábenga jábiamama.

5

Mora bēnga Bēngbe Bētsabe bominyiñe tšábenga montsemna

¹ Er Bèngbe Bètsá tojama bēnga chabe bominyiñe tšábenga chamotsemnana, bēnga chábeñe imošbuachéyeca; mora tempcá tšabá Bèngbe Bètsáftaca bēnga montsatsmēna, Bèngbe Utabná Jesucristbeyeca. ² Bēnga Crístbeñe mondošbuáchema, cha tojama bēnga chamotsetatšēmbuama Bèngbe Bètsá tša tšabia yomnana, y Bèngbe Bètsábiocana tšabe soyēnga jtse-bomnēse mora chamotsiyenama. Bēnga tša oyejuayēnga jésemnana, er Bèngbe Bètsábeñe jtsošbuáchiyēse mondobátmana cha puerta uámanēnga y bētsétsanga šochjábiamama, batšá ntšamo cachá yomncá. ³ Y ndoñe nye chama bēnga oyejuayēnga jésemnana, ndayá bēnga tmojtseufrina y padecena soyēnguiñe tmojtsajna órnaca. Chca mondbama, er bēnga mondétatšēmbu bēnga tmojtseufrina orna, bēnga juatsjínýana ntšamo uantadēnga jtsemnana padecena soyēnguiñe tmojtsemna ora, Bèngbe Bètsábeñe jtsošbuáchiyēse. ⁴ Bēnga padecena soyēnguiñe tmojtsemna ora, más tšabá uantadēnga jtsemnana mondobénayeca, Bèngbe Bètsá oyejuayá bēngaftaca jtsemnana, padecena soyēnguentšana ndegombre tšabá tmojachnēngo ora. Bèngbe Bètsá oyejuayá bēngaftaca chaotsemnana bēnga tmojama ora, bēnga jtsobenana más jtsobátmanana, ntšamo šojašebuachenacá cha yochjamama. ⁵ Bēnga chca tmojtsobátmanēse, ndocna te nye bonamente quemochatobátmana, er Bèngbe Bètsá šojinýanyé tša bētská cha šuababuánýeshanama. Bèngbe Bètsá chca tojama chë Uámana Espíritbeyeca, y cha endmēna nda Bèngbe Bètsá tbojanichmó bēngbe ainaniñe chaotsemnana jtsemándayama.

⁶ Tempo bēnga tondaye chemuatanobená jamana Bèngbe Bètsabe bominyiñe tšábenga jtsemnana, y chora Cristo tojanóbana bēnga chë bacna soyēnga tmojamēngbe tšabiana, nýa chama tempo yojamna ora. ⁷ Ndoñe paselo quenátsmēna jajuaboyana, ndáyeca canýa nantseprontana jóbanama canýa ntšamo chë leyiñe yomandancá jamama tojtsamanabiama; pero, canýa bētská jtsababuánýeshanēse tšabe soyēnga ínýēngbiana tojtsamabiama, nderádose chabiama jóbanama cuantseprontana. ⁸ Pero Bèngbe Bètsá bēnga šojanýanyé tša šuababuánýeshanama, er bēnga cabá bacna soyēnga ntsamcá imojoyena ora, Cristo bēngbiana tojanóbana.

⁹ Cristo, chabe buiñe juabuáshanēse bēngbiana tojanóbanayeca, Bèngbe Bètsá tojanma bēnga chabe bominyiñe tšábenga jtsemnana. Y chca endmēnayeca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiana chaotsemna ca Bèngbe Bètsá chaojayana ora. ¹⁰ Bēnga

tempo Bëngbe Bëtsá imojanáya; pero cha tojanma bënga cháftaca tempcá tšabá chamotsatsmënana, chabe Uaquiñá tojanóbanayeca. Y mora, bënga natjëmbana cháftaca chamotsemnana ya tojama ora, ndegombre atsebácanënga mochántsemna, chabe Uaquiñá ainá yómnayeca. ¹¹ Y ndoñe nÿe chca, ndayá bënga cháftaca puerte oyejuayënga chamotsemnámnaca Bëngbe Bëtsá jamana, ndayá Bëngbe Utabná Jesucristo bëngbiana tojánmayeca. Y mora, chábeyeca Bëngbe Bëtsá tojama bënga cháftaca tempcá tšabá chamotsatsmënana.

Adán y Cristo

¹² Canÿe entšá bacna soye tojanma causa, nÿetsca entšanga bacna soyënga amënga tmojábocana; y cha tojanóbana, bacna soyënga tojanma causa. Y chca, nÿetsca entšanga entsamna jóbanama, er nÿetscanga bacna soyënga tmojama. ¹³ Bëngbe Bëtsá Moisésbioye chë leyënga cabá nduántšaboshjona ora, entšanga quem luarentse bacna soyënga tmojanma. Pero ndocna ley tontsemna ora, Bëngbe Bëtsá ndoñe ntjatonÿayana entšanga bacna soyënga tmojamama. ¹⁴ Nÿetsca entšanga, Adánbentsana Moisésbentscoñe, nÿetscanga yojánamna jóbanama, ntšamo cach Adán tojanmcá ndoñe tmonjanmëngnaca, ntšamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entšanga mondobena jinÿama, ntšamo chë jabama ibojamná canÿe soyënguiñe yochtsanmëna.

¹⁵ Pero ntšamo chë útata tbojanmcá ndoñe cachca soye quenátsmëna; er Bëngbe Bëtsá entšangbe tšabiana jtsejuabnayëse tšabe soyënga chëngbiana tojanma ora, ndoñe yonjamna mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tšëngaftanga šmondétatšëmbo, nÿe canÿe entšá canÿe bacna soye tojanma causa, cha tojanma nÿetsca entšanga jóbanama chaotsamnana, pero Bëngbe Bëtsá entšangbe tšabiana yajuabnáyeca, más bëts soyënga jamana, chë Adanbe bacna soye entšangbiana bacna soyënga tojanmama. Chca, Bëngbe Bëtsá tojanma ba entšanga bëtscá tšabe soyënga chamotsebomnana; y chca tojama, nÿe canÿe entšá, Jesucristo, tšabe soyënga tojánmayeca. ¹⁶ Chë ba entšanga bëtscá tšabe soyënga chamotsebomnana Bëngbe Bëtsá tojamentšana endóbocana soye, puerte inÿetšá comna, chë entšá Adán, canÿe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebomnana ibojtsemna ca, y nÿetsca entšángnaca chë causa; pero masque nÿetscanga bacna soyënga tmojama, Bëngbe Bëtsá entšangbe tšabiana ndoñe bëndëtsebnatjëmbayeyeca, tojanma entšanga chabe bominiñe tšábenga chamotsemnana y chë bacna soyëngama castigánënga ndoñe chamondëtsemnana. ¹⁷ Ndegombre endmëna, canÿe entšá bacna soye tojanma causa, nÿetsca entšanga jóbanama yojtsamna. Pero puerte más, canÿe entšá Jesucristo tojanma. Ndëmuanÿengbiana Bëngbe Bëtsá tojama bëtscá tšabe soyënga chamotsebomnana, ndëmuanÿengbiana Bëngbe Bëtsá tojama chabe bominiñe tšábenga chamotsemnana, y Bëngbe Bëtsábiocana chca tmojóyëngacñënga, chënga nÿetscanga mochantsiyena bacna soyënga jtseyëñanayëse y nÿetsca tescama mo bëtšëtsangcá; y chca echántsemna ndayá Cristo tojánmayeca.

¹⁸ Y chca, ntšamo canÿe entšá, Adán, canÿe bacna soye tojanmama, Bëngbe Bëtsá tojánayana nÿetscanga bacna soye tmojanma y castigánënga chamotsemna ca; cachcá ntšamo canÿe entšá, Cristo, puerte tšabe soye tojánmayeca, Bëngbe Bëtsá jayanana nÿetscanga imojtsobena chabe bominiñe tšábenga jtsemnana y chë nÿetsca tescama yomna tšabe vida jtsebomnana ca. ¹⁹ Y

ntšamo Bëngbe Bëtsá tbojanmandacá ndoñe chaondëmama canye entšá tojanma causa, nyetsca entšanga bacna soye amënga tmojanobiama; cachcá, ntšamo Bëngbe Bëtsá tbojanmandacá canye entšá, Jesucristo, tojánmayeca, Bëngbe Bëtsá tojanma bëtsá entšanga chabe bominyiñe tšábenga chamotsemnama.

²⁰ Chë ley entšangbe cucuatšini tmojanáboshjona, jinyanÿiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiama yojtsama. ²¹ Chcasna, mora mochjayana, entšanga bacna soyëngaca puerte mandánënga imojamna, y chca, nyetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entšanga chabe bominyiñe tšábenga chamotsemnama, Bëngbe Utabná Jesucristbeyeca chë nyetsca tescama yomna tšabe vida chamotsebomnama; chíyeca mora bënga montsobena jtsiyenama, Bëngbe Bëtsá šojatsatá tšabe soyënga lempe bëngaftaca jtsemnëse.

6

Crístbeyeca bënga tšabe vida jtsebomnana

¹ Y asna, ¿ntšamo mochjayana? ¿šojtsamna jtsiyenana sempre bacna soyënga jtsamëse, chca, Bëngbe Bëtsá šuababuánÿeshanama más chašotsinÿanÿnama, cha más bacna soyënga bënga jtsaperdónayëse? ² ¿Ndoñe, ndegombre ndoñe! Tempo bënga monjaniyena bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjátsjuabnaye ntšamo ndoñe tšabá tontsemncá jatiyenana? ³ Er ndegombre tšëngaftanga šmondétatšëmbo, bënga uabáinënga tmojanoquedá ora, tmonjaninÿanyé bënga Cristo Jesúsëftaca cánÿiñe mo canÿacá bëtsemnama; y bënga uabáinënga tmonjanoquedá ora, enjamna mo bënga cuafjobancá, ntšamo Cristo tojanobancá. ⁴ Bënga uabáinënga tmonjanoquedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entšangcá jtsiyenama, ntšamo Crístoftaca tojanopasacá, cha cháuatayenama Bëngbe Bëtsá tojanma ora, chabe puerte bëts obenánaca.

⁵ Bënga Crístoftaca cánÿiñe mo canÿacá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cánÿiñe mo canÿacá cháftaca mochántsemna, bënga cachiñe vida nyetsca tescama chamotsatsbomnama Bëngbe Bëtsá jtsamëse, ntšamo Cristo cháuatayenama cha tojanmcá. ⁶ Y bënga mondétatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeñe cabá ntsošbuáchiye ora, mora ya ndoñe chca yontsemnama; y chca entsemna mo chë tempsca vida chaóbanama cuafjamcá, Cristo tmojanrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga chamondëtsemnama, mo nyets tempo nÿe inÿabiama oservenëngcá. ⁷ Er canye entšá tojóbanana ora, chë bacna soyënga chábioye ya ndoñe más ntsemándayana. ⁸ Er Cristo tojanóbana ora, mo bëngnaca cháftaca cuafjobancá endménayeca, cháftaca jtsiyenámnaca bënga montsošbuaché. ⁹ Bënga mondétatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama.

¹⁰ Cha tojanóbana, y chë bacna soye jamama juabnënga ndocna te ntjobenayana chábioye jamándana, y ínÿenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtse servénama yomna.

¹¹ Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánÿiñe mo canÿacá jtsemnëse.

¹² Tšëngaftanga cmontsamna, chë bacna soyënga jamama ainanentše šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nÿe cach tšëngaftanga, tšëngaftangbe cuerpiñe tšabá jtsemnana. ¹³ Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiama, y tojanma tšabe vida chašmotsebmomna; y jauyanana nÿetsca tšëngaftangbe cuerpentša soyëngna Bëngbe Bëtsá jaserviama yojtsemna ca. ¹⁴ Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

Ošbuachiyá obligaciónaca jtsemnana ntšamo tšabá yomncá jamama

¹⁵ Y asna, ¿bënga imojt sobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe! ¹⁶ Tšëngaftanga tšabá šmondëtatšëmbo, ínÿabe cucuatšïñe mo nÿets tempo nÿe ínÿabiama oservenëngcá šmojoquedá ora, cha jtsobedecénama, ndegombre tšëngaftanga chë nduiñbiama nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecénama, y chca, chabe bominiñiñe tšábenga jabocanana. ¹⁷ Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiama oservenëngcá šmojamna, bacna soyënga jamama juabnëngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá. ¹⁸ Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiama oservenëngcá šmojabocna, ntšamo tšabá yomncá jtsamama. ¹⁹ Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

²⁰ Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciónaca quešmënjatsmëna ntšamo Bëngbe Bëtsabiama tšabá yomncá játamama. ²¹ ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñiñe nÿetsca

tescama obaná cuaftsemncá. ²² Pero mora, ndoñe quešmátsmëna bacna soyënga jamama juabnëngaca mandánënga, y mora bëtská šmojtsemntšena Bëngbe Bëtsá jtseyeunanana y jtseeservénana. Chca jtsamana, tšëngaftangbiamu puerte tšabá entsemna, er chca, Bëngbe Bëtsabe entšanga šmochántsemna, y cabana, chë nyetsca tescama yomna tšabe vida šmochántsebomna. ²³ Bacna soyënga tcojtsamentšana jóbocnana entšá nyetsca tescama castiganá chaotsemnana, mo Bëngbe Bëtsabe bominyiñe nyetsca tescama obanënga cuaftsemncá; pero, Bëngbe Bëtsá šojtsatšatná soyënguentsana, jóbocnana chë nyetsca tescama yomna tšabe vida jtseebomnana, Cristo Jesús Bëngbe Utabnáftaca cányiñe mo canyáca jtsemnëse.

7

Chë bouamnábentšana ndayá bëngbiamu mochjuatsjinje

¹ Jesucristbeyeca catšátanga, tšëngaftanga šmotátšëmbo ntšamo chë leyënga entšangbiamu inëtsemnana; tšëngaftanga šmotátšëmbo, ntšamo chë leyiñe tojtsayancá canye entšá chaotsamamna, nye chë entšá tojtsainëntscuana chábioye jtsemándayana. ² Chcasna, canye bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canya jtoquédana, chë boyabiamu ndëmandaná ca. ³ Y chca, chë shema inye boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínÿaftaca ingñayá ca. Pero chabe boyá tojtsóbanëse, chë leyiñe endayana chë shemna canya jtoquédana, chë boyabiamu ndëmandaná ca, y cha jtsobenana ínÿaftaca jtobouamayana; y chca tojama ora, boyábioye ínÿaftaca ingñayana ndoñe ntsemnana.

⁴ Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngamu obanënga cuafjoquedangcá, ínÿabe entšanga jtsemnana, Crístbënga, ndabiamu Bëngbe Bëtsá tojanmu cháuatayenama; y chca jtsemnëse, bënga bëtská soyënga ntšamo tšabá yomncá chamotsamamu, Bëngbe Bëtsá jaserviama. ⁵ Bënga chë nye ntšamo cabënga imnabošcá monjanijena ora, chë ley enjanoservenana bëngbe ainaniñe chamotseebomnana bacna soyënga jamamu puerte bëts juabnënga, nye bënga tšabá jtsomñama. Ba bacna soyënga tmonjanmu, y chë causa bënga šonjánamna nyetsca tescamu castigánënga jtsemnana, mo Bëngbe Bëtsabe bominyiñe nyetsca tescamu obanënga cuaftsemncá. ⁶ Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiamu mo canye amëndayacá. Pero mora bënga chë leyamu mo obanëngcá montsemna; chca, bënga ndoñe chamondëtsijenama ntšamo tempo enjamncá, chë uabemana leyëngaca mandánënga, y aiñe tsmëcá chamotsijenama, ntšamo chë Uámana Espiritu iuamcá bënga vida chamotseebomnana.

Bacna soye jamamu juabna tcojtseebomnëse, chë ley jamamu entšá bacna soye chaomamu

⁷ Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamamu. Atše ndocna te matijántatšëmbona ndayá yomna chë “ínÿabioye jtsántšabošana”, “ínÿabioye ndoñe cattsantšaboše ca” chë leyiñe ndoñe matmëñjanábemëse. ⁸ Pero bacna soyënga jamamu juabnënga atše bomna causa tonjanmu, atše puerte chaitsebošamu chë ndoñe šonjamu jtsebošana soyënga; y chca chë juabnëngaca tonjanopasá, atše chë leyënguñe ndayá iuayanamu jtsejuabnayëse. Er ndocna ley tondmëna ora, entšá ndoñe

ntsetatšëmbuana ndayá yomna bacna soye jtsamana. ⁹ Canÿe tempo enjamna, chora atše sënjaniyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnama; ¹⁰ y chora atše sënjántatšëmbona, chë causa šojtsanmëna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá. Bëngbe Bëtsá chë mando tojanma, atše chë nÿetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nÿetsca tescama castiganá jtsemnama. ¹¹ Chë leyentša mandiñe inÿe soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá.

¹² Pero bënga mëntšá mochjayana: chë ley na tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. ¹³ Y asna, ¿quem tšabe soye tojanma atše chašotsemna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nÿetsca entšanga mondobena jinÿana canÿe bacna soye, mo canÿe puerte bëtš bacna soycá.

¹⁴ Bënga mondëtatšëmbo chë ley Bëngbe Bëtsabe ley yomnama, pero atšna nÿe canÿe entšá sëndmëna, canÿa nÿets tempo nÿe bacna soyënga jamama juabnëngaca mandaná. ¹⁵ Ndegombre ndoñe quešnátësertana ntšamo sëntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsogustancá. ¹⁶ Pero chë atšbe ainaniñe stsejuabná ndoñe tšabá tontsemna soye stsamëse, ndayama leyiñe iuayana ndoñe candmëna ntsamana ca, chca atše jtsinÿanÿnayana chë ley ndegombre tšabe soye yomnama. ¹⁷ Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama. ¹⁸ Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama. ¹⁹ Atše ndoñe quetsátama chë tšabe soye ndayá jamama sëndbošcá, pero aiñe sëntsama chë bacna soye ndayá jamama ndoñe sëndbošcá. ²⁰ Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

²¹ Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. ²² Atšbe ainanoca puerte sëntsoyejuá, Bëngbe Bëtsábiocana yóbocana mandëngama. ²³ Pero atše sënjinÿena inÿe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca

yomna mo ndegombre soyca, mo chë bacna soyëngaca mandaná cuaftsemncá.

²⁴ ¡Tša lastema atšbiamá! Chë bacna soye jamama juabnënga átšbeñe entsemánda, y entsama atše chašotsemna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá. ¿Nda nanjobenaye chentsana atše jatsbocama? ²⁵ Nye Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aiñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga sëntsama, ntšamo chë juabnënga šontsemandacá.

8

Ntšamo Bëngbe Bëtsabe Espiritu yomandacá jtsiyenana

¹ Y chca, Bëngbe Bëtsá ndoñe ntjayanana, Cristo Jesúseftaca cányiñe mo canyáca imomnënga, chëngbe bacna soyëngama nyetsca tescama castigánënga jtsemnama yojtsamna ca. ² Er, chë Uámana Espítoftaca mandánënga mondmënayeca, Bëngbe Bëtsá šojatsebacá, bënga chë bacna soye jamama juabnëngaca mandánënga ndëtsemnama, y nyetsca tescama castigánënga ndëtsemnama, mo Bëngbe Bëtsabe bominyiñe nyetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebomnama, cányiñe mo canyáca Cristo Jesúseftaca jtsemnëse. ³ Bëngbe Bëtsá tojanma ndayá Moisesbe ley ndoñe tonjanobenacá, er entsanga mondoyena nye ntšamo cachënga imobošcá, y nye cányënga ndoñe ntšobenana jamana ntšamo tojtsamncá. Bëngbe Bëtsá tojánayana entsángbeñe bacna juabnëngbe mando jtsepochoçama ca, y chama chabe Uaquiñá tbojanichmó. Cha quem luaroye mo canye entsacá tojánabo, canye ainánaca, mo chë entsanga bacna soye amëngbe ainancá, pero ndocna te ni mo canye bacna soye ndoñe tonjëftsema; y tojánabo, chábeyeca entsanga bacna soyëngama perdonánënga chamotsemnama. ⁴ Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nye ntšamo bënga entsanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

⁵ Chë nye cachënga tšabá jtsomñama cachëngbe juabnëngaca imoyenënga, nye sempre jësejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espiritu ainaniñe iuamëndacá oyenëngna, sempre jësejuabnayana tšabe soyënga jamama, ntšamo chë Uámana Espiritu yobošcá. ⁶ Ntšamo chë nye cachá tšabá jtsomñama juabnëngaca mandaná oyenentsana jóboçnana entsá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obaná cuaftsemncá; y ntšamo chë Uámana Espiritu tojtsemandacá oyenentsana jóboçnana chë nyetsca tescama yomna tšabe vida jtsebomnama y ainaniñe tšabe ebionana. ⁷ Chë nyets tempo oyenënga nye ntšamo tmojtsebošcá nye cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntšobenana; ⁸ y chca, chë nye chca bacna juabnëngaca oyenënga, ndoñe ntšobenana jamana ntšamo Bëngbe Bëtsá tšabá tbojtsinýancá.

⁹ Pero tsëngaftanga ndoñe quešmátiyena nye cach tsëngaftanga tšabá jtsomñama cach tsëngaftangbe juabnëngaca, sinó šmojtsiyena ntšamo

chë Uámana Espíritu tsëngaftangbe ainaniñe cmamëndacá, er chë Uámana Espíritu sempre tsëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. ¹⁰ Pero Cristo sempre tsëngaftangbe ainantse vida totsóbomñese, masque tsëngaftangbe cuerpënga yochjopochóca, quem luarentse entsanga bacna soyënga jtsamana causa, tsëngaftangbe espíritu nyets tempo vida echanjesóbomñe, er Bëngbe Bëtsá tojama tsëngaftanga chabe bominyiñe tsábenga chašmotsemnana. ¹¹ Y Bëngbe Bëtsabe Espíritu, Jesús cháuatayenama tojamabe Espíritu, sempre tsëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tsëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tsëngaftangbe ainaniñe iuétsemna.

¹² Chcasna, Jesucristbeyeca catsátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nyë bënga tsabá jtsomñama cabëngbe bacna juabnéngaca; ¹³ er nyë bënga tsabá jtsomñama cabëngbe bacna juabnéngaca šmojtšiyenëse, castigánënga šmochántsemna, mo Bëngbe Bëtsabe bominyiñe obanënga cuaftsemnácá; pero Uámana Espíritbeyeca, chca juabnéngaca nyetsca bacna soyënga jtsamana jtsajbanama šmojobenase, chë nyetsca tescama yomna tsabe vida šmochántsebonna.

¹⁴ Ntšamo chë Uámana Espíritu yomandacá tmojtšamëngna, Bëngbe Bëtsabe básenga jtsemnana. ¹⁵ Er Bëngbe Bëtsá ndoñe tonjama bënga ainaniñe canye espíritu chamotsebonnana, mo nyë inyabiama nyets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebonnana Espíritu jamana bënga Bëngbe Bëtsabe básenga chamotsemnana, y chë Espíritu endama “Atšbe Taitáca” bënga Bëngbe Bëtsá chamotsechembuanama. ¹⁶ Y chë Uámana Espíritu y bëngbe espíritu canye ora jayanana bënga Bëngbe Bëtsabe básenga imomnaca. ¹⁷ Y Bëngbe Bëtsabe básenga mondménayeca, bëngnaca mochanjójyëngacñe ndayá cha chabe básenga jatšatayama tojašebuachenacá; bënga y Cristo cányiñe chë soyënga mochanjójyëngacñe, er bënga inye soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chásuabiamama, ntšamo cach Cristo yomncá.

Bëngbe Bëtsá bëtsétsanga y uámanënga šochjábiamama

¹⁸ Atše ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tsabiama uámanana y buashinjinyanana Bëngbe Bëtsá šochjínjanjyiyama. ¹⁹ Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnana jinyanjyiyama ora. ²⁰ Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canye te, ndëmua ora chë soyënga chaoservema cha yochjamama jsetatšëmbëse, ntšamo quem luare jobojátšama ora chama cha yojanjuabnacá; ²¹ Bëngbe Bëtsá canye te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinjinyanana jtsebonnana, cachcá yochjama lempe chë cha tojanma soyëngaca.

22 Er bēnga mondētatsēmbo lempe ntšamo Bēngbe Bētsá tojanmcá mēntscoñama yomna mo canye shembása šešona jtsebomnama ora tbojtsetsetsama tojtsobēsnaćá; er lempe ntšamo cha tojanmcá entsemna mo tša cuaftsebošćá Bēngbe Bētsá chaomama, chē soyēnga chaoservema ndayama cha tempo tojanjuabocá. 23 Pero ndoñe nye chē lempe ntšamo Bēngbe Bētsá tojanmcá yojtsemna mo chē shembasacá, sinó bēngnaca; y bēnga ainaniñe mondbomna chē Uámana Espíritu, y chē soye endmēna ndayá natsana bēnga tmojanóyēngacñe, chē Bēngbe Bētsá bētsćá soyēnga šochjátsatayentšana; bēnga bēngbe ainanoca tša jesobēsnañana, bēnga chabe básenga chamotsemnama Bēngbe Bētsá chaomama mondobátmanēntscuana, y chca, Bēngbe Bētsá chaoma bēnga ndocna te ndopochócama cuerpēnga chamotsebomnama. 24 Bēnga, Bēngbe Bētsábeñe jtsošbuáchiyēse monjobátmana ntšamo cha tojanayancá chaomama, y chíyeca cha bēnga šojatsebacá; pero ndayama tmobatmancá, ya tojtsēchnējuanama bēnga tmojtsonyase, chora chama ya ndoñe ntjátobatmanēngana. Er ndocná jatobátmanana chē ndayá jinýama ya tojobenacá. 25 Pero ndayama bēnga tmobatmancá, cabá ndoñe jinýama tmontsobena soye tojtsemnēse, bēnga jtsamnana Bēngbe Bētsábeñe jtsobátmanana, uantadēnga jtsemnēse, ntšamo tojayancá Bēngbe Bētsá chaomēntscuana.

26 Uámana Espíritnaca bēnga šochandbētsējabuachana, er bēnga ainaniñe ndoñe corente ntsošbuáchiyana. Bēnga ndoñe quemuátstatšēmbo Bēngbe Bētsáftaca jencuéntana ntšamo ndegombre tšabá yomncá; pero cach Espíritu Bēngbe Bētsábioye bēngbiamna jtsotjanañana, mo chca ora chabe ainanoca tša cuaftsobēsnaćá; y ndayá chca ora tbojtsotjanañamna, bēnga ndoñe ntjobenayana bēngbe palábraca chama jóyebuambayama. 27 Y Bēngbe Bētsana, ntšamo entšanga ainanoca tmojtsebošćá yonýá, y ntšamo chē Espíritu jayanama tojtsebošćá yotátšēmbo, er chē Espíritu chabe entšangbiamna ibotjanañe, ntšamo Bēngbe Bētsá yobošćá.

Bēnga ayēnjanayēngama más tmojábocana

28 Y bēnga mondētatsēmbo, Bēngbe Bētsá nýetsca soyēnguiñe inétsama cha imobobonshánēngbe tšabiamna, ndēmuanýenga cha tojáchembo chabe entšanga chamotsemnama, ntšamo cha jamama yojanjuabnacá. 29 Jesucrístbeñe imošbuachéngbiamna, Bēngbe Bētsá quem luare tojanma orscana yojanjuabná y chēnga tojanabacacá chca chamotsemnama, y chē tempšana tojaninýnaná chēnga chabe Uaquiñacá chamotsemnama; chca, chabe Uaquiñá chē bētsćá catsátangbeñe chē natsaná chaotsemnama. 30 Y chē Bēngbe Bētsá chca tojánabacangnaca, tojánachembo chabe entšanga chamotsemnama; chēngbiamna tojanma chabe bominýiñe tšábenga chamotsemnama, y chēngbiámna yochjama chabe uámanana y obenanentšana chamotsebomnama.

31 Y asna, ¿chē soyēngama ntšamo mochjayana? Co Bēngbe Bētsá bēngaftaca tojtsemnēse, bēnga jáyēnjanama ndocná queochatobenaye ca. 32 Cha tondaye tonjanma chabe Uaquiñá jasúfriama ndoñe chabondētsemnama, sinó tojanalesenciá entšanga chamóba, nýetsca bēngbe tšabiamna. Bēngbe Bētsá chabe Uaquiñáftaca chca tojanmēse, ndegombre Bēngbe Bētsá lempe šochanjátsataye. 33 ¿Nda nanjobenaye jayanama chē Bēngbe Bētsá tojábacacanga bacna soyēnga tmojama y castigánēnga chamotsemna ca? Ndocná; er cach Bēngbe Bētsá endmēna nda tojayana bēnga chabe bominýiñe tšábenga imomna ca. 34 Y asna, ¿nda nanjobenaye jayanama bēnga castigánēnga jtsemnama šojtsamna ca? ¿Cristo Jesús cha yojtsemna? Ndoñe. Cristo, nda bēngbiamna tojanóbana, pero cabá más, ndabiamna Bēngbe Bētsá

tojanma cháuatayenama, y mora Bëngbe Bëtsabe catsbioica yojtsetbemana, jamándama y puerta bëtsá chentše jtsemnana; y choqa, chánaca bëngbiamama Bëngbe Bëtsábioye ibotjanañe. ³⁵ ¿Ndayá nanjobenaye Crístbentsana, chë tša sondababuanÿeshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojt sama ora, tondaye saná shëntsana ora, tondaye entsáyá tmontsábomna ora, o resjo bëngbiamama tojtsemna ora, o bënga jtsëbáyama ínÿenga tmojtseboše ora? ³⁶ Ntšamo Bëngbe Bëtsabe uabemana palabrenguiñe endayancá, canÿe entsá Bëngbe Bëtsábioye ibojauyana ora:

Acbe causa entsanga cada te šontsëtsëtsná bënga jtsëbáyama ca;

entsanga bëngbioye nÿe ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

³⁷ Pero ndoñe; nÿetsca chë soyënguentšana bëngna ayëñjanayëngama más tmonjábocana, cha bënga šuababuánÿeshanayeca. ³⁸ Er atše tšabá sëndëtatsëmbo tondaye yondobena, bënga Bëngbe Bëtsábentsana, chë tša sondababuanÿeshanábentsana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; ³⁹ ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga sondababuanÿeshanábentsana jt-sajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿé bonshánentsana!

9

Bëngbe Bëtsá Israeloca entsanga tojabacacá, uámanënga chamotsemnana

¹ Atše, Crísoftaca cánÿiñe mo canÿacá quetsomñecana, ntšamo sëntsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. ² Ndegombre, atše puerta ngmënáca atšbe entsangbiamama, chë Israeloquëngbiamama sëntsemna y atšbe ainana tša šontsetsetše, chënga Jesucrístbeñe jtsošbuáchiyama ndoñe quemátsboše causa. ³ Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castiganá y Crístbentsana luaroca jtsemnana, atšbe entsanga, chë cach atšcá buiñe bomna entsanga ju-jabuáchama. ⁴ Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamama y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamama yojánboše y ndayá chëngbiamama jamama, y chë ley chëngbe cucuatšinë tojanáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. ⁵ Chënga mondmëna chë bëngbe tempsca uámana bëts taitangbentsánënga, y Crístnaca mo canÿe entsacá, mo canÿe Israeloca entsangbentsacá tojánabo; y cha endmëna Bëngbe Bëtsá, nÿetsca soyënguiñe mandayá. Nÿetsca entsanga nÿets tempo cha chamotsatschuaná. Chca chaotsemna.

⁶ Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nÿetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. ⁷ Ni nÿetsca Abrahábentsana entsanga, ndoñe chabe ndegombre básenga quemátsmëna;

er Bëngbe Bëtsá Abrahámbioye tbojaniyana: “Chë ácbentšana entsanga nÿe Isaácbentšana mochanjabo ca.”⁸ Chca entsayana, bëngna ndoñe šontsamna jtsejuabnayana Abrahámbentšana nÿetsca entsangbiama mo Bëngbe Bëtsabe basengcá; inÿetsá, nÿe chë Bëngbe Bëtsá tbojanšbuachenáyeca Abraham yojánabamna básengbiama cocayé entsemna jtsejuabnayana, Abrahámbentšana ndegombre entsanga bétsemnama.⁹ Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canÿe šešona bochántsebomna ca.”

¹⁰ Pero nÿe nÿetsá ndoñe quenátsmëna. Chë Rebecbe uta básatna canÿe taitá ibnabomna, bëngbe tempsca bëtš taitá Isaac.¹¹⁻¹² Bëngbe Bëtsá, Rebécbioye tbojaniyana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinÿinÿiyama chë básatbentšana canÿa cha tbojánbocacama, Jacob, y ndoñe chë inÿe basa, Esaú, chca jamama tempo cha tojanjuabóyeca. Rebécbioye chca tbojaniyana chë básata cabá ndonÿna ora, y ni canÿe basa cabá ndocna soye ndama ora. Y chca, ntšamo tojanopasacana, tojanopasá chë básatbentšana canÿa y ndoñe chë inÿa chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama.¹³ Ntšamo Bëngbe Bëtsá chabe uabemana palabrenguiñe tojanayancá: “Jacob sënjánbobonshana, y Esaú sënjanáboyënja ca.”

¹⁴ Y asna, ¿ntšamo mochjayana? ¿Bëngbe Bëtsá ndoñe cachcá nÿetscángaftaca endétsemna ca? ¡Ndoñe, ndegombre ndoñe! ¹⁵ Er Bëngbe Bëtsá Moisésbioye tbojaniyana:

Atše sochanjóngmia nda chaitsebošabiama,
y nda chaitsebošá chanjalastéma ca.

¹⁶ Y chca, Bëngbe Bëtsá canÿe entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama.¹⁷ Er Bëngbe Bëtsabe uabemana palabrenguiñe, Faraón chë Egiptoca réybioye cha tbojaniyana: “Atše rey tcbonjábema, tša bëtscá atšbe obenana yomnama nÿetscanga ácheñe chayinÿanÿema, y nÿets luarentša entsanga atšbiama chamotatsëmbonama ca.”¹⁸ Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiama nduauenaná chaot-somñama.

¹⁹ Pero ndánaca tšëngaftanguentšá šuatjatjaye: “Bëngbe Bëtsá chca tojt-samëse, ¿ntšamo cha nantsobena jayanana canÿe entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?”²⁰ Pero, nÿe entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canÿe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”²¹ Chë fshantse soyënga pormayá jtsobenana canÿe fshantsentšana jamana, canÿe matbaja uámana tescama, y inÿajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

²² Bëngbe Bëtsá yojáboše jinÿanÿiyama entsángaftaca tbojánetnama, chëngbe bacna soyëngama; y yojáboše cha puerte obená yomnama jinÿanÿiyama. Chíyeca, chënga tša yojanéuantana, chënga chë ndëmuanÿengbiama Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanÿenga jtsapochócama Bëngbe Bëtsá yojtsanprontana.²³ Y chánaca yojáboše jinÿanÿiyama cha puerte uamaná y bëtšá yomnama. Cha tojama, bënga chë ndëmuanÿenga cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó bënga

uámanënga y bëtsëtsanga jábiamama. ²⁴ Bënga mondmëna chë ndëmuanyënga Bëngbe Bëtsá chama šojánachembo, ínÿengna judío entsanguentsana, y ínÿengna ndoñe judiëngbentsana. ²⁵ Ntsamo chabe uabemana palabrënguiñe, Oséasbe librësañe Bëngbe Bëtsá tojanayancá:

Entšanga ndoñe átšbenga mondmënënga, chënga “atsbe entsanga ca” chantsëbobuatma;

y canÿe luarentša entsanga ndoñe sënjánababuanÿeshanënga, chëngna “atsbe bonshánënga ca” chantsëbobuatma.

²⁶ Y cach luare ndayentše Bëngbe Bëtsá tojánayana: “Tšëngaftanga atsbe entsanga ndoñe quešmátsmëna ca”,

cachentše Bëngbe Bëtsá ainá chënga echanjáuyana “atsbe básenga ca”.

²⁷ Israeloca entsangbiana, Isaías jabuachana tojánayana:

Masque Israeloca entsanga puerta banga chamotsemna, nÿa mo chë mar béjayoca chënÿañe cascajá,

Bëngbe Bëtsá nÿe báseftanga chentšana echanjátsebacaye;

²⁸ er, ndoñe bën y Bëngbe Utabná canÿe y nÿetsca tescama echanjayana,

nÿets quem luarentša entsangbiana ndayá chënga tmojamama tšabá o ndoñe tšabá bëtsemnama,

y chëngaftaca echanjama ntsamo chaojayancá ca —cha tojánayana.

²⁹ Ntsamo Isaías tojanayancá, Bëngbe Bëtsá Israeloca entsangaftaca ntsamo jamama tojanoyebuambá ora:

Bëngbe Utabná, nÿets obenana bomná,

ínÿengna bënga jtsapochócama cha tojanalesenciá ora,

báseftanga bëngbe entsanguentsënga ainënga chamotsomñama ndoñe matënjanmëse,

bënga mora pochocánënga mamojtsemna, mo chë Sodoma y Gomorra pueblëngoca entsangcá ca,

cha nÿetscanga y nÿetsca tescama tojtsanapochócaye ca.

Israeloca entsanga y chë tšabe notiënga

³⁰ Chcasna, mora mëntsá mochjayana: ndoñe judiënga tondaye monjánama Bëngbe Bëtsabe bominiñe tšábenga jtsemnama, pero cha tojanma chënga chabe bominiñe tšábenga chamotsemnama, chënga chábeñe imojtsošbuáchiyama. ³¹ Pero, Israeloca entsanga imojánboše Bëngbe Bëtsabe bominiñe tšábenga jtsemnama, ntsamo chë leyiñe iuayancá jtsamëse; pero ndoñe chca tmonjanobená. ³² ¿Y ndáyeca chca? Co chë Bëngbe Bëtsabe bominiñe tšábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nÿe ntsamo leyiñe iuayancá jtsamëse. Y chca, chëngna Jesús tmojtsanaboté, ntsamo chë Bëngbe Bëtsabe uabemana palabrënguiñe chë tmojtsanábotengbiana endayancá, chëngbiana cha yomna mo chë ndëtsbé ndayiñe chënga jtsojestjamcá ca.

³³ Bëngbe Bëtsabe uabemana palabrënguiñe cha chca tojánayana:

Smochjinÿe, atše sënjama Jerusalenentše canÿa chaotsemna, y cha endmëna mo ndëtsbecá ndayentše chënga mochjojestje,

y canÿe peñëscá ndayëse yochjama chënga chamotsótsatsama;

pero nda chábeñe tojtsosbuaché, ndocna te nÿe bonamente queochátobatmana ca.

10

¹ Jesucrístbeyeca catsátanga, atše nÿets ainánaca sëntseboše y Bëngbe Bëtsá sëntseimpadana, cha Israeloca entsanga cháuatsebacama. ² Atše

sëndétatsëmbo y sentsobena chëngbiana jayanama, chënga puerte mond-boše Bëngbe Bëtsá jasérviana, pero ntšamo chënga yojtsësertancá, ntšamo Bëngbe Bëtsá jasérviana yojtsamnamna, ndoñe quenátsmëna ntšamo ndegombre yomncá. ³ Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tsábenga chamotsemnana, y cachënga tmojúanguango ntšamo jamëse jobenayama Bëngbe Bëtsabe bominyiñe tsábenga jtsemnana; pero ndoñe chca tmonjanobená, chë entsanga chabe bominyiñe tsábenga chamotsemnana ntšamo Bëngbe Bëtsá inetsamcá ainánaca ntjoyëngacñécá. ⁴ Er Cristo tojama entsanga ndoñe chamondëtsama ntšamo leyiñe iuayancá, Bëngbe Bëtsabe bominyiñe tsábenga jtsemnana, chca, chënga chamobenama chabe bominyiñe tsábenga jtsemnana, Cristbeñe jtsošbuáchiyëse.

⁵ Chë Bëngbe Bëtsabe bominyiñe tsábenga jtsemnana bošëngbiana, ntšamo leyiñe iuayancá jtsamëse, Moisés mëntsá tojánayana, chëngbiana tojanábema ora: “Nda tojtsama nyetsca mandënga ntšamo leyënguiñe endayancá, tsabe vida echántsebomna, nyets tempo chë leyëngaca mandaná ca.” ⁶ Mëntsá endmëna ntšamo Bëngbe Bëtsabe uabemana palabrénguiñe iuayana, entsanga chabe bominyiñe tsábenga chamotsemnana ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); ⁷ o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).” ⁸ Ntšamo Bëngbe Bëtsabe uabemana palabrénguiñe iuayancá mëntsá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabréngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. ⁹ Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca. ¹⁰ Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominyiñe tsábenga chamotsemnana; palabréngaca bënga jinýanýiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

¹¹ Er Bëngbe Bëtsabe uabemana palabrénguiñe mëntsá endayana: “Nda Bëngbe Bëtsabeñe tojtsošbuaché, ndocna te nye bonamente queochátobatmana ca.” ¹² Judiënga y ndoñe judiënga atsebácanënga mondmëna cach sóyeca, er canye Utabná nyetscangbe Utabná endmëna, y cha tmojtsotsëmbuanëngbiana, cha bëtscá jtsamana. ¹³ Er Bëngbe Bëtsabe uabemana palabrénguiñe mëntsá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.” ¹⁴ Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiana jóyebuambayama ndoñe tmonjouenëse? ¿Y ntšamo chabiana mochjouena, chabe buayenana soyënga chënga jáuyanama ndocná tontsemnëse? ¹⁵ ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrénguiñe endayancá: “¡Tša tsábá chë buayenánana abuatambayënga tmojáshjajna ora ca!”

¹⁶ Pero nyetscanga chë tsabe noticiënga ndoñe ntjoyeunayana. Cach Isaías mëntsá tojánayana: “Utabná, ¿nda chë mondabuayiyná soyënguiñe yojtsošbuaché ca?” ¹⁷ Chcasna, chë tsabe noticiënga jouenëse, entsanga jobenayana Jesucristbeñe jtsošbuáchiyana; y nda Cristbiana tojtsabuayiynase, entsanga chabe buayenánana jouenana.

18 Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrenguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyëts quem luariñe tojóshjango, y chëngbe palabrenga nyëts luarënguentša entsangbenache tojuáshana ca.

19 Pero cachiñe šcotjá: ¿Israeloca entsanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tsëngaftanga chašmotsíyentšbuašama, chënga chë ndoñe monjamna mo tsëngaftangcá atšbe entsanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

20 Isaíasnaca, Bëngbe Bëtsabiama tojanoyebuambá ora, puerte añémoca tojánayana:

Chë atše ndoñe šmondënguanga, šmonjínÿena;

y chë atšbiama ndoñe mondënotíciangbioye sënjenonÿinÿé ca.

21 Pero Israeloca entsangbiama mëntšá tojánayana:

Nyëts tempo atše tša sënjánama, chënga átšeftaca tšabá tempcá chamot-satsmënama,

pero chënga ndoñe chemátanbošena jouenama, y atšbe contra monjëtsemna ca.

11

Bëngbe Bëtsá, Israeloca entsangbiama tsabe juabna yobomnama tojinÿanÿé

1 Y as mora šcotjá: ¿Bëngbe Bëtsá chabe entsanga tojtsanëbaté? ¡Ndoñe, ndegombre ndoñe! Cach atše canÿe Israelocá sëndmëna, Abrahábentšana entsá y Benjaminbe bëts pamillentšana entsá. 2 Bëngbe Bëtsá chabe entsanga ndoñe tonjubaté, chë tempšana tojánabacacanga. Tsëngaftanga šmondëtatšëmbo ntšamo Bëngbe Bëtsabe uabemana palabrenguiñe endayancá, Bëngbe Bëtsabe juabna oyebuambnayá Elías, Israeloca entsangbe contra Bëngbe Bëtsábioye cha ibojanatsëtsná ora: 3 “Bëngbe Utabná, acbe juabna oyebuambnayënga tmojtšëbaye y acbiama pormana altarënga tmojtsepochochá; nÿe atše vídaca tijoquedá, y chënga montseboše átšnaca jóbama ca.” 4 Y mëntšá Bëngbe Bëtsá tbojanjuá: “Atše canÿsëfta uaranga boyabásenga atšbiama sënjacuedá, Baal ndoñe tmonjadoranga, ndayá entsanga tmojobopormá y imojtsejuabná canÿe dios yomna ca.” 5 Mórncaca cachcá entsemna, judiënguentše báseftanga monduájamna Jesucristbeñe ošbuáchiyënga, ndëmuanÿyënga Bëngbe Bëtsá tojabacacá, cha chëngbiama tsabe juabna bómnyeca. 6 Bëngbe Bëtsá entsanga jabacacayana chëngbiama tsabe juabna bómnyeca; y ndoñe chca ntjamana ndayá entsanga tmojamama. Er ndayá tmojamama Bëngbe Bëtsá entsanga tojabacacase, cha nanjínÿanÿiye cha chca inétsama, ndoñe nÿe chëngbiama tsabe juabna bómnyeca.

7 ¿Y asna? Israeloca entsanga ndoñe chemátaninÿena ntšamo Bëngbe Bëtsabe bominÿiñe tsábenga jtsemnana, pero chënguentšënga básefta bocacánëngna aíñe tmojanobená. Bëngbe Bëtsá tojanalesenciá chë ínÿyënga Israeloquënguentšana chabe buayenana soyënga ainaniñe ndoñe chamondóyëngacñama; 8 ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama chënga chabe soyëngama jósertama ndoñe

chamondëtsobenama, y mëntscoñama chënga ndoñe quemátobena chabe soyëngama ni jinÿana ni josértana, mo nduabínÿnënga o nduauenanënga cuaftsemnëngcá ca.”⁹ Davídnaca chëngbiama mëntsá tojánayana:

Mo chë entsãnga canÿe fiestentse oboyejuayënga, chëngbe uayayëngbeyeca nÿe ndeolpe ishëchenëngcá,
y mo chë bayëngbiama uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtsbeñe cuaftsojestjá.

Chca Bëngbe Bëtsá chaoma, chëngbe bacna soyëngama;
y cha cháuyana chënga puerte castigánënga jtsemnana yojsamna ca, bacna soyënga tmojama causa;

¹⁰ Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,
y chaoma puerte chamosufrima, nÿets tempo padecena soyënguiñe jtsiyenëse ca —cha tojánayana.

Bëngbe Bëtsá ndoñe judiënga tojatsebacá

¹¹ As mora šcotjá: ¿Israeloca entsãnga Bëngbe Bëtsá ndoñe tmonjanoyená ora, cha tojánayana chënga nÿetsca tescama castigánënga jtsemnana yojsamna ca, ndocna inÿe soye chëngbiama ntsemncá? ¿Chëngbiama yojamna mo chë ndëtsbeñe jojestjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyená causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentsana tmojoshachiñcá montsiyentsbuaše. ¹² Judiënga bacna soyënga tmojanma causa, inÿe entsãnga quem luarentse tmojobená ba tsabe soyënga jtsebomnama. Chë judiënga tmonjanorrebaá causa, chë ndoñe judiënga ba tsabe bendicionënga Bëngbe Bëtsábentsana tmojoshachiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tsabe bendicionënga Bëngbe Bëtsábentsana nÿetsca entsãngbiama echántsemna.

¹³ Ntšamo mora chanjayancá, tsëngaftanga ndoñe judiëngbiama entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebomna ca. ¹⁴ Atše sëntsobátmana, quem trabájoca atše jobenayana jamama chë cach atscá buiñe bomna entsãnguentšënga, ndayá chë ndoñe judiënga Bëngbe Bëtsábentsana tmojoshachiñcá chamotsiyentsbuaše, y chca, ndayá tijamama, Bëngbe Bëtsá chënguentšana báseftanga cháuatsebacama. ¹⁵ Er chë judiënga Bëngbe Bëtsá tojtsanëbaté ora, cha tojanma inÿe entsãnga quem luarentse cháftaca tempcá tsabá chamotsatsmënama; y chënga cha chamojoyeuná ora, corente tsabá echántsemna, nÿa chënga mo obanënga cuabmëncá y cuaftsatayanëngcá.

¹⁶ Nda canÿe arninÿentsana chë natsana tandëse Bëngbe Bëtsabiama joserviama yojtsemna ca tojayanëse, jtsemnana mo nÿetsana chabiama cuaftsemncá. Canÿe betiyentsa tbëtëjënga Bëngbe Bëtsabiama yojtsemna ca canÿa tojayanëse, nÿetsca chë betiyentsa buacuafjëngnaca Bëngbe Bëtsabiama jtsemnana.

¹⁷ Chë judiënguentse báseftanga Jesucristbeñe ndoñe montsanošbuaché ora, tsëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canÿe jena olivo betiyentsana entsãnga tmojatëtse buacuafjëngcá, y tsëngaftangna mo tjoca olivo betiyentsa buacuafjënga, chë jena olivo betiyeshiñe jenëfjëngcá. Mora tsëngaftanga Bëngbe Bëtsábentsana cachca tsabe soyënga chë judiëngaftaca šmontsebomna, mo chë jena buacuafjënga y cachentsa buacuafjënga cach

tbëtējentsana lempe cuaftsoyëngacañcá. ¹⁸ Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebomnana, chë Jesucristbeñe ndoñe montsanošbuaché judiëngbiama yojamna soyënga. Šmochtsejuabnaye, buacuafjëngna chë tbëtējëngayeca vida jtsebomnana, y ndoñe tbëtējënga chë buacuafjëngayeca; cachcá, tšëngaftanga nÿe Bëngbe Bëtsábeyeca chë tšabe soyënga šmojtsebomna.

¹⁹ Pero tšëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentsana jójëngacñana ca.” ²⁰ Ndegombre, chënga Jesucristbeñe ndoñe montsanošbuaché causa, mo buacuetëtšënfjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentsana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebomnana. ²¹ Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmomnënga, cha cach ndoñe quecmochátaperdonaye, chábeñe ošbuáchiyana šmojtšajbanase.

²² Bëtscá šmochtsejuabnaye Bëngbe Bëtsá puerte tšabia yomnana, pero cha tšatjayá yomnámna šmochtsejuabnaye; tšatjayá endmëna chë bacna soyënga tmojtšamëngaftaca, pero tšëngaftangaftacna puerte tšabia. Cha tšëngaftangaftaca chca echántsemna, tšëngaftanga chca chašmojtšomerecënëntscuana; pero ndóñesna, Bëngbe Bëtsá echanjama tšëngaftángnaca mo buacuetëtšënfjëngcá chašmoquedama, chë tšabe bendicionënga Bëngbe Bëtsábentsana ntsoyëngacañcá. ²³ Y ntšamo mora imojtsejuabnacá chë judiënga tmojatrocá y tmojontsé Jesucristbeñe jtsošbuáchiyana, chëngnaca cachiñe chë tšabe bendicionënga Bëngbe Bëtsábentsana mochanjójëngacñe, y mochántsemna mo betiyiñe jena buacuafjëngcá, er Bëngbe Bëtsá becá obenana endbomna jamama ntšamo chë judiënga tempo imojanbomncá cachiñe chamotsatsbomnana. ²⁴ Chcasna, más paselo jtsemnana canÿe jena olivo betiyentša buacuatëtšënfja cach betiyiñe jëtšjena, y ndoñe, chë tjoca olivos betiyentša buacuafja canÿe jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsošbuaché judiëngbiama, jóntšana jtošbuáchiyana y tšabe bendicionënga Bëngbe Bëtsábentsana jójëngacñana, tšëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiama.

Bëngbe Bëtsá nÿetscángaftaca puerte tšabia endmëna

²⁵ Jesucristbeyeca catšátanga, atše sëntseboše tšëngaftanga chašmotsetátšëmbo chë tempo Bëngbe Bëtsá entšanga ndoñe tonjaninÿanyé soyëngama. Atše sëntseboše tšëngaftanga quem soyëngama chašmotsetátšëmbo, chca, tšëngaftanga ndoñe judiënga chë judiëngbiama más uámanënga šmomna ca ndoñe chašmondëtsejuabnana. Ndayá Bëngbe Bëtsá tempo entšanga ndoñe tonjaninÿanyecá, quem soye endmëna: Bëngbe Bëtsá tojalesenciá, nÿe baseftatescama banga Israeloquënga Bëngbe Bëtsabe soyënga ainaniñe ndoñe chamondóyëngacñama; pero chca echántsemna, chë ndoñe judiënguëntše atsebácanënga jtsamnama imomnënga, atsebácanënga chamojtsemnëntscuana. ²⁶ Chca chaojopasá ora, nÿetsca Israelentša entšanga atsebácanënga mochántsemna; ntšamo Bëngbe Bëtsabe uabemana palabrenguiñe endayancá: Entšangbe atsebacayá Israelocana echanjabo,

y echanjama nyetsca Jacobëbentsana entsanga ndoñe más vida chamondëtsebomna, bacna soyënga jtsamëse ca.

²⁷ Y mëntšá endmëna ntšamo chëngbiamu chjašebuachená:

chënga játsebacana, chëngbe bacna soyëngama chajaperdónaye ora ca —chiñe endayana.

²⁸ Chë tšabe noticiënga tmojtsanaboté causa, judiënga Bëngbe Bëtsabe uayayënga mondmëna, chca, tšëngaftangbe tšabiamu chaotsemnama. Pero Bëngbe Bëtsá tojánabacacayeca, chëngnaca Bëngbe Bëtsabe bonshánënga mondmëna, er Bëngbe Bëtsá chëngbe tempsca uámana bëts taitanga chca tojanašebuachená. ²⁹ Chca endmëna, er Bëngbe Bëtsá ndocna te juabna ntjatrócana; nyetscanga chabe entsanga chamotsemnama tojáchembënga, nyets tempo cha echántsabuanýeshana, y echanjama chëngbeñe tšabe bendicionënga chaotsemnama. ³⁰ Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa. ³¹ Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecënënga, chca, Bëngbe Bëtsá chëngnaca cháualastemama. ³² Er Bëngbe Bëtsá tojinýanýé, cha ndoñe ntjoyeunayama juabnéngaca nyetscanga mandánënga imomnama, chca, nyetscanga jálastemama cha jobenayama.

³³ ¡Ndegombre, Bëngbe Bëtsá nyetscangbiamu puerte tšabia endmëna, puerte osertaná y puerte obiashjachá! Ndocná quenátobena ínýënga jábuayenama ndayá Bëngbe Bëtsá jamama inetsejuabnacyá, y ndocná quenátobena corente josértana ntšamo cha inetsamcá. ³⁴ Ntšamo Bëngbe Bëtsabe uabemana palabrénguiñe endayancá:

Ndocná quenátstasëmbo ntšamo Bëngbe Bëtsá inetsejuabnacyá; ndocná quenátobena cha jábuayenama ndayá jamana ibomnama.

³⁵ Ndocná quenátobena ndayánaca cha natsana jshatšëtayana, chë tbo-jatšëtabiamu ndebená cha jatsmënama, y chë ndebënama ndayánaca jtoiyayama chabotsemnama ca.

³⁶ Er lempe cha tojama, lempe cha iútabna, y lempe chabiamu yomna. ¡Nyetscanga nyetsca tescama cha chamotsatschuaná! Chca chaotsemna.

12

Ntšamo jtsiyenëse Bëngbe Bëtsá jtseservénama

¹ Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórana ca, Bëngbe Bëtsá jadórana mo ndayá cuafjobacá y cuafjuatšëmboncá, mo cabá ainá cuafsomñcá. Smochjauyana tšëngaftanga sempre šmochtsentšëna cha servénana y jtsamëse cha tšabá bëngaftaca chaotsemnama. As, chca chašmojtsama ora, ndegombre oyejuayá Bëngbe Bëtsá šmochántsebiamnaye.

² Ndoñe šmatšiyëna jtsamëse ntšamo chë nyë quem luarama enójuabnaye entsanga monduamancá, y smochjaleséncia Bëngbe Bëtsá mo tsëm entsangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga smochanjobenaye jtsejuabnayana y smochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnama.

³ Ndayá Bëngbe Bëtsá atšbiamu tšabá jtsejuabnayëse šojatšëtamu, nyetsca tšëngaftanga cbochjáuyana, ndocná cachabiamu chaondëtsejuabná más uamaná yomna ca, nyë ntsachetšá jtsenójuabnayana ibomna nyëtšá. Más

tšabá, cada ona cachabiamá tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiamá chaotsetrabájama. ⁴ Er, ntšamo bënga cada ona mondbomna canye cuerpo y chë cuerpiñe ba soyënga jtsebmomna, y nyetsca soyënga ndoñe cach soyama cuerpiñe ntoservénana, ⁵ cachcá bënga ošbuáchiyënga, masque bëtscanga imomna, Crísoftaca cánñiñe mo canyácá mondménayeca, bënga mondména mo chabe cuerpo cuaftsemncá, y cada ona cánñiñe mo canyácá nyetscángaftaca.

⁶ Bëngbe Bëtsá tojama bënga cada ona chamotsebmomna ndoñe cachca chabe tšetana obenana, ntšamo Bëngbe Bëtsá cada ona bëngbe tšabiamá inajuabnaycá. Y chabe juábnaca bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. ⁷ Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama. ⁸ Inyënga jañémuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inyëngbiámna chaotsemnana bënga jamama chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inyënga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

Ntšamo bënga Jesucristbeñe ošbuáchiyënga jtsamana šojtsamna

⁹ Inya chašmojtsebomshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama. ¹⁰ Cmontsamna nyetscanga puerte jtsenbobonshánana, Jesucristbeyeca catsátanga quetsomñecá, chë inyënga bëngbiama más uámanënga imomna ca jtsejuabnaye.

¹¹ Ndoñe oyënjayënga šmattsemna, ndayá bëtscá Bëngbe Utabnabiamá šmochtsetrabájaye; ainaniñe corente añemo jtsebmomne, Bëngbe Utabná sempre šmochtseserverna.

¹² Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerte oyejuayënga šmochtsemna; padecena soyënguiñe chašmojtsachñëjuana ora, puerte uantadënga šmochtsemna, y sempre Bëngbe Bëtsáftaca šmochtsencuëntaye.

¹³ Bëngbe Bëtsabe entšanga opresido bomnënga šmochjújabuache, y šmochtseprontana tšëngaftangbe yebnentše posada inyënga júyentšamiamá.

¹⁴ Bëngbe Bëtsá šmochtseimpadana, chë tšëngaftanga chašmosufrima amëngbiama tšabe bendicionënga cha chaotsamama; aínë, cha šmochjaimpáda tšabe bendicionënga chëngbiama chaotsamama, bacna soyënga ndoñe.

¹⁵ Oyejuayënga inyëngaftaca šmochtsemna, chënga oyejuayënga chamojtsemna ora; ngménaca šmochtsemna, inyënga ngmëniñe chamojtsemna ora.

¹⁶ Šmochtsiyena nyetscanga jtsenëyeunanëse. Nye cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

¹⁷ Inyënga bacá chacmojtsaborlana ora, ndoñe šmattsatëchénguaye; corente šmochtsentšena ntšamo nyetsca entšangbiama tšabá yomncá jtsamama. ¹⁸ Ntsachetšá šmojobenacá, lempe šmochtsama natjëmbana nyetsca entšángaftaca jtsiyenama. ¹⁹ Atšbe bonshánënga, inyënga

bacá chacmojtsaborlana ora, ndoñe šmatjama chënga chë causa chamotsesufrínama, ndayá Bëngbe Bëtsá šmochjaleséncia chënga cháucastigama; er Bëngbe Bëtsabe uabemana palabrenguiñe cha tojánayana: “Atse chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.”

²⁰ Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsane, saná cochjacaredáda,

y tbojtsajuendase, cochjuáfsiye.

Chca chacojamëse, cochanjama cha puerte chaotsëuatja ntšamo tcmojaborlana,

y ainana corente chabotsetšena, mo chebana iñbenga chabe bestšasiñe cuafjacacá ca.

²¹ Ndoñe šmatjaleséncia, ntšamo ndoñe tšabá tontsemncá tšëngaftanga chacmayëñjana. Chamna, ntšamo tšabá yomncá jtsamëse, chë ndoñe tšabe soye šmochjayëñjaná.

13

¹ Nÿetsca entšanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca thonjalesenciase, y nÿe Bëngbe Bëtsá tojama amëndayënga obenana chamotsebomnana. ² Chca, chë amëndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna; ³ er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë amëndayëngbioye ntjatebëuatjácá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá; ⁴ er chë amëndayëngna Bëngbe Bëtsabe trabajo amënga mondmëna, tšëngaftangbe tšabiamana. Pero bacna soyënga šmojtsamëсна, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. ⁵ Chíyeca, jtseytana ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondëtsebomnana, ndoñe chca šmontsama causa, sinó chë ainanentšá tšabe juabnënga ntšamo tbojtsëtsësnacá joyeunayama yómnayeca. ⁶ Cachca soyëngama, amëndayëngbiamana impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšena ora.

⁷ Chcasna, tšëngaftanga šmochjáyentšbuachiye ntšamo chënga jtsebomnana tojtsamncá. Chë crocénana entšanga ayëngacayëngbioye, ndaye impuëstnaca šmochtëbuénaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnaye.

⁸ Crocénana inÿa jëtsëntšabuáchiyama chacmojtsamnëse, nÿe ntoyiyacá ndoñe šmatjoquéda, nÿets tempo ndebëngna; nÿe quem soye sempre šmochtsama: nÿetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá. ⁹ Quem mandënga, “acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, inÿa tojtsebomna soye ndoñe nÿe acbiamana cattseboše”, y chë inÿe mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. ¹⁰ Nda ndëmua entšábioye

tbojtsebobonshana, chábioye ndoñe bacá ntjabórlana; chca, ndánaca jtsebobonshánese, entśá jamana lempe ntśamo leyiñe yomandancá.

¹¹ Chë soyënga cmontsamna jtsamana, er bënga mondëtatśëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentśana cuafjofšenangcá, Jesucristo jaserviama jtsentśënese. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntśamo chë Jesucristbeñe jtsošbuáchiyama tmonjanontśé ora enjamnama. ¹² Mora bënga mondoyena canye luarentše bëtscá bacna soyëngaca y ngmenánaca, y chca jtsemnana mo bënga nyets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binýniñe ya jontśamcá. Chýyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyëñjanama bënga jtseprontánese, mo canye soldado jenëuyanama y inya jayëñjanama ba soyënga tojenocjacá. ¹³ Ntśamo šojtsamncá mochtsiyena, ntśamo entśanga ndaye tšabe sóynaca jamama monduamancá, ínýengbiama lempe chaotsinýnëse. Chcasna, ndoñe queśnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsoyencá chca soyënga ndoñe ntsamana, nyetscanga ndoñe cachcá ntsejuabnayama ndoñe ntsamana y ndoñe ínýenga yapa ntsíyentśbuašana. ¹⁴ Chca játamamna, šmochtsiyena jtsamëse ntśamo Bëngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšëngaftanga tšabá jtsomñama juabnéngaca, ndayá tšëngaftanga chašmotsamama chë juabnénguiñe tojtsemncá.

14

Ndoñe šmattsóyebuabnaye inye ošbuáchiyëngbe contra

¹ Chë Jesucristbeñe nye batsatema ošbuáchiyënga tšabá šmochjúbuaja, y chëngaftaca ndoñe šmattsenatsësnaye ndayá aiñe o ndoñe jamana yontsamnama. ² Er básefta ošbuáchiyënga corente imotátśëmbo chënga nye ndayánaca jasama imobenama, pero chë Jesucristbeñe nye batsatema ošbuáchiyëngna, ndocna mëntšena ntseyayana, er chënga jtsejuabnayana aiñe jasana canye bacna soye nántsemna ca. ³ Chë nyetsca saná sayënga ndoñe chamondëtsejuabná chë inye soyënga ndoñe mondëtsesayëngbiama, chë causa chënga más batśá uámanënga imomna ca; y chë ndaye soyënga ndoñe mondëtsesayëngna, chë nyetsca saná sayëngbe contra ndoñe chamondëtsoyebuabná, er Bëngbe Bëtsá chënga tojúbuaja mo chabe entśangcá. ⁴ Tšëngaftanga ndoñe quecmátamna chë ínýabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntśamo tbojtsemncá, er Bëngbe Utabná obenana endbomna cha chca chaotsamama.

⁵ Báseftanga mondmëna, chënga jtsejuabnayana canye te inye tescama más uámana te yomna ca; pero ínýengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátśëmbo, ntśamo yojuabnacá ndáyeca chca ca. ⁶ Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojtšesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

⁷ Bënga ošbuáchiyënguentsana ndocná ainá ntsemnana nÿe cachabiamana, ni jóbanana nÿe cachabiamana. ⁸ Bënga tmojtsiyenëse, Bëngbe Utabnabiamana jtsiyenana; y tmojóbanësna, Bëngbe Utabnabiamana jóbanana. Chca, masque ainënga o obanënga, bënga Bëngbe Utabnábengana jtsemnana. ⁹ Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

¹⁰ As, ¿ndáyeca tsëngaftanguentse báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tsëngaftanguentse jtsichámuana, catšátanga ndoñe uámanënga montsemnana, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. ¹¹ Er Bëngbe Bëtsabe uabemana palabrenguiñe Bëngbe Utabná mëntsá tojánayana:

Ndegombre atše ainá sëndëtsomñe, y chíyeca atše šcojurá, nÿetscanga atšbe delante mochanjoshëntsaméntša atše jadórama, y nÿetscanga šmochanjauyana, “ndegombre aca Bëngbe Bëtsá condmëna ca”.

¹² Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

Ndoñe šmatjama inÿe ošbuáchiyënga bacna benachiñe chamótsatsama

¹³ Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. ¹⁴ Atše sëndëtatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemnana ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiamana cocayé chë soye nÿets tempo jëftsemnana ndoñe tšabe soye. ¹⁵ Tsëngaftanga inÿa becá šmojtsatsëtsná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tsëngaftanga tša šmojtsatsá causa, cha chca soyënga tojase, y chentsana tbojtsebiona puerte bacna soye tojamama, chca, tsëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tsëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiamana Cristo tojanóbana, chë ndoñe ndegombre benachiñe chaoquedama. ¹⁶ Ndoñe šmatjaleséncia ndayá tsëngaftanga tšabá šmétsamama, ínÿenga ndoñe tšabá tsëngaftangbiamana chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora. ¹⁷ Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënanana y ainaniñe oyejuayana jtsebomnana; y Uámana Espíritbeyeca bënga jobenayana chca jamana. ¹⁸ Y nda Crístbioye chca tbojtseserverna, jamana Bëngbe Bëtsá cháftaca oyejuayá chaotsemnana, y entšangbe bominiñe tšabia jtsemnana.

¹⁹ Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga chaújabuache Jesucristbeñe corente jtsošbuáchiyama y ainaniñe bëtscá añemo jtsebomnana. ²⁰ Tsëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá

jasama endmëna; pero ndayá tšëngaftanga šmojasama, inÿa bacna benachiñe chaótsatsama šmojamëse, chë soye cocayé ndoñe tšabá ntsemnana. ²¹ Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aíñe tcojama ora, Jesucristbeyeca canÿe catšata chaojuaboma y bacna soye chaomama tojoservese.

²² Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangaftaca chaotsemna. Canÿe entšá ndegombre oyejuayá jtsemnana, canÿe soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. ²³ Pero canÿe entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

15

Ntšamo ínÿengbiana tšabá tojtsemncá mochtsama, ndoñe nÿe bëngbiana

¹ Bënga, chë Jesucristbeñe corente ošbuáchiyënga, šontsamna chë nÿe batšatema ošbuáchiyënga jujabuáchana, chënga bacna soyënga tmojtsama ora, nÿe batšá ošbuáchiyana bomna causa; y ndoñe nÿe jatsënguayana nÿe ndaye soyëngaca yopodena bënga tšabá jtsemnana. ² Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebomnana. ³ Er Cristo, ntšamo tojanmcá cach ndoñe tonjanma nÿe cha oyejuayá jtsemnana. Inÿetsá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” ⁴ Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabuátambama endmëna. Ndayá bënga chiñe tmojuatsjínÿama, bënga jtsoebenana padecena soyënguiñe tmojtsachñëjuana ora uantadënga jtsemnana, y ainaniñe más añemo jtsebomnana; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. ⁵ Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotsebomnana, cha chaoma nÿetscanga canÿe juabna chašmotsebomnana, ntšamo Cristo Jesús yojanjuabnacá tšëngaftanga jtsejuabnayëse; ⁶ cha chca chaoma, nÿetsca tšëngaftanga mo cánÿiñe cuaftsemncá, y mo nÿetscanga canÿe ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanÿema.

Chë ndoñe judiëngbiámna chë tšabe noticiënga jtsemnana

⁷ Nÿetscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnama. ⁸ Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima; ⁹ y Bëngbe Bëtsá puerte bëtsá yomna ca chë ndoñe judiëngnaca chamuayanámna, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá;

y jacántase chanjayana aca puerta bëtsá y uamaná comna ca.

¹⁰ Inyoca mëntšá endayana:

Puerta oyejuayënga chë ndoñe judiënga šmochtsemna, Bëngbe Bëtsabe bocacana entšángaftaca cányiñe ca.

¹¹ Y ínÿoca mëntšá endayana:

Bëngbe Utabná šmochtsatschuanaye tšëngaftanga ndoñe judiënga, y cha šmochtsatschuanaye nyetsca tšëngaftanga nyets luarënguenache entšangaca.

¹² Y Isaíasnaca Bëngbe Bëtsabe uabemana palabrenguiñe mëntšá tojanábema:

Canÿa Isaíbe entšanguentšana echanjabo,

y Bëngbe Bëtsá chábioye uamaná bochanjábema, nyets luarënguenache entšanga chaotsamëndama,

y chënga chábeñe jtsošbuáchiyëse, chábeñe mochantsobátmana tšabe soyënga chëngbiamama chaotsamama ca.

¹³ Atše, Bëngbe Bëtsá sëntseimpadana, nda inétsama bënga chábeñe chamotsobátmanama tšabe soyënga bëngbiamama chaomama, cha chaoma tšëngaftanga ainaniñe puerta oyejuayënga chašmotsemnana y ainaniñe tšabe ebionana chašmotsebomnana, chábeñe jtsošbuáchiyëse; y Bëngbe Bëtsá chca tšëngaftangbiamama chaoma, tšëngaftanga cada te más chábeñe chašmotsobátmanama, chë Uámana Espíritbe obenánaca.

¹⁴ Jesucristbeyeca atšbe catsátanga, atše corente sëndëtatšëmbo tšëngaftanga puerta tšábënga šmomnana, ndayá cmamnana corente šmotatšëmbuama, y jtsebuayiynayama šmobenámna. ¹⁵⁻¹⁶ Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjca; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebomna chë uámana trabajo, Cristo jtse servénana, chë ndoñe judiënga jtsejabuáchanëse. Atše bachnëcá sëntsoserverna, Cristo stseserverna ora, entšanga tšabe noticiëngama jtsebuayiynayëse; atše chca sëndama chë ndoñe judiënga Jesucristbeñe chamotsobuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiamama canÿe uatšëmbonancá. Chcánaca atše sëndama, ndoñe judiënga ndegombre Bëngbe Bëtsábënga chamotsemnana, chë Uámana Espíritbeyeca.

¹⁷ Chca, atše Cristo Jesúseftaca cányiñe mo canÿacá quetsomñecá, ndegombre sëntsobena jtsejuabnayana ntšamo Cristo jaserviama atše sëndamcá, puerta uámana soye yomnana. ¹⁸ Atše añemo sëntsebomna nÿe chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, ¹⁹ chë Bëngbe Bëtsabe obenana jinÿanÿiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabo jatšase, nyetsca luarënguëjana Iliria luaróntscóñe, Cristbe tšabe noticiëngama nyets luarënguenache entšanga tijabuayená. ²⁰ Atše sempre canÿe soye inÿe soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamama oyebuambnayana tmonjanuena luarënguenache; y chca sënjanma, atše ndoñe játamama inÿa tojanbojatšé trabajo, mo ínÿabe bojatšena yebnentše jajebuama cuafjatontšecá. ²¹ Ntšamo Bëngbe Bëtsabe uabemana palabrenguiñe endayancá, chë tempo Cristbiamama ndoñe tmonjanuenëngbiamama:

Chë ndëmuanyënga tempo ndocná chabiamá tonjanabuayená, chënga tšabá mochanjinÿe ntšamo cha yomnana;
y chë ndocna te chabiamá tmonjouenënga, chabe soyëngama echanjósertaye ca.

Pablo yojanjuabná Roma bëts puebloye jama

²² Y nÿa chë causa, atše ndoñe chiyjobená tšëngaftangbioye jana tšëngaftanga jányama, masque ba soye tsjenojuabná choye jama. ²³ Pero mora atšbe trabajo quem luarënguifne sënjapochocá y tempscana tšëngaftanga jányama tša sëndánbošeyeca, ²⁴ sëntsejuabná mora aíñe chjobenaye choye jama, tšëngaftanga jautsëtsayama, chëjana chajjachnëngo ora, España luaroye chaitšá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentsana Diosmanda šmochjuájabuache, y lempe ntšamo chašojtsajabotcá šmochjätšetaye jobenayama Españoloye ayana jtëtóntšama. ²⁵ Morna Jerusalenoye chanjá, choca entšanga Bëngbe Bëtsábenga imomnënga jaujabuáchama; ²⁶ er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnëjémënga imomnënga jujabuáchama; y oyejuayënga chca tmonjama. ²⁷ Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatsatayëse, chënga vida jtsebomnama chamotsobenama. ²⁸ Y chca, quem trabajo chajjapochocá ora, y chë ndoñe judiënga ošbuáchiyënga lempe tmojätbanana chajjáftsayentšbuachiye ora, chanjontšé Españoloye jama, y tšëngaftangbiajana chanjachnëngo tšëngaftanga jáftsanyama, tšëngaftangaftaca baseftayté jëftsemnama. ²⁹ Atše corente sëntsetatšëmbo tšëngaftangbioye chajjá ora, chjášhango y chjama tšëngaftanga bëtscá tšabe bendicionënga Crístbentsana chašmotsebomnama, tondaye chacmondëtsabuáshebenëntscuana.

³⁰ Jesucristbeyeca catsátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tšëngaftanga cbontsaimpadana, bëtscá chašmotsentšena Bëngbe Bëtsá nÿets ainánaca jtseimpadánama, ntšamo atše sëndbetseimpadancá, cha atše chašotsinÿenama. ³¹ Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalenoquënga Bëngbe Bëtsábenga, tšabá chamóyëngacñama ndayá chënga jujabuáchama chajjáftsayentšbuachiye ora. ³² Y chentsana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená. ³³ Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamotsebomnama, nÿetsca tšëngaftangaftaca chaotsemnama. Chca chaotsemna.

16

Ubuátmënga jacheuayama

¹ Atše sëntseboše tšëngaftanga jáuyanana Febe, Jesucristbeyeca bëngbe uabena, canÿe tšabe entšá endmënama; cha chë Cencrea puebloca enefjuana ošbuáchiyënga endújabuachana. ² Tšabá cha šmochjofja, mo canÿa

Bëngbe Utabnábia quetsomñecá, ntšamo Bëngbe Bëtsabe entsanga entsamncá ínÿengaftaca jenofjana. Smochjuájabuache ntšamo tbojtsajabotcá, er cha banga tonjújabuache; átšbioynaca.

³ Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiamá oservéniñe. ⁴ Jobanámñaca bonjanprontana, atše jatsbocama, ndoñe chašmondóbama. Atše chama chata sentsatacheuaná; y ndoñe nÿe atše, sinó nÿets luarenache enefjuana ndoñe judiënga ošbuachiyëgnaca chca. ⁵ Chë ošbuáchiyënga, chë Bëngbe Bëtsá jëtschuayama chatbe yebnentše jénefnama imuamanëgnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. ⁶ María šmochjachuaye; cha tšëngaftangbeñe bëtscá tojatrabajá. ⁷ Chë cach atšcá judeocata Andrónico y Junias šmochjácheuaye. Chata canÿe ora átšeftaca cárceloye bonjanëtámëna, y Jesucristbe ichmónëngbiamá chata puerte uámanata bonjamna, y atšbiamá más natsana tbojanontšë Jesucristbeñe jtsošbuáchiyama.

⁸ Ampliato šmochjachuaye, atšbe bonshaná, er atšcá cha Bëngbe Utabnáftaca cánÿiñe mo canÿacá bondmëna. ⁹ Urbano šmochjachuaye, chë bëngaftaca Cristbiamá oservéniñe trabajayá; y atšbe bonshana Estáquisnaca šmochjachuaye. ¹⁰ Apeles šmochjachuaye; cha ba soye tonjinÿanjé Jesucristbeñe puerte yošbuáchema; y Aristóbulbe yebnentšëgnaca šmochjácheuaye. ¹¹ Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëgnaca. ¹² Trifena y Trifosa šmochjácheuaye; chata Bëngbe Utabnabiamá puerte bondëtrabajá; y bëngbe bonshaná Pérsidnaca šmochjachuaye; cha bëtscá endëtrabajá, Bëngbe Utabnabiamá oservéniñe. ¹³ Rufo, chë Bëngbe Utabnabiamá uámana trabajayá, šmochjachuaye, y chabe mamánaca; cha mo atšbe mamacá endmëna. ¹⁴ Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca imnënutanangnaca. ¹⁵ Filólogo y Julia, Nereo y chabe uabena, Olimpas y nÿetsca Bëngbe Bëtsabe entsanga chëngaftaca imnënutanangnaca šmochjácheuaye.

¹⁶ Nÿetscanga mo Jesucristbeyeca catšatangcá šmochjenuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. Nÿets luarenache enefjuana Cristbeñe ošbuáchiyënga cmontsacheuaná.

¹⁷ Jesucristbeyeca catšátanga, atše cbontsaimpadana tšabá šmochjuáfšna y cuedado smochtsebmna chë cánÿenga ínÿengaftaca contra chamotsemnama y ínÿenga Jesucristbeñe ošbuáchiyana chamotsajbanama imnëtsamëngbiamá; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana. ¹⁸ Er chca amënga, ndoñe ntsentšënaná Cristo Bëngbe Utabná jtseservénana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabrëngaca chë paselo jáingñana yomna entsanga jáingñana, chëngbe ainaniñe chëngcá chamotsejuabnama. ¹⁹ Nÿetsca entsanga tmojouena, chë Bëngbe Bëtsabe soyëngama ntšamo ínÿenga tcmojabuatambacá, tšëngaftanga corente šmnëtsayaunanama, y chíyeca atše puerte oyejuayá tšëngaftangaftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. ²⁰ Y Bëngbe Bëtsá, nda inëtsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšinë cuafjaboshjoncá.

Atše sěntseimpadana Běngbe Utabná Jesús, chaoma tšabe bendicioněnga tšěngaftangbeñe chaotsemnama.

²¹ Timoteo, chě átšeftaca trabajayá, tšěngaftanga cmontsacheuaná; y Lucio, Jasón y Sosípater, cach atšcá Judeoquěnga, chěngnaca tšěngaftanga cmontsacheuaná.

²² Atšnaca Tercio, chě Páblěbe cuenta quem tsbuanácha uabiamnayá, tšěngaftanga cbontsacheuaná, tšěngaftanga y átšnaca Běngbe Utabnáftaca cánýiñe mo canýacá quetsomñecá.

²³ Gayo cmontsacheuaná; atše Pablo chabe yebnentše posada sěntsebomna, y cha enduamana nýetsca chě muentša ošbuáchiyěnga tšabá júbuajana. Erasto, chě quem pueblentša crocénana bojanýá, tšěngaftanga cmontsacheuaná, y Jesucristbeyeca běngbe catšata Cuártěnaca.

²⁴ Atše, Běngbe Utabná Jesucristo sěntseimpadana, cha chaoma tšěngaftangbeñe tšabe bendicioněnga chaotsemnama. Chca chaotsemna.

Quem tsbuanácha juapochócama, Pablo Běngbe Bětsábioye tbojtanchuá

²⁵ Běnga sempre mochtsinýanýnaye Běngbe Bětsá puerte uamaná yomnama. Cha endobena jamama tšěngaftanga puerte chašmotsošbuáchema; y chca, cha echanjama ntšamo chě běnga fsěndabuayiná tšabe noticiěnguiñe yomncá, ntšamo chě Jesucristbe buayenana soyěnga yomncá, y ntšamo chě Běngbe Bětsá šojinýanýé ndegombre soyěnga yomncá. Nýets tempo měntscoñama, Běngbe Bětsá chě soyěnga entšanga ndoñe tonjinýanýé, y chě causa chěnga chě soye ndoñe ntsetatsěmbuana. ²⁶ Pero morna, ntšamo Běngbe Bětsabe juabna oyebuambnayěnga tmojanabemcá, tojama bětscá entšanga chě ndegombre soyěngama chamotsetatsěmbuama; Běngbe Bětsá, chě nýets tempo vida bomná, tojanmandá entšanga nýets luarěnguenache chě ndegombre soyěngama chamotsetatsěmbuama, chěnga chábeñe chamotsošbuáchema y ntšamo cha yobošcá chamotsamama.

²⁷ Nýe canýe Běngbe Bětsá endměna, y cha nýets osertánana endbomna. ¡Nýetscanga chamotsinýanýná cha puerte bětsá y uamaná yomnama, ndayá Jesucristo tojanmama! Chca chaotsemna.

1 Corintios

Pablo chënga jacheuayama

¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánboşeyeca, cánýiñe chë Jesucristbeyeca catşata Sósteneseftaca, ² quem tsbuanácha sentsabiamná tşëngaftanga chë Corinto bëts pueblocá Jesucristbeñe oşbuáchiyëngbiama; ndëmuanyënga Cristo Jesúseftaca Bëngbe Bëtsá tojábiamá chabe entşanga nye chábioye oservénënga, ndëmuanyënga Bëngbe Bëtsá tojáchembo chabe entşanga chaşmotsemnama, chë nye quem luarama enójuabnaye entşanguentşana luarénënga, Bëngbe Utabná Jesucristbioye tmojotşëmbonëngaftaca, Jesucristo nda yomna Bëngbe Utabná y chëngbe Utabná. ³ Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tşëngaftangbeñe tşabe bendicionënga chaotsemnama, y tşëngaftangbe ainaniñe tşabe ebionana chaşmotsebonnama.

Bëngbe Bëtsá Jesucristbeyeca tojama tşëngaftanga ba tşabe bendicionënga chaşmotsebonnama

⁴ Bëngbe Bëtsá tşëngaftangbiama sempre sëndbëtsatschuanaye, er tşëngaftanga cánýiñe mo canýacá Cristo Jesúseftaca şmómnyeyeca, Bëngbe Bëtsá tşëngaftangbeñe tojajuabó, tşëngaftangbe tşabiamá. ⁵ Chca Crístoftaca şmómnyeyeca, Bëngbe Bëtsá tojama tşëngaftanga chaşmotsebonnama chábensana nyetsca tşabe soyënga, tşëngaftanga obenana chaşmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmësertama. ⁶ Chca, ntşamo cbonjanabuayiynacá mo Jesucristbe ndegombre soyëngcá, tşëngaftangnaca ínýëngbioye tşabá şmojinýanyé ndegombre soyënga bëtsemnama, chë ntşamo jtsiyenama. ⁷ Y chca, Bëngbe Bëtsá chabe entşanga inétsatşatnaye tşabe soyënguentsana tondaye quecmochatabuáshebena, Bëngbe Utabná Jesucristo quem luarentşe yochtónýna tescama Bëngbe Bëtsábeñe jtsoşbuáchiyëse chaşmojtsobátmanëntscuana. ⁸ Cha echanjama tşëngaftanga chábeñe corente chaşmotsoşbuáchema y ainaniñe bëts añemo chaşmotsebonnama, ndayá tşëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nyetsca entşangbiama tşabá o ndoñe tşabá tmonjamama yochjayana te, ndocná chaondobená jayanana tşëngaftanga ndoñe tşabá şmonjama ca. ⁹ Bëngbe Bëtsá nyets tempo jtsamana ntşamo tojaşebuachenacá, y cha endmëna nda tcmojánachembo cánýiñe mo canýacá chaşmotsemnama chabe Uaquiñá Jesucristoftaca, Bëngbe Utabná.

Choca oşbuachiyëngbeñe nyetscanga ndoñe cachcá montsanjuabná

¹⁰ Jesucristbeyeca atşbe catşátanga, tşa cbontsaimpadana, chë ndayá Bëngbe Utabná Jesucristo nyetsca bëngbiama yomnama, tşëngaftanga nyetscanga cachcá chaşmotsejuabnama, y tşëngaftangbeñe ndoñe más báseftanga canýe soye y ínýënga inýe soye chamuatsjuabná. Y aiñe şmochtsiyena mo canýacá, nyetscanga cachcá jtsejuabnayeşe y cachcá jamama jtseboşëse. ¹¹ Jesucristbeyeca atşbe catşátanga, atşe chca sënjayana, er Cloebe yebnentşënga şmonjabëuenaye, tşëngaftangbeñe şmojtsenpenzentserama. ¹² Ntşamo sentsichamcá entsemna ndayá tşëngaftangbentşe báseftanga şmojtsichamo: “Atşe Páblëbe ustoná sëndmëna ca”; ínýëngna imojtsichamo: “Atşna Apólosbe ustoná sëndmëna ca”; ínýënga: “Atşna Pédrëbe ustoná sëndmëna ca”, y ínýëngna: “Atşna Cristbe ustoná sëndmëna ca” imojtsichamo. ¹³ Chca

šmojtsamama, jtsóbocanana mo cada básefta ošbuáchiyënga canyë Cristo tmojtsebomncá. ¿Pablo yojamna nda tmojancrucificá tšëngaftangbe tšabiama? ¿O tšëngaftanga uabáinënga šmomna, atšë jótšëmbonëse, tšëngaftanga atšbe ústonënga bétsemnama? ¹⁴ ¡Bëngbe Bëtsá sëndbëtsatschuanaye atšë ndocná tšëngaftanguentsá tijanábayama; nÿe Crispo y Gáybioye aíñe! ¹⁵ Chca, ndocná quenátobena jayanana, atšë jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá. ¹⁶ Estéfanasbe pamillentsëgnaca sënjanëbaye, pero ndoñe quetsatabouínÿna inÿa tijanábayama. ¹⁷ Er Cristo ndoñe chešnatanichmó inÿenga jubáyama, ndayá chë chabe tšabe noticiëngama entsanga jábuayenama. Ndoñe chešnatanichmó chë soyënga jayanama, corente osertana entsangbe soyënga jtsichámëse; chca, entsanga Crístbeñe chamotsošbuáchema, ndoñe chë atšbe osertánanentsana palabrëngama, sinó nÿe chë buayenánama, Cristo cruzoca bëngbiama tojanóbanama.

Crístbeñe yomna Bëngbe Bëtsabe obenana y osertánana

¹⁸ Quem buayenánana, Cristo entsangbiama cruzoca tojanóbanama, chë pochocánënga jtsemnama tmojtsajnëngbioye jtsinÿanana mo ndoñe corente juabna bomnëngbe soycá; pero bëngbiama, chë Bëngbe Bëtsá nÿetsca tescama šochjátsebacangbiamna, quem buayenánana jtsinÿanÿayana Bëngbe Bëtsabe obenana. ¹⁹ Ntšamo Bëngbe Bëtsá chabe uabemana palabrënguiñe tojanayancá:

Atšë chanjama chë tša osertánëngbe osertánana tondayama chaondëtsoservénama;

y chanjama chë ba soyëngama osertánëngbe osertánana tondayama chaondëtsámanama.

²⁰ ¿Ntsachetsá yojtsámama chë tša osertaná y chë puerte uatsjinÿená tbojayana soyënga? ¿Ntsachetsá yojtsámama chë tša tšabá chë soyëngama juabnáyá, morscá, y inÿengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánanaca tmojayana soyënga tondaye yonduámanama. ²¹ Bëngbe Bëtsá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entsanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínÿnana chábeñe ošbuáchiyënga játsebacana chë bënga fsëndabuayiyiná soyëngama, masque inÿëngbioyna mo ndoñe corente juabna bomnabe soycá jtsinÿanana.

²² Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatsëmbuama. ²³ Pero bëngna Crístbiama entsanga fsëndabuayiyiná, chë inÿenga tmojancrucificabiama. Quem buayenánana chë judiënga ndoñe tšabá ntjéuënanana. Y ndoñe judiënga mondbëtsejuabnaye chca yomna mo canyë ndoñe corente juabna bomnabe soycá ca; ²⁴ pero bëngbiama, nÿetscanga Bëngbe Bëtsá chabe entsanga chamotsemnama šojáchembëngbiamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; ²⁵ er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canyë ndoñe corente juabna bomnabe soycá, pero ndegombre endmëna canyë puerte más osertaná tojama soye, lempe ntšamo entsanga imotatsëmbuama. Y ndayá cha tojamcá masque bángbioye jtsinÿanana mo canyë tondaye obenabe soycá, ndegombre chë soye jtsinÿanÿayana Bëngbe Bëtsá

puerte más obenana yobomnama, nyets obenana ntšamo entšanga imobomnama. ²⁶ Jesucristbeyeca atšbe catsátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnama tcmojánachembo ora. Tšëngaftangbentše nye báseftanga tša osertánënga šmojamna, ntšamo chë osertánana bomnënga imomnama entšanga mondbetsejuabnacyá; y báseftanga šmojamna becá mando atšetanënga o uámana pamillentšënga. ²⁷ Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama. ²⁸ Bëngbe Bëtsá quem luarentšana tojanbocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama. ²⁹ Y chca, Bëngbe Bëtsabe delante ndocná quenátobena jayanana tša bëtsá cha yomna ca. ³⁰ Bëngbe Bëtsá tojama bënga Crísoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bominÿiñe chamotsemnama, chabe entšanga jtsemnama chamobenama, puerte tšábënga cach Bëngbe Bëtsacá, y atsebácanënga chamotsemnama. ³¹ Y chca, ntšamo Bëngbe Bëtsabe uabemana palabrénguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

2

Ntšamo Pablo Cristo crucificanábiama chënga tojanabuayená

¹ Pero, Jesucristbeyeca atšbe catsátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ni chë tša osertánëngbe palabréngaca. ² Y tšëngaftangafataca sënjamna ora, ndoñe quetstétseboše nye ndayíñnaca jatsjuabnayana, ndayá nye Jesucristbeñe, nda bëngbe tšabiama tmojanrucificá. ³ Atše tšëngaftangbeñe sënjamna, mo canÿa ba soyënga jamama ndobenacá, y mo canÿa puerte auatjacá y tbojtsengmëmncá, chabe trabajo jamama ndoñe jobenayama juabnaye causa. ⁴ Ntšamo cbonjanëtsësná y cbonjanabuayiynacá atše sënjanoyebuambá ndoñe chë tša osertánëngbe palabréngaca, tšëngaftanga jáyënjanama chiñe chašmotsošbuáchemá; pero aíñe tcbonjanayënjaná, Bëngbe Bëtsabe Espíritu y chabe obenana tšëngaftanga jinÿanÿiyëse, ⁵ chca, tšëngaftanga Bëngbe Bëtsábeñe chašmotsošbuáchemá, ndoñe nye entšangbe osertánanaca, sinó Bëngbe Bëtsabe obenanama.

Uámana Espíritbeyeca, Bëngbe Bëtsá jamana entšanga cha chamotsábuatmama

⁶ Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsoertánama, chëngbeñe bënga fchandóyebuambaye becá osertánana bomna soyënga. Pero ndoñe quenátsmëna quem luarentša entšanga quem tempo mondbétsichamo soyënga, ni mora quem luarentše amëndayëngbe soyënga, ndëmuanÿënga ndoñe bën y ndocna obenana bomnënga mochanjëftsoquéda. ⁷ Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entšangbioye baytentscuana ndoñe tonjaninÿanÿé soyënga, y chca, entšanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná,

chë soyëngaca bënga mochtsanobena puerte bëtsëtsanga y uámanënga jtsemnana, cháftaca chë nyetsca tescama yomna tšabe vida jtsebmomnana.

⁸ Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga aíñe matënjancrucificá, Bëngbe Utabná nda puerte bëtsá y uamaná yomna. ⁹ Bëngbe Bëtsabe uabemana palabrénguñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinye, ni tonjouena y ni mo tonjajuabó ca.

¹⁰ Pero Bëngbe Bëtsá quem soyënga chabe Espíritoftaca bënga šojanñanyé, er chë Espíritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámna.

¹¹ Entšángbeñe ndocná quenátobena jtsetatšëmbuana ndayá entšabe ainaniñe tomnana, sinó nye chë entšabe espíritu, chë chábeñe yomná. Cachcá, nye Bëngbe Bëtsabe Espíritu jtsetatšëmbuana ndayá Bëngbe Bëtsá tojuabnacá. ¹² Y bëngna, Bëngbe Bëtsábiocana Espíritu tmojóyëngacñe, ndoñe canye quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiama cha jtsejuabnayëse. ¹³ Bënga chë soyëngama fsëndoyebuambná, ndoñe chë quem luarentša entšángbentšana tifjuatsjinye osertánana bomna palabréngaca, sinó chë Bëngbe Bëtsabe Espíritu šojabuatambá palabréngaca. Chca, Bëngbe Bëtsábiocana soyëngama bënga fsëndabuayiná, Bëngbe Bëtsabe Espíritbentšana yóbocana palabréngaca, chë Uámana Espíritu ainaniñe imobomnëngbioye.

¹⁴ Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbiocana yóbocana soyënga, er chë entšabiama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntso benana. Chca endmëna, er entšá jobenayana quem soyëngama jtsetatšëmbuama y josértama, nye chabe ainaniñe chë Uámana Espíritu tbojtsájabuachañe. ¹⁵ Pero nda aíñe chë Espíritu tbojtsebomna jtso benana nyetsca soyënga tšabá jinñyama chabosertama, y ndocná chë Espíritu ndoñe ttondbomná ntso benana josértana ntšamo chë Espíritu bomná yomnana. ¹⁶ Er Bëngbe Bëtsabe uabemana palabrénguñe mëntsá endayana: “Ndocná quenátabuatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

3

Jatrabájama enutanánënga Bëngbe Bëtsá jasérviana

¹ Pero, Jesucristbeyeca atšbe catšátanga, atšbe ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nye cachënga tšabá jtsomñama juabnënga bomna entšangbioycá, mo basetemëngbioycá, Cristbe soyëngama josértama ndobenënga. ² Mo canye bebmácá, chabe basetémbioye nye létšiyë jafšiyana y paselo jabmuánama sananga, chë básetema chcana jasama cabá ndoñe ntso benana causa, cachcá, atšbe chonjanabuatambá Bëngbe Bëtsabiama nye chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; ³ er tšëngaftanga cabá šmojtsama, nye ntšamo cach tšëngaftanga tšabá jtsomñama tšëngaftangbe juabnënga yomncá.

Y tšëngaftanga ínÿengaftaca cabá yapa šmojtsenántšaboše y nÿe ínÿengbiocyte jayénjanama soyënga šmojtsamëntscuana, tšëngaftanga šmojtsama nÿe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nÿe quem luarama enójuabnaye entšangcá. ⁴ Er canÿa: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” tojayana ora, chca jtsamana mo chë nÿe quem luarama enójuabnaye entšangcá.

⁵ Tšëngaftanga chca šmojamama, atše šontsemna tšëngaftanga jájtayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo. ⁶ Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcjinacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. ⁷ Ntšamo, chë jená y chë matënguiñe béjaye buešcjinayá ndoñe yapa ntsámanana chiñe shajuanënga chaóboconama, nÿe Bëngbe Bëtsá aíñe, cachcá, nda Bëngbe Bëtsabiama entšanga jábuayenama trabajo tojabojatsé y nda chentšana tojashjango cach trabajuiñe jóntsama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana. ⁸ Chë jená y chë matiñe béjaye buešcjinayá cach trabajuiñe jtsentšénana, y chatna mo trabajayatcá jtsámanana; y cada ona juácanana ntšamo chabe trabajo tomncá.

⁹ Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts yebncá. ¹⁰ Er Bëngbe Bëtsá atšbe tšabiama jtsejuabnayëse, chë trabajo šojabonÿé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inÿa, mo chë inÿe yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama. ¹¹ Mo chë cánÿabentšana inÿe trabajayacá, ndoñe ntsobenana chë yebna jajebuama tojanbojatsé cha chë yebna chaotsécuatjonama tojanpormañe inÿe soye cachcá chaoservema jatspórmana, cachcá, ndocná chaondëtsabuatambá inÿe soyënga, nÿe ntšamo Jesucristbe soyënga yomncá aíñe, chë ntšamo atše natsana sënjanabuatambacá. ¹² Chë Jesucristbiama más uámana soyënga buatëmbayá jtsemnana mo chë castellano, midio y inÿe uámana soyëngaca yebna jebuanacá; y chë Jesucristbiama nÿe nduámana soyënga buatëmbayana mo chë niñëbenga, but-sajësha y tëshenjñesheca yebna jebuanacá. ¹³ Y Cristo chaojësabo te, Bëngbe Bëtsá echanjínÿanÿiye ntšamo cada cánÿabe trabajo yomnama. Cha chë te íñesheca chca echanjínÿanÿiye, y chë íñesheca, Bëngbe Bëtsá echanjinÿe y echanjínÿanÿiye ndaye trabajo cada ona tojamama. ¹⁴ Ntšamo cada cánÿabe trabajo yojtsámanama jtsetatšëmbuama Bëngbe Bëtsá chaojinÿe ora, cha chabe trabajo aíñe yojtsámana ca queojayanëse, chë tšabe trabajayá Bëngbe Bëtsábiocana canÿe uacanana soye echanjóyëngacñe, er cha jtsemnana mo canÿe entšacá, nda canÿe yebna tojtsejebuana jtsejuinÿama ndoñe paselo tondmëna soyëngaca. ¹⁵ Pero chë te cánÿabe trabajo nÿe batšá yojtsámanama Bëngbe Bëtsá íñesheca chaojinÿanÿese, chora chabe trabajo echántsemna mo chë jtsejuinÿama paselo tomna soyëngaca jebuanabe soyëngcá, chentšana

nÿets yebna jtsejuinÿana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsabiana trabajo tojtsamá, nÿe batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

¹⁶ ¿O tšëngaftanga ndoñe šmondétatšëmbo nÿetscanga cánÿiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tšëngaftanguentše Bëngbe Bëtsabe Espíritu yomnana? ¹⁷ Nderado nda tojama, tšëngaftanga nÿetscanga cánÿiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochoça, er chë Jesucristbeñe ošbuachiyëngcá cánÿiñe imomnënga, jtsemnana mo chë Bëngbe Bëtsabe bëts yebncá, chabe entšanga nÿe chábioye jaserviama; y tšëngaftanga chca šmondmëna.

¹⁸ Ndocná cachá chaondëtsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canÿe puerte osertaná inëtsemnana, cha bontsemna jóbemama mo canÿa ndabiana quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹ Er chë quem luarentša entšanga tša osertánënga imotátšëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrenguiñe mëntsá endayana: “Bëngbe Bëtsá chë tša osertánënga jáyëñanana, ndayá cachënga ínÿenga jáingñama tša osertánánaca tmojtsama soyëngaca ca.” ²⁰ Y mëntsánaca endayana: “Bëngbe Utabná endétatšëmbo chë tša osertánëngbe juabnënga tondayama yondoservënama ca.” ²¹ Chíyeca, ndocná chaondëtsichamo corente uamaná yomna ca, ndaye entšabe ustoná tomnana, er lempe ntšamo šmobomncá, Crístbeñe ošbuáchiyënga bëtsemnana, tšëngaftangbe tšabiana endmëna, y nÿetscanga chë tcmojujabuachëngnaca cachcá. ²² Lempe tšëngaftangbe soye endëtsumñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. ²³ Y tšëngaftanga Crístbënga šmondmëna, y Cristna Bëngbe Bëtsábia.

4

Jesucristbe ichmónëngbe trabajo

¹ Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanyé, pero mora aíñe tojinÿanyé soyënga jtsabuátambayama trabajo bomnënga. ² Chca, nda canÿe trabajo tojtsebojanÿabiamna, chabe mandayá jtsobatmanana cha aíñe tšabe palabra bomná chaotsemnana. ³ Atšbe bariëna, tondaye quenátamana, ntšamo tijamcá šmojinÿe y ndoñe tšabá tijama ca šmojanënëse, o inÿe entšanga cachcá tmojanënëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnana. ⁴ Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tšabá o ndoñe tšabá tijamama. ⁵ Chíyeca, tšëngaftanga ndoñe quecmátamna jinÿana y jayanana ínÿenga ndoñe tšabá tmonjama ca, chë nÿa chama tempo cabá ndóshjanguëntscuana,

Bèngbe Utabná chama chaojésabo ora. Cha chaojésabo ora, puerte tšabá echanjínyanýiye chë iytemencá yomna soyèngama, mo ibetiñe cuaftsemncá, y botamana echanjínyanýiye, mo binýniñcá, ndayá jamama nýe chèngbe ainanoca entsanga tmojajuabocá. Y chora Bèngbe Bètsá cada entsabiana echanjayana tšabe soyènga, ntšamo tbojtsomerecencá.

⁶ Jesucrístbeyeca atšbe catsátanga, chë soyèngama tšabá jábuayenamna, atše sènjama ntšamo Apolos y atše tifjatrabájama botamana chašminýama, y chca sènjama tšèngaftangbe tšabiana, ntšamo bèndata tifjamentsana chašmuatsjínýama jtsiyenana nýe ntšamo Bèngbe Bètsabe uabemana palabrenguiñe iuayancá, y ndocná tšèngaftanguentšá canýe entsabiana chaotsenábotamnaye, y ínýabiana ndoñe tšabá chauátoyebuambnama. ⁷ Er, ¿nda chë ínýengbiana más uámanènga tšèngaftanga cmojtsabiamná? ¿Y ndayá šmobomna, Bèngbe Bètsá ndoñe tcmojtsatá soye? Y tšèngaftanga chca chašmotsebomnama cha tojanmèse, ¿ndáyeca šmojtsenabotamná mo Bèngbe Bètsabe tšetana soyènga ndoñe tontsemncá, y nýe cach tšèngaftangbeyeca šmojonýencá?

⁸ Tšèngaftanga šmojtsejuabná ya lempe ntšamo cmèjajotcá Bèngbe Bètsábicocana šmojtsebomna ca, y lempe ntšamo jtsebošama šmojtsobencánaca ca. Mo reyènga cuaftsemnèngcá cmojtsabiona, bèngbentsana tondaye ntsèjajotcá. Malaye tšèngaftanga mo reyèngcá šmojtsemna, Cristoftaca cánýiñe jtsemándayèse; chca, bèngnaca tšèngaftangaftaca jtsemnama, cánýiñe jtsemándayèse. ⁹ Atše šontsinýana, bènga chë Cristbe ichmónènga Bèngbe Bètsá šojábiana mo chë nýetscangbiana más nduamanèngcá, mo chë jóbana yojsamna entsangcá. Nýetscanga chë Bèngbe Bètsá tojábiamènga bèngbioye jtsénýayana mo ndoñe cachca entsanga fstsemncá; angelènga y entságnaca cachcá bèngaftaca montsama. ¹⁰ Bènga, Cristbiana oservena causa, quem luarentša entsangbiana fsèntsinýna mo corente juabna ndbomnèngcá; chë cuenta, tšèngaftanga šmojtsejuabná Cristbe soyèngama corente osertánènga šmomna ca. Bènga fsèndmèna chë entsangbe bominiñe ndocna obenana ndbomnènga; y tšèngaftangna šmojtsejuabná puerte obenana bomnènga šmomna ca. Tšèngaftangbioye ínýenga puerte uámanènga y bètsétsanga jtsabiamnayana, pero chènga bèngbioye jtsèbuayènjana. ¹¹ Y mèntscoñama, bènga šontsabuashebebiana saná, ndayá jofsiyama y entsáyá. Entsanga bèngbioye bacá jtsaborlánana, y tondaye yebna queftsátsbomna. ¹² Y bènga puerte jabuache fsèndètrabája cach bèngbe cucuatšèngaca. Entsanga šojóyanguango ora, Bèngbe Bètsá fchandbètseimpadana cha chaoma chènga tšabe bendicionènga chamotsebomnama. Bènga chamosufrima ínýenga tmojtsama ora, bènga chë soye fchandbètsoboyaye. ¹³ Inýenga bèngbiana bacá tmojtsoyebuambná ora, jtsababuánýeshanèse fsènduamana jtèjuana. Quem luarentša entsangbe bominiñe bènga jtsemnana chë puerte nduámanènga, mo chë quem luarentša basurèshèngcá, chë quem luarentša entsanga tondayama ndoservèngca, mo chë quem luarentša tsengacá; y chca endmèna mèntscoñama.

¹⁴ Quem soyènga ndoñe quechatèbuabianná tšèngaftanga chašmotsèuatjama, sinó ndayá jábuayenama mo cach atšbe basèngbioycá, atšbe bonshánènga. ¹⁵ Er masque tšèngaftanga mallajta abuátambayènga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšèngaftangbiana mo taitangcá, Cristo Jesúsbeñe jtsošbuáchiyama tcmojanéjabuachama. Nýe atše sèndmèna mo taitacá tšèngaftangbiana, mo ošbuachiyèngcá, er atše natsana tcbonjanabuayená

chë tšabe noticiënga Jesucristbiana, y tšëngaftanga chiñe šmotsanošbuaché.
¹⁶ Chíyecna, cbontsaimpadana ntšamo atše tijamcá chašmotsamama.

¹⁷ Chama Timoteo tšëngaftangbioye sentsichamná, atšbe bonshaná, canye aíñe tšabe palabra bomná; Bëngbe Utabnábeñe tojanošbuachéyeca, atše Cristbiana sënjanbuayiyná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Cristbeñe ošbuachiyacá, ndayama atše nyets tempo ošbuáchiyënga sëndbetsabatambaycá nyets luare ošbuáchiyënga enefjuanenache.

¹⁸ Tšëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jányama ca. ¹⁹ Pero Bëngbe Bëtsá chašojalesenciase, sentsobátmana betscó tšëngaftangbioye jama jányama. As chjinye ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nye ntšamo jayanama imobencá. ²⁰ Er Bëngbe Bëtsá canye ošbuachiyabe ainaniñe tojtsemánda ora, chca jtsinýnana ndoñe nye ntšamo tojtsichámuama, ndayá Bëngbe Bëtsabe obenana chábeñe tojtsemnama.

²¹ ¿Tšëngaftanga ndayá más šmattseboše: atše chayá tšëngaftangbioye jauacánama, o chayá tšëngaftangbioye jányama puerte bonshanánaca y ntsetšatjaycá tšëngaftanga jauyanama?

5

Ndayá cuanjama canye boyabása shembásaftaca bacna soye amáftaca

¹ Ndegombre nyets luariñe entsótatsëmbo tšëngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bëngbe Bëtsábioye nduabuátmënga chca ntsamana: canye entsá cachabe mamamnáftaca bacna soye yojtsama. ² Y tšëngaftanga cabá šmojatsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngménaca jtsemnana, tša uabouana soye cha yojtsama causa. Canye entsá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá. ³ Y atšna, masque tšëngaftangaftaca choca ndoñe quetsásmëna, atšbe juabna choca tšëngaftangaftaca entsemna; y chca atšbe espíritoca sëntsemnayeca, Bëngbe Utabná šojéftsanatšetá mándoca, sënjajuabó y sëntsetatsëmbo ntšamo tšëngaftanga cmojtsamnama, chë entsá chca tojamáftaca. ⁴ Tšëngaftanga chašmojënefjna ora, chentše atšbe espíritoca tšëngaftangaftaca atše chántsemna, y atšbe espíritu chentše echántsemna Bëngbe Utabná Jesusbe obenánaca. ⁵ Y chora tšëngaftanga cmontsamna jamándana chë entsá ya ndoñe más tšëngaftangaftaca mo ošbuachiyacá chaondenútanama, mo Satanasbe cucuatšíñe cha cuafjaboshjoncá, chca, chë quem entsá nye cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnama.

⁶ Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canya tšëngaftanguentše chca chaotsamama. Chca ndoñe tšabá quenásmëna. Tšëngaftanga ya šmondétatsëmbo, ntšamo chë nye batšá levadura endbama, nyets arninýá chauábochema; cachcá, tšëngaftanguentše canya tša bacna soye chca tojama ora, nyetscangbiana ndoñe tšabe soyënga jóbocnana. ⁷ Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnëngaca ya ndëmandánënga

šmojtšémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebomnama. Bashco fiesta ora, oveshá tmojanóba, Israeloca entsanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentsana bënga játsebacama. ⁸ Ntšamo chë judiënga chë fiesta ora mondbamcá, nýets levadura ojamnana cachcá jonýayana, cachcá, bënga šontsamna jtsajbanana oyenana bacna soyënga ínýengbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nýe levadúraca ndëpormana tandëse mondbetsesaycá, cachcá, bënga šontsamna jtsiyenana nýetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

⁹ Chë inýe atsbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. ¹⁰ Y chca ndoñe quetstëtseboše jáuyanana nýa tondayama chašmondëtsoyebuambná nýetsca chë quem luarentšënga boyabása o shembásaftaca bacna soye amëngaftaca, chë nýe cachëngbiana bëtscá soyënga jtsebomnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adorayëngaftaca ca; er nýa chca jamamna, tšëngaftanga cmattsamna quem luarentšana jëftsebocanana. ¹¹ Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nýe cachabiana bëtscá soyënga jtsebomnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo šmuatjót bema chëngaftaca cánýiñe jasama. ¹²⁻¹³ Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nýe chë ošbuáchiyënga tšëngaftangaftaca innénutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: “Tšëngaftanga cmontsamna, chca bacna soye amá tšëngaftangbentsana jtabocnana ca.”

6

Ošbuáchiyënga jendemándama tojtsemna ora

¹ Canýe tšëngaftanguentsa ošbuachiyá inýe ošbuachiyabiana canýe demanda tojtsebomna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbioye nanjá chabe demanda chamouenama? ² Tšëngaftanga ndegombre šmondëtatšëmbo, Bëngbe Bëtsabe entsanga mochjayanama quem luarentša entsangbiana tšabá o ndoñe tšabá tmonjamama. Y chënga quem luarentša entsangbiana chca jayanama tmojtsobenëse, ¿ndoñe montsobena más base soyëngama chca jayanama? ³ Tšëngaftanga ndegombre šmondëtatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyenama soyëngama chca játayanana. ⁴ Y chcase, tšëngaftangbeñe chca demandënga chë quem luarentše jëftsiyenama soyëngama tojtsemna ora, ¿ndáyeca šmatjätëbuayana chë ošbuáchiyëngbiana tondaye tmontsámána entsanga, chë soyënga chamojandmanama? ⁵ Chca sënjayana tšëngaftanga chašmotsëuatjama: ¿o tšëngaftanguentsë ni mo canýa yondmëna corente

osertaná, ošbuachiyéngbeñe demandénga chaojandmanama? ⁶ Pero ndoñe chca: ošbuachiyéngbeñe demandénga tojtsemna ora, mandadéngbioye jana chë soyénga chaojandmanama. Y chca jamana ndošbuáchiyénga mandadéngtaftaca.

⁷ Y tšéngtaftangbeñe nýe demandénga jájandmanama tojtsemna ora, tšéngtaftangbiama ya canýe puerte bacna soye jtsemnana. ¿Ndáyeca ndoñe šmattsóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiabëbana ora? ⁸ Pero cach tšéngtaftangtaftacna inýetsá copasana, ínýengbioye bacá jtsaborlánana y jtsabiabëbanana, y tšéngtaftangcá Crístbeñe ošbuachiyéngbioynaca.

⁹ ¿Tšéngtaftanga ndoñe šmondétatšëmbo, chë bacna soye aménga Bëngbe Bëtsabe améndayoye ndoñe mochanjámarshenguama? Ndoñe matenoíngñana. Ni chë boyabása o shembásaftaca bacna soye aménga, ni chë cachéngbe pormana soyénga diosénga yomna ca jtsejuabnyése adórayénga, ni cachéngbe boyá o shema ínýaftaca íngñayénga, ni chë boyabásenga mo shembasengcá jtsinýnama bošénga, ni chë boyabásenga inýe boyabásengtaftaca bacna soye aménga, ¹⁰ ni chë atbëbanénga, ni chë nýe cachéngbiama bëtscá soyénga jtsebomnama tša bošénga, ni chë tša tmoyénga, ni chë uayátsenayénga, ni chë ínýengbiama bacna soye jtsamése inmëtsatbëbanénga, chénga nýetscanga ndoñe quemochatobenaye Bëngbe Bëtsabe améndayoye jamashjnama. ¹¹ Y tempo báseftanga tšéngtaftanguentšénga chca šmojamna, pero Bëngbe Bëtsá tšéngtaftangbe bacna soyéngama tcmojaperdoná, y chca entsemna mo bebénénga cuaftsemncá; cha tojama tšéngtaftanga chabe entšanga chašmotsemnama, nýe cha chašmotseservénama, y tojama tšéngtaftanga mo tšabengcá chabe bominiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

Bëngbe cuerpo chaotsemna Bëngbe Utabná jtseservénama

¹² Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyénga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatslesencia ndaye sóyecnaca nýets tempo mandaná jatsmënana. ¹³ Mëntšánaca mondbétsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canýe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionénga chaotsamama. ¹⁴ Y Bëngbe Bëtsá, nda tojama Bëngbe Utabná cháuatayenama, bëngbiámncaca chabe obenánaca echanjama chámuatayenama.

¹⁵ ¿Tšéngtaftanga ndoñe šmondétatšëmbo, Crísoftaca cánýiñe mo canýacá šmomnama yomna mo tšéngtaftangbe cuerpo chabe cuerpentša soye cuaftsemncá? Tšéngtaftangbe cuerpo Crístbioye jaserviama endmënayeca, tšéngtaftangbe cuerpo jtsemnana mo Crístbe cuerpentša soycá. ¿Ntšamo atšbe chjátobena atšbe cuérpoca, chë ndayá yomna mo Crístbe cuerpentša soycá, canýe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšéngtaftanga ndoñe šmondétatšëmbo, canýe entšá canýe bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrénguiñe boyabása y shembása tbojéninýenama mëntšá endayana: “Chë útata mo canýacá

bochántsema ca.” ¹⁷ Pero canye entśá Běngbe Utabnáftaca cányiñe mo canyáca tojtsemna ora, jtsemnana mo chě útata cach canye espíritu tbojtsebmncá.

¹⁸ Nya ndocna te canye boyabása o shembásaftaca bacna soyenga šmattsama. Nderado ndaye inye bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamama, lempe jamana nye cachabe cuérpoca, y chě causa, chca jamése, cachabe cuerpama más bacna soyenga jtsamana. ¹⁹ ¿Tšěngaftanga ndoñe šmondětatsěmbo tšěngaftangbe cuerpo yomna mo canye yebncá Uámana Espíritbiana, cha tšěngaftangbe ainaniñe chaotsiyenama Běngbe Bětsá tojánmayeca? Ndegombre tšěngaftangbe cuerpo ndoñe tšěngaftangbe soye quenátsměna, sinó Běngbe Bětsabe soye. ²⁰ Chca endměna, er Cristo běnga játsebacama tojanóbana ora, yojamna mo cha bětsca cuařjopagacá tšěngaftanga Běngbe Bětsábenga chašmotsemnama. Chiyeca, chě tšěngaftangbe cuerpěngaca chašmojtsama soyěngaca šmochtsinyanynaye Běngbe Bětsá puerte uamaná y bětsá bětsemnama.

7

Jobouamayama jábuayenama

¹ Mora chanjóyebuambaye ndayá tšěngaftanga átšbioye šmojuábobemama. Ndegombre, canye boyabásabiama más tšabá endměna ndoñe chaondobouamá. ² Pero choca banga boyabása o shembásaftaca bacna soye aměnga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. ³ Boyábioye bontsemna jamana chabe shembiana lempe ntšamo jamama ibomncá, boyá bětsemnama; y chabe shěmnaca cachcá chabe boyabiama chaoma. ⁴ Chě shembe cuerpo ndoñe nye cha cányabiama ntsemnana, sinó chabe boyabiámncaca. Cachcá, chě boyabe cuerpo ndoñe nye cha cányabiama ntsemnana, sinó chabe shembíámncaca. ⁵ Ni boyá, ni shema ndoñe chabondětsejuabná jtsenbiátšbuana. Aíñe chca copodena, pero nye chě útata chca básefta tescama tbojenóyeunase, Běngbe Bětsáftaca jencuéntama jtsentšěnama. Pero chentšana chě útata entsamna cachiñe cányiñe jtětsmėnana, chca, Satanás ndoñe chaondobená jamama bacna soye chaócochěnguama, cachěnga jenomándama ndoñe tmonsobena causa.

⁶ Atše chca sěntsichamo, tšěngaftanga jábuayenama, ndayá jamama šmojtselesenciana, y chca ndoñe chašmondětsamama jaměndama. ⁷ Y atšbe bariěna, atšbe juabna entsemna malaye nyetscanga chě soyěnguiñe mo atšcá šmattsemna. Pero Běngbe Bětsá cada ona obenana tbojatšetá tšabe soyěnga jamama, Crístbeñe ošbuáchiyěnga jujabuáchama, inyěnga canye soyama, inyěngna inye soyama.

⁸ Chě cabá ndbouamněnga y viudanga sěntsětsětsná, chěngbiana tšabá yojtsemna ntjobouamaycá joquédana, atšcá. ⁹ Pero chca jtsemnana cachěnga jenomándama ndoñe tmonsobeněse, chěnga entsamna jtsóbouamayana, er más tšabá endměna jtsóbouamayana, y ndoñe nye boyabásabiama o shembásabiama tša nyets tempo jěsejuabnayana.

¹⁰ Pero chě bouamněnga sěntsaměnda shema chabe boyábioye ndoñe cachcá chabondetsonyá. Chca ndoñe nye atše quetsataměnda, ndayá cach Běngbe Utabná. ¹¹ Pero, shema cachcá chabe boyábioye tbojesonyase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chě boyá ndoñe quebnátsměna chabe shema cachcá jesonyayana.

¹² Chě inyěnga chjáuyana, atšbe juabncá y ndoñe Běngbe Utabnabe soycá, nderado canye ošbuachiyá tbojtsebmna canye shema Crístbeñe

ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonyá. ¹³ Nderado canye ošbuachiyá tbojtsebomna canye boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonýayana. ¹⁴ Er Bëngbe Bëtsá tojama, canye shembása ošbuachiyá chabe entšá chaotsemnana, nye chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chëngbeñe mo canye pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiama mo chabiama oservena entšacá, cha chëngbeñe mo canye pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondménayeca, canya o nyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiama mo chabe entšangcá. ¹⁵ Pero chë boyá o shema Crístbeñe ndošbuachiyá cachcá jtsenónýayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama. ¹⁶ Chca šmochjama, er aca shema çntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchemba, y chca, atsbocaná chaotsemnana? o aca boyá çntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchemba, y chca, atsbocaná chaotsemnana?

¹⁷ Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbétsamëndaye. ¹⁸ Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtse nobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënanana, ntšamo chë judiënga monduamancá. ¹⁹ Er ndayá iuámána, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. ²⁰ Cada ona bontsemna jtsiyenana, ntšamo yojoyencá, chabe entšá chaotsemnana Bëngbe Bëtsá tbojanchembo ora. ²¹ Bëngbe Bëtsá tcmojanchembo ora, nyets tempo ínÿabiama oservená cojamnëse, chama ndoñe cattsenócochinýena. Pero nderado tojtsemna ntšámose jashjáchama ndoñe más chca ntsemnana, cach acbiama jatrabájama, as chca cochjama. ²² Er chë nye ínÿabiama nyets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canya ya ndoñe más bacna soyënga jamama juabnéngaca mandaná, sinó Bëngbe Utabnabiama oservená. Cachcá, chë nye cachabiama trabajayá yojamná, Bëngbe Bëtsá tbojanchembo ora, mora cha nyets tempo Crístbe oservená jtsemnana. ²³ Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnana. Ndoñe šmatjaleséncia nye entšangbe juabnéngaca nyets tempo mandánënga chašmotsemnana, y Bëngbe Bëtsabiama chacmotsebnëtjomba. ²⁴ Chcasna, Jesucrístbeyeca atšbe catšátanga, cada ona bontsemna Bëngbe Bëtsáftaca jt-siyenana, ntšamo yojoyencá Bëngbe Bëtsá tbojanchembo ora.

²⁵ Y chë ndëbouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe

tšabiama tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsménama. ²⁶ Atše šontsinýana, entšá ibojtsemna jtsomñana nýe ntšamo mora yotsomñcá, er bēnga mora montsiyena puerte padecena soyēnguiñe. ²⁷ Shema tcobomñese, ndoñe cachcá catjēftsonýaye; y ndoñe tcondbomñesna, ndoñe catjátsēnguaye. ²⁸ Tcojobouamase, bacna soye ndoñe quecátama; y nderado canýe tobiáše tojobouamase, cach bacna soye ndoñe quenátama. Pero chē tmojtsobouamangna padecena soyēnguiñe mochanjoyena quem luarentše chamojēftsemnēntscuana, y atše sēntseboše chēnga jujabuáchama chca jatiyenama ndoñe chaondētsamnana.

²⁹ Jesucristbeyeca atšbe catsátanga, ntšamo sēntseboše jayanamna mēntšá entsemna: Cristo quem luaroye yochjésabo orscama ya nýe batšá entsájamna. Chiyeca, morscana y nýets tempo más chcoye, chē bouamnēnga entsamna jtsiyenana mo ndoñe bouamnēnga tmontsemncá, o mēntšá, entsamna jt-sentšénana Bēngbe Bētsabe soyēnguiñe, y ndoñe nýe chē bouamná bētsemnana tbojtsemna soyēnguiñe. ³⁰ Cachcá, chē puerte ngménaca tša ošachiyiñe imomñēnga, entsamna jtsiyenana mo ndoñe chca tmontsemncá; y chē puerte oyejuayēnga, chamotsiyena mo ndoñe chca tmontsemncá; chē soyēnga buam-nayēnga chamotsiyena mo tondaye chēngbe soye tontsemncá. ³¹ Chē quem luarentša soyēngaca jtsiyenama imojtsentšénēnga entsamna jtsiyenana mo ndoñe chca tmontsamcá, er quem luare ntšamo bēnga mora monduabu-atmcá, pronto echanjochnēngo.

³² Atše sēntseboše tšēngaftanga ndoñe chašmondētsenocochinýenana. Canýe entšá ndoñe bouamná tontsemna ora, jtsobenana jtsentšénana Bēngbe Utabnabe soyēngama jtsejuabnayama, y ntšamo oyejuayá cha jabemama; ³³ pero chē bouamná nýets tempo jtsenócochinýenana quem luarentša soyēngama, jtsiyenama, y ntšamo chabe shema oyejuayá jtsebomnana; ³⁴ y chca, cha uta soyiñe canýe ora jtsentšénana. Chē ndēbouamna shembása y chē tobiáše bontsobena jtsentšénana Bēngbe Utabnabe soyēnguiñe sempre jtsejuabnayama. Chēnga mondobena jtsentšénana Bēngbe Bētsá jaserviama, ndayá chēngbe cuérpoca y chēngbe espíritoca tmojamama. Pero inýetsá, chē bouamna shembásana, nýets tempo jesenócochinýenana quem luarentše vida jtsebomnana soyēngama, y ntšamo chabe boyá oyejuayá jtsebomnana.

³⁵ Atše chca cbontsētsētná tšēngaftangbe tšabiama, y ndoñe jamēndama ba soyēnga jamama ndoñe chašmondētsobenama, ndayá ntšamo tšabá yomncá chašmotsiyenama, y nýe Bēngbe Utabná jtseservénana chašmotsentšénana.

³⁶ Nderado nda tojtsejuabná chabe uatsētsnaye tobiášeftaca jtsebouamayama ibojtsemna ca, chca jamama chē tobiáše ya bētsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. ³⁷ Pero nderado inýa, tondaye obligaciōnaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšēmo, ndoñe ntsebouamayana tšabá yomna ca, cha tšabá chca jtsamana. ³⁸ Chcasna, chē tobiášeftaca tojtsobouamá chana, canýe tšabe soye jamana; pero chē ndoñe cháftaca tonjobouamá chana, canýe más tšabe soye jamana.

³⁹ Chē shembása bouamná jtsotocánana chabe boyáftaca sempre jēftsiyenana, chē boyá vida tojtsebomnēntscuana; pero chē boyá tojóbanēse, cha jtsobenana cachiñe jtobouamayana, nda cha tojtsebošáftaca, pero chca chaoma mo canýa Bēngbe Utabnáftaca cánýiñe mo canýacá quetsomñecá. ⁴⁰ Pero atše jayanamna, cha más oyejuayá nántsemna ndoñe

tontóbouamase; y sèntsejuabná, átsnaca tsbomna chë Bëngbe Bëtsabe Espiritu chašotsebuayiynama.

8

Uátšëmbona saná entsangbe pormana soyëngama

¹ Mora chanjóyebuambaye ndayá tšëngaftanga atše šmojatjama, ndayá jtseyayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nÿetscanga osertánënga imomnama. Canÿa tbojtsosertana ora, cha nderado nanjájuaboye, chca bëtsemnama puerte uamaná cha yojtsemna ca, pero canÿa, ínÿenga tojtsababuánÿeshana ora, cha jtsobenana chënga becá jujabuáchana. ² Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. ³ Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

⁴ Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngama, atše šcuayana: bënga corente mondëtatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. ⁵ Pero masque celoca y quem luarentše chamomna entsangbiama “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiama diosënga ca ubuátmënga, y banga bëts mándoca entsangbiama “utabnënga ca” uabáinënga), ⁶ bënga chë ošbuáchiyëngbiama nÿe canÿa Bëngbe Bëtsá endmëna, Bëngbe Taitá, ndábentsana nÿetsca soyënga yóbocana, y nÿe nda jtseeservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

⁷ Pero nÿetsca ošbuáchiyënga ndoñe chca quemátstatšëmbo. Básefta entsanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtsesá ora, jtsejuabnayana chca uatšëmbonana bëtsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸ Ndegombre, ndayá bënga tmojtsesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíñe tmojtsesama; ni ndoñe chcanga, ndoñe tmontsesá causa.

⁹ Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojtsamcá chamuatasmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca. ¹⁰ Er, aca chë soyëngama tatšëmbuá, nderado tcojótbemá jasama canÿe luarentše, canÿe soye ndayama entsanga dios yomna ca jtsejuabnayëse adórayentše, y canÿe Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondëtatšëmbo causa, y cha nderado chentše cojtsesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. ¹¹ Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë

ndoñe corente ošbuachiyá, y ndoñe aquécá chë soyëngama corente tatšëmbuá, cha pochocaná chaotsemnama, er chabe ainanentše echántsemna juabnënga canye bacna soye tojamama, chë saná tojasama. Chca nderado cányabioye catjama, ndabiama Cristo tojanóbana, cha jatsbocama. ¹² Jesucristbeyeca acbe catsatbiama chca bacna soye tcojama ora, chca causa cha canye soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nye chë catsatbiama, ndayá cach Cristbiámna. ¹³ Chiyeca, nderado ndayá atše stesama, atše tsjama Jesucristbeyeca atšbe catsata chaoma canye soye y chca jamama chabiama canye bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatsama.

9

Jesucristbe ichmónëngbe derecho

¹ Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnama. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinýama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiama atšbe trabajuentsana. ² Masque inýenga atšbiama ndoñe quematsjuabná atše canye Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánýiñe mo canýacá šmondmënama, puerte tšabá šmontsinýanýná atše Jesucristbe canye ichmoná tsmënama.

³ Mëntsá chanjayana chë atše ndoñe tšabá tijama ca imojtsichámëngbiama: ⁴ Ndegombre bënga nyets derecho fsëndëtsóbomñe jtsobátmanama tšëngaftangbentsana, chë tchojujabuáchëngbentsana, bëngbe trabajuama saná o ndayá jofšiyama chašcuacaredadama. ⁵ Y bëngnaca derecho fsëndëtsóbomñe canye shema ošbuachiyá jtsebomnama y bëngaftaca cha jëftsbetsama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catsátanga y Pédrënaca mondbetsamcá. ⁶ ¿O nye Bernabé y atše šojtsëtocana cabëndatbe cucuátseca jatrabájana vida jtsebomnama, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama? ⁷ ¿Ndëmua mo canye soldadcá tojtsoservená, ndayá tbojtsájobotama cachá nantsatopagana, vida jtsebomnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létsiyentsana ndoñe ntjofšiyama. ⁸ Ntšamo atše muentše sëntsichamcá ndoñe nye entsangbe juabna quenátsmëna; y Moisesbe leyíñnaca cachcá endayana, ⁹ er chabe leyíñe mëntsá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtseñe ca.” Y chca ndoñe quenátayana Bëngbe Bëtsá nye toronga inétsanýena ca, ¹⁰ sinó inye más bëts soye; chca endayana ndayá ndegombre bënga, chë Bëngbe Bëtsabiama soyëngama abuayiynayiñe trabájayënga cha šnetsanýena ca. Chca tmojanábema bëngbiama, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentsana batšá jýëngacñama. ¹¹ Y chca, bënga chë tšabe noticiëngama tchojábuañenase, y chca, Bëngbe Bëtsábiocana tšabe bendicionënga chašmotsebomnama bënga tifjama, ndoñe yapa

tanandátsmëna tsëngaftanga jótjañana, chë smobomna soyënguentsana bënga jëftsiyenama chašcuatšatama. ¹² Inyënga derecho tmojtsebomna tsëngaftanga jótjañana chë smobomnentsana chašmuacaredadama, tsëngaftangbeñe chëngbe trabajuama, as bënga más derecho fstsebomna chca jamama.

Pero bënga tondaye checbatamëndá, bënga chë derecho bétsebomnayeca. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondétsayaunana, bënga chë tsabe noti-ciënga fstsabuayiyá ora. ¹³ Tsëngaftanga šmondétatsëmbo, Bëngbe Bëtsabe bëts yebnoca trabájayënga Bëngbe Bëtsabiana oservéniñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojiyëbo sananguentsana. Y chë Bëngbe Bëtsá jadórana soyënga amënga, altaroca, chë juatsëmbonama luarentse, chënga jasana ndayá chentse tmojuátsëmbona soyënguentsana. ¹⁴ Cachcá, Bëngbe Bëtsá tojamandá, chë tsabe noti-ciënga abuyayiyayëngna, vida jtsebomnamna lempe ntšamo tojtsëjabotcá chamóyëngacñe ca, chë tsabe noti-ciënga abuyayiyayama. ¹⁵ Pero atše ndocna te chiyaisemandá ínënga chca chašmotsecuedánama, atše chë tsabe noti-ciënga abuyayiyayá bétsemnama chca derecho tsbómnyeyeca, y cach ndoñe mora quem soye quecbatëbuabiamná, tsëngaftanga ndayánaca atše chašmuatšetama. Atšbiana más tsabá nántsemna jóbana, y ndoñe ntjalesénciana inya chaoma atše cach atšbiana oyejuayá ndoñe ntjátsmënama, ínëngbentsana soyënga stjóyëngacñe causa.

¹⁶ Atše ndoñe quetsatsjuabná atše canye bëts soye stsama ca, chë tsabe noti-ciënga stsabuayiyayama, er atše obligaciónca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tsabe noti-ciënga ndoñe sentsabuayiyayase! ¹⁷ Chíyeca, atše chë tsabe noti-ciënga stsabuayiyayá nye atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nye atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonyécá. ¹⁸ Y chca, atšbe uacanana soye endmëna atše oyejuayá jtsemnana chë tsabe noti-ciënga abuyayiyayama, ošbuachiyëngbentsana atše vida jtsebomnama tondaye ntjatoyëngacñécá; chca, atše tondaye quetsátama chë tsabe noti-ciënga abuyayiyayama tsbomna deréchoca, chë atšbe trabajuentsana vida jtsebomnama.

¹⁹ Atše, masque ndocna entsábeyeca nyets tempo mandaná quetsátsmëna, puerte nduamaná sënjobema, mo canya nyets tempo ínëabeyeca mandaná, nyetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayënjanama Crístbeñe chamotsošbuáchema. ²⁰ Chë judiëngbiamna atše sënjama chaitsiyena mo chëngcá jtsamëse y jtsejuabnyëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema. ²¹ Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. ²² Chë nye batšatema ošbuachiyëngbiamna y Bëngbe Bëtsabe soyëngama nye batšatema osertánëngbiamna, atše sënjama chaitsiyena mo chëngcá jtsamëse y jtsejuabnyëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nyetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

²³ Atše lempe chca sëndama, bëtscá entsanga chë tšabe noticiënguïñe chamotsošbuáchema, y chca, atše atsbocaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

²⁴ Tsëngaftanga šmondétatsëmbo, canye luaroye jashjanguama entsanga tmojótjajo orna, banga jotjajuana, pero nÿe canya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tsëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. ²⁵ Nÿetscanga chë tmojótjajënga ínÿenga jáyëñjanama, chënga jopróntana nÿetsca soyënguïñe jtsenomándayëse, chca, canye uacanana soye, tsbuanachëngaca uapormana coronësha juayëngacñama; y chësha betesco jtsanctana. Pero bënga ndoñe; bënga mondoyena Cristbiana soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nÿetsca tescama bënga mochanjëftsebomna. ²⁶ Y atšna, atšbe bariëna sëndëntšena Bëngbe Bëtsá jtseservënama, ndoñe mo canya ínÿengbioye jáyëñjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatšënga tojtsëtsana y chë ínÿabe cuerpoye ndoñe. ²⁷ Mo canye tšabe peliayacá, chabe cuerpo játssetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbioye jtseservëñese chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

10

Cach entsangbe pormana soyënga ndoñe chamondëtsadoránama jábuayenama

¹ Jesucristbeyeca atšbe catšátanga, atše sëntseboše tsëngaftanga chašmotsetátšëmbo bëngbe tempsca bëtš taitanga judiënga, chënga nÿetscanga Bëngbe Bëtsá canye jantsetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá. ² Chë jantsetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. ³ Chënga nÿetscanga tmojanse cachca saná, chë Bëngbe Bëtsá celocana tojanichmó saná; ⁴ y nÿetscanga tmojanofsé chë Bëngbe Bëtsá tojanma chë peñësentšana chaóbocna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësentšë chëngaftaca tojanopasacá, yojaninÿanÿná Cristo chënga yojtsanÿenama. ⁵ Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentšë.

⁶ Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama. ⁷ Chíyeca, tsëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguïñe chëngbiana endayancá, chënga canye ternera castellanoca tmojanpormá ora, mo dios cuaftsemncá jadórama: “Entšanga tmojanotbiana jasamá y jatmuama, y chentšana tmojantsbaná joboyejuaama ca”. ⁸ Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canye te,

uta bnétsana y unga uaranga entsanga tmojanóbana ⁹ Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga. ¹⁰ Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana šojtsamnama, y Moisés, Bëngbe Bëtsabe uabemana palabrënguiñe chca tojëftsanboshjona bënga jabuátambama, bënga, chë Jesucristo yochjësabo orscama ya batšatema yojsájamna ora oyenëngbiana. ¹² Chcasna, nda tojtsejuabná Bëngbe Utabnabiana tšabá yojsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. ¹³ Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondëtatšëmbo Bëngbe Bëtsá sempre cmochtsëjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entsangbe pormana soyënga, ndayama ínÿenga jtsejuabnayana diosënga yomna ca. ¹⁵ Atše sëntsoyebuabná mo tšëngaftanga corente osertánënga cuaftsemncá. Cach tšëngaftanga šmochjenójuaboje y šmochjayana, ntšamo cbojtsëtsëtsnacá aíñe o ndoñe tšabá bëtsemnana. ¹⁶ Ntšamo Jesús chë coptema vinoyama Bëngbe Bëtsábioje tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿnayana bënga Crístoftaca cánÿiñe mo canÿacá imomnama, chabe buiñe juabuáshanëse bëngbiana tojanóbanayeca. Y chë mondbajataye tandëse tmojase ora, jtsinÿanÿnayana bënga Crístoftaca cánÿiñe mo canÿacá imomnama, cha bëngbiana tojanóbanayeca. ¹⁷ Bënga ošbuáchiyënga masque banga mondmëna, chca orna nÿetscanga cach tandëšentsana bënga jasana, y chíyeca bënga jtsemnana mo canÿacá, mo Cristbe cuerpcá.

¹⁸ Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinÿanÿnayana chënga cánÿiñe mo canÿacá imojtsemnana Bëngbe Bëtsáftaca, chë chca tmojtsadoranáftaca. ¹⁹ Y chca, atše ndoñe quetsátsboše jayanama chë entsangbe pormana soyënga mo diosënga cuaftsemncá, uámana soyënga yomna ca. Ni chë cach entsangbe pormana soyënga diosënga yomna ca jtsejuabnayëse jadórama uátšëmbona saná inÿe sanama más iuámana ca. ²⁰ Pero aíñe, entsanga cach entsangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioje jtsadoránana, y ndoñe Bëngbe Bëtsábioje. Y atše ndoñe quetsátsboše, tšëngaftanga chca uatšëmbonana šmojasama, cánÿiñe mo canÿacá chë bayëjëngaftaca chašmotsemnana. ²¹ Tšëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bëtsemnana mondbetsamcá, y chentsana chë cach entsangbe pormana soyënga, mo diosënga cuaftsemncá jadórama vínoye coptémentšanënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse

jasana, ntšamo ošbuáchiyënga bétsemnama mondbetsamcá, y chentšana cach entšangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

²² Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnama, er chë bayëjëngaftaca bënga chca jt-samana. ¿O imojtsejuabná bënga chabiamama más obenana bomnënga imomnaca?

Lempe šmochjama Bëngbe Bëtsá puerte bëtsá y uamaná yomnama jinÿanÿiyama

²³ Mondbétsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nÿetscangbe tšabiamama ntsemnana. “Entselesenciana ndayánaca jamama ca”, pero nÿetsca soyënga ntšamo bënga tmojamcá, ošbuachiyëngbioye ndoñe ntjuabuáchana Jesucristbeñe más chamotsošbuáchema, y ainaniñe más añemo chamotsebomnama. ²⁴ Ndocná chaondétsama lempe ntšamo tojobenacá nÿe cachabe tšabiamama, ndayá más chaotsama chë ínÿengbe tšabiamama.

²⁵ Lempe mercadoca tmojtsena soyënguentsana šmochjase, ntjatstjanaycá chë mëntsena aíñe o ndoñe tmonjuátšëmbona chë cach entšangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama; ²⁶ er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

²⁷ Nderado canÿe ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóboconama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. ²⁸ Pero nderado nda tcmojáuyana: “Quem mëntsena cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canÿa chca tcmojáuyana, y ainanentše šmojtsebomna juabnënga, chë chca jamama ndoñe tšabá bétsemnama. ²⁹ Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnama, ntšamo chë ínÿabe ainaniñe juabna yobomnama ca? ³⁰ Y atše chë ndayá stsesama Bëngbe Bëtsá tijëtschuase, ¿ndáyeca inÿa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” ³¹ Masque ntšámnaca, cachcá, chašmojtsešá, o chašmojtsofšëšná, o ndaye inÿe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿinayama. ³² Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe ošbuachiyëngcá enefjuanëngbiama. ³³ Smochtsama ntšamo atše sëndëntšencá, nÿetscanga nÿetsca soyënguñe oyejuayënga jtsabamnama, lempe ntšamo stjobenacá jtsemëse, ndoñe nÿe atšbe tšabiamama, ndayá masna chë ínÿengbe tšabiamama, chënga chamotsobenama chëngbe bacna soyënguentsana atsebácanënga jtsemnama.

11

¹ Tšëngaftanga šmochtsiyena ntšamo atše sëndamcá jtsemëse, cach ntšamo atše sëndoyencá, ntšamo Cristo inetsamcá jtsemëse.

Ntšamo yomna shembásenga tšabá jtsemnama, ošbuachiyëngcá tmojénefjna ora

² Atše sëntseboše tšëngaftanga jáuyanana tšabá šmojama ca, tšëngaftanga nýetsca soyënguiñe atšbiamá šmnétsenojuabnama, y tšëngaftanga šmojtsabuátambama y šmojtsamama ntšamo tčbonjanabuatambacá, cachcá ntšamo atše sënjëftsamboshjoncá. ³ Pero atše sëntseboše tšëngaftanga chacmësertá: nda nýetsca entsanga iuaménda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. ⁴ Nderado canýe boyabása chabe bestšaše tojtsenátstbotse, inýe ošbuachiyëngaftaca cánýiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšáseca chca tojama causa. ⁵ Pero nderado canýe shembása chabe bestšaše ndoñe tontsenátstbotse, inýe ošbuachiyëngaftaca cánýiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. ⁶ Er, nderado canýe shembása ndocna te tontseboše chabe bestšaše jtsenátstbotsana, chabiamá más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnama cha yochtsëuatja ca, as chabe bestšaše chaotsenátstbotse. ⁷ Boyabása ndoñe quebnátsmëna chabe bestšaše jtsenátstbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinýanýnáyana Bëngbe Bëtsá chabe mandayá yomnama. Pero ntšamo chë shembása yomncá, jtsinýanýnáyana chë boyabása chabe mandayá yomnama; ⁸ er Bëngbe Bëtsá, boyabása ndoñe tbonjanma shembásabentsana, ndayá shembása boyabásabentsana. ⁹ Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰ Chíyeca, y chca jamama angelënga tšabá jtsinýanánayeca, shembása jtsemnana chabe bestšaše chaotsenátstbotsama, chca, chaotsinýnama inýa chábeñe yomándama. ¹¹ Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseiytëtanana. ¹² Er masque Bëngbe Bëtsá, shembása boyabásabentsana tbojanma, mora, shembásabentsana boyabása jóbocnana; y lempe Bëngbe Bëtsábiocana endóbocana.

¹³ Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canýe shembásabiamá Bëngbe Bëtsáftaca jencuéntana, bestšaše ntsenatsbotscá. ¹⁴ Ntšamo entsanga sempre mondbetsejuabnaycá, ndayá tšabá bëtsemnama, bëngbioye jtsabuátambayana, boyabása bën stjënëshá chabuájua tojalesenciase, cha jamana cachá chama chaotsëuatjama. ¹⁵ Pero shembásabiamna, chë bën stjënëshá jtsinýanýnáyana chabe botamanana y uámanana, er Bëngbe Bëtsá tojanma shembása bën stjënëshá chaotsábomnama, chca, cha chaotsebomna ndáyeca chabe bestšaše jtsenátstbotsama. ¹⁶ Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatslesencia chca ndoñe chaondëtsemnama.

Bëngbe Utabnabiamá jtenójuaboyama jasama ora, chënga ndoñe tšabá imonjánama

¹⁷ Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoservena tšëngaftanga más bacá chašmotsemnama, y ndoñe

tšëngaftangbe tšabiama. ¹⁸ Natsana cbochjáuyana, atše sënjouena tšëngaftanga ošbuachiyëngcá šmojnëfjna ora, báseftanga canye soye immétsejuabnaye y ínÿengna inÿetsá ca, y atše sëntsejuabná batsana ndegombre chca yojtsemna ca. ¹⁹ Ndegombre jtseytana tšëngaftangbeñe chamotsemna báseftanga canye soye juabnayënga y ínÿengna inÿetsá, chca, nÿetscanga chamotsetatsëmbuama ndëmuanÿenga imojtsemna chë Bëngbe Bëtsá tojayana chënga tšabá tmojama ca. ²⁰ Tšëngaftanga tandëse jasama y vínoye jofšiyama šmojnëfjna ora, ntšamo bënga fsënduamancá, Bëngbe Utabná bëngbiana tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora; ²¹ er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nÿetscanga ndayánaca jasama chamotsebomnëntscuana; báseftanga shëntseca joquédana, y ínÿengna tša jëftsesana y jofšiyana jëftsótmenantscuana. ²² ¿Tšëngaftanga ndoñe yebna šmondbomna ndayentše jasama y jofšiyama? ¿Ndáyeca tšëngaftanga šmojtsejuabná chë imménefjna ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

*Bëngbe Utabnabiama jtenójuaboyama saná
(Mt 26.26-29; Mc 14.22-25; Lc 22.14-20)*

²³ Er atše cach Bëngbe Utabná bentšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona ibeta, tandëse tojanca, ²⁴ Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiama chanjóbana. Ntšamo mora montsamcá šmochtsama, atšbiana jtenójuaboyama ca.” ²⁵ Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatsëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšësná ora, chca šmochjama atšbiana jtenójuaboyama ca.” ²⁶ Er tšëngaftanga cada quemëntša tandëse chašmojtsešá ora y quem coptementšaycá chašmojtsofšësná ora, Bëngbe Utabná chaojésabëntscuana tšëngaftanga šmochántsinÿanÿnaye cha entšangbiana tojanóbanama.

Ntšamo yomna jamana, Bëngbe Utabnabiama jtenójuaboyama jasama ora

²⁷ Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiana Bëngbe Bëtsá jayanana cha puerta bacna soye tojama ca. Chë entšá chca tojama ora, cha jtsinÿanÿnayana, Bëngbe Utabnabe cuerpo y buiñe chabiana tondaye yonduámanama. ²⁸ Chíyeca, entsemna cada ona corente chauenuabó jtsetatsëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. ²⁹ Er nderado nda tojase y tojofšé, chë Bëngbe Utabnabiama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. ³⁰ Chíyeca, banga tšëngaftanguentsënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana. ³¹ Pero bënga corente tmojajuabó jtsetatsëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá

ndoñe buántsemna bënga játacastigana, ntšamo tšabá yomncá ndoñe tmonjase causa. ³² Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjinyáma, y chca, bayté chentsana, Bëngbe Bëtsá ndoñe chabondëtsemna játayanana bënga šojtsamna nyetsca tescama castigánënga jtsemnana ca, cányiñe chë nye quem luarama enójuabnaye entšangftaca.

³³ Chca, Jesucristbeyeca atšbe catšátanga, tšëngaftanga chë Bëngbe Utabnabiama saná jasama chašmojënefna ora, cányiñe nyetscanga šmochjajójtša. ³⁴ Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë inye soyëngama ndayama tšëngaftanga šmonjatjá, chamna chanjamánda tšëngaftanga jányáma chajjá ora.

12

Bëngbe Bëtsabe tšetana obenana, tšabe soyënga jamama

¹ Jesucristbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

² Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, inyënga cmonjanabuatambá soyënga, y chora tšëngaftanga šmonjamna inyábeyeca uasjanëngcá, cach entšangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsobenana. ³ Chiyëca, atše mora sëntseboše tšëngaftanga chašmotsetátšëmbo, ndocná ntsobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

⁴ Espíritu jamana bënga ndoñe chamondëtsebonnama cachca tšetana obenana tšabe soyënga jamama, pero lempe jobayana cach canye Espíritbeyeca. ⁵ Bënga, Bëngbe Bëtsá mondëserveda, nyetsca soyënguiñe jtsetrabájayëse, pero cach Utabná nyets chë trabajënga šojabanýé. ⁶ Nyetsca soyënga Bëngbe Bëtsabe obenánaca fsëndbétsama, pero cach Bëngbe Bëtsá endmëna nda inétsama bënga chë soyënga jamama obenana chamotsebonnama. ⁷ Bëngbe Bëtsá inétsama cada ošbuachiyá chaotsebonnama canye tšetana obenana tšabe soyënga jamama, y chë soye jtsinyanynayana Bëngbe Bëtsabe Espíritu chabe ainaniñe yomnana; y chë tšetana obenana jtsemnana nyetscangbe tšabiamana. ⁸ Bëngbe Bëtsá, Espíritbeyeca, canya obenana jatštayana puerte osertanánaca chaóyebuambama, y inyana obenana cach Espíritbeyeca ndayámnaca corente jtsetatšëmbëse chaóyebuambama; ⁹ inyana cach Espíritbeyeca, obenana Crístbeñe puerte chaotsošbuáchema, y inyabiamna, cach nye canye Espíritbeyeca, obenana jatštayana šoquënga jáshnama; ¹⁰ inyana, obenana tšabe soyënga Bëngbe Bëtsabe obenánaca jamama, y inyana, obenana Bëngbe Bëtsabe juabna jóyebuambayama. Inyana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiriténgbeyeca tojtsemnana, y inyana, obenana chë tempo ndmabiyáñnaca chaóyebuambama, y inyana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y inyëngna chama jábuayenama. ¹¹ Pero cach Espíritu, chë nye canye Espíritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

Nyetsca ošbuáchiyënga cányïñe, mo Cristbe cuerpcá jtsemnana

¹² Cuerpo nye canye soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nye canye cuerpo jtsemnana. Bëngaftácnaca cachcá. Bënga banga mondmëna nyetscanga Cristbeñe ošbuáchiyënga, pero Cristbeyeca, bënga cányïñe mo canyáca jtsemnana. ¹³ Er bënga nyetscanga, judiënga o ndoñe judiënga, nye ínÿabiama nyets tempo oservënga o cachëngbiama trabájayënga šojanëbaye, Crísoftaca cányïñe mo canyáca, jtsemnana mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espiritu nyetscangbe ainanoye cháumashënguama, bënga jtsamëndayama.

¹⁴ Cachcá, canye cuerpo ndoñe nye canye soye ntsebomnana, ndayá ba soyënga. ¹⁵ Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmëna. ¹⁶ Nderado matscuaše tojayana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmëna. ¹⁷ Nyets cuerpo bominye tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jonguëtsetsiyana. ¹⁸ Pero ndegombre endmëna, Bëngbe Bëtsá nyetsca soye cuerpentše tojancjá ndayentše cha tojánbošenentše. ¹⁹ Nyetsca cuerpentša soyënga nye canye soye tojtsemnëse, ndoñe canye cuerpo nántsemna. ²⁰ Pero ndegombre endmëna, masque ba soyënga cuerpentše yomna, nye canye cuerpo jtsemnana.

²¹ Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”. ²² Inÿetsá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga. ²³ Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entsáyaca jtichëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entsáyaca jtichëtjëse. ²⁴ Pero chë cuerpentša soyëngaca, chë nyetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama. ²⁵ Cha chca tojanma, cuerpentša nyetsca soyënga chë cuerpama trabajo cányïñe chamotsamama, y chca, cada soye chaotsama trabajo chë cuerpentša nyetsca soyëngbe tšabiama. ²⁶ Nderado canye cuerpentša soyama bacna soye tojopasá, chora nyetsca chë cuerpentša soyëngámnaca chca ndoñe tšabe soye jtsebínÿnana; pero canye cuerpentša soyama tojama más uámana soye chaotsemnana o ndaye tšabe soye tojopasase, chora nyetsca chë cuerpentša soyëngámnaca chca tšabe soye jtsebínÿnana.

²⁷ Cachcá, tšëngaftanga Cristbeñe ošbuáchiyënga, cháftaca cányïñe mo canyáca jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. ²⁸ Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuátambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga,

chë ínÿengbioye puerte ujabuáchanënga, chë inÿe ošbuachiyëngbioye amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe. ²⁹ Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oyebeuambnayënga, nÿetscanga ndoñe abuátambayënga, nÿetscanga ndoñe Bëngbe Bëtsabe obenana bomnënga, bëts soyënga jamama. ³⁰ Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbioye chama jtsabuayiynayama. ³¹ Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

Bonshánana jtsebomnana

Y inÿe soye más, atše cbochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseeservënëse.

13

¹ Nderado atše stjóyebuambaye entšangbe biyañe y angelëngbe biyañe, pero ínÿengbioye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe. ² Y atše obenana stsebomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna. ³ Y atše lempe ntšamo stsebomncá ndbomnjémënga stšëjátaye, y ínÿengbioye stjenontréga atšbe cuerpo chamojuinÿema, pero ínÿengbioye ndoñe sentsababuánÿeshanëse, atše ndocna uámana soye ntjashjáchana.

⁴ Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntsenábotamnayana, ni cachá chë ínÿengbiamá más uamaná ntjatenobiamnayana; ⁵ ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiamá tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana. ⁶ Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. ⁷ Inÿenga ababuanÿeshaná, ainaniñe añemo jtsebomnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

⁸ Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebomnama; ⁹ er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nÿe batšatema bëngbioye jtsinÿanÿnayana Bëngbe Bëtsabe soyëngama, ndoñe lempe; ¹⁰ pero Jesucristo chaojésabo ora, y chaojama bënga chamotsemna lempe ntšamo

Bëngbe Bëtsá bëngbiama yojanjuabnacá, quem soyënga, chë nÿe batsatema bëngbioye jtsinÿanÿayana Bëngbe Bëtsabe soyëngama, ya ndoñe más queochátsbinÿna.

¹¹ Atše básetema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sëntsanajbaná lempe amana mo canÿe basetemcá. ¹² Cachcá, mora bënga quem luarentše nÿe batsatema Bëngbe Bëtsabe soyëngama jtsetatšëmbuana, mo canÿe espejuñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nÿe batsatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuatmcá.

¹³ Pero morna, Bëngbe Bëtsábeñe jtsošbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentšana chë más uámana soye endmëna ínÿenga jtsababuánÿeshanana.

14

Ndmabiyañe obenana Bëngbe Bëtsabe tšetánana

¹ Bëtscá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebomnama chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyebuambayama obenana. ² Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentše ntšamo cha tojtsoyebuambnacá ndocná ntjosértana; chana chabe espíroftaca jtsóyebuambnayana y ndoñe nÿe chabe juábnaca, chë tempo Bëngbe Bëtsá ndocna entšábioye tbonjaninÿinÿé soyëngama. ³ Pero chë Bëngbe Bëtsabe juabna oyebuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguiñe tmojtsemna órna añemo chamotsebomnama. ⁴ Chë tempo ndmabiyañe mora jóyebuambayama obenana bomná, jtsamana nÿe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyebuambnayana jtsamana chë ošbuachiyëngcá enefjuanënga chca soyënga chamotsebomnama.

⁵ Atše sëntseboše nÿetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyebuambnayá más uamaná jtsemnana chë inÿe biyañe oyebuambnayabiama; chca ndoñe nántsemna, ntšamo canÿe biyañe tojayancá chë biyañe oyebuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmoujenama, chënga chamotsobena más jtsošbuáchiyama y añemo jtsebomnama. ⁶ Y mora, Jesucristbeyeca atšbe catšátanga, atše nderado tchojábuache y nÿe inÿe biyañe tchojáuyanëse, ¿chca ntšamo cbatjújabuache? Atše jtsoobenana jujabuáchana, nÿe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinÿinÿecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jábuátambama cha yoboše soye.

7 Entšanga monduamana ndayánaca juéanana, mo flautéjfa o arpa, vida ndbomna soyénga; cada sóyeca inyetšá juéanama ndoñe tontsopodénese, ndocná nantsobena jtsetatšëmbuama ndayá canya chë soyéngaca yojtséanama. 8 Y nderado nda trompetéjfa tojuájetá ora, soldadénga japéliama chamoprontama, chë uajatétaná inyetšá, nya chama ndoñe tonjuájetése, ndocná buanjosérta y jenpéliama ndoñe nanjopróna. 9 Tšëngaftangafácna cachcá jtsopasánana. Inyenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nye cánýenga cuaftsoyebuambnacá. 10 Atše sëntsejuabná, ndegombre quem luarentše ba inye biyañe entšanga imnétsoyebuambnayana, y ndaye biyañnaca tmojoyebuambá ora, sempre jtsemnana ínýenga ntšamo chénga tmojtsichamcá osertánénga. 11 Pero ntšamo inya chabe biyañe šojauyancá atše ndoñe šontsésertánese, atše stsemna canye chabiamana ndosertana biyañe oyebuambnayá, y chánaca cachcá atšbiamana. 12 Chcasna, chë Uámana Espíritu šondinýanýná obenana jtsebomnana tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngañnana, chë ošbuáchiyënga más jtsošbuáchiyama y añemo jtsebomnana inétsama obenana.

13 Chýyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuayenama obenana chaotsebomnana. 14 Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayése, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. 15 Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsihámua jksejuabnayésnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayése. 16 Nderado aca Bëngbe Bëtsá cojtsatschuaná nye espíritoca, y canya quem Bëngbe Bëtsabe tšetana obenana ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquécá cha yojtsejuabnana jinýinýiyama, er ntšamo cojtsichamcá cha ndoñe ntsésertánana. 17 Aca jtsoobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnana. 18 Atše, Bëngbe Bëtsá sëntsatschuaná inye biyañe jóyebuambayama tšëngaftangbiamana más tsobenama; 19 pero Crístbeñe ošbuachiyëngcá tmojénefjna ora, atše más sëndbétseboše nye mo shachna palabratémnaca jóyebuambayana, chénga añe catafjosertacá, chca, ínýenga jabuátambama, y ndoñe bnétsana uaranga palabrénga jatóyebuambnayana inye biyañe, chénga chaósertama ndoñe tontsopodénese.

20 Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyénga jamama ntsetatšëmbcá; pero mo bëtsétsangcá tšabá šmochtsejuabnaye. 21 Bëngbe Bëtsabe uabemana palabrénguiñe, Bëngbe Utabná mëntšá tojánayana:

Atše quem entšángbioye chanjáuyana,

ínýenga inye luarëngocana ashjajnëngaftaca, chëngbiamana canye ndosertana biyañe oyebuambnayënga;

y chanjáuyana ndayá chëngbe biyañe chamojtsichamo soyéngaca;

pero ni chca, chénga ndoñe quešmochatóyeunaye ca.

22 Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinýanýiyama,

y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinñanñiyama, y chábeñe ndošbuachiyëngbioyna ndoñe. ²³ Er tsëngaftanga nyetscanga ošbuachiyëngcá šmojënefjna ora, nyetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tsëngaftanga opënga šmojtsóbema ca. ²⁴ Pero nyetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama. ²⁵ Y Bëngbe Bëtsá chábioye bochanjinñinñiye ntšamo cha ainaniñe tojajuabó y tojabošencá, ndayá ndocnábioye tbonjinñinñyecá, y cha echanjoshéntsamentšiyë Bëngbe Bëtsá jadórama, y tsëngaftangbe delante echanjayana Bëngbe Bëtsá ndegombre tsëngaftangbeñe yojtsemna ca.

Ošbuachiyëngcá šmojënefjna ora, ntšamo tsabá yomncá lempe šmochtsama

²⁶ Chcasna, Jesucristbeyeca atšbe catšátanga, šmojënefjna ora, cada ona ndayánaca jtsebomnana nyetscangbiamá: ínñengna jtsobenana javérsiama, Bëngbe Bëtsá jëtschuayama, ínñengna jtsobenana jabaúambana o jábuayenama ndayá Bëngbe Bëtsá tojinñanñyecá, o tempo ndmabiyañe chora jtsóyebuambnayana, o entšanga jábuayenana ntšamo inña inñe biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnama Cristo jaserviama. ²⁷ Nderado inñe biyañe jóyebuambayama tojtsemnëse, útata o nña másese únganga chca chamoyebuambá, y canñánña; y jtseytana ndánaca ntšamo tmojtsichamcá chabosertá y nyetscanga chama chauabuayená. ²⁸ Y chca chabosertama y nyetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefjna ora chë chca oyeambuambayá bontsemna ndoñe chca biyañe ntsóyebuambnayana, sinó nñe canya tojtsemna ora cha jtsobenana chca Bëngbe Bëtsáftaca jencuéntana. ²⁹ Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínñengna jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábíocana tayojsóbocanama. ³⁰ Pero canya Bëngbe Bëtsabe juabna tojtsóyebuambnantscuana, inña chentše ouenana tbemanábioye Bëngbe Bëtsá tbojinñinñyé ndayánaca yojtsebomna jayanama, as chë natsana oyeambuambayá iytëca chaóbema, y chabolesenciá chë inña chaóyebuambama. ³¹ Chca, nyetscanga, canñánña jtsobenana jayanana soyënga, Bëngbe Bëtsabe juábnaca jtsóyebuambnayëse, nyetscanga chamuatsjínñyama y nyetscanga añemo jatšatayama. ³² Chë Bëngbe Bëtsabe juabna oyeambuambayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; ³³ er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnama, y nñe ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entšanga mondbénefjna luarënguenache endbetsemncá, ³⁴ tsëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefjna ora, er ndoñe quenátslesenciana chënga chora chamuátoyebuambnama, y aíñe chënga entsamna chëngbe boyanga jtsayaunanana, ntšamo Moisesbe leyíñe endayancá. ³⁵ Chënga ndayánaca jtsetatšëmbuama tmojtsebošëse, cachëngbe boyángbioye yebnoca

chamotjanga; er ndoñe corente tšabá ntsemnana canye shembása jtsóyebuambnayana tšëngaftanga ošbuachiyëngcá šmojénefjna ora.

³⁶ ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nýe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nýe cánýenga ndoñe ntsobenana jayanama ndayá jamama cmojtsamnana. ³⁷ Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnana. ³⁸ Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

³⁹ Chcasna, Jesucristbeyeca atšbe catšátanga, puerta šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínýenga ndoñe chamondëtsóyebuambnana; ⁴⁰ pero lempe šmochjama ntšamo jamama yomncá, y ndoñe nýe ntšamo cada ona tojatsjuabnacá.

15

Cristo tojtanayenama

¹ Morna, Jesucristbeyeca atšbe catšátanga, atše sëntseboše tšëngaftanga chašmuatenójuaboma atše tchbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservënëse šmojtсийena. ² Chca šmobómnyeyeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo chbonjanabuayiynacá; chca ndóñesna, nýe ndoñe corente tšabá ntjajuaboycá chë buayenana soyënguiñe šmojtsanošbuaché.

³ Er atše tšëngaftangbeñe sënjëftsanboshjona, Bëngbe Bëtsábiocana atše tjanóyëngacñe más uámana buatëmbana soyënga. Atše tchbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá; ⁴ chë Cristo tmojanatbontsá y unga tianoje cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá; ⁵ chë Pédrëbioye tbojánebëbocnama, y chentšana chë bnëtsana útata ca uabobáinëngbioynaca. ⁶ Chentšana mo shachna patsama más chábeñe ošbuáchiyënga tojánebëbuacna, chënga cánýentše imojtsemna ora; chënguentsanga banga cabá vida imotsóbomñe, masque báseftanga ya tmojóbana. ⁷ Chentšana Santiágbioye tbojánebëbocna, y chentšana nýetsca chabe ichmónëngbioye.

⁸ Y chentšana átšnaca šonjánebëbocna. Mo canye šešona cabá shbená tojonýnacá, Cristo chabe ichmoná šonjábema, chë tempo chama jopróntama ntsebomncá, ndayëntscuana ínýenga cha tojanabuatambá. ⁹ Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. ¹⁰ Pero Bëngbe Bëtsá atšbe tšabiamna yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiamna jtsamana, ndoñe nýe bonamente quenátsmëna. Er atše más sënjatrabajá, chë inýe Jesucristbe ichmónëngbiama; pero ndegombre atše ndoñe nýe canya chca chiyatsma, sinó masna Bëngbe Bëtsá chë trabajo tojama, tšabe juabna atšbiamna jtsebomnëse. ¹¹ Ndayá más yojtsámana ndoñe quenátsmëna, atše o chënga, Jesucristbe soyëngama

abuayiyayniñe más tojatrabajá, sinó ndayá chë soyënga bëngbe buayenana soye yojtsemna, y tsëngaftanga chiñe šmojtsošbuaché.

Chë obanënga cachiñe vida mochtsatsbomnama

¹² Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tsëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca? ¹³ Pero chca tojtsemna, chë obanënga ndoñe mochántayenasna, Cristo cach ndoñe tontanayena; ¹⁴ y Cristo ndoñe matenjésayenëse, bënga nýe bonamente chabiama fstsabuayiyná, y tsëngaftanga nýe bonamente chábeñe šmojtsošbuaché. ¹⁵ Y canýe más bëts soye: chca tojtsemnësna, bënga muanjábocna mo chë Bëngbe Bëtsabiama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbétsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. ¹⁶ Pero chë obanënga ndoñe mochántayenasna, Cristo cach ndoñe tontanayena. ¹⁷ Y Cristo cháuatayenama Bëngbe Bëtsá ndoñe matënjänmëse, tsëngaftanga nýe tondayama chábeñe šmojtsošbuaché; tsëngaftanga chë bacna soyëngama cabá ndoñe perdonánënga šmontsemna. ¹⁸ Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nýetsca tescama castigánënga. ¹⁹ Bënga tmojtsobátmana Cristo bëngbiama tsabe soyënga chaotsamama, pero chca nýe quem luarentse bënga vida tmojtsebomnëntscuana, as bënga nýetscangbiama más muantsomerecena, nýetscanga bëngbiama chaotsangmënama.

²⁰ Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinýänýayana más shajuanënga chentsana yochjóboconama, cachcá, Cristo tojtanayena ora, cha tojaninýänýé Bëngbe Bëtsá yochjanma ínýënga chábeñe ošbuáchiyënga chámuatayenama vida chamotsatsbomnama. ²¹ Chca, ndayá canýe entšá, Adán, tojanmama, nýetscanga jóbanama yojtsamna, cachcá, ntšamo inýe entšá, Cristo, tojanmama, Bëngbe Bëtsá yochjama entšanga chámuatayenama. ²² Er ntšamo, Adánbentšana entšanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nýetsca tescama yomna tsabe vida chënga chamotsebomnama. ²³ Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentsana, Cristo cachiñe quem luaroye chaojésabo ora, nýetscanga chë Crístbe entšanga imomnënga. ²⁴ Y chentsana, Bëngbe Bëtsá chë Taitábioye, Cristo chabe amëndayana chabojantsabuaché ora, nýetsca mandadënga, mando y obenana bomnënga corente jtsayënjänayëse. ²⁵ Er Cristo bontsemna ínýënga mo reycá jtsamëndayana, chabe uayayënga chabe cucuatšíñe chamoquedama Bëngbe Bëtsá tojamëntscuana. ²⁶ Canýe uayayá inétsama entšanga jóbanama; pero Cristo último echanjama chabe obenana pronto chaotsochocama. ²⁷ Er ntšamo Bëngbe Bëtsabe uabemana palabrënguiñe endayancá: “Bëngbe Bëtsá tojama Cristo nýetsca soyënguiñe chaotsemándama ca.” Pero “tojama Cristo nýetsca soyënguiñe chaotsemándama ca” tojayana ora, jtsopodénana puerta tsabá jinýama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nýetsca soyënguiñe chaotsemándama. ²⁸ Y Cristo nýetsca soyënguiñe chaojtsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nýetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentse yobínýniñe.

²⁹ Inyetsánaca, báseftanga cachiñe uabáinenga imojtsemna, chë ošbuáchiyënga nduabáinenga obanëngbe cuenta. Chca chënga jamana mo chë obanënga uabáinenga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? ³⁰ Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Cristbiana oservena causa? ³¹ Atšbiana cada te resjo endmëna jóbanama. Jesucristbeyeca atšbe catsátanga, atše sentsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canye oservenacá, tsëngaftanga chábeñe šmojtsošbuáchema. ³² Mo canya tsátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nye chë entšanga mondbétsejuabnaye jëftsashjáchama soyënga jtsebošëse chca matsjamnëse, ¿ndaye tsabe soye matënjanoócna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofsiye, nderado yëfse muatjóbanana ca!”

³³ Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tsabe soyënga, ntšamo jtsamëse yojoyena.” ³⁴ Tsabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tsëngaftanguentse Bëngbe Bëtsabe soyënga ndoñe quešmatábuatma. Atše chca sentsichamo tsëngaftanga chašmotsëuatjama.

Ntšamo chë obanënga mochtayena

³⁵ Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” ³⁶ ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebomnama. ³⁷ Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana. ³⁸ Pero Bëngbe Bëtsá jamana chë jénayentsana mata chauábocnama, ntšamo jamama cha tojajuabocá; y cha jamana cada jénayentsana canye mata chauábocnama, ntšamo chë jénayentsana chauábocnama tojtsemncá. ³⁹ Nyetsca cuerpënga ndoñe cachcá ntsemnana. Entšanga canye cuerpo mondbomna, bayënga inye cuerpo, shloftšënga inye cuerpo, y beongna inye cuerpo. ⁴⁰ Chë celoca vida bomnënga inyetsá jtsinynana, y chë quem luarentse vida bomnëngna inyetsá. Pero chë buashinÿinÿanana y botamanana ntšamo celoca vida bomnënga jtsinynancá, ndoñe cachcá ntsemnana chë quem luarentse vida bomnëngbe botamanancá. ⁴¹ Cachcá, shinÿe ndoñe quenátsbomna cachca buashinÿinÿana juashconcá, ni estrellëngcá; y estrellënguentse cach ndoñe cachcá ntsebuashinÿinÿanana.

⁴² Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentse imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentse bënga mondbomna cuerpo jóbanana, ínÿenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca. ⁴³ Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinÿinÿana y echantsámana. Bënga quem luarentse imoyenëntscuana imobomna cuerpo, nye batšá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo

echántsemna. ⁴⁴ Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canye cuerpo quem luarentše vida chaotsebomnama yómnyeyeca, canye cuéerpënaca, jtsemnana celoca vida chaotsebomnama.

⁴⁵ Chca Bëngbe Bëtsabe uabemana palabrënguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentsána nyetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Crístna canye espíritu endmëna, y chë espíritu jamana entsanga chë nyetsca tescama yomna tsabe vida chamotsebomnama. ⁴⁶ Pero chë celoca nyetsca tescama vida jtsebomnama cuerpna ndoñe natsana ntjóbcnana, ndayá chë quem luarentše vida jtsebomnama cuerpo; chentsána chë celoca vida jtsebomnama cuerpo. ⁴⁷ Bëngbe Bëtsá, chë natsana entsá tbojanma fshántseca, y chca, cha fshantsentsána tojánbcna; Crístna, mo entsángbentsána chë natsaná tsmacá bemanacá, celocana tojánbcna. ⁴⁸ Adánbentsána, chë natsana entsá, chë fshántseca tmojanmábentsána tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Crístcá jtsemnana; Cristo nda celocana tojánabo.

⁴⁹ Ntšamo bënga jtšinynana chë Bëngbe Bëtsá fshántseca tbojánbema entsacá, cachcá bëngnaca mochtsinýna ntšamo chë celocá yomnacá.

⁵⁰ Jesucrístbeyeca atšbe catsátanga, atše cbochjáuyana, nye quem luarentše vida jtsebomnama cuerpëngaca, bënga ndoñe ntsoberenana Bëngbe Bëtsabe amëndayoye jamashënguana; ni ndayá yochjopochóca soye, ntsoberenana ndayá ndoñe yochanjopochóca soye jtsebomnana. ⁵¹ Smochjouena, atše canye soye cbochanjáuyana, y chë soye Bëngbe Bëtsá entsanga tempo ndoñe tonjaninýanyé: Bënga ošbuáchiyënga nyetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. ⁵² Nye betesco, mo tcojofshetá y cachora tcojtafšnacá, quem luare ya jopochócama ora, canye ángel trompetéjua chaojuájatëta ora, er chora trompetéjua echanjuénana, Bëngbe Bëtsá echanjama obanënga chámuatayenama, nyetsca tescama vida jtsebomnama; y bënga, chë ainënga mochtseemnëngna, cha šochanjátrocaye mo tsmëmangcá jtsemnana; ⁵³ er jtseytana Bëngbe Bëtsá chaotrocá chë bëngbeñe jopochócama yomna soye, ndocna te yochanjopochóca soyiñe; y ndayá bëngbeñe yochjóbana soye, ndocna te yochanjóbana soyiñe. ⁵⁴ Bëngbe Bëtsá chca bëngaftaca chaojama ora, chë cha jatrócana ndayá bëngbeñe yochjopochocacá, ndocna te yochanjopochóca soyiñe, y ndayá bëngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrënguiñe chama endayancá:

Bëngbe Bëtsá tojayënjaná chë entsanga chamóbanama endbëtsama obenana; entsanga ndoñe más quemochatóbana ca.

⁵⁵ ¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayënjaná ca!

⁵⁶ Entsanga bacna soyënga tmojama causa, obenana endmëna entsanga jóbanama chaotsamnana. Ndayá leyíñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnëngaca mandaná jtsemnana, y cabana, jóbanama jtsemnana. ⁵⁷ ¡Pero Bëngbe Bëtsá mochtsatschuanaye, bënga mo ayënjanayëngcá

cha šojábiamama, er ya ndoñe šontsamna chca jtsemnama, chë Bëngbe Utabná Jesucristo bëngbiamama tojanma sóyeca!

⁵⁸ Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiamama trabájayiñe, er tšëngaftanga šmondétatšëmbo, Bëngbe Utabnabiamama trabájayiñe ndayá šmojamcá, ndocna te nÿe bonamente ntsemnana.

16

Jerusalenoca ošbuáchiyëngbiamama crocenánama

¹ Mora chanjóyebuambaye chë Jerusalenoca Bëngbe Bëtsabe entšanga ndbomnjémëngbiamama tšëngaftanga šmochjuíchmua crocenánama. Atšbe sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atšbe sënjanabuayenacá. ² Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabaye; chca atšbe choye chaijá ora, ndoñe chacmondëtsamna quem uajabótama chora crocénana játatbanayana. ³ Y atšbe choye chaijáshjango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbioye tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. ⁴ Y nderado, átšnaca chëngaftaca jama tšabá tojtsemnëse, chënga átšeftaca chamua.

Ntšamo Pablo yojanjuabná chë luarëngoye jama

⁵ Atšbe sëntsejuabná tšëngaftangbioye jama jautsëtsayama, Macedonia luarëjana chaijachnëngüentšana, chentša ošbuáchiyënga jaftsanÿëse, er atšbe sëntsejuabná natsana Macedonia luaroye jéftšana. ⁶ Nderado baseftayté tšëngaftangbeñe chašuétsjetana, o nderádose nÿets uaftena tempo; as tšëngaftanga inÿe luaroye játama chašmuájabuachama, ndëmoye jama chašojtsemnoye. ⁷ Atšbe ndoñe quetsátsboše nÿe betscó tšëngaftanga jáftsanÿana, er atšbe sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. ⁸ Pero Efesoca šochanjajétana Pentecostés fiesta chaojobuáchëntscuana. ⁹ Er Bëngbe Bëtsá tojama atšbe jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

¹⁰ Timoteo tšëngaftangbioye chaojase, yejuana šmochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamama endëtrabája, ntšamo atšbe sëndamcá. ¹¹ Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chauatábama, er atšbe cha sëntsobátmana, chë inÿenga muentše Crístbeñe ošbuáchiyëngaftaca.

¹² Y Jesucristbeyeca bëngbe catšata Apólosna, atšbe bëtscá cha sënjaimpadá, chë Jesucristbeyeca catšátanga tšëngaftanga jánjyama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chënga jtadiósoftanama

¹³ Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nÿets tempo, Crístbeñe y chabe soyënguñnaca šmochtsošbuáchiye. Ainaniñe puerte añemo

šmochtsebomna, y bëtscá šmochtsama Bëngbe Bëtsabe obenánaca. ¹⁴ Y nÿetsca soyënga ntšamo chašmojtsamcá, bonshanánaca šmochtsama.

¹⁵ Jesucrístbeyeca atšbe catšátanga, tšëngaftanga šmondëtatšëmbo, Estéfanas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamama jtsetrabájayana, chabe entšanga jtsëjabuáchanëse. ¹⁶ Atše cbaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nÿetsca chë ínÿenga mo bëngcá quemuiñe uajabuáchanëse trabájayënga cmojtsamëndacá.

¹⁷ Atše tša oyejuayá séntsemna tšëngaftangbe pueblentšana Estéfanas, Fortunato y Acaico moye tmojáshjajnama, er atše séntsobena oyejuayá chëngaftaca jtsemnana, tšëngaftangftaca choca jtsemnana cabá ndoñe séntsobenëntscuana.

¹⁸ Er chënga átšbioye tmonjabo y tšëngaftangbiamama šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

¹⁹ Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuachiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca. ²⁰ Muentša ošbuachiyënga nÿetscanga cmontsacheuaná. Nÿetscanga šmochjenchuaye mo Jesucrístbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²¹ Quem palabrënga tšëngaftanga jacheuayama cach atšbe cucuátšeca séntsabiamná.

²² Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

²³ Atše, Bëngbe Bëtsá séntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnana. ²⁴ Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.

2 Corintios

Jacheuayama

¹ Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catšata Timotéoftaca quem tsbuanácha sentsabiamná, Corinto puebloca Bëngbe Bëtsábeñe ošbuachiyëncá enefjuanëngbiama, y nyets Acaya luarentše Bëngbe Bëtsabe nyetsca entšangbiámnaca. ² Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebonnama.

Ntšamo Pablo tojansufrí

³ Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiana lastemado yomná, y ndaye padecena soyënguiñe tmojtsemna ora, bënga šondbetsañemuayá. ⁴ Cha bënga jtsañëmuayana padecena soyënguiñe tmojtsemna ora, chca, bënga chamotsobenama chë tmojtseufrinënga jañëmuayama, ntšamo Bëngbe Bëtsá šojjabuachcá chënga jujabuáchëse. ⁵ Er ntšamo Cristo tojansufricá, bënga tša fsëndësufrina chabiana oservëniñe; cachcá, Cristbeyëcnaca Bëngbe Bëtsá jamana bënga puerte añemo ainaniñe fchaitsebonnama. ⁶ Er bënga tmojtseufrinëse, jtsemnana bënga jobenayama tsëngaftanga jañëmuayama chë šmojtseufrina ora, y atsebácanënga chašmotsebonnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañëmose, jtsemnana bënga fchayobenama tsëngaftanga jañëmuayama, padecena soyënguiñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora. ⁷ Bënga sempre fsëndobátmana y tsabá fsëndëtatšëmbo chë padecena soyënguentšana tsabá šmochjábocanama, er bënga fsëndëtatšëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebonnama, ntšamo bënga fchaitsebonnama cha tojamcá.

⁸ Jesucristbeyeca atšbe catšátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguiñe fsënjanienya, nya ndoñe más jauantacá, chentšana vídaca jabocanama ntjatobatmancá. ⁹ Bënga šontsanënana mo jóbana cuafsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. ¹⁰ Cha šojatsebacá bënga jóbana puerte resjo enjamnentšana, y cachcá šochjátsebacaye bëngbiana cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama. ¹¹ Tsëngaftángnaca cmontsamna bënga jujabuáchana, bëngbiana Bëngbe Bëtsá jaimpádase; chca, ba entšanga Bëngbe Bëtsá mochanjëtshuaye, er cha tojama bënga chábentšana tsabe bendicionënga fchayóyëngacñama, cha jamëse ntšamo chënga bëngbiana tmojanimpadacá.

Ndayeca Pablo Corinto puebloye ndoñe tonjána

¹² Canye soye endmëna ndayá oyejuayënga šojtsabiamná: bënga bëngbe ainantša juabnëngaca jtsetatšëmbuana puerte tsabá jtsamëse ftsiyena ca,

ntšamo chë Bëngbe Bëtsabe entšanga endbetsamncá, nyetsca quem luar-entša entšángbeñe, y más tšëngaftangbeñe, y bënga jtsetatšëmbuana ntšamo tšabá tifjamcá nyets ainánaca tifjamama. Bënga tondaye chibiatsma quem luarentša entšangbe osertanánaca, ndayá Bëngbe Bëtsá tša tšabia bëngaftaca bëtsemnayeca, šojújabuache chca chamotsiyenama. ¹³ Er ntšamo fsëntsabiamnamna ndoñe queftsátsboše, ntšamo tšëngaftanga šmojtsalía y cmojtsësertánentšana inyetsá játayanana, y sëntsobátmana puerte tšabá lempe chacmósertama. ¹⁴ Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiana oyejuayënga chašmotsemnama, ntšamo bëngnaca tšëngaftangbiana oyejuayënga fchantsemncá.

¹⁵ Chca ndegombre yomnama atše sëndëtatšëmboyeca, atše sënjanjuabná tšëngaftangbiye jshétsana jányama, y chca, chë tšabe soye tšëngaftangbiana uta soye jamana, tšëngaftangbiye uta soye jányëse. ¹⁶ Atše sënjanjuabná tšëngaftanga jshaftsanyana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca, tšëngaftanga mašmënjnobená atše juajabuáchana Judea luaroye játama. ¹⁷ Atše chca jamama tsjanjuabná ora, ¿chca tijanma ndoñe corente tšabá ntjenojuaboycá? ¿Tšëngaftanga šmatjajúaboje, ntšamo nye quem luarama enójuabnaye entšanga monduamancá, cachora canye soyama “áiñe” y “ndoñe ca” jayanëse, atše ndayánaca jamama snëtsejuabnaye ca?

¹⁸ Canye soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canya cachora canye soyama “áiñe” y “ndoñe ca” cuafjatichamcá. ¹⁹ Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canye soye jamama y chentšana jatsjuabnayana inyetsá jatsmama, mo canye entšá cachora canye soyama “áiñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá. ²⁰ Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojášebuachenama cha “áiñe ca” cuaftsichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. ²¹ Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cányiñe mo canyácá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama. ²² Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinýanýnayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnyeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatsatayama šojašebuachenacá.

²³ Bëngbe Bëtsá entsonýá atše ndegombre stsihámuaama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucacánëse. ²⁴ Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnama.

2

1 Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá. 2 Tšëngaftanga ngménënga chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga? 3 Chíyeca tčbonjanëbuábiamana chë ntšamo šmojualiácá, chca, atše choye stjášhjangora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiamana más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftángnana chca mašmënjánbošëna y oyejuayënga chë soye matcmënjánabiamana. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora. 4 Pero chë tsbuanácha tčbonjanëbuábiamana ora, atše corente šonjanongmé y ainana šonjántsetšëna chca jabuache soyënga tšëngaftanga jubuábiamama, y chca jamama shëchbuýnana sënjanoperdé. Pero atše ndoñe checbátanëbuabiamana atše jatsmama tšëngaftanga puerte ngménënga chašmotsemnana, ndayá chašmotsetatšëmbuama atše tša cšababuánýeshanama.

Perdón chë bacna soye amabiamana

5 Y mora, chë tšëngaftangbeñe puerte ngménënga chaotsemnana tojama boyabásabiamna, cha átšbioye ndoñe ngmená chešnátšbema, ntsachetšá tšëngaftanga tčmojabiamcá, ínýengbioye ínýengbiamana más. Chca sënstichamo, er atše ndoñe quetsátšbošë jayanama ntsachetšá tojamama cha más bacna soye tojama ca. 6 Banga tšëngaftanguentšënga ntšamo šmojamcá, chë entšabiamana ya bëtš castigo entsemna. Nýe nýetšá ponto. 7 Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménënga bëtsemna causa. 8 Chíyeca, tšëngaftanga cbaimpadá cachiñe tšabá chašminýinýé chábioye corente šmobobonshánama. 9 Tempo ya chama tčbonjanëbuábiamana, atše jinýama tšëngaftanga aiñe o ndoñe šmotsanprontánama, lempe ntšamo tčbonjanamëndacá jamama. 10 Chcasna, ndánana ndayánana tšëngaftanga chašmojaperdoná ora, átšnana cha chantseperdóna. Y atše cha chantseperdóna, ndayá japerdónana ndegombre tojtsemnëse. Y chca chanjama tšëngaftangbe tšabiamana y Cristbe delante. 11 Atše tšëngaftangcá, quem entšábioye šcoperdoná chë bëngbiamana tojama bacna soye; chca, Satanás ndoñe chaondobenama bënga jáingñama, er bënga mondëtatsëmbo cha inëtsebošë ndaye bacna soye entšá chaotsamama.

Ndayëca Pablo ndoñe natjëmbana Troas puebloca tontsanoquedañe

12 Atše Troas puebloca sënjánashjangora, Cristbe tšabe noticiënga jábuayenama, atše sënjáninýe Bëngbe Útabná tojanma chentše banga chë buayenana soye chamouenama y chëngbe ainaniñe chana chamóyëngacñama. 13 Masque chca enjamna, atše ndoñe quetstëtšobena natjëmbana ainana jtsebomnana, er atše sënjanjuabná Jesucristbeyëca bëngbe catšata Tito chentše jinýenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

Crítoftaca cánýiñe mo canýacá jtsemnëse, bënga mo ayëñjanayëngcá jtsemnana

14 Atše Bëngbe Bëtšábioye sëndbëtšatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Crítoftaca cánýiñe mo canýacá jtsemnëse, nýets tempo cha šnetsënachayama, mo canýe ayëñjanayacá, y chë nýets luarenache entšanga

Cristbiamama soyënga chamotsábuatmama bëngaftaca cha yojtsamama, mo nda canye botamana uanguëtse soye nyets luarënguenache chauáshanama cuaftsamcá. ¹⁵ Er chë incienso tojtsejuínÿinÿana ora, entšábioye tšabá juanguëtšenana; cachcá Cristbe tšabe noticiënga fstsabuayiyná ora, Bëngbe Bëtsabiamama bënga jtsemnana chë ndëmuanÿenga tmojtsama cha oyejuayá chaotsemnana. Incienso tcojtsejuinÿná ora, nyetscángbioye juanguëtšenana. Cachcá, Bëngbe Bëtsabe palabra fstsoyebuambná ora nyetscanga jouenana, Cristo yojtsatsebacanga y chë pochocánënga jtsemnana imojtsajnëngnaca. ¹⁶ Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayiynacá y tmojouencá chënga tmojtsaboté; y chca, chëngbiamama chë tšabe noticiënga jtsemnana mo canye obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nyets tempo jtsebomnana; y chca, chëngbiamama chë tšabe noticiënga jtsemnana mo canye puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama? ¹⁷ Bënga chë tšabe noticiënga ndoñe queftsatabuayiyná, ntšamo ba entšanga imojtsamcá, mo nye batšá uámana soyënga cuaftsemncá, y ndayánaca juacánama, mo nda ndaye nduámana soyënga cuaftsencá. Banga chca mondama; bënga ndoñe. Bënga, Crístoftaca cánÿiñe mo canÿacá jtsemnëse, fsëndabuayiyná mo Bëngbe Bëtsabe delante cuaftsemnëngcá, ndegombre nye ntšamo tšabá yomncá nyets ainánaca jtsebošëse, y mo Bëngbe Bëtsabe ichmonëngcá.

3

Chë Bëngbe Bëtsabe tsëm tratama buayenana soye

¹ Chca bëngbiamama fstsjayana ora, tsëngaftanga cmojtsinÿana ¿bënga cachiñe tiftëtontsé cabënga bëtsëtsanga enobiamnayana? ¿O bënga šojtsamna, mo inÿengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama? ² Bënga bëngbe ainaniñe puerte tšabá fsëndëtatšëmbo, nyetsca entšanga, ntšamo tsëngaftanga jtsemnëse šmoyencá tmojinÿe ora, tsëngaftanga jtsinÿanÿnayana bënga ndegombre ntšamo tšabá yomncá fstsamama. Chca, tsëngaftanga jtsemnana mo canye tsbuanachacá, nyetscanga jtsabuatmana y jtsobenana jualiana, bënga tšabá fstsamama. ³ Nyetscanga tšabá mondëtatšëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámna. Chca, tsëngaftanga šmondmëna mo Cristbe canye tsbuanachacá, ndayëcha quem luarentša entšángbioye tojuyentšbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canye tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entšanga chamotsobedecënana, pero tsëngaftangna Cristbe buayenana soye tsëngaftangbe ainaniñe šmojóyëngacñe.

⁴ Crístbeyeca Bëngbe Bëtsábeñe jtsošbuáchiyëse, bënga corente fsëndëtatšëmbo chca ndegombre bëtsemnana. ⁵ Ndoñe quenátsmëna, nye bënga cánÿenga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nye Bëngbe Bëtsabe ujabuáchenanaca; ⁶ er cha tojama bënga fchayobenama quem trabajo jamama, chë entšanga jábuayenana Bëngbe Bëtsá chabe

entsángbioye tojanašebuachená soyëngama, ndayá Cristo tojanma sóyeca, mo canye tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inyetsá; entsanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tsabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyetsca tescama yomna tsabe vida chënga chamotsebomnama.

⁷ Quem Moisesbe ley, chë ndoñe tmonjobedecema entsanga jóbanama jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbioye tbojanantsabuaché ora, cha tša buashinÿinÿaniñe tojánabo. Chë causa entsanga ndoñe imontsobena ni mo jinÿana Moisesbe jubiá, er tša ibo-jtsanjuebëbuashinÿinÿana, Bëngbe Bëtsáftaca tbojánencuententsana tojtanabo ora. Pero betesco tojanëjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentsbuaché ora, tša buashinÿinÿanánaca cha tojanmëse; ⁸ ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháuamashënguama Bëngbe Bëtsá tojama ora. ⁹ Bëngbe Bëtsá chë ley tojanayentsbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominiñe tsábenga chamotsemnana. ¹⁰ Er chë Bëngbe Bëtsá ley tojanayentsbuaché ora tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entsángbiamama tsëm soyënga tojtsamama tcojtsonÿá ora, chë tša buashinÿinÿanana yojtsemna ora. ¹¹ Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsángbiamama jamama ora, chë ndocna te yochan-jochnëngo tempo ora, Bëngbe Bëtsá más chabe buashinÿinÿanana y uámanana echántsiniÿanÿnaye.

¹² Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyetsca soyëngama jayanëse, tondayama ntjatauatjca. ¹³ Y chca, bënga ndoñe Moiescá queftsátama, chë chabe jubiá chaobuashinÿinÿenama Bëngbe Bëtsá tojanma ora, canye entsëjuaca yojtsenamochëcjua; cha chca tojanma, chë Israeloca entsanga ndoñe chamondobená jinÿama chë jubiá buashinÿinÿanana ya yojtsëchnëjuana ora. ¹⁴ Pero Bëngbe Bëtsá tojanma chënga ndoñe chaondósertama ntšamo Moiesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiamama jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiamama iytëmena soyënga cuaftsemncá, mo chë Moisés yojtsenamochëcjua entsëjuacá. Y chca endmëna, er nÿe Crístoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. ¹⁵ Y mëntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. ¹⁶ Pero canye entsá chë Bëngbe Utabnabe benache tojishache ora, cha jtsobenana chë soyëngama josértana. ¹⁷ Y Bëngbe Utabná y Espiritu canÿa bondmëna, y Bëngbe Bëtsabe Espiritu tojtsemnentše, chë bacna soyënga jamama juabnënga, ni chë ley ndoñe

ntsemándayana. ¹⁸ Moisés chabe jubiañe Bèngbe Bètsabe buashinÿinÿanana y uámanana tojaninÿanyé, y chíyeca, canÿe entséjuaca yojtsenamochécjua, chca, chénga ndoñe chamondinÿama. Pero bēnga ošbuáchiyēnga nÿetscanga jtsinÿanÿayana Bèngbe Utabnabe buashinÿinÿanana y uámanana, mo canÿe espejo canÿe soye tojtsinÿanÿnacá, y ndoñe queftsátsboše ntšámnaca jamēse chē soye jatsēytamianana. Cha bēngaftaca yojtsama cada te más chē ntšamo cha yomncá bēnga chamotsemnana, cada te más bētsētsanga chē ntšamo cha yomncá jtsemnēse. Chca endmēna ntšamo Bèngbe Utabná yojtsama; y Bèngbe Utabná y Espíritu canÿa bondmēna.

4

¹ Y chca, Bèngbe Bètsá bēngbiana lastemado yómnayeca, quem trabajo šojabanÿé, jtsabuayinÿayama chē Crísoftaca tojašebuachená soyēnga; y chíyeca bēnga ndocna te ntjájbanana ainaniñe añemo bomnana. ² Bēnga fsēntsaboté chē ínÿenga iytēmencá inmētsama soyēnga, chē ínÿenga tmojinÿe ora chama jtsēuatjana, y chē ínÿenga entsanga jáingñama inmētsama soyēngnaca, y Bèngbe Bètsabe buayenana soye ndoñe queftsatstróca ndoñe ndegombre soyēngaca. Chamna, bēnga sempre nÿe chē ntšamo ndegombre yomncá fsēndbétsoyebuambnaye, mo Bèngbe Bètsabe delante cuaftsemnēngcá jtsamēse; y chca, bēnga fsēndbétsama cada entsabe ainanentša juabnēnga chamuayanama, bēnga ndegombre soyēnga fstsoyebuambná ca. ³ Y nderado bēnga chē tšabe noticiēnga fstsabuayinÿá ora, báseftanga chē soyēnga chaósertama ndoñe tontsopodénēse, nÿe chē pochocánēnga jtsemnana tmojtsajnēngbiana chca jtsemnana. ⁴ Chēngbiana, chē Crístbeñe ndošbuáchiyēngbiana, chē quem luarentše mora mandayá, Satanás, tojama chē buayenana soye ndoñe chaondētsēsertánama; chca, chénga ndoñe chamondinÿama chē tšabe noticiēnguentšana puerte bēts y tšabe soyēnga, chē Cristo puerte bētsá y obená yomnana ínÿanÿnaye soyēnga, nda nÿetsca soyēnguiñe Bèngbe Bètsacá yomna. ⁵ Bēnga ndoñe nÿe cabēngbe soyama queftsatabuayinÿá, ndayá Jesucristbiana mo Bèngbe Utabnacá. Bēnga bēngbiana fsēndbáyana mo oservenēngcá fstmēna ca, tšēngaftanga jujabuáchama; y chca fsēndbétsama Jesús jaserviama. ⁶ Er Bèngbe Bètsá, nda quem luare jobojátšama ora tojanmandá binÿniñe ibetentšana chaóbocnama, chánaca tojama bēnga ainaniñe tšabá chabe soyēngama chašotsēsertánama, chca bēnga fchayobená juabuátmanana chē Bèngbe Bètsabe uámanana y obenanentšana inétsobocana osertánana, ndayá Crístbeñe bēnga mondonÿá.

Bēnga fsēndoyena Crístbeñe jtsošbuáchiyēse

⁷ Pero chē puerte tšabe y bēts soye, chē Crístbe buayenana soye, bēnga mondbomna cuerpiñe, bēngbe ainaniñe; y chē cuerpēnga jtsemnana nÿe mo matbajēngcá, ndoñe yapa obenana ntsebomnana, chca, jinÿanÿiyama tša bēts obenana Bèngbe Bètsábicana yóbocanama, y ndoñe bēngbentšana. ⁸ Y chca, bēnga nÿetsca padecena soyēnguiñe vida fsēndbomna, pero ndoñe queftsátsmēna ndobenēnga chē padecena soyēnguentšana tšabá jacobanama; ndoñe queftsátstatsēmbo ndayá jamama šojtsamna, pero ndoñe queftsátsmēna ntsoyencá jtsobátmanama quem padecena soyēnguentšana tšabá jacobanama. ⁹ Inÿenga montsama bēnga puerte fchaisufrima, pero Bèngbe Bètsá ndoñe nÿe cachcá šontsabashejuana; mo nda ínÿabioye cuafjutsencá tmojtsentsjaná ora, ya jóbama jtseprontánana, uayayēnga bēnga jtsēbáyama imojtsejuabnangbe cucuatšiniñe fsēntsemna, pero cabá ndoñe ntjobáyana. ¹⁰ Inÿenga siempre jtsamana bēnga bēngbe cuerpiñe puerte fchaisufrima, y jobanámna resjo jtsemnana, ntšamo Jesúseftaca tmojanmcá,

cha chaosufrima y chaóbanama. Chca bēngaftaca endopasana, chca, ínŷenga chamobená jinŷama Jesús bēngbeñe vida yobomnama. ¹¹ Er bēnga vida fchabomnēntscuana, sempre puerte resjo bēngbiana jēftsemnana jóbanama, Jesúsbioye servena causa; y chca endmēna, ínŷenga chamobená jinŷama Jesús vida yobomnama bēngbe cuerpiñe, chē canŷe te yochjopochóca cuerpo. ¹² Y chca, bēnga tša fsēndēsufrina y jobanámnaca resjo endmēna; y tšēngaftanga tšabe noticiēnga šmojóyēngacñayeca, Bēngbe Bētsá tojama chē nŷetsca tescama yomna tšabe vida chašmotsebomnama.

¹³ Bēngbe Bētsabe uabemana palabrenguiñe endayana: “Atše sēntsanošbuaché y chíyeca sēnjanoyebuambá ca.” Bēnga cachca ošbuáchiyana fsēndbomna chē chca tojanayanacá, y chíyeca bēngnaca Bēngbe Bētsábeñe fsēntsošbuaché y chabiana fsēntsoyebuambná. ¹⁴ Er bēnga fsēndētatsēmo, Bēngbe Bētsá, nda tojanma Bēngbe Utabná Jesús cháuatayenama, chánaca yochjama bēnga Crísoftaca cánŷiñe mo canŷacá jtsemnēse, bēnga chámuatayenama, y tšēngaftangaftaca cánŷiñe cha yochtsemnoye šochjúshejango. ¹⁵ Lempe ntšamo bēnga fstsama y fstsesufrincá tšēngaftangbe tšabiana endmēna; chca, más becá entšanga chábeñe chamojtsošbuaché ora, ba tšabe bendicionēnga Bēngbe Bētsá entšangbiana jtsamēse, más becá entšángnaca chábioye chamotsatschuaná, ndayá chēngbiana cha yochjamama; y lempe chca, Bēngbe Bētsá puerte uamaná y obená yomnama nŷetsca entšanga chamotsichámuama.

¹⁶ Chíyeca bēnga ndoñe ntjájbanana ainaniñe añemo bomnana. Masque quem luarentša bēngbe cuerpo cada te jtsopochócyana, Bēngbe Bētsá jamana chē bēngbentšana nŷets tempo vida yochtsebomna soye, cada te más obenana chaotsebomnama; y chca, bēnga jtsemnana mo tsmēma entšangcá. ¹⁷ Ntšamo bēnga mora fsēndēsufrincá endmēna nŷe quem luarentše vida tmojtsebomnēntscuana, y chca, chē soye jtsemnana mo canŷe nduámana soycá; pero ntšamo bēnga fsēndēsufrincá josérviana bēnga jtsebomnama chē Bēngbe Bētsá šochjatsataye puerte bēts uámanana y obenana, cháftaca nŷets tempo vida jtsebomnama, chē ndayá yomna nŷetsca soyēngama más bēts y uámana soye. ¹⁸ Er bēnga nŷe chē tojtsopodena jinŷama soyēnguiñe ndoñe nŷets tempo queftsatsjuabná, ndayá chē ndoñe yondopodena jinŷama soyēnguiñe; er chē bēnga imobena jinŷama soyēnga ndoñe nŷetsca tescama ntsemnana; pero chē bēnga ndoñe mondobena jinŷama soyēnga cocayé nŷetsca tescama jtsemnana.

5

¹ Bēnga mora mondbomna canŷe cuerpo quem luarentše vida jtsebomnama. Quem cuerpo yomna mo chē jtsatsjacama yopodena yebncá, cánŷentše ndoñe nŷets tempo ntjēftsemnana. Bēnga mondētatsēmo, quem cuerpo canŷe te tojtsopochocase, Bēngbe Bētsá yochjama bēnga tsmēma cuerpēnga chamotsatsbomnama, celoca nŷetsca tescama vida jtsebomnama, Bēngbe Bētsabe pormana cuerpēnga y ndoñe entšangbe pormana cuerpēnga. ² Chíyeca, bēnga quem luarentše chca vida tmojtsebomnēntscuana, yapa tmojtseufrina causa, bēnga tša jtsebošana betscó Bēngbe Bētsá celoye chašúyambama, y bēnga nŷets tempo celoca jtsiyenama tsēm cuerpo jtsebomnama cha chaomama; ³ chca, Cristo yochjésabo ora, bēnga chē tsēm cuérpoca chamotsemnana, y ndoñe nŷe espíritu ndocna cuérpoca. ⁴ Bēnga quem cuerpiñe, chē quem luarentše vida jtsebomnama cuerpiñe chamojtsiyenēntscuana, yapa padecena soyēnguiñe sufrina causa, bēnga jabuache mochanjáshachna; chca echántsemna ndoñe nŷe chē espíritu ndocna cuérpoca jtsemnana bēnga imojtsebóseyeca, ndayá masna, bēnga chē

tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboše chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nyetsca tescama vida jtsebomnama. ⁵ Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espíritu bëngbe ainaniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

⁶ Y chca, bënga sempre ainaniñe bëts añemo fchandbétsebomna. Bënga fsëndétatsëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentše. ⁷ Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nÿe ndayá jinÿama tmojtso benama. ⁸ Bëngbe fsëntsemna ainaniñe bëts añémoca, y más fsëntseboše jájbanana quem cuerpiñe vida jtsebomnana, jama Bëngbe Utabnáftaca nyetsca tescama vida jtsebomnama. ⁹ Chíyeca bënga bëtsá fsëndëntsena Bëngbe Utabná sempre oyejuayá jabemama, masque bënga quem luarentše quem cuérpoca tmojtsiyena, o ya ndoñe. ¹⁰ Er nyetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentše chabe cuerpiñe vida yojjëftsebomnëntscuana tojëftsemcá.

Jábuayenama ntšamo Bëngbe Bëtsá inama entšanga tempcá tšabá cháftaca chamotsatsmënama

¹¹ Chcasna, Bëngbe Utabná nyetscangbiamana chë más bëtsá yomnama jtsejuabnayeše, bënga bëtsá fsëndama entšanga jáyënjanama, bënga tšabá fstsamama chamotsejuabnama. Pero Bëngbe Bëtsá ya endétatsëmbo ntšamo bënga fstmënama, y atše sentsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnéngaca, chë bëngbiamana aíñe ca cmojtsëtsëtná juabnénga. ¹² Bënga ndoñe cachiñe cabëngbiamana queftsatoyebuambná; chca fsëntsichamo ndayá tšëngaftanga oyejuayënga bëngbiamana chašmotsemnana, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entšanga canÿe entšábeñe tmojtsonÿacá y ndoñe chca chë entšabe ainaniñe tomna soyëngaca. ¹³ Er bënga mo chë ndoñe corente juabna ndbomnëngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnëngcá fstsamëse, jtsemnana tšëngaftangbe tšabiamana. ¹⁴ Bënga chca fsëndmëna, Cristo šondábabuanÿeshanayeca, y chë soye endama bënga nÿe cha fchaitseservénama, er bënga fsëndenojuabná y puerte tšabá fsëndétatsëmbo, canÿa, Cristo, nyetscangbiamana tojanóbanama; y cha nyetscangbiamana tojanóbanayeca, endmëna mo cha tojanóbana ora, nyetscanga cháftaca cuafjobancá. ¹⁵ Y Cristo nyetscangbiamana tojanóbana, chë quem luarentše vida bomnënga ndoñe más nÿe cachëngbiamana chamondëtsiyenama, sinó chabiamana, nda chëngbiamana tojanóbana y tojtanayena. ¹⁶ Chíyeca, bënga ya ndoñe ndocnabiamana queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Crístbiamana fsënjanjuabná, mora ya ndoñe chca chabiamana queftsatsjuabná. ¹⁷ Chcasna, nderado nda Crísoftaca cánÿiñe mo canÿacá tojtsemna, Bëngbe Bëtsá tojama cha mo canÿe tsëm entšacá chaotsemnana. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inÿe soyënga y tsëm soyënga.

¹⁸ Bëngbe Bëtsá endmëna nda chca inétsama, entšanga mo tsëm entšangcá jábiamama; y cha Crísoftaca tojama bënga tempcá tšabá cháftaca chamotsatsmënama. Y cha bënga canÿe trabajo šonjanabanÿé, bënga entšanga

jábuayenama, Bëngbe Bëtsá inétsama entšanga tempcá tšabá cháftaca chamotsatsmënana, y entšanga jujabuáchama chca chamotsemnana. ¹⁹ O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tšabá cháftaca jtsatsmënana, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyetsca tescama castigánënga jtsemnana ndoñe chaondétsamnana. Y bënga šonjanabanjë chë trabajo, entšanga jtsabuayiynayama ntšamo Bëngbe Bëtsá inama entšanga tempcá tšabá cháftaca chamotsatsmënana. ²⁰ Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadaná. Cristbe cuenta cbaimpadá, bëtscá šmochtsentšena Bëngbe Bëtsáftaca tempcá tšabá jtsatsmënana. ²¹ Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canyë bacna soyënga amá cuaftsemncá, chca, bënga Crístoftaca cányiñe mo canyáca jtsemnëse, Bëngbe Bëtsabe bominiñe tšábënga jtsemnana chamotsobenana.

6

¹ Chcáyeca, bënga Bëngbe Bëtsáftaca cányiñe trabájayënga quetsomñecana, cbontsaimpadana ndoñe nye bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebomnëse. ² Er Bëngbe Bëtsá chabe uabemana palabrënguiñe mëntšá tojánayana:

Chë tšabe soye jamama tšabá šonjaninýana ora, atše tcbonjanoyeuná;

chë ácbioye jatsbocama te, tcbonjanájabuache ca.

Smochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtsebošë aca jatsbocama.

³ Bënga ndocna bacna soye queftsátama, ndayá chaoma entšanga chë tšabe noticiënga chamotsábotema, chca, ndocná podësca chaondétsóyebuambnana bëngbe trabajuama, Cristbiana. ⁴ Inyetsá, bëngna nyetsca soyënguiñe fsënjaniyena mo Bëngbe Bëtsabe oservenëngcá; Bëngbe Bëtsábeñe obatomancá puerte uantadënga jtsemnëse, fstsésufrina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngménaca fstsemna ora; ⁵ ínýënga šojtsatsetšená ora; cárceloye šojautame ora; entšanga bëngbe contra tmojtsebouénana ora; jabuache trabájayiñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebomna ora. ⁶ Bëngnaca fsëntsinýanýná Bëngbe Bëtsabe oservénënga fstsmënana, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínýënga ntšamo šojáborlaye ora puerte uantadënga jtsemnëse; ínýëngbioye puerte bonshanánaca jtsénýayëse; Uámana Espíritu bëngbe ainaniñe jtsebomnëse; y ndegombre nyets ainánaca nyetscanga jtsababuánýeshanëse; ⁷ ntšamo Bëngbe Bëtsabiana ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiana jenëuyanama soyënga jtsebomnana, chë Satanásbioye jáyëñjanama y chabiana jenëuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe bominiñe tšábënga chamotsemnana. ⁸ Bënga fsëntsinýanýná Bëngbe Bëtsabe oservénënga fstsmënana, ínýënga bëngbiana tšabe soyënga tmojtsejuabná ora y bënga nduámanënga jtsemnana chënga tmojtsama ora; ínýënga tšabe soyënga bëngbiana tmojtsoyebuambná ora y chënga bëngbiana podësca tmojtsichamo ora; bënga áingñayënga fstsmëna ca báseftanga tmojtsejuabná

ora, pero bēnga ntšamo ndegombre yomncá jtsóyebuambnayēse. ⁹ Mo nduamanēngcá bēnga entšangbeñe jtsēnyayana, pero banga corente tšabá bēnga šondēubuatma; bēngbiana sempre resjo endmēna jóbanama, pero šmochjinýe, bēnga sempre vídaca chentsana jatóbocañana; bēnga juatsjinyama jobenayama, Bēngbe Bētsábeyeca castigánēnga fchandbétsemna, pero nýa jóbanana ndoñe. ¹⁰ Masque ngménēnga fstsemna, ainaniñe sempre oyejuayēnga fchandbétsomñe; masque ndbomñjemēngcá, pero fchandbétsama banga Bēngbe Bētsábicana bētsacá chamotsebomnama; quem luarentša soyēnga tondaye queftsátsbomna, pero Bēngbe Bētsabe entšanga quetsomñecana, ndegombre lempe fsēndētsóbomñe.

¹¹ Tšēngaftangbiana, Corintoca entšanga, lempe fsēnjayana, tondaye ntjaitēmcá; nyets ainánaca, corente cbondábabuanýeshana. ¹² Bēnga puertecbondábabuanýeshana, pero tšēngaftangna ndoñe yapa quešcátbabuanýeshana. ¹³ Atše cbontsaïmpadana, mo canýe taitá chabe básēnga cuaftsaimpadancá, atše puerte chašmotsebobonshánama, er atše corente cbondábabuanýeshana.

Bēnga mondmēna mo Bēngbe Bētsabe bēts yebncá

¹⁴ Crístbeñe ndošbuáchiyēngaftaca ndoñe šmatjenutaná ndayánaca jamama, er chca, chēngaftaca šmatjábocana mo chē jaárama uacnata ndoñe cachēnchechata tbontsemncá. Ndegombre, chē tšabe soyēnga amá y Bēngbe Bētsabe bominyiñe tšabia mēná, nýa tondayama cachcá ntsejuabnayana, chē Bēngbe Bētsá tojamandacá ndoñe tontsamacá y bacna soyēnga amacá. Ndegombre, chē entšangbe juabna binýnayáftaca vida bomná, nýa tondaye ntsebomnana chē nýe mo ibetiñcá juabnayáftaca. ¹⁵ Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. ¹⁶ Ndocna soyiñe cachcá ntsemnana, Bēngbe Bētsabe bēts yebna, chē nýe canýe Bēngbe Bētsábioye jadórama yebna, y chē entšangbe pormana soyēnga, mo diosēnga cuaftsemncá jtsadoránana soyēnga; chca endmēna, er bēnga, nyetscanga cánýiñe Jesucrístbeñe ošbuachiyēngcá, mondmēna mo Bēngbe Bētsá Ainabe bēts yebncá, ntšamo Bēngbe Bētsá chabe uabemana palabrenguiñe chabe entšangbiana tojanayancá:

Chēngbeñe vida chántsebomna y chēngbenache chántšana;
atše chēngbe Bētsá chántsemna
y chēngna atšbe entšanga ca.

¹⁷ Chíyeca mēntšánaca Bēngbe Utabná chabe entšanga tojanéyana:

“Chē bacna soye amēngbentšana šmochjésebocana, y chēngbentšana
šmochtsojuánañe;
tondaye šmattsebana, ni šmattsama ndayá Bēngbe Bētsabe entšangbiana
ndoñe tšabá tontsemncá.

As cbochanjúbuaja,

¹⁸ y chántsemna mo canýe taitacá tšēngaftangbiana,
y tšēngaftangna mo atšbe uaquiñēnga y bembangcá.

Chca séntsichamo atše, tšēngaftangbe Utabná, nyets obenana bomná ca” —
chiñe enduábemana.

7

¹ Chcasna, atšbe bonshánēnga, chca endmēna ntšamo Bēngbe Bētsá šojašebuachenacá. Chíyeca šontsamna, Bēngbe Bētsabe delante nyetsca soyēnguiñe tšábēnga jtsemnana, bēngbe cuerpama o espíritbiana bacna soye ndoñe más ntsamcá; y Bēngbe Bētsá nyetscangbiana más uamaná yomna

ca mondëjuabnáyeca, lempe ntšamo tmojobenacá mochtsiyena mo chabe entšangcá, nyetsca soyënguiñe puerte tšábenga jtsemnëse.

Ntšamo chë Corintoca entšanga juabna tmojantrócá

² Bëngbiama šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entšá chaotsemnana, y ndocnábioye chibiatsingñé.

³ Atše chca ndoñe quetsátichamo, ndoñe tšabá šmonjama ca tšëngaftangbiama jayanama, er ntšamo ya tcbonjauyancá, atše tšëngaftangbiama sempre ainaniñe puerte bonshanánaca sëndbétsenojuabnaye; y chca, mo átšeftaca canyiñcá šmochántsemna, masque chayóbana o cabá vida chaitšóbomñëse.

⁴ Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiama puerte oyejuayá sëntsemna. Lempe ntšamo tsëufrincá tsiyenama, atšbe ainaniñe bëtš añemo sëndétšóbomñe y corente sëntsoyejuá.

⁵ Macedonia luaroye fsënjánashajna orscana, ndoñe luare queftsátšobomna jóchnama, sinó nyetsca soyënguiñe fsëndëpdecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse. ⁶ Pero Bëngbe Bëtšá, chë yapa añemo ndbomnëngbiolye endbetsañemuayá, tojanma bënga ainaniñe más añemo fchaitšebomnana, Tito moye tonjánashjango ora. ⁷ Y cha tonjánabo ora, bënga ndoñe más añemo quefstëtšebomna nyë cha tojánashjanguama, sinó tšëngaftanga šmojanájabuachama y ainaniñe añemo chaotšebomnana šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiama ndoñe tšabá šmonjanma causa, y ntšamo tšëngaftangbiama atšbe tšabiana puerte iuámanana; y quem chabe noticiëngaca, cabá más sëntsoyejuá.

⁸ Er masque tšëngaftanga tša ngménaca šmojamna chë tcbonjanëbuábiamama tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatšëmbo chë tsbuanácha básefta tescama ngménënga tcmojánabiama, ⁹ mora atše puerte oyejuayá sëntsemna, ndoñe tšëngaftanga ngménënga šmojamnana, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtšá inabošcá; chíyeca, bënga ndocna bacna soye tšëngaftangbiama chibiatsma. ¹⁰ Ntšamo Bëngbe Bëtšá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbocaná chaotsemnana, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nyë quem luarama enójuabnaye entšanga mondbetšebomncá ngménana bomnentsana, ndoñe ntjóbocnana juabna jatrócana; chentsana jóbocnana nyë nyetsca tescama castigáná jtsemnana, mo nyetsca tescama cuafjobancá. ¹¹ Smochjinýe ndayá tojóbocna, ntšamo Bëngbe Bëtšá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtšcá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nyetsca chë soyënguiñe tšëngaftanga šmonjinýanyé chca bacna soye ndoñe šmonjanmama; y chca, mora tondaye quenátšmëna tšëngaftanga castigo jtšebomnana chacmotsamnama. ¹² Y chca, atše chë tsbuanácha

tcbonjanëbuábiamana ora, ndoñe checbátanëbuabiamana chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminyanyé tšëngaftanga bëngbe tšabiamana puerte šmenójuabnama. ¹³ Chíyeca bënga más añemo ainaniñe fsëntsebomna.

Pero ntsachetšá añemo fstsboomnama, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nyetsca tšëngaftangbiamana. ¹⁴ Tito tšëngaftanga jányama cabá nda ora, atše cha sënjanianana tšëngaftanga šmochjanóyeunaye chë atše tcbonjanëbuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inyetsá, lempe ntšamo tcojojauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tšëngaftangbiamana fstsóyejuama. ¹⁵ Y mora Tito más cmontsababuányëshana, ntšamo cha tcmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiamana jtsejuabnayëse šmojanofjama tojtenojuabó ora. ¹⁶ Atše puerte oyejuayá sëntsemna, er atše sëndëtatšëmbo tšëngaftanga ntšamo tšabá yomncá nyetsca soyënguiñe šmochtsamama.

8

Chënga jañëmuayama, inye ošbuachiyëngbioye nyets ainánaca jujabuáchama

¹ Y mora, Jesucristbeyeca catšátanga, bënga fsëntseboše tšëngaftanga chašmotsetátšëmbo ntšamo Bëngbe Bëtsá bëtscá tšabe bendicionënga tojama Macedonia luarentše ošbuachiyëngcá enefjuanëngbiamana. ² Chënga puerte tmojasufri, y chora chca, chënga tmojinyanýe becá imošbuáchema y tša imoyejuama; y masque puerte ndbomnjëmënga, chënga nyets ainánaca bëtscá tmojanacaredadó Jerusalenentša ošbuáchiyënga ndbomnjëmëngbiamana. ³ Atše sëndëtatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóseyeca. ⁴ Tša šonjánaimpadana chëngbioye jálesenciamana ndayánaca jamama, Jerusalenoca ošbuachiyëngbioye jujabuáchama. ⁵ Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. ⁶ Ndayá Macedonioca ošbuáchiyënga tmojanmama bënga añemo fsënjanyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbana, Jerusalenoca ošbuáchiyënga jujabuáchama, ndayá cha jamama tojanbojatšecá. ⁷ Y morna, ntšamo tšëngaftanga nyetsca soyënguiñe tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jaserviama y bëngbioye corente ababuányëshanënga —cachcá, mórnaca bëtscá šmochjama quem trabajuiñe chë ošbuáchiyënga ndbomnjëmëngbiamana, tšëngaftangbe bonshánana jtsinyanýnaye.

⁸ Chca ndoñe quecbatëtsësná mo canye mandcá; atše sëntseboše ndayá nye tšëngaftanga jáuyanana ntšamo inyënga bëtscá tmojatrabajá chë ndbomnjëmëngbiamana, tšëngaftangnaca cachcá chašmotsamama; y chca, chašminyanýema chë tšëngaftanga šmobomna bonshánana ndegombre bëtsemnama. ⁹ Er tšëngaftanga šmondëtatšëmbo ntšamo Bëngbe Utabná Jesucristo puerte tšabe soyënga bëngbiamana tojamama, bëngbioye puerte

jtsababuánÿeshanëse. Celoca, cha cabá quem luaroye ndabo ora, cha bëtsá inabomna; pero tsëngaftanga ababuánÿeshanayeca, mo canÿe puerte nduamanacá tojanóbema. Y mora, Cristo mo canÿe nduamanacá tojóbemayeca, Bëngbe Bëtsá puerte tsabe soyënga šojatšatá.

¹⁰ Tsëngaftangbe tsabiamama mëntsá cbabuayená, ntšamo quem soyiñe šmochjamama. Chë inÿe uata tsëngaftanga šmonjanbojatsé, ndoñe nÿe chë ndbomnjëmëngbiama jacjayama, ndayá chca jamama jtsebošámnaca.

¹¹ Morna, chë ndbomnjëmëngbiama trabajo šmochjapochóca; chca, ntšamo tsëngaftanga beca šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse.

¹² Er canÿe entsá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

¹³ Ndoñe quenátsmëna, tsëngaftanga puerte ujabótënga chašmoquedá, inÿengbioye atšatnaye causa, chënga ndoñe yapa ujabótënga cha-mondëtsemnana.

¹⁴ Atše sentsichamo ndayá nÿetscanga chamotsenajabuachana, chca tojtsëjaboto ora ca. Mora, chë bëtsá šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inÿe orna, chënga entsamna tsëngaftanga jujabuáchana chë cmojtsabuáshebena soyëngaca. Chca, nÿetscanga jóyëngacñana ndayá tojtsëjaboto ora.

¹⁵ Ntšamo Bëngbe Bëtsabe uabemana palabrënguiñe endayancá:

Chë tša bomnábioye ndoñe chebatanójama;

y chë nÿe batšá bomnábioye, ndoñe quebënjatanbuáshbena ca.

Tito y chabe enutënga

¹⁶ Bëngbe Bëtsá šcuatschuá, tsëngaftanga jtsanÿenama Tito ainaniñe juabnënga chaotsebomnana cha tojanmama, cachcá ntšamo bënga fsëndbomncá.

¹⁷ Er tsëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiamama puerte enduámama tsëngaftangbe tsabiana; chíyeca mora echanjá tsëngaftanga jányama, chca jamama cachá yobóseyeca.

¹⁸ Títoftaca, canÿa Jesucristbeyeca bëngbe catsata fsëntsichamná; chabiamama puerte tsabá ošbuachiyëngcá enefjuanëngbenache mondoyebuambná, chabe trabajuama chë tsabe noticiënga abuayiynayama.

¹⁹ Y ndoñe nÿe chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjëmëngbiama trabajuiñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama.

²⁰ Títoftaca cha fsëntsichamná, chca, ndocná chaondëtsichamo bënga ndoñe tsabá tifjama ca, ntšamo játbana cmojtsamniñe, chë beca juabónana játbana, ndbomnjëmënga jujabuáchama;

²¹ er bënga fsëndama lempe ntšamo ftsobencá, ndoñe nÿe ntšamo Bëngbe Bëtsabe bominiñe tsabá yomncá jamama, ndayá ntšamo entsangbe bominiñe tsabá yomncánaca.

²² Chátaftaca inÿa Jesucristbeyeca bëngbe catsátnaca fsëntsichamná; cha bënga ba soyiñe šonjinÿanÿé cha yojtseboše bëtsá jamama, Cristo jaserviama, y mora más, er cha puerte bëtsá entsejuabná tsëngaftanga puerte tsabá šmochjamama.

²³ Y Titbiamna, cha quem trabajuiñe atšbe enutá endmëna, y atšcá tsëngaftangbiama endëtrabája; y chë inÿata Jesucristbeyeca bëngbe catsatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana.

²⁴ Chíyeca, chëngbioca ošbuachiyëngcá enefjuanënga chca chamotsetatšëmbuama, chë

ichmona boyabásengbioye šmochjínjányiye tšëngaftanga ndegombre chënga šmojtsababuánjeshanama, y bënga razón fstsebomnama tšëngaftangbiama oyejuayënga jtsemnama.

9

Chë inye ošbuáchiyëngbiama crocénana játbanama

¹ Chë Jerusalenoca Bëngbe Bëtsabe entsangbiama crocénana játbanamna ndoñe quenátsiyta tšëngaftangbioye jatëbuabiamnayama, ² er atše ndegombre sëntsetatšëmbo tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inye uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebomnama, chëngnaca chë trabajo jamama. ³ Pero Jesucrístbeyeca quem catsátanga sëntsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nje bonamente chaondëtsemnama, y ntšamo sënjanayancá tšëngaftanga chašmotseprontánama; ⁴ er nderado báseftanga Macedonioquënga átšeftaca tmojá y choca ndëprontánënga tcmojánjena chë ndbomnjémëngbiama ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsetátšëmbo tšëngaftanga prontánënga šmochtsemna ca; y ndegombre, tšëngaftangbiama cabá más ouatjá nántsemna. ⁵ Chiyeca, tšabá šonjuínjnana Jesucrístbeyeca quem catsátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínjányiye ndbomnjémëngbiama šmojacjá, chca jamama tša šmobóšeyeca, y ndoñe nje batšatema jatšatayama y tšëngaftangbiama bëtscá jobuájuama šmojtseboše.

⁶ Quemuiñe šmochtsenójuabnaye: Nda nje batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana. ⁷ Cada ona bontsemna jajájuana ntšamo chabe ainaniñe tojajuabocá; ndoñe ngménaca o nje ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. ⁸ Bëngbe Bëtsá endobena jamana chábentšana nyetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nyetsca soyënguiñe cmojtsëjbotcá sempre chašmotsóbomñama, y cabá más bëtscá chašmotsebomnama, nyetsca tšabe obrënguiñe ínÿenga chašmëjabuachama. ⁹ Bëngbe Bëtsabe uabemana palabrenguiñe, mëntšá endayana chë bëtscá tojacjabiamana:

Cha nyets ainánaca ndbomnjémënga bëtscá jatšatayana;

y chë tšabe soyënga ntšamo cha tojtsamcá nyets tempo jëftsemnana.

¹⁰ Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjbotcá, y echanjama, tšëngaftanga cabá más tšabe soyënga chašmotsamama. ¹¹ Bëngbe Bëtsá echanjama tšëngaftanga nyetsca tšabe soyënga chašmotsebomnama, chca, tšëngaftanga nyets ainánaca puerte ínÿengbioye chašmatšatama, y bëngbeyeca, chë mochjójyëngacñënga Bëngbe Bëtsá chamotsatschuanama; ¹² er chë ujabuáchenana Bëngbe Bëtsabe entsanga tcojatšatá ora, ndoñe nje ndayá tojtsëjbotcá jatšatayana, ndayá chënga Bëngbe Bëtsá chamotsatschuanámnaca jamana. ¹³ Chënga Bëngbe Bëtsá

mochántsatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguine iuayancá tšëngaftanga šmobedecénama, y ntšamo tšëngaftanga tšabá jamëse, nÿets ainánaca bëtsá soyënga chënga y nÿetscanga šmojátšatama. ¹⁴ Y chënga tša mochántseboše tšëngaftanga jánÿama y tšëngaftangbiamama Bëngbe Bëtsá mochántseimpadana, er cha bëtsá tšabe soyënga tšëngaftangbiamama tojama. ¹⁵ ¡Bëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

10

Ntšamo Pablo tojánayana ínÿenga chabe contra imojtsichamo ora

¹ Y mora, atše Pablo, cbochanjáimpada, tšëngaftangbioye puerte bonshanánaca jtsënyäyëse, y tšëngaftangbiamama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentsana bënoca stsemna ora ca. ² Tšëngaftanga cbontsaimpadana, tšëngaftanga jánÿama chajá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatsëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nÿe bënga tšabá jtsomñama juabnëngaca bënga fstsiyena ca. ³ Ndegombre bënga quem luarentše fsëndoyena, pero ndoñe queftsátspelia Cristbiamama, ntšamo quem luarentša entsanga mond-uamancá; ⁴ er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entsanga japéliama monduamancá, ntšamo nÿe chënga tšabá jtsomñama juabnënga yomncá. Inÿetsá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canÿe uayayábioye jtsepochochocancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiamama, ⁵ y Bëngbe Bëtsabe osertánana jtsabotema juabnënga bomnëngbiamama, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana. ⁶ Bënga fsëntseprontana chë Cristbiamama nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

⁷ Tšëngaftanga ndayánaca jtsonÿayana nÿe ntšamo tbojtsabinÿnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crísbenga fstmënama, ntšamo cha yomncá. ⁸ Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja. ⁹ Atše ndoñe quetsátsoše tšëngaftanga chacmotsinÿana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama. ¹⁰ Er báseftanga mëntšá atšbiamama imojtsichamo: “Chabe tsbuanáchangañe cha šontsamënda bëtsá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canÿe ndocna obenana ndbomnacá, y ntšamo tojtsichamcá tondaye ntšámanana ca.” ¹¹ Chca entsanga entsamna jtsetatsëmbuana, ntšamo

bënga fstsichamcá, tsbuanachangá juíchmuase, tsëngaftangaftaca cabá ndoñe fsëntsemna ora, tsëngaftangaftaca fchaitsemna órnaca, bënga chca fchjamama.

¹² Ndegombre bënga ndoñe tša añemo queftsátsbomna jayanama nyetsá uámanënga fstmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tsábenga imomna ca, nÿe ntšamo cachëngbeñe ínÿenga imomnama jtsonÿayëse; y chca tmojtsama ora, chënga juabna ndbomnënga jtsemnana. ¹³ Bënga ndoñe yapa quifchatóyeuambaye cabëngbiamá, chca, tša tsábenga bënga imomna ca jtsenábotamnayama; fchanjóyeuambaye ndayá chë bënga tifjama tsabe trabajuama, ndayá Bëngbe Bëtsá šojabanÿecá, y chíñnaca entsemna ntšamo tsëngaftangbeñe Corintoca tifjamcá. ¹⁴ Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tsëngaftangaftaca ndoñe mafsënjamnëse; er bënga chë natsanënga fsënjamna tsëngaftangbioye jama, Cristbiamá tsabe noticiënga jábuayenama. ¹⁵ Y ndoñe quifchatóyeuambaye tša tsabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnayeca. Chamna, bënga fsëntsobátmana tsëngaftanga Cristbeñe más chašmotsošbuáchema, y chca chaojtsemna ora, bënga fchayobená ba luariñe entšanga jábuayenana, ntšamo tsëngaftangbeñe fsëntsamcá. ¹⁶ Chca, fsëntsobátmana bënga jobenayama tsabe noticiëngama jábuayenama, chë tsëngaftangbentsana más chcoye imoyena entšángbioye; chca, bënga ndoñe yapa quifchatóyeuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

¹⁷ Ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uámana entšá yomna ca, más tsabá cha cháuyana Bëngbe Utabná puerta uamaná endmëna ca.” ¹⁸ Er Bëngbe Bëtsá jayanana canÿe entšá ndegombre tsabá tojama ca, ndoñe nÿe cachá tojt-senábotamnabiamá, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiamá.

11

Pablo y chë ndoñe ndegombre ichmónënga

¹ Malaye atše šmëntjëuánta, atše básefta soyënga mo canÿe opá tojtsoyeuambnacá stsihámëntscuana, cach atše stsenabotamná ora. Masque ntšámñaca šmochtsëuánta. ² Bëngbe Bëtsábeyeca atše tša cbondábabuanÿeshana y cbondánÿena, tsëngaftanga nÿe cha chašmotsëstonama y ndoñe ínÿengbioye. Er atše Cristo sënjašbuachená tsëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tsëngaftanga júshejanguana, mo nÿe chábioye sempre ustonëngcá, ntšamo canÿe taitá chabe bembe ndocna boyabása nduabuatomá nÿe canÿe boyabásaftaca chaóbuamama jushjanguancá. ³ Mëtscuaye Evábioye tbojaningñé, y cha tbojanínÿnana puerta osertanabe soyënga cuaftsatsëtsnacá, pero ndegombre ndoñe chca yonjamna. Atše sentsauatja nderado cachcá ínÿenga tsëngaftangaftaca muanjama y tsëngaftangbe juabna chašmotrocá, y chca, tsëngaftanga chašmotsajbaná sempre jtsejuabnayana nÿe Cristo nyetsca soyënguiñe jtseeservénama. ⁴ Atše chama sentsauatja, er ndánaca jashjanguana y Jesusbiamá tojtsabuayiyná, mo cha inÿe entšá cuaftsemncá, ndoñe ntšamo bënga Jesusbiamá fsëndabuayiynacá, y tojtsama tsëngaftanga chašmobená canÿe espíritu jtsebomnana, pero ndoñe ntšamo chë Bëngbe Bëtsá tojama tsëngaftangbe ainaniñe cháumashënguama espiritcá, chë Uámana Espíritu, tsëngaftanga tsabá cha jtsëuántana. Y atše sentsauatja, tsëngaftangbe ainaniñe

inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentsana šmonjouencá, y chora tšëngaftanga chábioye beca tšabá jtsëuántana. ⁵ Pero atše sëntsejuabná tondayiñe más batsá uamaná tsmëna ca, chë Jesucristbe puerte uámana ichmónënga imomna ca juabnayëngbiama. ⁶ Atše ndoñe sënjuatsjinÿe ntšamo corente tšabá entšángaftaca jóyebuambayama; pero atše puerte tšabá sëndëtatsëmbo ntšamo stsichámuama. Bënga puerte tšabá nÿetsca soyënguiñe tšëngaftanga tcbonjanÿanÿé, ndegombre chca osertánana ftsbomnama.

⁷ ¿O atše ndoñe tšabá sënjama, tšabe noticiënga cbonjanabuayiyná ora, tšëngaftangbentsana atšbiama tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama? ⁸ Mo ínÿenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama. ⁹ Y tšëngaftangaftaca sënjamna ora y ndayánaca šojanájoboto ora, atše ndoñe checbátantjañe atšbe opresidama, chca, tšëngaftangbiama totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjamna, atšbe causa tšëngaftangbiama totcá ndoñe chaondëtsemnana; y sempre chca chántsama. ¹⁰ Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatsëmbo ndocná Acaya luarentše yochjama atše chayajbaná puerte oyejuayá jtsóyebuambayama, chë tšabe noticiënga stsabuayiyná ora; y chca chanjama atšbe opresidama chašmoyema ínÿenga ntsamncá. ¹¹ ¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endëtatsëmbo tša cbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga fstsamcá chënga imojtsetrabája ca. ¹³ Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. ¹⁴ Y chama ndoñe šmatjenjaná, er cach Satanásnaca endbëtsama mo canÿe buashinÿinÿana angelcá jtsinÿnama; ¹⁵ chíyeca, ndoñe muatjenjaná, chabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bëtsemna causa

¹⁶ Cachiñe cbochtëtéyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnayama jobenayama. ¹⁷ Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatsëmbëse ndegombre stsebomna ndáyeca jobenayama jtsenábotamnayana. ¹⁸ Banga mondmëna, cachënga jtsenábotamnayana ndayá quem luarentše chënga tmojamama, as átšnaca chantsenábotamnaye. ¹⁹ Tšëngaftanga chë tša osertánënga, oyejuayënga opëngbioye jtsëuantánana. ²⁰ Atše sëndëtatsëmbo tšëngaftanga chë opëngbioye šmnetsëuantánama, er tšëngaftanga šmondbëtsëuantana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tcmojtsajuebjantsetayënga.

²¹ Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiama šmojayancá, tšëngaftangaftaca chca jamama.

Inyënga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átšnaca añemo sëntsebomna chama jtsenábotamnayama; chca stjayana ora, mo canye opá tojtsoyebuambnacá sëntsoyebuambná. ²² Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahábentšana entsanga imomnama. Atšnaca Abrahábentšana entsá sëndmëna. ²³ Chënga jtsichámuana Cristo imoservenca. Atše chëngbiama cabá más tšabe oservená sëndmëna. Chca stjayana ora, mo canye opá tojtsoyebuambnacá sëntsoyebuambná. Atše chëngbiama más tijatrabajá, más šmojutame, más šmojatsetšená y ba soye atšbiama resjo endmëna jóbanama. ²⁴ Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. ²⁵ Unga soye niñëbéngaca šmonjanëtsjanganja, y ndëtsbéngaca canye šmonjanatëchënganja. Unga soye chë atše sënjánenjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejëtanana. ²⁶ Atše becá sënjánana, y chca atšbiama resjo enjamna bëts fshajayënguiñe y uacucuatšënga chašmuebiatbëbama; resjo cach atšbe entsángbentse, judiënga y ndoñe judiëngbentse; resjo bëts pueblënguentse, entsanga ndoyenentse y mar béjayoca. Atšbiámna resjo enjamna chë Jesucristbeyeca atšbiama catsátanga imomna ca jtsichámuana, pero ndegombre chca ndoñe mondmënéngbeñe. ²⁷ Atše bëtschá tijatrabajá empás uamëntšnaya joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebomncá; tijasufri sësna y tondaye entsayama.

²⁸ Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschbatsmëna, er ndoñe quetsátstatsëmbo ntšamo nyetsca ošbuachiyëngcá enefjuanënga imojtsiyenana. ²⁹ Ndánaca tšabe soye jamama tondaye añemo tontsebomna ora, atše chabiama šochandbóngmia, mo átšnaca cach tondaye añémoca cuabndëtsemncá. Nderado inyënga tmojama ndánaca bacna soyiñe chaótsatsama, atše ndegombre puerte ngmëna chandbëtsesufrina. ³⁰ Nderado nya tojásiyta atše ndayama jatenábotamnayama, as chë atše tondaye obenana ndbomná tsmënama inyanynaye soyëngama chtsenábotamnaye. ³¹ Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endëtatšëmbo atše ndegombre stsihámua chë sëntsoyebuambná soyënguiñe. ³² Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atše chašmishachama chëjana stsebocana ora; ³³ pero básefta enutënga, canye sbarëcuiñe šmontsanëstjango chë pueblentša shëconana tapiëšiñe canye atëfjnëjana, y chca atše sënjanobená chëngbe cucuatšëntšana jótsbocana.

12

Ndayá Pablo mo otjenayoquëcá tojáninye y ndayá Satanás tojanma, Pablo chaosufrima

¹ Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinýe Bëngbe Bëtsabe soyëngama y Bëngbe Utabná šojinýinýe soyëngama. ² Atše canýe entšá sënduábuatma, cha Crísoftaca cánýiñe mo canýacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatsëmbo Bëngbe Bëtsá cha tbojanánatse chabe cuérpoca o nýe chabe espiritiñe. ¡Nýe Bëngbe Bëtsá chama yotátšëmbo! ³⁻⁴ Atše sëndétatsëmbo Bëngbe Bëtsá chë entšábioye celoye tbojanánatsama, nýetscanga oyejuayënga imomnoye (atše ndoñe quetsátstatsëmbo Bëngbe Bëtsá tbojanánatse chabe cuérpoca o nýe chabe espiritiñe; nýe Bëngbe Bëtsá chama yotátšëmbo), y chentše cha tojanuena palabrënga, ndocná bontsemna jayanama palabrënga, chë ndayama entšangbiama ndoñe yontselesenciana jatichámuana. ⁵ Atše chë entšá sëndmëna. Canýe entšá ndáftaca chca tojopasabiama, tšabá nántsemna chama jtsenábotamnayana; pero cach atšbiana jtsenábotamnayana ndoñe tšabá ntsemnana, ndayá nýe chë atše mo obenana ndbomnacá tsmënama inýinýnaye soyëngama chantsenábotamnaye. ⁶ Y nderado jtsenábotamnayama atše stseboše, chca ora atše ndoñe stsama mo canýe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiana tbojtsinýanama o ntšamo atšbiana cha tojouenama atše más tsmëna ca. ⁷ Chíyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninýinýe entšá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canýe bëts uchmašëfja atšbe cuerpiñe tojt-sashacuancá, mo Satanasbe ichmona soycá, atše chaisufrima chaomama. ⁸ Unga soye Bëngbe Utabná sënjaimpadá chca sufrínana chašotsebojuánama; ⁹ pero Bëngbe Utabná šonjauyana: “Nýe atšbe bonshánana endmëna lempe ntšamo cmojtsajabotcá; nýetscanga atšbe obenana más tšabá jinýana, chë obenana ndbomna entšángbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inýinýnaye soyëngama, Cristbe obenana átšbeñe sempre chaot-somñama. ¹⁰ Chíyeca, Cristo jaserviama, oyejuayá chandbëtsemna atše mo obenana ndbomnacá stsemna ora, ínýenga šmojtsoyenguá ora, puerte padecena soyënga causa ndayá jamama ndoñe sëntsetatsëmbo ora, atše puerte chaisufrima ínýenga tmojtsama ora y puerte tšetšena ainánaca stsemna ora; er chca soyënguiñe stsemna ora, mo canýa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

Nderado ndayá Corintoca ošbuáchiyënga muanjamama Pablo yojánauatja

¹¹ Atše chca chë soyëngama sëntsenabotamná ora sënjoyebuambá mo canýe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanýenga yojtsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnama. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juab-nayëngbiama, masque atše šontsebiona mo atše tondaye cuaftsamancá. ¹² Canýa Jesucristbe ndegombre ichmoná bëtsemnama inýinýnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inýinýnaye soyënga y chë tšabe soyënga ntšamo chora tonjanopasacá, puerte tšabá jtsinýanýnayana atše canýe ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse. ¹³ ¿Ndayá tšëngaftanga ndoñe cachcá šmonjanóyëngacñe chë

inÿe luarenache ošbuachiyëngcá enefjuanëngbiama? Canÿe soye aínne, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aínne sënjalesenciácá. Smochtseperdóna chca bacna soye tšëngaftangbiama tija-mama.

¹⁴ Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiama mo canÿe taitacá, Crístbeñe šmontsanošbuachéyeca, atše chabiamama tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiama. ¹⁵ Y atše corente oyejuayá lempe ntšamo tsbomncá chanjátšataye, y atše jopochócantscuanënaca, tšëngaftangbe tšabiamama. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

¹⁶ Ndoñe; tšëngaftanga tšabá šmondétatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo ínÿenga ndayíñnaca jáingñama atše tstátšëmbo ca, chëngbentsana crocénana josháchiñama; y atše catijama, ínÿenga jáingñase, nÿe ntšamo atše tsbošcá chamotsamama ca. ¹⁷ ¿O nderado atše tchojaingñé, canÿa chë tšëngaftangbioye sënjichamó chentsáftaca? ¹⁸ Tito sënjanimpadá tšëngaftanga jányama chaotsama, y cháftaca sënjanichmó chë inÿa bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

¹⁹ Nderado tšëngaftanga šmojtsjuabná bënga jenëuyanama chca cbojtsëtsësná ca; pero ndoñe chca quenátsmëna. Inÿetšá, bënga Crístoftaca cánÿiñne mo canÿacá entsangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucrístbeyeca atšbe bonshana catšátanga, tšëngaftangbe tšabiamama tijayana, Crístbeñe corente chašmotsošbuáchema y ainaniñne bëts añemo chašmotsebomnana. ²⁰ Er atše sentsauatja, atše jányama chajjá ora, ndoñe chacbondánÿena ntšamo tsbošcá, y tšëngaftanga atše ndoñe chašmondínÿena ntšamo šmojtsebošcá. Sentsauatja nderado bacna soyënga šmattsama: jtsenpenzentserana, ínÿengaftaca yapa jtsenántšabošana, ndayánaca rábiaca jtsamana, nÿe tšëngaftangbiama tšabe soyënga jtsebomnana jtsebošana, ínÿengbiama podesca ichámuana, uayátsenayënga jtsemnana, ínÿengbiama cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chacbojánÿenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá. ²¹ Atše sentsauatja, cachiñe jányama chajjá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngmënacama jošachnama ba tšëngaftangbiama, ndëmuanÿenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntšobencá.

13

Inÿe soyëngama jábuayenama y jádiošoftama

¹ Móraca ya unga soyama tsëngaftanga jányama chanjá. Atse chajáshjango ora, tojtseytëse chanjayana ntšamo báseftanga tmojamcá tsábá o ndoñe tsábá bétsemnana. Nda bacna soye ntšamo Moisesbe leyiñe endëmandancá tojama ora, atse chanjayana cha ndoñe tsábá tonjama ca; pero útata o únganga tmojtsemnëse, chënga chamuayanama cha ndegombre chca tojamama. ² Atse tempo sënjanabuayená, chë tsëngaftanguentsënga bacna soye tmojánamënga y chë ínÿenga, atse šojtsanmëna jácastigana, chca soyënga amana ndoñe tmonjájbánanga. Mora, tsëngaftangbentsána bënoca sëntsemna ora, cachiñe cachcá cbëtëtabuayená, ntšamo sënjanamcá chë tsëngaftangaftaca uta soyama sënjamna ora: atse cachiñe jányama chajase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. ³ Atse chca chanjama, er tsëngaftanga šmontsenguá ndayánaca tsábá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tsëngaftangaftaca cha tojamama; ndayá chabe bëtš obenana tsëngaftangbeñe bëtscá jtsinÿanÿayana. ⁴ Er cha tmojancrucificá mo canÿa obenana ndbomnacá; pero mora, Bëngbe Bëtšá puerte obená bëtšómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtšá puerte obená bëtšómñeyeca, tsëngaftanga jtsaservénama.

⁵ Tsëngaftanga cada ona šmochjšhénojuaboye, tsábá jtsetatšëmbuama mocna entšanga bétsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Šmochjšhénojuaboye chca šmošbuáchema ntšamo šmojtsemnama y tsábá ínÿenga šmochjínÿanÿiye. ¿Ndoñe šmondétatšëmbo Jesucristo tsëngaftangbe ainaniñe yoyenama? Ndoñesna, tsëngaftanga ndegombre ndoñe Crístbeñe ošbuáchiyënga šmontsemna. ⁶ Pero atse sëntsobátmana tsëngaftanga ndegombre chašmotsejuabnama bënga Jesucristbe ndegombre ichmónënga ftsmënama. ⁷ Y Bëngbe Bëtšá fsëntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënama tsëngaftanga jinÿanÿiyama, ndayá ntšamo tsábá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjáboto jinÿanÿiyana ntšamo bënga bëngbe mándoca ftsmënama mo ichmonëngcá, tsëngaftanga jábuayenama. Pero chë soye tondayana šattsentšamna, ⁸ er bënga queftsátobena tondaye jamana Bëngbe Bëtšabe ndegombre soyëngama contra; nÿe ntšamo chabe ndegombre soyënga yomncá aíñe. ⁹ Bënga fsëntseboše ntšamo tsábá yomncá tsëngaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿaycá, y tsëngaftanga ainaniñe bëtš añémoca šmojtsemna ora y puerte tsábá šmojtsenománda ora. Bënga Bëngbe Bëtšá fchandbétseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tsábënga, y lempe ntšamo tsëngaftanga chašmotsemnama Bëngbe Bëtšá yobošcá. ¹⁰ Quem tsbuanácha cbontsëbuabiamná tsëngaftangaftaca cabá ndoñe sëntsemna ora; chca, atse choye chajá ora ndoñe chašondétsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tsëngaftanga jujabuáchama chábeñe corente chašmotsošbuáchema y ainaniñe bëtš añemo chašmotsebomnama, y ndoñe tsëngaftanga jatapochócama.

¹¹ Morna, Jesucristbeyeca atšbe catšátanga, tsábá chašmotsomñe, šmochtsajbaná chca bacna soyënga amana y šmochtsemna lempe

ntšamo Bëngbe Bëtsá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjémbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebonnama endamá, tšëngaftangftaca echántsemna. ¹² Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá. ¹³ Nÿetsca quem luaroca ošbuáchiyënga cmontsacheuaná.

¹⁴ Atše, Bëngbe Bëtsá sëntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámána Espíritu sempre chašmotsóbomñe, y chë Uámána Espíritoftaca cánÿiñe mo canÿacá chašmotsomñe.

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sentsabiamná Jesucristbeñe ošbuáchiyëngbiana, chë Galacia luaroca ošbuachiyëngcá enefjuanëngbiana. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. ³ Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. ⁴ Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. ⁵ Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

Nÿe canÿe ndegombre buayenana soyënga Cristbiana endmëna

⁶ Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. ⁷ Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentsë, ba ndegombre soyënga jtsejuánama, inÿe soyënga jacjayama. ⁸ Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tchbonjanabuayenacá, as chë chca tojtsamabiana ¡Bëngbe Bëtsá chaoma infiernoca becá chaosufrima! ⁹ Tempo ya chca sënjánayana; mora cachiñe šcutëtayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiana chaoma infiernoca puerte chaosufrima!

¹⁰ Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama

¹¹ Atše sëntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarentša entšangbe juabnentšana ndoñe yondóbocanama. ¹² Ndocna entšá

chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

¹³ Tšëngaftanga šmojátatsëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. ¹⁴ Atše inÿe judiënga cach atšcá uata bomnëngbiana más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá. ¹⁵ Pero Bëngbe Bëtsá atšbe tšabiana yojanjuabná, y chíyeca, atše cabá ndonÿna ora, canÿe bëts soyama cha šojanbocacá. ¹⁶ Y cha tojánbošena ora, šonjaninÿinÿé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënema chašobuayenama; ¹⁷ y Jerusalenoye cach ndoñe chiyataná chë atšbiana más natsana Jesucristbe ichmónënga imojamnëngaftaca jencuéntama. Chamna, cachora Arabia uabaina luaroye sëntsanofñe, y chentšana Damasco bëts puebloye sëntaná.

¹⁸ Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca jencuéntama, y cháftaca nÿe uta semana sënjëftsemna. ¹⁹ Y ndocna chë Jesucristbe inÿe ichmónënga chiyáisananÿe; nÿe Santiago aíñe, Bëngbe Utabnabe catšata. ²⁰ Bëngbe Bëtsá šontsonÿá, ntšamo tšëngaftanga chontsëtsëtsnacá ndegombre bëtsemnama.

²¹ Jerusalenocana sënjëftsanbocnentšana, Siria y Cilicia luarëngoye sënjána. ²² Pero chë tempo, chë Jesucristbeñe ošbuáchiyënga Judea luariñe bomínÿeca ndoñe quešmënjatanábuatma. ²³ Nÿe ínÿengbioye imojtsayaunana: “Nda tempo bënga puerte chamotsesufrínama enjanamá, mora entsanga entsabuayinÿá, Jesucristbeñe jtsošbuáchiyama caojtsamna ca. Y tempo cha tša enjánboše jamama entsanga Jesucristbeñe ndoñe chamondëtsošbuáchema ca” —chënga imojtsichamo. ²⁴ Y entsanga Bëngbe Bëtsá imojtsatschuanaye, ndayá cha atšbiajana tojanmama.

2

Chë inÿe ichmónënga tmojánayana Pablo aíñe tšabá yojsama ca

¹ Jerusalenoye sënjána orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše. ² Choye sënjána, choye jama šojamnama Bëngbe Bëtsá šonjaninÿanÿéyeca. Atše nÿe chë Jesucristbeñe ošbuáchiyëngbiana uámanënga imojamnëngaftaca sënjanencuentá, ínÿengaftaca ndoñe; y chë tšabe noticiëngama chë ndoñe judiëngbeñe sëndabuayinÿama chënga sënjanacuntá. Chca sënjanma atše jtsetatšëmbuama, ntšamo tijanma y sënjëftsamcá ndoñe nÿe bonamente yonjamnama. ³ Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinÿnama. ⁴ Chca tonjanopasá, masque ínÿenga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojsanopasánama chë ošbuáchiyënga ntsetatšëmbcá, mo chë ošbuáchiyëngbiana bacna soyënga jamama cuafseitëmena cuenta.

Chënga tmojánabo jtsetatsëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nyëts tempo mandánënga chamot-siyenama. ⁵ Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga beca fsënjánboše tšëngaftanga nyëts tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanýëngbiama entšanga monjánichamo chë uánatsanënga imojamna ca (ndayá chënga tempo imojamna atšbiamama ndoñe quenatámama; Bëngbe Bëtsabiamama nyëtscanga cachcá monduámama), chëngna tondaye chešmatanbuayená, ntšamo tempo tijanmama inýetsá chaimama. ⁷ Masna, chënga tmonjántatsëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntsabuáchema, ntšamo judiënga jábuayenama cachcá Pédrëbioye tbojanëntsabuachecá. ⁸ Er Bëngbe Bëtsá atše chabe ichmoná šonjánbema, ndoñe judiënga chabiamama jábuayenama, ntšamo cachá Pédrëbioye chabe ichmoná tbojanbemcá, judiënga chabiamama jábuayenama.

⁹ Santiago, Pedro y Juan, chë ošbuachiyënguentša uánatsanënga, atše canýe bëts trabajo chaitsebomnana Bëngbe Bëtsá tojanmama tmonjántatsëmbona ora, cucuatše šontanatšataye atše y Bernabëbioye, jinýinýiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiyayama trabajo jamama, y chëngna judiëngbeñe. ¹⁰ Chënga nyë šonjanaimpádaye chë ošbuáchiyënga ndbomnéjémënga Jerusaleñoquëngbiama jtsenójuabnayama; y atše bëtscá séntsama chënga jujabuáchama.

Pablo Antioquioca Pédrëbiamama tojánayana cha ndoñe tšabá tojanma ca

¹¹ Pero Pedro Antioquía bëts puebloye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. ¹² Mëntsá tonjanopasá: Santiago básefta entšanga Antioquiocyte tojanichmó, pero chënga cabá choca ndáshajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnana yojánamna ca tmojánayanënga, chabiamama muanjájuaboyama yojtsauatja causa. ¹³ Chë inýe judiënga ošbuachiyëngnaca tmojanontsé amana cachcá ntšamo Pedro yojtsamcá, jtsamëse ntšamo chënga imojántatsëmbo chca jamama ndoñe yonjanamncá. Y Bernabénaca, ntšamo chënga imojtsamcá jtsónýayëse, chëngcá yojtsama, jtsamëse ntšamo cha yojántatsëmbo chca jamama ndoñe ibonjamncá. ¹⁴ Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninýe ora, Pédrëbioye nyëtsca ošbuáchiyëngbe delante sënjanayana: “Aca canýe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

¹⁵ Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmncá, chë “bacna soye amënga ca”, ndoñe queftsátsmëna. ¹⁶ Y bënga mondëtatšëmbo, canýe

entśá Jesucristbeñe tojtsoşbuáchema, Bëngbe Bëtsá jamana cha chabe bominiñiñe tşabia chaotsemnana, y Bëngbe Bëtsá ndoñe chca ntjamana, ntşamo chë judiëngbe leyënguiñe jamama yomna ca iuayancá chë entśá tojamama. Y bëngnaca Jesucristbeñe imojtsoşbuaché, Bëngbe Bëtsá chaomama bënga chabe bominiñiñe tşábenga chamotsemnana, pero ndoñe ntşamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canye entśá chabe bominiñiñe tşabia chaotsemnana, ntşamo chë judiëngbe leyënguiñe iuayancá jamama ibomna ca cha tojamama.

¹⁷ Pero, bënga bëtsá mondënguá, Bëngbe Bëtsá chaomama bënga chabe bominiñiñe tşábenga chamotsemnana, bënga Crísoftaca cányiñe mo canyáca jtsemnëse, chábeñe imoşbuáchema. Chca mondoşbuaché, bënga chë bacna soyëngama perdonánënga chamotsemnana. Pero inye entşanga jtsichámuana bënga bacna soyënga amënga imomna ca, ntşamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga şuabiamná ca nántsayana? ¡Ndoñe, ndegombre ndoñe! ¹⁸ Atşe, ntşamo Bëngbe Bëtsá şojaninñinñecá, chë şojtsemna jájbanama soyënga, cachiñe jajuaboyama y jamama stëtontşese, mo chë Moisesbe ley jtsocumplínana perdonánënga jtsemnana, atşe stsemna mo nda ndayá cachá tojtseñdbema y cachiñe tojtşejebuanacá; y ndegombre, atşe stsemna canya ntşamo ndoñe tşabá yondmëncá amá. ¹⁹ Chë judiëngbe leyëngaca atşe sëndëtatsëmbo, ntşamo chë leyënguiñe iuayancá stsamëse, Bëngbe Bëtsá ndoñe yochanjama atşe chabe bominiñiñe tşabia chaitsemnana; y chca, atşe jtsemnana mo obanacá chë castígoca, er chë leyentşa mandënga stsamëse, ndoñe quetsátobena atsbo-caná jtsemnana. Chë léyeca ndoñe más mandaná ntsemnana jtseboşëse, atşe cachcá chë ley sënjanonýá, Jesucristbeñe jtsoşbuáchiyama; y chca, atşe chaitsobena jtsiyenana Bëngbe Bëtsá jtseşervënëse. Atşe Crísoftaca cányiñe mo canyáca sëndmëñayeca, Cristo cruciñe tojanóbana ora enjamna mo átşnaca cuafjobancá; ²⁰ y mora entsemna mo nye atşe ya ndoñe cuafsiyencá, Cristo becá vida atşbe ainaniñe entsebómñayeca. Y ntşamo mora atşe vida sëntsebomncá, entsemna atşe chë Bëngbe Bëtsabe Uaquiñábeñe betsoşbuáchiyama, nda şojánbobonshana, y chabe derecho vida jtsoşbomñama cachcá tojanonýá y atşbe tşabiamna tojanóbana. ²¹ Atşe ndoñe quetsatábotena ntşamo Bëngbe Bëtsá entşangbe tşabiamna juabna yobomncá. Nderado Bëngbe Bëtsá tojama canye entśá chabe bominiñiñe tşabia chaotsemnana, ntşamo chë leyiñe jamama yomna ca iuayancá cha tojtşamama, as Cristo nye tondayama matënjanóbana.

3

Ley jtsobedecënëse o Jesucristbeñe jtsoşbuáchiyëse

¹ ¡Tşëngaftanga Galacientşa entşanga, yapa ndenójuabñayënga! Entsemna mo nda tcmojtsabocjuanacá, tşëngaftangbe juabna tojtsetrocá. Ndoñe queşnátësertana ntşamo chca nanjopása, er cach atşe botamana cbonjanabuayinñá, Jesucristo cruciñe tojanóbana. ² Atşe sëntseboşe nye canye soye atşe chaşmëyana: ¿Uámana Espíritu tşëngaftangbe ainaniñe tojanamashëngo jtsemándayama, tşëngaftanga ntşamo chë leyiñe jamama yomna ca iuayancá şmojamama, o tşëngaftanga chë tşabe noticiënga şmojanuena y chiñe şmojtsoşbuáchema? ³ ¿Ndáyeca tşa ndenójuabñayënga şmomna? Bëngbe Bëtsabe Espíritbeyeca tşëngaftanga şmonjanontşé mo tsmëma entşangcá jtsemnana. ¿Y mora şmojtseboşe tşëngaftangbe vidënga jachñënguama nye entşangbe juabñëngaca jtsiyenëse? ⁴ ¿Nyetsca soyënga

ndayëjana tsëngaftanga šmojachnějna, tondayama tonjoservé? Ndegombre chca ndoñe taiuatsmëna. ⁵ Bëngbe Bëtsá, chë Uámana Espíritu tsëngaftangbe ainaniñe cháumashënguama tojanma ora, y tsëngaftangbeñe bëts soyënga chaopasama tojama ora, ¿ndáyeca chca nanjama? ¿Tsëngaftanga ntšamo chë leyiñe jamama yomna ca iuayancá šmojtsamama, o tsëngaftanga Jesucristbe tsabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrenguiñe mëntsá endayana: “Cha Bëngbe Bëtsabeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tsabia yojamna ca.” ⁷ Chíyeca tsëngaftanga cmontsamna jtsetatšëmbuana, Bëngbe Bëtsabeñe ošbuáchiyënga mondmëna mo Abrahám bentsana entsangcá, cachcá ošbuáchiyana bëtsebomnama, chë chá bentsana ndegombre entsangbiamá más. ⁸ Bëngbe Bëtsabe uabemana palabrenguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tsábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrenguiñe, cabá chca ndëma ora, Bëngbe Bëtsá Abrahám bioye quem tsabe noticiënga tbojanbuayená: “Acbeyeca, atše chanjama nyetsca quem luarentša entsanga tsabe bendicionënga chamotsebomnama ca.” ⁹ Bëngbe Bëtsá tojanma Abraham ba tsabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiám naca ba tsabe soyënga jamana, cachcá ntšamo Abrahambiamá tsabe soyënga tojanmcá.

¹⁰ Chë Bëngbe Bëtsá chabe bominiñe tsábenga yochjábiamá ca juabnayënga, ntšamo leyiñe jamama yomna ca iuayancá lempe tmojtsobedecënama, chënga nyets tempo jtsiyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrenguiñe mëntsá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguiñe iuabemancá ca.” ¹¹ Ndegombre, puerte tsabá entsinñinýena, Bëngbe Bëtsá ndoñe yochanjama ndocná chabe bominiñe tsabia chaotsemnama, ntšamo chë leyiñe jamama ibomna ca iuayancá tojtsobedecëñe. Chca ndegombre endmëna, er Bëngbe Bëtsabe uabemana palabrenguiñe mëntsá endayana: “Nyë ndabiamá Bëngbe Bëtsá tojama chabe bominiñe tsabia chaotsemnama, cha Bëngbe Bëtsabeñe betsošbuáchema, cha ndegombre chë nyetsca tescama yomna tsabe vida echántsebomna ca.” ¹² Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsabeñe cuaftsošbuachecá. Ntšamo Bëngbe Bëtsabe uabemana palabrenguiñe endayancá: “Nda tojtsama nyetsca mandënga ntšamo chë leyënguiñe endayancá, tsabe vida echántsebomna, nyets tempo chë leyëngaca mandaná ca.”

¹³ Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrenguiñe endayancá: “Nyetsca tescama castigo chaotsebomna, nda canýe niñësiñe tmojajonýá chaóbanama cha ca.” ¹⁴ Chca tojopasá, Bëngbe Bëtsá chaomama, chë tsabe bendicionënga ntšamo cha Abrahám bioye tbojanšbuachenacá, ndoñe judiëngnaca chamotsebomnama, Cristo Jesús beyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócamá

¹⁵ Jesucristbeyeca catšátanga, chë ndayá sentsichamcá endmëna ntšamo nÿets tempo entšángbeñe endbetsopasancá. Uta entšata tbojenoyeuná canÿe trato jénbemama, y ntšamo tbojenšbuachenacá chaotsinÿnama chatbe uabaina tsbuanáchañe tbojuábemëse, ndocná inÿa más ntobenana jayanana ntšamo tbojentratacá ndoñe yontsoserverna ca; y inÿe soyënga chiñe jacjayama cach ndoñe. ¹⁶ Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamama jamama, y chabe entšanguentšana canÿabiámnaca. Y Bëngbe Bëtsabe uabemana palabrënguiñe ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiama cuaftsichamcá; sinó mëntšá endayana: “acbe entšanguentšana cánÿabiamama ca”. Y chca entsayana, nÿe canÿe entšá ca; y cha endmëna Cristo. ¹⁷ Atše ndayá mëntšá cbontsëtsëtsná: Natsana, Bëngbe Bëtsá Abrahánoftaca canÿe trato tojánbema, y tbojaniyana “áiñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšíñe chë leyënga tbojanántšaboshjona; chíyeca, chë leyënga ndoñe ntobenana jamana chë Bëngbe Bëtsá Abrahánoftaca tojánbema trato ndoñe chaondëtsooservénama, ni jamana ndayá Bëngbe Bëtsá tojanšbuachenacá ndoñe chaondëtsooservénama. ¹⁸ Er ndayá Bëngbe Bëtsá chabe entšanga tojatšatacá, tojtsemna chënga ntšamo chë leyiñe jamama yomna ca iuayancá tmojtsamama, chca, chë tsetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiamama jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamama tojanma.

¹⁹ Asna, ¿ndayama chë Moisesbe ley nantsoserverna? Bëngbe Bëtsá chë leyënga tojanáboshjona, ba tšabe soyënga jamama Abrahámbioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinÿanÿiyama ndayá tšabá o ndoñe tšabá jamama bëtsemnama, chë Abrahámbentšana Uámana Entšá jashjanguëntscuana, ndabiamama Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšíñe tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entšángaftaca. ²⁰ Uta entšata canÿe trato jénbemamna, jtseytana inÿe entšá chë uta entšátaftaca chaóyebuambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nÿe canÿa chca tojanma, y ndoñe bonjanájaboto inÿa chabiamama Abrahánoftaca chaóyebuambama.

Ndayama chë ley yomna

²¹ ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšíñe canÿe ley tojanáboshjona, y chë ley tojtsobena jamana entšanga ndegombre tšabe vida chamotsebomnama, as Bëngbe Bëtsá nanjama entšanga chabe bominÿíñe tšábenga chamotsebomnama, ntšamo chë leyiñe jamama yomna ca iuayancá tmojtsamama. ²² Pero Bëngbe Bëtsabe uabemana palabrënguiñe endayana, nÿetsca quem luarentša entšanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jójëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

²³ Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama

Bëngbe Bëtsá jinÿanÿiyama tempo joshjanguëntscuana. ²⁴ Cristo jabama tempo tonjanoshjanguëntscuana, chë ley bëngbiana enjamna mo canÿe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Crístbeñe jtsošbuáchiyama chamobenama, y chca, Bëngbe Bëtsá chaoma bënga chabe bominÿiñe tšábenga chamotsemnana. ²⁵ Pero Jesucrístbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canÿe entšacá, ndayá tšabá yomncá bënga chamotsamama cuaftsamcá. ²⁶ Cristo Jesúsbeñe šmojtsošbuáchema, nÿetsca tšëngaftanga šmojobená Bëngbe Bëtsabe básenga jtsemnana, Cristo Jesúseftaca cánÿiñe mo canÿacá jtsemnëse. ²⁷ Tšëngaftanga tcmonjanëbaye, y chca, Crístoftaca cánÿiñe mo canÿacá šmontsemna. Y mora šmojobená mo cach Crístcá jtsemnana. ²⁸ Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nÿets tempo nÿe ínÿabiana oservenënga y chë nÿe cachëngbiana trabájayënga cachcanga, y boyabásenga y shembásengnaca. Nÿetsca tšëngaftanga mo canÿacá šmondmëna, Cristo Jesúseftaca cánÿiñe mo canÿacá jtsemnëse. ²⁹ Tšëngaftanga Crístbe entšanga šmondmënayeca, šmontsemna mo Abrahám bentšana entšanga cuaftsemncá; y chca, ntšamo Bëngbe Bëtsá Abrahám bioye tbojašbuachenacá, tšëngaftanga šmochanjóyëngacñe.

4

¹ Atšnaca séntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canÿe basacá tojtsemnëntscuana, ndocna derecho chë soyënguiñe ntse-bomnana; y chca, cha jtsemnana mo canÿa nÿets tempo nÿe ínÿabiana oservenacá, masque lempe ntšamo chabe taitá tbojašbuachenacá chë uaquiñabiana tojtsemna. ² Chë uaquiñá tojtsobóchantscuana, entšanga jtsemnana ndëmuanyënga ntšamo cha tbojtsajabotcá jtsoinayana, y ínÿenga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. ³ Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nÿets tempo nÿe ínÿabiana oservenëngcá, quem luarentše imománda espiritëngaca. ⁴ Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nÿetsca entšangcá, canÿe shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse. ⁵ Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana. ⁶ Y chca, tšëngaftanga ya chabe básenga šmojtsemnana jinÿanÿiyama, Bëngbe Bëtsá chabe Uaquiñabe Espíritu tbojanichmó, nÿetscangbe ainaniñe cháuamashënguama, y chë Espíritu endama bënga Bëngbe Bëtsá chamochembo, “Atšbe Taita ca”. ⁷ Mëntšá, cada ona tšëngaftanguentšá ya ndoñe quenátsmëna mo chë nÿets tempo nÿe ínÿabiana oservenëngcá, quem luarentše imománda espiritëngaca mandánënga, y aíñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básenga jatšatayama tojašebuachenacá cha echanjóyëngacñe.

Pablo, Galacia luaroquëngbiana ngménaca yojtsanjuabnaye

⁸ Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nÿets tempo nÿe ínÿabiana oservenëngcá, ndoñe ndegombre diosënga

mondmëna espiritëngaca mandánënga. ⁹ Pero mora, Bëngbe Bëtsábioye šmónsábuatma ora, o tšabá jayanama, Bëngbe Bëtsá cmojtsebuatma ora, ¿ntšámoyeca tšëngaftanga cachiñe chë quem luarentse imománda espíritënga šmojtsayaunana? Chënga ndocna obenana quemátsbomna, y nduámanënga mondmeña. ¿Ndáyeca tšëngaftanga šmojtseboše cachiñe jtsemnana mo chë nyëts tempo nyë ínÿabiama oservenëngcá, chë espiritëngaca mandánënga? ¹⁰ Tšëngaftanga tša jtsejuabnayana diënguñe, shinÿënguñe, canÿe uatentša tempënguñe y uatënguñe, mo uámana tempëngcá Bëngbe Bëtsá tšabá jadórana, y chama bëts fiestënga jtsebomnana. ¹¹ Atše corente šontsengmena, nderado atšbe trabajo tšëngaftangbeñe tondayama tonjoservé.

¹² Jesucristbeyeca atšbe catsátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá. ¹³ Tšëngaftanga šmondëtatšëmbo, atše sënjanobená chë natsana soyama tšëngaftanga chë tšabe noticiënga jábuayenama, canÿe šocana šonjanontšáshjango causa. ¹⁴ Atše canÿe šocana sënjanbomna causa, tšëngaftangbiana ndoñe paselo quenjatsmëna tšëngaftangbeñe atše jofjana; pero masque chca, tšëngaftanga ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canÿe ángel Bëngbe Bëtsabe ichmoná šmojofjá, o cach Jesucristbioycá. ¹⁵ Ndayá chora tšëngaftangftaca enjanopasancá, puerte oyejuayënga tcmonjánabiama. ¿Y mora ndayá tojopasá? Ndegombre, atše sëndëtatšëmbo y sëntsobena jayanama, tšëngaftanga ndaye sóynaca atšbiana mašmënjánmama. Chë más uámana šmojánbomna soyënga atšbe cucuatšñe mašmënjánboshjona, y nÿa mo chë bominyëngnaca masmënjánenobuchjatsëca atše jatšetayama. ¹⁶ Y morna, ¿ntšamo ndegombre yomncá cbojtsëtsëtsnama, atšbiana šmojtsejuabná mo tšëngaftangbe uayayá cuaftsemncá ca?

¹⁷ Chë ndoñe ndegombre soyënga buátëmbayënga montsinÿinÿná mo tšëngaftangbiana ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiana ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánÿëshanama. ¹⁸ Puerte tšabá endmëna atše y ínÿënga chafstseboše tšëngaftangftaca amiguënga jtsemnana, canÿe tšabe soye jamama tojtsemnëse; y sempre chca chauétsemna, tšabiana tojtsemnëse, y ndoñe nyë atše chentše tšëngaftangftaca stsemna ora. ¹⁹ Tšëngaftanga, chë atšbiana mo atšbe basengcá šmondmëñënga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canÿe šešona jtsebomnana ora canÿe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana. ²⁰ Malaye atše, mora tšëngaftangftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiana tsësentínana. Atše tša šontsecochëngmena tšëngaftangbiana.

Ntšamo Agar y Sáraftaca tojanopasá

²¹ Canÿe soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyiñe endayanacá tacmojtsešertana? ²² Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiana nyëts tempo oservená; y chë ínÿana, cachabe shëembeñe, Sara, y mua ndocnabiama nyëts tempo oservená

yonjamna. ²³ Chë chabe shembiana nyets tempo oservernabe šešona, tojanonýná nye Abraham y Agar chca chaotsemnama tbojánbošenayeca; y cachabe shembe šešona tojanonýná, Bëngbe Bëtsá chë soye jamama Abrahámbioye tbojanšbuachenáyeca.

²⁴ Ntšamo Agar y Sara, y chatbe šešónataftaca tojanopasacá, bënga canýe uámana soye šontsabuatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nyets tempo nye ínýabiana oserverná yojamná, entsinýinýná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšifne tojanáboshjona ora. Agar básenga yojtsabamna ora, chëngnaca tmojanonýná nye ínýabiana nyets tempo oservernënga jtsemnama, y chë tratentša leyifne soyëngaca mandánënga jtsemnama tmojtsebošëngnaca jtsemnana mo nye ínýabiana nyets tempo oservernëngcá. ²⁵ Ndayá Agáraftaca tojanopasacá entsinýinýná chë Sináí batsjoca tmojánbema trato, Arabia luaroa; y chë morsca bëts pueblo Jerusalénëngaca entsinýinýná, er chentša entsanga montsemna chë leyëngaca mandánënga. Ntšamo Agar y chabe básenga nye ínýabiana nyets tempo oservernënga monjamncá, Jerusalemntša entsángnaca cachcá chëngcá mondmëna, chë leyëngaca nyets tempo mandánënga bëtsemnayeca. ²⁶ Ndayá Sáraftaca tojanopasacá, chë nye cachabiana trabájaye shembása, entsinýinýná chë trato, chë tšabe bendicionënga Abrahambiana jamama chábioye tbojanšbuachená ora. Chánaca entsinýinýná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalemntše joyénanama, y chca, ndegombre chënga mondmëna celocama entsanga. ²⁷ Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiana, y chca endmëna mo canýe shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiana, y chca endmëna mo canýe shembása aíñe boyaftaquëcá, er Bëngbe Bëtsabe uabemana palabrënguiñe chë shembásatbiana mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama,

moyejuá y moyó oyejuayá cojtsemnama.

Chca moma, er aca, chë shembása chabe boyabiana utšená, chë shembása boyá bomnabiana más básenga cochántsabamna ca.

²⁸ Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbioye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. ²⁹ Ntšamo chë tempo tojanopasacá, chë Isaac chaosufrima Ismael tojanmncá (Ismael, Abrahambe uaquiñá Agárbeñe, chë nye chata chca tbojánbošenayeca onýnaná; Isaac, chë Bëngbe Bëtsabe Espíritbeyeca onýnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. ³⁰ Pero, ¿ndayá Bëngbe Bëtsabe uabemana palabrënguiñe Abrahambe básatbiana iuayana? Mëntšá endayana: “Moma, chë nyets tempo nye ínýabiana oserverná y chabe basa acbe yebnentšana chábuaisebocnama, er chë nyets tempo nye ínýabiana oservernabe šešona ndoñe quenátobena chabe taitabe soyënga jtsebomnama. Nye chë propio shembe šešona aíñe,

er chë shemna ndoñe nÿe ínÿabiana nÿets tempo oservená quenátsmëna.”
³¹ Chcasna, Jesucristbeyeca atšbe catšátanga, bënga ndoñe quemuátsmëna mo canÿa nÿe ínÿabiana nÿets tempo oservenabe básenga cuaftsemncá, er mora ya ndoñe más quemuátsmëna chë léyeca nÿets tempo mandánënga. Y aíñe montsemna mo canÿe shema ndoñe nÿe ínÿabiana nÿets tempo oservenabe básenga cuaftsemncá, er Bëngbe Bëtsabe básenga bënga mondmëna.

5

Cristo bënga šojatsebacá

¹ Cristo bënga šojatsebacá, ndoñe más mo chë nÿets tempo nÿe ínÿabiana oservenëngcá chamondëtsiyenama, chë léyeca mandánënga. Nÿa šmochtsentšena nÿets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínÿenga chácmbiamama.

² Tšabá šmochjouena. Atše Pablo cbëyana: Nderado tšëngaftanga ndoñe judiënga, šmojalesenciá ínÿenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiana tojanmcá tondayama nantsoservenana.

³ Ndëmuanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana.

⁴ Ndëmuanÿenga tšëngaftangbentšana šmojtsenguá, Bëngbe Bëtsabe bominiÿiñe tšábenga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiana jtsejuabnayëse, chácmatsebacana. ⁵ Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominiÿiñe tšábenga nÿets tempo chamotsemnama. Y bënga chca mondobátmana, Jesucristbeñe ošbuáchiyana bómnyayeca, y chë ošbuáchiyana chë Uámana Espíritbiajana bëngbioye endobá. ⁶ Er Crísoftaca cánÿiñe mo canÿacá tmojtsemna ora, aíñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

⁷ Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama?

⁸ Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama. ⁹ Ntšamo entšanga mondëntšayancá: “Nÿe base levadura jamana nÿetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nÿetsca leyëngaca mandánënga.

¹⁰ Bënga Bëngbe Utabnáftaca cánÿiñe mo canÿacá bëtsemnayeca, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

¹¹ Y atšbiana chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsabuayiynase, entšanga ya ndoñe

muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entsanga stsbuayiyná ora, chënga ya ndoñe átseftaca nanjósentiaye. ¹² Pero chë natjëmbana ainánaca ndoñe chašmondëtsiyenama imojtsamëngna, jmalaye cachënga muanjenocbóna!

¹³ Pero tšëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojt sobena jaleséciana, nÿe tšëngaftangbe cuerpënga tšabá chamotsemnana juabnëngaca mandánënga jatiyenama. Chamna, tšëngaftanga šmuenbobonshánayeca, nÿetscanga šmochtsenájabuachana. ¹⁴ Er ntšamo Moisesbe leyentša nÿetsca mandënguiñe endayancá, nÿe canÿe mandiñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” ¹⁵ Pero ínÿenga chamotsesufrínama jtsamëse tšëngaftanga šmojt siyenëse, mo tšátjaye bayënga tmojt senashantsná y tmojt senobanacá, cuedado šmochtse bomna. Ndoñese, nÿetscanga šmatjánenpochocaye.

Ntšamo chë Bëngbe Bëtsabe Espíritbeyeca vida jtse bomnana

¹⁶ Chíyeca cbochjáuyana: Nÿets tempo šmochtsiyena ntšamo chë Uámana Espíritu cmojt samëndacá, y chca, tšëngaftanga ndoñe quešmochátama soyënga, nÿe cach tšëngaftanga tšabá jtsomñama juabnëngaca. ¹⁷ Er ndayá bënga, nÿe entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nÿe entsangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojt samëse, ndoñe quešmátobena jamana, ndayá cach tšëngaftanga, nÿe entsangbe juábnaca jamama šmojt sbošcá. ¹⁸ Tšëngaftanga, ntšamo chë Uámana Espíritu cmojt samëndacá šmojt samëse, ndoñe quecmátamna ntšamo chë leyiñe iuayancá játamama.

¹⁹ Ntšamo entsanga, nÿe entsangbe juábnaca tmojt samcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jésejuabnayana, y ndoñe nt sobenana cachënga jenomándama, chca soyënga jtsamëse. ²⁰ Ba uabouana soyënga jtsamana, diosënga yomna ca tmojt sejuabná soyënga jadórama, jtsencjuanayana, ínÿengaftaca jt senáyayana, nÿetscanga ndoñe cachcá chamondëtsejuabnana jtsamana, ínÿengaftaca yapa jt senántšabošana, soyënga nÿe rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. ²¹ Nÿe jtsebošana ntšamo ínÿa tojatashjachcá jtse bomnana, yapa tmoyënga jtse mnana, fiestënguiñe ndoñe tšabe soyënga jtsamana, y ínÿe soyëngnaca mo chë soyëngcá jtsamana. Y mora atše cbaruayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemocháts bomna.

²² Pero, Uámana Espíritu ainaniñe tojtsemánda ora, quem soyënga chentšana jóbocnana: nÿetscanga jtsababuánÿeshanana, jtsóyejuayana, natjëmbana ínÿengaftaca jt siyenana, puerte uantado nÿetsca padecéniñe jtse mnana, nÿetscanga corente bonshanánaca jt sënÿayana, tšabe ainana jtse bomnana, y nÿetscañe tšabe palabra bomnënga jtse mnana, ²³ jtsejuabnayana chë ínÿenga mo chabiama más uámanënga cuaftsemncá, y cachá nÿetsca soyënguiñe jenomándama jt sobenana. Y ndocna ley quenátsmëna, chca soyënga tmojt sama entsangbiama contra cháuyanama. ²⁴ Jesucristbenga imomnënga tmojt ama, chënga chë nÿe entsangbe juabnëngaca mandánënga ndoñe ntse mnana; ya ndoñe más, chë nÿe cachënga tšabá jtsomñama

bacna juabnëngaca mandánënga quemátsmëna, y chë nÿe cachëngbiama soyënga jamama bëtská juabnëngaca cach ndoñe. ²⁵ Bënga ndegombre tšabe vida chamotsebomnama Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. ²⁶ Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiayama, y ndoñe nÿe mochjásboše ntšamo ínÿa tojashjachcá jatsbomnama.

6

Nÿetscanga šmochtsenájabuachana

¹ Jesucrístbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemmandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonÿayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jamama. ² Chë soyënguiñe chašmojtsepdecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³ Nderado nda tojtsejuabná, cha canÿe uámana entšá yomna ca, pero ndoñe chca cha tondmënëse, cachá jtsenoíngñayana. ⁴ Cada ona chauenjuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. ⁵ Er cada ona bontsemna jtšenójuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

⁶ Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nÿetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñécá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.” ⁸ Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnëngaca, cha echanjábocna jabuache castiganá nÿetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemmandacá jtsamëse, chë nÿetsca tescama yomna tšabe vida echántsebomna. ⁹ Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canÿe bëts te echanjóshjango, bënga bëtská tšabe soyënga josháchiñama, mo tša tšabe shajuanënga tmojashaquécá.

¹⁰ Chíyeca, tmojtsobena ora, nÿetscangbiama tšabe soyënga mochjama, pero masna chë Jesucrístbeñe ošbuáchiyana bómnyeca, bëngcá Bëngbe Bëtsabe básenga imonnëngbiama.

Quem tsuanácha juapochócama cach Pablo tojanábema

¹¹ ¡šmochjinÿe, tša bëts letrëngaca cach atšbe cucuátšeca mora cbontsëbuabianná!

¹² Ndëmuanyënga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšenënga chašmotsemnama, ntšamo judiënga monduamancá, chënga chca jtsamana

nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entsangbiana puerte iuámana ca chënga tmojtsabuayiynase. ¹³ Pero ni mo chë más delicadentse base bobachtema tétšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tétšenënga chašmotsemna, chënga jtsenábotamnayama jobenayama, ínýenga base bobachtema chacmatëtšama tšëngaftanga šmojalesenciama. ¹⁴ Atšeftacna ndocna te chca chaondopasá. Atše nýets tempo y becá chanjëftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenátamana ntšamo entsanga quem luarentse imojuabnacá y chëngbiana puerte iuámana; y ndayá atšbiana puerte iuámana, entsangbiana tondaye quenátamana; y chë causa, atše chëngbiana mo obanacá sëndmëna. ¹⁵ Chë más delicadentse base bobachtema aíñe tétšená o ndoñe, tondaye quenátamana. Ndayá puerte iuámana endmëna, Bëngbe Bëtsá mo tsmëma entsangcá bënga šojábiana, Uámana Espíritu bëngbe ainaniñe jtsemándayëse. ¹⁶ Chë quem buatëmbana sóyeca jtsamëse šmoyenëngbiana, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nýe chëngbiana chca quetsatsimpadana, ndayá nýetscanga Bëngbe Bëtsabe entsanga imomnëngbiámnaca.

¹⁷ Y mora, nýe canýe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinýna ntšamo atše tijasufrí, Jesusbe oservená bëtsemnama.

¹⁸ Jesucristbeyeca atšbe catsátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

Efesios

Jacheuayama

¹ Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiamá. ² Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y chata chaboma tšëngaftangbe ainaniñe tšabe ebionana chašmotsebmnama.

Crísoftaca cányiñe mo canyáca jtsemnëse, bënga mochántsebmna nyjetsca tšabe soyënga, ntšamo celoca yobinyncá

³ Bëngbe Bëtsá y Bëngbe Utabná Jesucristbe Taitábioye mochjëtšchuaye, er bënga Crísoftaca cányiñe mo canyáca mondménayeca, Bëngbe Bëtsá tojama bënga nyjetsca tšabe soyënga chamotsebmnama, ntšamo celoca yobinyncá. ⁴ Bëngbe Bëtsá bënga šojanabacacá Crísoftaca cányiñe mo canyáca chamotsemnana, cabá quem luare cha ndama orscana, bënga chabe delante chamotsemnana chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama. ⁵ Bëngbe Bëtsá šuababuányeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. ⁶ Chiyeca bënga Bëngbe Bëtsábioye sempre jtšatschuanayana, cha bëngbe tšabiamá juabna yobómnayeca, ndayá chabe Bonshana Uaquiñáftaca bëngbe tšabiamá cha tojamama. ⁷ Bëngbe Bëtsá puerte bonshanánaca bëngbe tšabiamá bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiamá tojanóbana, chabe buiñe juabuáshanëse. ⁸ Bëngbe Bëtsá tojama bënga nyjets osertánana y becá juabna chamotsebmnama, cha becá bonshanánaca bëngbe tšabiamá juabna yobómnayeca, ⁹ y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninñanýé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. ¹⁰ Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebmna nyjetsca chë soyënguñe mo chë mandayacá.

¹¹ Bëngbe Bëtsá sempre jamana nyjetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá. ¹² Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama. ¹³ Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cányiñe mo canyáca chašmotsemnana y tcmojanainñaná tšëngaftanga chabe entšanga bëtsemnana. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo

cha tojanašebuachenacá. ¹⁴ Bënga chë Uámana Espíritu bëngbe ainaniñe mondbómnyayeca, corente mondetatšëmbo ndayá Bëngbe Bëtsá chabe entšanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiama inétsamama, nyetscanga cha mochántatschuanaye, cha bëtsá y obená bétsemnama.

Pablo Bëngbe Bëtsábioye tbojanimpadá, ošbuáchiyënga osertánana chamotse-bomnama.

¹⁵⁻¹⁶ Chcáyeca, atšna, Bëngbe Bëtsá tšëngaftangbiama stseimpadana ora, sempre cha sëndbëtsatschuanaye, er atše sënjátatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuánjeshanama. ¹⁷ Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnama, y chacminyanjé nda Bëngbe Bëtsá yomnana, chca, más tšabá cha chašmotsábuatmama. ¹⁸ Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotse-bomnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsošbuatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftangnaca chašmotsetatšëmbo tša bëtsá y bëts soyënga yomna ndayá chabe entšanga cha tojašebuachenacá; ¹⁹ y chašmotsetatšëmbo tša bëts soye y ndocna te ntjëtšopochócama chabe obenana yomnana, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëts obenana endmëna, ²⁰ ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama. ²¹ Choca Cristo nyetsca soyënguiñe yojtsemánda, y más bëtsá obenana y mando yojtse-bomna nyetsca mándayëngbiama, chë mando y obenana bomnëngbiama, y cha yomna más uamaná y bëtsá nyetsca chë entšangbiama mo bëtsëtsangcá utabnëngbiama, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentše yobínjnama y Cristo yochjésabentšana yochtsebinjnamnaca. ²² Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiama. ²³ Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguífñaca, y lempe cha endëmánda.

2

Atsebácanënga mondmëna, Bëngbe Bëtsá suababuánjeshanayeca

¹ Tempo tšëngaftanga Bëngbe Bëtsabiama mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtsá bacna soyënga šmojánama. ² Chca, tšëngaftanga šmonjánama mo chë nye quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu. ³ Tempo bënga nyetscanga fsënjaneyena ntšamo tšëngaftanga šmonjaniyencá. Bënga soyënga fsënjánama, nye ntšamo

ftsjanbošcá nýe bēngbe cuerpēngbe tšabiamá, y nýe ntšamo bēngbe juabna enjamncá bacna soyēnga jamama. Bēnga fsēnjaniyena soyēnga jtsamēse mo chē Bēngbe Bētsábioye nduabuatma entšanga mondbetsamcá; chē causa bēnga fsēnjanomerecena jtsebomnana chē Bēngbe Bētsabe uabouana castigo, cachcá chē Bēngbe Bētsábioye nduabuatmēngcá. ⁴ Pero Bēngbe Bētsá sempre tša lastemado entšangbiamá endmēna y sempre corente bēnga šondábabuanýeshana; ⁵ y chíyeca, bēnga cabá mo obanēngcá chabiamá fsēnjamna ora, bacna soyēnga fsēnjánama causa, chora cha tojanma bēnga tšabe vida chamotsebomnama y Crísoftaca cánýiñe mo canýacá chamotsemnama. Bēngbe Bētsá tšēngaftangbe tšabiamá juabna bómnyeca, bacna soyēnguentsána tcmojatsebacá. ⁶ Bēnga Jesucrísoftaca cánýiñe mo canýacá bétsemnyeca, Cristo Jesús cháuatayenama Bēngbe Bētsá tojanma ora y celoca tbojtantbema ora, enjamna mo bēngnaca chámuatayenama Bēngbe Bētsá cuafjamcá y Cristo Jesúseftaca celoca cuaftatbiamcá. ⁷ Chca enjamna, Bēngbe Bētsá entšanga cháuinýanýema nýetsca joshjanguama tempēnguiñe, ntšamo cha bēngbe tšabiamá bētscá juabna bétsebomnama, cha Cristo Jesúseftaca bēngbioye tšabe juábnaca šojánanye ora. ⁸ Er Bēngbe Bētsá tšēngaftangbiamá tšabe juabna yojánbomnyeca, tcmojatsebacá, Jesucrístbeñe šmojtsanošbuáchema; pero atsebácanēnga šmondmēna, ndoñe cach tšēngaftanga ndayá šmojánmayeca, ndayá atsbocaná jtsemnana endmēna Bēngbe Bētsabe canýe tšetana soye. ⁹ Atsebácanēnga šmondmēna, ndoñe cach tšēngaftanga ndayá šmojánmayeca; chíyeca ndocná quenátobena jtsenábotamnayana atsbocaná yojtsemnama. ¹⁰ Bēngbe Bētsá šojtabiamá ntšamo bēnga mondmēncá, y Cristo Jesúseftaca cánýiñe mo canýacá bétsemnyeca, Bēngbe Bētsá mo tsmēma entšangcá cuaftsatsmēncá šojtabiamá, tšabe soyēnga jtsamēse jtsiyenama. Y ndayá bēnga tšabá mondamcá, Bēngbe Bētsá tempo tojanprontá bēnga chamotsamama.

Crístbeyeca tempcá tšabá Bēngbe Bētsáftaca jtsatsmēnana

¹¹ Tšēngaftanga ndoñe judiēnga, ndēmuanýenga judiēnga cmondubuatma “chē más delicadentše base bobachtema ndétētšēnēnga ca”, chēngcá uinýnanánēnga ndoñe šmondmēnana; chēnga cachēnga jtsenábobuatmana “chē más delicadentše base bobachtema tētšēnēnga ca”, y cachēngbe cuerpēnguiñe chca jtsamana. Mēntšá, tšēngaftanga chē ndoñe judiēnga, ¹² šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšēngaftanga Cristo ndoñe šmonjánbomna, Israeloca entšangbiamá stētsoye šmonjanquedana, y ndoñe šmonjantátšēmbó lempe ntšamo Bēngbe Bētsá chabe entšanga tojanašebuachenacá. Tšēngaftanga quem luarentše šmonjaniyena ndocnábeñe ntšobatmancá y Bēngbe Bētsá ntsabuatmá. ¹³ Pero mora tšēngaftanga Cristo Jesúseftaca cánýiñe mo canýacá šmontsemna, chē tempo Bēngbe Bētsá ndoñe šmonjanábuatmēnga, y cha tojama chábioye chašmotsábuatmama; y chca yomna, er Jesús, chabe buiñe juabuáshanēse, tšēngaftangbiamá tojanóbana. ¹⁴ Cach Cristo yojtsama bēnga tempcá tšabá Bēngbe Bētsáftaca chamotsemnama. Cha tojama judiēnga y ndoñe judiēnga nýetscanga mo cachca entšangcá chamotsemnama, mo nda canýe tapiēse tojtsendbemcá, chē ndayēšeca canýe luarentša entšanga tmojtsenjáta, chēnga enáyaye causa. ¹⁵ Cristo chēnga mo cachca entšangcá tojábiamá, judiēngbe leyēnga y mandēnga ndocna obenana chamondētsebomnama jamēse. Chca tojama, cha jóbānēse, chē útoica entšanga mo nýe canýe tsmēma entšangcá jábiamama, cháftaca cánýiñe mo canýacá jtsemnēse. Cha chca tojanma chēnga nýetscanga tšabá chamotsiyenama; ¹⁶ y Cristo cruciñe tojanóbanayeca, cha tojanma chē útoica

entšanga enáyayana chamotsajbanama, y tojanma chë útoica entšanga mo canýe entšangcá chamotsemnana, chënga tempcá tšabá Bëngbe Bëtsáftaca chamotsatsmënana.

¹⁷ Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënana. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. ¹⁸ Er chábeyeca, canýánýenga y ínýenga montsobena chë Taitábioye jobéconana, er bënga nýetscanga cachca espíritu bëngbe ainaniñe mondbomna, chë Uámana Espíritu. ¹⁹ Chíyeca tšëngaftanga, Bëngbe Bëtsabe entšanguentše ndoñe quešmátsmëna mo ínýe luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inýetsá endmëna; tšëngaftanga derecho šmondbomna cachcá ntšamo Bëngbe Bëtsabe entšanga mondbomncá, y Bëngbe Bëtsabe básenga šmondmëna. ²⁰ Jesucristo y chabe entšanga mondmëna mo canýe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayiñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá. ²¹ Quem más uámana luarentše uashacuana ndëtsbeñe, nýetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nýetsca chábeñe ošbuáchiyënga cháftaca cánýiñe mo canýacá chamotsemnana, y ínýengnaca cachcá chamotsemnana. Y nýetsca ošbuáchiyënga Crístoftaca cánýiñe mo canýacá tmojtsemna ora, chënga jtsemnana mo Bëngbe Utabnabiana canýe bëts yebna jebncá, chábioye jtsatschuanayama. ²² Y tšëngaftanga Efesoca ošbuachiyëngbiámnaca Cristo entsama, chë ínýe chábeñe ošbuáchiyëngaftaca mo canýe entšangcá chašmotsemnana. Y chë Uámana Espíritu bëngbe ainaniñe yojtsiyénayeca, bënga nýetscanga cánýiñe mondmëna, mo canýe bëts yebncá ndayentše Bëngbe Bëtsá yoyena.

3

Pablo Jesucristbe trabajo yojanbonýena, chë ndoñe judiëngbeñe jamama

¹ Chca, atše Pablo utamená sëntsemna, Cristo Jesusbiana soyënga entšanga abuayiynaye causa, tšëngaftanga chë ndoñe judiëngbe tšabiana. ² Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiana juabna yobomnana; y chca, chë trabajo atše šojabonýé, tšëngaftangbe tšabiana jamama. ³ Tšëngaftángnaca cmontsamna jtsetatšëmbuama ndayá Bëngbe Bëtsá šojinýinýé, ntšamo cha jamama tempo tojanjuabocá, pero entšanga chca ndoñe tonjaninýanýé, y chë soyama ya batšatema tcbonjubuábiana. ⁴ Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tbonjaninýinýé soyënga; pero mora cha tojinýanýé, Jesucristbe ichmónënga nýe Bëngbe Bëtsabiana oservëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. ⁶ Ndayá tempo Bëngbe Bëtsá ndoñe tonjaninýanýecá mëntšá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábicocana mochjoshachiñcá, chëngnaca chábicocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo

mondbomna mo chëngbe mandayacá. Y chca Cristo endmëna mo bestšašcá y chënga nyëtscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjójyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánýiñe mo canýacá bëtsemnayeca.

⁷ Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama, tšabe noticiënga entšanga jtsabuayiy-nayëse; y cha átšeftaca chca tojanma chabe obenánaca. ⁸ Atše nyëtsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentsana lempe jtsabuutmana. ⁹ Y chë trabajo šonjabonyé jamama, nyëtscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyëtsca soyënga tojamá, tempšana yojanjuabnacá. Mëntscoñama Bëngbe Bëtsá chë soye ndocnábioye tbonjinýinýé, pero mora aíñe. ¹⁰ Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyëts osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nyëtsca tescama jamama, y chca cha tojama Jesucrísoftaca, Bëngbe Utabná. ¹² Bënga Crísoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauajcá, y corente jtsetatšëmbëse cha ndoñe chašondubatema. ¹³ Chíyeca atše cbontsaimpadana ndoñe chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiamana tsësufrientšana, tšëngaftangbiamana tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentšana nyëtsca pamíllanga celoca y quem luarentše uabaina imóyëngacañe, chabe delante joshaméntšase, ¹⁶ séntseimpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebomnana, chabe Espíritbeyeca, ¹⁷ y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínýenga nyëts ainánaca jtsababuánýeshanëse, ¹⁸ tšëngaftanga y nyëtsca Bëngbe Bëtsabe entšángnaca tšëngaftangaftaca, chašmotsobena josértama Cristbe bonshánana bëngbiamana tša bëtscá yomnana. Nderado nda tojontsé chabe bonshánana jatšëmbonana mo canýe soye cuaftsemncá, cha ndocna te nanjobenaye jtsetatšëmbuana tëntsoye ndayëntscoca yomna y nýanëjoye ndayëntscoca, jashenoye ndayëntscóñe y tsbanánoye ndayëntscóñe yomna. ¹⁹ Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nýe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

²⁰ Y mora, nyëtscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebomnana. ²¹ ¡Entšanga Bëngbe Bëtsá chamotsatschuaná nyëts tempo y

nýetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

4

Uámana Espíritbeyeca bënga cánýiñe mo canýacá jtsemnana

¹ As, atše chë cárceloye utamená, Bëngbe Utabnabiama trabájaye causa, tšëngaftanga cbontsaimpadana, ndëmuanýënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanýënga Bëngbe Bëtsá cach soyama tojánachembo y chca imomerecena. ² Cada ona chamotsenojuabná mo chë ínýënga chabiama más uámanënga tmojtsemncá, y nýetscángbioye puerte bonshanánaca šmochtsobátmana, y bëtscá bonshánana jtsebomnëse šmochtsenëuantana; ³ siempre šmochtsejuabnaye y šmochtsentšena tšëngaftanga nýets tempo cánýiñe mo canýacá chašmotsemnana, nýetsca tšëngaftanga natjëmbana jtsemnëse. Y tšëngaftanga šmontsobena cánýiñe mo canýacá jtsemnana chë Uámana Espíritbeyeca. ⁴ Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Crístbe cuerpo, y cachca Espiritu bënga nýetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nýetscanga cachcá šochjátatayama chamotsobátmanama. ⁵ Bënga nýetscanga cach Utabná mondbomna, cachca ošbuáchiyana Jesucristbeñe mondbomna, y bënga nýetscanga uabáinënga mondmëna chca betsošbuáchiyama. ⁶ Bënga ošbuáchiyënga nýetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nýetscángbeñe jtsinýnana, y nýetsca bëngbe ainaniñe chabe Espiritu endmëna.

⁷ Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jubabuáchama. ⁸ Chíyeca, Bëngbe Bëtsabe uabemana palabrënguiñe Jesucristbiana mëntšá endayana:

Cha celoye tontantsjuá, y cháftaca tonjanéyamba nýetsca chabe uayayënga,
chë tojánayënjananga,
y chabe entšángbioye obenana tonjanatsatá, tšabe soyënga jamama ca.

⁹ ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰ Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canýe ora nýetscañe cha chaotsemnana. ¹¹ Y cachá, chë tšabe soyënga jamama obenana tojanatsatá ora, tojanma chábeñe ošbuáchiyënguëntse chamotsemna ínýëngna chabe ichmónënga, ínýëngna Bëngbe Bëtsabe juabna oyebuambnaye, ínýëngna tšabe noticiënga Crístbiana abuaiynayënga, y ínýëngna ošbuáchiyënga anýenënga y Bëngbe Bëtsabe soyëngama abuátambayënga. ¹² Cristo tojanabacacangna chabe entšángbioye mochjanëjabuache, cha tojanabanýe trabajo chënga chamotsamama, y nýetsca ošbuáchiyënga, chë nýetscanga cánýiñe mondmëna mo Crístbe cuerpcá, cada te más ošbuáchiyana y bonshánana chamotsebomnana, ¹³ bënga nýetscanga chamobenantscuana cachca ošbuáchiyana Jesucristbeñe jtsebomnana, y Bëngbe Bëtsabe Uaquiñabiama nýetscanga lempe cachcá jtsetatsëmbuama. Chca, bënga mochanjashjache jtsemnana lempe ntšamo Cristo yomncá, mo bëtšëtsanga bëtscá juabna bomnëngcá, ¹⁴ y ndoñe nýe mo basengcá, Bëngbe Bëtsabe soyëngama jtsetatsëmbuama. Chë soyënguiñe ya ndoñe más nýe mo basengcá quemochátmëna, ndëmuanýënga paselo jáingñama yomna. Mo canýe barquëshá nýe ndaye bínýiacnaca tojtsëyambancá, básefta entšanga

nÿe ndaye buatëmbana soye tmojatuencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuena tsëm sóyeca, ínÿengbioye áingñayënga. Chënga beca montsetáttsëmbo ntšamo entšanga jáingñana, y montseboše chë montsabatambá bostero soyënga bënga jtseyeunanama. ¹⁵ Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. ¹⁶ Mo canÿe bestšašcá, chëse jamana nÿetsca chë cuerpentša soyënga ndayentše chamueneffnama y chiñe jobónjuama chamotsobenama, chë cuerpo saná chaotsebomnama jtsamëse, chca, nÿets cuerpo tsabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nÿets cuerpo tsabá jobóchana; cachcá, ošbuáchiyënguentsë cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

Cristoftaca cánÿiñe mo canÿacá jtsemnëse tsëm vida šmochtsebomna

¹⁷ Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. ¹⁸ Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábocana yóbocana tsabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. ¹⁹ Chënga bacna soyënga tmojtsama ora, tondayama ntsenócochinÿenana; chënga nÿets tempo jesentsénana nÿetsca bacna soyënga amana, y chca jtsamana tondayama ntjatenojuabnaycá.

²⁰ Pero chca ndoñe quenjatsmëna ntšamo tsëngaftanga Cristbe soyëngama šmojanatsjinÿe y ntšamo chábioye šmojanabatmancá. ²¹ Ndegombre tsëngaftanga chabiamna šmojanuena y ínÿenga tcmojanabatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá. ²² Chcasna, ntšamo tsëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tsëngaftanga šmojanjuabná, šmojansentina y šmojanamcá, canÿe ondbiamnaye juabnentsana yojóbocana, tsëngaftanga bacna soyëngama juabnëngaca mandánënga jtsemnëse, y chë juabnënga tsëngaftangbioye cmojánaingñaye. ²³ Tsëngaftanga cmontsamna tsëngaftangbe juabniñe tsëm y tsabe juabnënga jtsebomnana. ²⁴ Tsëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tsëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiamna, tsëngaftanga chašmotsiyenama jtsamëse Bëngbe Bëtsabe bominiñe tsabá yomna soyënga y chábioye jadórama soyënga, chë ndegombre soyënguentsana óbocana soyënga.

²⁵ Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nÿetscanga cánÿiñe

mondmëna mo nÿe canÿe entsangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nÿets te chacmondetëna. ²⁷ Ndoñe šmatjaleséncia Sathanás ndayánaca tšëngaftangftaca chaomama.

²⁸ Chë yojanatbëbaná chauajbaná atbëbanama y jatrabájama chaontsé; cachabe cucuatšeca tšabe trabajo chaotsóboma, chca, ndayánaca cha chaotsebomnama chë ujabótënga jatšatayama.

²⁹ Bacna palabrënga ndoñe šmattsichamo, pero aíne tšabe palabrënga y nÿa chorsca ujabótama palabrënga, chë inÿe entsángbioye jujabuáchama más Cristcá chamotsemnama, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsëtsësná sóyeca. ³⁰ Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmojanainÿnaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nÿetsca tescama yochjatsebacaye orscama.

³¹ Inÿëngbiamama bacna juabnënga ainaniñe ndoñe chašmondëtsebmoma, etonánënga ndoñe chašmondëtsemna, ni inÿëngaftaca ndoñe chacmondetëna. Inÿëngbioye ndoñe chašmondëtšabuachembuana, inÿëngbioye ndoñe šmatjoyánguango y ndaye bacna sóynaca ndoñe šmattsama. ³² Nÿetscángaftaca tšábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

5

Ntšamo yomna Bëngbe Bëtsabe básënga chamotsiyenama

¹ Tšëngaftanga, Bëngbe Bëtsabe bonshana básënga quetsomñecá, nÿa šmochtsentšëna cachacá jtsemnama. ² Smochtsiyena nÿetsca soyënga bonshanánaca jtsamëse, ntšamo Cristo šojanababuanÿeshancá; chca, cha chabe derecho vida jtsebmomñama cachcá tojanonÿá y bëngbiamama tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe bominiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóbama y altaroca tcojajuinÿese, y chë soye botamana jtsonguëtsiyana.

³ Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayanama y jtsebošana, y chë nÿe yapa jésebošana más soyënga inÿëngbiamama jtsebmomnama cach ndoñe. Ni chë soyëngama ndoñe šmattsóyëbuambnaye. ⁴ Bacna soye ndoñe šmattsóyëbuambnaye, ni corente ntjenojuaboycá, ni nÿe ntšámnaca bacna soye jenbotatšëmbonana cach ndoñe, er chë soyënga tšëngaftangbiamama ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. ⁵ Er tšëngaftanga ya šmondëtatsëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga inÿëngbiamama jtsebmomnama bošá y amá (chca jtsayanana chabiamama más iuámana soyënga jtsebmomnama, Bëngbe Bëtsábioye jatsbobonshánama), chca amënguentšana ndocná tondaye queochatóyëngacñe ndayá Bëngbe Bëtsá chabe entsángbioye jatšatayama tojašebuachenantsana, Cristo y Bëngbe Bëtsabe amëndayoca. ⁶ Ndocná chacmondaingñe ndoñe ndegombre tondmëna palabrëngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. ⁷ Chíyeca, chca amëngbe soyënga tondaye šmattsama.

⁸ Tempo tšëngaftanga šmojanijena bacna juabnënga jtsebomnëse y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánÿiñe mo canÿacá bétsemnayeca, chabe soyënga šmontsetátšëmbo y sempre šmondétsemna cháftaca, chë entsangbe juabnënga binÿnayáftaca. Smochtsiyena jtsamëse mo chë binÿnayabe entsangcá. ⁹ Chë binÿnayábeyeca entsanga tšabe soyënga jtsamana, chë Bëngbe Bëtsabe bominÿiñe tšabá yomna soyënga, y ndegombre soyëngnaca. ¹⁰ Nÿa šmochtsentšena soyënga jamama, Bëngbe Bëtsá oyejuayá chaotsemnama. ¹¹ Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbioye šmochjínÿanÿiye chënga ndoñe tšabá tmonjamama. ¹² Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja; ¹³ pero nÿetsca soyënga binÿniñe tmojacá ora jtsopodénana tšabá jinÿama ntšamo ndegombre tomncá. Cachcá, ntšamo entsanga tmojamcá chë binÿnayá chaojinÿanÿé ora, echantsopodena jtsotatsëmbuama ntšamo chë soyënga yomnana; ¹⁴ er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entsanga iytëmencá tmojtsamcá chë binÿnayá chaojinÿanÿé ora, chënga mochántsetátšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá;

chë bacna soyënga ama causa, Bëngbe Bëtsabe bominÿiñe mo obanëngcá imomnënguentsana šmochtsojuánañe,

y Cristo acbe juabnënga echantsebinÿnaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá. ¹⁶ Lempe ntšamo chašmojobenacá nÿets tempo tšabe soyënga šmochtsama, er quem tempo entsanga yapa bacna soyënga montsama. ¹⁷ Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama. ¹⁸ Ndoñe šmattsótmenaye, er chë soye entsábioye juanatsana jenomándama ndoñe chaondëtsobenama; chamna, šmochjama Uámana Espíritu siempre y bëtscá tšëngaftangbe ainaniñe chaotsemándama. ¹⁹ Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiamama šmochjacántaye y cha šmochtsatschuanaye. ²⁰ Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canÿe yebnentšënga chamotsemnama

²¹ Nÿetscanga šmochtsenëyeunana, tšëngaftanga Crístbioye puerte šmorrespetánayeca.

²² Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nÿets tempo chca šmochtsama, Bëngbe Utabná chašmotsobedecénama. ²³ Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora cha chënga entsamënda, mo chë bestša nÿets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnama imotatsëmbcá y chca jtsamana, cachcá, chë shemángnaca entsamna jtsemnana nÿetsca soyënguiñe chëngbe boyángaftaca.

²⁵ Boyanga, tsëngaftangbe shémanga smochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiamá tojanóbana. ²⁶ Chca tojanma, chënga chabe entšanga y puerte tsábenga jábiamama; y chënga tmojánenabaye ora, tmojaninÿanÿé Bëngbe Bëtsá chëngbe bacna soyënga tojánabuajuanama, y chabe delante tsábenga chamotsemnama cha tojanmama. Cha chca tojanma, er chënga chábeñe imojtsanošbuaché, chabiamá buayenana soyënga tmojanuena ora. ²⁷ Cha chca lempe tojanma, chë ošbuáchiyënga japróntayama corente tsábenga y uámanënga cachabiamá chamotsemnama, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tsabá tmonjamënga ca, ni ndocna inÿe cachca sóyeca. ²⁸ Ntšamo canÿe boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsenobobonshánana, er chata cánÿiñe jtsemnana mo nÿe canÿe entšá cuenta. ²⁹ Er ndocná cachabe cuerpo jtsáboyënjana, ndayá saná janguangoñana y jtsinÿenana, ntšamo Cristo bënga chë ošbuáchiyëngaftaca endbetsamcá; ³⁰ er bënga nÿetscanga cánÿiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. ³¹ Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canÿacá bochántsemna ca.” ³² Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. ³³ Pero morna, tsëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

6

¹ Básenga, Bëngbe Utabnáftaca cánÿiñe mo canÿacá bétsemnayeca, tsëngaftangbe bëtsëtsangbioye smochtsayaunana, er chca jamana tsabá endmëna. ² Moisesbe leyiñe canÿe mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tsabe bendicionënga jamama: “Acbe taitá y acbe mamá ndoñe stëtsoye catjëftsaquédaye, ³ tsabe vida chacuetsobomñama y quem luarentše bayté chacuetsiyenama.”

⁴ Taitanga, ndoñe šmattsama tsëngaftangbe básenga chauetënama; más tsabana, chënga smochtsabéchaye jtsabuátambayëse y jucácanëse, ntšamo Bëngbe Utabná endbetsabuatambaycá.

⁵ Tsëngaftanga, chë nÿets tempo nÿe ínÿabiamá oservénënga, tsëngaftangbe nduiñënga smochtsayaunana; chca smochtsama puerte respétoca, bëtscá cuedádoca y nÿets ainaniñe tsabe juabnëngaca, mo cach Crístbioye cuaftseservencá. ⁶ Y chca chë nduiñëngbioye smochtsaservena, ndoñe nÿe chënga chacmojtšënÿa ora, mo nda nÿe entšangbe delante tsabá joquédama cuaftsebošcá, ndayá Cristbe oservenëngcá, chënga nÿets ainánaca jtsamana ntšamo Bëngbe Bëtsá tojtsebošcá. ⁷ Nÿetsca trabajotëmënga smochtsama nÿets tsëngaftangbe añémoca, mo Bëngbe Utabnabiamá cuaftsetrabajacá, y ndoñe nÿe entšangbiamá. ⁸ Er tsëngaftanga ya šmondëtatšëmbo, cada ona, nÿets tempo nÿe ínÿabiamá trabajayá o nÿe cachabiamá trabajayá tomna, ntšamo tsabe soyënga tojamcá Bëngbe Utabnábiocana yochjójyëngacñe.

⁹ Y tsëngaftanga, ndëmuanÿengbiamá ínÿenga nÿets tempo imoservena, cachcá tsabá chëngaftaca smochjamna, tondayama ntsaútatjnyëse.

Smochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiamana nyetscanga cachcá monduámana.

Ndayá Bëngbe Bëtsá entsanga tojatsatá Satanabiama jenëuyanama

¹⁰ Y morna, Bëngbe Utabnáftaca cánýiñe mo canýacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo. ¹¹ Mo canýe soldadcá, ba soyënga jtochëtjuana chë tmojtsentsjananga ora uayayëngbiama jenëuyanama, tšëngaftángnaca cachcá, nyetsca chë Bëngbe Bëtsá cmojatsatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyëñjanama. ¹² Er bënga ndoñe quemuatenojuerzana cach quem luarentša entsángaftaca jenëyëñjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tshanánoca luarënguñe imomna y bacna soyënga chaotsebinýnama ama espíritëngaftácnaca. ¹³ Chíyeca, lempe ntšamo Bëngbe Bëtsá cmojatsatácá šmochjójyëngacñe y chë soyënga jtsamëse šmochtsiyena jtseprontánama, mo canýe soldado jenëuyanama y jáyëñjanama bëtscá soyënga tojtochëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëñjanama, y jenëuyanama lempe jtsamëse, chašmobená cha jayëñjanama.

¹⁴ Mo canýe soldadcá, jabuache jtasnayana y cochaca canýe morocho soye jenácochjatsana jtsevalentiamana y ndoñe chamondëyëñjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominýiñe tšabá yomna soyënga jtsamëse, mo chë morocho soye cochaca cuafjenacochjatscá, chca, Satanás tšëngaftangaftaca tondaye chaondobená jamama. ¹⁵ Mo canýe soldadcá jtoshëcochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama. ¹⁶ Canýe soldado escudo jtsebomnana chë uayayabe uajuinýinýana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadcá, canýe morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjésejuabnaye Bëngbe Bëtsá cmojatsëbacama, y chë juabna cmochanjújabuache, mo canýe morocho buchtsanëse cuaftsabuchëtsancá. Mo canýe soldadcá, chë uayayábioye jayëñjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëñjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. ¹⁸ Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiama nyetscangbiama cha šmochtseimpadana.

¹⁹ Atšbiámnaca Běngbe Bětsá šmochtseimpadana, atše jóyebuambayama chajontsé ora, cha chě buayenana soye chašúyanama; y atše chayobená tondayama ntjatauatjca jóyebuambayana, y chca, entsanga chayinyanýé Jesucristbiana tšabe noticiēnga, ndayá chēnga tempo ndoñe monjántatsēmbo.

²⁰ Běngbe Bětsá šojichmó mo canya chabe cuenta oyebuambayacá, chě buayenánama entsángbeñe jóyebuambayama, y chca bėtsamama, mora atše utamená sěntsemna. Atšbiana Běngbe Bětsá šmochtseimpadana, atše chayobenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

Pablo chēnga jtadiósoftanama

²¹ Tíquico, Jesucristbeyeca bēngbe bonshana catšata y canye entsá tšabe palabra bomná, Běngbe Utabnabe trabajo jamama oservéniñe, ntšamo atše stsemnama y ndayá stsamama tšēngaftanga chašmotsetatsēmbuama, lempe cmochanjácuntaye. ²² Chama cha tšēngaftangbioye sěnjichmó, ntšamo muentše fstsemnama chacméyanama, y tšēngaftanga ainaniñe añemo chašmotsebomnama chaomama.

²³ Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catšatangbe ainaniñe tšabe ebionana chašmotsebomnama, y Běngbe Bětsábioye y ínýengbioye puerte chašmotsababuánýeshanama, Jesucristbeñe tšēngaftangbe ošbuachiyánaca; ²⁴ y chaboma, chě Běngbe Utabná Jesucristbioye bėts bonshanánaca imobobonshanēngbeñe tšabe bendicionēnga chaotsemnama, canye ndocná yondobena jatrócama bonshanánaca.

Filipenses

Jacheuayama

¹ Pablo y Timoteo, Jesucristbiana oservénata, quem tsbuanácha fsentsabiamná Filipos bēts puebloca Bēngbe Bētsabe entšanga imomnēnga, y Jesucristoftaca cānyīñe mo canyáca imomnēngbiana. Fsentsabiamná nyetsca chē Jesucristbeñe ošbuáchiyēngbiana, nyetsca chentša uanatsanēngaftaca y chē inye ošbuáchiyēnga ujabuáchaniñe trabajayēngaftaca. ² Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tšēngaftangbeñe tšabe bendicionēnga chaotsemnana, y chaboma tšēngaftanga ainaniñe tšabe ebionana chašmotsebomnana.

Pablo Bēngbe Bētsábioye tbojtanchuá ošbuáchiyēngbiana

³ Cada tšēngaftangbiana stenojuabó ora, Bēngbe Bētsá tšēngaftangbiana sēndbētsatschuanaye; ⁴ y Bēngbe Bētsá tšēngaftangbe tšabiana stseimpadana ora, atše corente oyejuayá chca sēndbētsama, ⁵ ntšamo tšēngaftanga atše šmojuájabuachama, tšabe noticiēnga Jesucristbiana entšanga abuayiyñayīñe, tšēngaftanga Jesucristbeñe jtsošbuáchiyama šmonjanbojatsé orscana y mēntscoñama. ⁶ Atše corente sēntsetatsēmbo, Bēngbe Bētsá tojanbojatsé tšēngaftangbe ainaniñe tšabe soyēnga jtsamama, y más tšabe soyēnga yochtsamama. Y chca yochtsama, lempe ntšamo tšēngaftangbiana cha yojtsejuabnacá chaochnēnguēntscuana, y chca, Cristo Jesús yochjésabēntscuana. ⁷ Atše tšēngaftangbiana sempre ainaniñe sēndbētsenojuabnaye, chíyeca atšbiana puerta tšabá entsemna chca tšēngaftangbiana jtsejuabnayana. Tšēngaftanga nyetscanga atše šmonjuájabuache jamama chē Bēngbe Bētsá tša tšabía bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntsētámena ora o natjēmbana shjoca stsana ora, nyetscāngbioye tšabá inyinyñayīñe chē tšabe noticiēnga ndegombre soyēnga bētsemnana, y bētsca amiñe entšanga chē soyēnguiñe corente chamotsošbuáchema. ⁸ Bēngbe Bētsá yotátšēmbo ntšamo sēntsichamcá ndegombre bētsemnana. Atše tša sēntseboše tšēngaftanga jányama y cbontsababuanyeshana cachcá ntšamo Cristo Jesús atše šondbobonshancá. ⁹ Atše, Bēngbe Bētsá sēntseimpadana tšēngaftanga cada te más cha chašmotsebobonshánama y chē inyēngbioynaca, chca, osertánana chašmotsebomnana ndayá chē ndegombre soye bētsemnana jtsetatšēmhuama, y chašmotsetátšēmbo ndayá tšabá o ndayá ndoñe tšabá tondmēnana; ¹⁰ y chca, chašmotsobena siempre jabocacayama chē puerta tšabá yojtsemna jamama soye. Chca, Cristo yochjésabo ora, tšēngaftanga puerta tšabe vida šmochántsebomna, bacna soyēngaca ndēmandánēnga; y tondaye quešmochátama, chora chē entšanga chca ndoñe tšabá quenátsmēna ca chamuátichamuama. ¹¹ Y lempe ntšamo chašmojtsamcá ndegombre tšabá echántsemna, y nye Jesucristo endobena jamama entšanga chca chamotsamama. Nyetsca chē tšabe soyēnga echántsemna, Bēngbe Bētsá puerta bētsá y uamaná bētsemnana jinñanñiyama.

Atšbe vida endmēna Cristo jtse servénama

¹² Jesucristbeyeca atšbe catsátanga, atše sēntseboše tšēngaftanga chašmotsetátšēmbo, ntšamo atše tijapasama, más bētsca entšanga Jesucristbiana tšabe noticiēnguiñe chamotsošbuáchema tojoservema. ¹³ Chca, nyetsca chē romanēngbe mandadbe bēts yebna bojanýa soldadēnga

y chë inye entšanga quem luarentše montsetátšëmbo atše utamená stsemna, atše Cristbiana tstrabája causa. ¹⁴ Atše utamená sëntsemnayeca, ošbuáchiyënguentsana banga ainaniñe más añemo montsebomna, y chíyeca chënga Bëngbe Bëtsabe palabra más y más añémoca y tondayama ntjatauatjca entšangbioye montsabuaiyina.

¹⁵ Ndegombre entsemna, báseftanga Cristbiana entšangbioye imojtsabuaiyina, pero chëngna nye ntšamo tijashjachca šmojtsántšabošama chca, y chënga imojtseboše, bëtsca jtsamëse, atše chayotjayanama; chíyeca chca imojtsama. Pero inyëngna, entšangbioye montsabuaiyina tšabe soyënga inyëngbiana jamama ndegombre imojtsebóseyeca. ¹⁶ Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyeca, Jesucristbiana tšabe noticiënga ndegombre bëtsemnama entšanga jtsinyanayana; ¹⁷ pero chë inyëngna chca imojtsama, ndoñe tšabe soyënga inyëngbiana imojtsebóseyeca, ndoñe chënga chë inyëngbiana tšabe soyënga imojtsebóseyeca. Chënga Jesucristbiana imojtsoyebuambná nye entšanga chënga chamotsarrespetánama, y nye cachëngbiana tšabe soyënga jtsebomnama imojtsebóseyeca. Chënga jtsejuabnayana mochjobenaye jamama atše más chašotsengménama ca, muentše utamená chjëftsemnëntscuana, chënga entšangbioye chca tmojtsabatambá ora. ¹⁸ Pero ¿ndayase chë soye atšbiana? Masque ntšámnaca, tšabe soyënga inyëngbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atše oyejuayá sëntsemna.

Y cabá más chanjóyejuaye, ¹⁹ er atše sëntsetatšëmbo quem utámenentšana atše chjësebocnama. Atše sëntsetatšëmbo muentšana chjësebocnama, tšëngaftanga Bëngbe Bëtsá šmoimpadánayeca y Jesucristbe Uámana Espiritu šuajabuachánayeca. ²⁰ Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero aiñe nyetscangbe delante beca añémoca chayoyebuambá, y nyets tempo pero más mora, lempe ntšamo stsamama y stsichámuama, atše chaima entšanga chaminyanýema Cristo puerte bëtsá y uamaná bëtsemnama, y chca chántsama masque ainá o obaná chaitsemnëse. ²¹ Chca entsemna, er atšbe vida Cristo jtse servénama endmëna, y nderado atše chajóbanëse, nyetscanga puerte bëts soye mochanjëftsashjache. ²² Pero atše ainá stsemnëse, chanjobenaye más uámana trabajo Cristbiana jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe. ²³ Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Crístoftaca jtsatsmënama, y ndegombre chca atšbiana puerte tšabá nántsemna; ²⁴ pero, inyoicana tšëngaftangbiana šontsemna ainá jëftsemnana. ²⁵ Atše corente sëntsetatšëmbo chca ndegombre yochtsemnama, y chíyeca sëntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtsca oyejuayana chašmotsebomnama. ²⁶ Chca, atše tšëngaftanga jutsëtsayama choye chajjá ora, chašmobená inye soyama más Cristo Jesús jëtschuayama.

²⁷ Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiana tšabe noticiënguiñe endayancá. Y mëntšá, cachcá, jutsëtsayama chajjá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmontsajbanama, y aiñe beca ošbuáchiyana chábeñe šmotsobomñama; nyetscanga cachcá šmojtsejuabnáyeca y nyetscanga cach soye šmojtsebóseyeca, cánýiñe nyetscanga enutanánënga

jtsenojuerzánëse, ndocná chë tšabe noticiënguine tšëngaftanga šmobomna ošbuáchiyana chacmondábuajuanama. ²⁸ Tšëngaftangbe uayayëngbiama tondayama šmattsauatja, sempre bètsá añemo šmochtsebmoma. Chca tšëngaftanga šmochanjínyanýie chënga pochocánënga mochtsemnana, y tšëngaftangna atsebácanënga šmochtsemnana. Y chë soye Bëngbe Bëtsá tšëngaftangbiama echántsama, Crístbeñe šmošbuachéyeca. ²⁹ Chca echanjopása, er Bëngbe Bëtsá tšëngaftangaftaca puerte tšabia endmëna, Crístbiama oservënënga Bëngbe Bëtsá tcmojábiana, pero ndoñe nýe chábeñe chašmotsošbuáchema, ndayá chabiama chašmosufrímnaca. ³⁰ Tšëngaftanga y atše cachca soyama montsenojuerzana. Tšëngaftanga ya šmonjinýe ntšamo atše sënjánenojuerzana, entšanga jinýanýiyama chë tšabe noticiënga ndegombre soyënga bëtsemnana. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

2

Ndoñe uámanënga šmattsenobiamnaye, ntšamo Cristo ndoñe tonjanmcá

¹ Tšëngaftanga, Crísoftaca cánýiñe mo canýacá jtsemnëse, ainaniñe bètsá añemo šmontsebmoma. Cristo cmondábabuanýeshana, y chë soye tšëngaftanga cmontsëjabuachana nýetsca trabajënguentšana tšabá jabocanama. Y tšëngaftanga Crístbe Espíritoftaca cánýiñe mo canýacá šmontsemna; tšëngaftanga nýetscanga šmondénbobonshana y nýetscangbiama jóngmiana šmonduamana. ² Tšëngaftanga lempe chca šmobómnayeca, atše corente oyejuayá šmochjábema, er tšëngaftanga nýetscanga cachcá cánýiñe šmondëjuabná, cachcá nýetscanga šmondénbobonshana, nýetscanga mo canýe ainancá šmondobomna, y nýetscanga cachca soye šmondboše. ³ Tondaye šmattsama nýe ínýenga chë sóyeca chamotjáyanama, o nýe tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiama más uámanënga imomnana. ⁴ Y ndocná tondaye chaondëtsama, nýe chabiama tšabe soyënga jónýenama, sinó ndayánaca chaotsama nýetscangbiámnaca tšabe soyënga jónýenama.

⁵ Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

⁶ Cha nýets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše sëntseboše nýetsca entšanga nýets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

⁷ Pero cha mo nduamanacá tonjanóbema, nýetsca chabe bomna soyënga jëftseboshjonëse, y ndegombre, mo canýe oservenacá tojanóbema.

Cha canýe entšacá tojanonýná, y entšanga canýe ndegombre entšacá tmojáninýe.

⁸ Cachá tojanlesenciá nduamaná jtsemnana, y sempre Bëngbe Bëtsábioye ibnayeunana, y jobanámnaca, cruciñe jóbanëse.

⁹ Ndayá cha tonjanmama, Bëngbe Bëtsá, chë celoca más uámana luare tbojaninýinýé

y chë más uámana uabaina, chë más bëtsëtsangbe uabainënguentša uabaina tbojabuajo;

¹⁰ y chca, celoca imomnënga, y quem luarentše y fshantse jashenoye imomnëngnaca nýetscanga chamóshamentšema, Jesúsbioye jëtschuayama, chabe uámana uabaina jayanëse;

11 y chca, nyetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nyetscanga chamotsatschuanama.

Cristbeñe ošbuáchiyënga entsamna mo buashinyinÿana estrellëngcá jtsemnana

12 Chcasna, atšbe bonshana catsátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiana bënoca stsemna ora. Bëtsëtsanga ntjatenobiamnycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; 13 er Bëngbe Bëtsá nyets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yujuabná y yobošcá chaotsemnana.

14 Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjatichamcá y ínÿengaftaca jabuachana ntjatenatsëtsnycá. 15 Chca cmontsamna, chca, tšëngaftanga šmojtšama soyënguiñe ndocná ndocna bacna soye chaondínÿenama, y puerte tšabe vida chašmotsebomnana. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentše puerte bacna entšángbeñe y sempre bëtscá bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentše buashinyinÿana estrellëngcá. 16 Chë tšabe soyëngaca entšángbioye chauinÿanÿé ntšamo muanjobenaye tšabe vida jtsebomnana. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chëngbioye tojtsayëñanacá. 17 Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Cristbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjabanëse, puerte oyejuayá stsemna, y stjama tšëngaftángnaca cachcá chašmotsóyejuama. 18 Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

Timoteo y Epafrodito

19 Atše becá ošbuachiyánaca Bëngbe Utabná Jesúsbeñe jtšobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiana chašubocuëntama, y chca, atše más añemo chaitsatsbomnana. 20 Er nÿe cha endmëna canÿa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; 21 chë ínÿengna nyetscanga nÿe cachëngbe tšabiana ndayánaca jamama jtsejuabnayana, y tondaye ntsebošana Jesucristbiana jamama. 22 Pero cach tšëngaftanga ya šmondëtatšëmbo, ntšamo Timoteo chë padecena soyënguentshana tšabá tonjétsobocñama, y ntšamo Timoteo y atše, mo canÿe uaquiñá chabe taitábioye cuaftsajabuachancá, cánÿiñe fsënjantrabája, más bëtscá entsanga chë tšabe notiçiënga chamóyëngacñama. 23 Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo

y cachora; ²⁴ pero bētská ošbuachiyánaca sēntsobatmánayeca, sēntsejuabná, Bēngbe Utabná chašojtábocnēse, pronto átšnaca chjobenaye choye jama.

²⁵ Atše sēntsejuabná yojtsemna, Jesucristbeyeca bēngbe catšata Epafrodítaca choye jíchmuana, nda átšeftaca cánýiñe endētrabája y chē tsabe noticiēnga ndegombre soyēnga bētsemnama jinýanýiyama endenojuerzana, nda tšēngaftanga šmojanichmó atše chašuaabēuájabuachama. ²⁶ Cha chanjíchmuá; cha puerte entseboše tšēngaftanga jánýama, y yapa ngménaca entsemna, cha šocá enjamnama šmojátatšēmbonama. ²⁷ Y ndegombre cha šocá enjamna, y enjétsinýna mo jtsobanamcá; pero Bēngbe Bētsá tbonjalastemá, y ndoñe nýe chábioye sinó átšbioynaca, atše ndoñe más ngmenanēnga chayátsbomnama, ntšamo mora sēntsebomnama. ²⁸ Chýyeca atše más sēntseboše cha pronto jíchmuana, as tšēngaftanga cha chašmojtinýe ora, puerte oyejuayēnga chašmotsemnama, y atše ndoñe yapa chašondētsengmenama. ²⁹ Smochjofja nýets oyejuayánaca, Bēngbe Utabnábeyeca catšátanga quetsomñecá; y nýets tempo chacá amēngbioye mo bētsētsangcá šmochtsétabna, ³⁰ er batsatema más y matēnjétsobana, Cristbiana trabajaiñe uajabuachaniñe. Cha chē trabajo tonjanma atše juajabuáchama, ntšamo cach tšēngaftanga ndoñe chešmatanobenacá, atše juajabuáchama.

3

Ndayá Pablēbiana ndegombre corente yojanámana

¹ Y morna, atšbe catšátanga, ndayá Bēngbe Utabná tojamama móyejuanga. Ndoñe bacá quešnatámana, ntšamo chē inýe tsbuanáchañe tchbonjanēbuabiamcá cachcá cachiñe jtētēyanama; y chē soye bētská cmochanjújabuache ndoñe resjuiñe chašmondētsemnama. ² Cuedado šmochtsebomna chē ndoñe tsabe entšangbiana, mo quešēngcá imomnēnga, chē puerte bacna soyēnga mondbétsamēnga, y entšangbe más delicadentše base bobachtema jatētsana uamanēnga; ³ er bēnga mondmēna y ndoñe ínýenga, chē ndegombre uinýnanánana bomnēnga, bēnga Bēngbe Bētsabe entšanguentšēnga bētsemnama, bēnga chē Uámana Espíritbe uajabuáchenanaca Bēngbe Bētsá mondadoránama, bēnga chē Cristo Jesúseftaca cánýiñe mo canýacá bētsemnama mondbétsoyejuama, y bēnga chē ntšamo ínýenga monduamancá bēngbe cuerpiñe jamama tondayama yondoservénama mondbétsejuabnayama.

⁴ Masque atše razón sēndētsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chē soyēnga yoservena ca jtsejuabnayama, ndegombre atše chabiana más razón chama stsóbomñe. ⁵ Sēnjanonýná y posufta tianoye base bobachtema chē más delicadentše šmojantētše; atšbe nýets uta bētsētsata Israeloca entšanguentšata bonjamna, y atšna Benjaminbe bēts pamillentšá sēndmēna; atšbe tempsca bēts taitanga nýetscanga hebreunga innamna. Atšna fariseo sēnjamna. Atše sēnjánama, lempe ntšamo judiēngbe leyēnguiñe endayancá, ndayá jamama šojanmēncá. ⁶ Atše tša sēnjánboše Bēngbe Bētsá jtse-servénama, chýyeca Jesúsbeñe ošbuáchiyēnga bētská sēnjanēcamena; y ndayá canýe entšá ibnésemna jtsamama, Bēngbe Bētsabe bominiñe tšabia jtsemnama, judiēngbe ley jtsocumplínēse, chama ndocná tondaye quenjátsbomna jayanama, atše ndoñe tšabá sēntsanama ca.

⁷ Pero lempe chca ntšamo atše sēnjamnama y ndayá sēnjánamama, puerte sēnjanjuabná atšbiana puerte yojanámana ca; pero mora, Cristo atšbe ainaniñe tonjámashēngoyeca, chē soyēnga atšbiana ya ndoñe quenatámana. ⁸ Y cabá más, tondaye atšbiana quenatámana, chē bēts soye jtsonýayēse,

Cristo Jesús, Bëngbe Utabná jtsabuatomana. Chábeyeca, lempe chë nÿe quem luarentsa soyënga sënjëseboshjona, y lempe chë soyënga atšbiamatodayama quenátoserverna; y chca entsemna, chë bëts soye jëftsashjáchama, Cristo jtsabuatomama, ⁹ y cháftaca cánÿiñe mo canÿacá jtsemnama. Atše ya ndoñe quetsatsnguá Bëngbe Bëtsabe bominiñe tšabia jtsemnama, nÿe ntšamo atše tijamama chë judiëngbe ley jtsocumplínese, pero Crístbeñe jtsošbuáchiyëse aíñe; Bëngbe Bëtsá entsama atše chabe bominiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. ¹⁰ Atše sëntseboše ndayá cha jtsabuatomana, chë obanënguentsana tojtanayenama cha tojaninÿanÿe obenana atše chaitsebomnama, atše cháftaca cánÿiñe mo canÿacá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; ¹¹ y ntšámnaca, atše jëftsashjáchama Bëngbe Bëtsá chaoma atše chaitayenama.

Yejuana jtsentsénese, Bëngbe Bëtsábiocana uacanána josháchiñama

¹² Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtsabe bominiñe stsemna ca, pero sempre natsanoye sëntsá, mo nda canÿe luaroye jashjanguama cuaftsëchamancá; y puerte jtsošbuáchiyëse sëntsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiamat chaitsemnama. ¹³ Atšbe catšátanga, atše ndoñe quetsátichamo chca ya tijashjache ca. Pero chama canÿe soye sëntsama: chë tempo atše sënjábomna y sënjánama soyënga, mora lempe stëtsoye sënjaquedá, y bëtscá sëntsama jobenayama chë jashjanguama yojtsemnoye jashjanguama, ¹⁴ chë ndëmoca yojtsemna jashjanguama luaroye jobenayama jashjanguama, mo nda canÿe luaroye jashjanguama ndayánaca juacánama bëtscá jenojuérsase cuaftsëchamancá. Cachcá, átšnaca sëntsá chë Bëngbe Bëtsá šojtsachembuana uacanána josháchiñama, Cristo Jesúsbeyeca; y chë uacanána entsemna chë nÿetsca tescama yomna tšabe vida jtsebomnana.

¹⁵ Chca bënga šontsamna jtsejuabnayana, chë Jesucrístbeñe puerte ošbuáchiyana y nÿets tempo cha ústonënga; y nderado tšëngaftanga ndayíñnaca inÿetšá šmojatsjuabná ora, Bëngbe Bëtsá chë sóynaca tšabá cmochanjínÿanÿiye. ¹⁶ Pero morna šontsamna jtсийenana ntšamo méntscoñama Bëngbe Bëtsabe soyëngama šojosertacá.

¹⁷ Jesucrístbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtсийenama tcbonjaninÿanÿecá imojtсийenëngbioye šmochtsënÿaye. ¹⁸ Ntšamo cbochanjauyancá, ya ba soye tcbonjáuyana y mora cachíñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnama montsinÿinÿná, lempe ntšamo Cristo chë cruciñe jóbanëse bëngbiamat iuayancá contra chënga imojtsemnama, ¹⁹ y chëngbioye nÿetsca tescama infiernoca mochántsapochocaye. Chëngbiamat chë más uámana soye yojtsemna jtsamana ntšamo cachënga tmojtsebošcá, nÿe cachëngbe cuerpíñe tšabá jtsonñama. Chënga nÿa mo bëts soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngamat jtšëuatjama; y chënga sempre jësejuabnayana chë nÿe quem luarama enójuabnayëngbe soyëngamat. ²⁰ Chë cuenta bëngna, ndegombre celocamat entšangamat mondmëna, y mora montsobátmana, chë luarocamat chauabobëngbe atsebacayá, Bëngbe Utabná Jesucristo. ²¹ Cha bëngbe cuerpënga, chë pronto jopochócamat cuerpënga echanjátrocaye, jtsemnama mo chabe cuerpacá, chë

obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeyca.

4

Bëngbe Utabnáftaca cányiñe mo canyáca jtsemñese oyejuayana jtsebmna

¹ Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyese, cháftaca cányiñe mo canyáca šmochtsemna. Corente cbondábabuanyeshana y tša sëntseboše tšëngaftanga jányama. Tšëngaftangbeyeca atšbe puerte oyejuayá sëntsemna, y atšbe corente sëndbétsoyejuaye tšëngaftangbiamá ínÿengbioye jáuyanama.

² Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. ³ Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entsanga abuayiynayiñe. Clemente y inÿe entsanga átšeftaca tmonjatrabajá cach soye amiñe. Nÿetsca chëngbe uabaina entsábemana chë librésañe, ndayentše yojtšábemana chë tšabe vida mochjónÿenëngbe entsangbe uabaina.

⁴ Sempre oyejuayënga šmochtsemna, Bëngbe Utabnáftaca cányiñe mo canyáca jtsemñese, y cachiñe šcutëtayana: ¡Móyejuanga! ⁵ Nÿetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

⁶ Tondayama šmattsenócochinÿena, pero cada Bëngbe Bëtsáftaca chašmojtscuënta ora, ndayá cmojtšéjabortama cha šmochjaimpáda. Y chca chašmojtscama ora, chánaca šochtsatschuanaye. ⁷ Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebmna; chë tšabe ebionana puerte bëtscá endmëna, y bënga entsanga quetsomñecá ndoñe ntsoobenana chama jósertana; y chca tšabe ebionánaca, tšëngaftangbe juabnënguiñe y ainaniñe tondayama quešmochátenocochinÿena, er tšëngaftanga cányiñe mo canyáca Cristo Jesúseftaca šmondmëna.

Lempe ntšamo tšabá yomncá soyëngama jtsejuabnayana

⁸ Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecéniñe, nÿetsca soyënguiñe entsangbe bominiñe tšabá yomniñe, nÿets tempo corente tšabá yomniñe, nÿetsca soyënga entsanga yogusetániñe, y lempe chë ndayama entsanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

⁹ Sempre šmochtsama chë átšbentšana šmojuábouinÿe soyënga, chë atšbiajana šmojóyëngacñe soyënga, chë atšbe šmojoyeuná soyënga y ntšamo šmojinýcá atšbe jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebmna amá, tšëngaftangaftaca echántsemna.

Pablo tojtanacheuá tmojanájabuachama

¹⁰ Atšbe corente sëndoyejúá Bëngbe Utabnáftaca cányiñe mo canyáca tsmënama, er tšëngaftanga ba ishinÿe chentšana, cachiñe šmojatobená atšbe jatiniñiyana ntsachetšá atšbe tšabiana tšëngaftangbiamá iuámanana. Chca, atšbe ndoñe quetsátichamo tšëngaftanga atšbiamá cmojtscanebnëtjomba ca, ndayá ntšamo tšëngaftanga tšabá šmojuabnacá atšbe jinÿiniñiyama ndoñe yonjanopodena ca. ¹¹ Atšbe chca, ndoñe quetsátichamo uajabotá stsemna ca, er atšbe sënjuatsjinÿe sempre oyejuayá jëftsemnana, nÿe ndaye soyiñe

masque batšatémnaca stsebomněse. ¹² Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomněse. Atše tijuatsjinýe oyejuayá jtsemnana masque nýe ndaye soyënguínaca stsemna ora, jasama bëtscá stsebomna ora o masque nýe shëntseca jtsemnama šojtsemna ora, atše jtsiyenama bëtscá soyënga stsebomněse o masque ndóñnaca. ¹³ Atše lempe chca sëndobena, atše obenana jtsebomnama Cristo endbétssamayeca. ¹⁴ Masque chcasna, tšëngaftanga tšabá šmonjama, atše padecena soyënguínë sënjamna ora atše juajabuáchana.

¹⁵ Tšëngaftanga, chë Filipos puebloca Jesucristbeñe ošbuáchiyënga, corente šmondétatšëmbo, Macedonia luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatšena tempo tšëngaftangbe luarentše chë tšabe noticiënga entsanga abuayiynayiñe; y nýe tšëngaftanga atše šmonjanájabuache. ¹⁶ Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. ¹⁷ Chca ndoñe quenátayana atše tsjuabná nýe tšëngaftangbentsana ndayánaca jójëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiamama más chaotsóyejuama. ¹⁸ Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominjñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtsecá, chora cha oyejuayá chca jójëngacñana. ¹⁹ Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. ²⁰ Entšanga nýets tempo chamotsinýanýná Bëngbe Bëtsá y Bëngbe Taitá puerte uamaná bëtsemnama. Chca chaotsemna.

Chënga jtadiósoftanama

²¹ Atšbe cuenta, nýetscanga chë Jesucristbeyeca Bëngbe Bëtsábenga imomněnga šmochjácheuaye. Atšeftaca montsemna Jesucristbeyeca catšátangnaca cmontsacheuaná. ²² Nýetscanga chë muentše Bëngbe Bëtsábenga imomněnga, y más chë romanëngbe mandadbe bëtš yebnoca oyenënga, cmontsacheuaná.

²³ Atše sëntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.

Colosenses

Jacheuayama

¹ Atše Pablo, Jesucristbe ichmoná Bëngbe Bëtsá chca yobóseyeca, y Jesucristbeyeca bëngbe catsata Timotéoftaca, ² quem tsbuanácha sentsabiamná chë Colosas pueblaca Bëngbe Bëtsábenga imomnëngbiana. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catsátanga. Atše sëntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

Pablo, Bëngbe Bëtsábioye tbojanimpadá Colosas pueblaca ošbuáchiyëngbiana

³ Bëngbe Bëtsá, Bëngbe Utabná Jesucristbe Taitá tšëngaftangbiana fstseimpadana ora, cha sempre fchandbëtsatschuanaye, ⁴ er bënga fsenjátatsëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuányëshanama. ⁵ Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsobena tšabe soyama jobátmana, Bëngbe Bëtsábeñe jtsošbuáchiyëse. Chë šmotsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuányëshanama. Bëngbe Bëtsá celoca enduaquëcñá chë tšëngaftanga šmojtsobatmana tšabe soye. ⁶ Chë tšëngaftanga tcmojanabuayená tšabe noticiënga más bëtscá entsanga montsuenana; y chca, nyets quem luarentše entsanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanyënama ndegombre cmojanosérta orscana. ⁷ Y chca Epafra tšëngaftanga tcmojanabuatambá, Bëngbe Bëtsabe bonshánama y tšabiánama. Epafra endmëna canya bëngaftaca Cristbiana oservená, y cha bënga fsëndbobonshana; cha Cristbiana endëtrabája bëngbe cuenta tšëngaftangbentše. ⁸ Cha šonjáuyana ntšamo chë Uámana Espiritu yojtsama, nyetscanga Jesucristbeñe ošbuachiyëngbioye chašmotsababuányëshanama.

⁹ Lempe ntšamo tšëngaftangaftaca tojopasama, chë natsana te tšëngaftangbiana fsënjauena orscana y mëntscoñama, Bëngbe Bëtsá sempre tšëngaftangbiana fchandbëtseimpadana, cháftaca fstsencuénta ora. Bëngbe Bëtsá fsëndëimpadana, chabe Espiritu chaoma tšëngaftanga chašmotsobena jtsetatšëmbuana y jtsosertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. ¹⁰ Y chca, tšëngaftanga šmochantsobena jtsiyenana jtsamëse ntšamo Bëngbe Utabná yobošcá, y sempre šmochántsama ntšamo chabiana tšabá yomncá. Ntšamo tšëngaftanga chašmojtsiyencá tšabe soyënga jtsamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. ¹¹ Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebonnama; y chca, tšëngaftanga chë padecena soyënguñe chašmojtsemna ora, puerte uantadënga chašmotsemnama, y ainaniñe añémoca Bëngbe Bëtsábeñe becá chašmotsobátmanama. ¹² Y puerte oyejuayënga Bëngbe Taitá šmochántatschuanaye, nda iuama bënga

chamotsobena ntšamo cha chabe entsanga jatsatayama tojašebuachenacá jtsebmomnama. Tšëngaftanga šmochanjóyëngacñe ntšamo cmojtsëtocancá celoca, chë corente buashinÿinÿana luarentse. ¹³ Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentsana, y tojama chë chabe bonshana Uaquiñabe amëndayana bëngbe ainaniñe chamotsebmomnama; ¹⁴ chábeyeca Bëngbe Bëtsá Satanasbe cucuatšentsana šojatsebacá; o mëntsá, chábeyeca Bëngbe Bëtsá bëngbe bacna soyënga šojtsaperdoná.

Cristo tojanóbanayeca, entsanga Bëngbe Bëtsáftaca tšabá jtsatsmënana

¹⁵ Cristo tmonjáninÿe ora, bënga tmojántatsëmbona ntšamo Bëngbe Bëtsá yomnana; entsanga imojobena cha jinÿama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. ¹⁶ Chábeyeca Bëngbe Bëtsá tojama lempe ntšamo celoca y quem luarentse yobinÿncá, lempe ntšamo chë entsanga imobena o ndoñe mondobena jinÿama soyënga, y chë espíritëngnaca chë imobena ínÿengbioye jtsemëndayana y obenana imobomna. Bëngbe Bëtsá, chábeyeca y chabiamá tojama, lempe ntšamo quem luarentse yobinÿncá. ¹⁷ Bëngbe Bëtsá cabá nÿetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentse chaotsemnama yojamncá. ¹⁸ Cha endmëna nda nÿetscanga Bëngbe Utabnábeñe ošbuáchiyënga iuamënda, ntšamo chë bestšaše nÿetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebmomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënënguentšana, cha chë natsaná chaotsemnama; nÿe cha canÿa chë más uámana luare chaotsebmomnama, nÿetscañe chaotsemándayama. ¹⁹ Er Bëngbe Bëtsá yojanjuabná cachabiamá tšabá yojamna, lempe ntšamo cha yomncá, chabe Uaquiñábeñnaca chaotsemnama, ²⁰ y Bëngbe Bëtsá tojánbošena, Crísbeyeca nÿetsca soyënga quem luarentse y celoca, cháftaca tempcá tšabá chaotsatsmënana. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nÿetsca soyënga quem luarentse y celoca, cháftaca tempcá tšabá chaotsatsmënana.

²¹ Tempo, tšëngaftanga Bëngbe Bëtsá stëtšoye šmojanquedá y chábioye uayayënga šmojamna, bacna soyënga šmojanjuabná y šmojánama causa; ²² pero mora chabe Uaquiñáftaca, cha mo canÿe entsacá jóbánëse, Bëngbe Bëtsá tojama tšëngaftanga tempcá tšabá cháftaca chašmotsatsmënana; y chca tojama, tšëngaftanga chabe delante nÿets tempo chašmotsemnama; chora tšëngaftanga, chabe entsanga, ainaniñe ndocna bacna soye ndbomnënga chašmotsemnama, y ndocná chaondayana ntšamo šmojamncá ndoñe tšabá yontsemna ca. ²³ Pero tšëngaftanga cmontsamna chë bëtscá ošbuáchiyana šmondobomnana nÿets tempo jtsebmomnana, Bëngbe Utabnábeñe jtsošbuáchiyama ndocna te ntjajbanacá. Nÿets tempo chë tšabe noticiënguiñe šmochtsosbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nÿe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmncá, Jesucristbiamá buayenánama šmojanuena ora. Chë buayenánana endmëna ntšamo ba entsanga nÿetsca quem luarentša entsángbioye tmojabuayenacá, y atšbe trabajo endmëna cach tšabe noticiëngama entsanga jtsabuayiyayana.

Pablo, ošbuáchiyënga jasérviamá trabajo tmojanbonÿé

²⁴ Atše corente sënjesoyejuá mora tšëngaftangbiana jasúfriama stsobenama. Ba entsanga entsamna jasúfriana Cristo jasérviana, y atše sëntsesufrina ntšamo Cristo tojansufricá, mora atše jtsesufrinése chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiama, chë chabe cuerpcá imomnënga, chënga Crístbenga bétsemnama. ²⁵ Bëngbe Bëtsá atše šojábema chë Jesucristbeñe ošbuáchiyëngbe canye ujabuachaná. Cachá chë trabajuama šojanábuayana, chca jamëse, tšëngaftangbe tšabiama chaotsemnama. Chë trabajo endmëna, lempe ntšamo cha tojayancá entsanga jábuayenana. ²⁶ Bëngbe Bëtsá nyetsca entsanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábenga imomnënga chë soye cha tojinýanýé. ²⁷ Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninýanýecá; y yoboše chë ndoñe judiënga jinýanýiyama tša bëts y tšabe soye yomna chë ndegombre buayenánana, ndayá tempo ínýenga ndoñe tonjaninýanýecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojsiyena, y chábeñe puerte jtsošbuáchiyëse šmojt sobena jtsobátmanana, Bëngbe Bëtsá puerte bëtšétsanga y uámanënga chácmbiamama, batšá ntšamo cachá yomncá. ²⁸ Bënga nyetscángbioye Jesucristbiana fchandbëtsabuayiyenaye; fchandbëtšétsétsnaye ndayá chënga ndoñe yontsamna jtsamana, y fsëndbëtšabuatambaye nyets osertanánaca ndayá chënga aíñe yojsamna jtsamana, y chca, nyetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cánýiñe mo canýacá jtsemnëse. ²⁹ Chca chaotsemnama, atše bëtscá sëndëtrabája; y chca sëntsama, chë Cristo yojsama atše chaitsebomnama bëtš obenánaca.

2

¹ Atše sëntseboše tšëngaftanga chašmotsetátšëmbo, Bëngbe Bëtsá beca tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atše šmonjinýe ošbuachiyëngnaca. ² Atše chca sëndama, tšëngaftanga y chënga ainaniñe bëtš añemo chašmotsebomnama, y cánýiñe mo canýacá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebomnama, y chë tempo Bëngbe Bëtsá entsanga ndoñe tonjaninýanýé buayenánama chašmotsetatšëmbuama, y chë buayenánana Cristbe soye entsemna. ³ Mo canye bëtscá bomnana iytëmena soycá pero mora ya uínýenana, cachcá Crístbeñe entsemna nyets osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entsanga ndoñe tonjaninýanýé, pero mora Cristo yojsama bënga chë uámana soyënga chamotsebomnama. ⁴ Atše chca sëntsichamo, botamana palabrëngaca ndocná chacmondáingñema. ⁵ Er masque choca tšëngaftangaftaca atše ndoñe quetsátmëna, atšbe ainana aíñe choca tšëngaftangaftaca entsemna; y atše puerte sëntsoyejuá tšëngaftanga šmatenýeyunanama y nyets tempo Bëngbe Bëtsábeñe šmojtsošbuáchema.

Crístoftaca cánýiñe mo canýacá jtsemnëse, entsanga ndegombre tšabe vida jtsebomnana

⁶ Tšëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá. ⁷ Chca šmontsobena jamana, cháftaca

cányiñe mo canyáca nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiana buayenana soyëngama, ntšamo tmojabuatambacá; y Bëngbe Bëtsá sempre šmochtsatschuanaye.

⁸ Cuedado šmochtsebomna, ndoñe šmatjaleséncia ndocná chaondëtsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnëngaca tšëngaftanga jáingñama, nye básefta entšangbe juabnënga y tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuátambayentsana y chë espíritëngbentsana, ndëmuanyëngbiana entšanga jtsejuabnayana chënga nyetsca soyënguiñe imománda ca; pero Crístbentsana chë juabnënga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canye entšacá quem luarentse yojëftsiyena; ¹⁰ y Bëngbe Bëtsá tojama tšëngaftanga ndegombre tšabe vida chašmotsebomnana, Crísoftaca cányiñe mo canyáca bëtsemnayeca; y Cristo, nyetsca chë mándayënga y obenana bomnëngbiana más uamaná endmëna. ¹¹ Tšëngaftanga Crísoftaca cányiñe mo canyáca bëtsemnayeca, mo uinynananëngcá šmontsemna, tšëngaftanga Bëngbe Bëtsabe entšanga šmomnana. Quem uinynanánana ndoñe quenátsmëna mo chë más delicadentse base bobachtema tmojatëtšcá, cach entšangbeyeca ntšamo judiënga monduamancá, pero aíñe entsemna cach Cristo nda tcmojauinynaná; y chë uinynanánana entsemna, tšëngaftangbe ainanentsana Cristo bacna juabnënga jabuajuánayana. ¹² Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bëtsemnana tšëngaftanga šmojtsošbuáchema, y chë obenana tojama Cristo cháuatayenama.

¹³ Inye tempo tšëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinynananënga mo Bëngbe Bëtsabe entšangcá ndoñe šmonjámnyayeca, pero aíñe šmojanamana bacna soyënga jtsamana nye ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnana, Crísoftaca cányiñe mo canyáca jtsemnëse, y Bëngbe Bëtsá bëngbe nyetsca bacna soyënga šojtsaperdoná. ¹⁴ Mo nda ba ndebënénga tojtsabamna y chama tsbuanachangá tojtsamna y chiñe tojtsayana chënga obligacionaca imojtsemna chë ndebënána pronto jtobocana ca, pero chë entšá chëchangá tojtsandbiana chë entšanga cha ndoñe más chamondëtsendebënama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebënána tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínÿengbioye amëndayënga; y nyetsca entšangbe delante tojaninÿanyé cha chënga jtsamëndayama yobenama, mo canye reycá chë ínÿenga tojayëñaná ora, chabe entšangaftaca natsana jtsayana y chë ayëñanánënga ústonoye.

Ainaniñe becá jtsebošana chë ošbuáchiyëngbiana celoca yomna soyënga

¹⁶ Ndoñe caso šmattsabiamnaye, ndoñe tšabá šmontsama ca ínÿenga tšëngaftangbiana tmojtsichamo ora, ndayá tšëngaftanga šmétsesaye o

šmétsofšěšnayama, o ndayá aíñe o ndoñe šmondbétsamama Běngbe Bětsá jadórama fiestěnga ora o shbojueta fiesta ora, o jóchnama tese. ¹⁷ Bayte entsemna, Běngbe Bětsá entsangbe cucuatšíñe chě manděnga tojánboshjona, chě soyěngama běnga jabuátambama. Chě manděngaca Běngbe Bětsá yojaninýanýnaye ndayá más chcoye jopásama; entsángbioye yojaninýanýnaye ndayá Cristo yochjanmama. ¹⁸ Báseftanga mondměna y chěnga mo nduamaněngcá entsángbeñe jtsebínýnana, pero tsoye cachěnga corente uámaněnga jtse nobiamnayana y angelěnga jtsadórayana, mo Běngbe Bětsá cuaftsemncá. Ndoñe caso šmattsabiamnaye, tšěngaftanga ndoñe tšabá šmontsama ca chěnga tmojtsichamo ora, ntšamo chěnga tmojtsichamcá tšěngaftanga ndoñe šmontsámayeca. Chěnga jtsichámuana běts soyěnga mo otjenayoquěcá tmojinýe ca, y nýe cachěnga puerte jtse nábotamnayana, pero chca chamotsamama razón ndoñe quemátsbomna, er nýe ntšamo inýe entsanga imnetsejuabnaycá chěngnaca cachcá jtsejuabnayana. ¹⁹ Chěnga Jesucrístoftaca cánýiñe ndoñe tmonjoquedanga, y Cristo endměna chě nýetsca ošbuáchiyěngbe aměndayá, mo chě bestšaše nýets cuerpo jtse mandayancá. Canýe cuerpiñe chě bestšaše jtsamana nýets cuerpo chaóbochema, ntšamo Běngbe Bětsá tojtsebošcá, chě cuerpo ndayá jasama chaotsebomnama jtsaměse, y nýetsca chě cuerpentša soyěnga chamenefjanama jtsaměse. Cachcá, Cristo jtsamana nýetsca ošbuáchiyěnga cánýiñe mo canýacá cháftaca chamotsemnana, y cada te más tšabá cha chašmotsábuatmama.

²⁰ Cristo tojanóbana ora enjamna mo tšěngaftángnaca cuafjobancá, y Běngbe Bětsá tšěngaftanga cmojatsebacá chě quem luarentše imománda espíritěngbe cucuatšentšana. As, ¿tšěngaftanga ndáyeca šmojtsiyena jtsaměse mo chě nýe quem luarama enojuabnayěngcá? ¿Ndáyeca tšěngaftanga cabá šmobedecena chca manděnga, mo: ²¹ “Chě soye ndoñe matsbanana, chca soye ndoñe catjase, o chě soye acbe cucuátšeca ndoñe catjaca ca”? ²² Lempe chě manděnga, chě ndayá canýa ndoñe bontsemna jamana, nýe soyěngama jtsayanana, y tempo tojochněngo ora, chě soyěnga jtsopochócana y chora tondaye ntsámanana. Chě manděnga jtse mnana nýe ntšamo entsanga mondbetsamcá y ínýěngbioye mondbetsabuatambaycá. ²³ Ndegombre, ba entsanga jtsejuabnayana chě manděnga tmojaměngbiana, puerte osertanáncaca chca tmojama ca, pero ndegombre chca ndoñe quenátsměna; er chěnga jtsichámuana, ntšamo Běngbe Bětsá jadórama yomncá imojtsabuatambá ca, jtsabuátambayana entšá cabnměna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chě manděnga tondaye ntsámanana, er chě manděnga entsangbe ainanentsana ndoñe ntjajuánana chě bacna soyěnga jtsamama juabněnga.

3

¹ Cristo cháuatayenama Běngbe Bětsá tojanma ora, enjamna mo tšěngaftángnaca Crístbeñe ošbuáchiyěnga, chašmatayenama cha cuafjamcá. Chíyeca, tšěngaftangbe ainaniñe puerte šmochtseboše ndayá Běngbe Bětsá celoca tšěngaftangbiana yobomncá; y choca, Cristo uamana puestentše endětbemana, Běngbe Bětsabe catsbioica. Y šmochtsinýinýnaye chca šmojtsebošama, ntšamo jtsaměse mora šmojtsiyenama. ² Tšěngaftanga nýets tempo chě celoca soyěngama šmochtsejuabnaye, ndoñe chě nýe quem luarentše yomna soyěngama. ³ Tšěngaftanga Crístoftaca cánýiñe mo canýacá jtse mněse, jtse mnana mo tšěngaftanga ya cuafjobancá, er mora ya ndoñe quešmátiyena tempcá jtsaměse. Cristo, Běngbe Bětsáftaca cánýiñe mo canýacá endměna, y Cristo endměna nda mora tšěngaftangbe vida

yojtsinÿena. ⁴ Ndegombre, Cristo endmëna nda endama tsëngaftanga tsabe vida chašmotsebojnana; y quem luarentse cha cachiñe chaojtonÿná ora, tsëngaftángnaca chentse cháftaca šmochántsemna, y chora ntšamo Cristo corente uamaná y bëtšá yomnana Bëngbe Bëtšá yochjinÿanÿiyá, tsëngaftangbiámna echanjinÿanÿiye más bëtšétsanga y uamanënga šmojtsemnana.

Tempscá vida y morsca vida

⁵ Tsëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtseyena nÿe ínÿengbiama bacna juabnënga jtsebojnëse, y ndoñe chaondëtseboše nÿe bëtšcá soyënga ínÿengbiama más jtsebojnana, er chca jtsamana jtsayanana, chabiama más yojsámna soyënga jtsebojnana, Bëngbe Bëtšá jatsbobonshánana. ⁶ Er entšanga mondmëna y chënga chca soyënga jtsamama jtsebošana, y Bëngbe Bëtšá ndoñe ntseyeunanana. Chca entšángaftaca Bëngbe Bëtšá puerte bochanjetna, y echanjamánda chë uabouana castigo chëngbeñe chaotsemnana. ⁷ Y tempo, tsëngaftanga šmojaniyena jtsamëse, sempre nÿe chca bacna juabnëngaca, ⁸ pero mora tsëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tsabe palabrenga jtsóyebuambnayana. ⁹ Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. ¹⁰ Y mora tsëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtšá chca tsmëma entšangcá tcmojábiamana; y cha nÿets tempo yojsama, tsëngaftanga cada te más ntšamo cha yomncá chašmotsemnana, chca, corente tsabá cha chašmuábuatmanana. ¹¹ Chíyeca, ndayá Bëngbe Bëtšá tojamama, ndoñe judiënga y judiënga cachcanga mondmëna; chë más delicadentse base bobachtema tëtšenënga ndoñe más uamanënga quemátsmëna chë ndoñe chca mondmënëngbiama; chë inÿe luarëngocana áshjajnënga, bën tjoye oyenënga, chë nÿe ínÿabiama nÿets tempo oservënënga y chë cachëngbiama trabájayënga, nÿetscanga cachcanga mondmëna. Chë nÿe ndayá iuámna endmëna Crístbeñe jtsošbuáchiyana y nÿetsca ošbuáchiyëngbe ainaniñe cha yojtsemna jtsemándayama.

¹² Tsëngaftanga Bëngbe Bëtšábenga šmondmëna. Cha cmondábabuanÿeshana y tcmojabacacá chabe entšanga chašmotsemnana; chíyeca, tsëngaftanga cmontsamna ínÿenga jtsinÿanÿinayana nÿetscangbiama jóngmiamana šmuamanama, tsabe juabna ínÿengbiama sempre šmnëtsebojnana, cada ona chë ínÿenga chabiama más uamanënga cuaftsemncá imnëtsejuabnayama, nÿetscanga puerte bonshanánaca šmnétsënÿayama, y nÿetsca padecena soyënguiñe corente uantadënga šmomnana. ¹³ Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtšá tsëngaftanga tcmojaperdonacá, tsëngaftángnaca cachcá ínÿenga šmochjáperdonaye. ¹⁴ Lempe chë soyëngama más enduámna nÿetscanga jtsenbobonshánana. Nÿetscanga šmojtsenbobonshánëse, tsëngaftanga šmochantsobena sempre lempe chë inÿe soyënga corente tsabá jtsamana, ntšamo ndegombre chë soyënga jamama yomncá. ¹⁵ Cristo endama tsëngaftangbe ainaniñe tsabe ebionana chašmotsebojnana. Chë tsëngaftangbe ainaniñe tsabe ebionánaca

šmochtsiyena nÿetscanga natjẽmbana, Jesucristbeñe ošbuáchiyẽnga quetsomñecá. Bẽngbe Bẽtsá tcmojáchembo tšẽngaftanga nÿetscanga cánÿiñe mo canÿe cuerpcá chašmotsemnana, y chca, natjẽmbana chašmotsiyenama. Bẽngbe Bẽtsá sempre šmochtsatschuanaye.

¹⁶ Chẽ Cristbe puerte tšabe buayenana soyẽnga tšẽngaftangbe ainaniñe nÿets tempo šmochtsambaye. Nÿets osertanáncá šmochtsenbuátẽmbaye y šmochtsenbuayiynaye. Nÿets ainánaca šmochjacánta chẽ Salmos librẽšañe uabemana cantẽnga, chẽ Jesucristbe soyẽngama cantẽnga, y chẽ Bẽngbe Bẽtsabe Espíritu iuama tšẽngaftanga chašmotsobena jacántama soyẽnga; chca šmochjama Bẽngbe Bẽtsá jẽtschuayama. ¹⁷ Y lempe ntšamo chašmojtsama o chašmotsichamcá, Bẽngbe Utabná Jesúsbeñe ošbuáchiyẽnga quetsomñecá chca šmochjama, sempre Bẽngbe Bẽtsá Bẽngbe Taitábioye, chábeyeca jt-satschuanayẽse.

Ntšamo ínÿengaftaca jtsiyenama

¹⁸ Shémanga, šmochtsetátšẽmbo tšẽngaftangbe boyanga chẽ yebnentša mándayẽnga imomnana, y nÿets tempo chca jtsejuabnayẽse šmochtsiyena, er tšẽngaftanga Bẽngbe Utabnábeñe ošbuáchiyẽnga quetsomñecá, chca cmontsamna. ¹⁹ Boyanga, tšẽngaftangbe shémanga sempre šmochtsababuánÿeshana, y podesca palabréngaca ndoñe šmattsẽtsẽsnaye.

²⁰ Básenga, tšẽngaftangbe bẽtsẽtsanga nÿetscañe šmochtsayaunana; chca šmojtsamẽse, Bẽngbe Bẽtsá oyejuayá echántsemna. ²¹ Taitanga, ndoñe šmattsama tšẽngaftangbe básenga chauetẽnana, ainaniñe tondaye añémoca chẽnga ndoñe chamondẽtsatsmẽnana.

²² Tšẽngaftanga chẽ nÿets tempo nÿe ínÿabiamana oservénẽnga, tšẽngaftangbe nduiñẽnga nÿetscañe šmochtsayaunana, y ndoñe nÿe chẽnga tcmojtsẽñÿa ora, mo nda nÿe entšangbe delante tšabá joquédama tojtsebošacá, ndayá chẽnga šmochtsayaunana nÿets ainaniñe ndegombre tšabe juabnẽngaca, er tšẽngaftanga Bẽngbe Utabnabiamana corente respeto šmondobomna. ²³ Lempe ntšamo chašmojtsamcá, nÿets tšẽngaftangbe añémoca šmochtsama, mo Bẽngbe Utabná ndegombre cuaftseservencá, y ndoñe nÿe entšangbioycá. ²⁴ Tšẽngaftanga ya šmondẽtatšẽmbo, ntšamo cha chabe entšanga tojašebuachenacá mo uacanancá, Bẽngbe Utabná tšẽngaftanga cmochjátšatayama. Er Cristo, chẽ Utabná, endmẽna ndábenga tšẽngaftanga šmomnana, y cha šmondẽservena. ²⁵ Pero chẽ ndoñe tšabe soyẽnga tontsamábioye, Bẽngbe Bẽtsá bochanjacastíga, ntšamo chẽ entšá bacna soyẽnga tojamcá, er Bẽngbe Bẽtsabiamana nÿetscanga cachcá monduámana.

4

¹ Y tšẽngaftanga, ndẽmuanÿengbiamana ínÿenga nÿets tempo imoservena, nÿetsca soyẽnguiñe tšabá šmochtsama, y nÿetscangbiamana cachcá šmochtsemna, chẽ nÿets tempo nÿe tšẽngaftangbiamana oservenẽngaftaca, er tšẽngaftanga šmondẽtatšẽmbo celoca canÿa endmẽna, ndabiamana tšẽngaftangnaca oservénẽnga šmondmẽna.

Ošbuáchiyẽnga jábuayenama

² Nÿets tempo Bẽngbe Bẽtsáftaca šmochtsencuéntaye, ntšamo šmojtsichámuama botamana jtsejuabnayẽse y Bẽngbe Bẽtsá jtsatschuanayẽse. ³ Bẽngbe Bẽtsáftaca cha šmojtsencuénta ora, bẽngbiámnaca chašmochtseimpadana, cha chaoma bẽnga fchayobenama Bẽngbe Bẽtsabe palabra Cristbiamana entšanga jábuayenama, chẽ buayenana soye ndayama tempo entšanga ndoñe monjántatšẽmbo. Atše chẽ buayenana soye entšanga

abuátambaye causa, mora cárceloje sentsétámena. ⁴ Chcasna, Bëngbe Bëtsá atšbiana smochtseimpadana, atše chayobenama chë buayenana soyënga entsanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

⁵ Smochtsiyena nyetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nyets tempo ínÿenga smochtsinÿanÿnaye tšëngaftanga Jesucristbeñe ošbuáchiyënga bétsemnama. ⁶ Inÿengaftaca chašmojtsencuénta ora, smochtsama ntšamo šmojtsoyebuambnacá chëngbiana tšabá chaotsemnama, y soyënga smochtsichamo nyetscanga oyejuayana chamotsebomnama; y smochtsetátšëmbo ntšamo cmojtsamna cada cánÿabioye jojuana.

Jtadiósoftanama

⁷ Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiana bëngaftaca oservená, tšëngaftangbioye noticiënga echanjuamba ndayá átšeftaca tojopasama. ⁸ Chiyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañémuayama. ⁹ Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

¹⁰ Aristarco, muentše átšeftaca cárceloje utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga smontsemna ndayá jamama cmojtsamnana, Marcos tšabá joffama, cha tšëngaftanga jautsëtsayama tojase. ¹¹ Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entsángbioye chaóshjanguama, y chënga mondama atše ainaniñe bëts añemo chaitsebomnama. ¹² Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservena. Cha nyets tempo tšëngaftangbiana Bëngbe Bëtsábioye tša bochandbétseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente smochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. ¹³ Cach atše sënjinÿe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëgnaca. ¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catšátanga bëngbe cuenta smochjácheuaye. Ninfábioynaca smochjachuaye, y nyetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëgnaca. ¹⁶ Quem tsbuanácha chašmojualiá chentšana, Laodiceoca ošbuachiyëngbioye smochjuíchmua, chócnaca mëcha chamualiamá; y tšëngaftángnaca smochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

¹⁷ Arquipo smochjauyana yejuana chaotsantješna chë Bëngbe Bëtsá tbojabonÿe trabajo sempre tšabá chaotsocumplínama.

¹⁸ Atše Pablo, nÿe quem palabrenga tšëngaftanga jacheuayama cach atšbe cucuátšeca sentsabiamná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

1 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnana, y tšëngaftanga ainaniñe tšabe ebionana chašmotsebmnama.

Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama

² Bënga sempre Bëngbe Bëtsá fsëndëtschuaná tšëngaftangbiamá, y bënga cháftaca ftsencuénta ora, tšëngaftangbiamá fchandbëteimpadana. ³ Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca catsátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnana. ⁵ Bënga chë tšabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bëtsemnana. Tšëngaftanga corente šmondëtatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiamá nguayíñe.

⁶ Chora, ntšamo bënga fsënjanamcá y ntšamo Bëngbe Utabná enjanियencá, tšëngaftanga šmonjanontsé amana; y chë buayenánana šmonjanóyëngacñe chë Uámana Espiritu tcmojanatsatá oyejuayánaca, masque ínÿenga tmojamna tšëngaftanga puerta chašmosufrima. ⁷ Mëntsá, tšëngaftanga uánatsanënga šmonjanobiamá ntšamo ndegombre jtšiyenama, nÿetsca Macedonia y Acaya luarentša Jesucristbeñe ošbuáchiyëngbiamá. ⁸ Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatsëmbo —nÿets luarenache entsángnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema — y chca, bënga tondaye más quešnátëjamoto tšëngaftangbiamá jatichámuama. ⁹ Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama, ¹⁰ y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentsana cháuatayenama, y cha šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiamá yobomnentsana.

2

Ntšamo Pablo yojantrabája Tesalónica puebloca

¹ Cach tšëngaftanga, Jesucristbeyeca catsátanga, šmondëtatšëmbo bënga tcbonjánabuache ora ndoñe nÿe bonamente quenjatsmënama. ² Tšëngaftanga šmondëtatšëmbo, bënga cabá tšëngaftangbioye nda ora, Filiposoca

sonjanëyánguango y bacá sonjánaborlama; y masque tsëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tsabe noticiënga bëtscá añémoca jabuátambama. ³ Er bënga entsángbioye bostero soyënga ndoñe queftsjatanabuayiyná, tsëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná. ⁴ Bëngna inyetsá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, sonjanëbuáyana chabe tsabe noticiënga entsanga jabuátambama, y chca bënga fsëndoyebuambná; chíyeca bënga ndoñe nye entsangbe bominyiñe tsabá chaotsinýnama queftsátama, ndayá nye Bëngbe Bëtsabiama, nda chë ndayá bëngbe ainaniñe yomnama yotátšëmbo. ⁵ Ntsamo tsëngaftanga corente šmondétatšëmbcá, bënga ndocna te tsëngaftangbiama tsabe soyënga tifjánayana, tsëngaftanga bëngaftaca oyejuayënga chašmotsemnama; y ntsamo tsëngaftanga cbonjanëtsëtsnacá ndoñe quenjatsmëna nye tsëngaftangbentsana ba soyënga bëngbiama josháchiñama. Bëngbe Bëtsá chama yotátšëmbo. ⁶ Ndocna te bënga queftsatsnguá entsanga más uamanëngcá bënga chašotsabiamnama, ni tsëngaftangbentsana, ni inyëngbentsana.

⁷ Masque bënga, Cristbe ichmónënga bëtsemnama, matifjanobená tsëngaftanga nye sempre jtsamëndayana, bënga ndoñe chca chibiátanma; bënga corente jtsababuánýeshanëse cbonjánanýena, ntsamo canye mamá chabe básenga jtsabéchayana y corente bonshanánaca jtsanýenana. ⁸ Tša cbonjánababuanýeshanayeca, bënga ndoñe nye chë Bëngbe Bëtsabe tsabe noticiënga checbënjatanabuayená, tsëngaftanga chiñe chašmotsošbuáchema ntsamo bënga fsëndošbuachecá, ndayá bëngbe vidënga jáshbiamnaca fsënjanprontana tsëngaftangbe tsabiama. ¡Tša cbondábabuanýeshana! ⁹ Jesucristbeyeca bëngbe catšátanga, tsëngaftanga šmenabouínýna ntsamo bënga bëtscá y jabuache fsënjantrabajama, Bëngbe Bëtsabe tsabe noticiënga abuayiynayiñe y bëngbe vida onguayiñe, chca, tsëngaftanga ndoñe chacmondëtsamnama bëngbe uajabótama bënga jatatšatnayama.

¹⁰ Cach tsëngaftanga šmondétatšëmbo y Bëngbe Bëtsánaca, ntsamo bënga ftsjamna tsëngaftanga chë ošbuáchiyëngaftaca fsënjamna ora; fsënjaniyena ntsamo Bëngbe Bëtsá tsabá tbojtsinýancá, nyetscángaftaca fsënjánama ntsamo jamama šojanamncá, y ndocná quenátobena jatichámuana ntsamo fsënjanamcá ndoñe tsabá yonjamna ca. ¹¹⁻¹² Tsëngaftanga šmondétatšëmbo, bënga bëtscá jóyebuambayëse cada ona tsëngaftanguentsá cbonjanëjabuachanama y cbonjánanëmuama, ntsamo canye taitá chabe básengaftaca endbetsamcá. Bënga bëtscá cbonjanëtsëtsná ntsamo Bëngbe Bëtsá tsabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

¹³ Bënga, Bëngbe Bëtsabe tsabe soyënga cbonjanabuayiyná ora, ntsamo tcbonjanëyancá tsëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nye entsangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca, tsëngaftanga chë chabeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. ¹⁴ Jesucristbeyeca catšátanga, cach tsëngaftangbe luarentša entsanga cmonjanëcamena ora y šmonjansufrina, šmonjanpasá ntsamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora. ¹⁵ Chë judiëngbe bëtš taitanga, Bëngbe Bëtsabe juabna oyebuambnayëngbioye tmojtsanëbaye, y ntsamo

chëngbe bëtš taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tsábenga Bëngbe Bëtsabe bominyiñe quemátsmëna, y nyetsca entsangbe contra montsemna. ¹⁶ Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica puebloca entsanga jányama

¹⁷ Jesucristbeyeca catšátanga, bënga tsëngaftangbentsana baseftayté jëftsebochnama šonjanotocá ora, masque ndoñe choca tsëngaftangaftaca queftsjátanmëna, sempre tsëngaftangbiamá fsënjanenuabná, y tša fsënjánboše tsëngaftangbioye jtésana jautsëtsayama. ¹⁸ Bënga fsënjánboše tsëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. ¹⁹ Atše sënšanboše tsëngaftanga jautsëtsayama, er tsëngaftangbeyeca Bëngbe Utabná Jesusbe delante, cha yochjésabo ora, ntšamo tsëngaftanga šmoyenama, bënga puerte jtsošbuáchiyëse fchantsobatmana, corente oyejuayënga fchtsemnama y más bëtšëtsanga fchtsemnama. ²⁰ Aíñe, ndegombre, ntšamo tsëngaftanga šmoyenama, bënga bëtscá añémoca ntšamo tsëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

3

¹ Chíyeca ya ndoñe chibiatanobená más jatobátmanana tsëngaftanga jautsëtsayama; as fsënjanjuabó nýe bëndata Atenas bëtš pueblentše joquédana, ² y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tsabe noticiënga Cristbiamá entsanga abuayinyayíñe. Fsënjanichmó chacmañémuayama y chaotsamama tsëngaftanga Jesucristbeñe más chašmotsošbuáchema; ³ y chca, ndocná Jesucristbeñe ošbuáchiyana chaondájbánama, masque tsëngaftanga Jesúsbeñe ošbuáchiyënga bëtsemnama, ínýenga imojtsama chašmotsesufrínama. Er cach tsëngaftanga šmondëtatšëmbo bënga šojtsamna chca quem luarentše jëftsepadecénana. ⁴ Y cabá tsëngaftangaftaca fsënjëftsemna ora, tcbonjanéyana bënga šojánamna jasúfriana; y ndegombre chca tonjopasá, ntšamo tsëngaftanga ya šmondëtatšëmbcá. ⁵ As y chë tsëngaftangbiamá jtsetatšëmbuama más jatobátmanana ndoñe quetstétsobenayeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aíñe bëtscá o ndoñe tsëngaftangbe ošbuáchiyana Jesucristbeñe tajojamnama, er atše yapa sënjanjuabná nderado Satanás tojanma tsëngaftanga bacna soyënga chašmotsamama, y chca, bëngbe trabajo tondayama chaondëtsošservénama.

⁶ Pero mora, Timoteo tsëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tsëngaftanga bëtscá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tsëngaftanga corente oyejuayënga bëngbiamá šmuatenajuabnama, y ntšamo tsëngaftanga tša šmojtseboše bënga jányama, cachcá ntšamo bënga tsëngaftanga jányama tša fsëntsebošcá. ⁷ Quem sóyeca, Jesucristbeyeca catšátanga, y mora chë bënga nyetsca chë padecena soyënga fstsebochna ora y ínýenga bënga jasúfriana imojtsama ora, bëtš añemo

fséntsebomna, ntšamo tsëngaftanga tša Jesucristbeñe šmojtsošbuáchema jtsetatšëmbëse. ⁸ Jtsetatšëmbuana tsëngaftanga sempre puerte tsábá Bëngbe Utabnáftaca šmoyenama, entsama bënga más añémoca chaftsiyenama. ⁹ Mora fchantsobena Bëngbe Bëtsá jtsatschuanayana tsëngaftangbiana, y chë tsëngaftangbeyeca chabe delante bënga oyejuayana ftsbomnámnaca. ¹⁰ Cada te, bnëtë y ibeta, tša Bëngbe Bëtsá fsëndétseimpadana jobenayama tsëngaftanga jautsëtsayama chašualesenciama, Bëngbe Bëtsabe palabra tsábá chašmobedecema, chë buayenánana ntšamo vojtsashbencá jabuátambama.

¹¹ Bënga, Bëngbe Bëtsá fséntseimpadana, cachá y Bëngbe Utabná Jesús, chašújabuache bënga fchayobenama tsëngaftangbioye jama jautsëtsayama. ¹² Y Bëngbe Utabná chaoma más bëtská chašmotsenbobonshánama, y cachá corente nyetscángaftaca, ntšamo bënga cbondababuanyeshancá. ¹³ Chca, tsëngaftangbe ainaniñe bëtská añemo šmochántsebomna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaundayana, ntšamo tsëngaftanga šmojamcá ndoñe tsábá yontsemna ca, er tsëngaftanga šmondmëna Bëngbe Bëtsábenga, nýe cha jtseservénama.

4

Ntšamo jtsiyenama, Bëngbe Bëtsá oyejuayá chaotsemnana

¹ Y mora inýe palabra šmochjatspaséncia. Jesucristbeyeca bëngbe catšátanga, tsëngaftanga bëngbentsana šmonjanatsjinýe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtsná más chca chašmotsamama.

² Tsëngaftanga šmondétatšëmbo ndayá tifjánayana ntšamo tsëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. ³ Bëngbe Bëtsá endboše tsëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondétsamama, ⁴ y nyetscanga chamotsobena ntšamo canýe shema jonguanguana, chë ntšamo canýa Bëngbe Bëtsábia yomná jamama ibomncá, y ntšamo entsangbe bominiñe tsábá yomncá, ⁵ y ndoñe chabondónguango nýe cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. ⁶ Chë palabriñe ndocná chabe catšátbioye chabondëingné, chë catšatbe shémaftaca bacna soye jamëse, er chca améngbioye Bëngbe Utabná corente echanjácastigaye. Chýeca bënga ya bëtská chama tcbonjabuayená. ⁷ Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tsábá yomncá jtsamama, ntšamo chabe entsanga mondbetsamcá. ⁸ Mëntsá, nda quem buatëmbana soyënga tojtsábotena, cha ndoñe nýe entsanga jtsëbátanana, ndayá Bëngbe Bëtsábioye, nda tsëngaftangbe ainaniñe Uámana Espíritu cháuamashënguama tojama.

⁹ Atše ndoñe quešnátsmëna juabuábiamana ntšamo cmojtsamna ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcbonjabuatambá nyetscanga chašmotsenbobonshánama. ¹⁰ Y ndegombre, tsëngaftanga chca šmondama nyetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

¹¹ Nýa sempre quem soyënguiñe šmochtsentšena: natjëmbana jtsiyenana, ínýengbe soyënguiñe ndoñe ntsontrëmeténana, y ndoñe ntjatobátmanana nýe ínýenga tsëngaftangbiana chamotsetrabájama, ntšamo tcbonjanëyancá tsëngaftangaftaca fsënjamna ora; ¹² chca šmochtsama, chë ínýenga Jesucristbeñe

ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

¹³ Bëngbe catsátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë inyëngcá, chë tcojóbanentšana ndoñe yontsemna jtayenama ca juabnayëngcá.

¹⁴ Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiama yochjama chë nyëtsca tescama yomna tšabe vida Jesucrístoffaca chamotsebomnana, y quem luaroye cháftaca chamuatábama.

¹⁵ Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiama.

¹⁶ Er entšanga mochanjouena canye mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

¹⁷ chentšana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nyëtsca tescama cháftaca bënga mochántsemna. ¹⁸ Quem palabrëngaca nyëtscanga ndoñe más ngménana ainaniñe chašmondëtsebomna.

5

¹ Jesucrístbeyeca catsátanga, ndoñe quenátsiyta atše jubuábiamana mocna ora chë soyënga yochjopásama. ² Cach tšëngaftanga corente šmondëtatsëmbo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjatsjuabná ora. ³ Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nye ndeolpe chë entsangbiama tša jasúfriama echanjóshjango, mo canye shembása šešona jtsebomnana ora nye ndeolpe jasúfriama jóntšancá; y ndegombre, entšanga chca jasúfriama quemochatotsbocá. ⁴ Pero tšëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá. ⁵ Nyëtsca tšëngaftanga šmondmëna entsangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶ chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aiñe šontsamna mo chë fšnëngcá jtsiyenana, bëngbe cuerpo jtsemándayëse y nyëts tempo jtseprontánëse. ⁷ Ibeta ora entšanga jtsemangana, y cach ibeta tojtsemna ora entšanga jotmenangana; ⁸ pero bënga, chë binýnentsëngna, šontsamna sempre bëngbe cuerpo jtsemándayana. Sontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiama jenëuyanama y cha jayénjanama, mo canye soldadcá, canye morocho soye cochaca jenácochjatsana jtsevalentiana y ndoñe chamondëyénjanama. Y chë castigüentšana Bëngbe Bëtsá šochjátsebacamnaca

puerte jtsošbuáchiyëse jtsobátmanana; y chca, bënga mochántsemna mo canye soldadca, cha canye casquëse juabuchëtsana jenëuyanama. ⁹ Er Bëngbe Bëtsá ndoñe šonjáchembo bënga chašotsamnana chë nyetsca tescama castigo jtsebonnana. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. ¹⁰ Cha bëngbiana tojanóbana, bënga cháftaca cányiñe jtsiyenama chamotsobenama, masque ainënga o obanënga chamojtsemnëse, cha chaojésabo ora. ¹¹ Chiyeca, nyetscanga šmochtsenañemuaye y šmochtsenájabuachana más jtsošbuáchiyama, ntšamo tšëngaftanga mora ya šmontsamcá.

Pablo choca ošbuáchiyënga jábuayenama

¹² Jesucristbeyeca catšátanga, cbontsaimpadana chašmotsarrespetana chë Bëngbe Bëtsabiana tšëngaftangbeñe trabajayëngbioye, y chë Bëngbe Utabná tšëngaftanguentse tojábacacanga uánatsanënga chamotsemnana y ntšamo jt-siyenama cmojtsamnana chácmbuayenama. ¹³ Cmontsamna chënga jtsar-respetánana y jtsababuányëshanana, ndaye trabajo chënga imojtsamama. Natjëmbana nyetscángaftaca šmochtsiyena.

¹⁴ Quem soyënga chašmotsamámnnaca cbontsaimpadana: jatrabájama ndoñe tmontsebošëngbioye šmochjucácana, añemo ndbomnëngbioye šmochjáñemuaye, bëtsca ošbuáchiyana ndbomnëngbioye šmochjújabuache, y uantadënga nyetscángaftaca šmochtsemna.

¹⁵ Cuedado šmochtsebonna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentšena nyets tempo tšabe soyënga jtsamama cach tšëngaftanguentšëngaftaca y nyetsca entšangaftácnaca.

¹⁶ Nyets tempo oyejuayënga chašmotsemna. ¹⁷ Sempre Bëngbe Bëtsáftaca šmochtsencuëntaye. ¹⁸ Nyetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

¹⁹ Ndoñe šmattsama ntšamo chë Uámana Espíritu tšëngaftangbeñe yojt-samcá chaotsopochocama. ²⁰ Ndoñe šmattsábotena chë Bëngbe Bëtsabe juabna oyebuambnayëngbe buayenana soye. ²¹ Yejuana šmochjájabuoye y šmochjayana, chë Bëngbe Bëtsabe juabna oyebuambnayá yomná ca tojt-sichamuabe buayenánana ndegombre Bëngbe Bëtsábicana tayóbocanama, y chentša tšabe soyënga šmochjobuajo y sempre chca šmochtsama. ²² Nyetsca bacna soyënguëntšana šmochtsojuánañe.

²³ Cach Bëngbe Bëtsá, chë bëngbe ainaniñe tšabe ebionana chamotse-bonnana endamá, nyetsca soyiñe tšábenga chacá chacmabiana, y nyets tšëngaftangbe espíritu, ainana y cuerpo chaotsinýena, Bëngbe Utabná Jesu-cristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama. ²⁴ Nda tcmojúbuaja chábenga chašmotsemnana, cha sempre jtsamana ntšamo tojayancá, y lempe cha echanjama.

Inye rueguënga chëngbiana y jtadióšoftanama

²⁵ Jesucristbeyeca catšátanga, Diosmanda, bëngbiámnnaca Bëngbe Bëtsá šmochtseimpadana.

²⁶ Nyetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²⁷ Cbontsaměnda quem tsbuanácha nŷetsca Jesucristbeñe ošbuáchiyěnga chašměbuáliama, y chca sěntsama, Běngbe Utabná chca jamama šojanmandáyeca.

²⁸ Atše sěntseimpadana Běngbe Utabná Jesucristo, chaoma tšabe bendicioněnga tšěngaftangbeñe chaotsemnama.

2 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tsëngaftangbiana, chë Tesalónica bëts puebloca Jesucristbeñe ošbuáchiyëngbiana, tsëngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmommënga. ² Atše sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnana, y tsëngaftangbe ainaniñe tsabe ebionana chašmotsebomnana.

Cristo chaojésabo ora, ntšamo entsanga tmojamama Bëngbe Bëtsá echanjayana

³ Jesucristbeyeca bëngbe catsátanga, šontsamna nyets tempo Bëngbe Bëtsá tsëngaftangbiana jtsatschuanayana, ntšamo tsëngaftangbiana jamama šojtsëtocancá, er tsëngaftanga cada te más ošbuáchiyana šmontsebomna, y ntšamo tsëngaftanga nyetscanga šmojtsenbobonshana, tempscama más yojtsemna. ⁴ Tsëngaftangbe ošbuáchiyama y bonshánama, bënga nyets tempo oyejuayënga fchandbëtsemna, chë ínÿenache Bëngbe Bëtsábeñe ošbuáchiyëngcá enefjuanëngbeñe tsëngaftangbiana jóyebuambayama. Bënga fchandbëtsoyebuambnaye ntšamo tsëngaftanga inÿetšá ntjatsjuabnacyá Jesucristo šmëstonama, y ntšamo tsëngaftanga chábeñe tša šmošbuachémnaca, masque ínÿenga tša cmëcamena y chašmosufrima bëtscá imojtsama, tsëngaftanga Jesucristbeñe ošbuáchiyënga bëtsemnana. ⁵ Tsëngaftanga chca Cristo šmëstonayeca, corente entsinÿinÿena Bëngbe Bëtsá nyetsca soyënguiñe tsabá amá yomnana, y entsanga ntšamo tmojamama tsabá o ndoñe tsabá bëtsemnana jayanama ora, cha chca echanjayana ntšamo entsanga tmojtsomerecencá. Y chca entsayana tsëngaftanga aíñe merecido šmotsobuájoñe chabe amëndayoye jamashënguama ca; y mora, tsëngaftanga choye jobenayama jashjanguama šmojtsamama, ínÿenga imojtsama chašmotsesufrínama.

⁶ Bëngbe Bëtsá echanjama ntšamo jamama ibomncá; echanjama chë tsëngaftanga chašmosufrima imojtsamënga bëtscá chamosufrima; ⁷ y echanjama tsëngaftanga y bënga chë mondësufrinëngbiana, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá iñetsënga echántsemna. ⁸ Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tsabe noticiënga Bëngbe Utabná Jesusbiana ndoñe montsuenanëngbioynaca. ⁹ Chënga Bëngbe Bëtsá echanjácastigaye, nyetsca tescama jtsapochócase; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnana. ¹⁰ Quem puerte uámana te, Bëngbe Utabná chaojésabo ora, nyetsca chabe entsanga, nyetsca chábeñe ošbuáchiyënga cha mochántatschuanaye y mochántschamo: “¡Tša obená cha yomna ca!” Y tsëngaftanga chëngaftaca šmochántsemna, er tsëngaftanga šmonsanošbuaché bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

¹¹ Chíyeca, chca chaotsemnana, nyets tempo Bëngbe Bëtsábioye tsëngaftangbiana fsëndëimpadana merecido bomnënga chácmbiamama, chë vida chašmotsebomnana, ndayama cha tcmojúbuaja, y chabe obenánaca bëtscá chaoma tsëngaftanga chašmobená nyetsca tsabe soyënga ntšamo

šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema. ¹² Chca jtsamëse, tšëngaftanga šmochanjínÿanÿiye Bëngbe Utabná puerte bëtsá y uamaná bëtsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtsá y Bëngbe Utabná Jesucristo tšëngaftangbiama tšabe juabna ibobomna.

2

Chë Bëngbe Bëtsabe contra yomná

¹⁻² Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninÿenama ora. Básefta entšanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtscá šmochtsentšena chënga ndoñe chamondobená jamana tšëngaftanga inÿetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtšëtsëtsná ora: “Canÿe Bëngbe Bëtsabe juabna oyebuambnayá šonjáuyana chë Bëngbe Bëtsabe uámana te ya tojóshjango ca” o “canÿa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”. ³ Bëtscá šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama. ⁴ Cha Bëngbe Bëtsabe contra echanjóyeubumaye, chë ndëmuanÿengbiama y ndaye soyëngama entšanga imojuabná diosënga imomnama contra echanjóyeubumaye. Chentšana cha echanjayana chëngbiama más obená yomna ca. Y Bëngbe Bëtsabe bëts yebnóynaca cha echanjámashëngo, choca echanjót'bema y entšanga echantsëtsëtsnaye ndegombre cha Bëngbe Bëtsá yojtsemna ca.

⁵ ¿Chë soyama tšëngaftanga ndoñe šmondenabouínÿna? Atše cabá tšëngaftangaftaca sënjamna ora, chama sënjanoyebuambná. ⁶ Y tšëngaftanga šmondétatsëmbo, nda mora yojtsama chë Bëngbe Bëtsabe contra yomná ndoñe chaondonÿnama, cabá chë tempo chca jopásama ndóshjango ora. ⁷ Mora ya mallajta entšanga puerte bacna soyënga tmojontšé amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nÿe Bëngbe Bëtsá chca šojinÿanÿese; pero ntšamo tcbonjauyancá chë Bëngbe Bëtsabe contra yomnabiama ndoñe queochatëchnëngo, nÿa nda chë soyënga ndoñe chaondëtsemnama yojtsamábioye Bëngbe Bëtsá chabojtsejuaná ora aíñe. ⁸ Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinÿinÿanánaca y obenánaca echanjábocnama, chábioye bochantsepochoáca. ⁹ Chë Bëngbe Bëtsabe contra yomná, Satanasbe obenánaca echanjabo, y entšanga bëts obenana echanjínÿanÿiye, y chë bëts soyëngaca entšanga ingñënënga mochántsemna. ¹⁰ Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entšangbioye nÿetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiama chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama. ¹¹ Chca causa, Bëngbe Bëtsá entseleséncia entšanga ingñënënga chamotsemnama, y chë ndoñe ndegombre soyënguiñe chamotsošbuáchema. ¹² Bëngbe Bëtsá chca

echanjama, nyetscanga chë ndegombre soyënguiñe Jesucristbiamana ndoñe tmontsošbuáchenga, chë bacna soyënga amama oyejuayënga tmojtsemnënga, chë nyetsca tescama castigo chamotsebomnana jayanama.

Bëngbe Bëtsá šojabacacá atsebácanënga jtsemnana

¹³ Pero bënga šontsamna nyets tempo Bëngbe Bëtsá jtsatschuanayana tsëngaftangbiamana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnana tcmojánabacacama. Bëngbe Bëtsá tcmojatsebácá er chë Uámana Espíritu Bëngbe Bëtsabe entšanga tcmojábiamana, y tsëngaftanga chë ndegombre soyënguiñe šmojtsošbuaché. ¹⁴ Chë tsabe notiçënga bënga cbondábuayiynayeca, Bëngbe Bëtsá tcmojúbuaja chábinga chašmotsemnana. Cha tcmojúbuaja Bëngbe Utabná Jesucristbe obenana y buashinyinýanánëncaca chašmotsebomnana.

¹⁵ Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tsëngaftangbeñe jóyebuambayëse y tsbuanácha jubuábiamëse, y ndocna te inýetšá šmatjátsjuabnaye. ¹⁶ Bëngbe Bëtsá puerte tsabia endmëñayeca, cha šuababuánýeshana y tojama bënga sempre añemo ainaniñe chamotsebomnana y chë mochjóyëngacñe tsabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, ¹⁷ chata chaboma tsëngaftanga bëtscá añemo ainaniñe chašmotsebomnana, y tsëngaftanga nyets tempo chašmotsobena ntšamo tsábá yomncá jtsichámuama y jtsamama.

3

Bëngbiamana Bëngbe Bëtsá šmochtseimpadana

¹ Y morna, Jesucristbeyeca bëngbe catšátanga, Diosmanda bëngbiamana Bëngbe Bëtsá šmochtseimpadana, nyetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tsëngaftanga šmonjanmcá. ² Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyná palabriñe. ³ Pero Bëngbe Utabná sempre jtsamana ntšamo tojayancá, y cha echanjama tsëngaftanga más chábeñe chašmotsošbuáchema, y ndoñe nye cachcá quecmaténýa chë bacna soyënga mandayá nye ntšámnaca ndoñe chacmondáborlama. ⁴ Y Bëngbe Utabná entsama bënga ndegombre ainaniñe fchaitsejuabnana, ntšamo bënga tcboganamëndacá mora šmojtsamama y cachcá sempre šmochtsamámnaca. ⁵ Bënga, Bëngbe Bëtsá fsëntseimpadana, Bëngbe Utabná benache chacmanýanýé bonshánana jtsebomnana ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnana, ntšamo Cristo tojansufrí ora yojanbomncá.

Nyetscanga entsamna jtsetrabájayama

⁶ Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. ⁷ Cach tsëngaftanga tsábá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tsëngaftangbeñe fsënjaninyena ora, nye ntjatrabajacá oyëñjayënga ndoñe queftsjatsmëna, ⁸ ni ndocnabe saná chibiáisese, tondaye ntabuenaycá.

Inyetsá enjamna; cada te bnété y ibeta jabuache fsenjantrabája, chca, tsengaftanga ndoñe chacmondétsamnana bēngbe ujabótama bēnga jatatsatnayama. ⁹ Y ndegombre, bēnga derecho fsenjānbomna tsengaftanga jamēndama chašcújabuachama; pero masque chca, bēnga jabuache fsenjantrabája tsengaftanga chašmotsetatsēmbuama ntšamo yomna jtsiyenama, y chca chašmotsamama. ¹⁰ Bēnga tsengaftangaftaca fsenjamna ora, mēntšá tcbonjanamēndá: Nda ndoñe tontseboše jatrabájama, cha cach ndoñe chaondétsesá. ¹¹ Chca fsentsichamo, er bēnga fsenjátatsēmbona, báseftanga tsengaftanguentsēnga imojtsiyena tondaye ntsamcá, pero tša chē ínēngbe soyēnguiñe jtsontremetēñese. ¹² Chca oyena entšángbioye fsēntsabuayiyná y fsēntsamēnda Bēngbe Utabná Jesucristbe mándoca, natjēmbana cachēngbe vida onguayíñe chamotsotrabájañama.

¹³ Jesucristbeyeca catšátanga, ndoñe chacmondēumantšé tsabe soyēnga amana. ¹⁴ Nderado nda ntšamo quem tsbuanáchañe fsenjancá ndoñe tontsuenana, šmochjarrepára nda cha yojtsemna y cháftaca ndoñe šmattsencuéntaye, chca, cha chaotsēuatjama. ¹⁵ Mo canye uayayacá ndoñe šmattsonyaye; šmochjabuayená mo canye catšatcá, chca ndoñe chaondétsamama.

Jtadiósoftanama

¹⁶ Bēngbe Utabná fsentseimpadana, cha, chē entsanga tsabe ebionana ainaniñe chamotsebomna iuamá, chaoma tsengaftanga nyets tempo y nyetsca tescama chca chašmotsebomna. Bēngbe Utabná tsengaftangaftaca chaotsemna.

¹⁷ Nyē quem palabrēnga tsengaftanga jacheuayama cach atšbe cucuátseca sēntsabiamná. Atše chca sēndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnana.

¹⁸ Atše, Bēngbe Bētsá sēntseimpadana, Bēngbe Utabná Jesucristo chaoma tsabe bendicionēnga tsengaftangbeñe chaotsemnana.

1 Timoteo

Jachuayama

¹ Atše Pablo, Jesucristbe ichmoná sēndmēna. Bēngbe Bētsá bēngbe at-sebacayá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiana cha yochjamama. Atše Jesucristbe ichmoná sēndmēna, er chata tbojanmandá atše chca jtsemnama. ² Timoteo, atše quem tsbuanácha cbontsabobiamná. Atše Bēngbe Bētsabe soyēngama entšanga sēnjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sēntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēnga chacotsebomnama, chata chacmolastemama y ainaniñe tšabiana ebionana chacotsebomnama.

Pablo chē ndoñe ndegombre soyēnga abuátambayēngbiana chēnga tojanabuayená

³ Ntšamo chē Macedonia luaroye chocana sēnjēftsanbocna ora tcbonjanimpadacá, mora cachiñe cbochtētsimpáda. Efeso puebloca cochjoquéda, básefta entšanga chácuamēndama chē ndoñe ndegombre soyēnga ndoñe chamondētsabatambama, ⁴ ni nyets tempo ndoñe nje chamondetsejuabná anteungbe cuentēngama, ni chē ba uabemana uabáinēnga chē tempsca bēts taitangbiana. Er nje chca yapa jesejuabnayanentšana, jóbocnana nje ínñyēngaftaca jabuachana enatsētsnayıñe, y chca chēngbioye tondayama ntjujabuáchana ntšamo Bēngbe Bētsá jamama yojuabnacá chaósertama. Chē soyna nje chábeñe jtsošbuáchiyēse jobenayana josértana.

⁵ Chca mando entsemna nyetscanga chamotsenbobonshánama, y chē bonshánana endóbocana nda chabe ainanentše ndocna bacna soyēnga tondobomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana. ⁶ Báseftanga tmojtsajbaná chca jtsemnana y inye soyēngama tmojontsé juabnayana; chíyeca chēnga mora imojtsentšena nje ndayámnaca ndoservenena soyēngama enatsētsnayana. ⁷ Chēnga jtsebošana Bēngbe Bētsabe leyabuátambayēnga jtsemnama, pero chēnga ndoñe yontsósertana ni ntšamo imojtsabatambacá, ni mo ndayánaca ntšamo chēnga tmojtsichamcá, mo chē soyēnga ndegombre cuaftsemncá.

⁸ Pero bēnga mondētatsēmbo chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse. ⁹ Bēngnaca mondētatsēmbo, chē leyēnga ndoñe tmonjuama chē nyetsca soyēnguiñe tšabá amēngbiana. Chē leyēnga tmonjuama quemēntša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservenaca juabnayēnga, cachabe taitá o mamá obánayēnga y ndēmuanñyēnga imomna entšanga obánayēnga, ¹⁰ boyabásaftaca o shembásaftaca bacna soye amēnga y boyabásēnga cach boyabásēngaftaca bacna soye amēnga, entšanga enēnga nje ínñyabiana nyets tempo chamotseservénama, bosterēnga y chē nje bonamente Bēngbe Bētsabiana júrayēnga; chca entsayana, chē leyēnga yomna jácastigama nyetscanga ndēmuanñyēnga ndoñe tmontsama ntšamo chē ndegombre buatēmbana soyēnguiñe iuayancá. ¹¹ Ntšamo muentše chē leyēngama tijayancá,

entsebuátëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsanga jabuátambama.

Pablo Bëngbe Bëtsábioye tbojtanchuá, tbojanlastemama

¹² Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjëtseprontanama, y chíyeca šojanábuayana atše chabiamama chaitrabajama; y cha endmëna nda inétsama atše obenana chaitsebomnama chë trabajo jamama. ¹³ Cha chca átšeftaca tonjanma, masque tempo atše chabe contra ba soyënga sënjanichamo, chabe ústonënga sënjanëcamena, y chabiamama tondaye respeto ntsebomncá sënjanenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjatanmëna, y chca, atše ndoñe quetsjatanatšëmbo ndayá tsjámamama. ¹⁴ Y chca, Bëngbe Utabná ba tšabe bendiciónënga atšbiamama tonjanma, y chábeñe ošbuachiyá šonjánbema, y tonjanma atše cha chaitsebomshánama y ínÿengbioynaca. Cha chca bëngbiamama tojama, bënga cánÿiñe mo canÿacá Cristo Jesúseftaca bëtsemnayeca.

¹⁵ Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëtš bacna soye amá sëndmëna. ¹⁶ Chíyeca, Bëngbe Bëtsá šonjanlastemá, jinÿanÿiyama cha puerte uantado entsángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachëngbioye; chca tonjaninÿinÿé cachá átšeftaca uantado jtsemnëse, atše nÿetscangbiamama chë más bëtš bacna soye amá jtsemnëse. ¹⁷ ¡Entsanga nÿets tempo chamotsinÿanÿná, chë Utabná nÿets tempo mandayá y puerte bëtšá y obená yomnama! Cha endmëna chë ndocna te echanjëftsobaná, chë entsanga ndoñe ntsoobenana jinÿamá y chë nÿe canÿe Bëngbe Bëtsá yomná. Chca chaotsemna.

¹⁸⁻¹⁹ Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entsanga chacúyanama, ntšamo báseftanga Bëngbe Bëtsabe juabna oyebuambnayënga acbiamama tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuachiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjëtsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buatëmbana soyënguiñe jtsošbuáchiyana. ²⁰ Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiamama ndoñe bacá ntsóyebuambnayana.

2

Pablo tojanabuayená ntšamo Bëngbe Bëtsá jtsadoránama

¹ Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuënta ora, nÿetsca soyëngama ntšamo tojtsëjabotcá cha chamotseimpadana, nÿetsca entsangbiamama, y cha sempre chamotsatschuaná. ² Entsemna, nÿetscangbe tšabiamama Bëngbe Bëtsá jtseimpadánama, pero masna quem luarentša reyëngbiamama y inÿe mándayëngbiamama, chca, nÿetscanga puerte natjëmbana jtsiyenama chamuetsobenama, y nÿetsca soyënguiñe tšabá jtsamëse, Bëngbe Bëtsá jtsatschuanayama, y entsangbe juabniñe tšabá chamotsemnama.

³ Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana; ⁴ y chca jtsóyejuayana, er cha endboše nÿetsca entsanga atsebácanënga chamotsemnama y chë ndegombre buayenánana chamotsábuatmama. ⁵ Chca nÿetsca entsangbiamama endmëna, er nÿe canÿe Bëngbe Bëtsá nÿetscangbiamama endmëna, y nÿe canÿa endmëna nda yobena jamama entsanga tempcá tšabá Bëngbe Bëtsáftaca chamotsemnama; cha endmëna Jesucristo, cach entsá. ⁶ Er Jesucristo, mo canÿa ínÿenga játsebacama cuaftopagacá, chabe derecho vida jtsobomñama cachcá tojanonÿá y tojanóbana, chca, nÿetsca entsanga chamotsobenama atsebácanënga jtsemnama. Chë soye cha tonjaninÿanÿé, nÿa chama tempo yojtsemna ora, chë Bëngbe Bëtsá nÿetsca entsanga atsebácanënga chamotsemnama yobošama. ⁷ Bëngbe Bëtsá chca nÿetsca entsangbiamama yobóšeyeca, Jesucristo šojanábuayana chabe ichmoná jtsemnama, chabe soyënga entsanga jtsabuayinayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

⁸ Ntšamo sënjayancá, atše sëntseboše nÿetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebotmncá, ínÿengaftaca ntjatentjayanaycá, y ínÿengaftaca jabuachana ntjatenatsëtsnaycá chënga chamotsemna.

⁹ Y atše sëntseboše shembásenga entsayangá chamuatíchëtjo, mo chë tšabe shembásenga mondbetsichëtjoncá, ndoñe nÿe entsanga chamotsëbuáuatjama y ntšamo tmojtsichëtjonama chëngna uámanënga imomna ca entsanga chamotsejuabnama. Ndoñe quenátamna jtsenóbotamnayana, nÿa mo chca chquëcnënga jtsemnëse, ni castellano soyëngaca o uámana fjantse ndëtšbéngaca, o yapa uámana entsayangaca, chca, nÿe entsanga jinÿama tšabá jtsemnama. ¹⁰ Pero aiñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

¹¹ Nderado nda tojtsabuatambá ora, shembása bontsemna jtsatsjéndayana, chca ora tondaye ntjatichamcá, y chentša mándayënga chaotsayaunana. ¹² Atše ndoñe quichatsleséncia, canÿe shembása boyabásenga chaotsabuatambá, ni chaotsamënda. Canÿe boyabása tojtsabuatambá o tojtsamënda ora, shembása ndocá chaondëtsichamo. ¹³ Chca chaotsemna, er Bëngbe Bëtsá natsana Adán tbojanpormá, y chentšana Eva; ¹⁴ y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciaca. ¹⁵ Pero shembása atsbocaná echántsemna, básenga quem luaroye endbaúshejangoyeca, pero chamna, aiñe nÿets tempo Bëngbe Bëtsábeñe tojtsošbuáchese, nÿetscanga tojtsababuánÿeshanëse, cachá nÿetsca soyënguiñe jenomándama tojtsobenëse, y nÿets tempo tšabe soyënga tojtsamëse, ntšamo Bëngbe Bëtsabe entsanga mondbetsamcá.

3

Ntšamo ibojtsemna chë ošbuachiyëngcá enefjuanëngbeñe mandayá

¹ Mëntšá ndegombre endmëna: nderado nda tojtseboše canÿe trabajo jtsebotmnama, cánÿentse ošbuachiyëngcá enefjuanentse chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo.

² Chiyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná

chaondětsichamuama. Y mēntsánaca cha bontsemna jtsemnama: n̄ye can̄ye shembásabe boyá; ntšamo jtsiyenama tšabá juabnayá chaotsemna, cachá n̄yetsca soyēnguiñe jenomándama chaotsobena, y chaotsetátšēmbō ndayá ibomna tšabá jtsamana; chaotseprontana chabe yebnentše posada entšanga júyentšamiama, y chaotsobena botamana abuatambayá jtsemnama. ³ Ndoñe yapa tmoyá o penzentsero chaondětsemna; pero chaotsemna tšabá mandbomná, entšanga natjēmbana chamotsiyenama bošá, y ndoñe chaondětsejuabná n̄ye crocénana jésebomnama. ⁴ Chaotsetátšēmbō ntšamo n̄yetsca chabe yebnentša entšanga botamana jtsamēndayama, y chaoma chabe básenga chē ntšamo cha tojayancá chamotsamama, ndocna te stētsoye chamondēquedama; ⁵ er, nda cachabe yebnentša entšanga ndoñe tontsobena jtsamēndayama, chca, ¿ntšamo nantsobena chē ošbuachiyēngcá enefjuanēnga jtsan̄yenama? ⁶ Cha ndoñe chaondětsemna cabá mora cuenta Jesucristbeñe ošbuachiyá; aín̄e chca chē ošbuachiyēngcá enefjuanēngbe mandayá tojtsemnēse, nderado n̄ye cachá uámana entšá nantsenobiamnaye, y ntšamo Bēngbe Bētsá Satanásbioye tbonjancastigacá, chca bētsemnama, cach soyama Bēngbe Bētsá chē entšábioye buanjacastíga. ⁷ Chánaca bontsemna jt-siyenana jtsamēse, y chca chaojtsama ora, chē Jesucristbeñe ndošbuáchiyēnga tšabá chabiamama chamotsichamo. Chē entšá ndoñe chca tontsamēse, chēnga chabiamama mochanjayana ndoñe tšabá yontsama ca, y Satanás echanjama cha chabócochēngo bacna soyēnga jamama.

Ntšamo ibojtsemna chē ošbuachiyēngcá enefjuanēnga ujabuachaná

⁸ Cachcá, chē mándayēngbe ujabuáchanēnga mēntšá entsamna: uámana entšangcá n̄yetscanga chamotsētabna, uta palabra ndbomnēnga; ndoñe yapa vínoye chamondětsetmó, y ndoñe chamondětseboše n̄ye paselo becá crocénana jtsebomnama. ⁹ Chēnga entsamna ndegombre jtsošbuáchiyana chē Bēngbe Bētsá tojin̄yan̄yé soyēnguiñe, chē ndayiñe bēnga mondošbuaché, chēngbe ainaniñe in̄yetsá juabnēnga ntjatsbomncá. ¹⁰ Natsana, chēngbiama botamana šmochjshauarrepára jtsetatšēmbuama chēnga aín̄e o ndoñe montsobena mo chē ošbuachiyēngbeñe mándayēngbe ujabuachanēngcá joserviama. Chēnga n̄yetsca soyēnguiñe tšabá tmojtsemnēse, šmochjálesenciaye chiñe chamoservema. ¹¹ Cachcá, chē shémanga mēntšá entsamna: n̄yetscangbiama mo uámana entšangcá utabnēnga, ndoñe uayátsenayēnga, cachēnga n̄yetsca soyēnguiñe jenomándama obenēnga, y n̄yetscañe tšabe palabra bomnēnga. ¹² Can̄ye ujabuachaná chaotsemna n̄ye can̄ye shembásabe boyá, y chaotsetátšēmbō ntšamo chabe básenga y n̄yetsca chabe yebnentša oyenēnga jtsamēndayana. ¹³ Chē ujabuáchanēnga tšabá chiñe tmoservénēse, can̄ye uámana puesto mochanjashjache, y chēnga mochantsobena bēts añémoca jtsóyebuambnayama ntšamo Cristo Jesúsbeñe tmošbuáchema.

Ndayá Bēngbe Bētsá bēnga šojin̄yan̄yecá, can̄ye bēts buatēmbana soye endmēna

¹⁴ Atše sēntsobátmana pronto chjobenaye jama aca jauatsētsayama; pero chca cbontsabobiamná, ¹⁵ nderado atše betesco jama ndoñe sēnjobenase, chaotsetatšēmbuama ntšamo can̄ya ibojtsemna n̄yetsca chē Bēngbe Bētsábenga imomnēngaftaca. Chēnga mondmēna chē Jesucristbeñe ošbuáchiyēnga, chē Bēngbe Bētsá Ainabe básenga. Chēnga chē Bēngbe Bētsabe ndegombre soyēnga mondbomna chē más uámana puestoca quem luarentše, y tša mondētšēna chama ín̄yēngbioye jáyēnjanama. ¹⁶ N̄ya ndegombre endmēna, Bēngbe Bētsá soyēnga šojin̄yan̄yé, y chē soyēngaca bēnga montsobena jtsiyenana, chē

Bëngbe Bëtsabe entsanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntšá endmëna: Cristo quem luarentse cach entsacá entsángbioye tojánëbëbuacna. Chë Uámana Espíritu tonjinñanyé cha nyetsca soyënguiñe tšabá amá yomnama. Angelënga cha tmojáninýe, y chabiana ba luarënguentša entsángbioye tmojanabuayená. Ba entsanga quem luarentse chábeñe montsanošbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinñanyiyëse.

4

Báseftanga chë tšabe benachentsana mochtsojuánañe

¹ Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entsanga áingñayënga mochántsayaunana, y chë ndoñe ndegombre soyënga chë bacna bayëjënga entsángbioye mochtsabuátambaye soyënguiñnaca. ² Chca buatëmbana soye jtsóbocanana chë bacna entsanga ntšamo ndegombre tmojuabnacá ndinýinýnayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nýe chca chëngbe ainaniñe jésejuabnayana. ³ Quem entsanga ndoñe ntjalesénciana ínýenga chamotsobouamama, y jtsemándayana básefta sananga entsanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. ⁴ Er lempe ntšamo Bëngbe Bëtsá entsanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; ⁵ er chca saná Bëngbe Bëtsábioye tšabá jtsinñana, cachá chca tojayánayeca, y bënga chë sanama cha mondbatschuayama.

Jesucristbiana trabájayiñe canýe tšabe oservená

⁶ Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canýe tšabe oservená cochántsemna. Y mo nda bëtscá añemo jtsebmomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebmomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

⁷ Pero ndoñe nýe quem luarentša entsangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebmomnama, mo nda bëts añemo jtsebmomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; ⁸ cachabe cuérpoca ba soyënga jamana más añemo jtsebmomnama, aíñe batsatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámana y juajabuáchana nyetsca soyënga tšabá chaotsemnana; chca jtsamana puerte tšabá endmëna cachabe vidama quem luarentse, y chë inýe vidócnaca. ⁹ Ntšamo tijayancá ndegombre entsemna, y nyetscanga entsamna jtsejuabnayana chca ndegombre bëtsemnana. ¹⁰ Y chë soyama bënga puerte mondëtrabája y mondësufrina, er chë Bëngbe Bëtsá

Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nyetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

¹¹ Ntšamo quem soyëngama tcbonjauyancá entšanga cochtsamëndaye y cochtsabuátambaye. ¹² Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotser-respetánama, chca jtsamëse icoyenama jtsonyáyëse, cachcá chamotsamama: botamana jtsóyebuambnayëse, nyets tempo tšabe soyënga jtsamëse, nyetscanga jtsababuányëshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. ¹³ Atše choca chajashjanguëntscuana, cochtsentšena chë Bëngbe Bëtsabe uabemana palabrënga entšángbeñe jtsalíayama, y chënga jtsabuátambayama y jtsabuayiynayama. ¹⁴ Acbioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oye-buambnayënga acbiama tmojanoyebuambá ora, y chë ošbuachiyënguentša bëtsëjëmënga chëngbe cucuatšënga ábeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

¹⁵ As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entšanga chamobená jinýama, aca cada te más tšabá lempe cojtsamama. ¹⁶ Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnama y chë ácbioye ouenanëgnaca játsebacama.

5

Ntšamo Timoteo ibojtsemna chë inýe ošbuáchiyëngaftaca jtsemnana

¹ Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catšátanga cuaftsemncá. ² Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabëñanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebmncá.

Ošbuáchiyëngbenache viudanga tmojtsemna ora

³ Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana. ⁴ Pero canýe viudá nderado básenga o nietënga tuabamna, chënga entsamna natsana jshauatsjinýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanýenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana. ⁵ Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyets tempo jtseimpadánana, bnëtë y íbeta, cha chabuájabuachama. ⁶ Pero canýe viudá, nýe quem luarentša entšánggaftaca oyejuayá jtsemnama soyënga tojtsamëse, cha masque ainá tojtsamna, Bëngbe Bëtsabe bominyiñe mo canýe obanacá jtsemnana, er chábioye ndoñe ntse servénana. ⁷ Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama

chaondětsebomnama. ⁸ Er, nda cachabe entšanga y más, cachabe pamíllanga ndoñe tontsacuedana, cha chca jtsinýinýayana chë buattëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entšá jtsemnana.

⁹ Chë jujabuáchama viudanga imuábemana lístañe, chaotsábemana chë viudá chñënguana bnëtsana uatama más yobomná, y nýe canýe boyá ibnabomná. ¹⁰ Entšanga cha chamotsábuatma mo canýe tšabe soyënga amacá: chabe básenga botamana tojabëché, áshjajnënga chabe yebnentše posada júyentšamiana prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nýetsca tšabe soyënga jamama yontšená.

¹¹ Pero chë lístañe, chë viudanga chñënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nýe cachënga tšabá jtsemnana juabnënga jtsebomnana y soyënga jtsamana. Chcase, chënga Jesucristbioye ya ndoñe ntse servénana, y chora jtsebošana cachiñe jtëtóbouamayama; ¹² y chca, ínýenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. ¹³ Y cabá más, tondaye ntsamcá tmojtsemna ora, chënga juabouinýana oyënjayënga jtsemnana, y yebnënguenache jtsanama; y ndoñe nýe oyënjayënga, sinó oinýanëngnaca, ínýengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. ¹⁴ Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. ¹⁵ Atše chca sëntsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

¹⁶ Canýe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye jujabuáchama.

Ntšamo cuantsemna chë ošbuachiyëngbeñe amëndayëngaftaca

¹⁷ Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayinayama y jtsabuátambayama imontšëngbioye. ¹⁸ Er Bëngbe Bëtsabe uabemana palabrenguiñe endayana, mëntšá: “Aca canýe toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca”; ínýoca: “Chë trabajayá merecido jtsebuájonana juácánama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

¹⁹ Nderado nda tcmojáuyana canýe bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinýe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

Inýe soyëngama jábuayenama

²⁰ Chë bëtsëjemënga nýe bacna soyënga tmojtsamënga, nýetsca entšangbe delante cochjucácana, chca nýetscanga uatjana chamuishache, bacna soye amama castigo mochtsebomnama.

²¹ Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonye ora, ni canye entsá ínÿengbiana más tšabá ntjatabacacnycá. ²² Ndocnabe bestšašiñe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canye bëtsëjema amëndayacá joserviama yojtsobenama, nye betesco, juabuáyanama botamana ntjenouaboycá. Pero nye ntjenouaboycá chca tcojamëse, y cha canye bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnama.

²³ Aca ba soye uafsbiaca condbëtsešoca causa, ndoñe más nye ena búyeshe cattseftmana, sinó base vínoynaca.

²⁴ Entšanga mondobena tšabá jinÿana, básefta entsangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nye tcojátjayentsana entsanga chama jtsetatšëmbuana. ²⁵ Cachcá, báseftanga entsangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmcá tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjátatšëmbona.

6

¹ Chë nyets tempo nye ínÿabiana oservénënga entsamna, chëngbe nduiñëngbiana jtsejuabnayana, chënga uámana entsanga imomnana y nyets respeto jtsebomnana imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbëtsabatambaye, ínÿenga podësca ndoñe chamondëtsoyebuambnana. ² Y chë imobomna Jesucristbeñe ošbuáchiyënga nduiñënga, chëngbioye nye batsá ndoñe chamondëtсарrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entsanga jtsabuátambayana, y becá jtsëtsëtsnayana chca chacmóyaunama: ³ Nderado nda inÿe soyënga tojtsabatambá, y ntšamo bënga mondëjuabnacá, chë Bëngbe Uabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, ⁴ cha nye cachá puerte uámana entsá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nye chama vida jësebomnana. Cha chca yomna causa, nye jtsebošana chë inÿa tojashjache soyënga jtsebomnana, nyetscanga ndoñe cachcá chamondëtsejuabnana jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiana jtsejuabnayana, ⁵ y ínÿengaftaca nye sempre jtsenpenzétsiayana, er chëngbe juabniñe nye bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nye más soyënga jóyëngacñama yoserverna ca. ⁶ Ndegombre canye entsá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nye chë tojtsebomna soyëngaca tojtsemnëse. ⁷ Er bënga tmojanonÿná ora, quem

luaroye bēngaftaca tondaye tmonjáníyēbo, y quem luarentšana cach tondaye quemochatobenaye jēftsocñama. ⁸ As, bēnga ndayá jasama y ndayá jtichētjuama tmojtsebomnēse, chē soyēngaca oyejuayēnga mochtsemna. ⁹ Pero chē bomnēnga jtsemnama tmojtsebošēnga, bacna soyēnga jamama tojócochēngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chē entšanga Satanasbe cucuatšiñe ndeolpe jotsatšana; chora chēnga jtsamana soyēnga mo chē juabna ndbomnēngcá, y chē cachēngbiamana ndoñe tšabe soyēnga tmojtsamēngbe juabnēngaca. Y mo chē uándbemana barco, bēts búyeshe asentoye tojtsenatjēmbcá, cachcá, chē bacna juabnēnga bomnama, chēngbioye mochántsapochocaye y nyetsca tescama mochántscastigaye. ¹⁰ Crocénana jtsebomnama yapa jtsebošana, jamana entšabe ainanentšana nyetsca bacna juabnēnga y soyēnga chaóbocnama; y básefta entšanga, crocénana jtsebomnama yapa jtsebošana causa, tmojtsajbaná ošbuáchiyana chē Bēngbe Bētsabe soyēnguiñe, chē bēnga mondošbuaché soyēnguiñe, y chca cachēngbiamana tmojama puerte chamosufrima y bēts ngménana jtsebomnama.

Chē tšabe soyama jtsenojuerzánama, ošbuáchiyana sempre chaotsemnama

¹¹ Pero aca, Bēngbe Bētsabiamana oservená, chca benachentšana cochtsojuánañe. Nya cochtsentšana, chē Bēngbe Bētsabe bominiñe tšabá yomncá jtsamama, chē ndayá Bēngbe Bētsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuánñeshanama, Bēngbe Bētsabeñe jtsobátmanēse puerte uantado padecena soyēnguiñe jtsemnama, y corente jtsababuánñeshanēse nyetscanga chacotsēnyayama. ¹² Chē tšabe soyama, ošbuáchiyana joboguiyanama cochtsenojuerzana. Chē nyetsca tescama yomna tšabe vida cochjashjache; chama Bēngbe Bētsá tcmojanchembo y bētscá entšangbe delante tconjánayana tšabe soyēnga Jesucristbiamana, ndayiñe aca icošbuaché. ¹³ Y mora, Bēngbe Bētsabe delante, nda endbama lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiamana ndegombre bemncá Poncio Pilatbe delante lempe tojanayaná, chatbe delante cbontsemánda, ¹⁴ lempe cochjama ntšamo tcbonjauyancá, ndocna soye chacmondētšashbe jamama, y cochtsiyena, ntšamo ndocná tondaye chaondētsebomna jayanama aca bacna soye tcojama ca. Y chca cochtsama Bēngbe Utabná Jesucristo quem luaroye yochjésabēntscuana. ¹⁵ Y nya chē soyama chē tempo chaojóshjango ora, Bēngbe Bētsá chca echanjínñanyiye, er cha endmēna chē corente bendición bomná y chē nye canye Mandado. Cha nyetsca reyēngbiamana, chē más uámana Rey, y nyetsca amēndayēngbiamana, chē más uámana Utabná. ¹⁶ Nye cha ndoñe bondmēna ndocna te ntjóbanana, y cha canye bēts buashinñinñana luarentše endoyena y choye ndocná yondobena jobéconana. Cha ndocná tbonjinnye y ndocná yondobena jinñana. ¡Entšanga nyets tempo chamotsinñanñá cha puerte bētsá y obená bētsemnama! Chca chaotsemna.

¹⁷ Chē quem luarentša soyēngaca bomnēnga imomnēnga, cochjámēndaye enábotamnayēnga ndoñe chamondētsebnama, ni lempe tšabá yochjóboconama, bētscá soyēnga bētsebomnama ndoñe chamondētsobátmana, er chē tcobomna soyēngama ndoñe ntsótatšēmbuana ndayēntscocñama chca mochtsebomnama; pero aiñe, Bēngbe Bētsabeñe jtsošbuáchiyēse, chēnga chábeñe chamotsobátmana. Cha endmēna chē sempre bētscá soyēnga šnetsatšatnayá; y chca, cha jamana bēnga chamotsobena nyetsca chē soyēngaca oyejuayēnga jtsemnama. ¹⁸ Ntšamo tšabá yomncá chēnga chamotsama, ba tšabe soyēnga chamotsama, y siempre tšabe ainánaca chamotseprontana entšanga ba soyēnga jatšatayama, y ndaye tmobomna

soye entšángaftaca jenájatayama. ¹⁹ Mo nda bētsá shajuana tojtsábuajo y jtsetatšēmbuana yochtsebomna más chcoye jasama, cachcá, quem bomnēnga ba tšabe soyēnga tmojtsamēse, mochántsetatšēmbo chēnga bētsá tšabe bendicionēnga más chcoye mochtsebomnama. Y chēnga chē soyēnga tmojtsamēse, chēnga chē ndegombre vida, chē nýetsca tescama yomna tšabe vida mochanjēftsashjache.

Inye soye Timotéobioye tbojanbonjé

²⁰ Timoteo, ndayá Bēngbe Bētsá tcmojabonjēcá, botamana cochtsinjēna. Entšanga nye quem luarentša soyēngama encuéntayana, ndoñe cattsuēnana, ni chē ndoservena soyēngama jabuachana enatsētsnayana, chē ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. ²¹ Atše chca sēntsichamo, er báseftanga chca osertánana imobomna ca ichámēnga, Jesucristbeñe ošbuáchiyana y chē bēnga mondošbuaché soyēnguiñe ošbuáchiyana tmojtsajbaná.

Atše, Bēngbe Bētsá sēntseimpadana, áceñe tšabe bendicionēnga chaotsemnama.

2 Timoteo

Jachuayama

¹ Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē n̄yetsca tescama yomna tšabe vida chamotsebomnama; y chca vida montsebomna Cristo Jesúsēftaca cānyīñe mo can̄yáca bētsemnayeca. ² Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácbeñe tšabe bendicionēnga chaotsemnama, chata ácbioye chacmo-lastemama, y acbe ainaniñe tšabe ebionana chacotsebomnama.

Ndoñe ntsēuatjana entšángbeñe Jesucristbiana jóyebuambayama

³ Sempre Bēngbe Bētsáftaca stsencuēnta ora, acbiama sēndbētsenojuabnaye, y acbiama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnayēse y jtsetatšēmbēse, ntšamo atše stsamcá tšabá bētsemnama, cachcá ntšamo atšbe bēts taitanga tmojanmcá. ⁴ Atše sēndbētētenojuaboye ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētīnyama, atše puerte oyejuayá chaitsemnama. ⁵ Bēngbe Bētsá acbiama sēndbatschuaye, er atše sēndbátēnojuaboye aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētatsēmbo.

⁶ Chíyeca sempre cochtsantješna quem uámana soyama: Mo nda can̄ye shin̄yañe tojtsajuin̄yīnacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsin̄yena. Chē obenana aca conjanóyēngacñe, atšbe cucuatšēnga acbe bestšašīñe sēnjanjajó y Bēngbe Bētsá acbiama sēnjanimpadá ora. ⁷ Er Bēngbe Bētsá tonjama bēngbe ainaniñe Uámana Espíritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiana y n̄yetscangbiana chamotsebomnama, y cabēnga jenomándama chamotsobenama. ⁸ Chíyeca, ndoñe cattseuatja entšanga jáuyanama, ntšamo tcojin̄ye y cojtsetatšēmbcá Bēngbe Utabnabiana ndegombre bētsemnama; ni atšbiana ndoñe cattseuatja, atše cárceloye sēndutámenama, chabiana oservena causa. Chamna, chē Bēngbe Bētsá cmochanjátsetaye obenánaca, sempre cochtseprontana jasúfriama, átseftaca y ín̄yengaftaca, entšanga tšabe noticiēnga abuayīynaye causa. ⁹ Bēngbe Bētsá endmēna nda bēnga šojatsebacá, y šojáchembo jtsiyenama mo chábēnga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiana juabna bómnayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiana jamama sóyeca. ¹⁰ Y mora, Bēngbe Atsebacayá Jesucristo tojáboyeca, Bēngbe Bētsá sojin̄yan̄yé cha bēngbe tšabiana juabna yobomnama. Jesucristo tonjama, entšanga n̄yetsca tescama obanēnga ndoñe chamondētsemnama, y tonjama bēnga chamotsetatšēmbuama, chē tšabe noticiēnga chabiana jouenēse y joyeunayēse, bēnga chē n̄yetsca tescama yomna tšabe vida mochjábomnama, ndoñe n̄ye jopochócama cuerpēnguiñe.

¹¹ Bëngbe Bëtsá šojanábuayana tšabe noticiënga entšanga jábuayenama, Jesucristbe ichmoná jtsemnama y entšanga jabuátambama. ¹² Chë causa, atše mora cárceloca quem soyënga sëntsesufrina; pero chama atše ndoñe quetsátëuatja, er atše sëndëtatšëmbo ndábeñe atše stsošbuáchema, y corente sëndëtatšëmbo cha yobena jtsinýenana ndayá šojabonyécá, chë ndayté cha yochjésabëntscuana.

¹³ Nýets tempo, chë ndegombre buayenánana, ndayá átšbentšana tconjanuencá, entšanga cochtsabuayiynaye, entšanga jtsinýanýnayëse aca Jesucristbeñe icošbuáchema, y Bëngbe Bëtsá y nýetscanga icuababuánýeshanama, y chca yomna aca Cristo Jesúseftaca cánýiñe mo canýacá bétsemnayeca. ¹⁴ Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonyécá sempre cochtsinýena.

¹⁵ Ntšamo ya condëtatšëmbcá, nýetsca ošbuáchiyënga Asia luaroquënga cachcá šmonjesonýá, y chentše bontsemna Figelo y Hermógenes. ¹⁶ Pero Bëngbe Utabná Onesíforbe pamállanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. ¹⁷ Masna, Romoye tojabánashjango ora, cha botamana šojánguango y šonjáninýena. ¹⁸ Bëngbe Utabná lastemado cháftaca chaotsemna, ntšamo nýetscanga tmojamcá tšabá o ndoñe tšabá yontsemnama cha yochjayana ora. Aca corente condëtatšëmbo ntsachetšá Onesíforo Efeso puebloca šonjanéjabuachama.

2

Jesucristbiana canýe tšabe soldado

¹ Y aca, atšbe uaquiñá, chë Cristo Jesús acbiana tšabe juabna yobomnentšana, bëtscá añemo ainaniñe cochtsebmna. ² Ntšamo ba entšangbe delante šconjoyeunacá, cach buayenánana, boyabásenga nýetscañe tšabe palabra bomnënga cochjábanýiye, y chamotsobena ínýenga cachcá jabuátambama.

³ Aca, chë bënga fsëndbmna padecena soyëngama jasúfriama chacmojtsemna ora, Jesucristbe soyëngama entšanga abuayiynaye causa, ainaniñe bëtš añemo cochtsebmna, mo canýe tšabe soldadcá, cha chabe mándayabiama jasúfriana. ⁴ Ndocna soldado ntjátanana shjoca soyënguiñe vida jtsebmnama o crocénana juácanama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. ⁵ Y canýe travisiayá, ínýenga jáyëñanama, canýe soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶ Chë jajañe trabajayá derecho jtsebmnama chë natsaná jtsemnama, chë tmojatbaná sananguentšana ndayánaca jtsebmnama. Acaftaca cachcá echanjopása, chë trabajo tšabá chacojamëse. ⁷ Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

⁸ Sempre cochtsenójuabnaye Jesucristbiana, ndabiama Bëngbe Bëtsá tojanma cháuatayenama y enjamna canýa rey Davídbentšana entšá, ntšamo atše chabiama sëndabuayiyná tšabe noticiënguiñe endmëncá. ⁹ Chca abuayiynaye causa, atše sëntsesufrina, nýa cadenëjuangácnaca utsbuaná, mo canýe bëtš bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínýenga entšángbioye montsabuatambá. ¹⁰ Chíyeca atše nýetsca padecena soyëngaca sëndëtsóboyana, Bëngbe Bëtsabe bocacánëngbe tšabiama, chëngnaca atsebácanënga chamotsemnama, Cristbeñe jtsošbuáchiyëse; y Cristo Jesús bëtšëtsanga cháuabiamama, y cháftaca nýetsca tescama chamotsiyenama.

¹¹ Mëntšá ndegombre endmëna:

Cristo Jesús tojanóbana ora, enjamna mo béngnaca cuafjobancá, er bēnga tmontsajbaná oyenana ntšamo tempo monjanियencá y Jesucristbeñe montsošbuaché;

y chca, béngnaca cháftaca mochantsiyena;

¹² bēnga chē padecena soyēngaca tmojtseufrina ora, tmojtsemorochēse, béngnaca Jesucristoftaca mochántsemandaye.

Bēnga tmojayana, cha ndoñe monduabuatma ca, as cha bēngbiámnaca cachcá echanjayana;

¹³ bēnga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinñanñayēse.

Canñe trabajayá, ndáftaca Bēngbe Bētsá jtsóyejuayana

¹⁴ Chē tcbonjauyana soyēngama, cochjama chē entsanga chamot-senójuabnama, y Bēngbe Bētsabe delante cochjábuayenaye chēnga ndoñe yontsamna nñe palabrēngama jabuachana enatsētsnayana; er chca, ndocna tšabe soye ntjamana, y chca tmojtseatsētsná ora, jamana chē soye ouenanēnga más batšá chamotsošbuáchema, y jujabuáchana chēngbe tšabe juabnēnga jtsondbiamama. ¹⁵ Lempe ntšamo icobencá cochtsama, aca chacotsemnama mo canñe entšá ndabiamama Bēngbe Bētsá cháuyana nñetsca soyēnguiñe tšabá amá yomna ca; aca chacotsemnama mo canñe trabajayacá, nda tondaye tontsebomna ndayama jatēuatjama; y chacotsemnama chē ndegombre buayenánana corente tšabá buatēmbayá. ¹⁶ Entsanga nñe quem luarentša soyēngama, ndoservena palabrēnga tmojtseencuēnta ora, chē soye ndoñe cattsuenana; er chē soye jamana entsanga puerta inñetsá chamobocanama, ntšamo Bēngbe Bētsá ndoñe yondmēncá, inñetsá jtsejuabnayēse y jtsamēse. ¹⁷ Chēngbe buatēmbana soyēngaca puerta bacá inñengbioye jáborlana, nña mo canñe uabouana šocana chamotsebomnama cuafjamcá. Chca buatēmbayēnguentše Himeneo y Fileto bontsemna. ¹⁸ Chata chē ndegombre benachentšana tbojtsojuánañe, y ibojtsichamo chē obanēnga chámuatayenama Bēngbe Bētsá ya catēnjama ca, y Jesús chaojésabo ora, nñetscanga chámuatayenama Bēngbe Bētsá ndoñe yochanjama ca. Chē causa, chata bontsama básefta entsanga chē ntšamo Jesucristbeñe imojanošbuachecá, mora ya ndoñe chamondētsošbuáchema. ¹⁹ Pero Bēngbe Bētsabe ndegombre buayenánana nñets tempo cachcá endesomñe, y ndocná quenátobena chē soye jatrócama. Chca endmēna mo chē ndētšbenga ndayiñe canñe bēts yebna tojebncá, ndayiñe mēntšá yojtsábemana: “Bēngbe Utabná endēubuatma chē chábenga imomnēnga”, y “Nñetscanga chē Bēngbe Utabná benga imomnēnga ca tmojtsechámēnga, chamuajbaná nñetsca bacna soyēnga amana ca”.

²⁰ Canñe uámana entšabe yebnentše, tsafjoca soyēnga ndoñe nñe castellano o midio soyēnga ntsemnana, ndayá niñēse y fshantse soyēngnaca; chē natsana soyēnga uámana tescama jtsebuájonana, pero chē inñe soyēngna, nñe nñets tempo chauetsoservēnama. ²¹ Chca endmēna chē Jesucristbeñe imojtsošbuachēngbeñe, ndoñe nñetscanga tmontsajbaná bacna soyēnga juab-nayana y amana, ni chē chca tmojtsama entšángbentšana ndoñe tmontso-juaná. Pero, chca jtsojuánañama tojtsebošá, echántsemna canña Bēngbe Utabnabiama tšabe trabajayá; y chca, mo chē tsafjoca castellano y midio soyēngcá, canñe uámana trabajuiñe echanjosérvia, y cha sempre echántseprontana ndaye tšabe soye jamama.

²² Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aíñe cochtsiyena ntšamo Bëngbe Bëtsabe bominyiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nyëtscángaftaca natjëmbana cocht-somñe, chë chaujabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebomncá. ²³ Ndoservena soyëngama palabrénga y ndosertánentsana óbocana soyëngama ndoñe cattsuenana; aca corente condëtatsëmbo chë soyënguentsana entsanga nyë jabuachana enatsëtsnanyiñe jabocanana. ²⁴ Pero chë Bëngbe Utabnabiana oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nyëtscanga jtsënÿayana, jtsemnana tšabe buatëmbayá y ínÿengaftaca uantadá. ²⁵ Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatsëmbuama; ²⁶ chënga botamana chamuatsjuaboma, y Bëngbe Bëtsá, Satanasbe cucuatšënguentsana cháuatsebacama. Satanas chënga tojanëtabá ntšamo cha tojtsebošcá jamama, mo bayënga canÿe uachmaniñcá.

3

Ntšamo entsanga mochtsemna, Cristo jésabama chaojtsobeco ora

¹ Pero aca cmontsemna jtsetatsëmbuana, Cristo jésabama tempo chaojtsobeco ora, entsanga echántsamna puerte padecena soyënguiñe jtsiyenana. ² Chca echántsemna, er entsanga, cada ona nyë cachabe tšabiana echanjésenojuabnaye, crocénana jtsebomnama tša mochántseboše, mochántsemna enábotamnayënga y ínÿengbioye mo nduamanëngcá mochantsënÿaye. Bëngbe Bëtsabiana y ínÿengbiana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiana tšabe soyënga tmojtsamëngbioye quemochtëtacheuanaye, y Bëngbe Bëtsabiana y chabe soyëngama ndoñe respeto quemochátsbomna, ³ ni cachëngbe pamílangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nyëtsca tšabe soyënga uaboténënga. ⁴ Chënga, uayayëngbe cucuatšinë entsanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá mochantsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. ⁵ Inÿenga echantsinÿana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínÿanÿiye, Bëngbe Bëtsá obená bëtsemnana chënga ndoñe mondošbuáchema.

Nÿa tondayama chëngaftaca cattsencuëntaye. ⁶ Chënguentsë báseftanga mondmëna, y chëngna botamana palabréngaca yebnënguenache jamashj-nana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nyë cachënga tšabá jtsemnana, ntšamo tmojtsebošcá. ⁷ Chënga nyëts tempo nyë ndaye tsëm soye jatóntsana jatatsjínÿana, pero ndocna te ntjobenayana Bëngbe Bëtsabe

ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínÿenga jáingñama abuatambayënga nÿetsca ndegombre soyëngama contra jtsemnana. Chë entsanga chëngbe juabniñe nÿe bacna soyënga jtsebomnana, y Bëngbe Bëtsá chënga tojtsébaté, chënga chë ndegombre soyënguiñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entsanga jáyënjanama, er nÿetsca entsanga mochanjátatsëmbona chënga nÿe bacna soyënga juabnayënga imomnana, mo chë Israeloca entsanga tmojantatsëmboncá Janes y Jambres nÿe chca juabnayata bëtsemnana.

Inÿe soye Timotéobioye tbojanbonÿé

¹⁰ Pero acna, puerte tšabá condétatsëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínÿengaftaca uantado tsmëna; ntšamo atše, Bëngbe Bëtsá y ínÿengbioye tsababuánÿeshana; ntšamo atše, Bëngbe Bëtsábeñe jtsobátmanëse, ¹¹ ínÿenga šmonjanacmena ora; y sënjansufrina ora, padecena soyënguiñe bëtš añemo tsjánbomna. Acnaca condétatsëmbo ntšamo atše chama Antioquía, Iconio y Listra bëtš pueblëngoca tsjansufrínama. Pero masque entsanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. ¹² Ndegombre endmëna, nÿetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúsëftaca cánÿiñe mo canÿacá imomnënga, puerte mochanjasúfria, chca bëtsemnana, chënga chamosufrima ínÿenga chamojtsama ora; ¹³ pero chë bacna entsanga y chë ínÿenga áingñayënga, cada te más bacna entsanga mochántsemna, más bacna soyënga jtsamëse; chënga ínÿengbioye mochántsaingñaye, pero cachëngnaca ingñénënga mochántsemna.

¹⁴ Pero aca, nÿets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga; ¹⁵ y aca, cabá básetema conjamna orscana, chë Bëngbe Bëtsabe uabemana palabrengama condétatsëmbo, chë ndaye sóyeca aca contsobena juatsjinÿana, Bëngbe Bëtsá chacmatsbocama, Cristo Jesúsbeñe jtsosbuáchiyëse. ¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrenguiñe yobinÿncá entsanga chamuábemama. Chë uabemana palabra endoservená, bëngbioye chë ndegombre soyënga jabuatambama; nderado ndaye soye ndoñe tšabá tmonjamama bënga chamotsetatsëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuatambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse; ¹⁷ chca, canÿe entšá Bëngbe Bëtsabiamá oservená y obená chaotsemnana, tšabá chaotsetatsëmbo y sempre chaotseprontana nÿetsca tšabe soyënga jtsamama.

4

¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá, ² Bëngbe Bëtsabe palabra entsanga chacotsabuayiynayama; sempre chca jamama cochtseprontana, masque entsanga aíñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatsëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca

cochtsabuátambaye, chca ora puerte uantado jtseññese. ³ Chca cochtsama, er canye tempo echanjóshjango y chora entsanga chë ndegombre buatëmbana soye ndoñe quemochátuenana; chamna, nye chë último tsëm soyënga jtsetatsëmbuama boše causa, ba abuátambayënga mochanjuánguango, y chënga mochántsihomo soyënga nye ntšamo cach entsanga jouenama tmojtsebošcá. ⁴ Chënga chë ndegombre soyënga ndoñe quemochátuenana, y nye ndaye cuentënga mochántseyeunana. ⁵ Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebošna; chë Jesucristbiana tsabe noticiënga entsanga abuayiyayabe trabajo cochtsama; y nya cochtsentšena ndayá Bëngbe Bëtsá tcmojabonyecá tsabá jtsamama.

⁶ Er mo Bëngbe Bëtsábioye jëtschuayama, canye bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnama. ⁷ Cristo Jesusbe soyëngama corente sënjenojuerzá. Mo canye travisiayacá, chë jashjanguama yomna luaroye ya tojashjancá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nyets tempo Jesucristbeñe sëndošbuaché. ⁸ Chcasna, atšbiana canye uacanana soye echántsemna, er Bëngbe Bëtsá tojama atše chabe bominyiñe tsabia chaitsemnama. Bëngbe Utabná endmëna chë ndegombre tsabá ichamuá entsanga aiñe o ndoñe tsabá tmonjamama, y cha chë uacanana soye šochántatšetaye, entsanga ntšamo tmojamama cha chaojabáyana ora. Pero cha nye atše ndoñe chë uacanana soye quešochtëtätšetaye, ndayá nyetscángbioye chca, ndëmuanyënga puerte imoboše cha cachiñe cháuesabama, cha imobobonshánayeca.

Inye soyënga Timoteobiana

⁹ Lempe ntšamo tcojobenacá cochjama betscó jabama atše jabínyama; ¹⁰ er Demas, cha yapa nye quem luarentša entsangbe soyënga bošá enjamna, cha cachcá šonjesonýá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye. ¹¹ Nye Lucas, chë šmonjanájabuachanënguentsana, mora átšeftaca entsemna. Marcos cochjatsenguango y ácaftaca cochjëftsbetše, er cha atšbe trabajuama puerte oservená endmëna. ¹² Tíquico, Efesoye sënjichmó. ¹³ Chacojabo ora, uabonjanía šochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondëtsebnatjëmbe.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. ¹⁵ Chabiana cuedado cochtsebošna; cha tojobenase ntšámnaca cmatjabórla, er cha chë bënga mondabuayiná soyëngama contra entsemna.

¹⁶ Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nyetscanga cachcá šmonjésonýaye. Pero atše sentsobátmana, Bëngbe Bëtsá chama chënga chaotsaperdoná. ¹⁷ Pero Bëngbe Utabná aiñe šonjanájabuache y tonjanma atše bëts añemo jtsebošnama, y chcase, atše sënjanobená Jesucristbiana nyetsca chabe tsabe noticiënga entsanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentsana šonjanatsbocá, mo canye león jtsosañamentšana ndábioye cuafjatsbocacá, ¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentše cha yománda luaroye šochanjesbetše. ¡Nyetscanga nyetsca tescama cha chamotsatschuaná! Chca chaotsemna.

Pablo Timotéobioye jadiósoftanama

- ¹⁹ Atšbe cuenta cochjácheuaye Prisca y Aquila, y Onesíforbe pamílnaca.
- ²⁰ Erasto, Corinto puebloca tontsoquedañe, y Trófimo Mileto puebloca šocá sēnjěftseboshjona. ²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y n̄yetscanga muentše Jesucristbeñe ošbuáchiyēnga.
- ²² Atše sēntseimpadana, Bēngbe Utabná Jesucristo ácaftaca chaotsemna, y Bēngbe Bētsá tšēngaftangbeñe tšabe bendicionēnga chaotsemnama chaoma.

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entsanga jábuayenama, chë Bëngbe Bëtsá chabe entsanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatsëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse. ² Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsanga chca vida jtsebomnama; ³ y nÿa chama tempo tojóshjango ora, chë entsanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entsangbiana yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mándoca. ⁴ Tito, quem tsbuanácha cbontsabobianná. Atše Jesucristbe soyëngama entsanga sënjanabuayiyná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ábeñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

Titbe trabajo Creta luaroca

⁵ Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjftsemandacá. ⁶ Canÿa bëtsëjemama uabuayaná mëntšá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntšobencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca. ⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyéyeca, cha bontsemna jtšiyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentero ndoñe chaondëtsemna; y ndoñe chaondëtseboše nÿe paselo becá crocénana jtsebomnama. ⁸ Pero chabe yebnentše posada entsanga júyentšamiama sempre chaotseprontana, tšabe soyënga chaotsebínÿnama sempre chaotsentšena, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. ⁹ Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnama, y chë soyama contra tmojtsemnënga jáyënjanama, ndoñe tšabá montsamama.

¹⁰ Cha chca bontsemna, banga nÿe ndëmandánënga jtšiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna

chë nyetsca ošbuáchiyënga base bobachtema chë más delicadentše tétšenënga jtsemnama yojtsamna ca mondbétsichamënguentše. ¹¹ Y entseyta chëngbioye jtayáchetana, er chënga jamana ba pamíllanguentše nyetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹² Enjamna canÿa, ndabiama entsanga jtsichámuana cach Creta luar-entša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” ¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; ¹⁴ y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nyetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojamama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. ¹⁶ Chënga jt-sichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënana. Chënga Bëngbe Bëtsabe bominÿiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. ² Cochjayana chë bëtsëjémëngna chamotsemna cachënga nyetsca soyënguiñe jenomándama obenënga, nyetscangbiama mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nyetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; ⁴ chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana, ⁵ ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nyetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

⁶ Cachcá, chë bobontsënga añemo cochtsatšatnaye cachënga jenomándama chamotsobenama, ⁷ y chënga cochjínÿanÿiye ntšamo yomna jtsiyenana, cachaca nyetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca

cochtsama, ⁸ chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiama jayanama.

⁹ Chë nyets tempo nýe ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama. ¹⁰ Ndoñe chamondëtsatbëbana, pero aíñe nyëtscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

¹¹ Er Bëngbe Bëtsá bënga šonjinÿanyé cha bëngbe tšabiama juabnënga yobomnama, y chca, cha tojama nyetsca entsanga chamotsobena atsebácánënga jtsemnama. ¹² Chë Bëngbe Bëtsabe juabna bëngbe tšabiama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. ¹⁴ Cha chabe derecho vida jtsobomñama cachcá tojanonÿá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentsana bënga játsebacama, ainaniñe ndocna bacna soye ndbomnënga jábiamama, bënga chábënga chamotsemnama, sempre prontánënga ntšamo tšabá yomncá jtsamama.

¹⁵ Chca cmontsemna jtsabuátambayana, chënga becá añemo jtsatšatnayëse, y jtsinÿanÿnayëse chënga bacna soye tmojamama, chë nyets condbomna mándoca jucácánëse. Ndoñe catjaleséncia ndocná chaundayana aca mando ndoñe condbomna ca.

3

Ndayá Jesucristbeñe ošbuáchiyënga yojtsamna jamana

¹ Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. ² Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nyetscángaftaca natjëmbana jtsiyenama bošënga, tšabá mándbomnënga, nyetscanga tšabe ainánaca imojtsënÿama entsanga jtsinÿanÿnayëse.

³ Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñénënga y mandánënga monjamna nyetsca bacna soyënga jamama juabnëngaca y nýe quem luarentše tšabá jtsemnama juabnëngaca. Bënga monjaninyena nýe bacna soyënguiñe juabnaye, ínÿenga uantšaboše. Inÿenga bënga šonjanëbuayënja y bënga nyetscanga monjanenábboyënja. ⁴ Pero Bëngbe Bëtsá, bëngbe Atsebacayá, bëngbe tšabiama juabna yobómnyeyca y tša šuababuánÿeshanama šonjaninÿanyé ora, ⁵ cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entsangcá chamotsemnama, ntšamo tempo yojamncá ntjatsjuabnaycá

y ntjatamcá. ⁶ Bëngbe Atsebacayá Jesucristbeyeca, Bëngbe Bëtsá tojanma Uámana Espíritu bëngbe ainaniñe nyets tempo chaotsemándama y bënga chašotsëjabuachanama, ⁷ chca bënga, Bëngbe Bëtsá bacna soyëngama šojaperdónanga y bëngbe tšabiama juabna bómnyeca tojayana chabe bominyiñe tšábenga imomnënga, chamotsobena cha yobomna soyënguentsana bënga mo ndayá cuaftsëtocancá jóyëngacñama, y chca, chábeñe jtsošbuáchiyëse, chë nyetsca tescama yomna tšabe vida chamotsobátmanama.

⁸ Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentsena chë tšabe soyënga jtsamama. Chë bu-atëmbánana puerte tšabá endmëna y nyetscangbiama bëtscá endoservena.

⁹ Inÿenga nÿe ndoservena soyëngama jabuachana tmojtsenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtsenëyeunanamcá, y judiëngbe leyëngama ndoñe ínÿengaftaca cattsenpéliaye. Chca jtsamana tondayama ntososervëna, y nÿe bonamente chca jtsamana.

¹⁰ Nderado nda tojtsama entšanga ndoñe cachcá nyetscanga chamondëtsejuabnama y chamotsenpéliama, canÿe o uta soye cochjabuayená ndoñe tšabá tonjamama; pero cha ndoñe tcmönjóyeunase, chentšana cháftaca ndoñe más cattsóyebuambnaye.

¹¹ Chca cochjama, er aca cochanjátatšëmbona canÿa chca tojtsemná, chabe juabna tojatrocá bacna soyënga jtsejuabnayama. Chë soye y chë inÿe bacna soyënga ntšamo cha tojtsamcá, jtsinÿanÿnayana cha ibojtsemna castiganá chama jtsemnama.

Inÿe soyënga Titbiama

¹² Atše, Artemas o Tíquico ácbioye chaijichmó y choca chaojáshjango ora, ndayánaca cochjama Nicópolis puebloye aca jama atše jinÿama, er atše sënjajuabó chentše chë uaftenëntscuana jëftsemnana. ¹³ Lempe ntšamo chacojobenacá, cochjuájabuache chë ínÿenga obuauyayá Zenas, y Apólosnaca; lempe ntšamo chata ibojtsëjabotcá cochjátataye, ínÿoye jama jatóntsama chamobenama y benachëjana tondaye chaondëtsabuáshebenama. ¹⁴ Atše sëntseboše, bëngbe entšanga, chë bëngcá Jesucristbeñe ošbuáchiyënga, chamotsentsena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservena vidënga ndoñe chamondëtsebomnama.

Pablo Títbioye jadiósoftanama

¹⁵ Nyetscanga chë átšeftaca montsemnëngnaca cmontsechuaná. Atšbe cuenta cochjácheuaye nyetscanga chë bënga imuababuanÿeshanëngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá sëntseimpadana, cha chaoma ácbëñe tšabe bendicionënga chaotsemnama.

Filemón

Jachuayama

¹ Atše Pablo, mora utamená Cristo Jesusbiamana oservena causa, quem tsbuanácha sentsabiamná, Jesucristbeyeca bēngbe catsata Timotéoftaca, acbiamana Filemón, bēngbe bonshaná y nda bēngaftaca condētrabája Jesucristo jaserviama. ² Atše sentsacheuaná, Jesucristbeyeca bēngbe uabena Apia y Arquípnaca, nda bēngaftaca cányiñe Jesucristbe soyēngama endenojuerzana; y nyetsca ošbuachiyēngnaca, ndēmuanyēnga imuamana acbe yebnentše jēnefnama Bēngbe Bētsá jētschuayama. ³ Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnana, y chaboma tšēngaftangbe ainaniñe tšabe ebionana chašmotsebonnana.

Filemonbe bonshánana y ošbuáchiyana

⁴ Bēngbe Bētsáftaca stsencuēnta ora, acbiamana sēndbētsenojuabnaye, y sempre acbiamana Bēngbe Bētsá sēndbētsatschuanaye, ⁵ er atše sēnjátatšēmbona ntšamo aca nyetsca chē Bēngbe Bētsábēnga imomnēnga icuababuányēshanama, y ntšamo aca Bēngbe Utabná Jesúsbeñe tša icošbuáchemana. ⁶ Bēnga, Jesucristbeñe ošbuáchiyēnga quetsomñecá, ácaftaca mo canyáca fsēndmēna. Chca endmēnayeca atše Bēngbe Bētsá sēntseimpadana, tšēngaftanga chašmobená más botamana josértana nyetsca chē Bēngbe Bētsábiocana tmojóyēngacñe tšabe bendicionēnga, bēnga Cristo Jesúsēftaca cányiñe mo canyáca bētsemnayeca. ⁷ Jesucristbeyeca atšbe bonshana catsata, aca chē Jesucristbeñe ošbuáchiyēnga tša condábabuanyēshanama, atše corente oyejuayá sēntsemna y bēts añemo sēntsebonna. Y aca tcojama, nyetscanga chē Bēngbe Bētsábēnga imomnēnga chēngbe ainaniñe ngmēnaca ndoñe chamondētsemnana, chēnga jujabuáchēse.

Pablo, Filemónbioye Onésimbiamana tbojanimpadá

⁸ Y chca, atše Cristbe ichmoná quetsomñecá sēntsobena, aca nyē jamándana ntšamo yomncá chacotsamama, pero atše chca ndoñe quichatsma. ⁹ Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamana oservena causa, ¹⁰ canyē ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Cristbeñe tonjanošbuachéyeca, cha mo atšbe uaquiñacá tonjanóbema.

¹¹ Tempo, cha ácbioye tondayama quecmēnjátanservena, pero mora cha becá entsámama, acbiamana y atšbiamana. ¹² Mora ácbioye sēntsatichamná, y atše siempre chabiamana sēndbētsenojuabnaye y sēndbobonshana. ¹³ Atšbiamana puerte tšabá manmēna cha átšēftaca matēnjoquedase, acbe cuenta atše chaoservema, cárceloye utamená sēntsemnēntscuana, chē tšabe noticiēnga entšanga abuyiynaye causa. ¹⁴ Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnana, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošēse. Chcasna, tondaye quichatsma, chē soye chca chaotsemnana aca cabá ndocá ntjayancá. ¹⁵ Atše sēntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnana ca, ¹⁶ y ndoñe nyē acbiamana mo nyets tempo canyē oservenacá, ndayá chama más

uamanacá, mo Jesucristbeyeca canye bonshana catsatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canya nye achiamā nyets tempo oservená, ndayá Bēngbe Utabnábeyeca canye catsata, ntšamo cach aca condmēncá.

¹⁷ Chca, aca atšbiamā condējuabná mo ácaftaca cányiñe Bēngbe Utabnabiamā trabajayacá; chíyecna cmontsemna cha jtofjana, mo atše šcojofjá. ¹⁸ Nderado ntšamo cha tcmojanborlá o ndayánaca tcmondebena, atše chama chochjētsēntšabuachiye. ¹⁹ Atše Pablo, cach atšbe cucuátšeca quem soye sēntsabiamná. Atše chama chochanjētsēntšabuachiye. Ndegombre, ndoñe quenátšiyta atše chachēyana becá šcondebena ca, ntšamo atsbocaná jtsemnama atše tchojánbuayenama. ²⁰ Chcasna, Jesucristbeyeca atšbe catsata, Bēngbe Utabnáftaca cányiñe mo canyácá quetsomñecá, Diosmanda chē pavor šcochtsebema. Diosmanda cochjama atšbe ainana ngménaca ndoñe chaondētsemnama.

²¹ Atše chca cbontsabobiamná, er atše tšabá sēndētātšēmo, ntšamo cbontseimpadancá cochjamama, y cabá más chama cochjatsmama. ²² Y mora inye soye, Diosmanda posada šcochjabopróna, atše jányama chaijábocna orscama, er atše puerte jtsošbuáchiyēse Bēngbe Bētsábeñe sēndobátmana, cha tšēngaftangbiamā yochjama lempe ntšamo atšbiamā chašmojtjañcá, y chca, cha šochjaleséncia atše tšēngaftangbioye jésama.

Pablo Filemónbioye jadiósoftanama

²³ Epafra, muentše átšeftaca cárceloye utamená, Cristo Jesusbiamā entšanga abuayinye causa, chánaca cmontsechuaná. ²⁴ Y Marcos, Aristarco, Demas y Lucas, chē bēngaftaca mondētrabájanga Cristo jaserviama, chēngnaca cmontsechuaná.

²⁵ Atše sēntseimpadana Bēngbe Utabná Jesucristo, chaoma tšabe bendicionēnga tšēngaftangbeñe chaotsemnama.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyebuambnayëngaftaca. ² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inÿe luarënga tojama. ³ Cha endinÿanÿná Bëngbe Bëtsabe corente buash-inÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninÿanÿé cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jtsamëndayama.

Bëngbe Bëtsabe Uaquiñá chë angelëngbiama más bëtsá yomna

⁴ Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canÿe más uámana uabaina y chë angelëngbiama canÿe más uámana trabajo tbojanbonÿé. ⁵ Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjanianyana, ntšamo chabe Uaquiñábioye tbojaniancá:

Aca atšbe Uaquiñá condmëna.

Mënté entsanga sënjinÿanÿé aca atšbe Uaquiñá comnana ca.

Ni ndocna angelbiama mëntšá tojánayana, ntšamo chabe Uaquiñabiama tojanayancá:

Atšbe canÿe taitá chabiama chántsemna,

y cha canÿe Uaquiñá atšbiama ca.

⁶ Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷ Y chabe angelëngbiama, mëntšá tojánayana:

Atšbe sëndama atšbe angelënga, chë atšbe buayiynayënga, mo binÿiëngcá chamotsemnana,

y chënga, atšbe oservënënga, mo inÿëjëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

⁹ Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nÿa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnana,

chë inÿengbiama más oyejuayá ca —Bëngbe Bëtsá tojánayana.

¹⁰ Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

¹¹ Lempe chë soyënga nyets tempo ndoñe queochátsmëna;

aca n̄yetsca tescama cochántsemna.

Lempe ch̄e soyēnga echanjopochóca, mo tojuatanguaná entšayacá.

¹² Aca ch̄e luarēnga cochanjátrocaye, mo tsmécá cuafjabiamcá.

Chca, ch̄e luarēngaca cochanjama, mo entšayá tcojtenējonētse y tcojenotrocacá.

Pero aca n̄yets tempo cach aca cochandesomñe,

y n̄yets tempo vida cochandesóbomñe ca —cha tojánayana.

¹³ Bēngbe Bētsá ndocna te ndocna ángelbioye mēntšá tbonjanianyana, ntšamo chabe Uaquiñábioye tbojaniancá:

Atšbe catšbioica cochtsetbemana,

acbe uayayēnga acbe cucuatšīne chamoquedama atšbe obenánaca chjamēntscuana ca.

¹⁴ Ndegombre, n̄yetsca angelēnga espíritēnga mondmēna Bēngbe Bētsá jaserviama, ndēmuan̄yēnga cha tojanichamó bēnga jabújabuachama, ch̄e atsebácanēnga mochtsemnēngbe tšabiamana.

2

Can̄ye bēts soye endmēna atsebácanēnga jtsemnana

¹ Chíyeca, bēnga šontsamna sempre Bēngbe Bētsabe soyēnga jtsuenanana, ch̄e bēnga tmonjouena soyēnga, ch̄e tšabe benachentšana ndoñe chamondojuánama. ² Ndayá Bēngbe Bētsá tempo angelēngaca entšanga tojanamēndacá, can̄ye ndegombre soye endmēna, y entšanga entsamna chca jtsobedecénana; y ch̄e bacna soye tmojanmēnga y ntšamo Bēngbe Bētsá tojanmandacá ndoñe tmonjanmēnga castigo tojanatšatá, chca tmojanma causa; y chca, ³ bēnga chca bacna soyēnga tmojtsamēse, ¿ntšamo mochjobenaye jtsejuabnayana Bēngbe Bētsá chama ndoñe šochanjacastígaye ca? Ndegombre cha chca echanjama, bēnga chábeñe ndoñe tmontsošbuáchese, ch̄e bēts soye jēftsashjáchama, atsebácanēnga jtsemnana. Bēngbe Utabná ch̄e natsaná yojtsemna nda entšanga tojanabuayená Bēngbe Bētsá entšanga yochjánatsebacama; y ín̄yēnga bēnga šonjanabuayená cachcá ntšamo chábioye tmojanoyeunacá. ⁴ Y Bēngbe Bētsánaca tonjanin̄yan̄yé, ndayá chēnga tmojanabuayenacá ndegombre bētsemnana, chabe obenana jin̄yan̄iyama soyēngaca, entšanga chamenjnaná soyēngaca, bēts soyēngaca, y entšanga ch̄e Uámana Espíritu ainaniñe chamotsebomnana cha jtsamēse. Chca jamēse, cada ona chaotsobena jamama ntšamo Bēngbe Bētsá yobošcá.

Bēngbe Bētsá tojanma Jesucristo entšangcá chaotsemnana

⁵ Bēngbe Bētsá angelēnga ndoñe tonjubuáyana chamotsemándama ndayá quem luarentše yochtsemniñe, lempe mo tsmécá chaotsemnana Bēngbe Bētsá chaojama ora, ch̄e ndayama mora bēnga montsoyebuambná.

⁶ Chamna, ín̄yoca Bēngbe Bētsabe uabemana palabrenguiñe mēntšá endayana, ntšamo chábioye can̄ya tbojaniancá tojánayana:

Entšanga ndoñe yapa uámanēnga quemátsmēna, as ¿ndáyeca tša chēngbeñe cuanjésejuabnaye?

Chēnga entšanga mondmēna. ¿Ndáyeca tša chēnga cuanjésan̄yena?

⁷ Aca tcojama entšá puerte uamaná chaotsemnana, y ch̄e angelēngna n̄ye batsatema chabiamana más uámanēnga mondmēna.

Aca tcojama cha puerte uamaná y respeto merecido bomná chaotsemnana,

⁸ y cha chaotsemándama n̄yetsca ch̄e in̄ye soyēnguiñe, ch̄e quem luarentše aca tcojamiñe —chiñe can̄ya tojánayana.

Entšá lempe chaotsemándama Bēngbe Bētsá tojanma ora, tondaye tonjánboshjona entšáftaca ndēmandana soye ca. Pero mēntscōñama ndoñe

n̄ya chca quemëntin̄ye, ch̄e ent̄sá lempe nt̄samo quem luarent̄se yomncá jtsemándayana. ⁹ Pero b̄enga mondétats̄embo y corente mondon̄yá Jesús aín̄e chca tojanmama. B̄engbe B̄etsá tojanma cha nduamaná chaotsemnama, mo can̄ye ent̄sacá, baseftayté ch̄e angel̄engbiama más bat̄sá uamaná. B̄engbe B̄etsá, ent̄sangbe t̄sabiama jtsejuabnaye, yojánboše Jesús chaóbanama, corente jasúfriase; B̄engbe B̄etsá yojánboše cha chca chaomama, n̄yets luarent̄sa ent̄sangbe t̄sabiama. Y Jesús ya chca tojánmayeca, B̄engbe B̄etsá ya tojin̄yan̄yé cha puerte b̄etsá y uamaná b̄etsemnama.

¹⁰ N̄yetsca soȳenga yobin̄ya B̄engbe B̄etsabiama y ch̄ábeyeca. T̄sabá enjamna, B̄engbe B̄etsá jamana Jesucristo chaotsemnama lempe nt̄samo ent̄sanga tmojt̄sajabotcá, nda ch̄engbe bacna soȳenguent̄sana ch̄áuatsebacama. B̄engbe B̄etsá chca tojanma, Jesús, ch̄e ent̄sanga atsebácan̄enga jtsemnama unachayá, chaosufrima jam̄ese, chca, ba ent̄sanga celoca, mo chabe basengcá, ch̄áftaca b̄ets̄etsanga chamotsemnama. ¹¹ Er B̄engbe B̄etsá cach Taitá n̄yetscangbiama endm̄ena: Jesús, ch̄e ent̄sanga B̄engbe B̄etsábenga chamotsemnama iuamabiama, y ch̄e ent̄sanga chca chamojt̄semn̄engbiámnaca. Ch̄íyeca Jesús, B̄engbe B̄etsabe Uaquiñá, ndoñe nts̄euatjana ch̄engbioye cat̄sátanga ca jtsachembuana. ¹² B̄engbe B̄etsabe uabemana palabrenguiñe B̄engbe B̄etsábioye cha m̄ent̄sá tbojaniana:

At̄sbe uabents̄engbeñe acbiama chanj̄oyebuambaye,
y jacántase cbochanj̄etschuaye, ácbioye adóraȳenguent̄se ca.

¹³ Y m̄ent̄sánaca cha B̄engbe B̄etsabiama tojánayana:

At̄se at̄sbe B̄etsábeñe chantsošbuáchiye ca.

Y más chcoye m̄ent̄sá tojánayana:

Muent̄se B̄engbe B̄etsabe básengaftaca s̄entsemna, ch̄e at̄sbe cucuat̄siñe tojábashesjuan̄enga, at̄se jtsan̄yename ca.

¹⁴ Quem B̄engbe B̄etsabe básenga n̄yetsca ent̄sangcá mondm̄enayeca, Jesúsna can̄ye ent̄sá ch̄engcá tojanóbema. Cha chca tojanma, jóbane, ch̄e ent̄sanga jóbana chaotsamnama obenana bomná Satanás, jaȳenjanama.

¹⁵ Y chca, cha tojama ch̄e jóbana y ndayá chent̄sana yochjopásama auat̄j̄enga ndoñe chamond̄etsauatjama; ch̄enga n̄yets tempo corente ngm̄enaca imnoyena, jóbana auatja causa. ¹⁶ Er ndegombre, cha ndoñe tonjánabo ch̄e angel̄enga jabújabuachama, ndayá ch̄e Abrahámbent̄sana ent̄sángbioye.

¹⁷ Y chama cha ibojamna jtsemnana n̄yetsca soȳenguiñe cachcá mo chabe uabents̄engcá, ch̄e ent̄sanga, chca, jobenayama jtsemnama ch̄engbiama mo bachnangbe can̄ye más uámana am̄endayacá, B̄engbe B̄etsá jtseimpadánama ch̄engbioye ch̄engbe bacna soȳengama ch̄áuaperdonama, puerte lastemado m̄ená y sempre nt̄samo B̄engbe B̄etsá tbojauyancá amá. Chca, cha jóbane jamama ent̄sanga chamobenama perdonán̄enga jtsemnama, y chca, jobenayama B̄engbe B̄etsáftaca t̄sabá tempcá jtsemn̄engama. ¹⁸ Y mora cha entsobena, nd̄emuan̄yenga bacna soye jamama tojócochengūenga jujabuáchana; cha chca entsobena, er cachánaca tojansufrí, cha bacna soye chaomama Satanás t̄sa yojsent̄sena ora.

3

Cristo Moisesbiama más uamaná endm̄ena

¹ Ch̄íyeca, Jesucristbeyeca cat̄sátanga, B̄engbe B̄etsábenga, nd̄emuan̄yenga B̄engbe B̄etsá tojáchembo chabe ent̄sanga chamotsemnama, corente Jesucristbeñe šmochj̄esejuabnaye. Cha endm̄ena nda B̄engbe B̄etsá b̄engbioye tbojanichmó, y nda b̄engbiama yomna mo ch̄e más uámana bachnangbe am̄endayacá, B̄engbe B̄etsábioye jtseimpadánama bacna soȳengama

chašotsaperdonama. Cha chca endmëna chë bënga mondošbuachë soyënguiñe y chë mondbáyana ndegombre yomna ca soyënguiñe. ² Er Jesús nyets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. ³ Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsomerecénana Bëngbe Bëtsá cha puerte bëtsá y uamaná bëtsemnana cháuinñanyema, nye ntšamo Moisés, canya Bëngbe Bëtsabe entšanguentšá yojanomerecénama. ⁴ Ndëmuanye yébnënaca canye jebuaná jtsebmomnana, pero Bëngbe Bëtsá endmëna nda tojanma lempe ntšamo yobinñncá. ⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservernacá nyetsca Bëngbe Bëtsabe entšángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsemiñe; cha, chë Uaquiñacá y chënga chë Bëngbe Bëtsabe pamillentšëngcá. Bënga chë pamillentša entšanga jtsemnana, bënga chë ndayá tmošbuáchema bëts añémoca sempre tmojtsoyebuambnase, y sempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebmomnana puerte oyejuayënga tmojtsemnëse.

Chë jóchnama uámana luare Bëngbe Bëtsabe entšangbiama

⁷ Chcasna, ntšamo chë Uámana Espíritu Bëngbe Bëtsabe uabemana palabrënguiñe tojanayancá:

Mënté tsëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tsëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinñyama ntsachetšá más muanjobenaye jamana y Bëngbe Bëtsá cabá uantado chëngaftaca tajojtsemnana.

⁹ Bëngbe Bëtsá tojánayana: “Chentše, tsëngaftangbe bëts taitanga bëtscá monjánama jinñyama ndayéntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninye chë atše sënjánama bëts soyënga.

¹⁰ Chýyeca, atše chorsca entšángaftaca šonjánetna y sënjánayana:

‘Tsëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábosena jtsiyenana ntšamo atše tsbošcá jtsamëse.’

¹¹ Chýyeca, atše chëngaftaca etonaná sënjánayana, mo nda cuafjajuracá,

chënga ndocna te mochjëftsashjache chë átšeftaca jóchnama uámana luaroye jashjanguama ca” —cha tojánayana.

¹² Jesucrístbeyeca catšátanga, yejuana šmochtsantješna ndocná tsëngaftanguentšá chaondëtsebmomna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe. ¹³ Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe

uabemana palabrënguiñe “mënté ca” uabaina tempo. Chca cmontsamna, ndocná tsëngaftanguentśá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnéngaca ingñená. ¹⁴ Er, ndayá Jesús chabe amëndayoca yobomnentśana bënga chamóyëngacñamna, bënga šontsamna sempre ainaniñe corente jtsetatsëmbuana Jesusbe soyënga ndegombre soyënga bëtsemnama, ntśamo bënga chábeñe jtsošbuáchiyama tmonjanontśé ora monjanamcá.

¹⁵ Ntśamo Bëngbe Bëtsabe uabemana palabrënguiñe endayancá: Mënté tsëngaftanga ntśamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entśanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

¹⁶ ¿Y ndëmuanyënga imojamna, chë Bëngbe Bëtsá tojanëyancá tmojanu-enentśana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga. ¹⁷ ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entśanga ndoyena luaroca tmojanóbana y chëngbe cuerpo chentše tojanoquedá. ¹⁸ ¿Y ndëmuanyënga tojanëyana, mo nda cuafjajuracá, chënga ndocna te mochjëftsanashjache chë cháftaca jóchnama uámana luaroye jashjanguama ca? Co chë ndëmuanyënga ntśamo cha tojanmandacá ndoñe tmonjanmënga. ¹⁹ Y ndegombre, bënga montsobena jinýama chënga ndoñe tmonjëftsanashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4

¹ Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntśamo cha šojanašebuachenacá cachcá mëntscoñama iuétsemna, puerte cuedado mochtsebomna, nderado ndánaca tsëngaftanguentśá ndoñe nanjobenaye chca jashjáchama. ² Er bëngnaca chë tsabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tsabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché. ³ Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiamama cha mëntśá tojánayana ora:

Chíyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjëftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴ er Bëngbe Bëtsabe uabemana palabrënguiñe cányëntse mëntśá endayana, chë cánysëfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë cánysëfta tianoye ca.

⁵ Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiamama:

Chënga ndocna te quemocháisashjache chë átšeftaca jóchnama uámana luaroye jashjanguama ca.

⁶ Chë entśanga monjamna chë natsanënga chë tsabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache,

ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama. ⁷ Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canye tempo tojuinýnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguiñe mëntšá tojánayana ora:

Mënté tsëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

⁸ Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebonnama cha choca matënjannëse, Bëngbe Bëtsá bayté chentšana, David yojëftsiyena ora, inye tempuama ndoñe matënjanoyeubambá, chë ndaye ora entsanga muanjobenaye chë cháftaca jóchnama uámana luare jashjáchama. ⁹ Y chca, cabá endmëna canye uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; ¹⁰ er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. ¹¹ Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjëftsashjache.

¹² Er Bëngbe Bëtsabe palabra endmëna mo canye aina soycá, nyets tempo entsángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerta jashenoye jatëtšana canye cuerpo tcojatëtše ora, cachcá y cabá puerta más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinýé sóynaca; y chë palábraca cha endobena jáuyanana ntšamo bënga tmojajuabó y tmojabošencá aiñe o ndoñe tsabá bëtsemnana. ¹³ Ntšamo Bëngbe Bëtsá tojamentšana tondaye quenátopodena chabiamá iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiamá lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëts amëndayá

¹⁴ Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamá ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entsángbeñe tmojayana. ¹⁵ Er chë bëngbiamá impadaná, mo bachnangbe canye más uámana bëngbe amëndayacá, Jesús, yobena bëngbiamá jóngmiana, bënga inye ora ndoñe yapa obenana tmontsebonna ora, tsabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjajuanama, jayënjanama

bacna soye chaomama, n̄yetsca juabnēnga nt̄samo bēngnaca mondbetsebomncá, pero Jesús ndocna te ndocna bacna soye tonjēftsema. ¹⁶ As, ndauatjca Bēngbe Bētsá mochjótšēmbona, mo chábioye cuaftsobecocnangcá; cha can̄ye uámana tbemaniñe yojtsetbemana can̄ye bēts reycá; chca mochjama, bēnga cháśualastemama, y bēngbiama t̄šabe juabna jtsebomnēse, chaśújabuachama bēnga chca chaśojtséjaboto ora.

5

¹ Ndēmuan̄ye bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Bēngbe Bētsá jaserviama, chábioye juatšēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuperdonama. ² Chē bachna jtsoebenana jóngmiana, chē bacna soyēnga amēngbiama chama ntsetatšēmbcá, y chē bacna soyēnga jamama ingñénēnga imomnēnga, mo otšenēngcá imomnēngbiama, er cachánaca in̄ye ora ndoñe yapa obenana ntsebomnana, chē bacna soyēnga jamama juabnēngama jtocochbuáchama. ³ Y chíyeca cha jtsemnana bayēnga jobáyama Bēngbe Bētsá juatšēmbonama, ndoñe n̄ye entšángbioye bacna soyēngama cháuperdonama, ndayá chábioye chaboperdonámna. ⁴ Ndocná quenátobena cachá quem uámana trabajo jentsetayana, bachnangbe más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, nt̄samo ndegombre Aarónoftaca tempo cha tojanmcá. ⁵ Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiama impadaná, mo bachnangbe can̄ye más uámana amēndayacá, ndayá Bēngbe Bētsá tbojanábuayana chē uámana trabajo jtsebomnana. Cha endmēna nda Jesúsbioye mēntšá tbojanianana: Aca at̄šbe Uaquiñá condmēna.

Mēnté entšanga sēnjinyan̄yé aca at̄šbe Uaquiñá comnama ca.

⁶ Y ín̄yocnaca, Bēngbe Bētsabe uabemana palabrenguiñe mēntšá tbojanianana: Aca n̄yetsca tescama can̄ye bachna condmēna, can̄ye bēts bachna nt̄samo Melquisedec yojamncá ca.

⁷ Jesús quem luarent̄se yojēftsiyenēntscuana, cha juayebuáchēse y shēchbuíyeca Bēngbe Bētsáftaca ibnécuentaye y ibnaimpadana, cha chē jobanámentšana jatsbocama yojanobená; y Jesús nt̄samo Bēngbe Bētsá yojanbošcá tojánmayeca y t̄ša respeto chabiamana bómnyeca, chábioye tbojanoyeuná. ⁸ Chca, Cristo masque Bēngbe Bētsabe Uaquiñá inamna, jasúfriase tojanábouin̄ye nt̄samo jamana ndayá Bēngbe Bētsá tojtsebošcá. ⁹ Chca, Bēngbe Bētsá chábioye tbojánbema lempe nt̄samo entšanga tmojtsajabotcá, nda chēngbe bacna soyēngama cháuatsebacama; chentšana cha, Cristo, tojanma lempe nt̄samo yojaniytcá, n̄yetscanga chē entšanga chábioye imojánēyeunanēnga chamotsobenama n̄yetsca tescama atsebácanēnga jtsemnana; ¹⁰ y Bēngbe Bētsá tbojanábuayana, chē chabe delante sempre bēngbiama impadaná, mo bachnangbe can̄ye más uámana amēndayacá chaotsemnana, can̄ye bēts bachna nt̄samo Melquisedec yojamncá.

Resjo endmēna, ošbuáchiyana jtsajbanana

¹¹ Bētscá entsemna quem palabrama jóyebuambayama, pero chē soyēnga jayanama nt̄samo t̄šēngaftanga catafjosertaycá, ndoñe paselo quenátsmēna, er t̄šēngaftangna n̄ya uenana Bēngbe Bētsabe soyēngama jósertana. ¹² T̄šēngaftanga ya bayté Jesucristbe soyēngama šmotátšēmboyeca, t̄šēngaftanga cmontsamna ya jtsoebenana ín̄yēngbioye chē soyēnga jtsabuátambayana; pero t̄šēngaftanga

cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontsé ora natsana jshauatsjínýana soyëngama. Y chca, tšëngaftanga šmojobiama mo šešonatemëngcá, jtsëjabótana létšiyé jofšiyana y ndoñe jobenayana jasana chë jabmuánama ndoñe paselo tontsemna soyënga. ¹³ Chë nyetsca soyënguiñe ntšamo tšabá yomncá jt-samama buatëmbana soyënga ndoñe tontsabuatmá cha, jtsemnana mo canýe šešonatemcá, nda vida jtsebomnana nýe létšiyé jtseftmanëse. ¹⁴ Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsemëse tmoyenamna, chënga jtsemnana mo bëtsëtsangcá, ndëmuanýenga ndayánaca jasana, chë ndoñe paselo jabmuánama soyëngnaca.

6

¹ Chcasna, bënga šontsamna jtsajbanana nýe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjinýe soyënga, y šontsamna jtsatsjëndayana chabiama nyetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtseyayana. Ndoñe más nýe chë natsana buatëmbana soyëngama mattatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; ² chë juabáyana ndayá yomna; chë inýabe bestšašíñe cucu-atšënga jacjayana Bëngbe Bëtsábíoye chabiama jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nyetsca tescama yomna tšabe vida chamotsebomnana o nyetsca tescama castigánënga chamotsemnana. ³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanýenga, canýe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnana, y chë Uámana Espíritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašebuachenacá sempre inétsamama tmojinýe, y ndëmuanýenga tmojáninýe Cristo jtsamana bëts soyënga chabe bëts obenánaca, chë ndaye obenánaca cha puerta bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábíoye jtobéconama; er Bëngbe Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábíoye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. ⁷ Smochjinýe: fshantse jamana chë ba uafténënga chiñe chaómashënguama, y chë chiñe trabájayëngbiama bëtscá jaja sananga tojóbocnëse, Bëngbe Bëtsá jamana, chë fshantsentsana bëtscá tšabe soyënga entšangbiama chaotsebínýnama. ⁸ Pero nýe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebomnana

⁹ Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna,

chë atsbocaná jtsemnama tojtsá cha yobomna soyënga. ¹⁰ Er Bëngbe Bëtsá sempre ntšamo tšabá yomncá nyetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiana šmojinÿinÿé bonshánama, chabe entšángbioye jtsëjabuáchanëse, ntšamo mórnaca šmojtsama. ¹¹ Pero bënga fsëntseboše, cada ona tšëngaftanguentsá, nyets tempo y Jesús chaojésabëntscuana chaotsinÿanÿná corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiana cha chaomama. ¹² Ndoñe queftsátsboše tšëngaftanga oyënjayënga chašmotsobiana chë Bëngbe Bëtsá tcmojabanÿé trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnama.

¹³ Bëngbe Bëtsá Abrahámbioye tbojanšbuachená ora, chca tbojaniana cachabe uabaina jayanëse, er inÿa chabiana más uamaná ndoñe yontsemna ndabiana jajúrama, ntšamo tbojanšbuachenacá ndegombre chaotsemnama; ¹⁴ cha mënšsá tbojanšbuachená: “Añe, atse chanjama aca bëtscá tšabe bendicionënga chacotsebomnama, y chanjama acbentša pamillentšana mallajta entšanga chamotsemnama ca.” ¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiana canÿe puerte más uámanabe uabaina jayanëse, y chca chëngbiana más uamanabiana tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana. ¹⁷ Y chca, Bëngbe Bëtsá tojánbošena botamana jinÿanÿiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanÿé cha chca yochjanmana, cachabiana jajúrase, chë ntšamo tojanašebuachenacá yochjanmama ndegombre bëtsemnama. ¹⁸ Bëngbe Bëtsabe šbuachenana soye y chama jinÿanÿiyama ntšamo tojanayancá, ntšamo tojanašebuachenacá ndegombre yochjanmana, chë uta soye ndocná ntšobenana jatrócama; y chca tojayana ora, ndoñe ntšopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanÿenama, mo canÿe bëtš resjuentsana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanÿenama mondobátmana. ¹⁹ Mo ntšamo chë béjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántšashatiyiyana, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëtš yebnoca, “chë más uámana ca” uabaina luaroye, entšëjua ujonÿana stëtsoica, Bëngbe Bëtsabe delante jtsemnama, ²⁰ ndayentše Jesús celoca, Bëngbe Bëtsabe delante tojámashëngo bëngbe tšabiana soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama,

canÿe bÿets bachna ntšamo Melquisedec yojamncá.

7

Jesús, canÿe bÿets bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chÿe celoca Bÿengbe Bÿetsabiamá; Bÿengbe Bÿetsá, chÿe nÿetscangbiama más uamaná. Abraham chÿe reyÿenga y chÿengbe soldadÿengaftaca imojentsjaná y tojanayÿenjaná chentšana yoÿtsatabó ora, Melquisedec tojánbocna cha jajÿebenguama, y chora Bÿengbe Bÿetsábioye tbojanimpadá, Abraham bÿetscá tšabe bendicionÿenga chaotsebomnama chaomama. ² Chora Abraham chábioye tbojanatšetá, chÿe reyÿengaftaca imojentsjaná ora, lempe tojanosháchiñentšana, bnÿetsanentšana canÿe soye. Chÿe palabra Melquisedec endayana “nÿetsca soyÿenguíñe tšabá ama rey ca”; y chánaca yojamna Salem puebloca rey, y chca endayana “nÿetscanga natjÿembana chamotsiyenama ama rey ca”. ³ Chabe pamíllangbiama tondaye quenatótatsÿembo; chca cha endmÿena mo ni taitá ni mamá ndoñe endbomnacá, ni bÿets taitanga. Tondaye quenatótatsÿembo ntseco tojanonÿinama, ni ntseco tojanóbanama; chca, inÿe soyÿenguíñe cha yojamna mo Bÿengbe Bÿetsabe Uaquiñacá, y endmÿena mo nÿetsca tescama bachna cuaftsemncá.

⁴ Y mora, šmochjájuaboye tša uamaná Melquisedec inamnama, er bÿengbe tempsca uámana bÿets taitá Abraham chábioye tbojanatšetá, chÿe reyÿengaftaca imojentsjaná ora lempe tojanosháchiñentšana bnÿetsanentšana canÿe soye. ⁵ Ntšamo Moisesbe leyíñe endëmandacá, chÿe bachnangbe más uámana amëndayá Leví, Aarónÿenaca ca uabainabe pamillentšana tmomna bachnanga, jtsamnana chÿe Israeloca entšángbioye nÿetsca chÿe tmobomna soyÿenguentsana bnÿetsanentšana canÿe soye jtsayÿengacayana; y chca jtsamnana masque chÿe entšanga cachÿengbe pamillentsÿenga tmomna y Abrahámbentšana pamillentsÿegnaca. ⁶ Pero Melquisedec, masque Aaronbe pamillentsá ndoñe yonjamna, Abraham, chÿe ntšamo Bÿengbe Bÿetsá tbojanšbuachenacá tojanóyÿengacñabentšana, cha tojanóyÿengacñe nÿetsca soyÿenguentsana bnÿetsanentšana canÿe soye, y Bÿengbe Bÿetsábioye tbojanimpadá, Abraham bÿetscá tšabe bendicionÿenga chaotsebomnama chaomama. ⁷ Y ndocná quenátobena jayanama ndoñe ndegombre yondmÿena ca, chÿe Bÿengbe Bÿetsábioye impadaná ínÿabiamá tšabe soyÿenga chaomama, más uamaná inÿetsemna chÿe chca tojóyÿengacñabiama, inÿa chabiamá Bÿengbe Bÿetsábioye tbojaimpadá ora. ⁸ Quem tempo, bachnanga mochjóbanÿenga, entšángbioye jtsayÿengacayana nÿetsca chÿe tmobomna soyÿenguentsana bnÿetsanentšana canÿe soye, pero chÿe Bÿengbe Bÿetsabe uabemana palabra, Melquisedecbiama endoyebuambná cha mo canÿa cabá ainá totsomñcá. ⁹ Y bÿenga montsobena jayanama, Abraham Melquisedécbioye chÿe nÿetsca soyÿenguentsana bnÿetsanentšana canÿe soye tbojanoyé ora, yojamna mo Leví, chÿe nÿetscángbioye nÿetsca soyÿenguentsana bnÿetsanentšana canÿe soye ayÿengacayá, Melquisedécbioye chca cuaftopagacá; ¹⁰ er cha Abrahambe pamillentsá inamna. Melquisedec yoÿtsabó ora y chábioye chÿe lempe tojanosháchiñentšana bnÿetsanentšana canÿe soye Abraham tbojanatšetá ora, yojamna mo nÿetscanga, chÿe Abrahámbentšana entšanga más chcoye mochtsaniyenÿenga, chÿengnaca chÿe bnÿetsanentšana canÿe soye cuaftajajocá, masque Abraham chca tojanma ora, Leví y chÿe Abrahámbentšana inÿe entšanga cabá ndoñe tmonjanonÿiná.

¹¹ Israeloca entšanga Moisesbe ley tmojanáyÿengaca, chÿe bÿets taitá Levibe pamillentsÿenga bachnanga imojamnÿenga Bÿengbe Bÿetsá imojtseservena ora, y

chënga monjamna Aarónbentsana entsanga. Ntsamo chë leyiñe yomandancá imojánamënga perdonánënga jtsemnana y Bëngbe Bëtsabe bominyiñe tšábenga jtsemnana quem bachnanga jamama matmënjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntsamo chë bëts bachna Melquisedec yojamncá. ¹² Er, canye bachnanga Bëngbe Bëtsábioye jtseservénama tmojaybaná y inye bachnanga chábioye jaserviama tmojatontsé ora, jtseytana chë natsana bachnanga imojanoserverna ora mándaye leyëngnaca jtsetrócama. ¹³ Bëngbe Utabná, ndabiama quem soyënga jtsóyebuambnayana, ndoñe Aaronbe pamillentsá quenjatsmëna, ndayá inye pamillentsá, y quem pamillentsa entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. ¹⁴ Er nyetscanga mondëtatšëmbo Bëngbe Utabná Judabe pamillentsana bëtsemnana, y chë pamillama Moisés ndocá tonjánayana, Bëngbe Bëtsá mo bachnangcá chënga jtseservénama.

¹⁵ Y ntsamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. ¹⁶ Cha bachna yojamna, ndoñe chë bachnanga chabe pamillentsana jabocanama yojánamnama canye ley tojánayanayeca, ndayá nyetsca tescama jëftsiyenama cha inobënyeca. ¹⁷ Er mëntsá endmëna, ndayá Bëngbe Bëtsá chabiama tojánayana: Aca bachna nyetsca tescama condmëna, canye bëts bachna ntsamo Melquisedec yojamncá ca.

¹⁸ Cha tojánabo ora, Bëngbe Bëtsá tojanma chë nda bachna jtsemnana y ntsamo joserviama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnana, y chca, chëngbiana ndoñe bëtscá yonjanoserverna. ¹⁹ Er Moisesbe léyeca, entsanga ndoñe tmonjanobená Bëngbe Bëtsabe bominyiñe tšábenga jtsemnana, pero mora chama canye corente más uámana soye montsebonna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chásuabiamama, y chca, Bëngbe Bëtsábioye bënga jtobéconama.

²⁰ Y Bëngbe Bëtsá lempe chca tojanma, cachabiama jajúrase, lempe ntsamo cha tojanayancá ndegombre chaotsemnana. Chë inye bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana, ²¹ pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiama jajúrase, Bëngbe Utabná canye bachna yochtsemna ca tojánayana. Ntsamo Bëngbe Bëtsabe uabemana palabrënguñe endayancá:

Bëngbe Utabná Bëngbe Bëtsá, Jesucristbioye tbojanianayana, cachabiama jajúrase, ntsamo tojanayancá ndegombre chaotsemnana, y juabna ndoñe ntjatrócamá:

“Aca bachna nyetsca tescama condmëna ca.”

²² Bëngbe Bëtsá chca tojánayanama, Jesúsbeyeca bënga corente mondëtatšëmbo, ndayá Bëngbe Bëtsá bëngbiana jamama tojanašebuachenacá, chë Jesúsbioye bëngbe bachna chaotsemnana juabuáyanana, más tšabá yojtsemna chë ndayá tempo cha chabe entsangbiana tojanašebuachená soyama. ²³ Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana. ²⁴ Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseserverna, y ndocna te chabe trabajo inyábioye bochanjëftsinyinýiye, chë inya cachcá jtsamama chauatontšema. ²⁵ Chíyeca, cha yobena nyetsca

tescama játsebacana ndëmuanyënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamama jkseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamama chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nyetscangbiamama cha chaotsemnana. ²⁷ Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsangama tmojanmámna, mo chë inye bachnangbe más uámana amëndayënga mondbetsamcá, cachëngbiamama y chë judiëngbiámna. Cha tojanma lempe ntšamo yojaniytcá canye soye y nyetsca tescama, entsangama bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonÿná ora; y tojanóbana entsangama chamotsobemama perdonánënga jtsemnana. ²⁸ Ntšamo Moisesbe leyiñe yojanmandacá, chëngbiamama mo chë bachnangbe más uámana amëndayëngcá tmojanëbuáyana entsangama inye ora bacna soye amënga; pero Bëngbe Bëtsá cabá chë ley entsangbe cucuatšifne tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiamama jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entsangama tmojtjabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbanëse tojanma entsangama Bëngbe Bëtsáftaca mo canyácá chamotsemnana

¹ Chë más uámana soye ndayama bënga montsichamo, chë Cristo mo bachnëcá yomnana montsoyebuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiamama impadaná, mo chë bëngbe bachnangbe más uámana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uámana tbemanentse. ² Chë inye bachnangama Bëngbe Bëtsabe bëts yebnentse tmojanamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentse nyets tempo Cristo mo chë bachnangbe más uámana amëndayacá yoserverna, entsangama ndoñe chca tmonjanpormá, ndayá Bëngbe Bëtsá.

³ Nyetscangama chë bachnangbe más uámana amëndayënga tmojanëbuáyana, entsangbiamama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama. ⁴ Cha quem luarentse tojtsetrabájase, cha ni mo bachna ndoñe nántsemna, er muentse ba bachnangama mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservënama. ⁵ Chë inye bachnangama imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentse Jesucristo celoca yoserverna luarcá, ni ntšamo cha yoservencá; nye batšatema bëngbioye šuinÿanÿná ntšamo chë celoca luare yomnana, ndayentse Cristo

mo bachnëcá yoserverna. Y bënga mondëtatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jat-sjacama opodena yebna Moisés japórmama ora, Bëngbe Bëtsá mëntšá tbo-janiyana: “Cuedado cochtsebomna chë atšbiama yebniñe nyetsca soyënga jamama, ntšamo tbonjaninÿinÿecá chacomama, chë tjoca bonjamna ora ca.”

⁶ Pero bëngbe bachnangbe más uámana amëndayá Cristo, tojashjache canÿe más bëts trabajo jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiana jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

⁷ Chë Bëngbe Bëtsá natsana tojanašebuachená soyëngaca matëñjanopodé entšanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canÿe trato chauátšbemama entšangbiana. ⁸ Pero Bëngbe Bëtsá tojáninÿe ntšamo yojanamncá entšanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiana mëntšá tojánayana: Canÿe tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená, chënga átšeftaca tempcá tšabá jtsemnama chamotsobenama.

⁹ Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjésanëbuacna ora; pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa, atše cachcá chënga sënjesanénÿaye ca, Bëngbe Utabná tojánayana.

¹⁰ Chë Israeloca entšangbiana ndayá jamama canÿe tempo chentšana chanjašebuachená soye, mëntšá entsemna ca, Bëngbe Utabná tojánayana: Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye. Atše chëngbe Bëtsá chántsemna, y chënga atšbe entšanga.

¹¹ Chë tempo ndoñe queochátšiyta cánÿenga ínÿenga chamotsabuátambama, cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátšëyta, er nyetscanga uámanënga y nduámanënga, corente tšabá atšbe šmochantsábuatma.

¹² Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátšjuabnaye ca —cha tojánayana.

¹³ Bëngbe Bëtsá, chë entšangbiana mora jamama tojášebuachenama tojt-sichamo ora, chca jtsemnana, er cha tojama chë tempo entšangbiana jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoserverna, chë soyna nÿe batšatema más y ya jtsopochócana.

9

Bëngbe Bëtsá jadórama muentša luare y chë celoca luare

1 Y morna, ndayá Bèngbe Bètsá tojanašebuachenama y tojanmandá soyama, mandènga yojamna ntšamo cha jtsadoránama, y nÿa chabiamana pormana yebnentše quem luarentše. 2 Chíyeca, Bèngbe Bètsá tojanmandá chaotsemna canÿe jatsjacama opodena yebna chábioye jadórama, mèntšá: Chè natsana tsañe quem Bèngbe Bètsabiamana yebnentše inauabaina “chè uámana luare ca”; chentše inamna chè canÿsèfta quinÿenèfjuangá castellano candelerèšiñe, y canÿe mesèsha ndayiñe yojacjana chè luarentše Bèngbe Bètsá bétsemnama inÿinÿnaye tandèšènga.

3 Inÿe ujonÿana entsèjua chentšana, inÿe luare inamna; inauabaina “chè más uámana luare ca”. 4 Chentše inamna chè castellano altar, incienso jajuinÿiyama, y chè cajontema nÿetsiñe castellánoca pormánètema. Quem cajontema yojaninÿanÿná ntšamo Bèngbe Bètsá tojanašebuachenacá, chè Israeloca entsànga chabe uámana entsànga yochjánabiamama, y inauabaina “Bèngbe Bètsabe šbuachenana soye inÿinÿnaye cajontema ca”; y chè tsoye quem soyènga inabomna: canÿe castellano jarrètema, maná ca uabaina tandèšèca, chè Bèngbe Bètsá tojanma celocana chabe entsàngbiamana chaótsatsama saná; Aaronbe varèfja, chè tojanantséfjonèfja; y chè ndètsbé tablèbenga ndayiñe Bèngbe Bètsá tojanábema chè bnètsana uámana mandènga. 5 Chè cajontema juatsboca imnamna chè juatèngmiáša uabomnènga, mo angelèngcá, “querubinènga ca” uabáinènga, y chènga imojaninÿanÿná chè Bèngbe Bètsabe buashinÿinÿanana chéntšnaca bétsemnama. Chènga, chè juatèngmiášhangaca chè cajontémentša nÿets ústonètema imojanètsbotsana; chè ústonètema inauabaina “entsànga bacna soyènga tmojamama Bèngbe Bètsá perdonaye luare ca”, er chentše, chè cajontema juatsboca chè bachnangbe más uámana amèndayá jtsamanana buiñe jabuéscjana, chè Bèngbe Bètsábioye cha ibnaimpadana te, entsànga cháuperdonama. Pero mora ndoñe quenátsiyta chè soyèngama lempe jatóyebuambnayama.

6 Lempe chca tmojanprontantsana, chè bachnanga sempre chè natsana luaroye imojánamashjuana, jamama ntšamo Bèngbe Bètsá tojanamèndacá, chábioye jadórama. 7 Pero nÿe chè bachnangbe más uámana amèndayá yojobena chè inÿe luaroye jamashènguana, y nÿe canÿe cada uata. Choye jamashènguama orna, cha ibojamna bayèngbe buiñe juabuyambana, Bèngbe Bètsábioye juatsèmbonama, chca, chè bachnangbe más uámana amèndayá tojanma bacna soyènga Bèngbe Bètsá chaboperdonama, y chè ntsetatsèmbcá entsànga tmojanma bacna soyèngnaca. 8 Chca, chè Uámana Espíritu jamana bènga chaśósertama, chè natsana luare cabá tojtsemnèntscuana y chè bachnanga cabá chè soyènga chentše tmojtsamèntscuana, nÿetscanga cabá ndoñe tmonjanobená chè inÿe luaroye jamashjnama, chè “más uámana luaroye”. 9 Chè soyèngaca jtsopodénana bèngbioye jinÿanÿiyana, chè tempo, chè Bèngbe Bètsábioye jadórama yebnentše entsànga uta luare imojábomna ora, ndoñe yonjopodena Bèngbe Bètsabe delante nÿetscanga jatsmènana, mo chè bachnangbe más uámana amèndayacá. Y chè soyèngnaca jtsayanana, chè Bèngbe Bètsabiamana uátšèmbona soyèngaca y bachnanga tmojanóba bayèngaca, ndoñe tonjanopodé jamana canÿa Bèngbe Bètsábioye adorayá, Bèngbe Bètsáftaca tempcá tšabá chaotsatsmènama y Bèngbe Bètsá chabe bacna soyèngama tbojaperdonama ainaniñe corente chaotsetatsèmbuama. 10 Chènga, chè uátšèmbona soyèngaca y tmojanóba bayèngaca tmojanma nÿe ntšamo Moisesbe leyíñe yojanayancá, ndayá chiñe yojanlesenciancá, ndayá jasama o jofšiyama, y chè cuerpo jabebiana mo tšabe entsàngcá Bèngbe Bètsabe delante jtsatsmènama; nÿetsca mandènga nÿe cuerpama, pero ainanama tondaye ntjamana. Pero chè entsànga chca yojánamna jtsamana, nÿe Bèngbe Bètsá inÿe soyènga, más

tšabe soyënga jamama tojamandantscuana, chë tsëm trato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tšabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama injuabnaycá. Chë luare ndoñe entsangbe cucuátšëca yondëpormana, y chca jtsayanana, quem luarentša soye ndoñe yondmëna ca. ¹² Cha, canye y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inyë bachnanga imojuamancá; ndayá jóbanëse, chabe buiñe juabuáshanëse, cha tojanma entsanga atsebácanënga jtsemnana chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnana chamotsobenama.

¹³ Ndëmuanyënga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuëscacjana, y chë altaroca tcojajuinyë ternerbe jatinýa chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentsana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. ¹⁴ Ndayá bachnanga tmojanmcá yojanámana entsanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jntsachetšá más yojtsámana Cristbe buiñe, ndëmuanyëye tojanábuashana bëngbiana cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsebomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canye bayá tondaye ndbemaná chë bachnanga cuafjobacá juatšëmbonama, entsangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnana bënga junatsana soyënga, chama bënga perdonánënga imojtsemnana, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

¹⁵ Chíyeca, Cristo jóbanëse tojama entsanga Bëngbe Bëtsáftaca cánÿiñe mo canyáca chamotsemnana, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entsanga chamotsemnana tojáchembënga perdonánënga chamotsemnana, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entsanga tojanašebuachenacá.

¹⁶ Ntšamo canye testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama. ¹⁷ Canye testamento tondaye ntsámanana, chë chca jamama tojašbuachená cha cabá ainá totsomñëntscuana; nÿa cha tojóbana orna aíñe. ¹⁸ Chíyeca chë Bëngbe Bëtsabe natsana trato, entsángbeñe tojanoboatsé, chora tmojanóba bayëngbe buiñe jabuëscjëse. ¹⁹ Moisés chë leyentša nyetsca mandënga nyetsca entsanga

tojanabuayenantšana, tojanca buángana boboshéshe y hisopo betiyentša buacuafja, chë ternerënga y chivëngbe buiñe búyesheca enajuabnëyiñe tojanfchecuacuá, y chora chë leyënga librësañe tojanbuéscacja, y nyetsca entsángbeñnaca. ²⁰ Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnana, y tšëngaftangbiama puerte yochtsámanama ca.” ²¹ Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoserverna. ²² Er ntšamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntsopodénana entsanga bacna soyëngama perdonánënga chamotsemnana.

Cristo jasúfriase y jóbanëse, tojanma entsanga bacna soyëngama perdonánënga chamotsemnana

²³ Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinýanýnáyana ntšamo chë celoca luare yomnana Bëngbe Bëtsabe delante, ndayentše Jesús yoserverna. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama. ²⁴ Er Cristo ndoñe tonjánamashëngo canýe luarentše Bëngbe Bëtsá jadórama nýe entsangbe pormánentše, ndaye luare nýe batšatema jtsinýanýnáyana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buiñeca, ndoñe cachabe buiñeca, chca, ndayánaca jamama entsanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtésebocnana, y chabe buiñe juabuáshanëse cachiñe jatóbanama, y ba soye cachcá chauétsemnana. ²⁶ Chca tojtsemnëse, Cristbiama manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canýe y nyetsca tescama tojenonýinýé quem luarentša entsanga bacna soyënga jabuajuánama, chëngbiama jóbanëse, mo entsangbe bacna soyëngama canýe tmojóba bayá, Bëngbe Bëtsábioye uatšëmbonacá. ²⁷ Cachcá, ntšamo nyetsca entsanga jtsamnana nýe canýe jóbanama, y chentšana Bëngbe Bëtsá chëngbiama jayanana chë imojétsiyenëntscuana ntšamo tmojanmcá tšabá o ndoñe tšabá bëtsemnana, y chëngaftaca jamana ntšamo chora tojajuabocá, ²⁸ cachcá, Crístnaca, nýe canýe chabe derecho vida jtsobomñama cachcá tojanonýá, chabe buiñe juabuáshanëse jóbanama, ba entsanga bacna soyëngama jáperdonama; y chentšana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inýe soyëngaca, ndoñe ntsinýanýnáyana lempe chë Bëngbe Bëtsá chabe entsanga jatšatayana puerte tšabe soyënga, pero aíñe batšatema jtsinýanýnáyana ntšamo chë soyënga

yochtsemnama. Chíyeca chë mandënga, chë uátsëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyëts tempo, chënga ainaniñe corente chamotsetatšëmbuama chëngbe bacna soyëngama nyëtsca tescama perdonánënga imojtsemnama. ² Er ndayá tcojtsamama Bëngbe Bëtsabiamama uátsëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnama matmëñjanobenase, chënga chë bacna soyënga tmojanmama ainaniñe ngmënaca ya ndoñe mamëñjëtsemna, y matmëñsanajbaná soyënga amana chë tmojóba bayëngaca. ³ Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; ⁴ er chë toronga y chivënga tmojóbanëngbe buíñeca ndoñe ntsopodénana entšangbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bëngbe Bëtsábioye mëntšá tbojanianyana:

Ndoñe tconjábošëna entšanga chacmátsëmbona soyënga, ni tmojobaye bayënga,

pero aïñe tcojama atše canyë entšacá chaitsemnama.

⁶ Ndoñe tšabá quecmátinýana chë tmojóba y tmojajuinýë bayënga, entšanga bacna soyëngama chacotsaperdonama.

⁷ As atše Bëngbe Bëtsá sënjanianyana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrënguiñe atšbiamama endayancá, chë ndayá atše chjanmama ca.”

⁸ Natsana, Cristo tojánayana, Bëngbe Bëtsá ndoñe tonjánbošëna, ni tšabá tbonjaninýnana entšanga chamuátsëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýë bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojtsamna. ⁹ Y chentšana, Cristo Bëngbe Bëtsábioye tbojatanianyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýë chë jtsamana soyënga tmojóba bayëngaca, tondaye yonduámama entšanga bacna soyënga jabuajuánama, y entšangbe bacna soyëngama jóbanëse tojaninýanýë chë ntšamo Bëngbe Bëtsá yobošcá jtsamana, más iuámama chë inýë soyënga játamama. ¹⁰ Bëngbe Bëtsá tojama, bënga chabe entšanga y chabe delante tšábënga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanëse, canyë y nyëtsca tescama.

¹¹ Judiëngbe nyëtsca bachnanga nyëts tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. ¹² Pero Jesucristo entšangbe bacna soyëngama tojanóbana ora, yojamna mo canyë tmojóba bayacá, Bëngbe Bëtsá entšanga bacna soyëngama cháuaperdonama; nyë canyë y nyëtsca tescama chca tojanma, y chentšana Bëngbe Bëtsabe catšbioica tojtanótbema, canyë uámama puestentše, jtsemándayama. ¹³ Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana. ¹⁴ Er nyë canyë, entšangbe bacna soyëngama cruzoca

jóbanèse, Jesucristo lempe tojama, entsanga chë Bëngbe Bëtsábenga jtsemnama chémbonënga, chabe delante nyetsca tescama tšabengcá chamotsemnama. ¹⁵ Y Uámana Espíritnaca, Bëngbe Bëtsabe uabenana palabrengüiñe šontsinÿanÿná chca ndegombre bétsemnama, mëntsá tojánayana ora:

¹⁶ Ndayá entsangbiama chjama, canÿe tempo chentšana chanjašebuachená soye mëntsá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntsá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

¹⁸ Chcasna, Bëngbe Bëtsá nyetsca tescama entsanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuafjobaycá, entsanga bacna soyëngama perdonánënga chamotsemnama.

Sontsamna Bëngbe Bëtsábioye jtobéconana

¹⁹ Y chca, Jesucristbeyeca catšátanga, Jesusbe buiñe tojanábuashanama y bëngbiama tojanóbanama, chábeñe jtsošbuáchiyëse, bënga montsobena, tondayama ntjatauatjácá Bëngbe Bëtsabe delante jamashënguama. ²⁰ Bënga montsobena jamashënguama chë tsëm benachëjana, Cristo bëngbiama tojamëjana; cha nda inétsama chë nyetsca tescama yomna tšabe vida chamotsebonnama. Mo chë quem luarentše chë bachnangbe más uámana amëndayacá, chë ujonÿana entséjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye jamashënguama. ²¹ Bënga mondbomna canÿe bëts bachnangbe más uámana amëndayá, Bëngbe Bëtsabe entsángbeñe jtsemándayama, y cha endmëna Jesús. ²² Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcaccá, Bëngbe Bëtsabe delante tšabengcá chamotsemnama cha jaserviama, cachcá, Cristbe buiñe juabuáshanëse y bëngbiama jóbanëse, bënga ainaniñe corente montsetátšëmbo Bëngbe Bëtsá nyetsca tescama bëngbe bacna soyëngama šojtsaperdonama. Y bënga béjayeca uabainëngnaca mondmëna; chíyeca bënga jtsoobenana Bëngbe Bëtsábioye chca jobéconana.

²³ Bënga šontsamna nyets tempo Bëngbe Bëtsábeñe puerte jtsošbuáchiyana, y ndocna te nÿe ndayámnaca játajbanana entsángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. ²⁴ Bënga šontsamna janguanguana ntšamo muatjobenaye añemo jenatšetayana, nyetscanga jtsebbonshánana, y ntšamo tšabá yomncá jtsamana; ²⁵ pero ndoñe quešnátamna játajbanana, Bëngbe Bëtsábioye jadórama enefjuanana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtsetatšetnaye Cristo nyets tempo jtseservénama, y más mora, chë ndayá imojtsonÿama, Bëngbe Utabná yochjésabama ya yojtsobecuama montsetátšëmbo ora.

²⁶ Er chë ndegombre soyëngama tšabá tmojátatšëmboentšana y chë soyënga tmojoyeuná chentšana, bacna soyënga jtsamëse tmojtseyena, nÿe chca jamama tmojtseboše causa, muattsaboté ndayá Cristo bëngbiama tojanmccá, bëngbe bacna soyëngama cha tojanóbana ora, y ya tondaye nántsemna

ntšamo Bëngbe Bëtsá bënga jtsaperdónama. ²⁷ Y chca, ndayá bënga muattsobena jobátmana soye nántsemna nýe chë Bëngbe Bëtsábiocana castigo, chë ndayama šojtsamna uatjana jtsebomnana; y nýe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochóca. ²⁸ Ndánaca chë Moisesbe leyama tojayana tondaye yondoalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá. ²⁹ Canya, nýets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndémuanýeye tojanábuashana bëngbiana tojanóbana ora, tondaye yonduámana ca, ndayá nýe ndaye entšabe buiñcá ca, chë buiñe chë ndémuanýeye šojtsinýanýná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entšanga šojábiana, cha jaserviama; chë entšá Uámana Espíritbioye tbojóyenguango, nda inétsama bënga tšabe soyënga chamotsebomnana; y canya chca amá, çtšëngaftanga ndoñe šmontsejuabná cha ibojtsomerecena Bëngbe Bëtsábiocana canýe puerte más uabouana castigo, chë Moisesbe leyama tondaye yondoalena ca tojayanabiana? ³⁰ Bënga nýetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínýenga chamosufrima tmojama causa; y chënga chanjácastigaye, ínýengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiana echanjyana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” ³¹ ¡Tša uabouana, Bëngbe Bëtsá chë nýets tempo ainabe cucuatšíñe joquédana, castiganá jtsemnana!

³² Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenujuérsana cmonjanotocá padecena soyënguiñe, y chë causa tša šmojansufrí. ³³ Báseftanga tšëngaftanguentsëngbioye entšangbe delante tcmojanoyánguango, y ínýenga tmojanma puerte chašmotsesufrínama; y ínýenga tšëngaftanguentsënga chca imojansufrinëngaftaca šmojanama, chënga jujabuáchama. ³⁴ Tšëngaftanga šmojánalastemana chë chënguentsënga cárceloye imojanétámenënga; y oyejuayënga šmojanlesenciá ntšamo šmojanbomncá ínýenga chacmotsabacama, er tšëngaftanga šmojátatšëmbona Bëngbe Bëtsábiocana más tšabe soyënga šmojtsebomnana, chë nýetsca tescama šmochtsebomna soyënga. ³⁵ Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtšobátmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnana. ³⁶ Tšëngaftanga cmontsamna corente uantadënga jtsemnana, padecéniñe chašmojtsachnëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. ³⁷ Er Bëngbe Bëtsabe uabemana palabrënguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

³⁸ Nýe chë ndabiana atše chaijama atšbe bominýiñe tšabia chaotsemnana, átšbeñe cha betsošbuáchema, cha ndegombre chë nýetsca tescama yomna tšabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyeuaye ca —cha tojánayana.

39 Pero bēnga ndoñe quemátsmēna chē uatjana causa Bēngbe Bētsábeñe ošbuáchiyana tmojtsajbananga, y chca, n̄yetsca tescama pochocánēnga jtsemnama imojtsajnēnga; pero aiñe mondmēna chē Bēngbe Bētsábeñe ndegombre ošbuáchiyēnga, y chca, chē atsebácanēnga jtsemnama mochjashjáchēnga.

11

Bēngbe Bētsábeñe ošbuáchiyana jtsebomnana

¹ Ošbuáchiyana jtsebomnana endmēna corente jtsetatšēmbuana, ndayá tmojtsobatmancá ndegombre chca yochjopásama; endmēna ainaniñe corente jtsetatšēmbuana, ndayá bēnga mora ndoñe tmontsonyáca ndegombre chca yomnama. ² Bēngbe Bētsá tojánayana bēngbe bēts taitanga tšabá imojánama ca, chēnga chábeñe imojtsošbuachéyeca.

³ Bēnga, Bēngbe Bētsábeñe mondošbuachéyeca, mondētatsēmbó cha quem luare y n̄yetsca luarēnga tojanmama, chca chaotsemnama cha tojanmandá ora; chcasna, chē ndayá mora bēnga jin̄yama imobencá, cha tojanma bēnga ndoñe mondobena jin̄yama soyēnguentšana.

⁴ Abel Bēngbe Bētsábeñe yojanošbuachéyeca, oveshatémēnga chábioye tbojanátšēmbona, y chē soye Bēngbe Bētsabiama más tšabá yojtsemna, chē ndayá Caín, chabe catšata, Bēngbe Bētsá jētschuayama tbojanátšēmbonama. Chíyeca, Bēngbe Bētsá tojánayana Abel chabe bominyiñe tšabia yojtsemna ca, ndayá Abel chábioye jētschuayama tojanmcá oyejuayá tojanóyēngacñeyeca. Ntšamo Abel Bēngbe Bētsábeñe yojanošbuachecá, masque cha ya obaná yojtsemna, chē soye cabá bēnga šontsabuatambá.

⁵ Enoc Bēngbe Bētsábeñe puerte yojanošbuachéyeca, Bēngbe Bētsá celoye tbojesanbētseñe, ntjobancá. Chentšana ndocná tonjanobená cha jtsin̄yenana, Bēngbe Bētsá tbojesanbētseñe causa. Y Bēngbe Bētsabe uabemana palabrēnguiñe endayana, Bēngbe Bētsá Enócraftaca oyejuayá canjamna ca, ntšamo jtsamēse yojoyenama, y chentšana celoye tbojtsanámbañe. ⁶ Pero Bēngbe Bētsábeñe ntsošbuachiycá, ndoñe quenátópodena cha oyejuayá bēngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bētsemnama, y cha inétsamama chē cha jtsabuatmama tša tmo-bošēngbiana bētsáca tšabe soyēnga chamotsebomnana, mo chábiocana uacana soyēngcá.

⁷ Bēngbe Bētsá Noébioye tbojanbuayená uabouana soyēnga yochjanopásama, cachora ndopodena jin̄yama soyēnga, y cha Bēngbe Bētsábeñe yojanošbuachéyeca, tojanma ntšamo Bēngbe Bētsá tbojanmandacá y barquēsha tojanapormá chabe pamíllanga jātsebacama. Cha chca tojanma ora, ošbuáchiyana bómnyayeca, cha tojanin̄yan̄yé entšanga tša bacna soyēnga tmojanmama y chē causa castigánēnga jtsemnama yojtsamnana. Chabe ošbuachiyánamnaca Noé tojánashjache Bēngbe Bētsabe bominyiñe tšabia jtsemnama, y chca entšá jashjáchana, n̄ye Bēngbe Bētsábeñe jtsošbuáchiyēse.

⁸ Bēngbe Bētsá Abrahámbioye tbojanchembo, in̄ye luaroye cháuama; Abraham Bēngbe Bētsábeñe yojanošbuachéyeca, tojanma ntšamo Bēngbe Bētsá tbojanmandacá, y tojánbocna chē luaroye jama, chē Bēngbe Bētsá tbojanšbuachená jatsetayama luaroye, masque Abraham ndoñe yontsetátšēmbó ndémoye yochjánama. ⁹ Bēngbe Bētsábeñe yojanošbuachéyeca, yojobena mo in̄ye luarocana ashjangonacá jtsiyenana, cachabe luarentše ndoyená, chē Bēngbe Bētsá tbojanšbuachená luarentše. Entšējuaca pormana tambēnguiñe yojoyena, cachcá ntšamo chē chábentšana básenga Isaac y Jacob ibojēftsiyencá; y chátnaca Abrahamcá ibojanobátmana jóyēngacñama ntšamo Bēngbe Bētsá

Abrahámbioye tbojanšbuachenacá. ¹⁰ Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puerte tšabe ucuatjoniñe pormana pueblo, canye luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

¹¹ Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šešona chabotsebomnama, masque chora ya bëtsanánëjema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canye šešona yochtsanbomnama tbojanšbuachená cha, nyets tempo ntšamo tojayancá amá yojamna ca. ¹² Y chca, quem entšá Abraham, chë šešonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

¹³ Nyetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nye achnëjuanëngcá ca. ¹⁴ Y chca tmojtsichámëngna, puerte jtsinýanýnaya chënga tša imojtseboše inye luaroca joyéanama, canye luare cachëngbiama. ¹⁵ Chënga nye chë ndayentšana tmojëftsanbocna luarama manjánjuabnase, matmënjanobená tšabá cachoye jesshëconama. ¹⁶ Pero chëngna canye más tšabe luare inmaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canye bëts luare, mo canye bëts publëcá chëngbiama tojanprontá.

¹⁷ Bëngbe Bëtsá Abrahámbioye jinýama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nye canye uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: ¹⁸ “Chë ácbentšana entšanga nye Isaacbiajana mochanjabo ca.” ¹⁹ Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbioye tbojtsanauyaná Isaac jóbama ora, yojamna mo Abraham obanënguentsana chábioye cuaftoyëngacñëcá. Y chca, ntšamo Isaácaftaca tojanopasacá, batšá yojtsinýanýnaye ntšamo Jesucrístoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiama, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

²¹ Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básëngbiama, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

²² José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entšanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

²³ Moisesbe bētsētsata Bēngbe Bētsábeñe ibojanošbuachéyeca, cha tojanonýna ora, unga shinýentscuana cha tmojtsaniytēme, er chata tbojáninýe cha canýe botamana básetema bētsemnama, y ndoñe tbonjanēuatjaná chē reybe mandama, chē nýetsca judiēngbe basetémēnga boyabásetemēnga jtsēbáyana.

²⁴ Moisés Bēngbe Bētsábeñe yojanošbuachéyeca, ya bētsá yojtsemna ora, ndoñe tonjánbošena chē Egiptoca reybe bembēbe uaqiñacá chamotsábuatmama. ²⁵ Chamna, tojánbošena cha jasúfriama ínýenga chamotsamama, cánýiñe chē Bēngbe Bētsabe entsángaftaca, y ndoñe nýe baseftayté tšabá jatsmēnana, bacna soyēnga jtsamēse, ntšamo cachá tojtsejuabnacá, nýe cachá tšabá jtsomñama. ²⁶ Chamna, cha yojanjuabná, chē padecena soyēnguiñe jasúfriana ntšamo Cristo tojansufricá, más tšabá yojamna chē Egiptoca uámana soyēngama, er cha Bēngbe Bētsábeñe jtsošbuáchiyēse chábeñe yojanobátmana, ba tšabe soyēnga mo canýe uacanana soycá cha ibochjanatšetayama.

²⁷ Bēngbe Bētsábeñe yojanošbuachéyeca, Moisés Egiptocana tojēftsanbocna, chē luarentša rey cháftaca chábuetsnama ntjatauatjca. Cha ainaniñe nýets tempo añemo yojtsebomna, y chca yojáninýna mo chē ndocná jinýama tondobenacá, Bēngbe Bētsábioye cuaftsonýacá. ²⁸ Bēngbe Bētsábeñe yojanošbuachéyeca, ntšamo Bēngbe Bētsá tbojanmandacá, Moisés chē judiēnga tojanabuayená Bashco fiesta jamama, y chē Israeloca entsángaftaca yebnēngoye amashjuaniñe buíñeca tojanbuéscacja, chca, chē ángel obanayá, chē Israeloca pamíllangbeñe Egiptoca chē mayor uaqiñēnga ndocá chaondámama.

²⁹ Moisés y Israeloca entsanga Bēngbe Bētsábeñe imojanošbuachéyeca, chē “Buángana ca” uabaina mar bejayējana tmojánenachnēngo, mo chiñe bojojo fshantse cuaftsomñcá; chentsana, chē Egiptoca entsanga cachcá jamama tmojánbošena ora, nýetscanga chiyiñe tojtsanatajo.

³⁰ Israeloca entsanga Bēngbe Bētsábeñe imojanošbuachéyeca, chē Jericó bēts pueblentša tapiēsēnga shēconana canýsēfta tentscuama chēnga imojánajnentšana, chēsēnga yojtsáshajaye.

³¹ Rahab, chē pueblentša bacna vida bomna shembása, Bēngbe Bētsábeñe yojanošbuachéyeca, ndoñe tonjanóbana chē ínýengaftaca, chē bēts pueblentse oyenēnga, chē ntšamo Bēngbe Bētsá tojanmandacá ndoñe tmonjanmēnga; y ndoñe tonjanóbana, er chē Israeloca entsanguentšana ichmónēnga tšabá tojanēbuaja, chē jarrepárama tmojánanga ntšámose chē luarentse oyenēnga jáyēnjanama jobenayama.

³² Atše sēntsobena bangbiana más jóyebuambayama, Bēngbe Bētsábeñe ošbuáchiyēngbiana, pero luare šattsēshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bēngbe Bētsabe juabna oyebuambnayēngcá. ³³ Chēnga Bēngbe Bētsábeñe imojanošbuachéyeca ínýengbe mandadēngbe entsángbioye tmojanayēnjaná, bētscá imojánama nýetsca entsángaftaca ntšamo tšabá yomncá jtsamama y nýetscanga cachcá chamotsámanama, ndayá Bēngbe Bētsá chēnga tojanašebuachenacá tmojanóyēngacñe; y Bēngbe Bētsá tojanma chēnga leóngaca imojtsemna ora, chēnga chamuatenáyebengoma, chentsana báseftangbioye ndocá chamondámama. ³⁴ Ošbuáchiyana bómnyayeca, Bēngbe Bētsá tojanma lempe chaotsefsanama, chēngbioye íñeshiñe tmojanacjá ora, chēnga ndocá chamondēpasama; tmojanotsbocá espadējaca jobanámentšana; ya tondaye añemo bēntsebomna ora, Bēngbe Bētsá tojanma bēts obenana y puerte añemo chamotsebomnama; tmojánashjache bēts obenana jtsebomnama

ínÿenga jáyēnjanama, chēngaftaca imojtsentsjaná ora; y tmojanobená inÿe mandadēnga y chēngbe soldadēnga jáyēnjanama, chamotsachetama jamēse. ³⁵ Ošbuáchiyana bómnayeca, básefta shembásenga chēngbe óbana pamíllangbioye cachiñe ainēnga tmojtananÿe, chēnga ainēnga chamotsatsmēnama Bēngbe Bētsá tojanma ora.

Ošbuáchiyana bómnayeca, ínÿenga tmojanma básefta ošbuáchiyēnga, puerte chamosufrima, y jobanámna; er chēnga más tmojánbošena jashjáchana chē nÿetsca tescama yomna tšabe vida jtsebomnana, y ndoñe nÿe chē jótsbocana batsatema más vida jtsebomnama. ³⁶ Ošbuáchiyana bómnayeca, ínÿenga corente tmojansufrí, ínÿenga chēngbioye tmojanoyánguango ora y tmojanatsetšená ora; y ínÿenga tmojansufrí y cárceloye cadenējuangaca utámenēnga joquédamnaca. ³⁷ Inÿengbioye ndētšbēngaca tmojtsanatēchēnganja, serruchēshaca tmojtsanējátcacaye, espadējaca tmojtsanēbaye. Inÿenga imojánajna cánÿentšana ínÿecnoye nÿe oveshá y chivēbe bobáheca uichétjonēnga, ujabótēnga, ainana tsetšanēnga, y ínÿengbeyeca mocá borlánēnga. ³⁸ Chē nÿe quem luarama enójuabnayēnga ndoñe monjanomerecena chēnga mēngaftaca jtsiyenama, chēnga chē vida imojábomna cánÿentšana ínÿecnoye aniñe, entšanga ndoyena luarēnguenache, tjañenache, fshantsiñe atēbēfjniñe y cuevēshēnguiñe.

³⁹ Nÿetsca quem entšanga, ndēmuanÿengbiamu muentše tmonjoyebuambá, Bēngbe Bētsá tšabá chēngbiamu tojánayana, ošbuáchiyana imojánbomna ca; pero ni canÿa chēnguentšá tonjanóyēngacñe, ndayá Bēngbe Bētsá chēngbe entšanga jatšatayama tojanašebuachenacá, nÿetsca tescama jtsebomnama. ⁴⁰ Bēngbe Bētsá, bēngbeñe jtsejuabnayēse, tojanjuabó canÿe más tšabe soye bēngbiamu jamama, chca, Bēngbe Bētsá canÿe ora jamama, bēnga nÿetscanga, chēnga y bēnga chamotsemnama lempe ntšamo Bēngbe Bētsá yobošcá, ntšamo Bēngbe Bētsá tojanašebuachenacá jóyēngacñe.

12

Bēnga mochtsejuabnaye ndayá Jesús tojanmama

¹ Chíyeca, bēnga mochtsejuabnaye ba entšangbiamu, chē bēngbiamu más natsana imojaniyenēnga, ndēmuanÿenga puerte tšabá bēnga jtsinÿanÿnayana ntšamo ndegombre yomnana Bēngbe Bētsábeñe ošbuáchiyana jtsebomnana, mo chēnga ndayá bēnga tmojtsamama cuaftsonÿangcá. Chcasna, mo chē tmochamanēngcá, ínÿengaftaca jenēyēnjanama, chē jashjanguama tojtsemna luaroye natsana jashjanguama, chēnga jotjajuamna, chē chorscama nduaserverna entšayá jtsenátsejcana, y lempe ndayá tojtsama más uenana chamotjajuama soyēngnaca jtsenójacana; bēngnaca cachcá, ndoñe matjaleséncia bēnga Crístbioye ndoñe tšabá ndētšoservénama, ni chē bacna soyēnga jamama juabnēnga, chē bēngbioye paselo jáyēnjanama juabnēnga cachcá chamotsamama. Chamna, šontsamna sempre Bēngbe Bētsá jtse-servénana, puerte uantadēnga jtsemnēse masque padecena soyēnguiñe tmoyena, bēnga chamobená chē trabajo jamama, chē ndayama Bēngbe Bētsá šojáchembo. ² Jesusbiamu mochtsejuabnaye, nda šuebēnatsana bēnga ošbuáchiyana chamotsebomnama, y šuinÿanÿná ntšamo nÿets tempo nÿetsca soyēnguiñe Bēngbe Bētsábeñe jtsošbuáchiyama. Cha chē cruzoca jóbanama sufrínana lempe tojanoboyá, er cha yojanobátmana chē chentšana yochtsanbomna bēts oyejuayánama; y yojanjuabná, chē más bacá uamana entšangcá jóbanana, chabiamu ndoñe canÿe uámana soye yonjamna ca; y chentšana chē uámana puestentše tojtanoítbema, Bēngbe Bētsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiana oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. ⁴ Tšëngaftanga padecena soyënguiñe šmojachnëngo, entšanga bacna soyënga imojtsama causa, pero méntscoñama ndoñe cmontsamna jóbanama, Cristbe soyëngama enojuerzániñe; ⁵ y tcmojtsébnëtjomba ndayá Bëngbe Bëtsá tšëngaftangbiöye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe méntšá endayana:

Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

⁶ Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca —chiñe endayana.

⁷ Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbiöye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? ⁸ Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengftaca cha endbetsamcá, as tšëngaftanga ndoñe ntsemnana ndegombre chabe básenga. ⁹ Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbiöye ndoñe stëtšoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnana, y chca, bënga tšabe vida chamotsebomnana. ¹⁰ Bëngbe bëtsétsanga quem luarentše, nye básefta tescama, bënga jëftsabuayiynayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiyná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábenga, ntšamo cha nyets tempo yomncá. ¹¹ Sempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aíñe cochtsetšenánënga. Pero bënga chë castigüentšana tmojuatsjinýe ndayá Bëngbe Bëtsá chë sóyeca tbojtsabuayiynacá, as chentšana jóbocnana natjëmbana oyenana, nyetsca soyënguiñe ntšamo tšabá yomncá jtsamëse.

Bëngbe Bëtsábioye jtsabotena, entšangbiana ndoñe tšabá ntsemnana.

¹² Mo nda puerte uamëntšnayacá, jatrabájama tondaye añemo ntjtsebomncá, tsátšena buacuatšëngaca y puerte uamëntšena ntsamiašëngaca, tšëngaftangbentše báseftanga ya uamëntšnayënga šmojtsemna Bëngbe Utabnabiama trabájayiñe, y ainaniñe ndoñe añemo šmontsebomna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbomna. ¹³ Mo chë canye benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínýama, y chë benachentšana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jasérviana corente añemo šmobomnënga, chë nye batsatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jasérviana yomncá jinýanýiyëse, y ntjalesenciácá ndocna soye chaotsama chë tšabe benachentšana tšëngaftanga chašmotsojuánañama.

¹⁴ Lempe ntšamo chašmojobenacá šmochjama n̄yetscángaftaca natjěmbana jtsiyenama, y ntšamo Běngbe Bětsabe entšanga mondbetsamcá jtsaměse chašmotsiyenama, cha jtseservénese; er chca ntjamcá, can̄ya ndoñe ntsoberenana Běngbe Utabnábioye jin̄yama. ¹⁵ Yejuana šmochtsantješna, ndocná Crístbeñe ošbuáchiyana chaondětsajbanama, y chca, chě Běngbe Bětsá chabe entšangbioye yochjatšataye tšabe soyěnga chěnga ndoñe chamondashjache. Smochtsantješna, tšěngaftanguentše ndocná chaondětsemna, mo can̄ye untja tbětějcá, chě chcaja sayěngbioye jásocayana, nda chaotsama, ín̄yenga natjěmbana ainana ndoñe chamondětsebomnama y bacna soyěnga jtsaměse chamotsiyenama. ¹⁶ Yejuana šmochtsantješna ndocná tšěngaftanguentše shembása o boyabásaftaca bacna soye amá chaondětsemnama, ni can̄ya ndabiamama Běngbe Bětsabe soyěnga tondaye chaondětsámama. Esaú chca tojanma, chě lempe yochjanashjachcá, mayor uaquiñá bétsemnama, chabe uabentsábioye can̄ye šcnena sanama tbojtaname ora. ¹⁷ Y tšěngaftanga šmondětatsěmbo, chca tojanopasá chentšana, Esaú tojánbošena chabe taitá Běngbe Bětsábioye chaboimpadama, chabiamama tšabe bendicioněnga chaomama, chě mayor uaquiñá bétsemnama yojanobena jtsebomnama soyěnga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jětsjandmanana. Masque cha tša tojánbošena, shěchbuíyeca chabe taitábioye jaimpádase, ya ndoñe yontsopodena ntšamo tojanopasacá jětsjandmanana.

¹⁸ Tšěngaftanga ndoñe chešmatobeconá, mo chě entšanga Israeloca Sinaí ca uabaina tjoye tmojanobeconacá, ndayá chěnga imojobena jabojajuama, y íñesheca yojtsángbototjuana, tondaye bin̄yiniñe luare, tša ibetiñe y puerte jabuache bin̄yiěngaca; ¹⁹ ni chešmatuena chěngcá, can̄ye trompetěfjua uajatětanana, ni Běngbe Bětsabe oyebuambnayana. Chě oyebuambnayana tmojanueněnga, imojtseimpadana ndoñe más chěngbioye chaondětsóyebuambnama. ²⁰ Chca tmojanma, jauántama ndoñe tmonjanobená causa, ntšamo Běngbe Bětsá tojanaměndacá: “Nda quem tjoca chaojoyená, masque can̄ye bayá chaotsomñe, entsemna chana ndětšběngaca chamotsatěchěnjanga jtsóbama ca.” ²¹ Ndegombre, ntšamo tmojanin̄ycá tša uabouana yojtsemna, cach Moisésnaca mēntšá tojánayana: “Tša šontsengmēmna auatjananá sěntsemna causa ca.”

²² Pero tšěngaftanga Běngbe Bětsábioye šmojobeconá, y chca endmēna mo tšěngaftanga can̄ye Sión ca uabaina tjoye celoca cuafjobeconacá, chě Běngbe Bětsá n̄yets tempo vida bomnabe běts pueblóye, mo celoca Jerusalén cuenta; y ba uaranga angelěngbioye šmojobeconá, cán̄yiñe oyejuayěnga enefjuaněnga imojtsemněngbioye, Běngbe Bětsá jtsatschuanayama. ²³ Endmēna mo tšěngaftanga chě Běngbe Bětsabe entšangbioye cuafjobeconangcá, chentše enefjuaněnga mo Běngbe Bětsabe basěngcá, chěnga ndayá chě Taitá tojašebuachenacá jóyěngacñama, ndēmuan̄yěnga Běngbe Bětsá chabe librěšañe tojúbiamama. Tšěngaftanga šmojobeconá Běngbe Bětsábioye, ntšamo n̄yetsca entšanga tmojamcá tšabá o ndoñe tšabá bétsemnama yochjayanábioye. Endmēna mo tšěngaftanga cuafjobeconacá, chě entšanga mora ya obaněnga y ntšamo tšabá yomncá jtsaměse imojěftsiyeněngbe espiritěngbioye, chě entšanga ndēmuan̄yěngbiamama Běngbe Bětsá tojanma chamotsemnama lempe ntšamo chabe entšangbiamama yojanjuabnacá, chca, cháftaca sempre vida jěftsebomnama. ²⁴ Tšěngaftanga Jesúsbioye šmojobeconá, chě jóbane, entšanga Běngbe Bětsáftaca mo can̄yacá chamotsemnama tojanmá, ntšamo Běngbe Bětsabe tsēm trato yojamncá; y endmēna mo chě běngbiamama cha tojanóbana ora tojanábuashana buiñoye tšěngaftanga cuafjobeconacá; chca tojanábuashana,

bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuésacajama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnama.

²⁵ Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentse tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse. ²⁶ Bëngbe Bëtsá Sinaí tjoca chë entšángbioye tojanoyebuambá ora, chabe oyeambuambayánaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócnaca ca.” ²⁷ Bëngbe Bëtsá “cachiñe ca” tojánayana ora, chë sóyeca yojsichamo, chë ndayté lempe chaongmëmanama cha cachiñe yochjama ora, chë quem luarentse tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama. ²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamama bëts respeto jtsebmomnëse, y nÿetscangbiamama más bëtsá cha yomnama jtsejuabnaye. ²⁹ Er Bëngbe Bëtsá puerte etonaná chë chabiamama nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochocamcá.

13

Ntšamo jtsiyenama, Bëngbe Bëtsá oyejuayá bëngaftaca chaotsemnama

¹ Sempre nÿetscanga šmochtsenbobonshana, Jesucristbeyeca catšátanga quetsomñecá. ² Sempre tšabá chë tšëngaftangbe yebnoye inÿe luarëngocana tmojášhjajnënga šmochjúbuaaja, er chca jamëse, ntsetatšëmbcá báseftangna angelënga chëngbe yebnentse tmojanëbuaja.

³ Chë utámenëngbiamama sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamot-sesufrinëngbiamama šmochtsenójuabnaye, er tšëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanenšbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëgnaca.

⁵ Ndoñe šmattsiyena jtsejuabnaye nÿe mallajta crocénana jëftsebomnama. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá canÿe entšá nanjobenaye átšeftaca jamama ca?

⁷ Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangbiama, sempre šmochtsenójuabnaye. Sempre šmochtsenójuabnaye chë ntšamo chënga imojaniyenentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bétsemnama.

⁸ Jesucristo cachá nÿets tempo iuétsemna, tempo, mora y nÿetsca tescama. ⁹ Ndoñe šmatjaleséncia ínÿenga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuataambama contra soyëngaca. Más tšabá endmëna bënga ainaniñe añemo jtsebmomnana, Bëngbe Bëtsá tšabe juabna bëngbiama yobómnyeca, y ndoñe chë sanama, chë ndayá aíñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiama tempo tonjanoservé.

¹⁰ Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebmomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. ¹² Cachcá, Jesúsna tojansufrí y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábënga chamotsemnama, y chabe delante mo tšabengcá chamotsemnama. ¹³ Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. ¹⁴ Er quem luarentše bënga ndoñe quemátsbomna canÿe bëts pueblo bëngbiama, nÿets tempo chausomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatšëmboncá. Chcasna, jtsóyebuambnayëse cha mochtsadorana. ¹⁶ Sempre ntšamo tšabá yomncá šmochtsama, y chë šmobomncá inÿengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiama, ntšamo cmojánanÿenama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

¹⁸ Bëngbe Bëtsá bëngbiama šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. ¹⁹ Tšëngaftanga bëtscá cbontsaimpadana, Bëngbe

Bětsá chašmoimpadama, atše chašolesenciama tšëngaftangaftaca cachiñe jt-satsmënama.

Bëngbe Bětsábioye chëngbiama jaimpádama y chënga jacheuayama

²⁰ Atše, Bëngbe Bětsá sěntseimpadana, cha chë nda endbětsama bënga natjěmbana chamotsiyenama, y nda tojanma Bëngbe Utabná Jesús cháuatayenama, nda bënga šondányena mo oveshëngbe tšabe abujěnyácá; y Bëngbe Bětsá chca tojanma, Jesús, chabe buiñe juabuáshaněse tojanóbanayeca, chca, entšanga jinýanýiyama ndegombre bétsemnama ntšamo Bëngbe Bětsá chabe entšangbiama tojanašebuachenacá nýetsca tescama jamama. ²¹ Cha sěntseimpadana chaoma tšëngaftanga chašmotsebomnama nýetsca tšabe soyënga ntšamo cmojtsějabcá, chca, lempe ntšamo cha yobošcá tšëngaftanga chašmotsamama; y cha Jesucrísoftaca chaboma bëngaftaca ntšamo cha tšabá tbojtsinýancá. ¡Nýetscanga nýetsca tescama Cristo chamotsatschuaná! Chca chaotsemna.

²² Jesucrístbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nýe básefta palabrëngaca chama tcbonjubuábiamama. ²³ Atše sěntseboše tšëngaftanga chašmotsetátšëmbo, Timoteo Jesucrístbeyeca bëngbe catšata, ya ndoñe utamená yontsemnama, y cha betesco átšbioye chaojtaběse, átšeftaca chanjěftsbetše tšëngaftanga jányama chajá ora.

²⁴ Tšëngaftanga ošbuachiyëngbeñe nýetsca amëndayënga šmochjácheuaye, y nýetsca Bëngbe Bětsabe entšágnaca choca. Chë Italia luaroquënga ošbuachiyënga tšëngaftanga cmontsacheuaná.

²⁵ Atše, Bëngbe Bětsá sěntseimpadana, cha chaoma tšabe bendicionënga tšëngaftangbeñe chaotsemnama.

Santiago

Jacheuayama

¹ Atše Santiago, Bëngbe Bëtsá y Bëngbe Utabná Jesucristbe canye oservená, tsëngaftanga cbontsëbuabiamná, tsëngaftanga chë bnëtsana uta Israeloca bëts pamillangbioye nyets luarëjana ujquëshenënga. Atše cbontsacheuaná.

Chë Bëngbe Bëtsábiocana osertánana

² Jesucristbeyeca atšbe catsátanga, tsëngaftanga ndaye padecena soyënguiñe chašmojtseyena ora, chiñe šmochjájuaboye mo chca tsëngaftangbe tsabiama cuaftsemncá y šmochjóyejuaye; ³ er tsëngaftanga šmondëtatšëmbo, chcañe chašmojtšajna ora, šmochtsetátšëmbo cach tsëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomñese, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñese. ⁴ Pero chca chašmojtsemñese, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

⁵ Nderado nda tsëngaftanguentšana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aiñe chana jtsebomnana, y Bëngbe Bëtsá chana bochanjátšetaye; er Bëngbe Bëtsá nyetscanga bëtscá endbëtsatsatnaye y ndocnábioye jatáboyënjana. ⁶ Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojt-samëse, inye ora aiñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binyia nye cáatoye jtsambayana. ⁷ Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama. ⁸ Cha jtsemnana canye entšá, mora canye soye juabnayá, pero chentšana inyetsá jatójuabnañana. Chca, cha jtseyenana nyetsca soyëngama uta soye jtsejuabnayëse, y chca cha ndoñe ntsobenana tondaye puerte tsabá jamama.

⁹ Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana; ¹⁰ y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaniñe uantšefjushacá, cha ndoñe nyets tempo quem luarentše ntjëtseyenana. ¹¹ Shinye tojábocna y becá tojojënyana ora, chë shácuaña jtsebuashana, chë uantšefjúsha jtsátsatšana y chabe uabótamanana ya ndoñe más ntsebinynana. Cachcá chë bomná, echanjóbana nye cachabiama más becá crocénana onguayiñe chaojtsemna ora.

Bacna soye ocochënguentšana tsabá jabocnana

¹² Oyejuayá chaotsemna chë entšá chë padecena soyënguentšana tsabá tojëtšbocná, cabá Jesucristbeñe ošbuachiyá; chama Bëngbe Bëtsá chabiama oyejuayá echántsemna y echanjama chë nyetsca tescama yomna tsabe vida cha chaotsebomnana, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. ¹³ Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna

soye jamama jócochënguana, y cha ndoñe ntsamana ínÿenga bacna soye jamama chaócochënguama. ¹⁴ Inÿetsá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jésejuabnayana y chë soye jtsasjayana cha chca jamama. ¹⁵ Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanjacastíga.

¹⁶ Atšbe bonshana catšátanga, ndoñe matenoíngña, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca. ¹⁷ Nÿetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábiocana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá iuesomñe y ndoñe inÿa ntjátsmënana. ¹⁸ Cachá jamama tojánbošenayeca, bënga chábenga šojánabiana, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnana.

Ntšamo ndegombre yomna Bëngbe Bëtsábioye tšabá jadórama

¹⁹ Atšbe bonshana catšátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámnaca. ²⁰ Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguiñe tšabá jtsamana. ²¹ Chcasna, šmochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnana.

²² Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aiñe jtsamana; ndoñe chca šmontsamëse, cach tšëngaftanga šmontsenoíngña. ²³ Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubíá espejuiñe tojtsenonÿacá: ²⁴ chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bétsemnana. ²⁵ Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabiana tondaye ntsámanana. ²⁷ Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

2

Nÿetscanga tšabá jtsatenonÿayëngana

¹ Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga

cmontsamna n̄yetsca entsanga cachcá jtsatenon̄yayēngana. ²⁻³ Nderado t̄sēngaftanga cán̄yent̄se šmojúnefjna, y chora can̄ye bomna entsá tojášhango castellano nt̄sabuch̄t̄jonēfjangaca y uámana entsaȳjuangaca bopormaná, cha botamana šmojúmashēngo y mēnt̄sá šmojauyana: “Moca quēfseroca mabesótbema ca”. Pero cachca ora, can̄ye ndbomn̄ejema tojášhango uandocuenta entsayá uich̄t̄joná, y cha šmojauyana: “Acna choca tsanana cochtsemna o chafjoca mótbema ca”. ⁴ Chca t̄sēngaftanga ya šmontsama cach t̄sēngaftanguent̄se báseftanga más uámanēnga ín̄yengbiana chamotsemnama, y chca šmojtsama, ana bacna juabnēnga šmojtsebomna causa.

⁵ Atsbe bonshana cat̄sátanga, quem soye šmochjouena: Bēngbe Bētsá quem luarent̄se ndbomn̄ēnga imomn̄ēnga tojabacacá, chēnga can̄ye puerte uámana soye chamotsebomnama, Jesucrist̄beñe puerte chamotsošbuáchema; y mo otocana soycá Bēngbe Bētsabe amēndayama chamosháchiñama. Cha imobobonshánēngbioye chē soye jat̄satayama tojašebuachená; ⁶ pero t̄sēngaftanga chē cuenta, mo ndoñe cach t̄sēngaftangcá entsanga bendmēncá chēngbioye jtsēn̄yayana. Ndegombre, chē bomn̄ēnga mondmēna chē n̄ye sempre cmondbétsamēndayēnga y chē sjojónana chē pueblent̄sa mandadēngbioye cmondbáunatsēnga. ⁷ Y cach bomn̄ēngnaca mondmēna chē Cristbiana podescá oyebuambnayēnga, ndábenga t̄sēngaftanga šmondmēna, y chabe uabaina t̄sēngaftangbiana puerte enduámana.

⁸ Bēngbe Bētsabe uabemana palabrenguiñe mēnt̄sá endayana: “Ndēmua entsánaca cochtsebobonshana nt̄samo cach aca cuenobobonshancá ca.” T̄sēngaftanga nt̄samo chē Bēngbe Utabnabe mandiñe endayancá ndegombre šmojtsamēse, t̄sabá šmochántsama. ⁹ Pero t̄sēngaftanga ndoñe cachcá šmontsenon̄yase, chcana bacna soye jtsamana y šmojama nt̄samo Bēngbe Bētsabe leyēnguiñe ndoñe yondēlesenciancá. ¹⁰ Y mora, can̄ye entsá n̄yetsca chē leyent̄sa mandēnga tojtsobedecena, pero ndoñe tontsama nt̄samo n̄ye mo can̄ye mando nt̄samo iuayancá, cha Bēngbe Bētsabiana jtsemnana can̄ya nt̄samo n̄yetsca chē leyent̄sa mandēnguiñe ndoñe yondēlesenciancá amá. ¹¹ Cach Bēngbe Bētsá, chē “acbe shema o boyábioye ín̄yaftaca ndoñe cattseíngñaye ca” tojanayaná, cachá mēnt̄sánaca tojánayana, “ín̄yabioye ndoñe catjóba ca”. Chca, nda cachabe shēmbioye ín̄yaftaca ndoñe tbonjaingñé, pero aíñe ín̄yabioye tbojóba, chca, Bēngbe Bētsabiana cha jtsemnana can̄ya n̄yetsca chē leyent̄sa mandēnga ndocumpliná.

¹² T̄sēngaftanga cmontsamna jtsóyebuambnayana y jtsamana ndayá Cristo šojanamēndacá, atsebacana entsangcá, er Bēngbe Bētsá echanjayana nt̄samo tmojamcá aíñe o ndoñe t̄sabá bétsemnama. ¹³ Er chē ín̄yengbiana ndoñe ngmēnana bomn̄ēngbiana, Bēngbe Bētsá ntjongmiacá echanjayana nt̄samo tmojamcá aíñe o ndoñe t̄sabá bétsemnama; pero chē ín̄yengbiana aíñe ngmēnana bomn̄ēngbiana, nt̄samo tmojamcá aíñe o ndoñe t̄sabá bétsemnama Bēngbe Bētsá chaojayana ora, chēnga t̄sabá chent̄sana mochanjábocana.

Chē ndegombre ošbuáchiyana, soyēngaca jin̄yan̄iyana

¹⁴ Atsbe cat̄sátanga, ¿ndayama cán̄yabioye buanjoser̄via jayanana aíñe Jesucrist̄beñe sēntsošbuaché ca, pero cha ín̄yengbiana t̄sabe soyēnga ndoñe tontsama, y chca, nt̄samo cha tojtsamcá ndoñe tontsin̄yan̄ná cha Jesucrist̄beñe yošbuáchema? Ndegombre, cha n̄ye chca tojtsichámēse, ndoñe n̄sopodénana cha atsbocaná chaotsemnama. ¹⁵ Nderado can̄ye boyabása o shembása ošbuachiyá entsayá tbojtsabuáshbena y saná chē te jasámnaca tbojtsebuáshbena, ¹⁶ y can̄ya t̄sēngaftanguent̄sá tbojauyana: “Diošoftá, sēsnama ndoñe chacond̄t̄sepadecena y becá chacuatoshachá ca”, pero chca chaotsemnama chábioye tondaye tbonjat̄setase, ¿ndayama nantsoservena chca

jayanana? ¹⁷ Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinÿanÿiyama, nÿe chca ošbuáchiyana jtsebomnana tondayama ntoservénana.

¹⁸ Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiana tšabe soyënga sentsama ca.” Chora atše stjojuá: “Sminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché nÿe canÿe Bëngbe Bëtsá yomnama y chca tšabá contsama; pero chë bacna bayëjëgnaca chiñe jtsošbuáchiyana, y chë causa chënga uatjana jtsebomnama y jtsangmëmnyana. ²⁰ Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsošbuaché, pero tondaye tontsama chca chaotsinÿnama, chabe ošbuáchiyana tondayama ntoservénana. ²¹ Bëngbe Bëtsá tojánayana chabe bominÿiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. ²² Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿnama; y ndayá cha tojanmama entsinÿinÿena, cha ndegombre puerte bëtscá yojanošbuáchema. ²³ Chca tojanopasá ntšamo Bëngbe Bëtsabe uabemana palabrenguiñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

²⁴ Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿnama, y ndoñe nÿe ošbuáchiyana tojtsebomnama. ²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanëyentsame, y chentšana tojanëjabuache inÿe benachëjana chamuáisebocanama, chë pueblentša soldadëngbiana chamotsachetama. ²⁶ Lempe básefta palabrenguiñe jayanamna mëntšá entsemna: ntšamo canÿe cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinÿnama, tondayama ntoservénana.

3

Bichtájaca tšabá jóyebuambayama endmëna

¹ Jesucristbeyeca atšbe catsátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entšanga abuátambayëngbiana, chë castigo más bëtscá yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aíñe o ndoñe tšabá bëtsemnama cha chaojayana ora. ² Bënga nÿetscanga nÿetsca bacna soyënga mondbëtsama. Nderado nda oyebuambnayañe ni mo canÿe bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtsenomándayama.

³ Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nÿets chëngbe cuérpoca tmojtsamcá jtsemándayana, y ndoñe nÿe chëngbe bestšaše. ⁴ Barquëshamnaca šmochjenójuaboye. Masque tša bëtsëtsacuemëngá y tša jabuache binÿiënga chë barco jtsëjuatsëntšnayana, chë uamanëjayënga chë barco juyambana ndayëjana tmojtsebošcá, y chca, nÿe canÿe base soyetëmaca,

timón ca uabainētémaca. ⁵ Cachcá, chë bichtaja cuerpiñe canye base soyetema endmëna, pero chë bichtájaca entsanga jtsenábotamnayana bëts soyënga tmojamama. Smochjouena, canye base íñeshe jtsobenana canye bëts tjañe juangbotjuama. ⁶ Y chë bichtaja endmëna mo canye íñeshcá, mo canye luare ndayentse puerte bacna soyënga tobinýncá. Chë bichtaja jtsobenana bëngbe cuerpentse puerte bacna soyënga bëngbiamama jamama. Mo canye íñeshe becá tojtsendbiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiamama jamama nyets tempo quem luarentse tmuetsiyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaotsamama.

⁷ Entšá endobena jtsamëndayana nyetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda; ⁸ pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauétsebinýnama, y mo canye mëtšcuaycá veneno jtsebomnana jóbama, chë bichtájaca cachcá endmëna. ⁹ Bichtájaca bënga puerte tšabá Bëngbe Bëtsá y Taitabiamama jtsichámuana, y cach bichtájaca bënga puerte bacá entsangbiamama mondbëtsichamo, masque Bëngbe Bëtsá cachacá enoparecënga chënga tojábiamama. ¹⁰ Cach uayásentsana jtsóbocanana Bëngbe Bëtsabiamama tšabe palabrënga y entsangbiamama bacna palabrënga. Jesucristbeyeca atšbe catšátanga, chca ndoñe chaondëtsemna. ¹¹ Canye bëjaye obocanentsana ndoñe ntsopodénana tšabe býyeshe chaóbocnama y cachentsana untja býyeshnaca. ¹² Ntšamo canye higo betiyentsana ndoñe ntsopodénana olivosëšënga jashacama, y canye uvas betiyentsana ndoñe ntsopodénana higuëbënga jashacama, cachcá, atšbe catšátanga, tamona býyeshentsana ndoñe ntsopodénana tšabe býyeshë chaóbocnama.

Bëngbe Bëtsábiocana óbocana osertánana

¹³ Nderado tšëngaftanguentse tojtsemna canye puerte tatsëmbuá y osertaná, cha bontsemna, chca yomnama entsanga jinýanyiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. ¹⁴ Pero tšëngaftangbe ainaniñe yapa ínýabioye šmojtsántšaboše y nye ínýënga chamotjáyana soyënga šmojtsama, as ndoñe šmattsenábotamnaye osertánënga y tšábënga šmomnana, er ndegombre Bëngbe Bëtsabe osertánana tšëngaftanga ndoñe šmontsebomna. ¹⁵ Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnayëngbentsana, nye entsangbe juabnentsana, y canye bacna bayëjbentsana. ¹⁶ Ndayentse entsanga yapa tmojtsenántšaboše, y nye ínýënga chamotjáyana soyënga tmojtsama, chentse tondayama quemochátenëyeunana y nyetsca bacna soyënga mochántsama.

¹⁷ Pero chë Bëngbe Bëtsábiocana óbocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínýënga ndoñe chamondëtsentsjanama amënga, tšábënga y sempre jtseprontánana ínýënga joyaunayama. Y cach quemënga jtsemnana ínýëngbiamama ngmënanama bomnënga, sempre tšabe soyënga jtsamana, cachcá nyetsca entsangbioye jtsénýayana, y ntšamo ndegombre tojtsemncá jtsichámuana y jtsamana. ¹⁸ Ntšamo canye jená, botamana shajuana jtsebomnana tšabe jénaye jájena, cachcá, sempre natjëmbana jtsiyenama bošëngna, natjëmbana ínýëngaftaca jtsiyenana, chca, nyetsca entsanga chamotsamama ntšamo Bëngbe Bëtsabe bominiñe tšabá yomncá.

4

Smochtsiyena Bëngbe Bëtsá tsëngaftangbeñe jtsemándayëse

¹ ¿Ndayentsana chë tsëngaftanga jtsentsjanayama y jtsepenzentsiyama yóbocana? Endóbocana chë tsëngaftangbe bacna juabnënguentsana, nÿe cach tsëngaftanga tsabá jtsonñama; y chë soyënga tsëngaftangbe ainaniñe sempre chë tsabe juabnëngama contra jésemnana. ² Tsëngaftanga ndayánaca jtsebomnama smojtseboše, pero chca jtsebomnama ndoñe smontsobena, as jtseprontánana ínÿengbioye jtsëbáyama. Inÿa ntšamo tobomncá tsëngaftanga tša jtsántšabošana, y chë soye jashjáchama ndoñe smontsobena ora, ínÿengaftaca jentjayanangana y jtsepenzentsiyana. Ntšamo smojtsebošcá ndoñe ntjobenayana jtsebomnama, Bëngbe Bëtsá chama ndoñe smondbotjañe causa; ³ y chë soye smojotjañe ora, tsëngaftanga ndoñe ntjójyëngacñana, ndoñe botamana chë soye smondbotjañe causa, er tsëngaftanga chë soye jtsebošana nÿe chaoservema oyejuayënga bacna soyënguiñe jtsonñama.

⁴ ¡Tsëngaftanga, Bëngbe Bëtsá bobonshánana smojtsajbananga! ¿Ndoñe smondétatsëmbo, chë jtsebošana nÿe quem luarama enójuabnayëngbe amigo jtsemnama y nÿe quem luarentša soyënga jtsebomnama, chca, canÿe entsá Bëngbe Bëtsabe uayayá jtsemnana? Ndánaca tojajuabó nÿe quem luarama enójuabnayëngbe amigo jtsemnama, chca, canÿe Bëngbe Bëtsábioye uayayá jóbemana. ⁵ Ndoñe nÿe bonamente Bëngbe Bëtsabe uabemana palabrenguiñe mëntsá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espíritu, puerte entseboše nÿe Bëngbe Bëtsá canÿa bëngbe amëndayá chaotsemnama ca.” ⁶ Pero Bëngbe Bëtsá, bëngbe tsabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrenguiñe mëntsá endayana:

Bëngbe Bëtsá chë nÿe cachënga uámanënga tmojtse nobiamnangbe contra entsemna,
y chë ndoñe uámanënga montsenobiamnangbiamna, Bëngbe Bëtsá más tsabe juabna entsebomna ca.

⁷ Asna, tsëngaftanga smochtseprontana nÿe Bëngbe Bëtsá chacmot-samëndama; ntšamo Satanás tcmojtsamëndacá ndoñe smattsama, y cha cachora tsëngaftangbentsana echantsachá. ⁸ Bëngbe Bëtsábioye smochtobeconá, y cha echanjama tsëngaftanga ntšamo cha yomnama chacmotsësertánama. Tsëngaftanga bacna soye amënga, cach tsëngaftangbe cucuatšëngaca tsabe soyënga smochtsama, bacna soyënga ndoñe. Tsëngaftanga chë inÿe ora jtsejuabnayana Bëngbe Bëtsá jtsebobonshánama, y inÿe orna, nÿe quem luarentša soyënga jtsebomnama, smochtsajbaná bacna soyënga jamama bošana, chca, nÿe tsabe juabnënga tsëngaftangbe ainaniñe chašmotsebomnama. ⁹ Tsëngaftangbe bacna soyëngama ngménaca smochtsemna, smochjenóbošachna y cochtsetšenánënga smochjójyëbuambaye. Jatenbiajuayamna, smochjenóbošachna; y joyejuayëngamna, ngménaca smochtsemna. ¹⁰ Bëngbe Bëtsabe delante bëtsëtsanga ndoñe smattsenobiamnaye, y cha más uámanënga cmochanjábiamna.

Inÿengbiamna ndoñe ntsichámuana ndoñe tsabá tmonjama ca

¹¹ Jesucrístbeyeca catšátanga, ínÿengbiamna bacna soyënga ndoñe smattsójyëbuambnaye. Nda cachabe catšatbiamna bacna soye tojtsichamo o tojayana ntšamo cha tojamcá ndoñe tsabá yontsemna ca, cha chora chë leyentša mandënga ndoñe ntso cumplínana y jtsichámuana chë leyentša mandënga tondayama yontsoservena ca. Y chë leyama chca tcojtsichámëse, cach ley jocúmplia cuenta, contsobiamná canÿe ichamuá chë ley aíñe o ndoñe yondoservénama, y chca ndoñe quecmátsmëna jtsamana. ¹² Chë ley

tojuapormá cha nÿe canÿa endmëna, Bëngbe Bëtsá, y cachá endmëna ntšamo entsanga tmojamcá aíñe o ndoñe tšabá bëtsemnana ichamuá, y cachánaca entsobena entsanga játsebacama o nÿetsca tescama jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bëtsemnana?

Ndayá yëfse yochjatëchnënguama ndoñe ntsótatsëmbuana

¹³ Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëts puebløye fchanjanga, y chentše canÿe uata fchanjëftsemna ba soyënguiñe trabájayiñe, y ndegombre becá fchanjónÿena ca.” ¹⁴ ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmna, y chca, tšëngaftanga šmondmëna mo canÿe jantšetëshcá, chëshe mora jónÿnana y nÿe ndeolpe jatenatjëmbana. Tšëngaftangaftaca cachcá echanjopása. ¹⁵ Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” ¹⁶ Pero chë cuenta, tšëngaftanga bëts soyënga šmochjamama sempre jtsenábotamnayana, ndayá tšëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna. ¹⁷ Nda tojtsobena ntšamo tšabá yomncá jamama, pero ndoñe chca tonjama, cha canÿe bacna soye jtsamana.

5

Chë bomnënga jábuayenama

¹ ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrínama šmochjenóbošachna y uatjananënga šmochtseyoye! ² Tšëngaftangbe bomnana buajónana janguánana entsemna, tondayama quenátoservena, y chë entsayëjuangá mejëjonga montsasá. ³ Tšëngaftangbe castellano y midio tojtsengúsheshe; y chë ngúsheshna echántsinÿinÿnaye tšëngaftanga chë crocenánaca ndoñe šmonjanmama ntšamo ínÿenga jujabuáchama yojamncá; chë causa, nÿetsca tescama cmochántsapochocaye, ntšamo chë íñeshe canÿe soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. ⁴ Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. ⁵ Quem luarentše tšëngaftanga šmondoyena ba botamana soyëngaca y nÿe ntšamo cach tšëngaftanga šmobošcá jtsamëse. Ntšamo canÿe uacná jóbana, minÿicá tojtsemna ora, cachcá tšëngaftangbiana entsobeco chë te, ndaye ora Bëngbe Bëtsá echanjama castigánënga chašmotsemnana, er puerta bacna soyënga šmojama. ¡Chë castigo jtsebínÿnama tempo ya entsobeco! ⁶ Tšëngaftanga, chë puerta tšabá amëngbiana šmojayana jóbana yojtsamna ca y šmojtsëbaye, chca ndoñe chaondëtsemnana chënga ndocá jamama ntsobercá.

Chë uantado jtsemnana y chë Bëngbe Bëtsáftaca jencuéntama ora

⁷ Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. ⁸ Tšëngaftángnaca uantadënga

šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catsátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tšëngaftangbiana ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aiñe o ndoñe tšabá bétsemnama, ya entsebeconá. ¹⁰ Atšbe catsátanga, chë tempsquënga Bëngbe Bëtsabe juabna oyeuambnayënga, ndëmuanÿenga entšanga tmonjanabuayená Bëngbe Utabná jótšëmbonëse, chënga bëngbioye šonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana. ¹¹ Bënga chëngbiana fsëndbétsejuabnaye oyejuayënga imojamna ca, chë tmojansufrí ora Bëngbe Bëtsabeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsabeñe yojanobátmana, puerte padecena soyënguiñe yojasufrina ora; y šmondétatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiana puerte ngmená yómnayeca.

¹² Pero masna, atšbe catsátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tšëngaftanga aiñe ca jayanama šmojtsebošëse, nÿe aiñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

¹³ Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtšchuayama. ¹⁴ Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtsëjemëngcá amëndayënga jáchembuana, chënga Bëngbe Bëtsá chabiana chamoimpadama, y Bëngbe Utabná jótšëmbonëse aceitiye chamuanëtjuama. ¹⁵ Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. ¹⁶ Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiana šmochtseimpadana, chca, tšabá mo shnanëngcá chašmotsemnama. Canÿa ndabiana Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jójëngacñana, y jobenayana bëts soyënga jamama. ¹⁷ Bëngbe Bëtsabe juabna oyeuambnayá Elías, mo cach bëngcá canÿe entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté. ¹⁸ Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinÿna.

¹⁹ Atšbe catsátanga, nderado nda tšëngaftanguentšá tojtsajbaná chë ndegombre soyënga jtsamana, pero inÿa chábioye tbojuájabuache cachiñe chë tšabe benache cháuatishachama, ²⁰ tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nÿetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sentsabiamná chë cachëngbe luarentše ndoñe mondoyenëngbiana, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiana.

² Sentsabiamná chë Bëngbe Bëtsá Bëngbe Taitá tojánabacacangbiana, ntšamo cachá jamama yojanjuabnacá y ntšamo jopásama yojantatsëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënama, bacna soyënga abujuanënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

Bëngbe Bëtsábeñe jtsošbuáchiyëse vida jtsebonnama, atsebácanënga jtsemnama

³ Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínÿengaftaca yómnyayeca, tojanma bënga tsëm juábnaca vida chamotsebonnama, bëngbioye bacna soyënga jabuajuánase, Jesucristo cháuatayenama tonjánmayeca. Chiyeca bënga montsobena chábeñe jtsobatmanana sempre y nyetsca tescama, ndayá cha šochjátšatayama.

⁴ Ndayá bënga šochjátšataycá ndoñe quenátsmëna jëftsopochócama opodena soyënga, ndayá nyets tempo tšabe soyënga. Y bënga mondobátmana jójyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiana cha yojtsinÿena. ⁵ Chë soyënga tšëngaftangbiana entsemna, Bëngbe Bëtsábeñe šmošbuáchema; cha chabe obenánaca cmondánÿena, tšëngaftanga jätsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

⁶ Chiyeca tšëngaftanga tša oyejuayënga šmojtsemna, masque nderado jtseytana inÿe ora, nyetsca padecena soyënguiñe jasúfriase chašmuachnënguama. ⁷ Mo chë castellanama jtsetatsëmbuama aiñe o ndoñe tšabe castellano tomnama iñiñe fjuchnëngcá, padecena soyënguiñe tšabá chašmojachnënguse, Bëngbe Bëtsá echanjínÿanÿiye tšëngaftanga ndegombre taišmošbuáchema. Chë castellano pronto endbetsopochóca, masque chca, chana puerte endbetsámana. Y tšëngaftangbe ošbuáchiyana chë castellanama puerte más enduámana. Tšëngaftanga padecena soyënguentšana bëts ošbuachiyánaca chašmojábocnëse, Jesucristo chaojésabo ora, entšanga mochanjinÿe tšëngaftanga šmojtsomerecena chacmotsatacheuanama, más bëtsëtsanga y obenënga chácmbiamama y uámanëngnaca.

⁸ Tšëngaftanga Jesucristo šmondobonshana, y chábioye ndoñe chešmátaninÿe; masque mora cha ndoñe quešmatonÿá, tšëngaftanga chábeñe šmontsošbuaché, y šmontsebonna canÿe puerte tšabe oyejuayana, y ntsachetšá chana yomnana ndoñe quešmátobena jayanama, tša bëtscá causa. ⁹ Chca oyejuayana tšëngaftanga šmontsebonna, er ndayá tšëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacayana.

¹⁰ Bëngbe Bëtsabe juabna oyebuambnayënga ya imojanatsjendá y imojan-guá jtsetatsëmbuama, ntšamo Bëngbe Bëtsá entsanga játsebacama, y tmojanoyebuambá ndayá Bëngbe Bëtsá tsëngaftanga jatsatayama, tsëngaftangbiamá tsábe juabna cha yobómnayeca. ¹¹ Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatsëmbuama chë soyënga yochjanopása ora, ndaye tempo y ntšamo chë tempo yochtsemnama. ¹² Pero tempo Bëngbe Bëtsá chëngbioye tojaninñanyé, chca jtsamana ndoñe cachëngbe tsábiamá yonjamnama, ndayá chca jtsamana yojamna tsëngaftangbe tsábiamá. Chënga tmojanoyebuambá, ntšamo chë tsábe noticiënga oyebuambnayënga tsëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsabá jinñyama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

¹³ Chíyeca, botamana jtsejuabnayëse tsabá jatrabájama, y cach tsëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjatsatayama tsëngaftangbe tsábiamá jtsejuabnayëse, Jesucristo quem luaroye yochjésabo ora. ¹⁴ Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnënga yomncá nñe tsabá jtsomñama, ntšamo Bëngbe Bëtsábioye cabá nduabu-atma ora šmonjanbomncá. ¹⁵ Chamna, šmochtsiyena mo chë Bëngbe Bëtsabe entsangcá, puerte tsábe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. ¹⁶ Er Bëngbe Bëtsabe uabemana palabrenguiñe mëntsá endayana: “Tsëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

¹⁷ Tsëngaftanga Bëngbe Bëtsábioye šmondbuyana “Taita ca”, šmondbótsëmbona ora. Bëngbe Bëtsábiamá nñetscanga cachcá mondmëna. Chíyeca, ntšamo nñetscanga tmojamama tsabá o ndoñe tsabá yontsemna ca cha yochjayana ora, cha chca echanjama nñe ntšamo chënga tmojamcá jtsonñayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nñetscangbiamá más bëtsá yomnama, chë šmojtsama sóyeca chca jtsinñanyayëse. ¹⁸ Tsëngaftanga šmondétatsëmbo, Jesucristo, mo nda ínñengbioye játsebacama crocénana cuafjëtsajocá, tonjanóbana tsëngaftanga játsebacama, chë nñetsca soyënga nñe bonamente jtsamëse oyenentšana, ntšamo jtsiyenama tsëngaftangbe bëts taitángbentsana šmojanatsjinñycá. Cristo ndoñe checmatanatsebacá, yopodena jtsopochócama soyënga jëtsjájuaše, mo crocénana o castellancá, ¹⁹ ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canñe oveshatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná. ²⁰ Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entsángbeñe tonjábocna tsëngaftangbe tsábiamá. ²¹ Crístbeyeca, tsëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntsá, ndábeñe tsëngaftanga šmošbuaché y šmobátmana, Bëngbe Bëtsábeñe endmëna.

²² Tsëngaftanga šmojama ndocna bacna soyënga ainaniñe ntsebomnama, Jesucristbeyeca catšátangbioye ndegombre jtsababuánñeshanama, er tsëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna,

sempe n̄yets ainánaca n̄yetscanga šmochtsenbobonshana. ²³ Bēngbe Bētsá tojama tšēngaftanga tsēm vida chašmotsebmoma; pero tšēngaftanga tsēm vida šmontsebmoma, ndoñe n̄ye quem luarentša entšanga ndayá tojamama, sinó ndayá Bēngbe Bētsá chē ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebmoma y chē palabra ndocna te queochaisopochóca. ²⁴ Ntšamo Bēngbe Bētsabe uabemana palabrēnguiñe endayancá:

N̄yetsca entšanga mondmēna mo shacuancá,
y chēnga imobomna tšabe soyēnga, endmēna mo chē shacuanentša uantšefjushangacá.

Chē shácuana jtsanctana y chē uantšefjushangá jtsatquécjanana;
entšanga cachcá, n̄yets tempo quem luarentše ndoñe quemochátiyena;

²⁵ pero Bēngbe Bētsabe palabra n̄yets tempo echanjesomñe ca —chiñe endayana.

Y chē palabra endmēna chē Jesucristbe tšabe noticiēnga, chē buayenánana ntšamo ín̄yēnga tcmojabuayenacá.

2

¹ Chcáyecna, n̄yetsca tescama šmochtsajbaná n̄yetsca bacna soyēnga amana, ín̄yēngbioye áingñayana, bacna entšanga chē ntšamo ndegombre šmojuabnacá ndin̄yín̄yayēnga ntsemnana, ín̄yēngbioye untšabošana, y ín̄yēngbiama uayátsenayana. ² Mo cabá mora on̄ynana šešoncá, tša jtsebošana chabe mamabe létšiyē, cachcá tšēngaftanga cmontsamna puerte jtsebošana n̄yets tempo Bēngbe Bētsabe soyēnga jtsebmoma, chē soyēngaca Jesucristbeñe corente chašmotsošbuáchema, y chca, atsebácanēnga chašmotsemnana; ³ ntšamo Bēngbe Bētsabe uabemana palabrēnguiñe endayancá: “Tšēngaftanga šmojátatšēmbona Bēngbe Utabná puerte tšabia n̄yetscángaftaca yomnana ca.”

Cristo, chē mo aina ndētšbecá endmēná

⁴ Bēngbe Utabnábioye šmochtoconá, nda endmēna mo can̄ye aina ndētšbecá, ndēmuan̄yēse tojtsama entšanga tšabe vida chamotsebmoma. Báseftanga cha tmojtsaboté, mo ntšamo chē ndētšbéngaca can̄ye yebna tmojtsejebuana ora, luaroca tmojtsejajó ndētšbecá; pero Bēngbe Bētsá chábioye tbojuábuayana, y chabe bomin̄yīñe cha puerte uamaná endmēna.

⁵ Chábioye šmochtoconá, tšēngaftanga chē tšabe vida šmojóyēngacñēnga, cán̄yīñe mo aina ndētšbéngcá, Bēngbe Bētsabiama jajebuama can̄ye yebnentšama chašmotsemnana; mo Bēngbe Bētsabiama bachnangcá chašmotsemnana, n̄ye Bēngbe Bētsábioye jtseservénama jtsentšénēse, chábioye jtsatschuanayama. Ntšamo Bēngbe Bētsábioye jtseservénama šmojtsamcá, chábioye tšabá jtsin̄yanana, ndayá Jesucristo tojanmama. ⁶ Chca ndegombre endmēna, er Bēngbe Bētsabe uabemana palabrēnguiñe, Bēngbe Bētsá Jesucristbiama mēntšá tojánayana:

Smochjin̄yē, atše sēnjama Jerusalenentše can̄ya chaotsemna,
y cha endmēna mo chē can̄ye yebna jajebuámentše chē más bēts uashacuanēsentše jajona ndētšbecá.

Cha atšbe Uabuayaná endmēna, y atšbiama puerte enduámana.

Nda chábeñe tojtsošbuaché, ndocna te n̄ye bonamente chábeñe queochátobatmana ca.

⁷ Tšēngaftanga, chábeñe ošbuáchiyēngbiama, nda endmēna mo chē yebna jajebuámentše más bēts uashacuanēsentše jajona ndētšbecá, cha puerte enduámana; pero chábeñe ndošbuáchiyēngbiama, entsopasana ntšamo Bēngbe Bētsabe uabemana palabrēnguiñe Cristbiama endayancá:

Chë yebna jebuanënga tmontsanaboté ndëtšbé,
mora chë más bëts uashacuanëšentše entsejájona ca.

⁸ Inyoca, Bëngbe Bëtsabe uabemana palabrënguiñe mëntsánaca chabiama en-
dayana:

Cha endmëna mo ndëtšbé ndayentše jtsojestjiyamcá;
y mo peñëscá yomna chënga chamotsótsatsáma ca.

Chënga Jesucristo jtsabotena, chabe buayenánana ndoñe ntjoyeunaycá;
Bëngbe Bëtsá cabá chca ndopása ora tojanjuabó chca chaotsemnama.

⁹ Pero tšëngaftanga šmondmëna Bëngbe Bëtsábeyeca bocacánënga, y mo
canye rey tmojtserverna bachnangcá, y šmondmëna Bëngbe Bëtsabe
entšanga nye chabiama jtsetrabájayama, y chë nye Bëngbe Bëtsábenga
šmognënga. Y chca endmëna, tšëngaftanga chë bëts soyënga ntšamo Bëngbe
Bëtsá tojamcá chašmotsabuayiynama. Cha endmëna nda tcmojáchembo
chašmotsajbanama oyenana mo ndoñe binýniñcá jtsejuabnayëse y jtsamëse,
cháftaca jtsemnama chašmotsobenama, chë tšëngaftangbe juabnënga puerte
binýnayáftaca. ¹⁰ Tempo tšëngaftanga ni mo cánýentša entšangcá ndoñe
quešmënjatsmëna, nye ujquëshenënga; pero mora, Bëngbe Bëtsabe entšanga
šmontsemna; tempo šmonjamna entšanga ndocná tonjánalastemanga, pero
mora, Bëngbe Bëtsá aíñe lastemado tšëngaftangaftaca entsemna.

Bëngbe Bëtsá jtservernana jtsiyenana

¹¹ Atšbe bonshánënga, ndayentše tšëngaftangbe ndegombre luare yomna,
celoca endmëna, y muentše quem luarentše, tšëngaftanga šmondmëna
mo ínýoicana ashjajnëngcá, y mo canye luarëjana nye achñëjuanëngcá,
cach tšëngaftangbe luaroye átaiñe. Chiyeca cbontsaimpadana, ndoñe
chašmondëtsama soyënga ntšamo chë šmobomna bacna juabnënga
tomncá, ainaniñe bacna soyënga bomna causa; chca juabnënga ainaniñe
jtsenpenzétsiyana, chentše jtsemándayama y Uámana Espíritu ndoñe
chaondëtsemándama. ¹² Chë Bëngbe Bëtsábioye nduabuatmëngbeñe sempre
šmochtsiyena tšabá jtsamëse; chca chënga, masque mora tšëngaftangbe
contra imojtsoyebuambná, tšëngaftanga mo bacá uamana entšanga
cuaftsemnëngcá, chë tšabe soyënga ntšamo tšëngaftanga šmojtsamcá
chamuinyama, y chca, Bëngbe Bëtsá chëngbioye chaojenonýinýe te, chábioye
chënga chamotsatschuanama.

¹³ Bëngbe Bëtsá šmoyeunanama, nyetsca entšanga mando bomnëngbioye
šmochtsobedecena; chë Romoca bëts mandádbioye, cha chë quem luarentša
más uámana puesto jtsemándayama endbómnyayeca; ¹⁴ y chë tšëngaftangbeñe
mandadëngbióynaca, ndëmuanýënga cha jíchamuana chë bacna soyënga
amënga jácastigama, y chë tšabe soyënga amëngbiama tšabá imojtsama ca
chamuayanama. ¹⁵ Chë mando bomnëngbioye šmochtsobedecena, er
Bëngbe Bëtsá endboše tšëngaftanga tšabe soyënga chašmotsamama, chca, chë
ndosertánënga chë tšëngaftangbiama podësca ichámënga, ntšamo ndegombre
yomncá ntsetatšëmbcá, tondaye chamondëtsebomna tšëngaftangbe contra
jayanama.

¹⁶ Šmochtsiyena tšabá jtsamëse, mo chë ya ndoñe más bacna soyëngaca
y bacna juabnëngaca ndëmandanëngcá; pero chca šmojtsemnama ndoñe
šmattsejuabnaye nye ndaye bacna soye jamama šmojtsobena ca, y nye
chca šmochjátama. Más tšabá endmëna jtsiyenana, mo chë Bëngbe Bëtsá
imoservenëngcá. ¹⁷ Nyetscangbiama respeto šmochtsobomna, chë Jesu-
crístbeyeca catšátangbioye šmochtsababuánýëshana, sempre šmochtsiyena
Bëngbe Bëtsabiama jtsejuabnayëse cha chë más bëtsá yomnama, y chë Romoca
bëts mandado šmochtsesrespetana.

Cristo chabe entsanga tojinjanýé ntšamo yomna jasúfriana

¹⁸ Tšëngaftanga, chë nyets tempo ínÿabiana canýe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiama jtsebomnése; y ndoñe nýe chë tšábëngbioye y nýe tšabá mandbomnéngbioye, ndayá chë bacá mandbomnéngbioynaca. ¹⁹ Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinýanana. ²⁰ Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinýanana. ²¹ Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiama tonjansufrí, y chca cha tcmonjaninýanýé, ntšamo jamama cmojtsamna, tšëngaftanga chca chašmotsamama. ²² Cristo ndocna te ndocna bacna soye chenáisea, ni ndocnábioye chebnaiseingñé. ²³ Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyetscanga tmojamama tšabá o ndoñe tšabá yonjamna ca yochjayana ora, chca echanjama nýe ntšamo chënga tmojamcá jtsonýayëse. ²⁴ Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. ²⁵ Er tšëngaftanga, tempo Bëngbe Bëtsábentšana bënoca šmonjamna, mo ótšena oveshëngcá; pero mora Cristbe benache šmojtishache, y cha cmontsanýena, mo oveshëngbe canýe abujenýacá, y cha entsantješna tšëngaftanga tšabá chašmotsemnama.

3

Ntšamo iuamna chë bouamnëngbioye jtsiyenana

¹ Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñjanama, Jesucristbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana, ² er chënga mochanjinýe tšëngaftanga šmojtsiyena, Bëngbe Bëtsá nyetscangbiama más bëtsá yomnama sempre jtsejuabnaye, y ntšamo šmojtsamcá chca yojtsinýinýayeca. ³ Cach tšëngaftangbiama ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nýa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; ⁴ ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnése ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nýe cach tšëngaftanga uámanënga jenobiamama juabnënga ntsebomncá, pero aiñe ainaniñe tšabe ebionana jtsebomnése. Chë soyënga Bëngbe Bëtsabe bominiñe puerte enduámama. ⁵ Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsábeñe imojtsanošbuaché y

chábeñe imojanobátmana, y nyetscanga chëngbe boyángbioye imojánayaunana. ⁶ Chca yojamna Sara, Abrahámbioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebomnëse.

⁷ Cachcá, tšëngaftanga boyanga, cada ona cachabe shémaftaca chaotsiyena, tšabá jtsenëyeunanëse, y cha respeto buajoná chaotsemnana jtsamëse; pero chca, ndoñe nÿe cha acbiamá más batšá obenana bomná bétsemnana, ndayá Bëngbe Bëtsá chabiamá tšabe juabna yobómnyeyeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnana.

Chë tšabe soyënga amama jasúfriama yojtsamnënga

⁸ Y morna, nyetsca tšëngaftanga cachcá šmochtsejuabnaye, ínÿenga šmochtsalastemana, chë Jesucristbeyeca catšátangbioye šmochtsababuánÿeshana, ínÿengbiamá chacmóngmiaye, y cada ona chaotsejuabná chë ínÿenga chabiamá más uámanënga imomna ca. ⁹ Inÿenga tšëngaftangbiamá ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábiocana tšabe bendicionënga chašmoháchiñama. ¹⁰ Ntšamo Bëngbe Bëtsabe uabemana palabrengüiñe endayancá:

Nda toboše tšabe vida jëftsebomnana y puerte oyejuayá tempënga jtsebomnana, yejuana chaochtsenojuabná bacna soyëngama ndoñe chaondëtsóyebuambnana, y ndoñe chaondëtseboosterama.

¹¹ Bacna soyënguentsána chaotsojuánañe y tšabe soyënga chaotsama, natjëmbana nyetscángaftaca jtsiyenama chaotseboše, y chca chaotsemnana sempre chaotsentšena.

¹² Chca bontsemna jamana, er Bëngbe Utabná, chabe bominÿiñe tšabe soyënga amëngbioye jtsanÿenana, chëngbiamá sempre jtsantješñëse; y sempre chëngbioye jtsayaunanana, chábioye ndayámnaca tmojtsotjanañe ora; pero chë bacna soyënga jamana uamanëngbe contra cha jtsemnana ca — chiñe endayana.

¹³ ¿Nda nanjobenaye tšëngaftangbiamá bacna soyënga jamama, tšëngaftanga chë tšabe soyënga jamama siempre šmojtsentšënëse? ¹⁴ Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatsataye. Chë tšëngaftanga chašmosufrima amëngbiamá ndoñe matauatjëngana, ni ainana tsetšenánënga ndoñe matsmënëngana, ¹⁵ ndayá ainaniñe siempre šmochtsejuabnaye Cristbiamá mo Bëngbe Utabnacá y chabiamá respeto šmochtsebomna; y siempre šmochtseprontana jojuama ndëmuanÿenga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiamá ainaniñe šmobátmanama. ¹⁶ Pero chca šmochjama tšabe ainánaca jtsënÿayëse y Bëngbe Bëtsabiamá respeto jtsebomnëse. Smochtsiyena tšabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmochtsama ca, chca, ínÿenga tšëngaftangbiamá podesca chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnana.

¹⁷ Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošëse, y ndoñe chë jasúfriana ndaye bacna soye tcojamama. ¹⁸ Er Cristo nÿe canÿe tonjanóbana bënga bacna soyëngama jáperdonama; chë nÿetsca soyënguiñe tšabá amá, chë Bëngbe Bëtsabe bominiñe ndoñe tšabá yondmëna soyënga amëngbiamama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama. ¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiamama castigo tojtsemnëntscuana; y cha tojanayënjanama chënga tojanabuayená. ²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyeca. ²¹ Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnama. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtšenóbolimpimama, ndayá bëngbe ainaniñe ndocna bacna juabnënga ntsebomnama Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. ²² Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiamama y espíritënga mando y obenana bomnëngbiamama.

4

Entšanga entsamna jtsiyenana ntšamo Bëngbe Bëtsá yobošcá

¹ Chcasna, ntšamo Cristo tojansufricá, chabe cuerpiñe mo entšacá játssetšenëse, tšëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, ² chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entšangbe bacna juabnëngaca, nÿe quem luarentše tšabá jëftsemnama. ³ Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjaniyena nÿetsca bacna soyënga jtsamëse, jenomándama ntsoyencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. ⁴ Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntsoyencá; y chë causa, chënga bacna soyënga tšëngaftangbiamama jtsóyebuambnyana. ⁵ Pero chënga echanjótocaye jayanama ndáyeca chca tmojamama, chë entšangbiamama, chë ainënga y chë ya mochjóbanëngbiamama, ntšamo tmojamama, aíñe o ndoñe tšabá bëtsemnama jayanama entseprontanabe delante. ⁶ Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿënga chë tšabe noticiëngama chëngbioye monjanabuayiyiná, chënga chamobenama chë nÿetsca tescama yomna tšabe vida chëngbe espíritoftaca jtsebomnama,

ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nyetsca entsanga yojtsamna jóbanama ca.

⁷ Ndoñe bayté y nyetsca soyënga echanjopochóca. Chíyeca, tsëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama. ⁸ Nyetsca soyëngama, masna, sempre nyetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama. ⁹ Nyetscanga šmochtsamana tsëngaftangbe yebniñe jenofjana, chca jamama totcá yojtsemna ntjatichamcá. ¹⁰ Nyetsca tsëngaftanga Bëngbe Bëtsá tcmojatšatá obenana tsabe soyënga jamama; chca, chë obenánaca cmontsamna jtsamana soyënga chë ínÿengbe tsabiama, chë Bëngbe Bëtsá cmojatšatá nyets obenánaca ínÿengbiocyte jujabuáchama, nyets tempo tsabe soyënga jtsamëse. ¹¹ Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojtsama cha chaotsebonnama obenánaca. Nyetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bétsemnama, Jesucristbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

Puerte tsabá endmëna, Crístbeñe tcošbuáchema, jasúfriama tbojtsemnëse

¹² Atšbe bonshana entsanga, ndoñe šmattsenjnanaye padecena soyënguiñe šmojtsesufrinama; chiñe jtsinÿnana ntsachetšá ošbuáchiyana šmobomnana. Chca ora ndoñe šmattsejuabnaye, tsëngaftanga ndoñe cmondamna chca soyiñe jtsachñëjuanana ca; ¹³ chamna, šmochjóyejuaye chë ntšamo Cristo tojansufricá šmojtsesufrina ora, chca, Cristo corente obenánaca y uamanacá entsángbeñe chaojtonÿná te, tsëngaftanga puerte chašmotsóyejuama. ¹⁴ Puerte šmochtsóyejuaye, nderado nda tcmojoyánguango Cristbiamá bétsoservernayeca, er Bëngbe Bëtsabe Espíritu, chë corente bëtšá endmëná, sempre tsëngaftangbe ainaniñe iuétsemna. ¹⁵ Tsëngaftanguentše ndocná chabondétsemna jasúfriama inÿa óbanaye causa, atbëbanama, bacna soyënga ínÿengbiama amama, o ínÿengbe soyënguiñe ontremeténama. ¹⁶ Pero Cristbe ustoná tomnama tojasufrí, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bétsemnama.

¹⁷ Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiama, chabe entsangbiama, tsabá o ndoñe tsabá tmonjamama. Cha chca bëngbiama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojayana ora. ¹⁸ Y chca, chë Bëngbe Bëtsabe bominÿiñe tsabá amabiama ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? ¹⁹ Chcasna, chë imosufrinëngaftaca Bëngbe Bëtsá chca yobóseyeca, entsamna chë tsabe soyënga jtsamana y Bëngbe Bëtsabe cucuatsiñe chëngbe espíritu chamoboshjona cha chaotsinÿenama, er cha chënga tojánabiama, y nyetsca soyënguiñe tsabe palabra bomná cha endmëna.

5

Crístbeñe ošbuáchiyënga jábuayenama

¹ Y mora, chë tsëngaftangbentše ošbuachiyëngcá enefjuanëngbeñe bëtšëjemëngcá amëndayënga chanjabuayená, atše cach tsëngaftangcá bëtšëjema, canÿa ntšamo Cristo tonjansufricá tonjaninÿá y chama

ínýenga tonjanéyana, y canya ndábioye cach tsëngaftangcá Bëngbe Bëtsá bochjábema más uámana y bëtsá, Cristo entsángbeñe chaojtonýná ora; tsëngaftanga chabuayená. ² Ošbuáchiyënga šmochtsanyëna; chënga chašotsanyënama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canye tšabe abujénýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtsëtocanama, ndayá chca jamama šmojtsebóseyeca. Chca ndoñe šmatjama nýe paselo crocénana juácana, ndayá ínýengbioye jujabuáchama tša šmobóseyeca. ³ Chë cmojtsamna jtsanyënama ošbuáchiyënga ndoñe nýe bëtscá šmattsamëndaye, mo chëngbe nduiñënga cuafjatsmëngcá, ndayá ntšamo tsëngaftanga šmojtšiyënama, chënga šmochjínýanýiye ntšamo yojtsamna jtsiyënama. ⁴ Chca, chë bënga nýetscanga, mo chë tšabe abujénýacá šuanýená, quem luaroye yochjésabo ora, mo canye uabuashinýinýana coronësha ndocna te tontsandbemëshacá, tsëngaftanga canye bëts uacanana soye šmochanjóyëngacñe, y chë soye endmëna nýetsca tescama; Bëngbe Bëtsá uámanënga y bëtsétsanga cmochanjábiana, cháftaca nýets tempo oyejuayënga jtsemnëse.

⁵ Cachcá, tsëngaftanga chë bobontsëngnaca chabuayená, sempre šmochtsejuabnaye chë bëtsëjémënga tsëngaftangbe amëndayënga imomnama, y chca šmochtsama. Cada ona tsëngaftanguentšá bontsemna jtsejuabnayana chë ínýenga tsëngaftangbiana más uámanënga cuaftsemncá, ínýengbioye šmojtsaserverna ora; er ntšamo Bëngbe Bëtsabe uabemana palabrenguiñe endayancá:

Bëngbe Bëtsá chë nýe cachënga uámanënga tmojtsenobiamnangbe contra entsemna,

y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

⁶ Sempre šmochtsejuabnaye Bëngbe Bëtsá chë más bëtsá nýetscangbiana yomnama, y nýets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmbiamama, chama chë tempo chaojobuache ora. ⁷ Nýetsca soyënga ndayama šmuenócochinýënama Bëngbe Bëtsabe cucuatšinë šmochjáboshjona, er cha tsëngaftanga yejuana cmondánýëna.

⁸ Cach tsëngaftanga jenomándama chašmotsobena y sempre šmochtseprontana, er tsëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tsëngaftanga Jesucristbeñe ošbuáchiyana chašmotsajbanama. ⁹ Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tsëngaftangaftaca jamama, cach tsëngaftangcá Jesucristbeñe ošbuáchiyënga nýets luarënguenache cachcá jasúfriama yojtsamnana jtsetatšëmbëse. ¹⁰ Pero tsëngaftanga baseftayté chašmojasufri chentšana, Bëngbe Bëtsá cmochanjábiana nýetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiana tšabe juabna bomná, bënga nýetsca tšabe soyënga šonjatsatá, y nda bënga šojáchembo nýetsca tescama bëtsétsanga jtsemnama, chca echanjama. ¹¹ Cha nýets obenana nýets tempo y nýetsca tescama chaotsebmna. Chca chaotsemna.

¹² Silvano, ndabiama sëndējuabná atšbiana canye tšabe palabra bomná Jesucristbeyeca catsata yomnama, cháftaca quem base tsbuanácha tbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chiyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

¹³ Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquiñacá endmënë, chánaca cmontsacheuaná.

¹⁴ Njëtscanga Jesucristbeyeca catsatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cányiñe mo canyacá šmomnënga, njëtscanga ainaniñe tšabe ebionana chašmotsebomnama.

2 San Pedro

Jacheuayama

¹ Atše Simón Pedro, Jesucristbe oservená y chabe ichmoná, quem ts-buanácha sentsabiamná tšëngaftangbiamá, ndëmuanÿënga šmojashjache jtse-bomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema. ² Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tšëngaftangbeñe chaotsemnana y chaoma tšëngaftanga ainaniñe tšabe ebionana chašmotsebomnama.

Chë Jesucristbeñe ošbuáchiyënga tšabe soyënga

³ Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtsëjabotcá tšabe vida jtsebomnama y jtsiyenama, Bëngbe Bëtsá jadórana soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnana y bëts soyënga jamëse, chabe entšanga chamotsemnana. ⁴ Chca, Bëngbe Bëtsá šojatšatá ntšamo bënga jatšatayama tojanašebuachenacá, bëts y uamana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebinÿnana, entšanga nÿe cachëngbe bacna juabnëngaca jtsiyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnana, cachacá jtsemnana jashjáchëse. ⁵ Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; ⁶ chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnana; y chentšana bëtscá šmochtsama, tšëngaftanga Bëngbe Bëtsá šmojtsadoránama jinÿanÿiyama; y ⁷ chca, nÿetsca tšëngaftanga ošbuáchiyënga chašmotsenbobonshana; y chca, nÿetsca entšanga chašmotsababuánÿeshana.

⁸ Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama. ⁹ Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënana tojamama. ¹⁰ Chíyeca, Jesucristbeyeca atšbe catšátanga, nÿa šmochtsentšëna chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. ¹¹ Chca, Bëngbe Bëtsá oyejuayá tšëngaftangbiamá echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

¹² Chcáyecna, atše sëntsejuabná tšëngaftangbioye sempre chë soyëngama jtsabuayiyayana, masque chë soyëngama ya šmotátšëmbo, y tša

šmojtsošbuaché Bëngbe Bëtsabe ndegombre soyënguiñe y chca šmojtseyena, chë mora šmojtsetátšëmbo soyënguiñe. ¹³ Sëntsejuabná, chajjëftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiynayëse. ¹⁴ Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá; ¹⁵ pero bëtscá chanjëftsema, atše chajjóbana chentšánënaca tšëngaftanga nyets tempo chë soyëngama chašmotsenójuabnama.

Cristo corente uamaná y obená yojamnama tmojáninýe ora

¹⁶ Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana. ¹⁷ Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábocana oyebuambnayana Jesúsbioye mëntšá tbonjanianya ora: “Mua atšbe bonshana Uaquiñá endmëna, atše chabiamana sëntsoyejuá ca.” ¹⁸ Cach bënga chë oyebuambnayana fsënjajuena, chë celocana tonjanóbocnana, er bënga Bëngbe Utabnáftaca fsënjánmëna, chë uámana tjoca.

¹⁹ Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabréngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanësha canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjínýanýiye, mo tšëngaftangbiamana canýe tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá. ²⁰ Pero natsana chacmësertá, ndocna palabra Bëngbe Bëtsabe uabemana palabrénguiñe tojayana canýe soye yochjopása ca, cabá chca ndopása ora, nýe cach Bëngbe Bëtsabe juabna oyebuambnayëngbe juabnentsana tojanóbocnana; ²¹ er Bëngbe Bëtsabe juabna oyebuambnayënga ndoñe monjanoyebuambná nýe chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

2

Chë ndoñe ndegombre soyënga buátëmbayënga (Jud 4-13)

¹ Chë Bëngbe Bëtsabe juabna oyebuambnayëngbe tempo, Israeloca entšángbeñe baseftágnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánýiñe, chca, chënga chca imojtsabuátambama entšanga ndoñe chamondëtatšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínýënga játsebacama crocénana cuafjëtsajocá. Y chca, nýe ndeolpe, chë Bëngbe

Bëtsábiocana uabouana castigo nÿetsca tescama mochántsebomna. ² Banga chëngbioye mochantsësetona, nÿetscna bacna soye, jenomándama ntsoyencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. ³ Chënga bëtsá crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiama tojánayana, ndoñe tšabá imojtsamama y chëngbiama castigo nÿetsca tescama chaotsemnánaca.

⁴ Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infernoye tojtsanatsatše y puerte ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiama nÿetsca tescama castigo chamotsebomnama yochjayana orscama. ⁵ Y cach ndoñe quem luarentša entsángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnana, chë nduauenana y bacna entsanga jtsapochócama. Chentsana, nÿe Noébioye, tbojanatsbocá, nda entsanga yojanabuayiyná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y inÿe canÿsëftangnaca tojanatsebacá. ⁶ Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entsanga, yapa bacna entsanga imojamnama, bëts castigo jtsebomnama yojánamnama; y íñesheca tojtsanapochocá, chë pueblënga y chentsa entsanga jatinyá jtsabiamëntscuana. Y chë sóyeca Bëngbe Bëtsá tojaninÿanyé ntšamo bacna entsángaftaca yochjama, chë chentsana mochtsiyena bacna entsangbiama. ⁷ Pero Bëngbe Bëtsá Lótbioye tbojanatsbocá, chë bëts pueblënga pochócaoyentšana. Cha yojamna Bëngbe Bëtsabe bominiñe tšabá amá, y ntšamo chë luarentša entsanga imojaniyenama, nÿetscna bacna soye jtsamëse, jenomándama ntsoyencá, cha puerte ngménana inabomna. ⁸ Er quem tšabe entsá, chëngbeñe oyená, chë entsanga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasufrina.

⁹ Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nÿetsca tescama chë bëts castigo chamotsebomnama jamándama. ¹⁰ Chca ndegombre endmëna, y más chë ndëmuanyënga nÿe cachëngbe cuerpëngama bacna juabnëngaca jtsamëse imoyenëngbiama, chënga chë Bëngbe Utabnabe mando jtsaboténana. Chënga bacá buátsenanënga mondmëna y jtsebošana nÿe ntšamo cachënga tmojtsejuabnacá chaotsemnana, y ndoñe ntsauatjana chë espíritënga obenana bomnëngbiama puerte bacna soyënga jtsóyebuambnayama. ¹¹ Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiama chca jayanama, chëngbiama ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

¹³ Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga.

Tšëngaftangaftaca cánÿiñe mo ošbuachiyëngcá tmojttesá ora, tšëngaftangbiamá ouatjácá jtsemnana y chëngbe causa, ínÿenga tšëngaftangbiamá podesca mochántsicamo, er chënga chentše oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

¹⁴ Chënga ndoñe ntsoebenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y sempre jtsentšénana nÿe más soyënga jésebošama y jésebomnana, ínÿenga tmobomnana más soyënga jashjáchama; chënga montsemna pochocánënga jtsemnana. ¹⁵ Chënga chë tšabe benachentsana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juácánama ínÿengbiamá bacna soyënga jtsamëse; ¹⁶ y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

¹⁷ Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsošservénana, y chca, chënga jtsemnana mo búyeshe obocantse tojtsebuashjácá; y chënga mora canÿe soye jtsejuabnayana y chentšana inÿetsá; chca chënga jtsemnana mo jantšetëshënga bëtš bínÿiaca bonjnëshëngcá. Chëngbiamá Bëngbe Bëtsá tojayana castigo chamotsebomnana, chë más ibetoca, tondaye binÿiñe luarentše. ¹⁸ Chënga ba botamana palabréngaca jtsenábotamnayana, pero tondayama ntsošservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñanase, nÿe cachënga tšabá jtsomñama bacna juabnéngaca soyënga chamotsamama, cachënga jenomándama ntsošbencá. ¹⁹ Chë abuátambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca. ²⁰ Er ndëmuanÿenga, Bëngbe Utabná y Atsebacayá Jesucristo tmojtšábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnénga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana. ²¹ Chëngbiamá más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominÿiñe tšabá yomncá inétsamama, chë soye jatabuátmanana y chentšana játajbanana chë buátëmbana soyënga y chë abuayiynayëngaftaca chëngbioye Bëngbe Bëtsá tojanoyé mandënga jtsobedecénana. ²² Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshëconana ca” y “chë cotše cabá chora bebená, ngüichetsoye jana jetsójanduouoyama ca”.

3

Jesucristo quem luaroyé jésabama ora

¹ Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama

tšëngaftangbe juabna nÿe ena tšabe soyëngaca chaotsemnama, y chca chaotsemnamna atše jtsabuayiynayëse chë tcmojanabuatambá soyëngama. ² Atše sëntseboše tšëngaftanga chašmotsenojuabná, ntšamo chë inÿe tempënga ora, chë nÿe Bëngbe Bëtsábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

³ Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tšabá jtsomñama bacna juabnéngaca, y cmochantsëbuayajuana, chë Cristo yochjésabama šmošbuáchema. ⁴ Chënga mëntšá mochántsi chamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtsëtsanga, ndémuanÿëngbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobojatšë orscana enjamncá ca.” ⁵ Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentsana y búyesheca; ⁶ y cach búyeshecnaca, chë uabouana uafteentša béjayeca, ya bayté yojtsemna, cha lempe quem luarentše yojanbinÿncá tojtsanpochocá. ⁷ Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotsepochochama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nÿetsca tescama castigo chamotsebomnama jamándama tempo candóshjanguëntscuana. Chora Bëngbe Bëtsá, celoca y quem luare íñeshca echantsepochochá.

⁸ Pero, atšbe bonshánënga, canÿe soye endmëna y chë soye ndoñe chacmondébnëtjomba: Bëngbe Utabnabe juabnama, canÿe te endmëna mo canÿe uaranga uatcá, y canÿe uaranga uata mo canÿe tecá. ⁹ Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betesco yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nÿetsca tescama castigo chaondëtsebomnama, ndayá nÿetscanga bacna soyënga amana jt-sajbanase, Bëngbe Bëtsabe tšabe benache chamuashjáchama.

¹⁰ Pero Bëngbe Utabná echanjésabo ndocná chama chaondëtsejuabná ora, mo canÿe atbëbanacá jashjanguana, ndocná chama tontsejuabná ora. Chora celoca echanjopochóca, canÿe jabuache shauenanánaca, y quem luare ndaye soyënguentsana yomnana íñeshca echántsefjatëjo, y ndayá Bëngbe Bëtsá y entšanga quem luarentše tmojamcá, lempe echántsejuinÿe.

¹¹ Lempe chca japochócamo entsémnayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nÿets tempo jtsamëse chë Bëngbe Bëtsábioye jtsatschuanayama yomna soyënga, ¹² tšëngaftanga chë Jesucristo quem luaroye jésabama chaóshjanguama šmojtsobátmanëntscuana; y nÿa šmochtsentsëna cha más betesco cháuesabama. Chë te íñeshca celoca echántsejuinÿe, y ndaye soyënguentsana quem luare yomnana cach íñeshca echántsefjatëjo. ¹³ Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nÿetscanga mochantsiyena ntšamo Bëngbe Bëtsabe bominiñe tšabá yomncá jtsamëse.

¹⁴ Chíyeca, atšbe bonshánënga, chë soyënga chaotsemnama šmojtsobátmanëntscuana, nÿa chiñe šmochtsentsëna, chca, cha yochjésabo

ora, chacmanÿena oyeniñe tšabá Běngbe Bětsáftaca jtsatsmēnēse, ínÿengaftaca natjěmbana jtsiyenēse; chacmanÿena ainaniñe ndocna bacna soye ndbomnēnga, y puerte tšabá jtsamēse oyeniñe; chca, ndocná chaondobená jayanama tšěngaftanga ndaye bacna soye šmojama ca. ¹⁵ Quem soye šmochtsejuabnaye: Běngbe Atsebacayá ndoñe yapa betsko tonjésabēsna, chca jtsemnana cha puerte uantado nÿetscángaftaca yómnyeca; chca cha yomna, ba entšanga chě bacna soyēnga amana chámajbanama y chabe benache chámuatishachama y chca, atsebácanēnga chamotsemnana. Cach quem soyēngámna, Jesucristbeyeca bēngbe bonshana catšata Pablo tcmonjanēbuábiamana, chě Běngbe Bětsá tojanma cha chaotsebomnana osertanána. ¹⁶ Chě soyēngama, Pablo nÿetsca chabe tsbuanáčhangañe tonjanoyebuambá. Chěchangañe endmēna soyēnga totcá josértama; y chě soyēngama, chě Běngbe Bětsabe soyēngama ndoñe tmonjuatsjínÿēnga, y chě mora canÿe soye jtsejuabnayana y chentšana inÿetšá juabnayēnga, jtsejuabnayana y ínÿengbioye jtsabuayiyayana ndoñe ndegombre yondmēna ca. Y cachcá jtsamana inÿe soyēngaca, Běngbe Bětsabe uabemana palabreñguñe. Chca chēnga montsajna pochocánēnga jtsemnana.

¹⁷ Chíyeca, atšbe bonshánēnga, tšěngaftanga chě ya šmojtsetátšēmo chě ndoñe ndegombre soyēnga abúatambayēnga mochtsemnana, yejuana šmochtsantješna; chca, chě Běngbe Bětsá ntšamo yomandacá ndobedecenēngbe soyēngaca ínÿēnga jáingñama, tšěngaftanga ndoñe chašmondětsemna mo uambanēngcá, ndoñe chašmondětsajbanama jtsebomnana chě Běngbe Bětsabe soyēnga ntšamo šmojashjachcá. ¹⁸ Pero atšna, Běngbe Utabná y Atsebacayá Jesucristo sěntseimpadana, tšěngaftanga chašmotsiyena jtsamēse, chě chábentšana šmojóyēngacñe ba soyēnga ntšamo tomnana jtsejuabnayēse, y chaoma tšěngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

1 San Juan

Cristo, chë nyetsca tescama yomna tšabe vida entšanga chamotsebomnama amá

¹ Bënga cbontsëbuabiamná chë Bëngbe Bëtsá ndabiajana inétsoyebuambnabiamna, chë nyetsca tescama yomna tšabe vida entšanga chamotsebomnama iuamabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašéngaca chabe oyeambuayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátseca fsënjábojajo. ² Cha bëngbentse tonjanonýná y fsënjáninyë; chíyeca bënga chabiamna cbontsëtsësná y cbontsabuaiyná, nda sempre vida yobomna y nda chë nyetsca tescama yomna tšabe vida entšanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyë. ³ Bënga tšëngaftanga cbontsabuaiyná ntšamo tifjinýe y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca. ⁴ Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

Bëngbe Bëtsá endmëna chë entsangbiama binýnayá

⁵ Mëntsá entsemna ntšamo Jesucristbentšana tifjouencá y chca tšëngaftanga cbontsabuaiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsemna. ⁶ Bënga tmojtsichamo cháftaca cánýiñe mo canýacá fséntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷ Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabujuanaye, y echanjama bënga chabe delante tšabá chamotsatsmënama.

⁸ Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe; ⁹ pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyie cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. ¹⁰ Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

2

Cristo, bëngbe obuauyayá

¹ Tšëngaftanga mo atšbe basengcá, er atše tcbonjanëjabuache Jesucristbe tšabe noticiënguiñe chašmotsošbuáchema, quem soyënga cbontsëbuabiamná bacna soyënga ndoñe chašmondëtsamama. Pero ndánaca Crístbeñe ošbuachiyënguentsá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá. ² Jesucristo tonjanóbana ndoñe nyë Bëngbe Bëtsá

bënga chásuaperdonama bëngbe bacna soyëngama, ndayá quem luarentsa nyetsca entságnaca chëngbe bacna soyëngama cháuaperdonama.

³ Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatsëmbo bënga cha imuábuatmama. ⁴ Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. ⁵ Pero nda ntšamo Bëngbe Bëtsá ibuamëndacá tojtsama, jtsinýanýnaya chabe ainaniñe Bëngbe Bëtsabiana corente bonshánana yomnama, y chca, mochántsetatsëmbo bënga sempre cánýiñe mo canýacá cháftaca imomnama. ⁶ Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojétsiyencá.

Canye tsëm mando

⁷ Atšbe bonshana entsanga, ntšamo mora cbontsëbuabiamnacá, ndoñe canye tsëm mando quenátsmëna, pero aiñe canye tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentsana šmonjouencá. ⁸ Pero masque chca endmënëse, quem cbontsëbuabiamná soye tsëngaftangbiana echántsemna mo canye tsëm mandcá. Cristo enjëtsiyena ntšamo quem Bëngbe Bëtsabe mando ndegombre yomncá y tsëngaftángnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binýnaya ya entsebuashinýinýana.

⁹ Nda tojayana chë binýnayaftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. ¹⁰ Nda chabe catšátbioye tbojtsebobonshana, cha chë binýnayaftaca jtsiyenana, y tondaye queochátsmëna cha bacna soye chaotsamama. ¹¹ Pero nda chabe catšátbioye tbojtsáboyënja, cha bacna juabnënga jtsebomnëse jtsiyenana, mo canya ibetiñe oyenacá. Cha ndoñe ntsetatsëmbuana chë ndayá tojamama ntšamo chentsana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tsábá yomncá chaotsamama.

¹² Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. ¹³ Taitanga, tsëngaftanga cbontsëbuabiamná, er tsëngaftanga ya šmonjuábuatmana chë quem luare jobojátšama orscana ya inamná. Tsëngaftanga bobontsëgnaca cbontsëbuabiamná, er tsëngaftanga ya chë nyetsca bacna soyënga mandayá Satanás šmonjayënjaná.

¹⁴ Básenga, tsëngaftanga tcbonjubuábiana, er tsëngaftanga chë Taitá ya šmonjuábuatmana. Taitanga, tsëngaftanga tcbonjubuábiana, er tsëngaftanga ya šmonjuábuatmana chë quem luare jobojátšama orscana ya inamná. Bobontsënga, tsëngaftángnaca tcbonjubuábiana, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nyetsca bacna soyënga mandayá šmonjayënjaná.

¹⁵ Ndoñe matsbošana oyejuayënga jtsemnana nye quem luarentsa soyëngaca, ni nye chë soyënga jtsebomnama. Nda yapa tojtseboše quem luarentsa bacna soyënga jtsebomnama, cha ndoñe chë Taitábioye bondbobonshana. ¹⁶ Er chë nye quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá

tmojátinÿe soye; y yapa jtšenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentsana. ¹⁷ Pero quem luare echanjopochóca y nÿetsca chentša soyënga, chë entsanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nÿetsca tescama yomna tšabe vida echántsebomna.

Chë Cristbe contra yomná

¹⁸ Básenga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. ¹⁹ Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nÿetscanga ndoñe mondošbuáchema.

²⁰ Pero Cristo, chë Uamaná, tšëngaftanga tcmonjabacacá, y cha tonjama chë Uámana Espíritu tšëngaftangbe ainaniñe cháúamashënguama; y nÿetsca tšëngaftanga chë ndegombre soyënga šmondétatšëmbo.

²¹ Atše cbontsëbuabiamná, ndoñe chë ndegombre soyëngama ndoñe šmondétatšëmbuama, ndayá aíñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cánÿiñe jtsemnama ndoñe yondopodénama. ²² Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiamna ndoñe ntsejuabnayana cha chë Taitá bétsemnama. ²³ Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánÿiñe mo canÿacá ndoñe ntsemnana. Pero nda entsángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cánÿiñe mo canÿacá jtsemnana.

²⁴ Tšëngaftanga, chë Cristbe ústonënga šmojanóbiamna orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánÿiñe mo canÿacá šmochántsemna.

²⁵ Y quem soye entsemna ntšamo Cristo šojëftsasëbuachená: chë nÿetsca tescama yomna tšabe vida jtsebomnana.

²⁶ Atše chca cbontsëbuabiamná, chë tšëngaftanga jáingñayama imojtsebošëngbiama chašmotsetatšëmbuama. ²⁷ Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebomna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuátambá ndegombre soyënga, y boštero soyënga ndoñe. Mëntšá, ntšamo chë Uámana Espíritu tcmojabuátambacá jtšiyenëse, Crísoftaca cánÿiñe mo canÿacá šmochtsemna.

²⁸ Y mora básenga, Crísoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnama y ndoñe chamondëtsëuatjama, bënga chabe delante chamojtsemna ora. ²⁹ Tšëngaftanga šmontsetátšëmbo Jesucristo nÿetsca soyënguiñe tšabá amá yomnama. Chcasna, cmontsamna jtsetatšëmbuana, nÿetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnama.

3

Cristbeñe ošbuáchiyënga, Bëngbe Bëtsabe básenga

¹ Menójuabonga, ntsachetsá Bëngbe Bëtsá chë Taitá šondábabuanÿeshanama. Chabe bonshánana tša bëtsá endmënyeca, bënga šondëubuabuatma chabe básenga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana. ² Atšbe bonshana entsanga, mora bënga ya Bëngbe Bëtsabe básenga montsemna. Y masque cabá ndoñe quemuátstatsëmbo ntšamo más chcoye bënga mochjamnama, aíñe mondëtatšëmbo, Jesucristo chaojabáisebocna ora bënga cachacá mochtsemnama, er bënga mochanjobenaye jinÿama ntšamo cha ndegombre yomncá. ³ Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

⁴ Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá. ⁵ Tsëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canÿe bacna soye ndoñe yondbomnama. ⁶ Chcasna, nda canÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiamana ndoñe tbonjosertá y ndoñe yondëtatšëmbo ntšamo cha bëtsemnama. ⁷ Atšbe básenga, ndocná chacmondaingñe: nda nÿetsca soyënguiñe tšabá tojtsama, cha canÿe tšabá mándbomna entsá jtsemnana, ntšamo Jesucristo yomncá; ⁸ pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuétsama. Bëngbe Bëtsabe Uaquiñá nÿa quem soyama tojabo: chë Satanabe soyënga jabëtsepochochocama.

⁹ Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. ¹⁰ Corente jtsotatsëmbuana ndëmuanÿënga Bëngbe Bëtsabe básenga imomnana y ndëmuanÿënga Satanabe básenga; ndëmuanÿéngnaca ntšamo tšabá yomncá ndoñe tmontsama o chabe catšata ndoñe tmontsebomnana, ndoñe ntsemnana Bëngbe Bëtsabe básenga.

Nÿetscanga jtsenbobonshánana

¹¹ Quem buayenana entsemna ntšamo tsëngaftanga šmojanuena, tsëngaftanga Cristbe ústonënga šmonjanobiama orscana: nÿetscanga šontsamna jtsenbobonshánama. ¹² Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

¹³ Jesucristbeyeca atšbe catšátanga, ndoñe šmattsenjnanaye chë nÿe quem luarama enójuabnayënga cmojtsëbuayënjama. ¹⁴ Bënga mondëtatšëmbo, bënga tempo monjan iyena chë nÿe quem luarama enójuabnayënga mondoyencá, y chca, Bëngbe Bëtsabiama mo obanëngcá monjamna, er bënga monjan iyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondëtatšëmbo, er bënga bëngbe catšátangbioye mondábabuanÿeshana. Nda chabe catšátbioye ndoñe tbontsebomnana, cha

cabá mo obanacá jtsiyenana. ¹⁵ Nda cachabe catsátbioye tbojtsáboyënja, cha jtsemnana mo entsānga obanayacá. Y tsēngaftanga šmondétatsēmbo entsānga obanayá ndoñe ntsoobenana jtsiyenana, chē nyetsca tescama yomna tsābe vida chabe ainaniñe jtsebonnēse.

¹⁶ Ndayá chē jtsebobonshánana bétsemnana mēntšá montsetátšēmbo: Jesucristo chabe derecho vida jtsebonnāma cachcá tojanonýá y bēngbiama tojanóbana; cachcá bēnga šontsamna jtsemnana, sempre jtseprontánana chē Jesucristbeyeca bēngbe catsátangbiama jóbanama. ¹⁷ Canýa bomnana tojtsebonna y catsátbioye uajabotá tbojtsonýá, pero chabiama ndoñe tbonjongmé y ndoñe tbonjuájabuache, cha ndoñe ntsoobenana Bēngbe Bētsabiama ainaniñe bonshánana jtsebonnana. ¹⁸ Atšbe básenga, ndoñe quešnátamna nyē bēngbe catsátanga imuababuánýeshana ca jatichámuana, y nyē chē bonshánama jatóyebuambnayana; pero ndegombre šontsamna ndayánaca jamana, chca, jinýanýiyama, bēnga ndegombre ínýengbiama imuababuánýeshanama.

Bēngbe Bētsabe delante natjēmbana ainánaca entsānga

¹⁹ Chcase bēnga mochántsetatsēmbo, ntšamo chē Bēngbe Bētsabe ndegombre soyēnga yomncá bēnga imojtsamama. Y bēnga ndoñe quemochátenocochinýena, Bēngbe Bētsábioca jtsemnana merecido ndoñe mondbuájona ca tmojtsejuabná ora; y bēngbe ainana natjēmbana Bēngbe Bētsabe delante echántsemna. ²⁰ Bēnga chca bēngbe ainaniñe tmojtsejuabná ora, bēnga montsobena natjēmbana ainana jtsebonnana, er Bēngbe Bētsá corente jtsotatsēmñana ntšamo bēngbe ainana yomnana, y cha lempe yotátšēmbo. ²¹ Atšbe bonshana entsānga, bēnga ndoñe bacna soye tmonjama ca bēngbe ainaniñe tmojtsejuabnase, jtsoobenana añémoca jtsemnana y tondayama ntsauatjca Bēngbe Bētsabe delante jtsemnana. ²² Y cha lempe ntšamo chamojotjañcá šochanjátataye, er bēnga montsama ntšamo Bēngbe Bētsá ibuamandacá y ndayá chabe bominýiñe tsabá yomncá. ²³ Y chabe mando endmēna: bēnga chabe Uaquiñá Jesucristbeñe jtsošbuáchiyana, y bēnga nyetscanga jtsebobonshánana ntšamo Jesús šojéftsamēndacá. ²⁴ Ntšamo Bēngbe Bētsá tojéftsemandacá amēnga, Bēngbe Bētsáftaca cánýiñe mo canýacá jtsemnana, y cha sempre chēngaftaca cánýiñe mo canýacá echanjéftsemna. Y quem sóyeca bēnga montsobena jtsetatsēmbuana cha bēngaftaca iuétsemnana: Uámana Espiritu bēngbe ainaniñe cháuamashēnguama cha tojama.

4

Chē Bēngbe Bētsabe Espiritu y chē Cristbe uayayabe espíritu

¹ Atšbe bonshana entsānga, nyetscanga chē Bēngbe Bētsabe juábnaca imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatsēmbuana chēnga aíñe o ndoñe chē Bēngbe Bētsabe juábnaca imóyebuambnama. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tsēngaftanga cmontsamna botamana chēngbiama juarrepárana. ² Chē Bēngbe Bētsabe Espiritu ndegombre imobomnēngbiama tsēngaftanga mēntšá šmontsobena jtsetatsēmbuana: nda tojayana Jesucristo quem luaroye aíñe entsacá tojánabo ca, cha ndegombre chē Bēngbe Bētsabe Espiritu yojtsebonna. ³ Pero nda ndoñe chca Jesucristbiama tonjayana, cha Bēngbe Bētsabe Espiritu ndoñe yontsebonna; ínýetsá, chana chē Cristbe contra yomnabe espíritu yojtsebonna. Tsēngaftanga šmojouena chē espíritu yochjabama; pero ndegombre cha ya quem luarentše entsemna.

4 Atšbe básenga, tšëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tšëngaftangbioye chacmaingñema, er chë nyets tempo tšëngaftangbe ainaniñe vida endbomná, chë nye quem luarama enójuabnayëngbe ainaniñe mándayabiama más obená endmëna. ⁵ Chë Bëngbe Bëtsabe ndoñe ndegombre juabna oyebuambnayëngna chë nye quem luarama enójuabnayënguentsana mondmëna, chíyeca chënga nye quem luarentša soyëngama jtsóyebuambnayana, y chë nye quem luarama enójuabnayënga chënga jtsayaunanana. ⁶ Pero bënga Bëngbe Bëtsábenga mondmëna. Nda Bëngbe Bëtsábioye tbojtsabuatma, bëngbioye jtsayaunanana; pero nda Bëngbe Bëtsábioye ndoñe tbontsabuatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiama, y nda chë ínÿengbioye jáingñama ama espíritu yobomnabiámnaca.

Chë bonshánana Bëngbe Bëtsábiocana yóbocana

7 Atšbe bonshana entsanga, chë bonshánana Bëngbe Bëtsábiocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inÿe entsángbioye tojtsababuánÿeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabuatmana. ⁸ Nda ndoñe chca tontsebobonshana, cha Bëngbe Bëtsábioye ndoñe ntsábuatmana, er Bëngbe Bëtsá bonshanánaca nyetsca soyënga jamana. ⁹ Bëngbe Bëtsá šonjinÿanÿé bënga šuababuánÿeshanana, cha chë nye canÿe Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tescama yomna tšabe vida chamotsebomnama. ¹⁰ Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanÿeshanayeca, y chabe Uaquiñá tbojanichmó, cha jóbanëse, bënga bëngbe bacna soyëngama perdonánënga chamotsemnana.

¹¹ Atšbe bonshana entsanga, Bëngbe Bëtsá chca šuababuánÿeshana; chcasna, bëngnaca šontsamna nyetscanga jtsenbobonshánana. ¹² Ndocná ndocna te Bëngbe Bëtsábioye tbonjinÿe. Bënga nyetscanga tmojtsenbobonshánëse, Bëngbe Bëtsá nyets tempo bëngaftaca echántsemna, y chabe bonshánana puerte bëtscá bëngbeñe echántsemna. ¹³ Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espíritu bëngbe ainaniñe cháumashënguama. ¹⁴ Y cach bënga fsënjinÿe y entsanga fsëntsëtsëtsná, chë Taitá chabe Uaquiñá tbojichmoma, quem luarentša entsanga jabátsebacama. ¹⁵ Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá.

¹⁶ Chcase bënga montsetátšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nyetsca soyënga bonshanánaca jamana y nda Bëngbe Bëtsá y chë inÿe entsanga sempre tojtsababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. ¹⁷ Chca, Bëngbe Bëtsabe bonshánana puerte bëtscá bëngbeñe echántsemna, bënga bëts añémoca y tondayama ntsauatjá chamotsemnana, chë tšabá o ndoñe tšabá tmonjamama entsangbiama jayanama Cristo yochjésabo orscama; er bënga Jesucrístoftaca cánÿiñe mo canÿacá jtsemnëse, quem luarentše mondmëna ntšamo Jesucristo endmëncá. ¹⁸ Nda Bëngbe Bëtsá y chë inÿe entsanga tojtsababuánÿeshana, tondayama ntsauatjana; bënga corente tmojtsebobonshana ora, ndoñe ntsopodénana uatjana jtsebomnana. Canÿe entsá tojtsauatja ora, jtsemnana mo chabe

castigo ya cuafjobjatšecá. Chca, nda uatjana tojtsebomna, Bëngbe Bëtsábioye y chë inÿe entšanga cha ndoñe corente yondábabuanÿeshana, ntšamo Bëngbe Bëtsá bënga šuababuanÿeshancá.

¹⁹ Natsana Bëngbe Bëtsá šojánababuanÿeshana, y chíyeca bënga, cha y chë inÿe entšanga imuababuánÿeshana. ²⁰ Nda tojayana: “Atše Bëngbe Bëtsábioye sëndbobonshana ca”, pero cachca ora cachabe catšátbioye tbojtsáboyënja, cha canÿe bostero jtsemnana. Canÿa aíñe jtsobenana chabe catšata jinÿama; y cha chë catšátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinÿama ndoñe ntsobenana. ²¹ Y bënga quem mando chábensana tmonjanóyëngacñe: nda Bëngbe Bëtsábioye tbojtsebobonshana, cachabe catšátbioynaca chabotsebobonshana ca.

5

Chë Jesucristbeñe ošbuachiyá endobena Satanasbe soyënga jayënjanana

¹ Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canÿe taitábioye tbojtsebobonshana, chë taitabe uaquiñábioynaca cha jtsebobonshánana. ² Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánÿeshanama. ³ Bënga Bëngbe Bëtsábioye imobobonshánama quem soyiñe jtsinÿnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama. ⁴ Nda Bëngbe Bëtsabe uaquiñá tomna, chana jáyënjanana quem luarentša entšanga y soyënga ntšamo Satanas yomandacá. Quem luarentša entšanga y soyënga ntšamo Satanas yomandacá, Cristbeñe bënga imošbuachéyeca montsobena bënga jayënjanana. ⁵ Nÿe nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entšanga y soyënga ntšamo Satanas yomandacá jayënjanana; ndocná más.

Bëngbe Bëtsá tojinÿanÿé ntšamo chabe Uaquiñabiama ndegombre yomncá

⁶ Cach Jesucristo endmëna nda quem luaroye tojánabo y mëntšá tojanenonÿinÿé: búyeshca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonÿinÿé nÿe búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bëtsemnama Jesusbiama, er chë Espíritu endmëna chë sempre ndegombre oyebuambnayá. ⁷ Endmëna unga soyënga, ndayá iuinÿanÿná ntšamo ndegombre yomncá Jesusbiama: ⁸ Espíritu, búyeshca y buiñe; y chë unga soyënga lempe cachcá Jesusbiama jtsinÿanÿnayana. ⁹ Bënga mondbétsejuabnaye, ndayá entšanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. ¹⁰ Nda Bëngbe Bëtsabe Uaquiñabeñe tojtsošbuaché, cha chca nÿets tempo chabe ainaniñe jtsejuabnayana; nda Bëngbe Bëtsabeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca. ¹¹ Ntšamo Bëngbe Bëtsá chabe Uaquiñabiama tojayancá mëntšá entsemna: Bëngbe Bëtsá bëngbiama tojama chë nÿetsca tescama yomna tšabe vida chamotsebomnama; y quem vida chabe Uaquiñabeñe entsemna. ¹² Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe

tontsemna, cha chë nÿetsca tescama yomna tšabe vida ndoñe ntsebomnana ca.

Inÿe soyëngama jábuayenama y jtadiósoftanama

¹³ Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nÿetsca tescama yomna tšabe vida šmojtsebomnana.

¹⁴ Bënga bëts añémoca y ndauatjá Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. ¹⁵ Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondëtatšëmbo chca ndegombre yomnana, y chca, bëngnaca montsetátšëmbo, ndayánaca chábioye bënga chamojtjañcá cha šochjátšatayama.

¹⁶ Nda cachabe catšátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nÿetsca tescama yomna tšabe vida chaotsebomnana, cha chca tojamentšana perdonaná jtsemnana cabá tojtsopodénëse. Pero canÿe bacna soye endmëna, y chca tojamama canÿa ndoñe ntsoobenana perdonaná jtsemnana, y chca, cha jabocnana canÿa nÿetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. ¹⁷ Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnana.

¹⁸ Bënga mondëtatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onÿnaná chábioye jtsinÿenana, y Satanás, chë nÿetsca bacna soyënga amëndayá, tondaye ntsoobenana chábioye jabórlana. ¹⁹ Bënga mondëtatšëmbo, bënga chë Crístbeñe ošbuáchiyënga Bëngbe Bëtsábënga imomnana, y chë quem luarentša inÿe entšanga Satanasbe cucuatšinë imomnana. ²⁰ Bëngnaca mondëtatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnana, chë ndegombre Bëngbe Bëtsá yomná jtsabu-atmama. Bënga chë ndegombráftaca cánÿinë mo canÿacá mondmëna, bënga chabe Uaquiñáftaca cánÿinë bëtsemnayeca. Cha chë ndegombre Bëngbe Bëtsá endmëna, y nda chë nÿetsca tescama yomna tšabe vida entšanga chamotsebomnana iuamá. ²¹ Atšbe básënga, ndoñe šmattsadorana cach entšangbe pormana soyënga, chë ndayama ínÿënga mondbëtsejuabnaye diosënga yomna ca.

2 San Juan

Jtsiyenana ndegombre soyëngaca y nyëtscanga jtsenbobonshánëse

¹ Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacáná y chabe basengbiámna, ndëmuanýenga atše ndegombre sëndábabuanýeshana. Y ndoñe nye atše chënga quetsátababuanýeshana, ndayá nyëtscanga chë Bëngbe Bëtsabe ndegombre soyënga uabuátmëngnaca.

² Atše cbontsababuanýeshana, chë ndegombre soyënga bëngbe ainaniñe mondbómnyeca, y chë soyënga bëngbe ainaniñe sempre echántsemna.

³ Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebomna. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

⁴ Puerte sënjoyejuá, er atše acbe básenguëntse báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. ⁵ Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. ⁶ Bënga, Bëngbe Bëtsá y chë inýe entšanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inýe entšanga jtsababuánýeshanëse.

Chë entsángbioye áingñayënga

⁷ Quem luarëjana banga entsángbioye áingñayënga mondajna, y chënga jtsejuabnayana Jesucristo quem luaroye ndoñe mo canýe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. ⁸ Chëngbiamna cuedado šmochtsebomna. Ndoñe chcase, tsëngaftanga ndoñe quešmochátsbomna chë Cristbiamna cach tsëngaftangbe trabajuentšana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

⁹ Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana. ¹⁰ Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye. ¹¹ Er nda chábioye tbojachuase, chábioye jtsajabuáchanana chë bacna soye chaomama.

Jtadiósoftanama

¹² Atše ba soyënga sëntsebomna tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyëtscángangftaca jencuéntama, chca, bëngbe oyejuayana puerte bëtscá chaotsemnana.

¹³ Cristbeyeca acbe quenata, chë Bëngbe Bëtsabe bocacáná, chabe básenga cmontsacheuaná.

3 San Juan

Juan Gaybiamá puerte tsabá tojanoyebuambá

¹ Atše chë bëtsëjema, quem tsbuanácha atšbe bonshana amigo Gaybiamá sentsabiamná. Chábioye atše ndegombre sëndbobonshana.

² Atšbe bonshaná y Crístbeyeca atšbe catsata, Bëngbe Bëtsá sëntseimpadana aca tsabia nyetsca soyënguiñe chacotsemnana y salud bomnánaca. Atše sëntsetatšëmbo aca ainaniñe tsabá cotsomñama, Bëngbe Bëtsabiamá bëtská tsabe juabnënga chentše jtsebonnëse. ³ Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtská sëntsoyejuá. ⁴ Tondaye jamana atše nyetšá oyejuayá chaitsemnana, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵ Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiamá ndayánaca tcojtsama ora. ⁶ Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjbotcá chënga cochjújabuache, chca, chënga chamobená tsabá inÿe luarëngoye játama. Chënga mondmëna Bëngbe Bëtsabiamá trabájayënga; chcasna, chëngaftaca cochjama ntšamo chënga chama merecido imobuajoncá. ⁷ Chca cochjama, er chënga chëngbe pueblënguentsana tmojëftsebocana Jesucristbeñe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentsana. ⁸ Chíyeca bënga šontsamna chëngbiamá jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótfes ndoñe tsabá tonjanma; Demetrio añe

⁹ Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiamá, pero Diótfes ndoñe yontsuenana ntšamo atše sentsichamcá, er cha yojtseboše chë ínÿengbioye nye jtsamëndayana. ¹⁰ Chíyeca atše choye chajá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojášhajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana imnétsenefjuana luarentšana yojtsatëbuacana.

¹¹ Atšbe bonshaná, ndoñe cattsama chë ndoñe tsabá yontsamacá, ndayá chë tsabe soyënga tmojtsamëngcá cochtsama. Nda ntšamo tsabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yomnana.

¹² Jesucristbeñe ošbuáchiyënga nyetscanga tsabe soyënga Demetriëbiamá montsichamo, y Jesucristbeñe ndegombre soyënga entsinÿna ntšamo cha

soyënga yojtsiyenama. Bëgnaca chabiamá tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

Jadiósoftanama

¹³ Atše ba soyënga sëntsebmna aca jauyanama, pero ndoñe quetsátsboše tsbuanáchañe juábobemana. ¹⁴ Atše sëntsejuabná betscó chjobenaye ácbioye jama jauatsëtsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebmna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

San Judas

Jacheuayama

¹ Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanýengbioye Běngbe Bětsá, chě Taitá chabe entšanga chamotsemnama tojáchembo, chabe bonsháněnga, y ndémuanýenga Jesucristo endánýena. ² Atše, Běngbe Bětsá sěntseimpadana, cha puerte lastemado tšěngaftangaftaca chaotsemnama, cha chaoma tšěngaftanga ainaniñe tšabe ebionana chašmotsebonnama, y chaoma tšěngaftanga cada te más Běngbe Bětsábioye y ínýengbioye chašmotsababuánýeshanama.

Chě ndoñe ndegombre soyěnga buátěmbayěnga

³ Atšbe bonsháněnga, atše tša sěndboše tšěngaftanga jubuábiamama, ntšamo Jesucristo běngbe bacna soyěnguentšana šojátsebacama, tšěngaftangbioye y běngbioynaca; pero atše sěntsejuabná atše šojtsemna tšěngaftanga jubuábiamana, jáimpadama bětská chašmotsama Jesucristbe soyěngama, chě mondošbuaché soyěngama jenujuérsama, ndoñe chaondopochocama. Chě soyěnga Běngbe Bětsá chabe entšanga canýe tojatsatá, y nýetsca tescama. ⁴ Er tšěngaftanga ntšamo ínýenga imomnama ntjatatsěmboncá, básefta entšanga tšěngaftangaftaca tmojenutaná. Chěnga mondměna Běngbe Bětsá ndoñe adórayěnga, y chě buátěmbana soyěnga tmojtsetrocá. Běngbe Bětsá běngbe tšabiamana juabna yobómnayeca, chěnga jtsichámuana tšěngaftanga šmojtsoyena nýetsca bacna soyěnga jtsaměse jtsiyenana, jenomándama ntsoyencá ca; y chca, chěnga montseboše jinýanýiyama, Jesucristo ndoñe běngbe canýe Nduiño y Běngbe Utabná chěngbiama yondměna ca. Y bayté, Běngbe Bětsabe uabemana palabrěnguiñe tmojanábema, chě chca aměngna jtsamnana nýetsca tescama castigáněnga jtsemnama ca.

⁵ Masque tšěngaftanga lempe quem soyama ya šmondětatsěmbo, atše sěntseboše jamama tšěngaftanga chašmotsenojuabná, Běngbe Utabná, Israeloca entšanga Egiptoquěngbe cucuatšěntšana tojanatsebacá chentšana, cachá chě Israeloquěnguentše chábeñe ndošbuáchiyěnga tojánapochocama; ⁶ y cachcá chě angelěngbiámna, ndémuanýenga ndoñe tmonjanoquedá chě tmojanóyěngacñe mándoca, pero aíně chěngbe luarěnga cachcá imojěftsonýaye. Chě causa, Běngbe Bětsá tojanmandá cadenějuangaca nýetsca tescama chamoquedama, chě más ibetiñe, tondaye binýniñe luarentše, chěnga bacna soyěnga tmojanmama nýetsca tescama castigáněnga jtsemnama yojtsamna ca, cha jayanama tescama. ⁷ Y chě Sodoma y Gomorra, y chě béconana pueblěnguentše entšangbiámna; chěngnaca cach angelěngcá ndoñe tšabá monjánama, y nýetsca bacna soyěnga imojánama boyabása o shembásaftaca, y ínýengaftaca y bayěngaftácnaca. Chíyeca chěnga tmonjansufrí chě íñesheca castigo nýetsca tescama, y chca, nýetsca entšangbioye tmojaninýanýé, ndayá yochjopása chě chca Běngbe Bětsábioye ndoñe tbontsobedecenáftaca.

⁸ Cachcá, chě ndoñe ndegombre soyěnga buátěmbayěngnaca chě mo otjenayoquécá tmojaninýe soyěngama jtsichámuana, y chě causa cachěngbe cuerpěngama bacna soyěnga jtsamana, chě mando bomněngbioye jtsěbátenana, y chě espíritěnga obenana bomněngbiama ndoñe tšabá ntsichámuana, mo chěngbioye cuafjoyanguangcá. ⁹ Pero ni mo chě angelěngbe mandayá Miguel quem buátěmbayěngcá tojanma. Cha chě diábloftaca ibojentsjaná ora, Moisesbe cuerpama cháftaca jabuachana ibojanenatsětsnaye ora, ndoñe tonjanenñemó jayanama chě diablěbiama

podesca soyënga, jóyenguanguse, ndayá nýe mëntsá ibojauyana: “Bëngbe Utabná chacmáacana ca.”¹⁰ Pero quem buátëmbayëngna, chë ndoñe tontsësertana soyëngama podesca jtsichámuana, y ntšamo tojtsebionama y tmojtsebošama, nýe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nýetsca tescama castigánënga jtsemnana chamotsajnama.

¹¹ ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbioye tbojanóba. Chënga crocénana juácanama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

¹² Chëngna tšëngaftangbiana jtsemnana mo canýe ndëtsenga luarentše canýe bëts tsengacá, tšëngaftangftaca tmojenutaná ora, cánýiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nýe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nýe cachëngbiana jtsantješnana, ínýëngbiana ndoñe. Chënga tša jtsašebuachiyana, pero chëngbe buátëmbana soyënga ínýëngbiana tondayama ntšoservénana; y chca, chënga jtsemnana mo chë tša jënýá ora jantšetëshëngcá, tondaye ntjuaftena, bínýiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa.¹³ Chënga nýets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinýanýnayana chënga chë bacna juabnënga imobomnama. Chca, chënga jtsemnana mo mar béjayoca oleshëngcá, chentšana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binýniñe luarentše nýetsca tescama chënga chamoquedama.

¹⁴ Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntsá tojánayana ora: “Smochjinýe, Bëngbe Utabná echanjabo bëtscá uaranga angelëngaftaca,¹⁵ nýetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nýetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana.¹⁶ Chënga mondmëna chë tšabe soyëngama nýets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nýe cachënga tšabá jtsomñama, y puerte botamana palabrénga jtsichámuana uámanënga jtsenobiamnayëse, y tšabe soyënga ínýëngbioye jtsëtsënyana, chënga tšabá joquédama y chëngbentšana ndayánaca josháchiñama.

Ošbuáchiyënga jábuayenama

¹⁷ Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntsá:
¹⁸ “Jesucristo quem luare jésabama tempo chaojtsobeco ora, mochántsemna

entšanga, y chënga mochantsiyena jtsamëse nÿe cachënga tšabá jtsomñama bacna juabnëngaca, y tšëngaftanga cmochantsëbuayajuana ca.”¹⁹ Chënga mondmëna chë ošbuáchiyënguentšë nÿetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnëngaca y ndoñe quemátsbomna Uámana Espíritu, chëngbe ainaniñe chaotsemándama.

²⁰ Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá. ²¹ Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

²² Chë inÿe ora aíñe y inÿe ora ndoñe Jesucristbeñe ošbuáchiyana bomnënga šmochtsalastemana. ²³ Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inÿengbiana chacmotsangmena, pero cuedado šmochtsebomna, chënga chašmojtšëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnëngaca, nÿa tondaye chacmondëtsogusetana.

Judas, Bëngbe Bëtsá jëtschuayama

²⁴⁻²⁵ Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

Apocalipsis

Ndayá quem librësañe yomna

¹ Quemuentše entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema. ² Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjaniyana ndegombre bétsemna soyëngama.

³ Oyejuayá nda tojtsalía, y oyejuayënga ndëmuanÿenga botamana tmojtsuenana quem yochjopása soyëngama, chë muentše entsabemancá ndegombre tmojóyeunanga, er chca jopasa tempo entsobeco.

Asia luaroca ošbuachiyëngcá enefjuanënga jacheuayama

⁴ Atše Juan, sentsabiamná chë Asia luaroca canÿsëftañe ošbuachiyëngcá enefjuanëngbiama. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebomna, Bëngbe Bëtsábentsana, chë canÿsëfta espíritëngbentsana y Jesucristbentsana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmënénga; ⁵⁻⁶ y Jesucristo, chë ntšamo Bëngbe Bëtsabiamna yotatšëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentšana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservénama. ¡Nÿetscanga nÿets tempo chamotsinÿanÿná Cristo puerte bëtsá y uamaná bétsemnama y obenana nÿetsca tescama yobomnama! Chca chaotsemna.

⁷ Mouenënga. Cristo jantšetëshënguiñe echanjésabo.

Chábioye nÿetscanga mochanjinÿe,

chë tmonjancrucificágnaca;

y quem luarentša nÿetsca entsanga puerte ngmënáca mochántsemna

y mochantsošachna chábeyeca.

Ndegombre, chca chaotsemna.

⁸ “Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

Juan mo otjenayoquëcá Cristbiamna tojáninÿe

⁹ Atše Juan, Jesucristbeyeca tšëngaftangbe catšata, cháftaca cánÿiñe mo canÿacá bétsemnama, cach tšëngaftangcá sëndëpadecena, tšëngaftangcá chanjëftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsabeñe jtsobátmanëse, uantado sëndmëna chë padecena soyënguiñe. Bëngbe Bëtsabe palabra sënjanabuayinama y Jesusbiamna ntšamo ndegombre endmëncá sënjanóyebuambnama, atše šmonjetsanëtšena mar béjayoca canÿe fshantsentše, Patmos ca uabáinoca.

¹⁰ Y tonjanopasá, canÿe tmengo, chë ošbuáchiyënga Bëngbe Utabnábioye cánÿiñe jëtschuayama te, atše sënjanóquedá chë Uámana Espiritbeyeca corente

mandaná, mo otjenayoquécá soyënga sënjetsonyaye, y atšbe stëtsoica canye jabuache oyebuambnayana sënjanuena, mo canye trompetéfjua cuafjuajatetcá; ¹¹ mëntsá šontsanatsëtsná: “Canye librësañe mábema lempe ntšamo contsonyácá y cochjuíchmua chë Asia luaroca canyësëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

¹² Sënjanobuértana jinýama nda chca šojtsanatsëtsná, y chca sënjanma ora, sënjáninýe canyësëfta castellano candelerësënga; ¹³ y chë canyësëfta castellano candelerësënguiñe tsëntsaca canya sënjáninýe, mo entšacá inýná, canye bën entšayá uichëtjoná, y cochóntscoca canye tëntša castellano uasnanëjaca. ¹⁴ Chabe stjënashana uafjantsësha, puerte uafjantsësha mo canye oveshabe boboshëshacá, y chabe fšnëbenga mo iñeshcá enjëtšinýna. ¹⁵ Chabe shecuatšënga enjëtsebuashinýinýana mo bronscá, ndaybé natsana iñëjana tcojuchnëngo enabé chaotsemnana y chentšana entšëjuaca becá tcojajojó corente chaotsebuashinýinýanama; y chabe oyebuambnayana jabuache enjëtseana mo bëtscá béjaye cuaftsebuachquëcjancá. ¹⁶ Chabe catšbioica cucuatšinë enjëtstbëna canyësëfta estrellënga, y chabe uayoicana enjëtsovocana canye espadëja, nyets utoicajana puerte efsánëja, y chabe jubiá tša enjëtsebuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

¹⁷ Cha sënjáninýe ora, chabe shecuatšentse mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatsayá y pochocayá, ¹⁸ chë sempre vida bomná. Atše obaná sënjamna, pero mora nyetsca tescama vida sëntsebomna. Atše obenana sëndbomna, y chë obenánaca entšángbioye ndoñe quenátamna infiernoca nyetsca tescama castigánënga jtsemnana, mo nyets tempo cuaftsobancá. ¹⁹ Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. ²⁰ Mëntsá endmëna chë atšbe catšbioica cucuatšinë tconjinýe canyësëfta estrellëngaca y chë canyësëfta castellano candelerësëngaca: chë canyësëfta estrellënga montsinýinýná chë canyësëftañe ošbuachiyëngcá enefjuanëngbeñe chamotsemándama uámana ichmónënga, y chë canyësëfta candelerësëngna chë canyësëftañe ošbuachiyëngcá enefjuanënga.”

2

Efesoca ošbuachiyëngcá enefjuanënga jábuayenama

¹ Mëntsánaca cha šonjaniyana:

“Mëntsá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntsá entsichamo chë chabe catšbioica cucuatšinë canyësëfta estrellënga entsatbëná y chë canyësëfta castellano candelerësënga luarëjana entsaná:

² Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entšanga tmojtsamcá. Atšnaca sëndëtatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnama.

³ Padecena soyënguiñe becá šmojoboyá y chca ora, Bëngbe Bëtsábeñe

šmobátmana. Chë soyënguiñe šmojasufrí, tšëngaftanga atše šmoservénama; y tšëngaftanga chca šmondëserveda, ainaniñe añemo jtsebomnama ntjajbanacá.

⁴ Pero canye soye sëntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiana ni nyetsca entsangbiana, ntšamo átšbeñe jtsošbuáchiyama šmonjanbojatsé orcá.

⁵ Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbiye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentsana cuaftsejuanacá. Chca chanjama, tšëngaftanga juabnayana ndoñe chašmonjatrocace.

⁶ Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entsanga tmojtsamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana tšabá chamojábocana mo ayëñjanayëngcá, chëngbiana chanjama chë nyetsca tescama yomna tšabe vida chamotsebomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentsana cuaftsesacá, chë entsanga sempre oyejuayënga mondbetsemnoca ca” —cha šonjaniyana.

Esmirnoca ošbuachiyëngcá enefjuanënga jábuayenama

⁸ Mëntsánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama: ⁹ Atše sëndétatsëmbo tšëngaftanga tša jabuache šmojasufrima y ndbomnjémënga šmomnama, pero ndegombre Bëngbe Bëtsábiocana bëtscá tšabe soyënga šmondëtsóbomñe. Y sëndétatsëmbo tša bacá tšëngaftangbiana mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entsangcá; chca, chënga mondmëna mo Satanabe entsangcá, nye chábioye jtseservënëse y jtsatschuanayëse.

¹⁰ Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínÿënga chacmëtámiana, jinÿama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Siempre bëtscá ošbuáchiyana, y ainaniñe bëts añemo šmochtsebomna, masque jobanámnaca chacmotsamna, Crístbiana trabájaye causa. Chca chašmojtsamëse, atše chanjama tšëngaftanga chašmotsebomnama mo canye uacanana soycá, chë nyetsca tescama yomna tšabe vida.

¹¹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

Pérgamoca ošbuachiyëngcá enefjuanënga jábuayenama

¹² Měntsánaca cha šonjaniyana: “Pérgamo bėts pueblentse ošbuachiyěngcá enefjuaněngbeñe chaotsemándama uámana ichmonábioynaca měntsá mabobema:

Měntsá entsichamo chě nyets utoicajana puerte efšana espaděja entsatbėná: ¹³ Atše sěndětatsěmbo ntšamo yomna tšěngaftangbe oyenentše, canye luare ndayentše Satanás entsángbioye puerte iuaměnda. Masque chca, tšěngaftanga sempre nye atše šmondětseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chě canye nyets tempo atšbe ustoná y atšbiama ndegombre oyebuambnayá, ín्यenga tmonjanóba ora. Y lempe chca tojopasá tšěngaftangbe pueblentše, ndayentše Satanás bėtscá entsana.

¹⁴ Pero básefta soyěnga sěntsebmna tšěngaftangbe contra jayanama: Chentše tšěngaftangbeñe báseftanga montsemna, soyěnga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entsángbioye jáingñama, chěnga chě ntšamo ndoñe tšabá yomncá chamotsamama; y chca, Balac tojanma chě ín्यenga diosěnga yojamna ca imojanajuabná soyěnga jadórama uátšěmbona saná chě Israeloca entsanga chamosama, y shembása o boyabásaftaca bacna soyěnga chamotsamama. ¹⁵ Chěntšnaca ín्यenga montsemna, y chěngna chě nicolaitěngbe buatěmbana soyěnguiñe mondošbuaché, y chca buatěmbana soyěnga ndoñe tšabá quenátsměna. ¹⁶ Smochtsejuabnaye ntšamo šmojtsamama, chěngbioye tšěngaftangbeñe šmojtsěuantana ora, y chca jtsamana šmochjajbaná; er ndóñese, atše betscó tšěngaftangbioye chanjá, y chě chca buatěmbana soyěnguiñe ošbuáchiyana ndoñe tmonjajbanángaftaca chanjěntsja chě atšbe uayoicana endóbocana espadějaca.

¹⁷ Chě jouenama tmojtsobeněnga, chamouena ndayá Espíritu chě ndayenache ošbuachiyěngcá enefjuaněnga yojtsětsětnacá. Chě padecena soyěnguentšana tšabá chamojábocana mo ayěnanayěngcá, chěngbioye maná chanjátataye chamosama, chě celoca tanděse, ndayá Běngbe Bětsá tempo entsángbioye ndoñe tonjinýanýe; y canye fjantse ndětsětema chanjáyentšbuachiye, chěnga oyejuayěnga šmojábemama. Chiñe canye tsěm uabaina echantsábemana; ndocná chě uabaina quenátabatma, ndayá nye chě chamojójyěngacñěnga ca” —cha šonjaniyana.

Tiatiroca ošbuachiyěngcá enefjuaněnga jábuayenama

¹⁸ Měntsánaca cha šonjaniyana: “Tiatira bėts puebloca ošbuachiyěngcá enefjuaněngbeñe chaotsemándama uámana ichmonábioynaca měntsá mabobema:

Měntsá entsichamo Běngbe Bětsabe Uaquiñá, chě mo iñeshcá uafšná y mo entsějuaca jojona puerte chaotsebuashinýinanama bronze shecuatšěnga bomná: ¹⁹ Atše sěndětatsěmbo ntšamo tšěngaftanga šmoyenama; sěndětatsěmbo ntsachetšá tšěngaftanga Běngbe Bětsábioye y nyetscángbioye šmababuánýeshanama, ntšamo tšěngaftanga Běngbe Bětsábeñe puerte šmošbuáchema, ntšamo chábioye šmoservěnama, ntšamo tšěngaftanga ín्यenga šmojuabuache y ntšamo Běngbe Bětsábeñe jtsobátmaněse becá šmojoboyá padecena soyěnguiñe; y sěntsetatsěmbo mora más bėtscá tšabe soyěnga šmojtsama, ntšamo tšěngaftanga átšbeñe jtsošbuáchiyama šmonjanbojatšé orscama.

²⁰ Pero canye soye sěntsebmna tšěngaftangbe contra jayanama: Tšěngaftangbeñe šmonděuantana chě shembása, mo chě bacna reiná Jezabelcá endmėnábioye. Chě shembása entsichamo Běngbe Bětsabe juabna oyebuambnayá canměna ca; pero chabe buatěmbana soyěngaca

atšbe oservénenga entsaíngña, shembása o boyabásaftaca bacna soyènga chènga chamotsamama, y chë ínÿenga diosènga yojamna ca imojanajuabná soyènga jadórama uátsëmbona saná chamosama. ²¹ Cha sënjuená atše chjacastíga ca, chca juabnayana ndoñe tonjatrocace, y canÿe boyabásaftaca bacna soyènga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátsbošena. ²² Mora atše chanjama bëtš šocana cha chaboshachama, y chë cháftaca bacna soye tmojamènga, juabnayana ndoñe tmonjatrocá y chca jtsamana ndoñe tmontsajbanase, chëngbiamá chanjama puerte chamosufrima; ²³ y chë shembásabe básenga chantsëbaye. Chca, nÿetsquénache ošbuachiyèngcá enefjuanènga mochántsetatsëmbo, ndayá entsanga juabniñe y ainaniñe tmojuabnacá atše tsuábuatmama; y cada ona tšëngaftanguentsá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentše, ínÿenga Tiatira pueblentše šmojtsemnènga, chë shembásabe buatëmbana soyènguñe ndoñe šmontsošbuachenga, y chë ínÿenga imuábuatma Satanasbe soyènga, chë ndoñe paselo josértama soyènga ndoñe šmonjuabuátmanènga, tšëngaftanga ndoñe quebochatamènda inÿe más toto soye chašmotsamama. ²⁵ Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtšábiocana šmojóyèngacñe soyènga yomncá, atše quem luaroye jesabámèntscuana.

²⁶ Chë padecena soyènguentsana tšabá chamojábocana mo ayënjanayèngcá y ntšamo atše sëndëmandacá chamojtsamènga, chë quem luarentše ya ndoñe más vida jesebomnámèntscuana, atšbe obenana chanjátšataye nÿetsca mándayèngbentša entsángbeñe jtsemándayama, ²⁷ ntšamo atšbe Taitá chabe obenana šojatsetacá; y chènga entsángbioye puerte obenánaca mochántsamèndaye, mo canÿe hierro varëfjaquécá, y chëngbe contra chamojtsemnëngbioye mochántsapochocaye, mo nÿe matbajènga tmojtsëtsjanjncá. ²⁸ Y chë jabínÿnama ora bínÿnaye estréllnaca chanjátšataye.

²⁹ Chë jouenama tmojtsobenènga, chamouena ndayá Espiritu chë ndayenache ošbuachiyèngcá enefjuanènga yojtsëtsëtsnacá ca” —cha šonjaniyana.

3

Sardisoca ošbuachiyèngcá enefjuanènga jábuayenama

¹ Mèntšánaca cha šonjaniyana: “Sardis bëtš pueblentše ošbuachiyèngcá enefjuanèngbeñe chaotsemándama uámana ichmonábioynaca mèntšá mabobema:

Mèntšá entsichamo chë Bëngbe Bëtšabe canÿsëfta espíritènga y chë canÿsëfta estrellènga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiamá ínÿenga tša jtsichámuana Bëngbe Bëtšá jasérviamá bëtscá šmojtsama ca, pero ndegombre tšëngaftanga nÿe batšatema šmontsama, y chca, chabiamá mo obanèngcá šmondmèna. ² Botamana šmochjenóbobonÿe y más šmochtsama chë Bëngbe Bëtšá jasérviamá cabá šmondama básefta soyènga. Ndoñe yapa quenatájamna chë tšabe soyèngnaca chašmotsajbanama, er atše sënjinÿe chë Bëngbe Bëtšábioye jasérviamá ntšamo jtsamèse šmoyencá, atšbe Bëtšabiamá ndoñe yapa tšabá quenátsmèna. ³ Asna, šmochtsenójuabnaye ndayá Bëngbe Bëtšábiocana šmojóyèngacñama, y chabiamá šmojouena soyènguñnaca. Ntšamo chë soyènga yomncá šmochtsiyena, juabnayana šmochjatróca y šmochjóntša bëtscá jtsamana Bëngbe Bëtšá jasérviamá. Ndoñe tšabá cach tšëngaftanga chašmonjenójuabose y juabnayana ndoñe

chašmonjatrocasa, nÿe ndeolpe chanjá tšëngaftangbioye, mo canÿe atbëbanacá, chabiamana ndocná tontsejuabná ora, y ndegombre tšëngaftanga ndoñe quešmochátstatsëmbo mocna ora atše tšëngaftangbioye chjama.

⁴ Masque chca, Sardisentše tšëngaftangbeñe básefta entsanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsaína uafjantsëjuangá uichëtjonënga, chënga chca merecido montsebuajónayeca. ⁵ Chë padecena soyënguentsana tšabá chamojábocana mo ayënjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana librësentsana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

⁶ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá ca” —cha šonjaniyana.

Filadelfioca ošbuachiyëngcá enefjuanënga jábuayenama

⁷ Mëntsánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë uamaná y ndegombre oyebuambnaya, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntšobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntšobenana jamama aíñe chaotsemnama: ⁸ Atše lempe sëndëtatsëmbo ntšamo tšëngaftanga šmoyenama. Minÿënga, atše sënjama tšëngaftanga bëtscá tšabe soyënga chašmotsebonnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiamana canÿe bësásá cuafjatëfjá, y chësa jtatámiamana ndocná quenátobena. Atše sëndëtatsëmbo tšëngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entsanga ndoñe šmondmëna ca. ⁹ Atše chanjama, chë mo Satanasbe entsangcá imomnënga, nÿe chábioye jtšeservënëse y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entsangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiamana respeto jinÿanÿiyama, y chca, chënga chamotsetátšëmbo atše sempre cbaabuánÿeshanama. ¹⁰ Atše tcbonjanamëndá, Bëngbe Bëtsabeñe jtsobátmanëse, lempe chašmotsoboyá padecena soyënguiñe, y tšëngaftanga chca šmonjama. Chíyeca, atše puerte tšabá chochántsanÿena, chë quem luarentše oyenënga nÿetscanga jasúfriama y padecena soyënguiñe jtsemnama chaojtsemna ora, Bëngbe Bëtsabeñe aíñe o ndoñe mondošbuáchema jinÿanÿiyama.

¹¹ Cachiñe quem luaroye betscó chanjésabo. Sempre šmochtsama ntšamo mora šmondamcá, y Bëngbe Bëtsábocana šmojóyëngacñe soyënga šmochtsinÿena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtšeservënama ndoñe tmontsajbanángbioye yochjatsataycá, chëngbe uacanana soye. ¹² Chë padecena soyënguentsana tšabá chamojábocana mo ayënjanayëngcá, chëngbiamana atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe

Bëtsábentsána quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atšbe tsëm uabaina. Lempe chca chanjama jinýanýiyama chënga Bëngbe Bëtsábenga mochtsemnama.

¹³ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

Laodiceoca ošbuachiyëngcá enefjuanënga jábuayenama

¹⁴ Mëntsánaca cha šonjaniyana: “Laodicea bëts pueblaca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: ¹⁵ Atše lempe sëndëtatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe šmontsaboté. Y chca, nýe batšatema šmojtseboše Bëngbe Bëtsá jaserviama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! ¹⁶ Chca, tšëngaftanga tibiye buyeshcá šmondmëna, y ndoñe quešmátšboše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtsébatena, mo nda tibiye búyeshe tojëtšbuashëtjácá, chcaye ndoñe bondogustana causa.

¹⁷ Er tšëngaftanga jtsichámuana bomnënga šmomna ca, puerte tšabá šmojábocana y tondaye cmontsabuašhebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebenama. Chca, tšëngaftanga šmontsemna nýa ndoñe tšabá, ínýenga ngmënanana chacmotsabamna, mo ndbomnjëmëngcá, mo jtanëngcá, Bëngbe Bëtsabe soyëngama ntsoertancá, y mo enašëngcá, bëtscá Bëngbe Bëtsabe soyënga ntsebošmncá. ¹⁸ Chíyeca cbabuayená, átšbentsána chašmuatsjinýe chë Bëngbe Bëtsabe soyënga y uámana soyënga, mo chë ena castellano jabemama, iñëjana fjëchnënguëse castellano átšbioye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonýá chë ba bacna soyënga ntšamo tšëngaftanga šmojtsamcá. Smochjaleséncia atše chachëjabuache tšëngaftanga Bëngbe Bëtsabe bominiñe tšábenga chašmotsemnama, mo juichëtjuama uafjantse entšayá átšbioye šmojtsantšabuamnañcá. Chca smochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chachëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominiñe šocanama shnana átšbioye šmojtsontšabuamnañcá. Chca smochjama, Bëngbe Bëtsabe soyëngama puerte tšabá chacmósertama.

¹⁹ Atše chë sëndábabuanýeshanënga sëndbaucácana y sëndbábuayenaye. Chíyeca, lempe ntšamo šmojobenacá smochtsama Bëngbe Bëtsá jaserviama, y juabnayana smochjatróca, y nýets tempo puerte smochtseboše Bëngbe Bëtsá jtseservénana. ²⁰ Nderado canýe tšabe amigo yebnoye tojabo y tojachembo, tšëngaftanga smojouenëse y bëšáša smojebiatëfjëse, cha jamashënguana, y cánýiñe cháftaca joyejuayana y jasana. Cachcá, atše entšanga sëntsachembuana chašmolesenciá chëngbe ainaniñe jtsiyenama.

Nderado nda šojóyeunase, atše chanjámashēngo chabe ainaniñe jtsiyenama, y nýets tempo cháftaca cánýiñe mo canýacá chanjéftsemna.

²¹ Chē padecena soyēnguentsana tšabá chamojábocana mo ayēnjanayēngcá, atše chanjama chēnga puerte bētsétsanga chamotsemnama ntšamo atše sēndmēncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayēngbioye sēnjayēnjanacá, y atšbe Taitáftaca chabe uámana tbemanentše tijotbemcá.

²² Chē jouenama tmojtsobenēnga, chamouena ndayá Espíritu chē ndayenache ošbuachiyēngcá enefjuanēnga yojtsétsétsnacá” —cha šonjaniana.

4

Chē Ainēnga Bēngbe Utabnabe uámana tbemanentša natsana imojtsechuanaye

¹ Chentšana mo otjenayoquēcá sēnjáninýe. Sēnjanrrepará y sēnjáninýe celoca canýe bēsáša enjétsatēfjna, y chē natsana sēnjanuena oyebuambnayana, chē enjamna mo canýe trompetēfjua cuafjuajatētcá, mēntšá šonjétsatsaye: “Moye másēngo, atše chochanjinýinýiye ntšamo más chcoye yochjopasacá ca.”

² Cachora, chē Uámana Espíritbeyeca, mo atšbe ainana celoca cuaftsemncá atše sēnjanuquedá, y sēnjáninýe celoca enjésemna canýe reybe uámana puesto, y chentše canýa enjésetbemana. ³ Chentše enjésetbemaná enjamna, puerte tēshinýná mo jaspe ndētšbecá, puerte buanganá mo cornalina ndētšbecá, y chē uámana puesto shēconana canýe tsēfcuácuatjo enjamna, y enjétebuashinýinýana mo canýe esmeralda ndētšbecá. ⁴ Chē reybe uámana puesto juachajana, inýe uta bnétsana y canta puesto sēnjáninýe, y chiñe uta bnétsana y canta bētsējémēnga amēndayēnga monjésetbiamana, uafjantsējuangá uichétjonēnga, y castellano coronēshangá monjétsabestšajona. ⁵ Chē uámana puestentšana enjétsobocana tcuinýējēnga, becá shauenanana y juesasanana; y chē uámana tbemaniñentša natsanoicna, canýsēfta uajuinýanēsha enjétsangbototjuana; chē uajuinýanēshangá entsayana chē Bēngbe Bētsabe canýsēfta espíritēnga. ⁶ Y chē uámana puestentša natsanoica enjésemna mo canýe mar bejaycá, tēshinýniye mo canýe cristal ca uabaina ndētšbecá.

Chē luariñe tsēntsaca, chē uámana puesto enjésemnentše y chē shēconánējana monjésemna canta Ainēnga, nýétsañe fšnēbēngaca, natsanoica y stēsoica. ⁷ Chē natsana Ainá enjamna mo canýe leoncá, chē inýe Ainá mo canýe torošcá, chē inýe Ainá enjánbomna mo canýe entšabe jubiácá, y chē inýe Ainá mo canýe águila tojtsongüefjnacá. ⁸ Chē canta Ainēnga, cada ona chnēnguana juatēngmiásha enjanábomna, y tsoicajana y shjoicajana nýétsañe fšnēbēnga monjánbomna. Y chēnga nýets tempo, ntjochnacá mēntšá monjánichamo:

¡Uamaná, Uamaná, Uamaná, Bēngbe Utabná,
Bēngbe Bētsá nýets obenana bomná,
nda enjamná, endmēná y sempre echanjéftsemná ca!

⁹⁻¹⁰ Chca chē Ainēnga Bēngbe Bētsá bētscá tmontanchuá, Bēngbe Bētsá chē uámana puestentše tbemaná, chē nýets tempo y nýetsca tescama oyená. Chēnga puerte respeto chabiamana monjétebomna y bētscá tmontanchuá. Cada ora chēnga chca tmonjanma ora, chē uta bnétsana y canta bētsējémēnga amēndayēnga, chē uámana puestentše tbemanabe shecuatšentše joshamentšiyana y chábioye jtsatschuanayana, chē coronēshangá chē natsanoica jutšanana, y mēntšá jtsichámuana:

¹¹ Aca n̄yets mercedo condětsobuájoñe, Běngbe Utabná y Běngbe Bětsá, entšanga chamotsin̄yan̄nama, aca puerte bětsá comnama, y chamotsichamo aca n̄yets respeto buajoná comna, y n̄yets obenana bomná comna ca, er aca n̄yetsca soyēnga tcojama; aca icnabóseyeca chē soyēnga yojtsemna y aca chca tcojanma ca.

5

Chē uabemana uándmanana tsbuanácha y chē Oveshatema

¹ Chē uámana puententše enjetsetbemanabe catsbioica cucuatšifne can̄ye uándmanana tsbuanáchanaca sēnjánin̄ye, y n̄yětsañe enjětsabemana tsoicajana y shjoicajana, y can̄ysēfta tsengájaše sellēngaca enjětsajandmanana. ² Y can̄ye ángel puerte obenana bomná sēnjánin̄ye, y cha mēntšá enjětsayebuache: “¿Nda mercedo yobuájona, quem uándmanana tsbuanácha jutěfjonama y chē sellēnga jutsēcama ca?”

³ Pero, ni celoca, ni quem luarentše, ni quem luarentša jashenoye, ndocná quenjatsmēna obenánaca chē uándmanana tsbuanácha jutěfjonama, ni juin̄yama. ⁴ Y atše puerte sēnjánenobošachna, er ndocná ntjón̄ynana mercedo buajoná chē uándmanana tsbuanácha chautěfjonama, ni chauin̄yama. ⁵ Pero can̄ya chē bētsějémēnguentšá šonjaninyana: “Ndoñe más matenóbošachena; mouena, chē Judabe pamillentšá, León ca uabobainá, mando y obenana bētsēbomnama, chē rey Davídbentšana Entšá, tonjayēnjaná; cha entsobena chē uándmanana tsbuanácha jutěfjonama, y chē can̄ysēfta sellēnga jutsēcama ca.”

⁶ Chora sēnjánin̄ye, chē uámana puesto y chē canta Ainēnga y chē bētsějémēngbe tsēntsaca, can̄ye Oveshatema tsanana, pero enjětsin̄yna mo cuafstobacá. Chē Oveshatema enjánbomna can̄ysēfta tsětjonēse y can̄ysēfta fšněbé. Chē can̄ysēfta fšněbé monjanin̄ynin̄ná chē Běngbe Bětsabe can̄ysēfta espíritēnga, chē Běngbe Bětsá n̄yets quem luarējana tojánichamonga. ⁷ Chē Oveshatema tonjanobeconá y chē uándmanana tsbuanácha tonjanaca, chē uámana puententše tbemanabe catsbioica cucuatšentšana; ⁸ y chabe cucuatšifne tonjanaca ora, chē canta Ainēnga y chē uta bnětsana y canta bētsějémēnga amēndayēnga chē Oveshatembe shecuatšentše tmonjanoshamentšé. N̄yetscanga monjětsētbēna arpangá y castellano copbenga jútjena inciensiýeca; chē copbenga inciensiýeca enjamna chē Běngbe Bětsabe entšanga tmojayana palabrēnga, cháftaca jencuéntama ora. ⁹ Y quem tsēm canto montsancántaye:

Aca mercedo condětsobuájoñe, chē uándmanana tsbuanácha chacuacama y chē sellēnga chacutsēcama; er acbe buifne juabuáshanēse tconjanóbana, y chca enjamna mo crocénana cuafjětsajacá, Běngbe Bětsabiama chamotsemnama, entšanga n̄yetsca cachca buifne bomnēnguentšana, n̄yetsca biyana bomnēnguentšana, n̄yetsca can̄ye entšanguentšana, y n̄yetsca mándayēngbentša entšanguentšana.

¹⁰ Aca tcojama chēnga chamotsobena ácaftaca jtsemándayama y uámanēnga chamotsemnama, Běngbe Bětsábioye mo bachnangcá chamot-seservénama,

y quem luarentše chēnga montsemánda ca —chēnga monjětseversiaye.

¹¹ Y chca sēnjětson̄yaye ora, mallajta angelēngbe oyebuambnayana sēnjuenuena, y chēnga monjětsemna chē uámana puententše, chē Ainēnga y chē bētsějémēnga amēndayēngbe shēconana. N̄yetsá bētsacá angelēnga monjětsemna, corente mallajta; ¹² y chēnga mēntšá monjětsayebuache: ¡Chē Oveshatema cuafjobacá endmēná,

merecido endëtsobuájoñe, nyets obenana, nyets bomnana, nyets osertánana y nyets añemo chaotsebomnama, y entsanga chabiana chamotsichamo cha nyets respeto buajoná yomna ca, y chamotsinñanñama cha puerte bëtsá y uamaná yomnama, y nyetscanga chamotsatschuanama ca! —chënga monjétsayebuache.

¹³ Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar bëjayoca, chëngnaca mëntšá monjétsichamo:

¡Chë uámana puestentše tbemanábioye y chë Oveshatema nyetscanga nyets tempo y nyetsca tescama chamótsatacheuanaye y chamotsichamo chata puerte uámanata y nyets respeto buajonata ibomna ca, y chamotsinñanñá chata puerte bëtsëtsata y obenata bëtsemnama ca!

¹⁴ Y chë canta Ainëngna monjétsichamo: “Chca chaotsemna ca.” Y chë bëtsëjémënga amëndayëngna tmonjanoshamentšé y chátbioye monjétsatacheuanaye.

6

Chë Oveshatema chë canyësëfta sellënga tonjanëtsëcá

¹ Chentšana más sënjáninýe; chë Oveshatema chë canyësëftentšana natsana sello tonjanëtsëcá ora, sënjanuena canya chë canta Ainënguentshana puerte jabuache, mo cuafjajuesascá, mëntšá enjétsichamo: “¡Mabo ca!” ² Sënjanrrepará y sënjáninýe canye fjantse couaye, y chábeñe enjetsenjaquená canye arquëja enjétsatbëna. Chábioye canye coronëshá tmonjaníyë, y mo canye ayëñjanayacá tonjëftsanbocna, y cabá más jatsyëñjanámnaca.

³ Chë Oveshatema chë inýe sello tonjanëtsëcá ora, sënjanuena chë inya chë canta Ainënguentshana mëntšá enjétsichamo: “¡Mabo ca!” ⁴ Y inýe couaye tonjánbocna, canye buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entsanga chamotsenóbama; y canye bëts espadëja tmonjanoyé.

⁵ Chë Oveshatema chë inýe sello tonjanëtsëcá ora, sënjanuena chë inya chë canta Ainënguentshana mëntšá enjétsichamo: “¡Mabo ca!” Sënjanontjësé y canye ftsenga couaye sënjáninýe, y chë enjetsenjaquená canye romanësha enjétsëtbëna. ⁶ Y chë canta Ainëngbeñe canye oyebuambnayana mëntšá sënjanuena: “Nýe canye kilo trigo canye tesca trabajuama, y unga kilo cebadá canye tesca trabajuama; pero chë aceitiye y chë vínoyna ndoñe cattsepochócase ca.”

⁷ Chë Oveshatema chë inýe sello tonjanëtsëcá ora, chë ústonoca Ainá enjétsichamo: “¡Mabo ca!” ⁸ Sënjanontjësé y canye shatsësiye couaye sënjáninýe; chë enjetsenjaquená Obanana ca enjanabaina, y stëtsóica bonjétsëstona canya, Obanënga imomna luare ca uabainá; y chátbioye obenana tmonjanatšatá cántañentšana cánýentše quem luarentše jtsepochócase, chentša entsanga jtsapochócase, entsanga tmojtsentsjanama, bëts shëntsanëngaca, šocanëngaca y quem luarentša tšátjaye bayëngaca.

⁹ Chë inýe sello tonjanëtsëcá ora, sënjáninýe chë altarentša tajsoye chë tmojanóbanëngbe espíritënga, chë Bëngbe Bëtsabe palabra entsanga abuayinayama tmojanóbanënga. ¹⁰ Chora chënga tmonjanontšé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entsangbiama cochjayana ndoñe tšabá tmonjamama, y chë bëngbioye obanayama cochjácastigaye ca?” ¹¹ Chentšana nyetscángbioye

uafjantse entsáyá tmonjaníyé y tmonjanéyana batsatema más chamobatmá ca, chë cachëngcá Crístbeyeca catšátanga y oservénënga, chë cachëngcá mochjanóbanënga, nÿetscanga chocha chamojtseemnëntscuana.

¹² Y más sënjáninÿe; chë inÿe sello cha tonjanëtsécá ora, jabuache fshantse tontsanangmémana; shinÿe tontsanftsénganga, mo chë obaná tojtsemnama juichëtjuama entsáyacá, y nÿets juashcona mo buiñcá enjétsinÿna, ¹³ y estrellatémënga celocana fshantsoye tontsantquécjana, mo canÿe higo betiye jabuache bínÿiaca tojtseshatíyeyna ora, chë nguëfshna higuëbenga cuafjatquécjancá. ¹⁴ Y celoca luare tontsanenatjëmba mo canÿe tsbuanácha cuafjuandmanacá, y nÿetsca tjañe y béjayoca fshantsënga, chë ndayentse enjamnentšana tontsanojuaná; ¹⁵ y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe ínÿabiama oservénënga y chë cachëngbiamá trabájayëngnaca, chë cuevëshënguiñe y bëts ndëtsbenguenache tjañe tmonsanóitana; ¹⁶ y chë tjañëngoye y chë ndëtsbengoye montsanichamo: “¡Bëngbioye šmotsëtebuantsá y šmotsaitame, chë uámana puestentse tbemanabe bominÿentsana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! ¹⁷ Er chë uachuana te chabe castigo jtsebínÿnama te tojóshjango; y mora ¿nda nanjobenaye chë sóyeca ndoñe chamondëtsepochochocama ca?” —chënga montsanichamo.

7

Chë Bëngbe Bëtsábioye oservénënga chë uabouana castigüentšana mochántsatsebacana

¹ Chca tonjanopasá chentsana, canta angelënga sënjánanÿe, monjétsatsana chë quem luarentša canta opochócayenache; chënga ndoñe quemënjatanleséncia chë canta binÿiënga jtsebínÿnama, ndoñe chaondëtsebinÿiayama, ni fshantsentse, ni mar béjayoca, ni ndocna betiyeshënguiñe. ² Inÿe ángelnaca sënjáninÿe, shinÿe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inÿe canta angelëngbioye, ndëmuanÿengbioye obenana tmojanatšatá chë fshantsentse y mar béjayoca lempe jtsepochochocama, chëngbioye jabuache tonjánabachembo: ³ “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiamá oservénëngbioye chë sélloca juentsaca fchayauínÿnanantscuana, ndoñe chamondëtsepochochocama ca!”

⁴ Y sënjanuena buétanga chë sélloca tmojánauinÿnanayama: canÿe patse, canta bnëtsana y canta uaranga entsanga uinÿnanánënga nÿetsca Israeloquentša bëts pamíllanguentšana.

⁵ Judabe pamillentsana, bnëtsana uta uaranga uinÿnanánënga;

Rubenbe pamillentsana, bnëtsana uta uaranga;

Gadbe pamillentsana, bnëtsana uta uaranga;

⁶ Aserbe pamillentsana, bnëtsana uta uaranga;

Neftalibe pamillentsana, bnëtsana uta uaranga;

Manasesbe pamillentsana, bnëtsana uta uaranga;

⁷ Simeonbe pamillentsana, bnëtsana uta uaranga;

Levibe pamillentsana, bnëtsana uta uaranga;

Isacarbe pamillentsana, bnëtsana uta uaranga;

⁸ Zabulonbe pamillentsana, bnëtsana uta uaranga;

Josebe pamillentsana, bnëtsana uta uaranga;

y Benjaminbe pamillentsana, bnëtsana uta uaranga entsanga.

Chë mallajta entsanga uafjantsëjuangá uichëtjonënga

⁹ Chentsana, sënjanrrepará y mallajta entsanga sënjánanÿe, ndocná quentaisobenaye jacúntana, nÿetsca mándayënguentsana, nÿetsca cachca buiñe bomnënguentsana, nÿetsca canÿe entsanguentsana, y nÿetsca biyana bomnënguentsana; chënga monjétsatsana chë uámana puesto chë Oveshatembe natsanentse, uafjantsëjuangá uichëtjonënga y ramëshangá monjétsëtbëna. ¹⁰ Nÿetscanga tša monjétsaye buache:

¡Bënga atsebacayana endobá, Bëngbe Bëtsá,
chë uámana puestentse entsetbemanábentsana,
y chë Oveshatémbentsana ca!

¹¹ Y nÿetsca angelënga, chë uámana puesto y chë bëtsëjémënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentsé, fshantsóntscoñe jotsejbénase, y Bëngbe Bëtsá tmonjanadorá, ¹² mëntšá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entsanga chamotsinÿanÿná cha puerte bëtsá y uamaná bëtsemnama; cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

¹³ Chentsana, canÿa chë bëtsëjemënguentsá tonjanoyebuambá y šonjantjá: “¿Ndëmuanÿenga imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiana cotátsëmbo ca” —atše sënjanjuá.

Y cha šonjaniyana: “Chënga montsemna chë jabuache ngmenënguentsana tšabá tmojábocanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsa-boshabé y chë Oveshatembe buiñeca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna,

y chábioye nÿets tempo chabe delante mondëserveda,

y chë uámana puestentse entsetbemaná,

chëngbenache jtsemnëse, chënga echántsanÿena, mo cuafjutsebotscá.

¹⁶ Ya ndoñe más shëntsana, ni uajuendayana quemochátsbomna;

shinÿama, ni yapa jënÿama ya ndoñe más quemochátssufrina;

¹⁷ er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënÿa,

y echanjunatse bėjaye vida bomniye yóbocana luaroye,

y Bëngbe Bëtsá echanjama ya ndoñe más ngmënanana chamondëtsebomnama ca” —cha šonjanjuá.

8*Chë ústonoca sello*

¹ Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nÿetsá.

² Chora sënjánanÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjaniyé.

³ Chentsana inÿe ángel tonjánashjango, canÿe castellano matbëtémaca incienso jajuinÿiyama, y altar natsanoica tonjantsá; chábioye bëtská incienso tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná

jëtschuayama, cánÿiñe nÿetsca chë Bëngbe Bëtsabe entsanga tmojoyebuambá palabrëngaca, cháftaca jencuéntama ora. ⁴ Y chë incienso juinÿentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entsanga cháftaca jencuéntama palabrëngaca. ⁵ Chentsana chë ángel chë incienso jajuinÿiyama matbëtema tonjanca, chë altarentša chebábengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëts cá tcuinÿënga, y quem luare tontsanangmëmana.

Chë trompetëfjuangá

⁶ Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

⁷ Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y iñeshe, cánÿiñe buiñeca. Ungañentsana cánÿentse quem luarentse tontsanjuinÿe, úngañentsana cánÿentse betiyeshënguiñe y nÿetsca nguëfshna shacuanënguiñnaca.

⁸ Chë inÿe ángel chabe trompetëfjua tonjanájatëto, y chora chë mar béjayoye tmonjanëtsana canÿe soye mo canÿe bëts tjañe tojtsangbototjuancá, y chë mar béjayiñe úngañentsana cánÿentse buiñe tontsanóbema. ⁹ Chë mar béjayiñe vida imobomnëngbeñe úngañentsana cánÿentse tontsanopochocá, y chë barquënguëntsñaca úngañentsana cánÿentse.

¹⁰ Chentsana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿanëshacá enjëtasangbototjuana, celocana tonjanótsatse chë úngañentsana cánÿentse béjayënguiñe, y béjaye óbocanénache.

¹¹ Chë estrella enjanabaina Untjana ca; y chë úngañentsana cánÿentse buyeshënguiñe untjiye tontsanóbema, y chë untja búyeshe causa ba entsanga tmonjanóbana.

¹² Chë inÿe ángel chabe trompetëfjua tonjanájatëto, y chora tontsanóndbema chë úngañentsana cánÿentse shinÿiñe, y chë úngañentsana cánÿentse juashconiñe y chë estrellënguiñnaca. Chca, nÿetsca chentsa úngañentsana cánÿentse ibetiñe tonjanoquedá, y chë causa ndoñe quemëntëtsebinÿnaye posufta horëntscuana, bnëté canta hora y ibeta canta hora.

¹³ Chentsana, sënjanrepará y sënjanuena canÿe águila, tsbanánoca celoca enjetsongüëfjná, jabuache mëntsá enjëtichamo: “¡Tša lastema, tša lastema, tša lastema quem luarentša entsangbiama, chë inÿe trompetëfjuangá chë inÿe unga angelënga chamojuájatëto ora ca!”

9

¹ Chentsana chë inÿe ángel chabe trompetëfjua tonjanájatëto, y sënjaninÿe canÿe ángel quem luaroye jastjanguana y enjëtisnÿna mo canÿe estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfjnentsa llavëfja. ² Chë uabouana tboca atëfjnentsë tonjánatëfjo, y chentsana becá ngona tonjanótsjua, mo bëts hornentsa ngoncá; y chë uabouana tboye atëfjnentsë ngona causa shinÿe tontsanibétata y nÿets celoca ena ngona enjëtsemna. ³ Chë ngonentsana ba tsátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá. ⁴ Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sëlloca nduinÿnanana entsangna aíñe. ⁵ Pero ndoñe chematanalesenciá entsángbioye jobáyana, ndayá nÿe jamama chënga shachna shinÿëntscuana tsetšanana

chamotsebomnama; y chë chënga monjánama chamotsebomnama tsetšanana enjamna mo canye alacranbe uetjoniñcá.

⁶ Chca tempo chaojtsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinyena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

⁷ Chë tsátjaye chapulinga monjétsinyäna mo couayëngcá prontánënga jama entsángaftaca jéntsjava; chëngbe bestšašine monjanábomna mo castellano coronëshangacá, y chëngbe jubiá enjamna mo entsabe jubiácá. ⁸ Stjënashe monjábomna mo shembásabe stjënashacá, y chëngbe juatsašënga mo leonbe juatsašëngcá. ⁹ Chëngbe cuerpënga jenëuyanama cochaca monjábomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtsacá enjamna, mo ba cochëshangá couayënga cuaftsasjojnacá, chë inyëngaftaca jéntsjava tmojëftsátjajo ora tojtseshauenancá. ¹⁰ Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjábomna shachna shinjëntscuana entsanga mal chamotsepasama. ¹¹ Chë tsátjaye chapulinga canye amëndayá monjábomna, chë uabouana tboca mándaye ángel; hebreo biyaña cha uabainá Abadón ca y grieguiña Apolión o pochocayá ca.

¹² Chë natsana pochócayana ya tocjochnëngo, pero más chcoye cabá inye uta soye más pochócayana cachcá echántsemna.

¹³ Chentsana chë inye ángel chabe trompetëfjua tonjanájetëto, y canye oyebuambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentsana enjëtsohocana. ¹⁴ Y chë oyebuambnayana, chë trompetëfjua tonjanájetëto y enjëtsetbëna ángelbioye tbonjaniana: “Chë canta angelënga chë Eufrates bëts fshájaye tsachoca utsbuanënga mëjafjoná ca.” ¹⁵ Y chë canta angelënga tmonjanëjafjoná; y nya chë ora, chë te, chë shinye y chë uatama chëngbioye tmojanaprontá, chë quem luarentša entsángbeñe úngañentsana cányëntšënga jtsëbáyama. ¹⁶ Atše sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

¹⁷ Mëntsá sënjananye mo otjenayoquëcá chë couayënga y chë chëngbeñe enjaquenënga: Chë enjaquenënga monjábomna morocho soyënga cochaca, jenëuyanama, y chë soye buanganana enjáninyäna, mo iñcá, y fchendana mo chë uámana ndëtsbé jacincá y tsësiyana inynana mo azufrcá; y chë couayënga monjábomna mo leonbe bestšašcá, y chëngbe uayoicana enjëtsohocana iñe, ngoná y azufrana. ¹⁸ Y chë úngañentsana cányëntšë entsanga tmonjanóbana quem unga uabouana pochócaye soyëngaca, chë couayëngbe uayoicana enjëtsohocanana: iñe, ngoná y azufrana. ¹⁹ Er chëngbe obenana entsanga japochócama monjábomna uayáshañe y uascuatšëjuañe; er chëngbe uascuatšëjua enjuamna mo mëtscuayëngcá, bestšašëngaca, y chëjuanga causa entsanga mal montsanpásaye.

²⁰ Pero chë inye entsanga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematana-jbaná amana chë bacna soyënga ntšamo monjanamcá; ndoñe chematana-jbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinýama, ni jouenama, ni jtsanama. ²¹ Juabna ndoñe chematantrocá y

ndoñe chematanajbaná entsanga obanayana, encjuanayana, bacna soyenga boyabása o shembásaftaca jtsamése oyenana, ni atbëbanana.

10

Chë ángel base uándmanana tsbuanáchaca

¹ Chentšana sënjáninýe inýe ángel, puerte obenana bomná; celocana enjétsastjajuana, y chabe shéconana canýe jantsetéshe enjétsamna; chabe bestsáse tatsétsacá canýe tséfcuácuatjo. Chabe jubiá shinýcá enjétsesuashinýinýana, y chabe shecuatšenga mo úcuatjona niñëbenga cuaftsoiñcá. ² Chabe cucuatšiñe enjétsëtbëna canýe base uándmanana y utëfjna tsbuanácha. Chabe catsbioica shecuátseca chë mar béjayoca tonjantsá, y chë uañicuayóicatšecna, quem fshantsentše. ³ Y jabuache tonjanoyó, mo canýe León cuaftseyocá; y tonjanoyó ora, canýsëfta juesasanentša jabuache shauenanana sënjanuena. ⁴ Chë canýsëfta juesasana chca tmonjanoyebuambá ora, atše sënjanoprntá ntšamo chënga tmonjanayancá juabemama; pero canýe oyebuambnayana celocana sënjanuena, mëntšá šonjétsatsaye: “Nýe aca cochtsójuabnañe ntšamo chë canýsëfta juesasana tmonjayancá, ndocnábioye catjauyana, y chë soye ndoñe catjuábema ca.”

⁵ Chora chë ángel, chë mar béjayoca y quem fshantsentše atsaná sënjaninýá, chabe catsbioica cucuatše celoye tonjanatsbaná, ⁶ y tonjanjurá Bëngbe Bëtsabiama, chë nýets tempo y nýetsca tescama oyenabiama, chë celoca, quem luare, chë mar béjaye, y lempe chë luarënguiñe yobinýncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, ⁷ er chë tempo chaojóshjango, chë ústonoye ángel chabe trompetëfjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yokuabnacá; chë soye nýetsca entšángbioye cha ndoñe chenatinýanýé, ntšamo tempo cha chabe oservëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniana: “Motsa y mauaca chë mar béjayoca y quem luarentše ángel entsemnabe catsbioica cucuatšiñe base uándmanana y utëfjna tsbuanácha ca.”

⁹ As atše chë ángelbioye sënjána; chë base uándmanana tsbuanácha chašuíyema sënjaniana, y cha šonjanjuá: “Quemécha, motsásañe. Acbe uayoye uamešquënëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

¹⁰ As chë base uándmanana tsbuanácha chë ángelbe cucuatšentsana sënjanaca, y sëntsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema. ¹¹ Chora šmonjaniana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canýe luarentša entšángaftaca, ba mándayëngbentša entšángaftaca, ba biyana bomna entsanguentšëngaftaca y quem luarentša reyëngaftaca ca.”

11

Chë útata Bëngbe Bëtsabe juabna oyebuambnayata

¹ Chentšana canýe medídaye niñëfja šmonjanoyé, mo jatsëmbonëfjcá, y šmonjaniana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entsanga chentše Bëngbe Bëtsábioye imojtsadorana. ² Pero chë Bëngbe Bëtsabe yebnentše más shjoica luarna

cachcá cochjonÿaye, ndoñe catjamedída, er chiñe chë ndoñe judiëngbiana endmëna; y chënga, chë uámana ca uabaina bëts pueblama, canta bnëtsana y uta shinÿëntscuana soyënga mochántsama chiñe jtsepochoçama, mo cuaft-sebotajnacá. ³ Pero atse, útata atsbiana tatsëmbuata y oyebuambnayata chanjichamuá atšbe cuenta entšángbioye jábuayenama, canÿe uaranga y uta patse y chnënguana bnëtsana tentscuana. Chatna uajojësha entšayangá uichëtjonata bochantsemna, chca, ngmena bomnama jinÿanÿiyama ca” — chata tbonjánayana.

⁴ Quem útata atsbiana tatsëmbuata y oyebuambnayata bontsinÿinÿena chë uta olivos betiyeca y chë uta candelerëseca, ntšamo Bëngbe Bëtsá, chë quem luarentse mandayabe delante endmëncá. ⁵ Nderado nda tojtseboše chatbiana bacna soye jamama, ndoñe quentatobenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochóçaye; nderado nda tojábošena chatbiana bacna soye jamama, cachcá cha buántsemna jóbanama. ⁶ Chë útata obenana bondbomna celoca jtsachtama, ndoñe chaon-duaftema, entšángbioye Bëngbe Bëtsabiana chabojtsabuayiná tese; obenana béjayënga buiñe jtsebiama, y jamama quem luarentse chaotsóndbemama, nÿetscna pochóçaye soyëngaca, bueta sóynaca ntšamo chata tbojtsebošcá.

⁷ Pero ntšamo Bëngbe Bëtsabiana ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántatsjaye, echantsayënjaná y echantsëbaye. ⁸ Y chatbe óbana cuerpo, chë corente bëts pueblentsa tsáshenañe echanjo-quéda, chë chatbe Utabná tmojancrucificá luarentse, y chë bëts pueblo inÿetsá juabáyamna nántsemna mo chë Sodoma y Egiptó luaroycá. Chentse endmëna mo chë bëts pueblënga Sodoma y Egiptcá, er chentse chë entšanga yapa bacna soyënga jtsamana. ⁹ Y unga y tsëntsa tentscuana, chë obanatbe cuerpo mochantsonÿaye, nÿetsca canÿe luarentsa entšanga, nÿetsca cachca buiñe bomna entšanga, ba biyana bomna entšanguentsana y ba mándayëngbentsa entšanga; ndoñe quenátslesenciana chata jutabuantsama. ¹⁰ Chata bochjóbanama, quem luarentse oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerte chamosufrima.

¹¹ Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentsana tbontantsata, y chë monjétsantješnënga tša uatjana tonjanëbuache. ¹² Chora canÿe jabuache oyebuambnayana tbonjanuena, celocana mëntsá enjétsëtsësnaye: “Moye mašënguata ca.” Y chatna canÿe jantsetëshiñe tbonjántsjua, y chatbe uayayënga chca monjétsionÿaye. ¹³ Cachora quem fshantse jabuache tontsanangmëmana, y chë bëts pueblentsë bnëtsanentsana cánÿentse tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

¹⁴ ¡Chë inÿe uabouana soye quem luare japochóçama, mora tocjochnëngo, pero betscó chë ústonoye uabouana pochóçaye soye echanjóshjango!

Chë ústonoye ángelbe trompetëfjua

¹⁵ Chë ústonoye ángel chabe trompetëfjua tonjanájatëto ora, celoca tša monjétsayebuache, mëntsá monjétsichamo: Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama, y chë amëndayana echántsemna nÿets tempo y nÿetsca tescama ca.

16 Y chë uta bnétsana y canta bëtsëjémënga amëndayënga, chë chëngbe uámana puestiñe Bëngbe Bëtsabe delante monjëtsetbiamanënga, tmonjanoshamentšë, fshantsóntscoñe jotsejbénase, y Bëngbe Bëtsá tmonjanadorá, 17 mëntsá jayanëse:

Bëngbe Utabná, Bëngbe Bëtsá nyets obenana bomná, aca chë mora cha condmëná y chë tempo cha conjamná cbontsatschuaná, er nÿa mora acbe bëts obenánaca soyënga cochjama, acbe amëndayana jóntsama.

18 Ba luarentša entsanga ácaftaca tmonjanotšatjyená; pero chëngaftaca cmojetnama chë uabouana castigo jtsebínÿnama te tocjóshjango, chë tempo tmojanóbanëngbiamá jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatsatayama chë acbiamá oservénëngbioye, chë acbe juabna oyebuambnayëngbioye, chë acbe entsángbioye, y chë acbe uabaina nyetscangbiamá más bëts uabainana yomnama juabnayëngbioye, uámanënga y nduámanënga; y chë tempo tonjóshjango, quem luare pochocayënga jtsapochócyama ca — chënga tmonjánayana.

19 Chora, Bëngbe Bëtsabe bëts yebna celoca tonjantëfjo, y choye enjëtsebinÿna chë cajontema, ndayëtema yojaninÿanÿná ntšamo Bëngbe Bëtsá chabe entsángbioye tojanašebuachenacá; y chora enjëtsemna tcuinÿënga, tša shaue-nanana, juesasanana, quem fshantse tontsanangmëmana y bëtscá bëntstá tonjantquécjana.

12

Chë shembása y chë uabouana bayá

1 Chentšana, canÿe bëts soye celoca tonjanonÿná entsanga canÿe soye jinÿanÿiyama: canÿe shembása, shinÿe mo chabe uichëtjoniaca, juash-cona chabe shecuatšentša tajsoye, y chabe bestšašinë canÿe coronësha bnétsana uta estrellëngaca. 2 Chë shembása ngomamaná enjëtsemna, y chë šësona jónÿnama yojëtsobecuama jabuache enjëtseyoye, chë šësona jónÿnama cha puerte jasúfriama ibojamna causa. 3 Y chora inÿe bëts soye celoca tonjanonÿná, entsanga inÿe soye jinÿanÿiyama: canÿe uabouana dragón buanganá, canÿsëfta bestšašëngaca y bnétsana tsëtjonëšëngaca y chë bestšašënguiñe enjanábomna canÿsëfta coronëshangá. 4 Chabe uascuatšëjuaca úngañentšana cánÿentšë chë estrellatëmënga celocana tontsansjojó, y quem fshantsoye chëtëmënga tontsanëtsana. Y chë dragón chë šësona jtsebom-nama shembásabe delante tonjantsá, chë šësonatëmbioye jtsósañama, cha tojonÿná ora. 5 Chora chë shembása canÿe šësona boyabásetema bontsan-bomna, nda nyets luarenache entsángbioye yochtsamëndaye mo canÿe hi-erro varëfjaquécá. Pero chë šësona chábentšana tmontsanjuaná y Bëngbe Bëtsábioye, chabe uámana puestoye tmontsanámbañe. 6 Chë shembásana entsanga ndoyena luaroye tontsanachá, Bëngbe Bëtsá canÿe luare ibojabo-prónta choye, chentšë saná chamocaredadoma, canÿe uaranga y uta patse y chnënguana bnétsana tentscuana.

7 Chentšana celoca canÿe entsjanayana enjëtsemna: Miguel, chë angelëngbe amëndayá, y chabe angelënga chë dragónaftaca monjëtšentsjanaye. Chë dragón y chabe angelënga monjëtšatsjanaye, 8 pero ndoñe chematanobená

jáyenjanama, y chëngbiamama ya ndoñe más luare celoca quentétsemna. ⁹ Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtská entsángbioye aingñayá; quem fshantsoye cha tmontsantsatše, y chë cha yojanamënda angelëgnaca.

¹⁰ Chora canye jabuache oyebuambnayana celoca sënjanuena, mëntsá enjétsichamo:

Chë Bëngbe Bëtsá entsangama játsebacama tempo ya tonjóshjango.

Mora Bëngbe Bëtsá echanjínyanýie chabe obenana y mándayana,

y chabe Uámana Uabuayaná Jesucristbe obenana jtsemándayama;

er chë Cristbe delante bëngbe catsátanga mal aquedayá ya tmontábocna,

nda nyets tempo Bëngbe Bëtsabe delante mal enjanaquedayá.

¹¹ Bëngbe catsátanga cha tmonjayëñaná,

er Cristo, chë mo tmojóba Oveshatemcá, Bëngbe Bëtsá bacna soyëngama entsangama cháuperdonama,

tonjanóbana, chabe buiñe juabuáshanëse,

y chë ndegombre soyëngama chënga monjanóyebuambnáyeca;

er chëngbe vida chëngbiamama ndoñe quenjatámana;

Jesucristo jaserviama jóbanama chënga monjanprontana.

¹² ¡Chcasna, celoca corente oyejuayana chaotsemna,

y tsëngaftanga chë choca oyenëngbeñnaca!

¡Pero tša lastema chë fshantsoca y mar béjayoca oyenëngbiamama,

er chë diablo tsëngaftangbioye tonjástjango, corente tsatjayá,

er cha entsetátšëmbo ya nye batsá yojsábojamna chë chábioye mochjastígama ca! —enjétsichamo.

¹³ Chë dragón quem fshantsoye tmojtsantsatsáma tonjáninýe ora, chë šešona boyabásetema tbonjanëshjango shembásabioye tbontsanacmé. ¹⁴ Pero

uta juatëngmiásha, chë bëts aguilbeshá, chë shembásabioye tmonjaniyé,

chabiamama tmojanprontá luaroye chaongüefjoma, entsangama ndoyena luaroca,

chë dragónbentsána bënoca; y chentše enjamna chë shembásabioye saná

chamuájuatšema, unga y tsëntsa uatëntscuana. ¹⁵ Chora chë dragón, chabe uayo-

oicana bëts béjaye tonjanbuashëtjo chë shembásabe stëtsoica, chaobuama y

chabotsambama; ¹⁶ pero quem fshantse chë shembásabioye tbonjanájabuache,

er chë fshantse mo uayašacá tonjantëfjo, y chë dragonbe uayoicana béjaye

obocniye tontsanobmuánañe. ¹⁷ Y chë dragón chë shembásabioye tondaye

jamana chenatanobená causa, corente cacháftaca tbonjánetna, y tonjána chë

ínýenga, chë shembásabe basengcá mondmënënga játsjayama, ntšamo Bëngbe

Bëtsá yomandacá imobedecënënga, y ntšamo Jesucristo tonjanabuayená

ndegombre soyëngaca sempre imoyenënga. ¹⁸ Y chë dragón chë mar béjaye

tsachañe tonjantsá.

13

Chë dragón tonjanma, chë mar béjayoca uabouana bayá chabe obenana chaotsebomnama

¹ Chentšana atše sënjáninýe, canye uabouana bayá chë mar bejayoicana

tonjánbocna; enjánbomna canýsëfta bestšašënga y bnëtsana tsëtjonëšënga, y

chëšënguiñe bnëtsana coronëshangá, y chë bestšašënguiñe bañe enjétsabemana

Bëngbe Bëtsabiamama contra oyebuambnaye uabaina. ² Chë uabouana bayá

sënjaninýá enjamna mo canye leopardcá, mo osbe shecuášangaca, y chë

uayáshana mo leonbeshacá. Chora chë dragón tonjanma chë uabouana bayá

chaotsebomnama chabe obenana, y chabe uámana puesto jtsemándayama,

y chabe bëts mando. ³ Canye chabe bestšašënguentše enjétsinýna mo

jóbanama têtseniñcá; pero chentše tbontanóbema; y chora quem luarentša nýetsca entšanga ojnánánenga monjésemna, y chë uabouana bayábioye montsanëyeunana. ⁴Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mentsá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

⁵ Chë uabouana bayábioye tbonjanlesenciá corente podesca Bëngbe Bëtsabiama chaotsóyebuambnama, y obenana tbonjanatšetá, canta bnëtsana y uta shinýentscuana chaotsemándama. ⁶ Y podesca Bëngbe Bëtsabiama tonjánayana, soyënga chabe contra, chabe bëts yebnama y chë celoca oyenëngbe contra. ⁷ Chábioynaca tbonjanlesenciá chë Bëngbe Bëtsábenga imomnënga játsjayama, jáyénjanantscuana; y obenana tbonjanatšetá chaotsemándama nýetsca cachca buiñe bomna entšángbeñe, nýetsca canýe entšángbeñe, nýetsca biyañe bomnëngbeñe, y nýetsca mándayëngbentša entšángbeñe. ⁸ Chë uabouana bayá nýetsca quem luarentša entšanga mochántadorana. Chë entšanga mondmëna ndëmuanýengbe uabaina ndoñe yontsábemana, chë Bëngbe Bëtsábioye jëtschuayama mo canýe oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nýetscanga chë tsabe vida mochjónýenëngbe uabaina.

⁹ Chë jouenama obenënga, chamouena.

¹⁰ Chë cárceloye jama ibomná, cárceloye bochanjotóca jama; chë espadējaca jobanamá, espadējaca echanjóbana.

Chíyeca quem luarentše entseyta, chë Bëngbe Bëtsábenga imomnënga pade-cena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

¹¹ Chentšana inýe uabouana bayá sënjáninýe, quem fshantsentsana enjëtsebocana; uta tsëtjonëse mo oveshabešcá enjánbomna, pero mo canýe dragoncá, mo canýa Satanásbeyeca mandanacá enjëtsoyebuambnaye. ¹² Y enjánama soyënga chë natsana uabouana bayabe nýets obenánaca, chabe delante. Chë fshantsentša bayá tonjanma nýetsca luarentše oyenënga chamotsadoránama chë natsana uabouana bayábioye, chë jóbanama têtseniñe tbontanobemá. ¹³ Cha ba bëts soyëngnaca enjánama chabe obenana entšanga jinýanýiyama, entšangbe delante jamana iñe celocana fshantsoye chaótsatšamnaca. ¹⁴ Y cha tbonjanlesenciá chaoma chabe obenana jinýanýiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanéyana canýe soye chamopormá, y chë soye cháotsinýna mo chë natsana uabouana bayacá, chë espadējaca têtsená enjamná, y chora tsabá enjetsatsmená. ¹⁵ Y chë inýe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámna, y jamama chë chábioye ndoñe tmontsadoránënga chamóbanama. ¹⁶ Y tonjanma, nýetscángbioye, básenga y bëtsétsanga, bomnënga y ndbomnënga, cachëngbiama trabájayënga y nýe ínýabiama nýets tempo oservëngënga, catšbioica cucuatšñe o juentsaca chamuínýnanama. ¹⁷ Y ndocná quenjátanobena ni jiyama, ni jobuámiñama, chë uinýnanánana ndoñe tontsebomnëse; chë uabouana bayabe uabaina o chë chabe uabainama yomna número.

¹⁸ Chë número jinýenamna bëtscá osertánana jtseytana. Chë becá osertánana bomná cháuinýena ntšamo chë uabouana bayabe número iuayancá, er canýe

entšabe número endmëna. Chë número endmëna chë chnënguana patse y chnënguana bnëtsana y chnënguana.

14

Chë canye patse y canta bnëtsana y canta uaranga entsangbe canto

¹ Y más sentsanonýá. Sënjáninýe, chë Oveshatema, enjétsatsjabna Sión ca uabaina tjoca, y cháftaca monjëtsemna canye patse y canta bnëtsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina. ² Chora sënjanuena celocana canye shauenanana, mo bëtscá béjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá. ³ Chënga canye tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjémënga amëndayëngbe natsanentše. Y ndocná quenjátanobena chë canto juatsjínýana, nýe chë canye patse y canta bnëtsana y canta uaranga quem luarentšëngbentšana atsebácanëngna aíñe. ⁴ Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentša entsanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservénama. ⁵ Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntsamo chë unga angelënga tmojánayana

⁶ Chentšana inýe ángel sënjáninýe, tsbanánoca celëjana enjétsongüefjnaye. Cha enjánbomna canye nýets tempscama oservena buayenana soye, entsángbioye jáuyanama, nýets quem luarentše oyenënga, nýetsca mándayëngbentša entsanga, nýetsca cachca buiñe bomna entsanga, nýetsca biyañe bomnëngbeñe y nýetsca canye entsangbiamá. ⁷ Y jabuache mëntšá enjétsichamo: “¡Bëngbe Bëtsabiamá šmochjájuaboye cha nýetscangbiamá chë más uamaná endmënama, y cha šmochtsatschuanaye, er ya tonjóshjango chë tempo ntsamo entsanga tmojamama tsabá o ndoñe tsabá bëtsemnama cha cháuyanama! ¡Chë celoca y quem luare, chë mar béjaye y nýetsca chë fshantsentšana óbocana béjayënga tojamá šmochtsadorana ca!”

⁸ Chábentšana inýe ángel mëntšá enjétsichamo: “¡Ya bëts castigo, ya bëts castigo chë Babilonia bëts puebloca entsángbeñe echántsemna!, ndëmuanýenga tmojinýanýe ntsamo puerta bacna soyënga shembása o boyabásaftaca jt-samama y inýe corentë bacna soyëngnaca, y chentšana nýets quem luarentša entsanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnama ca.”

⁹ Chë útatbentšana inýe ángel jabuache mëntšá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinýnanana soye juentsaca o cucuatšíñe chamojajoma, ¹⁰ chánaca bontsemna, chë Bëngbe Bëtsabe uabouana castigo jasúfriana. Entsanga puerta bacna soye tmojamama, Bëngbe Bëtsá puerta tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerta mochanjatsetšená, íñeshe y azúfrecá. ¹¹ Chca chamojtsesufrina ora, becá ngona echantsóbocana, y chë ngona nýets tempo chca echantsótsjuaye; y chënga, chë uabouana bayá y chábioye jadórama pormana soye adórayënga, y chabe

uinñnanana soye bomnëngbiana, ndocna te chë tsetšanana queochatëjbana ca” —cha enjëtsichamo.

¹² Chíyeca quem luarentše entseyta, chë Bëngbe Bëtsabe mandënga obedecënga y Jesúsbeñe puerte ošbuáchiyana bomnënga, chë Bëngbe Bëtsabe entšanga, padecena soyënguiñe tmojtsemna ora, puerte uantana jtsemnana.

¹³ Chentšana canye oyebuambnayana celocana sënjanuena, mëntšá šonjëtsatsaye: “Mëntšá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánýiñe mo canýacá jtsomñëse ca.’ ”

“Aíñe ca” —chë Uamana Espíritu tonjayana —, “chënga ya ndoñe más queochátamna jatrabájana, ni jasúfriana, er chënga tmojama tšabe soyënga Jesús jaserviama, y chë soyëngama chënga tšabe bendicionënga mo uacanancá celoca mochanjóyëngacñe ca.”

Ndayá chë angelënga quem luarentše tmojanatbaná

¹⁴ Chora más sënjáninýe; sënjáninýe canye fjantse jantšetëshe, y chëshiñe canya enjëtsëtbemana. Cha enjamna mo canye entšacá; chabe bestšašhiñe enjanábomna canye castellano coronésha, y cucuatšhiñe canye puerte efšana mëntšá enjëtsatbëna. ¹⁵ Chentšana, chë celoca Bëngbe Bëtsabe bëts yebnëntšana inye ángel tonjánbocna, y jabuache bonjëtsatsaye chë jantšetëshiñe tbermanábioye: “¡Acbe mëntšaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!”

¹⁶ Y chë jantšetëshiñe enjantbemaná chabe mëntšaca quem luariñe tonjánachbonja, y nyets quem luarentše atbanániñe tonjanoquedá.

¹⁷ Chentšana inye ángel chë celoca Bëngbe Bëtsabe bëts yebnëntšana tonjánbocna; chánaca canye puerte efšana mëntšaca. ¹⁸ Y chë altarentšana inye ángel tonjánbocna, chë mando bomná íñesheca castigo entšangbiana jamama; y chë puerte efšana mëntšá bomna ángelbioye jabuache tbonjaniyana: “¡Acbe mëntšaca machbonja y chë fshantsoca nyetsca uvas betiyeshënguentša uvasëšangá mátabe, er ya uabochenëšangá entsamna ca!” ¹⁹ Y chë ángelna chabe mëntšaca quem luariñe tonjánachbonja, y nyetsca quem luarentša uvasëšangá tonjanátabe, y lempe chë juantšëtëtjiana luaroye tonjanëtsana. Chë soye entsinýinýná ntšamo yochtsemnana Bëngbe Bëtsabe uabouana castigo. ²⁰ Chë uvasëšangana, chë bëts pueblëntšana chaboye tmonjanantšëtëtje, y chë luarentšana tša buiñe tonjanóbocna; tonjanójutjé couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canýsëfta pochócaye soyëngaca

¹ Chentšana, inye bëts soye entšanga inye soyama jinýanýiyama, celoca sënjáninýe, canye puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë soyënga chaojtsemnëntšana ya ndoñe inye pochócaye soye yochántsemna, er chëntscoñe Bëngbe Bëtsá yochjacastíga, lempe ntšamo cha jamama tojanjuabocá.

² Canye mar béjaynaca sënjáninýe, mo cristalcá enjëtsinýna íñeca enájuaabniye; y chë béjaye juachaca monjëtsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nyetscanga chënga monjëtsabomna Bëngbe Bëtsá tojanëtsatá arpangá. ³ Chënga, canye canto

monjésecantaye ntšamo Moisés, chë Bëngbe Bëtsabe oserverná tojancantacá, y ntšamo chë Oveshatema tojancantacá. Měntšá monjésecantaye:

Puerte bëts soyënga y tšabe soyënga entsemna lempe ntšamo aca tcojanmcá, Bëngbe Utabná Bëngbe Bëtsá nyets obenana bomná;

lempe ntšamo jtsamëse aca icyena, acbe bominyiñe puerte tšabe y ndegom-bre soyënga yomna,

nyets luarënguenache entšangbe Rey.

⁴ Bëngbe Utabná, ¿nda nanjájuaboye aca nyetscangbiana ndoñe más bëtsá condmëna ca,

o ndoñe cmantsatschuanaye?

Nye aca uamaná condmëna;

nyetsca mándayëngbentša entšanga ácbioye mochanjabo,

ácbentše mochanjoshamentšiyë aca jadórama,

er ntšamo tcojamcá lempe entšángbioye mora tcojinñanyé,

y lempe ntšamo aca tcojamcá tšabá jtsemnana ca —monjésecantaye.

⁵ Chca chentšana sënjanontješé y sënjáninye chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyë leyënga uajónentše. ⁶ Y Bëngbe Bëtsabe bëts yebnentšana tmonjánbocna chë canysëfta angelënga, chë canysëfta pochócaye soyënga uambayënga, uafjantse lino entšëjuangá uabuashinñyanëjuangá uichëtjonënga, y tëntša castellano uasnanëjëngaca cochóntscóñe. ⁷ Chentšana, canya chë canta Ainënguentšá chë canysëfta angelëngbioye tonjanoyé canysëfta castellano codbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná. ⁸ Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinñyanana y obenana jtsinñanyayëse; y Bëngbe Bëtsabe bëts yebnoye ndocná quenjátanobena jamashënguana, chë canysëfta angelëngbe canysëfta pochócaye soyënga candochñënguëntscuana.

16

Chë castígoca codbenga

¹ Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canysëfta angelëngbioye mēntšá enjétsëtsësnaye: “Motsajna y quem canysëfta codbenga, chë Bëngbe Bëtsábocana endóbocana uabouana castígoca, fshantsoca šmochjabuashcja ca.”

² Chora chë natsana ángel tonjána y chabe codbé quem luariñe tonjanbuashcja, y nyetsca entšanga chë uabouana bayabe uinñyanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšénana.

³ Chentšana, chë inye ángel chabe codbé mar béjayoca tonjanbuashcja, y choca búyeshe buiñcá tontsanóbema, mo canye entšá obanabe buiñcá, y nyetscanga chë mar béjayoca vida bomnënga tmontsanóbana.

⁴ Chora chë inye ángel chabe codbé béjayënguiñe y béjaye obocanënguiñe tonjanbuashcja, y buiñe tontsanobiama. ⁵ Chentšana sënjanuena, chë béjayënguiñe mando bomna ángel mēntšá enjétsichamo:

Aca nyetsca soyënguiñe tšabá amá condmëna,

er aca tcojayana chë quem luarentša entšanga chca castigánënga chamotsemnama.

Bëngbe Bëtsá, Uamaná, mora chca condmëna y chca conjamna;

⁶ er chënga tmonjama, chë acbe entšanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nyets mercedo imobuájona chca japásama ca —cha enjétsichamo.

⁷ Altarocánënaca canye oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entšanga contsacastigacá, ndegombre y tšabá entsemna ca.”

⁸ Chentšana, chë inye ángel chabe copbé shinýiñe tonjanbuashcja; chë shinýe corente tontsanobonýaná y chíyeca entšángbioye íñesheca tontsanajuinýé. ⁹ Y nyetscanga uabouancá juinýnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

¹⁰ Chentšana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entšanga bichtaja montsanenójantsnaye, yapa tsetše causa; ¹¹ pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

¹² Chentšana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë bėjaye tontsanbuashjo, japróntama chë shinýe bocanoica luarënguentša reyënga y chëngbe soldadënga chëjana chámuachnëjnama.

¹³ Atše sënjáninýe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinýna. ¹⁴ Chënga monjamna bayëjëngbe espíritënga; bëts soyënga monjánama obenana jinýanýiyama, y montsanbocana nyets luarentša reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entšangbiana jabáyanama ntšamo chënga tmojamama, chë te chënga chabe contra chamotsetsjama.

¹⁵ Bëngbe Utabná Jesucristo mëntšá tojayana: “Smochjinýe, atše nýe ndeolpe chanjabo, mo canye atbëbanacá, chabiamna ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entšayá totsaboprontañacá, nýe enasá ndoñe chaondëtsemnama, y entšanga chca tmojinýe ora ndoñe chaondëtsëuatjama ca.” ¹⁶ Y chë bacna espíritëngna chë reyëngbioye tmonjanënatse canye luare, hebreniñe Armagedón ca uabáinoye.

¹⁷ Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canye jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

¹⁸ Chora enjétssemna tcuinýënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entšanga imobinýna orscana, ndocna te nýa chca quem luare tontsanëbanjó. ¹⁹ Chë puerte bëts pueblo úngañe tontsanójatá, y nyets luarentša bëts pueblënga tontsanáshajaye, y Bëngbe Bëtsá tojanenojuabó chë puerte bëts pueblama, Babilonia ca uabaina pueblama, chentša entšanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanójatá ora, cha chënga tonjanacastigá.

20 Mar béjayoca nyetsca fshantsenga y quem luarentsa nyetsca tjañe tontsatenatjëmbe. 21 Celocana bëtsëtsa bëntstbenga entsángbeñe tonjantquécjana, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tsa montsansufrina chë bëts pochócaye bëntstá causa, y chë pochócaye bëntstá chëngbiana puerta jabuache castigo enjamna.

17

Chë puerta bacna vida bomna shembásabe castigo

1 Canya chë canysëfta angelënguentsá, chë canysëfta copbenga monjanatbënënguentsá, tonjánabo y šonjaniyana: “Mabo; cbochanjinýinýiye ntšamo yochtsemna chë puerta bacna vida bomna shembása, chë béjayënguiñe entsetbemanabe castigo. 2 Quem luarentsa mandadënga cháftaca puerta bacna soyënga tmojama, y quem luarentsa oyenënga puerta tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerta cuafjotmenangcá ca.”

3 Chentsana chë ángel, atše chë Uámana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjáninýe canýe shembása, canýe uabouana buángana bayábeñe enjaquená; chë bayabe cuerpiñe nyëtsañe Bëngbe Bëtsabiana puerta bacá oyebuambnaye uabaina enjétsabemana, y enjánbomna canysëfta bestšaše y bnëtsana tsëtjonëse. 4 Chë shembása enjanichëtjona uámana shbuenda uafjatsenga y buángana entsáyá, y entsanbotamana castellánoca, uámana botamana ndëtsëtémëngaca y pérlica. Chabe cucuatšiñe canýe castellano copbé enjétsatbëna, jútjena puerta uaboyënja soyëngaca, y chë boyabásengaftaca cha tojanma puerta bacna soyëngaca. 5 Y chabe juentsaca canýe uabaina enjétsabemana, ndoñe josérta soye, mëntsá: “Chë puerta bëts pueblo Babilonia, tša bacna entsanga chentše, mo chë puerta bacna vida bomna shembásengbe bebmá cuaftsemncá; chentsana tojanóbocna quem luarentsa nyetsca puerta uaboyënja soyënga ca.” 6 Atše sënjáninýe chë shembása tëmiá, er cha tojanofsé chë Bëngbe Bëtsábenga imojamnëngbe buiñe, ndëmuanýengbioye tmojanëbaye Jesusbiana oyebuambnaye causa.

Chca sënjáninýe ora, tša sënjanenjaná. 7 Chora chë ángel šonjaniyana: “¿Ndáyeca tcojenjaná ca? Atše cbochanjauyana ntšamo yojtsayana chë shembása y chë chábioye bontsambá uabouana bayá, chë canysëfta bestšaše bomná y bnëtsana tsëtjonëse; chë soye ndocná quenátstatsëmbo. 8 Chë tconjinýe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanýengbe uabaina quem luare jobojátsama orscana ndoñe yonduábemana, chë tsabe vida mochjónýenëngbe uabaina iuábemana librësañe, chënga mochanjenjaná, chë bayá chë tempo enjaniyená y mora ya ndoñe, pero cachiñe yochjésabama chamojinýe ora.

9 “Muentše canýe soye entsemna chë chca josértama chamojobenangbiana: chë bayabe canysëfta bestšaše endmëna canysëfta tjañe ndayiñe chë shembása entsetbemana; chë bestšašëngnaca mondmëna canysëfta mandadënga. 10 Chentsana, shachnëngbe amëndayana ya tonjochnëngo, canya mora entsetbemana jtsamëndayama y chë inýa cabá ndoñe tonjášhango. Y cha chaojášhango ora, ndoñe bënama cha queochaisemánda. 11 Chë tempo enjaniyena uabouana bayá pero mora ya ndoñe, endmëna chë canysëfta mandadënguentsana inýe mandado, pero chánaca chë inýe canysëftangcá endmëna y lempe pochocaná jtsemnama entsá.

¹² “Chë tconjinÿe bnëtsana tsëtjonëse mondmëna bnëtsana mandadënga, jamëndama cabá ndoñe tmonjójayenga; pero básefta tescama cánÿiñe chë uabouana bayáftaca, mando mo reyëngcá mochanjóyëngacñe. ¹³ Quem bnëtsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye. ¹⁴ Chë Oveshatembe contra mochántsejtsjanaye; pero chë Oveshatema echantsayënjaná, er chë Oveshatema endmëna nÿetsca amëndayëngbiamama chë más uámana Utabná y nÿetsca reyëngbiamama chë más uámana Rey. Chë bnëtsana mandadënga cháftaca mochántsejtsjanaye ora, cha chentse chabe entsángaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

¹⁵ Chë ángel mëntšánaca šonjaniyana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entsanga, enutanana entsanga, nÿetsca biyañe oyebuambnayënga y nÿetsca mándayëngbentša entsanga. ¹⁶ Y chë uabouana bayábeñe tcojinÿe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonÿaye; chabe cuerpentša mëntšena mochantsósañe y íñesheca mochántsejuinÿiye, chaopochocantscuana. ¹⁷ Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. ¹⁸ Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniyana.

18

Babilonia japochócamama

¹ Chentšana inÿe ángel sënjaninÿe, celocana enjétsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna. ² Chë ángel jabuache mëntšá enjétsichamo:

¡Ya mochantsepochóca, ya mochantsepochóca chë uámana pueblo Babilonia!
 ¡Chentse tojtsóbema diablëngbe oyeniñe,
 nÿetsca bacna espíritëngbe oyeniñe,
 y ndoñe tšabe y uaboyënja shloftšëngbe oyeniñe!

³ Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,
 mo chë bacna vida bomna shembásaftaca bacna soyënga cuafjamcá,
 mo puerte cuafjotmenangcá chë bacna vida bomna shembásabe vínoyeca.
 Nÿetsca luarënguentša mandadënga puerte bacna soyënga tmojama,
 mo chë shembásaftaca bacna soye cuafjamcá,
 y quem luarentša obuámnañënga y enënga, bomnënga tmojobiamama chentša entsanga yapa crocénana nÿe ndayíñnaca ntsejuabnaycá gástaye causa ca —cha enjétsichamo.

⁴ Chentšana, celocana inÿe oyebuambnayana sënjanuena, mëntšá enjétsichamo:

¡Chë bëts pueblentsana maisebocana!, tšëngaftanga chë atšbe entsanga šmomnënga,
 chë chentša entsanga mondbétsama bacna soyënga ndoñe chašmondétsamama,

ni chë chëngbioye japochócama soyënga tšëngaftangbiana cach ndoñe chaondëtsemnama.

⁵ Chënga tša bacna soyënga tmojama, tša bëtská nÿa mo celóntscoñe cuafjojut-jecá,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

⁶ Ntšamo chentša entšanga ínÿengbiana ndoñe tšabá tmonjamcá, chë entšangbiámnaca cachcá chaotsemna;

ntšamo tmojamama, cabá uta soye más cachca soye chëngbiana chaotsemna; ntšamo chentša entšanga ínÿenga chamosufrima tmojamcá, chëngnaca cachcá uta soye más chamosufrí.

⁷ Chënga corente jtsenábotamnayana y yapa crocénana nÿe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntsá jtsejuabnayana:

“Muentše mo reyëngcá mondëtbiámana.

Viudacá ngménaca ndoñe quemuátsmëna; tondayama quemochátssufrina ca.”

⁸ Chíyeca, canÿe ora pochócaye soyënga chëngbiana echanjóshjango:

jóbanama šocanënga, puerte ngménana y jabuache shëntsana,

íñsheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

⁹ Quem luarentša mandadënga, chentša entšángaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. ¹⁰ Chentšana bënoca mochanjoquéda antješna, chë uabouana castiguama auatja causa, y chentša entšangbiana mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiana, chë tša obenana binÿnentše!

Canÿe ora tšëngaftangbe castigo tojóshjango ca —mochánttsichamo.

¹¹ Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entšangbiana, er chora ya ndocná queochátsmëna chë chënga tmojúshjango soyënga chamobuámiñama:

¹² tmojúshjango castellano soyënga, medio soyënga, uámana y botamana ndëtšbenga, perlënga, uámana lino y shbuenda uafjatsenga entsáyá y sedéjua y uámana uabuángana entsáyá; nÿetsca botamana uanguëtše betiyënga, marfíloca pormana soyënga, uámana niñëšëngaca pormana soyënga, bronce soyënga, hierro y marmol soyënga; ¹³ bëtská canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnyënga, oveshënga, couayënga, cochëshangá y entšanga nÿets tempo nÿe ínÿabiana oservenëngnaca. ¹⁴ Y chë pueblentša entšangbiana mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna;

chë uámana y buashinÿinÿana soyënga y tša bomnana lempe šmojobuetše, y ndocna te más cachca soye quešmocháttsbomna ca!

¹⁵ Chë soyënga enënga, chë bëts pueblentša entšángbeyeca bomnënga tmojanobiamënga, bënoca mochanjoquéda antješna, chë bëts pueblentša

entsangbiana tša bēts castiguama auatja causa; mochanjošachna, puerte ng-menánaca mochántsemna. ¹⁶ Y mēntšá chentša entsangbiana mochanjayana: ¡Tša lastema, tša lastema tšēngaftanga chē uámana bēts pueblentše oyenēngbiana!

Chē enjáninŷna mo canŷe shembasacá, uámana lino entsějua uichētjoná, uámana shbuenda uafjatsenga y uabuángana entsayá uichētjoná, botamananá castellánoca, perlēnga y uámana botamana ndētšbēngaca.

¹⁷ ¡Y canŷe ora chabe tša bomnana lempe tojtsopochocá ca! —mochanjayana.

Nŷetsca chē barquēnguentša mándayēnga, chentša entsanga inŷe luaroye ajnēnga y chentša trabájayēnga, y nŷetscanga chē vida onguayiñe mar bėjayoca trabájayēngnaca, chentšana bēnocá mochanjoquéda antješna, ¹⁸ y chē bēts pueblo chaojtsangbototjuanentša ngona chamojinŷe ora, jabuache mochanjayana: “¡Quem uámana bēts pueblécá ndocna inŷe pueblo cachcá quenátsmēna ca!” ¹⁹ Chca chamojinŷe ora, ngménama bestšašiniŷe polvеше mochántsenotboto, y mēntšá mochántseyona ošachiyēnga y puerte cocht-setšenánēnga:

¡Tša lastema, tša lastema tšēngaftanga chē uámana bēts pueblentše oyenēngbiana!

Chentša bomnánaca bomnēnga tmojanobiana nŷetscanga chē mar bėjayoca barco bomnēnga.

¡Canŷe ora lempe tojtsopochocá ca! —chēnga mochántseyona.

Chora chē ángel tonjánayana:

²⁰ ¡Celoca oyenēnga móyejuanga

chē pueblo chca tojapasama;

y tšēngaftánagnaca móyejuanga, Bēngbe Bētsabe entsanga, Jesucristbe ichmónēnga y Bēngbe Bētsabe juabna oyebuambnayēnga, er chca jacastígase, Bēngbe Bētsá tojama chēnga chamosufrima, ntšamo tšēngaftanga chašmosufrima chēnga tmojanmcá ca! —cha tonjánayana.

²¹ Chentšana, canŷe ángel puerte obenana bomná, canŷe ndētšbé tonjanatsbaná, mo canŷe bēts nantsnēbé ndētšbecá, mar bėjayoye tonjanashbuetše y mēntšá tonjánayana:

Mēntšá, nŷe ndeolpe y jabuache, Babilonia chē uámana bēts pueblo mochántsetsatše,

y ndocna te más quem pueblo queochátsmēna.

²² Chentše, ndocna te más quemochátuenana

arpangá uabuástoyana, ni cantayana, flautēfjēnga y trompetēfjuangá cachndoñe;

ndocna te más quemochátsmēna obrerēnga,

ni chē nantsnēbeñe trabájayana quemochátuenana.

²³ Chentše, ndocna te más ndocna uajuinŷanēsha queochátšbinŷnaye,

ni casamento fiestentša enbouenanana quemochátuenana.

Er chē bēts pueblo chca mochantsepochoáca,

masque chentša obuámnañēnga y enēnga nŷets quem luarentše chē más bomnēnga monjamna,

y chentša bocjuanánaca nŷetsca luarēnguentša entsanga ingñénēnga monjamna ca —cha tonjánayana.

²⁴ Bēngbe Bētsá chca chē bēts pueblentše echanjama, er chentše tmojinŷena chē Bēngbe Bētsabiana trabájaye causa tmojanóbanēngbe buiñe; chē chabe juabna oyebuambnayēnga, chabe entsanga, y chē chábioye oservénama nŷets quem luarentše tmojtsēbayēngbe buiñe.

19

1 Chentšana celoca sënjanuena mo mallajta entšanga cuafsayebuachcá, mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entšanga tojatsebacá; cha puerte uámanana, buashinÿinÿana y mando endbomna,

² er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa, nyëts luarentša entšángnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca —chënga monjétsichamo.

³ Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyëtsca tescama chca echanjótsjuaye ca!

⁴ Y chora, chë uta bnëtsana y canta bëtsëjémënga amëndayënga y chë canta Ainënga tmonjanoshamentšé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntšá jayanëse: “¡Chca chaotsemna! ¡Bëngbe Utabná matschuanga ca!” ⁵ Y chë uámana puestentšana canÿe oyebuambnayana tonjanóbocna, mëntšá:

Bëngbe Bëtsá matschuanga, nyëtsca chabe oservénënga

y chë nyëtschangbiana cha chë más uamaná yomnama juabnayënga, básenga y bëtsétsanga ca.

Chë Oveshatembe casamento fiesta

⁶ Y sënjanuena mo mallajta entšangbe oyebuambnayancá, mo bëtscá béjaye cuafsobonjncá y mo bëts juesasanana shauenanancá; mëntšá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyëts obenana bomná tojontsé jamándana.

⁷ Puerte móyejuanga y mochjínÿanÿiye

Bëngbe Bëtsá puerte bëtsá y uamaná bëtsemnana,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

⁸ tmojalesenciá cha chauatíhëtjo uámana, nduatsenga uafjantse y uabuashinÿinÿana lino entšayá.

Chë shema entsinÿinÿná chë Bëngbe Bëtsabe entšanga;

y chë lino entšayá jtsichëtjonana entsinÿinÿná

chënga lempe ntšamo tšabá yomncá jtsamëse imoyena ca —chënga monjétsichamo.

⁹ Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófjanënga ca.’ ” Y mëntšánaca šonjaniyana: “Chca, ndegombre Bëngbe Bëtsabe palabrénga endmëna ca.”

¹⁰ As chabe shecuatšentše sënjanoshamentšé cha jadórama, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canÿe oservená sëndmëna, ntšamo aca condmëncá, y chë Crístbeyeca acbe catsátanga, ntšamo chabiana motatšëmbcá y chabe ndegombre palabrénga

nÿets tempo imabuayiynanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entšángbioye jábuayenama.

Chë fjantse couayiñe enjaquená

¹¹ Chora sënjáninÿe celoca atëfjniñe; canÿe fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye.

¹² Chabe fšñëbenga mo ñeshcá enjáninÿna, bestšašiniñe ba uabuashinÿinÿana coronëshangá enjanábomna, y canÿe uabaina chábeñe enjanábemana; nÿe cha chë uabaina yojanábuatma. ¹³ Cha enjanichëtjona buiñeca unëtjona entšayá y chabe uabaina enjamna “Bëngbe Bëtsabe palabra ca”. ¹⁴ Y chabe ústonoye monjétsajna mallajta soldadënga celoquënga, nduatsenga uafjantse y uámana lino entšayá uichëtjonënga, fjantse couayënguiñe enjaquenënga. ¹⁵ Chë enjëtsebnatsanabe uayoicana enjanóbocana canÿe puerta efšana espadëja, chë Bëngbe Bëtsábeñe ndošbuáchiyënga játatsetsama. Cha puerta obenánaca echántsamëndaye, mo canÿe hierro varëfjaquëcá. Cha echanjama entšángaftaca mo nda uvasëšangá juantsëtetjima tojtsabotajná ora cuafjamcá; y echanjama chënga chamotsebomnama chë puerta uabouana castigo, Bëngbe Bëtsá chë nÿets obenana bomná tbojetna causa. ¹⁶ Chabe uabonjaníyañe y chabe mëntjoca canÿe uabaina enjanábemana: “Nÿetsca reyëngbiana chë más uámana Rey, y nÿetsca amëndayëngbiana chë más uámana Utabná ca”.

¹⁷ Chentšana canÿe ángel sënjáninÿe, shinÿiñe enjétsatsana, chë celoca tsbanánoca nÿetsca monjanongüefjná shloftšënga jabuache mëntšá enjétsëtsësnaye: “¡Mabënga, menefjna chë Bëngbe Bëtsá tojaprontá bëts saná jasama; ¹⁸ chašmosama reyëngbe mëntšena, soldadënga amëndayëngbe mëntšena y valente entšangbe mëntšena, couayënga y chëngbeñe enjaquenëngbe mëntšena, y nÿetsca entšangbe mëntšena, cachëngbiana trabájayënga y nÿe ññyabiana nÿets tempo trabájayënga, básesenga y bëtsëtsanga ca!”

¹⁹ Chora atše sënjáninÿe chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jéntsjava. ²⁰ Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinÿanÿiyama; y cha chë soyëngaca tojanaingñé chë uabouana bayabe uinÿnanana soye chamuayentšajajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë ññeshca uafjajónayoye, chë azufre endëjuinÿinÿanentše. ²¹ Chë ññyëngbioyna tmontsanapochocá chë fjantse couayiñe enjaquenabe uayoicana enjanóbocana espadëjaca, y nÿetsca shloftšënga chëngbe mëntšënaca yapa tmontanoshachá.

20

Chë uaranga uata

¹ Chentšana canÿe ángel sënjáninÿe celocana entsanastjajuana chë corente asentoye tboca llavëfjaca, y canÿe bëts cadenëjua entsanëtvena. ² Chë ángel tbontsanbtá chë dragónbioye, chë tempsca mëtscuaye, chë Diablo

y Satanás endméná, y canye uaranga uatama tbontsanbátsēca. ³ Chē corente asentoye tboye tbontsantsatše, chentše tbontsanētame, y chentše bēsáša tsengájašeca tonjaninŷnaná, ndotatsēmbcá jatēfjuama ndocná chaondobenama; y chca, chē dragón ndoñe chaondobená jabocnama entšanga jáingñama, chē uaranga uata candochnēnguēntscuana; y chora, básefta tescama chē dragón mochanjētsboshjona.

⁴ Uámana puestēnga sēnjáninŷe, y chiñe tmonjanotbiama chē entšanga tšabá o ndoñe tšabá tmonjamama jayanama obenana tmojanóyēngacñēnga. Chē bestšaše jtsēstjanguēse tmojanóbanēngbe espíritēngnaca sēnjánanŷe. Chēnga chca tmojanóbana, Jesús tojánayana soyēnguiñe y chē Bēngbe Bētsabe buayenana soyēnguiñe sempre ošbuáchiye causa. Chēnga ndoñe tmonjanadorá ni chē uabouana bayá, ni chē chábioye jadórama pormana soye, y ndoñe tmonjanlesenciá chē bayabe uinŷnanana soye juentsaca o cucuatšīñe chamuayentsjajoma. Y sēnjáninŷe chēngna tmontanayena y Crísoftaca canye uaranga uatama montsanmánda. ⁵ Chē entšanga mondmēna chē natsanēnga jtayenama, pero chē tempo chē inŷe obanēnga ndoñe chemētētānayena, ndayá nŷe chē canye uaranga uata chentšana. ⁶ ¡Oyejuayēnga y Bēngbe Bētsabe entšanga, chē tmojtānayenēnga chē obanēnga chámuatayenama Bēngbe Bētsá tojanma ora! Chēnga ndoñe quenátamna chē nŷetsca tescama castigo jtsebomnana, ndayá Bēngbe Bētsá y Crístbioye mo bachnangcá chēnga mochántseservena, y Crísoftaca chē uaranga uatama mochántsemandaye.

Satanás japochócamá

⁷ Chē uaranga uata chaojochnēngo ora, Satanás chabe utámenocana mochanjētsboshjona; ⁸ y cha echanjábocna nŷets luarentša entšángbioye, chē Bēngbe Bētsabe soyēngama contra imomnēngbioye jáingñama, chē ntšamo Bēngbe Bētsabe contra Gog y Magog tempo ibojamncá imomnēnga. Satanás, chē entšanga echanjáchembo Bēngbe Bētsabe contra jéntsjava, y tša chēftanga cha echanjáchembo, nŷa mo chē mar bėjaye chēñŷoca cascajcá mochántsemna.

⁹ Chēnga nŷetscanga nŷets luarējana mochanjásjua, y chē Bēngbe Bētsabe entšanga oyenentše y chabe bonshana entšangbe bēts pueblo shēconana mochanjotsaye. Pero celocana iñe echanjatquécjana y chē Bēngbe Bētsabe contra imomnēnga lempe echántsjuinŷe. ¹⁰ Y Satanás, chē aingñayá, mochántsatmetše chē iñeshe y azúfreca uafjónayoye, ndayentše chē uabouana bayá y chē Bēngbe Bētsabe ndoñe ndegombre juabna oyebuambnayá tmontsanatmetše. Chentše bēts castigo nŷets tempo, bnēté y ibeta mochanjasufrina.

Chē obanēngbiama tmonjánayana ntšamo chēngaftaca jamama yojtsemnana

¹¹ Chentšana sēnjáninŷe canye bēts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjēmba, y ndócnentše más chenatanobinŷná. ¹² Y chē obanēnga sēnjánanŷe, bētsētsanga y básesenga, chē uámana puestentša natsanoica monjétsatsana; y chē librēsangá tmonjanētēfjo, y inŷe librēsanaca, ndēmuanŷēnga nŷetsca tescama tšabe vida mochjónŷenēngbe uabaina uabemana librēsa. Chē obanēngbiama tmonjánayana ntšamo chēngaftaca jamama yojtsemnana, cachēnga vida imojábomna ora ntšamo tmojéftsema soyēngaca, ntšamo chē librēsangañe yojanabemancá. ¹³ Chē mar bėjayoye tmojanóbanēnga choicana tmontanbocna, y chē obanēnga tmojanoquedanga luarēnguentshana tmontanbocna, y cada cánŷabiama tmonjánayana ntšamo cháftaca jamama yojtsemnana, cachēnga vida imojábomna ora ntšamo tmojéftsema soyēngaca.

14 Chentsana ya ndoñe más obenana quentétsemna entšanga chamóbanama chaomama, mo chë obenana chë ñesheca uafjajónayoye cuaftsëtsencá; quem ñesheca uafjajónaye endmëna chë nyetsca tescama castigo jtsebomnama luare; chë choca castigánënga jtsamnama yojsamnëngbiana entsemna mo chënga cachiñe cuafjatobancá; ¹⁵ y ndëmuanýengbe uabaina chë tšabe vida mochjónýenëngbe uabaina iuábemana librëšañe ndoñe yonjanabemana, chë ñesheca uafjajónayoye tmontsanatmetše.

21

Celoca tsmiñe y fshantse tsmiñe

¹ Chentsana atše sënjaninýe canýe celoca tsmiñe y canýe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentétsemna, y chë mar bėjaye chora cach tondaye. ² Sënjaninýe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábiocana celocana enjëtsostjajuana, puerte botamaniñe, mo canýe shembása puerte botamananacá, chabe boyá jábocnabiana. ³ Y chora canýe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšángaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. ⁴ Cha echanjama chënga ndocna te más ngmënënga chamondétsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnama y ndoñe más tsetšanana chamondétsebomnama; er ntšamo chënga entšangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

⁵ Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana ca.”

⁶ Chentsana šonjaniyana: “Lempe tonjochnëngo. Atše sëndmëna chë nyetsca soyënga bojatšayá y pochocayá, chë natsaná y chë ustonoyá. Mo nda tša uajuendayana tojtsebomná canýe bėjaye fshantsiñe obocanentšana cuafjofšecá, cachcá nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë nyetsca tescama yomna tšabe vídnaca, chca jtsebomnama chábioye tondaye ntsojtjañcá. ⁷ Nda nyetsca soyënguentšana tšabá chaojabocná mo ayëñjanayacá, lempe echanjóyëngacñe ntšamo atšbe entšángbioye jatšatayama tijašebuachenacá, y atše chabe Bëtsá chántsemna y cha atšbe uaquiñá. ⁸ Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiana puerte uaboyëñjanënga imomnënga, chë ínýengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nyetscanga bosterënga imomnëngbiamna, chënga entsamna chë ñesheca uafjajónayoca jasúfriana, chë azufre yojuinýinýanentše. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

⁹ Chentsana canýa chë angelënguentšá, chë canýsëfta copbenga bomnënga jútjena chë canýsëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinýinýiye chë tojobouamá shembása,

chë Oveshatembe shema ca.” ¹⁰ Y atše chë Uámana Espíritoftaca corente mandaná jtsemnëse, chë ángel šonjanánatse canye bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábiocana enjétsostjajuana. ¹¹ Chë bëts pueblo enjëtsebuashinÿinÿana Bëngbe Bëtsabe buashinÿinÿanánaca; enjëtsebuashinÿinÿana mo canye uámana botamana ndëtšbecá, mo jaspe ndëtšbecá, pero mo cristalca tëshinÿniñe. ¹² Chë bëts pueblo shëconana canye bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentše canye ángel, y chë bëshashangañe enjanábemana chë Israeloca bnëtsana uta bëts pamíllangbe uabaina. ¹³ Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. ¹⁴ Chë tapiëse enjanëcuatjona bnëtsana uta ndëtšbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

¹⁵ Chë ángel átšeftaca oyebuambnayá canye castellano juinÿnanëšëfja enjánatbëna jamedídama chë bëts pueblo, chentša bëshashangá y chentša tapiëse. ¹⁶ Chë bëts pueblo cach medida enjánbomna nÿets cantoica, cach medida tëntsoye y nÿanëjoye. Chë ángel chabe juinÿnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna. ¹⁷ Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

¹⁸ Chë tapiëse enjanpormana jaspe ndëtšbeca, y chë bëts pueblo ena castellánoca, tša chca nÿa mo cristalca tëshinÿniñe enjáninÿna. ¹⁹ Chë ndëtšbenga ndayiñe chë tapiëse enjanëcuatjona enjánbotamanana nÿetsca uámana botamana ndëtšbéngaca: canyebé jaspe ndëtšbeca, chë inÿebé zafíroca, chë inÿebé ágata ndëtšbeca, chë inÿebé esmeráldaca, ²⁰ chë inÿebé ónice ndëtšbeca, chë inÿebé cornalina ndëtšbeca, chë inÿebé crisólito ndëtšbeca, chë inÿebé berilo ndëtšbeca, chë inÿebé topácioca, chë inÿebé crisoprasa ndëtšbeca, chë inÿebé jacíntoca y chë inÿebena amatista ndëtšbeca. ²¹ Chë bnëtsana uta bëshashangá enjuamna bnëtsana uta perlënga; cada bëshasha nÿe canye pérlica uapormanësha. Y chë más bëts tsáshenëjana enjamna ena castellánoca; mo cristalca tëshinÿniñe enjáninÿna.

²² Chë bëts pueblentše ndocna Bëngbe Bëtsabe bëts yebna chiyátaninÿe, er Bëngbe Utabná, chë Bëngbe Bëtsá nÿets obenana bomná y chë Oveshatema chentše bonjamna, y chata nÿetscangbiana chë bëts pueblentše ndayéntšnaca adoránata bonjëtsemna. ²³ Chë bëts pueblentše ndoñe quen-jatsiyta shinÿe o juashcona chaotsebínÿnaye, er Bëngbe Bëtsabe buashinÿinÿanana chentše enjëtsebinÿnaye, y chë Oveshatembe buashinÿinÿanana mo uajuinÿanëshacá enjamna chë bëts pueblama. ²⁴ Chentša binÿnayánaca, entšanga nÿetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. ²⁵ Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna. ²⁶ Chë bëts puebloye mochanjiyëbo chë nÿetsca luarënguentša entšangbe uámana y bëts soyënga, y chë nÿetsca luarënguentša entšangbeñe bëtšëtšanga y uámanënga iuabiamná soyëngnaca. ²⁷ Pero ndocna te queochatómashëngo ndayánaca, y chë soye chaotsama entšanga ndoñe tšábenga chamotsemnama Bëngbe Bëtsá jadórana; ni ndocná queochátamashëngo, Bëngbe Bëtsabiana nÿa tondayama ogustana soyënga amá o ínÿengbioye jáingñama soyënga amá. Choye mochanjámashjna nÿe

chë ndëmuanyëngbe uabaina yojtsábemana chë Oveshatembe librësañe, chë nyetsca tescama tšabe vida mochjónyëngbe uabaina uábemanentše.

22

¹ Chë ángel šonjaninýinýé chë enjanobějna bėjaye vida bomniye. Chë búyeshe enjamna ndëtsenguiye y tëshinýniye mo cristalca. Enjanóbocana chë Bëngbe Bëtsá y chë Oveshatembe uámana puestocana, ² y chë más bëts tsashená tsëntsajana enjanobějna. Chë fshajayentša catoica lado enjanójuajna betiyeshënga chë nyetsca tescama yomna tšabe vida jtsebomnama, canýe uatiñe bnëtsana uta soye jashájonana, canýe cada shinýe; chë betiyeshentša tsbuanáchënga josérviana nyetsca mándayëngbentša entsanga jáshnama. ³ Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana. ⁴ Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye. ⁵ Chentše ndocna ora ibeta queochátsmëna, y chentša oyenënga ndoñe queochátëjaboto canýe uajuinýanësha o shinýe chaotsebínýnaye, er Bëngbe Bëtsá Bëngbe Utabnabe buashinýinýanana chëngbiama echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

Jesucristo jésabama entsobeco

⁶ Chentšana chë ángel šonjanianya: “Quem palabrënga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oye-buambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbiöye jinýanýiyama ndayá betscó yojtsemna jopásama ca.”

⁷ Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librësañe entsábemana ca.”

⁸ Atše Juan, chë soyënga sënjanuena y sënjáninýe. Y chca sënjanuena y sënjaninýentsana, chë chca šonjaninýinýé ángelbe delante atše sënjanoshamentsé, cha jadórama. ⁹ Pero cha šonjanianya: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyebuambnayënga y nyetscanga chë ndayá quem librësañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntsánaca šonjanianya: “Ndoñe mo iytëmencá catjáboshjona ndayá quem librësañe entsabemancá, chë ndegombre jochnënguama soyënga, er chca jopásama chë tempo ya entsobeco. ¹¹ Cachcá monýá chë bacna entsá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nyets tempo nyets ainánaca chábioye chabotseserverna ca” —cha šonjanianya.

¹² Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona

tšëngaftanguentsábioye chanjoyiye ndayá tojamama ntšamo tbojtsomerecencá. ¹³ Atše sëndmëna chë nyetsca soyënga bojatšayá y pochocayá, chë natsaná y ustonoyá, chë ndábeyeca y ndabiana lempe yomna ca” —šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebmomnama uacanánana jashjáchama, mo chë nyetsca tescama yomna tšabe vida jtsebmomnama betiyeshentsana cuaftsescacá, y mochanjobenaye chë tsëm bëts puebioye bësásajana tšabá jamashjnama. ¹⁵ Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿënga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

¹⁶ Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davidbentsana Entšá. Atše sëndmëna mo chë bínÿanoye puerta bínÿnaye estrellcá ca.”

¹⁷ Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebmomna, tojabo y bëtscá bėjaye cuafjofšecá, cachcá nda tša tojtseboše Jesusbe soyënga jtsebmomnama, chábioye chaobeconá y cha echanjama chë soyënga cha chaotsebmomnama y chë nyetsca tescama yomna tšabe vídnaca, chca jtsebmomnama tondaye ntsotjañcá.

¹⁸ Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. ¹⁹ Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nyetsca tescama yomna tšabe vida jtsebmomnama betiyeshentsana y chë tsëm bëts pueblentsana, chë ndayama quem librëšañe entsábemana.

²⁰ Quem soyënga oyebuambnayá, chë lempe ndegombre echantsemnana tonjayaná, atše, Jesús séntsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

²¹ Bëngbe Utabná Jesús chaoma tšabe bendicionënga tšëngaftangbeñe chaotsemnana.